

# **O UELHIRE UAIA**

**The New Testament in  
the Nehan language of  
Papua New Guinea**

**Nupela Testamen long  
tokples Nehan long Niugini**

# O UELHIRE UAIA

The New Testament in the Nehan language of the Autonomous Region of  
Bougainville, Papua New Guinea  
[nsn]  
Translation by Wycliffe Bible Translators

© 2011 Wycliffe Bible Translators, Inc.

Print publication, 2011 by Wycliffe Bible Translators

Web version

© 2014, Wycliffe Bible Translators, Inc.

<http://www.Wycliffe.org>

<http://pngscriptures.org>

<http://www.ScriptureEarth.org>



Creative Commons license (Attribution-Noncommercial-No Derivative Works)

<http://creativecommons.org/licenses/by-nc-nd/3.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

## Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narapela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long

<http://creativecommons.org/licenses/by-nc-nd/3.0>.

Sapos yu gat askim long dispela, **plis askim mipela.**

# Hanganar Bobolobo i Lolono tar Timuhur Uelhote:

*Kaman*

O Uelhire Uaia ke boloin Matiu Matiu . . . . .	.Mat . . . . . 5
O Uelhire Uaia ke boloin Mak Mak . . . . .	.Mak . . . . . 91
O Uelhire Uaia ke boloin Luk Luk . . . . .	.Luk . . . . . 142
O uelhire uaia ke boloin Jon Jon . . . . .	.Jon . . . . . 229
Aposoul Aposoul . . . . .	.Apo . . . . . 293
O bolobolo ke boloin Poul tasir tamat i Roum Roum . . . . .	.Roum . . . . . 373
O uakikilana ro bolobolo ke boloin Poul tasir tamat i Korin 1 Korin. . . . .	.1Ko . . . . . 411
O uatorikina ro bolobolo ke boloin Poul tasir Korin 2 Korin. . . . .	.2Ko . . . . . 445
O bolobolo ke boloin Poul tasir tamat i Galesia Galesia. . . . .	.Gal . . . . . 468
O bolobolo ke boloin Poul tasir tamat i Epeses Epeses . . . . .	.Epe . . . . . 482
O bolobolo ke heirin Poul tasir tamata gera tagorong mana tang Kristo i Pilipai Pilipai . . . . .	.Pil . . . . . 495
O bolobol o la tasir tamat tar pang uan i Kolosi Kolosi . . . . .	.Kol . . . . . 505
O bolobolo ke heirin Poul tasir tamata gera tagorong mana tang Kristo i Tesalonaika 1 Tesalonaika . . . . .	.1Te . . . . . 514
No uatorikina ro bolobolo Poul tasir tamat i Tesalonaika 2 Tesalonaika . . . . .	.2Te . . . . . 522
O uakikilangana ro bolobolo ke boloin Poul tang Timoti 1 Timoti . . . . .	.1Ti . . . . . 527
O uatorikina ro bolobolo ke boloin Poul tang Timoti 2 Timoti . . . . .	.2Ti . . . . . 538
O bolobolo ke boloin Poul tang Taitus Taitus . . . . .	.Tai. . . . . 546
O bolobolo ke boloin Poul tang Pilimon Pilimon . . . . .	.Plm . . . . . 551
O bolobol o la tasir Hibru Hibru . . . . .	.Hib . . . . . 554

O Bolobolo ke boloin Jems			
Jems . . . . .	.Jas.	. . . . .	.582
O uakikilangana ro bolobolo ke boloin Pita			
1 Pita . . . . .	.1Pi.	. . . . .	.592
A uatorikina ro bolobolo ke boloin Pita			
2 Pita . . . . .	.2Pi.	. . . . .	.603
A uakikilangana ro bolobolo ke boloin Jon			
1 Jon . . . . .	.1Jo	. . . . .	.610
O uatorikina ro bolobolo ke boloin Jon			
2 Jon . . . . .	.2Jo	. . . . .	.619
A uatouonono ro bolobolo ke boloin Jon			
3 Jon . . . . .	.3Jo	. . . . .	.621
O bolobolo ke boloin Jud			
Jud . . . . .	.Jud	. . . . .	.623
Uatuetete toro Uelhire Uaia geko ou			
O Uelhire geko ou . . . . .	.UGO.	. . . . .	.627

# Matiu

## O Uelhire Uaia ke boloin Matiu

### No bolobolo Matiu

O Uelhire Uaia rone tang Matiu o moko teil tar timuhur uelhote. Matiu e ate uaia tun toro tar uelhote ger pensioun. Sioun God ke umatoto tasir tamata ra kilais o propeit tar bolo uahiuu tar inetenit i uoum. O bureher propeit ka mene uelhir sira tena niuangoul Iesu, doh na kalekinale. A mamang inetelik geka bolo uahiuuagir propeit sioun ke pokoso sira tun tena binaka Iesu ke uangoul pe tar uanene i kot. Matiu ke hire uakalahara tun tar puhonene mare ualasira tun pare, Iesu ter Kristo. (A tenkanar puhene 'Kristo e kulo pare,' Na Toia God.' O propeit ka hire pare, Kristo e turung uelkarus tur tagigeig tenagi niguata uasa.)

O Uelhire Uaia rone tang Matiu o ueluatata tena niuangoul Iesu. Matiu ke bolo uahiuu tar inete ke ualasiraig Iesu. No bolobolon e moko teil pono na menmene Iesu toro Matiu mahar 5-7. A menenenina ra kilaig pare, 'A niualasir ger niualasira to tar siusan.'

O Uelhire Uaia tang Matiu o hire uakalahara pono pare, Iesu ke uauia tasir bureher tamata res mat. Iesu ke guata tasir kut ka banga tapokis (Mat 20.29-34). Ke guata tasir kamelongo ka longor huara tapokis (Mat 11.5). Kare luaka liu tasir tamata gesir nihikung liouan (Mat 8.28).

Bo o gisiamehe pukur tamatasitier keiping uleik ke tokouasais tang Iesu. Ka tung pous to tang Iesu tar korose. Bo Iesu puk ke ate teil pare, a puhon e turung pokos (Mat 16.21). O poropeit ka bolo uahiuo pare 'Kristo e turung mat (Aisaia 53; Mat 12.40). Tar binaka ke mate Iesu, inggono ke kale tar uelmahing teregi niguata uasaig (Mat 26.28).

Bo Iesu puk ahik pah ke mate dede, God ke uatua tapokis tatanon (Mat 28). Doh Iesu a tua daan i Heuen.

**Matiu ke ueluatata tasir tamatang Ju toso bunguna Iesu Kristo**

**1** <sup>1</sup> <sup>a</sup>Gine teka uakekene pe me ro bubunguna Iesu Kristo.  
Inggono ke la tur toso bunguna Debit. Debit ke la tur toso  
bunguna Abraham.

<sup>2</sup> Abraham te tamana Aisak.

Aisak a tamana Jekop.

Jekop te tamana Juda meso bung tahin.

<sup>3</sup> <sup>b</sup>Juda te tamas Peres me Sera ara tinas tang Temar.

Peres te tamana Hesron.

Hesron a tamana Ram.

<sup>4</sup> Ram te tamana Abinadab.

Abinadab a tamana Nason.

Nason te tamana Salmon.

<sup>5</sup> <sup>c</sup>Salmon a tamana Boas, doh Boas tinana tang Rehab.

Boas a tamana Obed ge tinana tang Rut.

Obed te tamana Jesi.

<sup>6</sup> <sup>d</sup>Jesi a tamana Toia Debit.

Debit te tamana Solomon.

Solomon tang tinana na kuaha baka uoum Uraia.

<sup>7</sup> Solomon te tamana Rehoboam. Rehoboam te tamana Abia.

Abia a tamana Asa.

<sup>8</sup> Asa te tamana Jehosopat.

Jehosopat te tamana Jehoram.

Jehoram a tamana Usaia.

<sup>9</sup> Usaia te tamana Jotam.

Jotam a tamana Ahes.

Ahes te tamana Hesekaia.

<sup>10</sup> Hesekaia a tamana Manase.

Manase te tamana Amon.

Amon a tamana Josaia.

<sup>11</sup> <sup>e</sup>Josaia te tamana Jehoiakin meso bung tahin. Tar binakonene o  
tamata ka keip liu turis i Israel ka la i Babilon.

<sup>12</sup> <sup>f</sup>I muduhia tar binaka ka keip liu turisir Israel ka la i Babilon.

Jehoiakin te tamana Sealtiel.

Sealtiel a tamana Serubabel.

<sup>13</sup> Serubabel te tamana Abiub.

Abiub a tamana Eliakim.

<sup>a</sup> 1.1 Uak 22.18; 1OUTT 17.11 <sup>b</sup> 1.3 Uak 38.29-30; Rut 4.18-22 <sup>c</sup> 1.5 Rut 4.13-17

<sup>d</sup> 1.6 2Sa 12.24 <sup>e</sup> 1.11 2To 22-24; 2OUTT 36.10; Jer 27.20 <sup>f</sup> 1.12 Esr 3.2

- Eliakim te tamana Asor.  
 14 Asor a tamana Sadok.  
 Sadok te tamana Akim.  
 Akim a tamana Eliud.  
 15 Eliud a tamana Eleasar.  
 Eleasar te tamana Matan.  
 Matan a tamana Jekop.  
 16 Jekop a tamana Josep.  
 Josep na bulout Maria,  
 doh Maria te tinana Iesu gera kilain Kristo.<sup>s</sup>

17A siokor hangaul, doha toueitinguampe ro bubunguna ko uakekene tur pe tang Abraham ko me lame tang Debit. Doha siokor hangaul doha tang toueit ponompe ro bunguna tang Debit e tuka ka keip liu tur peisir tamat i Israel ka la i Babilon. Doh tar binakonene ka keipisisin i Babilon, a siokor hangaul doho toueit ponompe ro bunguna tamat e tuka ka poho pein Kristo.

#### Tar binaka ka pohoin Iesu Kristo

18<sup>h</sup>Gine te hape ke kotpokoso pe Iesu Kristo. Maria tinanon a niuamatoto tar le tang Josep. Bo tar binaka puk halana rasina tura le, Maria ka ate manasain pare, ke balakoso to tena nitampopokohor Iabena Dedeil. 19Teene kompe a tamata uaipe na bulout Maria, Josep, maeit ke marang hiliu uanomo kompe tatanon. 20Tar binaka re namana Josep tar ineteninanine na anggelour Tamata Noman ke kotpokoso tatanono toro borborian. Ke kular anggelou pare, “Josep, Ingga ter bunguna Debit, ahik paho sokoro tar kale tang Maria pare, nang kuah, ge a keketik pe e la tatanon e la tur tar Iabena Dedeil. 21<sup>i</sup>Inggon e turung poho tar keketik bulout, doh ingga o turung uelkila tatanono tang Iesu, teene inggon e turung uelkarus tur tasir tamata tenas niguata uasa.” 22A mamang inetelikinanine ke kotpokoso sira tun tar uakalahara tar haua ke kulameigir Tamata Noman tasir propet,

- 23 “Ualongor! A kuah ahik pah ke uangoul keip me bulout e turung balakos,  
 kare turung poho tar keketik bulout,  
 kara turung uelkilain tang Emanuel.” *Aisaia 7.14; 8.8,10*  
 A puhon e kula pare, “God e uangoul tagu tagigeig.”

<sup>s</sup> 1.16 A tengkanar puhene “Kristo” e kula pare, “A tang siokor tamatar nikedang ke uamatotoin God tar me uelkarus tasir tamat.” <sup>h</sup> 1.18 Luk 1.27,35 <sup>i</sup> 1.21 Luk 1.31; 2.21

<sup>24</sup>Binaka ke gulete Josep, ke guata sira manasampe ke kula pe na anggelour Tamata Noman, kare kale tang Maria pare, na kuah. <sup>25</sup><sup>j</sup>Bo inggono puk ke uangoul uadedeil keip tatanon e tuka ke la poho peono tar keketik bulout. Doh Josep ke uelkila tatanono tang Iesu.

### O tamatang iate ka me banga tang Iesu

**2** <sup>1</sup>I muduhia ka poho to pein Iesu i Betlehem tar pang uan i Judia, tar binaka re toia Herot, o tamatang iate ra la tur tar butur re harhara turuhar pisara ka me pokos i Jerusalem. <sup>2</sup><sup>k</sup>Kara me dangata pare, “Ia kaeinir guama geka pohoin nas turung toiar Ju? Inggeim king bang huara tena pitopitono tar butur re uoto hara turuhar pisar, temaeit king lame tar me uatakai tatanon.”

<sup>3</sup>Tar binaka ke longoro Herot tar puhon, inggono ke hagouo uasa, meniangua ponompe tasir Jerusalem. <sup>4</sup>Herot ke kila toto tosnosio mamahoholikir pater, doho tamatang ualualasira tar ualatut, kare dangata tasisina ia ra turung poho toin Kristo. <sup>5</sup>Kara hiresina pare, “I Betlehem tar pang uan i Judia.” Teka hire pesin, “Ge teenina penine ka bolo uahiuagir propet pare,

<sup>6</sup> “Bo ingga Betlehem, tar pang uan i Judia,  
ingga ahik pah ter uadouhinar uan toro uan uleik i Judia. Ahik tun.  
Teene a tamatang uoum keip e turung la tur totomua,  
doh inggon e turung kaukaueke tosnogo tamatang Israelo.’ ”

*Maika 5.2; 2 Samuel 5.2*

<sup>7</sup>Doh Herot ke kila toto uanomo tasir tamatang iate, kare heheke tasisina tar binaka tun ka bang huara uakekenesina tar pitopit. <sup>8</sup>Kare kulono tasisina ra la i Betlehem, kare kula pare, “Mu la, karung la sir uaia tar keketik, doh getung tuparoum tatanon, inggoum mung me hire tapokis totoguo maru la pono, karu la hatup, karu uatakai tatanon.”

<sup>9</sup>I muduhia ka ualongoro per tamatang iate tang Herot ger toia, kara la manasampe. Doha pitopit geka banga tolaisisina tar butur re harhara turuhar pisara teke uoum keip tasisin, e tuka ke la toko uamatoto peono tar butur re uangoulinir keketik. <sup>10</sup>Tar binaka ka bang huarar tamatang iate tar pitopit ka uahauahantiehe tun. <sup>11</sup><sup>m</sup>Ka lamesina tar uma gere uangoulinir keketik, kara banga tatanono me tinan Maria, kara baka uahiuais i kot tar uatakai tatanon. Song ka pukusina tar ineteng uauah, kara heir tatanono tar goul,<sup>n</sup> doha adua, doha uaiuai amiamuh. <sup>12</sup>Bo God

<sup>j</sup> 1.25 Luk 2.21    <sup>k</sup> 2.2 Aha 24.17    <sup>l</sup> 2.6 Jon 7.42    <sup>m</sup> 2.11 Ker 72.10-15; Ais 60.6    <sup>n</sup> 2.11 A goul a giamehe siokor pang haen a iauiuel, doha bulauana i ranantieh. Tena binaka Iesu a mani ka tuha keipin tar goul.



puk ke uahire toro borboriana tasisin, ahik pah ra tapokis tang Herot, maeit ka la tapokisisina tenas uan, bo ka uelhir puk tar giameher lel.

### **A toking tinana Iesu kura keip tatanon i Isip**

<sup>13</sup>I muduhia ka hiliu baka per tamatang iate, na anggelour Tamata Noman ke me pokoso tang Josep toro borborian, kare kula pare, “Tentur, karo kale tar keketik me tinan, karung ualo liuila i Isip, ge Herot pe e turung sir tar keketik mare uiliatung pous tatanon. Uangoul i Isip e tuka getu hireo totomua tar tapokis.” <sup>14</sup>Maeit Josep ke kale tas ramatina nar bounгон, kara la manasampe i Isip. <sup>15</sup>°Doh Josep ke uangoul i Isip e tuka ke mate baka pe Herot. A puhonene ke kotpokoso sira tun tar puh ke kulainir Tamata Noman tasir propet, “Inggo ku kila tauete liu tur tar tug i Isip.”

### **Herot ke uiliatung pous tasir keketik bulout**

<sup>16</sup>Tar binaka ke ate Herot pare, o tamatang iate ka longlongoro boho tatanon, inggono ke nimaliana uasa tun. Temaeit ke hireono tar puhung kula pare, o keketik buloutusis ra uangoul i Betlehem ue gisis ra uangoul uiloho tar buturuon, geka torik uoum res krismas ue o keketik uain, ra uiliatung pousis. Herot ke ate tur teres krismasir keketik tasir tamatang iate ke heheke baka pe tasisin. <sup>17</sup>Tar binakonene a puh ke kotpokoso noman, ke kulamein propet Jeramaia pare,

<sup>18</sup> “A alialinginar kirkiring, kara uelmahing,  
kara niueldolomo uleik ka longoroin i Rama.  
Retiel<sup>p</sup> e kiring toso bung tun,  
kare de mata ualabukin, teene ka mata pe ro bung tun.”

*Jeramaia 31.15*

### **Josep me Maria kura tapokis keip tang Iesu**

<sup>19</sup>I muduhia ke mate baka pe Herot, na anggelour Tamata Noman ke menmene tang Josep toro borboriana tar binaka ra uangoul harahaisin i Isip. <sup>20</sup>Ke kulonor anggelou pare, “Tentur, kale tar keketik doh tinan, karung la tar pang uan i Israel, ge o tamata pe geka marang uiliatung pous tar keketik ka mate manas.” <sup>21</sup>Temaeit, Josep ke kale tar keketik, doh tinan, kara la manas i Israel.

<sup>22</sup>Bo ke longoro pukuono pare, nu Akeleus tere toia i Judia teene ke mate pe Herot ge tamanon. Temaene Josep ke sokoro mate la tar buturuon. I muduhia ka uahire peono toro borborian, inggono ke la tar pang uan i Galili <sup>23</sup><sup>q</sup>tar uan i Nasaret teka la uangoulusin. Temaene a

---

° 2.15 Hos 11.1    <sup>p</sup> 2.18 Retiel na kuaha Jekop ka mene uatuha tolain toso bung tinasin Israel.    <sup>q</sup> 2.23 Ais 11.1; 53.2; Luk 2.39; Jon 1.45

haua ke kulamein God tasir propet ke kotpokoso noman, “Inggono ra turung kilain a peng Nasaret.”

### Jon ger tang uahuhu ke kaleuatoro tena leler Tamata Noman

**3** <sup>1</sup>Jon ger tang uahuhu ke uakekene tar uelhire tauete to tar butur paden i Judia. <sup>2</sup>Kare kula pare, “Uapalih tenami niguata uasa, karung lame tang God, ge a Nitoiang Heuene pe ke uahuhut manasain.” <sup>3</sup>Doh Jon ger tang uahuhu, teonene ke menmenemein Aisaia ger propet tar binaka ke kula pare,

“Gine ter uauanar tang siok e kula ualeikala tar butur paden.  
‘Kaleuatoro tena leler Tamata Noman. Guata tar lel,  
e kodkodoho tar binaka re lameon.’ ”

*Aisaia 40.3*

<sup>4</sup>Na hikhiku Jon a nituha tar ulunar kamel, doh inggon e uoto pus tar kapokonor bulumakau. Na nieinon, o kakaring doho hani<sup>t</sup> roke. <sup>5</sup>O bureher tamata ka la turume i Jerusalem dohi Judia doh gisila uiloh tar kodom i Jodan tar me ualongoro tang Jon. <sup>6</sup>Gisina ka uelhire tauete tenas niguata uasa, doh inggono ke uahuhu tasisina tar kodom i Jodan.

<sup>7</sup>O bureher tamata uleikin tasir Ju ra kilais o Parisi, doho Sadiusi ka lame tar butur re uahuhu to Jon tasir tamata mara uahuhu ponois. Bo tar binaka puk ke banga Jon tasisin, kare kula pare, “Inggoum o soi uakap! Mai ke uahire tamiuoum tar ualo liu tanika tena nimalianana Godeit re turung lame? <sup>8</sup>Guata me inete gere ualasira uakalahar tasir tamata pare, inggoum kung uapalih tenami niguata uasa. <sup>9</sup>Doh ahik pah mung namana pare, e siauasium tena nimaliana God, teeit rung kula katongo pesium pare, Abraham a tamamiueim. Inngo gine ru hire tamiuoum, God e banotong uakotpokoso tur mo bunguna Abraham tar paluanine. <sup>10</sup>Wine daan a kangan e uahuhutung tokout uahiuu tar douk, doha mamang doukulikinit ahik pahe uoto ua me niein uaia ra oboroig, kara bakalaig toro hue.”

<sup>11</sup><sup>x</sup>Inngo u uahuhu keip tamiuoum tar kodomo tar ualasira pare, inggoum kung uapalih tenami niuangoul, kara niguatanitir sa. Bo a tang sioko puk e la uakelukume, inggon a i rana uain na nitampopokoho totoguo, bo inggo puk ahik paha tamata uaia tar kabkaba teil tena suon. Inggon e turung uahuhu keip tamiuoum tar Iabena Dedeil doho hue. <sup>12</sup>Inggon e uadelauana tena uatunar raes-uit<sup>9</sup> pare, inggon e turung kedanga liu tur tar kukuananar raes-uit tar

<sup>r</sup> 3.2 Mat 4.17; Mak 1.15    <sup>s</sup> 3.4 2To 1.8    <sup>t</sup> 3.4 hani, a teisir hoh, a lingiantiehe tun misianar suga.    <sup>u</sup> 3.7 Mat 12.34; 23.33    <sup>v</sup> 3.9 Jon 8.33,39; Roum 4.12    <sup>w</sup> 3.10 Mat 7.19; Luk 13.6-9    <sup>x</sup> 3.11 Jon 1.26-27,33; Apo 1.5    <sup>y</sup> 3.12 A raes-uit a giniamehi siokor garas. A plaua, doha bereit ka tuha turig tar kukuananin.

mongmongonor raes-uit, kare uamokola tar kukuananar raes-uit tena umang raes-uit, bo e turung ualuh pukuono tar mongmongonor raes-uit toro hue ge ahik paho banotong lomoh.”

### Iesu ka uahuhuin

<sup>13</sup>Tar binakono ke la turume Iesu i Galili, kare me lako tar kodom i Jordan mare me uahuhu Jon tatanon. <sup>14</sup>Bo Jon puk ke de mate uahuhu tatanon, kare kula pare, “Ingga deh pake tero uahuhu totoguo. Ae maene ro lamea totoguo?” <sup>15</sup>Bo Iesu puk ke kula pare, “Guata sira kompeene ru kula peo, ge raeig pe ira guata tar ineter kodkodoh.” Song ke guata sira Jon ke kula peon.

<sup>16</sup><sup>z</sup>Gitie ka uahuhu pein Iesu, doh tar binaka re puraka turuhaono tar laur, i Heuene ke takapuk, doh inggono ke banga tena Iabena Dedeil God ke la uahiu siraha tar baluh, kare me tok i rana tatanon. <sup>17</sup><sup>a</sup>Doha puhung uelhire ke la turuha i Heuen, e kula pare, “Gine ter tuguo geru malaelhirintiehe tunin, karu uahantiehe tun tatanon.”

### Satan ke uatolaua tang Iesu

**4** <sup>1b</sup>Doh tar binakon a Iabena Dedeil ke keip tang Iesu tar butur paden mare la uatolaua to Satan tatanon. <sup>2c</sup>Doh Iesu ahik mate ein tar toueitir hangaulur marein, doha toueitir hangaulur boung. I muduhia inggono ke gogo manas. <sup>3</sup>Doha tamatang uatolaua ke pokoso manas, kare me kula tatanono pare, “Ge para tuna God nomana, kula toro palaua rone o uapalihin toro bereit.” <sup>4</sup>Bo Iesu puk ke kula pare, “Ahik. A nibolo uahiu dehono tono uelhire God pare,

‘A tamat ahik pahe tua to puk re ein pe toro bereit,  
bo e tua to tar mamang uelhirelik ke kulaig God.’ ” *Ualatur 8.3*

<sup>5</sup>Doh Satan ke keip poluk tang Iesu tar uan uleik i Jerusalem, kare la uatur tatanono tar butur a i ranana tar umang lotu ger dedeil. <sup>6</sup>Doh Satan ke kula pare tatanon, “Ge para tuna God nomana, siaka uahiuako i kot, ge a puh pe a nibolo uahiu tono uelhire God pare,

‘Inggon e turung hire tosno angelou ra turung kaueke totomua.  
Doh gisina ra turung uasangana totomua tar limas  
mara hikia pahe tukainir kekeim mo palau.’ ” *Ker 91.11-12*

<sup>7</sup>Bo Iesu puk ke kula pare tatanon, “A puh pon e moko tono uelhire God pare,

‘Ahik paho uatolaua tar Tamata Noman, a God a noumua.’ ”  
*Ualatur 6.16*

<sup>z</sup> 3.16 Jon 1.32    <sup>a</sup> 3.17 Ker 2.7; Ais 42.1; Mat 12.18; 17.5; Luk 9.35    <sup>b</sup> 4.1 Hib 2.18; 4.15  
<sup>c</sup> 4.2 KT 34.28

<sup>8</sup>Doh Satan ke keip poluk tang Iesu tar lulunar siusan a i ranantieh, kare ualasira tatanono toro mamang uana uleik uakapa tunane tar kot, karo nitampopokoh, kara niuiana toro pang uanininanine. <sup>9</sup>Kare kula Satan pare, “Geto hatup uahiuu, karo lotu totoguo, inggo u siokor heir tar mamang inetelikinine totomua.” <sup>10</sup>Doh Iesu ke kula pare tatanon, “Satan, uareing totoguo! Ge a puh pe a nibolo tonu uelhire God pare,

‘Inggoum mung lotu tar Tamata Noman nami Godoum,  
karung longoro kompe tatanon.’ ”

*Ualutut 6.13*

<sup>11</sup>Song ke hiliu Satan tang Iesu, doho anggelou ka lame, kara me kaueke tatanon.

### **Iesu ke uakekene tena kalekinale i Galili**

<sup>12</sup><sup>d</sup>Tar binaka ke longoro Iesu ka uamoko pein Jon tar uih, kare tapokis i Galili. <sup>13</sup>Doh inggono ke hiliu tar uan i Nasaret, kare la uangoul i Kaperneam, a uanon e tok i tektekene tar kodomo uiluiloh i Galili, tonosio mahar koto ra bungus Sebulun me Naptali. <sup>14</sup>Iesu ke guata tar puhonene mare kotpokoso sira tunur puh ke kulain God tang propet Aisaia pare,

<sup>15</sup>“Inggoumeitir tamata toro mahar koto ro nas Sebulun me Naptali tar lele re lako i teh tar pang giamehenar kodom i Jordan, toro mahar kotong Galili gera uangoulur bureher tamatasit ahik paho Ju

<sup>16</sup>gerung uangoul tar kitupun,  
inggoum kung bang huara manasa tar uleikir luh,  
doh tamiuoumeit rung uangoul tar kitkitupun  
a luh ke kotpokoso manasa tamiuoum.”

*Aisaia 9.1-2*

### **Iesu ke uakekene tar kila tosono tamatang uakuakeluk**

<sup>17</sup><sup>e</sup>Tar binakonene Iesu ke uakekene tar uelhire tauete pare tasir tamat, “Upalih tar niguata uasa doh tenami niuangoul, ge a Nitoiang Heuene pe ke uahuhut manasin.”

<sup>18</sup>Gitie ke latlatei pela Iesu i tehe tar kodomo uiluiloh i Galili, kare bangangua tas nu Saimon gera kilain Pita me nu Andru, rasina ramamahialik ura bakbaka tenasira uben, ge a toking tamatang uekih pe rasin. <sup>19</sup>Doh Iesu ke kula pare tasrasin, “Mura uakelukuhane totoguo maru ualafir tamiraoum tar reihime tasir tamata tar la tang God.” <sup>20</sup>Doh rasina kura hiliu ualahurungua tenasira uben, kaura uakeluk tang Iesu.

<sup>d</sup> 4.12 Mat 14.3; Mak 6.17; Luk 3.19-20    <sup>e</sup> 4.17 Mat 3.2; 19.27

<sup>21</sup>Gitie ke la uain pela Iesu, kare bang huarangua poluk tar toking gisimeher ramamahialik, rasina tes nu Jems me Jon, a toking tuna Sebedi, rasin ura panete teil tar bout menia tara tamas, doh gisina ra uma uaia tenas uben. Doh Iesu ke kila tasrasina tar la tagu pono tatanon, <sup>22</sup>maeit rasina kura hiliu ualahurungua kompe tar bout, doha ra tamas, kaura uakeluk tatanon.

**Iesu ke uelhire tauete toro Uelhire Uaia, kare uauia tasir bureher tamat**

<sup>23</sup><sup>f</sup>Iesu ke uiloho uakap i Galili, kare la leka tenas umang lotusin, kare uelhire tauete toro Uelhire Uaia tar Nitoiang Heuen, doh ke uauia uakapa teres momouhur tamatisis res mat. <sup>24</sup><sup>g</sup>Doho ueluatata tang Iesu ko la uiloho uakapa tar pang uan i Siria, doho tamatisis ra maluana keip tar bureher mate ka keip pokosomeis tang Iesu mare uauiaono tasisin. Gisis res uelmahing uleik, doho nihikung liouan, o uoto lolong kapul, doha matar tukunus ka keip pokosomeis tang Iesu, kare uauiaono tasisina uakap. <sup>25</sup><sup>h</sup>Doho burehentiehe tunur tamatang Galili doho tamatang tar pang uan i Dekapolis, dohi Jerusalem, dohi Judia, doho mahar kotong tar pang giamehenar kodom i Jodan ka uakeluk tatanon.

**Iesu ke ualasira to tasir tamata i rana tar ponponin**

**5** <sup>1</sup>Binaka ke banga Iesu tasir manai tamat, inggono ke lingua taro i rana tar ponponin, kare la tabil. Doh no tamatang uakuakelukono ka laha tatanon, <sup>2</sup>kare uakekene manasono tar ualasira tasisina pare,

- <sup>3</sup> <sup>i</sup>“O tamata gera ateis a tabotantar iabeis tar ineter nang God, gisina tera banotong uah,  
gisinar tamatasina tera banotong kale tar mamang inetelikinitier uiar nanar Nitoiang Heuen.
- <sup>4</sup> <sup>j</sup>O tamata gera kiring, gisina tera banotong uah,  
God e turung ualabuk tasisin.
- <sup>5</sup> <sup>k</sup>O tamata gesir hamhamasilik, gisina tera banotong uah,  
a koto uakap a turung nasisin.
- <sup>6</sup> <sup>l</sup>O tamata gera malarantiehe tun tar uakeluk tar hagar uaiar nang God misiana tar tamatetie re gog, dohe kamadak tar marang kodom, gisina tera banotong uah,  
God e turung heir uamototo tun tasisin.
- <sup>7</sup> O tamata gera uoto ueldolomo tasir gisimeher tamat, gisina tera banotong uah,  
God e turung ueldolom tasisin.

<sup>f</sup> 4.23 Mat 9.35; Mak 1.39; Apo 10.38    <sup>g</sup> 4.24 Mak 6.55    <sup>h</sup> 4.25 Mak 3.7-8

<sup>i</sup> 5.3 Ais 57.15    <sup>j</sup> 5.4 Ais 61.2-3; UGO 7.17    <sup>k</sup> 5.5 Ker 37.11    <sup>l</sup> 5.6 Ais 55.1-2

- 8 O tamata ger dedeilir kolous, gisina tera banotong uah,  
ra turung banga tang God.
- 9 O tamata gera uoto uahiarou tar uelsae tasir tamat, gisina tera  
banotong uah,  
gisina ra turung kilais o bung tuna God.
- 10 <sup>m</sup>O tamata gera huata tar niduh ka heirigir tamata tasisin,  
teene ra uakeluk tun pesina tar hagar uaiar nang God, gisina tera  
banotong uah,  
a Nitoiang Heuen a nasisin.”

11 <sup>n</sup>“Inggoumeit ra uelsigalasioum, kara heirisioum tar niduh, kara boho tolasioum tar bureher inet, teeit rung uakeluk pe totoguo, inggoum mung banotong uah. 12 <sup>o</sup>Inggoum mung banotong bala uaia tun, karung uaha tun, ge a bulauamioum pe a uleik e uanguangoul tamioum i Heuen. O tamata ka guata sira uoum tar niguataninanine tasir propet geke uangoul baka uoum siounuhia tamioum.”

#### O uelhire uaranga tar teh, doha luh

13 “Inggoum misiana tar teh gane i kot, bo gete rouo pukur linglinginanin hape ra banotong uamalthe poluk peiginin? Ahik paha uia baka poluk, bo ra turung baka liu puk manasaig, kara ueihueih taner tamat i kot. 14 <sup>p</sup>Inggoum misiana tar luh gere heir tar luh tar koto uakap. Misian tar uan uleik ger nituha uapon i rana tar ponponin ahik pahe banotong ou. 15 <sup>q</sup>Doho tamat ahik pah ra touaouo tar luh i kukulebanga tar tolah, bo ra uatokoin i rana toro toktokono ro lam mare bala uakapar luhluhun iuma tar um. 16 <sup>r</sup>Ter siokono kompe, ingga pake ter luh tasir gisiameher tamata mara bang parokosin tar ineter uia ro guatagia, kara turung uatakai tang Tamoumua i Heuen.”

#### A tengkana te na puhung ualatut Moses

17 <sup>s</sup>“Inggoum ahik pah mung namana ku lahao tar me kale liu tena ualatut Moses ue nas niualasirar propet. Ahik pah ku laha tar me kale liu taninin, bo tar me guata tenas niualasirasin e kotpokoso tun. 18 <sup>t</sup>Inggou u uamana tun tamioum e tuka tar binaka re kap i Heuene, dohi kot ahik uadeil me sikina tar ualatutunin re turung rouo liu e tuka gete kapa na kalekinalenin. Geta kikitilikimper puhung ualatutur nang Moses, kara uakelukumpein e tuka gete kapa na kalekinalenin. 19 <sup>u</sup>Doh gete me tamat e katego tena kikitilikir puhung ualatut Moses, kare ualasira

<sup>m</sup> 5.10 1Pi 3.14    <sup>n</sup> 5.11 1Pi 4.14    <sup>o</sup> 5.12 2OUTT 36.16; Apo 7.52    <sup>p</sup> 5.14 Jon 8.12; 9.5    <sup>q</sup> 5.15 Mak 4.21; Luk 8.16; 11.33    <sup>r</sup> 5.16 Epe 5.8-9; 1Pi 2.12    <sup>s</sup> 5.17 Roum 3.31  
<sup>t</sup> 5.18 Luk 16.17; 21.33    <sup>u</sup> 5.19 Jas 2.10

tasir gisiamehe tar guata tanininanine, inggono tar hangan e turung kikitilik tar Nitoiang Heuen. Bo mai puk re uakeluk taninin, kare ualasira tasir gisiamehe ra uakeluk sira tatanon, inggon e turung tohangana tar Nitoiang Heuen.”

<sup>20</sup>“Inggo u hire tamiuoum. Doh geta hik nami hagar uaioum paha uiantiehe liu tenas hagarir tamatang ualualasira tar ualatut, doho Parisi, inggoum ahik tununguampe pah mung banoto mung lekala tar Nitoiang Heuen.”

### **Ahik paho uiliatung pous tar tang giameher tamat**

<sup>21</sup>“Doh Iesu ke kula poluk pare, “Inggoum kung longoro manasa tar puhung kula ka hirein tasir tamata sioun, ‘Inggoum ahik pah mung uiliatung pous tasir gisiameher tamat. Doh gete uiliatung pous me tamata tar tang giameh, inggon e la turung tur tar matanar tamata uleiking tar uelhehek.’ <sup>22</sup>“Bo inggo gine ru hire tamiuoum pare, a tamata gere nimaliana uasa tang tahin, ahik me tengkan, inggon e la turung tur tar matanar tamata uleiking tar uelhehek. Doha tamata gere uelhire uasa tang tahin, inggon e turung tur tar matanar tamatang uelhehek ger i ranantieh. Doh gete kulono pare, ‘Ingga a popouluan,’ inggon e tagin teil geta bakalaiono toro hue i Hel.”

<sup>23</sup>“<sup>x</sup>Temaene, geto lang heiria tenang uahung tang God toro olta, doho la namana huara tar uelsaer emiraoum me tahim, <sup>24</sup>hiliu to tenang uahung toro olta, karo la uakodkodoho keip baka tang tahim. Gete kodkodohon, song ro me heiria tenang uahung.”

<sup>25</sup>“Gete marang uamoko me tamata totomua tar limaneit re uoto tabila tar uelhire, doh tar binaka mura la harahala raoum tar lel, ter binakono pako uakodkodoho keipia tatanon. Gete uamokono totomua tar limanar tamatang tabila tar uelhire, kare la heirilaono totomua tar tamata re uoto kaeke tar karabus, kare tea ra bakalaia tar karabus. <sup>26</sup>Inggo u uamana tunumpe totomua, ingga ahik paho banotong hiliu tar karabus e tuka geto baka uadouh liua tenang uadouhina tunur mani.”

### **Iesu ke mene tar niguatang uraur**

<sup>27</sup>“Doh Iesu ke kula poluk pare, “Inggoum kung longoro manasa sioun tar puh ke kulain Moses e kula pare, ‘Inggoumur le, ahik pah mung guata toro ur.’ ” <sup>28</sup>Bo inggo u hire tamiuoum pare, “Gete me bulout e banga me tang siokor kuah kare maha tatanon, i lolono tena ninamanon, inggono ke guata keip manasa tatanon tar hagar uasa. <sup>29</sup>“Temaene geta matoumuaoneitir pang mua ke reih totomua tar guata me hagar

<sup>y</sup> 5.21 KT 20.13; Ual 5.17    <sup>w</sup> 5.22 1Jo 3.15    <sup>x</sup> 5.23 Mak 11.25    <sup>y</sup> 5.27 KT 20.14; Ual 5.18  
<sup>z</sup> 5.29 Mat 18.9; Mak 9.47

uasa, kale liu tatanon, karo baka liu. Auiantiehe geto baka liuia mo maharoum ter sa geta baka uadeilininir tukunumua i Hel. <sup>30</sup> “Doh gete ter pang limoumuaitir pang mua ke reih totomua tar guata me niguata uasa, tokout liu tatanon, karo baka liu. Auiantiehe geto taboin mo maharoumua ter sa geta baka uadeilininir tukunumua i Hel.”

### Iesu ke ualatoh ae maene a sa gete kategor tamata tono le

<sup>31</sup> <sup>b</sup>Iesu ke kula poluk pare, “Inggoum kung longoro manasa pono tena ualatat Moses pare, ‘A tamata gere de tena kuah, inggono pake bolo baka uoum mo bolobolong uahire tena kuaha pare, rasin ura ueltageih.’ <sup>32</sup> “Bo inggo u kula pare tamiuoum, gete me bulout e uelueluata liu tena kuaha tar binak ahikir kuaha pah teke guata tar niguata uasa, inggonor bulout teke guat, maene ke lekar kuaha tar puhung kular nana ro le. Ter hauon, binaka re la le palihir kuahonene tar tang giamehe siokor bulout, inggonener kuaha ke guata manasa pono toro ur. Doha bulout gere kale tar kuahonener nihiliu sioun, inggono ke leka pono tar puhung kular nana ro le, kare guatangua pono toro ur.”

### Inggoum ahik pah mung uamanato i ran

<sup>33</sup> <sup>d</sup>Iesu ke kula poluk pare, “A giameher puh ka kulain ro bung tubumiuoum, doh inggoum kung longoro manas, e kula pare, ‘Ahik paho boho tar binaka ro kula pare, o man i ran! Doh tar binaka ro kula pare, o man i ran, tar binaka ro guata tar ineteninanine, ingga pako uakelukunguampe tar puhung kulonene, karo guata uakodkodoho to tar inete tar matanar Tamata Noman.’ <sup>34</sup> “Bo inggo gine ru hire tamiuoum, inggoum ahik pah mung uaman i ran. Ahik pah mung kula pare, ‘O man i Heuen,’ ge i Heuene pe tono tabtabila God. <sup>35</sup> “Doh inggoum ahik pah mung kotou, ‘O man i kot,’ ge i koto pe e mok i kukulebang tang God. Doh inggoum ahik pah mung kotou, ‘O man i Jerusalem,’ ge i Jerusalem pe na uan uleikir toia uleik. <sup>36</sup> Doh ingga ahik paho uamana to tar porem, ge ingga pe ahik paho banotong touo katongo me kabeleng ulum e la patour ue e kurkurum. <sup>37</sup> Kula kompe ‘Aa’ ue ‘Ahik.’ Bor uelhire gera tumana baka polukulaig tar puhung uelhire, ginin e la tur tang Satan.”

<sup>38</sup> <sup>g</sup>Iesu ke kula poluk pare, “Inggoum kung longoro manasa tena puhung kula uapopokoh Moses gere kula pare, ‘Gete me tang siokor tamat e mamantouo me pang siokor matanar tang giameher tamat, git ke mamantouo ra mamantouo ponoinir pang siokor matan. Doh gete me tang siokor tamat e uatakalekus me siokor liuonor tamat, inggono ra

<sup>a</sup> 5.30 Mat 18.8; Mak 9.43    <sup>b</sup> 5.31 Ual 24.1-4; Mak 10.4    <sup>c</sup> 5.32 1Ko 7.10-11

<sup>d</sup> 5.33 NKP 19.12; Aha 30.2; Ual 23.21    <sup>e</sup> 5.34 Ais 66.1; Mat 23.22; Jas 5.12

<sup>f</sup> 5.35 Ker 48.2; Ais 66.1    <sup>g</sup> 5.38 KT 21.24; NKP 24.20; Ual 19.21



uatakalekus ponoin me siokor liuon.’ <sup>39</sup>Bo inggo u hire tamiuoum pare, inggoum ahik pah mung pehahaua tar tamata gere guata uasa tamiuoum. Gete me tamat e posar tar pararoumuaitir pang mua, tur keip uiuir pono tatanono tar pang kais. <sup>40</sup>Doh gete me tang siokor tamat e marang poluk totomua, dohe kale tonongo hikhikua, auia, heir pono tonongo hikhiku barah tatanon. <sup>41</sup>Doh gete me tang siokor tamat e kula tutup totomua tar huata mena inete duhono tar siokor kilomita, auia, la keip tatanono tar torikir kilomita. <sup>42</sup>Heir tar inete tasisit ra dangat, kara hik pah mung heir tar mudimiu tasisit ra marang kalkale baka puk.”

**Inggoum ahik pah mung pehahaua tar  
niguata uasa ka guataig tamiuoum**

<sup>43</sup><sup>h</sup>“Inggoum kung longoro manasa sioun tar puh e kula pare, malauehir tang uanotoum, karo de tenang uelmatan. <sup>44</sup><sup>i</sup>Bo inggo u hire tamiuoum pare, malauehir tosnomio uelmatan, karung mene uaia tasisit ra soul tamiuoum. Guata uaia tasisit ra de tamiuoum, karung poul tenami lotu tasisit ra heir tar niduh tamiuoum. <sup>45</sup>Getung guatoum pagiare, inggoum mung turung uangoul sira tun, o bung tuna Tamamiuenah i Heuen. Ge inggono pe e heir tar pisara tasir tamata uasa, doh tasir tamata uaia, doh inggon e heir tar huana tasir tamata uaia, doho tamata uasa pon. <sup>46</sup>Getung malauehir pukuoum tasisit ra malauehir tamiuoum hape re la uia to pelar puhonene? Gisisir ueuenau ra uoto guata pono pagiar. <sup>47</sup>Doh getung guata uaia pukuoum toso bung kaloumiu, hape rung giamehe sioko peoum tasir gisiameh? Gisis ponompe ra tele tang God ra guata uaia puk pono toso bung kaluas. <sup>48</sup><sup>j</sup>Bo inggoum puk pakung guata uakodkodoh misiana re guata uakodkodoho pe Tamamiuenah i Heuen.”

**Iesu ke ualasira hape ra poul peisir tamata gera malahir me nipoul**

**6** <sup>1</sup><sup>k</sup>“Mu tagin teil! Ahik pah mung ualasira tenami hagar uaia tar matasir manai mara bang, kara kale kai tar hangamiuoum geta hikoum pah mung kale me bulauamiu re la turuha tang Tamamiu i Heuen. <sup>2</sup>Temaene tar binaka ro marang heiria me inete tar tamata gere malahir me nipoul, ahik paho u toro tuil tar uahire tasir tamata tar haua ko guatain misiana tasir tamata gesir tang uelhire kokop. O tamatasina ra boho kompe tasir manai mara namanar tamata pare, gisin o tamata uaia, kara uatamata uleik tasisin. Inngo gine ru hire tamiuoum, o tamatasina ka kale uoum tar bulauas. <sup>3</sup>Temaene geto marang poulia me tamata gere malahir me nipoul, ahik paho uahire me tamata tar haua

<sup>h</sup> 5.43 NKP 19.18    <sup>i</sup> 5.44 KT 23.4-5; Luk 23.34; Apo 7.60; Roum 12.14,20

<sup>j</sup> 5.48 NKP 19.2; Ual 18.13    <sup>k</sup> 6.1 Mat 23.5

ko guatain <sup>4</sup>mare moko uaouor puhung nipoulonene. Doh Tamoumua gere ate tar mamang inetelikinit re ou, e turung bulaua uakalahara to totomua.”

### Iesu ke ualasira hape ra lotu per tamat

<sup>5</sup>Doh Iesu ke kula poluk pare, “Ahik pah mung guata sira tasir tamatang mene kokop. Gisina ra uaha tar tur iuma tar umang lotu doh tar morener uan, kara lotu mara bangar tamata tasisin. Inggogine ru hire tamiuoum, gisina ka kale tun manasa uoum tar bulauas uakapa tun. <sup>6</sup>Bo tar binaka ro lotua, la tar butur ro banot o uangoul me paheim. Holoro toro pirik, karo lotu tang Tamoum, ge ahik pah ra uoto bang huarain. Doh Tamoumua gere uoto bang huara tar inete ro guatang pahemigia ue o guata uauouogia e turung bulaua totomua.”

<sup>7</sup>“Doh tar binaka rung lotuoum, ahik pah mung kotouo me puhpuhung barahar puhpuhung lotu, misiana tasir tamatasit ra tele tun tang God. Gisina ra namana pare, geta guata keipisina me bureher uelhire God e longoro tasisin. <sup>8</sup>”Inggoum ahik pah mung uakeluk tenas hagarisin. Ge Tamamiuoum pe e atensioun manasa tar huar inete rung malaragioum tar binaka halanoum tung dangata tatanon.”

### Gine te pake terung lotu peoum

<sup>9</sup>“Gine te pake terung lotu peoum.

Tamamiueim, ingga kaeia i Heuen,  
inggeim mi uouongono tar hangoumua.

<sup>10</sup> °O heiriha tenang Nitoia, doh tenang nikauek e kotpokosane i kot,

doh tereng nimalara ra uakelukinane i kot  
ngohinanah i Heuen.

<sup>11</sup> O heiriha tamiueim tar nieining daan.

<sup>12</sup> °O kuse luara teremi niguata uasaeim

misiana ring kuse luara pe inggeim tasisit ra guata tar niguata  
uasa tamiueim.

<sup>13</sup> ¶Ingga dehen to keep tamiueim tar uedang,

karo uelkarus tur tamiueim tar tang siokor Tamata Uasa.

Ge a Nitoia pe doha nitampopokoh, doha hangana uleik a  
uiniator a noumua tar mamang binakalik.”<sup>r</sup>

<sup>1</sup> 6.5 Mat 23.5; Luk 18.10-14    <sup>m</sup> 6.7 1To 18.26-29    <sup>n</sup> 6.8 Mat 6.32    <sup>o</sup> 6.10 Luk 22.42

<sup>p</sup> 6.12 Mat 6.14-15; 18.21-35    <sup>q</sup> 6.13 Luk 22.40; Jon 17.15; 2Te 3.3; 2Ti 4.18; Jas 1.13

<sup>r</sup> 6.13 A giniamer bolobolong sioun tabo teilinir vesene 6.13b.

14<sup>s</sup>“Getung kuse luaroum tar niguata uasa ka guataig tamiuoum, Tamamiuoumenah i Heuen e kuse luara pono teremi niguata uasaoum. 15Bo getung de inggoum matung kuse luara tenas niguata uasar gisiameh, Tamamiuoum ahik pono pahe kuse luara teremi niguata uasaoum.”

### Iesu ke ualasira tar haging ueil

16<sup>t</sup>Iesu ke kula poluk pare, “Tar binaka rung ueiloum tar niein, inggoum ahik pah mung guata sira tasir tamatasitir tang kokopo ra uoto guata pe. Ra pe mara bang parokois ra ueil pe. Inggo u uamana tun tamiuoum, gisina ka kale manasa tar bulauas. 17Bo tar binaka ro ueilia tar niein, ingga o uamoko me uaiuai toro lum, karo uahuhu tar porem. 18Mara hikir gisiamehe pah ra bang paroko ro ueil pe ingga. Tamoumua puk manasampe ge ahik pah ra uoto bang huarain tere ate. Doh Tamoumua gere bang huara tar inete ro guata uaouogia e turung bulaua uakalahar a totomua.”

### Malauelhir tar ineter nang God ahik pah tar ineteng tar kot

19<sup>u</sup>“Inggoum ahik pah mung uamoko toto tenami mamang inetelikinitier uiaane i kot. Geta mamantouor kurkur ue me giniamhemper inete gere banotong uamout taninin, doho ueuenau ra banotong leka uelhir, kara la uenau. 20<sup>v</sup>Bo pakung uamoko toto puk tar ineter namiu i Heuen, tar butur ahik mo kurkur ue me giniamhemper inet e banotong uamout tananin ue mo ueuenau ahik pah ra banotong polaka, kara la uenau. 21Ge ia pe re mokor inete uaiar namiuoum ter buturuono re moko pono remi nimalauelhiroum.”

### A matanar tamat ngohinar luh

22Iesu ke kula poluk pare, “A matana tena luhur tukunun. Geta uiar matoumua, a luh e turung uoun uakapa tun tar tukunumua. 23Bo geta sar matoumua a tukunumua uakapa tun e turung kitup. Gete mokor luh totomua e ngohina paha kitup, a kitupon doh e turung kitupuntiehengua.”

### Ahik me tamata re banotong kalekinale i kukulebanga tar tang torikir tamata uleik

24“Ahik me tang siokor tamata re banotong uangoul i kukulebanga tar tang torikir tamata uleik tokah. Ge inggono pe e turung huain me tang siok, kare uaha tar tang giameh. Ue inggon e turung malauelhir tar tang siok, kare de tar tang giameh. Inggoum ahik pah mung banotong uakeluh tokaha tang God, doha mani.”

---

<sup>s</sup> 6.14 Mak 11.25-26    <sup>t</sup> 6.16 Ais 58.5-9    <sup>u</sup> 6.19 Jas 5.1-3    <sup>v</sup> 6.20 Mat 19.21; Luk 18.22

### Ahik paho namanantieh tar ineteng tar kot

25<sup>w</sup>“Temaene ru hireo tamiuoum, ahik pah mung namanantiehe tenami niuangoul, pare tar niein doha inum, doha hua ro gomoin tar tukunum. Na nituar tamat a i ranantiehe tar niein, doha tukununar tamat a i ranantiehe poluk tar gomon. 26<sup>x</sup>Banga tasir tetiau! Gisin ahik pah ra lebe tar uatun, kara lous ue ra ur toto, kara uamokola tar um, bo Tamamiuoum puk i Heuen e kaukeke teil tasisin! Doh inggoum o inete uleik uain poluk tasir tetiaua tang God. 27Mai tamiuoum re uoto namanantiehe tar inetenin, kare namana pare, e banot e uabarah tena niuangoulane tar koto mare barah?”

28“Kara hik pah mung namanantiehe tar gomon. Banga re hua per kalanguh roke, ginin ahik pahe kalekinale ue e tuha katongo mena gomon. 29<sup>y</sup>Bo inggo gine ru hire tamiuoum Solomon ger toia, ahik pono na niuiniatoro paha mataia ue mena hikhiku sira re mataia per kalanguh rokeninanine. 30God e ualoho tar garasanine i moren, doh ginin e tua puk daan, bo tar giameher marein ginina ra tokoutig, kara ualuhig. Bo inggoum pukene ahik remi nitagorong mana paha popokoh, inggoum tekung i ranantiehe tun tar kalanguh, temaene inggoum pakung ate pare, God e turung kaukeke uaia tun tamiuoum.”

31“Temaene inggoum ahik pah mung namanantieh, karung kula pare, ‘A hua ri einigieig? Ue a hua ri inumugieig? Ue a hua ri lohogieig?’ 32<sup>z</sup>Ter ineteninanine ra uoto namanantiehe tunigir tamatasit ra tele tang God. Doh Tamamiuoumenah i Heuen e ate manasa mung malara peoum tar ineteninanine. 33<sup>a</sup>Bo a inete uleik puk te pare, inggoum mung sir baka uoum tena Nitoia God menia tena hagar uaiaon, song re heir ponono tar ineteninanine tamiuoum.”

34“Temaene inggoum ahik pah mung namanantiehe tar marein roliuo. A ineteng roliuo e la manasampeig tar mareinon. A niduhun tar siokor marein e la manasampeig tena marein.”

### Ahik pah mung uelkedangesioum

**7** 1<sup>b</sup>“Ahik pah mung kedanga tasir gisiameher tamata mara hik ponoum pah ra kedangasioum. 2<sup>c</sup>Ge tar siokonor hagar pe rung kedanga peoum tasir gisiameh ter siokonor hagar kompe ra turung guata hahua pono pesioum. 3Ae maene ro banga tar sikir mongmango re moko teil tar matana kaloum, kara hik paho namana huara tar puhung douk uleikeit re moko teil tar matoum? 4Gete moko teil me puhung

<sup>w</sup> 6.25 Pil 4.6; 1Ti 6.6-8; 1Pi 5.7    <sup>x</sup> 6.26 Mat 10.29-31; Luk 12.6-7    <sup>y</sup> 6.29 1To 10.4-7; 2OUTT 9.3-6  
<sup>z</sup> 6.32 Mat 6.8    <sup>a</sup> 6.33 1To 3.11-14; Ker 37.4,25; Roum 14.17    <sup>b</sup> 7.1 Roum 2.1;  
 1Ko 4.5; Jas 4.11-12    <sup>c</sup> 7.2 Mak 4.24

douk tar matoumua, ae maene ro banotong kula ingga tang kaloum pare, ‘Kaloug, inggo dehu marang kale liu tar sikir mongmongo re moko teil tar matoumua?’ <sup>5</sup>Ir tang kokop! Ingga bo pake tero kale liu baka uoumumpe tar puhung doukeit re moko teil tar matoum maro bang huara uaiaa, song ro kale liu tar siksikir mongmongo re moko teil tar matana kaloum.”

<sup>6</sup>“Inggoum ahik pah mung heir tena inete God ger dedeil tasir lo ue ahik pah mung baka ueleheir tenami kuaman tasir hueit. Geta peirpeir uauhusin taninin, kara tur uiuir, kara eit tamiuoum.”

### Na nitampopokohor lotu

<sup>7</sup>Iesu ke kula poluk pare, “Dangata mara heiriono tamiuoum, sir marung tuparoum, dok mara puka ueleheirisium. <sup>8</sup>Ge o tamata uakapa pe gera dangat, gisina tera kale, doh mair tamata gere sir, inggono tere tupar. Doh mair tamata gere dok, inggono tera puka ueleheirin. <sup>9</sup>Gete me tuna me tang siko tamiuoum, e dangata tang tamana tar heir mo bereit tatanon, tamanono here turung heir tatanono mo bahir? <sup>10</sup>Doh gete dangatar keketik tang tamana tar heir me iana tatanon, tamanono here turung heir me soi tatanono bo? Ahik noman! <sup>11</sup>Inggoumur tamasir keketik mung uoto guata tar bureher niguata uasa, bo inggoum puk mung atentiehe tun tar heir tar ineter uia toso bung tumiu. Temaene inggoum mung ate tun pare, Tamamiuoumenah i Heuen e turung uaha tar heir tar inete uaia tang mai re dangata tatanon.”

<sup>12</sup><sup>g</sup>“A mamang hagarinit rung malaragium paka guataigir tamata tamiuoum ter hagarinin pakung guata ponogium tasisin. A puhung kulonene, e ragom tane uakapa tena ualatut Moses doh nas niualasirar propet.”

### Inggoum pakung solola toro pipirikilik

<sup>13</sup>“Inggoum pakung solola toro pipirikilik. O pirik gero rabian, doha lele ger tahang, kara malagir tar uakeluk ter lelono re lihila i Hel, doha burehentieher tamata ra uoto lihila tar lelono, <sup>14</sup>bo ro pirik gero lihila tar uan gere mokor nitua o kikitilik tun, doha lele re lihila tar buturuon a kising, karo parakukuh tar uakeluk, doha gisiamehe pukumpe ra uoto tupar, kara uakeluk.”

### Tagin tasir propet bohoboh

<sup>15</sup><sup>h</sup>“Tagin tasir propet bohoboh! Gisina ra uoto guata tar uelhirenitier uia tun tar reih tamiuoum. Bo res ninamana uleik tunusina tera marang

<sup>d</sup> 7.7 Mak 11.24; Jon 14.13; 15.7; 16.23-24    <sup>e</sup> 7.8 1Jo 3.22; 5.14-15    <sup>f</sup> 7.11 Jas 1.17

<sup>g</sup> 7.12 Mat 22.39-40; Luk 6.31; Roum 13.8-10    <sup>h</sup> 7.15 Mat 24.24; Apo 20.29; 2Pi 2.1

uaheil pukumpe tamiuoum, kara mamantouo tamiuoum. Gisina misiana tasir lo roke gera gomois tar kapokonor sipsip mara banotong la uahuhut, kara buak, kara uiliatung pous tasisin. <sup>16</sup> <sup>i</sup>Inggoum mung turung ate to tar haua ra guataigisin, te misiana kompe, inggoum mung banotong bang paroko to toro douk tar uauan. Inggoum ahik pah mung banotong lous tur tar kukuananar kalok toro douk ueluelhung ue tar uaunar kahaue toro douk uasa gero uelmomohang, bidouh? <sup>17</sup> <sup>o</sup>Douk gero huang tagal o ua me kukuanana uaia, bo ro douk gero hua uasa, ahik pahe uiar kukuanan. <sup>18</sup> <sup>o</sup>Douk gero huang tagal ahik paho ua me kukuanana me sa, doho douk gero hua uasa ahik paho ua me kukuanana me uia. <sup>19</sup> <sup>j</sup>Doha mamang doukulik ge ahik pahe uoto ua me kukuanana uaia ra tokout uahiuag, kara bakalaig toro hue. <sup>20</sup> <sup>k</sup>Ter siokono kompe rung turung ate peoum tasir propet bohoboho tar haua ra guatain.”

<sup>21</sup> <sup>l</sup>“Ahik paho tamata uakapa tunusit ra kila totoguo pare, ‘Nag Tamata Nomano, Nag Tamata Nomano,’ ra turung lekala tar Nitoiang Heuen, bo teesit puk manasa kompe ra uakeluk, kara guata tena nimalara Tamougou i Heuen. <sup>22</sup> Tar binaka re lamer mareining kedang, o bureher tamata ra turung kula pare totoguo, ‘Ir Tamata Noman, tar hangoumua inggeim king uelhire tauete tono uelhire God, doh teremuar nitampopokoh, inggeim king geil tauete tasir bureher liouana uasa, karing guata tar bureher nitou.’ <sup>23</sup> <sup>m</sup>Doh inggo u turung kula pare tasisin, ‘Mu uareing totoguo, ge inggoum pe o tamatang guata tar niguata uasa. Inggo u tele tamiuoum.’”

### **Mu longor, karung uakeluk tena niualasira Iesu**

<sup>24</sup> “Temaene a tamata gere longoro tar uelhireniner nouguo, kare uakeluk taninin, inggono misiana tar tamatang iate geke tuha uapono tena uma tar papalauan. <sup>25</sup> Doha huana ke dur, karo reih ko kotpokos, doha romo ke tentur, doha mamang inetelikininanine ke uaguna tar um, bo ahik pukuono pah ke pung, teene ka tuha uapono pein tar palau. <sup>26</sup> Bor tamata gere longoro tar uelhireniner nouguo, kara hik pah ke uakeluk taninin, inggono misiana tar tamatetie ahik mena niate geke tuha uapono tena um i rana tar ion. <sup>27</sup> Doha huana ke dur, karo reih ko kotpokos, doha romo ke tentur, kare u bise tar umon, teke punga uahiuu peon i kot, ke kapa tunungua.”

<sup>28</sup> Tar binaka ke menmene uakapa manasa Iesu tar ineteninanine, o tamata ka lutarantiehe tun tena niualasiron, <sup>29</sup> <sup>n</sup>teene inggono ke ualasisira tar tamatetier tohangan, doh ahik pah misiana tosnosio tamatang ualualasirasina tar ualatut.

<sup>i</sup> 7.16 Gal 5.19-22; Jas 3.12    <sup>j</sup> 7.19 Mat 3.10; Luk 3.9; Jon 15.6    <sup>k</sup> 7.20 Mat 12.33

<sup>l</sup> 7.21 Luk 6.46; Jas 1.25    <sup>m</sup> 7.23 Ker 6.8; 2Ti 2.19    <sup>n</sup> 7.29 Mak 1.22; Luk 4.32

### Iesu ke uauia tar tamat a toba

**8** <sup>1</sup>Tar binaka ke hiliu turuha Iesu tar ponponin, o bureher manai tamata ka uakeluk tatanon. <sup>2</sup>Doha bulout e mate keip toro toba ke lame tatanon, kare me hatup uahiua tatanon, kare kula pare, “Tamata Noman geto malara ingga o uadelauana totoguo.”

<sup>3</sup>Doh Iesu ke huela tar limana, kare tuha tatanono, kare kula pare, “Inggo u malar, ingga o delauan.” Kare delauana ualahur tununguar bulout, karo kapangua ponompe no toba. <sup>4</sup>Doh Iesu ke kula tatanono pare, “Ualongor! Dehen to hirhire me tamat, bo o la dedengua kompe tar pater, karo la ualasiraia, karo la heir tar uahung geke kulain Moses tar ualasira tasir tamata uakapa pare, ingga ko uia.”

### Iesu ke uauia tena tamatang kalekinale nas tang uoum keipir soldiang Roum

<sup>5</sup>Tar binaka ke lala Iesu i Kaperneam, nas tang uoum keipir soldia ke lame tatanon, kare me dangata uapopokoho tun tatanono pare, <sup>6</sup>“Tamata Noman, nag tamatang kalekinaleo e momouh rikin tenag umo, dohe momouh uasa tun, doh ke mate uakapar tukunun.”

<sup>7</sup>Doh Iesu ke kula pare tatanon, “Inggo u turung lame, karu me uauia tatanon.”

<sup>8</sup>Bo nas tang uoum keip pukur soldia ke kula tapokis tatanono pare, “Inggo ahik paha tamata uaia tar kaleme totomua tar me uangoul ium tenag umo, bo o kula kompe me puh mare la uia nag tamatang kalekinaleo. <sup>9</sup>Inggo u kula sira pare, ge inggo pe u uangoul pon i kukulebanga tasir tamata uleik gera kauেকে teil totoguo. Doh inggo katong, nogo soldia ra uangoul i kukulebanga totoguo. Doh getu kulo me tang sioko pare, ‘Ingga o la,’ inggon e la. Doh getu kula tar tang giamehe pare, ‘O lame,’ inggon e lame. Doh getu kulo tenag tamatang kalekinale pare, ‘Ingga o guata tar kalekinaleene,’ inggon e guat.”

<sup>10</sup>Tar binaka ke longoro Iesu tar ineteninanine, inggono ke lutar, kare kula tasir tamata gera uakeluk teil tatanono pare, “Inggo gine ru hire tamiuoum, inggo ahik pah ku ueltupara me tamat tasir tamatang Israel, na nitagorong mana sira tar tamatene! <sup>11</sup>Inggo u hire tamiuoum pare, o bureher tamata ra turung la turume tar butur re harhara turuhar pisar, doh tar butur re la hukor pisar, kara me tabila tagu tas Abraham, Aisak, doh Jekop tar Nitoiang Heuen. <sup>12</sup>Inggo bosir tamata’ geke kedanga baka uoumis God tar la uangoul tena Nitoiaon, God e turung baka tauetela tasisina tar kitkitupun tera la kiring tosin, teei ra nimaliana pe, kare uelmahingis.”

---

° 8.4 NKP 14.1-32; Mat 9.30; Luk 17.14    ♪ 8.11 Luk 13.29    ♫ 8.12 Mat 22.13; 25.30; Luk 13.28    ♫ 8.12 O tamata geke kedanga baka uoumis God tesir Ju.

<sup>13</sup>Doh Iesu ke kula pare tenas tang uoum keipir soldia, “La tapokis tenang uan. Doha puhon e turung pokoso totomua, ter hauon ingga ko tagorong man.” Doh tar binaka tunumpeonene, ke uia tapokis na tamatang kalekinaleon.

#### Iesu ke uauia tena uarih Pita ger kuah

<sup>14</sup>Iesu ke lala tena uma Pita, kare la bangangua tena uarih Pita re momouh rikin pe toro uat, doha tukununon e uelsuk uasa tun. <sup>15</sup>Doh Iesu ke tuha tar limanon, kare la ariana dedengua kompeon, kare tenturunguaon, kare kaleuatoro tena niein Iesu.

<sup>16</sup>Nareuinar binakoneit, o tamata ka keip pokosome tang Iesu tasir tamata ra uangoul teilir liouana uasa, doh inggono ke geil liu keip tasisina tar puhung uelhire, kare uauia tasisit ka momouh. <sup>17</sup>Ke guatono pare, tar uakalahara uakapa tun tar haua ke kulaig propet Aisaia sioun pare, “Inggono katongo ke kale teregi momouheig, kare huata teregi uelmahingeig.”

#### Iesu ke hire tar hagaring uakeluk tatanon

<sup>18</sup>Tar binaka ke banga Iesu tasir manai tamata ka tur uiloho pe tatanon, kare kula pare tosno tamatang uakuakeluk. “Inggeig i la tar pang giamehener kodomo uiluiloh.” <sup>19</sup>Doha tamatang ualualasira tar ualatut ke lame, kare me kula pare tang Iesu, “Ir tang ualafir, o mamang buturulik ro lagi, inggo u turung uakeluk totomua.”

<sup>20</sup>Doh Iesu ke hire tapokis pare tatanon, “O lo roke nas lebang, doho tetiaua nas niu, bor Tunar Tamat ahik mena uma uamatoto tun re hohouin, kara hik me butur re uadedeke toro lun.”

<sup>21</sup>Doha tang giameher tamatang uakuakeluk ke kula pare, “Ir Tamata Noman, inggo u marang uakeluk totomua bo o uamaluana baka kompe totoguo u la keu baka tang tamoug.”

<sup>22</sup>Bo Iesu puk ke kula pare, “Uakeluk totoguo gete reng nitagorong mana, karo uamaluana tasisit ahik mes nitagorong man ra keu tosnosio mat.”

#### Iesu ke louar, kare takoutunguar tukung uasul

<sup>23</sup>Iesu ke panete tar bout, doh no tamatang uakuakelukono ka la tagu tatanon. <sup>24</sup>ⁱKa hua matoto manasasin i uantininar kodomo uiluiloh i Galili, doha tukung uasul ke tentur, doha laur ke sasaopola tar bout, bo Iesu puk e hohouo rikinimpe. <sup>25</sup>Doho tamatang uakuakeluk ka la ualagura tatanon, kara kula pare, “Ir Tamata Noman, uelkarus tamiueim. Inggeig dehi mate manas!”

ⁱ 8.17 Ais 53.4   ⁱ 8.20 2Ko 8.9   ⁱ 8.21 1To 19.20   ⁱ 8.24 Ker 4.8



<sup>26</sup>Woh inggono ke kula pare tasisin, “Ae maene rung sokoroum? Remi nitagorong mana dehoun a kikitilik.” Song ke tentur kaion, kare louara tar romo pare, “Takoutir rom,” kare kula polukuono tar butuana pare, “Hiarou!” Song ke kapar rom, kare hiarouo tununguon. <sup>27</sup>Doh gisis ka lutarantiehe tun, kara kula pare, “A tamata hauonene maene ke longoror rom, doha butuana tatanon?”

### Iesu ke geil liu tasir liouana uasa tar tang torikir bulout

<sup>28</sup>Tar binaka ke lame Iesu tar pang giamehener kodom tar pang uan i Gadara, inggono ke uelutpara tar tang torikir tamata kura tauete turuha toro lebangang mat. A toking tamata rasin a toking nihikung liouana uasa, doha toking ualasokor, kara toking mamantou tun, temaene ahik me tamata re uoto marang lihila tar lelon. <sup>29</sup>\*Kaura kula ualeik rasina pare, “Ir Tuna God, a haua ro marang guataia tamiueim? Ue teko laha tar me uaelmahing tanika tamiueim i uoumuhia, song re pokosor binaka tun?”

<sup>30</sup>Doha pang hueit uleik ra uangoul uairehe sikoro kompela tar buturuon, ra ein. <sup>31</sup>Doho liouana uasa ka dangata uapopokoho tang Iesu pare, “Geto marang geil taueta tamiueim, uamaluana tamiueim mi la hikulala tar pang hueit.”

<sup>32</sup>Doh Iesu ke kula pare tasisin. “Mu la!” Doho liouana uasa ka hiliu tar toking tamat, kara la hiku tasir hueit. Doh gisinar pang hueit uakapa tunusine ka siokor ualontiehe tununguako tar hiuhiuon a i ranantieh, kara la siaka uahiuko tar kodomo, kara la siokor houp matengua.

<sup>33</sup>Doho tamatang kaukaueke tasir hueit ka bang, kara ualo liu, ka la pokososina tar uan kara la hire tasir gisiamer tamata tar mamang inetelik ke kotpokos. Doh ka ueluatata pono tar haua ke kotpokoso tar toking tamata ger toking nihikung liouan. <sup>34</sup>Doho tamata uakapa tun tar uanono ka lame tang Iesu. Doh tar binaka ka bangasina tatanono ka dangata uapopokoho tun tatanono tar hiliu tonoso mahar kotosin.

### Iesu ke uauia tar bulout a mater toking liman, doha toking keken

**9** <sup>1</sup>Doh Iesu ke panete tar bout, kare sairkoutula tar kodomo uiluiloh i Galili, kare la kotpokoso tena uan. <sup>2</sup>Doho tamata ka keipime tar tang siokor bulout tang Iesu, kura mate uakapar toking liman, doha toking keken, kare rikin kompe tono rikin. Doh Iesu ke bang paroko teres nitagorong manasin a uleik tun, kare kula tanenetir bulout pare, “Ir tug, Innga o bangang uah! Reng niguata uasaa ka kuse luara manasaig.”

<sup>3</sup>Doho gisiamer tamatang ualualasira tar ualutut ka menemene katongois pare, “A sa tunumpe re marang kale tane per tamatene tena hagar God!”

\* 8.26 Mat 14.31; Ker 89.9 \* 8.29 Mak 1.24; Luk 4.41 † 9.1 Mat 4.13

<sup>4</sup>Bo Iesu puk e ate teilinsioun manasa teresi ninamanasin, kare kula pare, “Ae maene i lolono teremi ninamanoum inggoum mung namnamana uasa? <sup>5</sup>O uelhire haua ro malagir totoguo tar men? Tar kula pare, ‘Reng niguata uasaa ka kuse luar manasaig,’ ue tar kula pare, ‘O tentur karo la.’ <sup>6</sup>Bo inggo puk u malara mung ateoum pare, a Tunar Tamat na nitampopokohane i kot, doh inggon e banot e kuse luara tar niguata uasa.” Song ke kula tar tamateitir mater toking liman, doha toking kekena pare, “Tentur! Kale tonongo rikin, karo la ium.” <sup>7</sup>Doh gitir tamata ke tentur, kare la tena um. <sup>8</sup>Tar binaka ka bangar tamat, kara lutarantiehe tunungua, kara uatakaiantiehe tunungua pono tang God ke heir pe tar nitampopokohonine tasir tamat.

### Iesu ke kila tang Matiu

<sup>9</sup>Tar binaka ke hiliu Iesu tar buturuon, doh gitie re la pelaon, kare bangangua tar tang kale takis a hangana tang Matiu, inggon e tabila tena buturung kalekinale. Doh Iesu ke kula pare tatanon, “Uakelukumeane totoguo.” Doh Matiu ke tentur, kare uakeluk tatanon. <sup>10</sup>Doh tar binaka ra ein tabil to Iesu tena uma Matiu, o bureher tang kale takis, doho tamatang guata tar niguata uasa ka lame, kara me tabila tagu tang Iesu menia tosno tamatang uakuakeluk, kara ein tokah.

<sup>11</sup><sup>b</sup>O gisiameher tamatang iate tar ualatut ra kilais, o Parisi<sup>c</sup> ka banga kara dangatangua tosno tamatang uakuakeluk Iesu pare, “Ae maene re ein keip nami tamatang ualualasiroum tasir tamata uasasine?”

<sup>12</sup>Iesu ke longoro tasisina, kare kula pare, “O tamata gesir tagal, ahik pah ra malara me nipoul e la tur tasir dokta, bo o momouh puk tera malara me nipoul. <sup>13</sup><sup>d</sup>Mu la, karung la sir tur tar tengkanar niate tonu uelhire God gero kula pare, ‘Inggo u malarantiehe tun teremi niueldolomoum tasir gisiameher tamat, e i ranantiehe uain tar uahung.’ Ge inggo pe ahik pah ku laha tar me kila tasir tamata uai, bo ku laha tar me kila tasir tamata uasa.”

### Iesu ka dangatain tar niguatang ueil

<sup>14</sup><sup>e</sup>Tar binakon no tamatang uakuakeluk Jon ger tang uahuhu ka lame tang Iesu, kara me dangata pare, “Aeono maene, inggeim mesir Parisi mi uoto ueil, doh nongo tamatang uakuakeluka ahik pah ra uoto ueil tagu?”

<sup>15</sup>Doh Iesu ke kula tapokis pare tasisin, “Tenas niguatar Ju, gete nihing ler bulout, o uanotonono ahik pah ra uangoul keip tar niduh, kara ueil tar binaka re uangoul keip harahono tasisin. Bo i muduhia puk tar binaka

<sup>z</sup> 9.4 Luk 9.47; Jon 2.25    <sup>a</sup> 9.6 Jon 17.2    <sup>b</sup> 9.11 Luk 15.2    <sup>c</sup> 9.11 O Parisi ra uoto uakeluk, kara ualasar tar bureher ualatut doh na ualatut Moses.    <sup>d</sup> 9.13 Hos 6.6; Mat 12.7  
<sup>e</sup> 9.14 Luk 18.12

re turung kotpokosor mareining kale liu tar le timuh toso uanoton, ter binakono re turung sir toisisin, song ra ueil.”

<sup>16</sup>“Ahik me tamata re banotong kaere tola toro mahar gomono timuh tar gomonor pensiouun mare uauia, ge o mahara pe roeit ro timuh o turung takih liu, doha takihin e turung uleikintieh. <sup>17</sup>Doh ahik pono me tamata re hedongo tola tar bino timuh tar itung kodomor pensiouun.<sup>f</sup> Gete guatono pare, a bino timuh e uoutuout kai, kare uatapuaka tar itung bino pensiouun, kare uasuasangua tar itung tar bino. Temaene ra uoto hedongonguaigir timuhur bino tar timuhur itung bino maura siokor moko uaia tokah.”

**Iesu ke uatua tapokis tar tang siokor keketik, doh ke uauia tar kuaha geke tuha kout tono hikhikuon**

<sup>18</sup>Binaka re menmene haraha Iesu tar ineteninane, a tamatang uoum keip tar umang lotu ke lame tatanon, kare me hatup uahiuane i koto tar kekenon, kare kula pare, “A tuguo dehon a kukuahalik ke nihing mat. Bo ingga puk o la ualahuruha, karo me tuha tatanono mare tua tapokison.”

<sup>19</sup>Doh Iesu ke tentur, kare uakeluk tatanon, doh no tamatang uakuakelukono ka la tagu pon. <sup>20</sup>Doha tang siokor kuah e tutung bakue e la tagu teil pono tasir manai. Ingonor kuaha ke tutung bakue tar puhung barah e banoto toro hangaul, doho torik ro krismas. Ingono ke lihime i muduhia tang Iesu, kare tuha kout toro suruna no hikhikuon. <sup>21</sup><sup>g</sup>Teene inggono ke namana pare. “Getu tuha pukuo tono hikhikuon, inggo u turung uia puk manas.”

<sup>22</sup>Doh Iesu ke tur uiuir, kare bangala tar kuah, kare kula pare, “Reng nitagorong mana ke uauia totomua.” Doh tar binakangua kompeonene ke uiar kuah.

<sup>23</sup>Doh Iesu ke la pokosola tena umar tamatang uoum keip tar umang lotu, kare banga tasir tamata ra kiring pe, kara u tar tual, kara ualualagoreih. <sup>24</sup>Kare kula pare, “Mu uareing! A kukuahalik dehene ahik pah ke mat, inggono dehe hohouo puk!” Doh gisina ka uanuanio uanete tatanon. <sup>25</sup>Tar binaka ka ueltula tauete manasaisir tamat i kalahar, Iesu ke lekala tena tina umar kukuahalik, kare kusa tar limanon, kare tenturunguaon. <sup>26</sup>Doho ueluatata tar puhonene ko la uiloho uakapangua tar pang uanion.

<sup>f</sup> 9.17 A kapokonor sipsip ue a kapokonor meme ra uoto tuhaig pare, a itung bino.

<sup>g</sup> 9.21 Mat 14.36

### Iesu ke uauia tar tang torikir bulout a toking kut

<sup>27</sup><sup>h</sup>Doh tar binaka ke hiliu Iesu tar uanion, doh gitie re la pelaon, a tang torikir bulout a toking kut kura kekete uakeluk tatanon. Kaura kulkula ualeik teil pare, “Ir Tuna Debit ueldolomo tamiraem!”

<sup>28</sup>Tar binaka ke la lekala Iesu tar um, rasitir toking kut kura lame tatanon, doh Iesu ke kula pare tasrasin, “Raoum mura tagorong mana pare, u banotong uauiao tamiraoum?” Kaura kula rasina pare, “Aa! Ir Tamata Noman, raeim mira tagorong man.” <sup>29</sup>Song ke tuha Iesu tara matas rasin, kare kula pare, “A haua ura tagorong manais raoum totoguo u banotong guat, e turung kotpokoso tamiraoum.” <sup>30</sup><sup>i</sup>Doha ra matas rasina ke bang. Doh Iesu ke kula tane tasrasin pare, “Ahik pah mura hirhire me tamata tar ineteninane.” <sup>31</sup>Bo rasina puk kura hiliu, kaura la uelueluatata ueltebeir tasir tamata tena nitampopokoho Iesu tar pang uanonene.

### Iesu ke uauia tar bulout a pau

<sup>32</sup>Tar binaka kura lar toking tamata rasit ka uauiaisira matas, o gisiamer tamata ka keip polukume tar tang siokor bulout a pau tang Iesu, teene re uangoul teil per liouana uasa tatanon. <sup>33</sup><sup>j</sup>Doh tar binaka ka geil liuininir liouan, gitir pau ke mene huar, doho manai tamata ka lutarantiehengua, kara kula uapopokoho pare, “Ahik tunumpe me inete sira pare, ka banga toinane i Israel!”

<sup>34</sup><sup>k</sup>Bo o Parisi puk ka kula pare, “Tamas deher liouana uasaonene re heir tar nitampopoko tatanono tar geil taute tasir liouan.”

### Iesu ke ueldolomo tasir tamat

<sup>35</sup><sup>l</sup>Iesu ke la uiloho, kare la hahai toro uan uleik, doho uuanilik. Inggono ke ualasira to tonosio umang lotusin, kare uelhire tauete toro Uelhire Uaia tar Nitoiang Heuen, kare uauia tasir tamata res mamang matelik.

<sup>36</sup><sup>m</sup>Tar binaka ke bangono tasir manai tamat, inggono ke ueldolomontiehe tun tasisin, teene gisina ra bangang hagouu uasa puk teil, kara hik me nipoul tatas misiana tasir sipsipisitie ahik menas tamatang kaukauek. <sup>37</sup><sup>n</sup>Doh Iesu ke kula tosno tamatang uakuakeluk pare, “A bureher niein ke mahoho manasa tar iom, bo o tamatang kalekinale puk o pag. <sup>38</sup>Temaene inggoum mung dangata tenami lotu tar Tamata Noman ge tanener iom mare heiriono mo bureher tamatang kalekinale tena iom.”

---

<sup>h</sup> 9.27 Mat 20.29-34    <sup>i</sup> 9.30 Mat 8.4    <sup>j</sup> 9.33 Mak 2.12    <sup>k</sup> 9.34 Mat 12.24; Mak 3.22; Luk 11.15    <sup>l</sup> 9.35 Mat 4.23; Mak 1.39    <sup>m</sup> 9.36 Aha 27.17; 1To 22.17; Sek 10.2; Mat 14.14; Mak 6.34    <sup>n</sup> 9.37 Luk 10.2

**Iesu ke kedanga toсно siokor hangaul, doha tang torikir aposoul**

**10** <sup>1</sup>Iesu ke kila toto toсно siokor hangaul, doha tang torikir aposoul, kare heir tasisina tar nitampopokoh mara banotong geil tauetesina tasir liouana uasa, kara banotong uauia tar mamang matelik.

<sup>2</sup>A hangasir aposoulusina teenine.

Uakikilangana tun te Saimon, gera uoto kila ponoin tang Pita,  
doh Andru tahinon,

doh Jems

me tahin Jon, ger toking tuna Sebedi,

<sup>3</sup> Pilip

doh Bartolomiu,

doh Tomas

me Matiu ger kalkale tar maning takis,

doh Jems ger tuna Alpius,

doh Tadius,

<sup>4</sup> doh Saimon ger Selot,<sup>p</sup>

doh Judas Iskariot, geke tangana tang Iesu tasir uelmatan.

**Iesu ke heir tenas kalekinale no aposoul**

<sup>5</sup>Iesu ke ualatue tasisin, kare kula tar puhung kulanine, “Ahik pah mung la toro uaninit ra uangoulur tamatasit ahik paho Ju ue noso uanir Samaria. <sup>6</sup>Bo inggoum mung la tasir sipsiping Israelesit ka heil. <sup>7</sup>Mu la, karung la uelhire tauete pare, A Nitoiang Heuene ke uahuhut manasain. <sup>8</sup>Mu la uauia tasir momouh, karung uatentur tapokis tasir mat, karung uauia tasir toba, karung geil tauete tasir liouana uasa. Mu heirheir puk misiana kung kalkale puk pe.”

<sup>9</sup>“Inggoum ahik pah mung kalkale teil me mani tar binaka rung la, <sup>10</sup>kara hik pah mung kale me tolah ue mo giamehe ro hikhiku ue mo su ue mo tukan. A tamatang kalekinale ra heir uoumumpeinir haua re malarain. <sup>11</sup>Doh getung pokosoum tar uan uleik ue a uauanilik, inggoum mung lekala, karung la sir me tamata uaia, karung uangoul tagu tatanon e tuka getung hiliuoum tar uanion. <sup>12</sup>“Tar binaka rung lekalaoum tar um mung kula pare, ‘A niuangoul uaia e moko tar umene!’ <sup>13</sup>Doh geta uaha uangoulur tamatang tar umono tamiuoum, uamaluana tenami puhung kulang uelhiarou e mokououm, bo geta hikisina pah ra uaha uangoul tamiuoum, karung kale tapokisoum tenami puhung kulang uelhiarou.

° 10.1 Mak 6.7; Luk 9.1    <sup>p</sup> 10.4 “A Selot,” a tamatang tur tane uapopokoho keip toсно tamat tar gavamanang Roum.    <sup>q</sup> 10.6 Jer 50.6    <sup>r</sup> 10.7 Mat 3.2; 4.17; Luk 10.9,11

<sup>s</sup> 10.9 Luk 10.4    <sup>t</sup> 10.10 Luk 10.7; 1Ko 9.14    <sup>u</sup> 10.12 Luk 10.5-6

14<sup>v</sup>Doh geta hik mo uauanilik ue mo uan uleik ra uaha uangoul tamiuoum ue ahik pah ra longoro tamiuoum, karung titir liuinguaoum tar siksikir koto tar kekeimiu tar uabang manate tasisin pare, ka guata uasa pe tamiuoum. 15<sup>w</sup>Inggo u uamana tun tamiuoum, tar Mareining Kedang a niduh re turung heirin God tar uanion e i rana uain poluk tar niduh ra turung heirin i Sodom dohi Gomora.”<sup>x</sup>

**Iesu ke hire tasir aposoul hape ra turung huata pela tar niduh**

16<sup>y</sup>Iesu ke kula poluk pare, “Ualongor, inggo u kula tamiuoum tar la sira tasir sipsipisitie ra lala i uantinanina tasir lo roke. Temaene inggoum pakung lang kanuh sira tasir soi, karung tagin teil tar haua rung marang guataig. Doh inggoum pakung uakeluk tenas hagarir baluh gesir niueluarur, kara hik pah mung namnamanang marang guata me niguata uasa. 17<sup>z</sup>Bo mung tagin teil pukuoum mo tamata gera turung reihila tamiuoum tar buturung uelhehek, kara turung kalkalopis to tamiuoum iuma tenas umang lotu. 18<sup>a</sup>Doh inggoum ra turung reihilasioum tasir tamata uleik tar gavaman, doho toia, teene rung uakeluk pe totoguo. Tar binaka ra guatasin pare tamiuoum, inggoum pakung mene tauete toro Uelhire Uaia tasisin, doh tasisit pon ahik paho Ju. 19<sup>b</sup>Tar binaka ra keipilasioum tar buturung uelhehek, ahik pah mung namanantiehe hape rung turung la kula pe ge ter binaka tun peono re turung hire God hape rung mene peoum. 20<sup>c</sup>Ge a uelhire pe rung turung menegioum ahik paha namiuoum, bo e la tur tena Iabena Dedeil Tamamiuoum gere turung mene keip tamiuoum.”

21<sup>b</sup>“Tar binakon e turung kotpokoso sira pare, o tamata ra turung reihila toso bung tahis katong mara uiliatung pousis, doho tamasar keketik ra turung guata sira pono toso bung tus, doho keketik ra turung uelmatana toso tinas, doho tamas, kara hire tasir tamata ra uiliatung pous tasisin. 22<sup>d</sup>Doho tamata uakapa tun e turung tokouasais tamiuoum, teene rung uakeluk peoum totoguo. Bo mai puk re tur uapopokoh e tuka tar uadouhinar marein, inggono tere turung uaudeilin God. 23<sup>e</sup>Doh geta guata uasa mo tamata tamiuoum me siokor uan, inggoum pakung ualo liuila me giameher uan. Inggo u uamana tun tamiuoum, inggoum ahik pah mung uolong uakapa tenami kalekinale toro mamang uanilik i Israel, kare pokoso manasamer Tunar Tamat.”

---

<sup>v</sup> 10.14 Luk 10.10-12; Apo 13.51    <sup>w</sup> 10.15 Mat 11.24; Jud 7    <sup>x</sup> 10.15 Baga Toro Bolobolong Uakeken 19.24. God ke mamantouo i Sodom dohi Gomora, teene a toking uan rasina kura uoununtiehe tun tar niguata uasa.    <sup>y</sup> 10.16 Luk 10.3; Roum 16.19  
<sup>z</sup> 10.17-20 Mak 13.9-11; Luk 12.11-12; 21.12-15    <sup>a</sup> 10.20 Jon 14.26    <sup>b</sup> 10.21 Mai 7.6; Mat 10.35; Mak 13.12; Luk 21.16

24<sup>c</sup>“Ahik me tamatang uakuakeluk re i rana uain tena tamatang ualualasir, doh ahik me tang kalekinale re i rana uain tena tamata uleik. 25<sup>d</sup>A tamatang uakuakeluk e banotong uaha gete kotpokoso sira tena tamatang ualualasir, doha tamatang kalekinale e banotong uaha gete kotpokoso sira tena tamata uleik. Gete ka kilaio tang Belsebul,<sup>e</sup> o bunguguo tera turung uelkilais me hanga uasantiehe tun.”

### Ahik pah mung sokoro tasir tamat, mung sokoro kompe tang God

26<sup>f</sup>Doh Iesu ke kula poluk pare, “Inggoum ahik pah mung sokoro tasir tamata gera marang guata uasa tamiuoum. A hauar inete ger nigomo uaou, ginin e turung padeneig. Doha hauar inete re moko uaou, ginina ra turung uakalaharaig. 27<sup>o</sup> Uelhire ru meneio tamiuoum tar kitup pake terung uelhire taueteioum tar marein. Doho uelhire ru uelhimukuio tar talingamiuoum pake terung tur kepioum tar moren, karung uelhire tauete tasir tamat.”

28<sup>g</sup>“Kara hik pah mung sokoro tasisit ra uiliatung poust tar tukunun, bo ahik puk pah ra banotong uiliatung poust tar iaben, bo mung sokoro kompe tang God gere banotong mamantouo tokaha tar tukunun, doha iabener tamat i Hel. 29<sup>h</sup>Inggoum mung iate, o tamata ra uoto bulaua tar torikir tetetiaualik tar siokor mani puk. Doh Tamamiuoum e uoto kaueke uaia tun tasisinar tetiau. Ahik me sioko tasisin e banotong pung i kot kara hik Tamamiuoum pahe ate teil. 30<sup>i</sup>Ter siokono kompe tamiuoum, Tamamiuoum e ate tamiuoum, doha ulumioum ponompenit, inggono ke aha manasa pon. 31<sup>h</sup>Temaene inggoum ahik pah mung sokor, inggoum o i ranantiehe poluk tar tukang pang tetetiaualik.”

### Ingeig ahik pahi matala tar hire o bunguna Iesu

32<sup>j</sup>“Mair tamata re hirein tasir gisiamer tamat pare, a nouguo, inggo u turung hire pono tang Tamougenah i Heuen a noug pe tatanon. 33<sup>k</sup>Bo mai puk re uolihin todoguo tasir tamat, inggo u turung uolih pono tang Tamougenah i Heuene pare, u tele tatanon.”

### O matmatame ra turung uelsae

34<sup>l</sup>Iesu ke kula poluk pare, “Inggoum ahik pah mung namana pagiare, ku lahaoane tar koto tar me uahiarou tasir tamata uakap. Ahik, inggo bo ku laha tar me uatentur tar uelkoi tasir tamat. 35<sup>m</sup>Ge inggo pe ku laha tar me uaeluelsae toso matmatame, a bulout e sa tang taman, doha kuah e

<sup>c</sup> 10.24 Luk 6.40; Jon 13.16; 15.20 <sup>d</sup> 10.25 Mat 9.34; 12.24; Mak 3.22; Luk 11.15

<sup>e</sup> 10.25 A hangene “Belsebul,” a giameher hangana Satan. <sup>f</sup> 10.26 Mak 4.22; Luk 8.17

<sup>g</sup> 10.28 Roum 8.31; Jas 4.12 <sup>h</sup> 10.31 Mat 6.26 <sup>i</sup> 10.33 Mak 8.38; Luk 9.26; 2Ti 2.12

<sup>j</sup> 10.35-36 Mai 7.6

sa tang tinan, doh ramatang enan ura uelsae. <sup>36</sup>Ge no uelmatanar bulout pe te gisinempe tena uma katongon. <sup>37</sup>Mai re malauelhirintiehe tang tamana doh tinana totoguo, inggon ahik paha tamata uaia mara kulain pare, a nouguo, doh mai re malauelhirintiehe tar tuneitir bulout ue gitir kuah, inggon ahik paha tamata uaia mara kulain, a nouguo. <sup>38</sup><sup>k</sup>Doh mair tamat ahik pahe huata tena korose, kare uakeluk totoguo, inggon ahik paha tamata uaia mara kulain, a nouguo. <sup>39</sup>Mair tamata re kapil uanono tar nitua tatan, na nituaon e turung rou. Bo mair tamata gere naman, kare sanga dede tonogo Uelhire Uaiao, kare heir liu tena nitua, inggono tere turung tupara tar nitua gere moko dede.”

**Mair tamata re poul tasir tamata gera uakeluk tang  
Kristo tera turung kale bulauana uaia**

<sup>40</sup><sup>l</sup>“Mair tamata re uaha uangoul totomua, e uaha uangoul totoguo, doh mai re uaha uangoul totoguo, e uaha uangoul tar tamatene ke heiriha totoguo. <sup>41</sup>Mair tamata re uaha uangoul tar propet, ge inggono pe na tamatang keip uelhire God, inggon e turung kale me bulauana sira tasir propet. Doh mair tamata re uaha uangoul me tamata uaia, teene a tamata uaia peon, inggon e turung kale pono me bulauana sira tasir tamata uaia. <sup>42</sup>Doh mair tamat re naman e marang poul tasir tamatasiner nang Kristo, kare heir tar kodomo rigirig me kaluasisisiner tiome ra uakeluk totoguo, inggo gine ru hire tamiuoum a bulauanon ahik pahe banotung rou.”

**Iesu me Jon ger tang uahuhu**

**11** <sup>1</sup>I muduhia ke uakapa baka pe Iesu ke hire pe tar mamang niualasiraninanine tosno siokor hangaul, doha tang torikir tamatang uakuakeluk, kare hiliuinguaono tar buturuon, kare la toro uan i Galili tar la ualasis, doh tar uelhire tauete toro Uelhire Uaia.

<sup>2</sup>Jon ger tang uahuhu e uangoul tar uih, doh tar binaka ke longorono toro uelhire tar mamang kalekinalelik ke guataig Kristo, kare kulangua tosno tamatang uakuakeluk tar la dangata tang Iesu pare, <sup>3</sup>“Ingga ter tamata ke menmenein Jon, e turung heirihain God tar me uelkarus tamiueim ue paking uanguangoul me tang giameh?”

<sup>4</sup>Doh Iesu ke hire tapokis tasisina pare, “Mu tapokis, karung la hire tang Jon tar haua kung longoroig, karung bangagioum. <sup>5</sup><sup>m</sup>O kut ka bang, o peil ka la uaia, o toba ka delauan, doho kamelongo ka longor huar. O tamata ge ka mat, ka tentur tapokis, doho tiome ka longoro toro Uelhire Uaia ge ka uelhire tauetein tasisin. <sup>6</sup>A niguata uaia e la tar tamata ge ahik pahe matala totoguo, bo e uakeluk dede totoguo.”

---

<sup>k</sup> **10.38-39** Mat 16.24-25; Mak 8.34-35; Luk 9.23-24; 17.33; Jon 12.25 <sup>l</sup> **10.40** Mak 9.37; Luk 10.16; Jon 13.20 <sup>m</sup> **11.5** Ais 35.5-6; 61.1



<sup>7</sup>Gitie ka hiliu manasa pe no uakuakeluk Jon, song ke ueluatata Iesu tar mamang inetelik tang Jon tasir tamat, “Tar binaka kung lalaoum tar butur padenen, a haua kung la marang bangasioum? Here kung lang banga tar romo re sasaula pe toro garas? <sup>8</sup>Here kung lang banga me tang siokor tamata e hiku teil me hikhiku uaia uelhir? O tamata gera hiku tar hikhikuninanine ra uangoul tenas umar tang mani. <sup>9</sup>Ae maeit kung lalaoumala? Tar lang banga tar propet? Te paara noman, bo i ranahia puk tasir propet. <sup>10</sup>”Ge teono pe gero kulkula teilin no uelhire God pare,

‘Inggo u turung heir tenag tamatang keip uelhire i uoumuhia totomua tar uakalahara tenang lela.’ *Malakai 3.1*

<sup>11</sup>Inggo u uamana tun tamiuoum, Jon ger tang uahuhu, a tamat a i rana uain tasir tamata uakapazine ka kotpokos i kot. Bo a tamata puk ger tabo hangana tar Nitoiang Heuen, inggon a i rana uain poluk tang Jon. <sup>12</sup>°Ke uakekene tur tar binaka ke uelhire tauete Jon ger tang uahuhu ke me tuka daan, a Nitoiang Heuen ke kotpokoso keip tena nitampopokoh, doho tamatasitier tampopokoho ra petutup tun tar la kale tatanon. <sup>13</sup>Uakekene tur tang Moses e tuka tena binaka Jon, o propet uakapa tun, doh na ualatut Moses ke uelhire ponome hape tar Nitoiang Heueneit gere turung lame. <sup>14</sup>°Doh gerung marang tagorong mana inggoum tenas uelhiresin, Jon te propet Elaija geka menmenemein e turung lame. <sup>15</sup>Geta to talingoumua, ingga o longor.”

<sup>16</sup>“Bo getu marang uelhireo tenas niguatar tamatang daan, hingia ro uelhire uaranga paku guataio? Gisina misiana tasir keketikisitie ra tabila tar moren, kara kila ualeik toso uanotous pare, <sup>17</sup>°Inggeim king u toro tulala marung doumoum, bo inggoum puk ahik pah kung marang doum, inggeim king kere tar kerekereng ueldolom, bo inggoum puk ahik pah kung marang kiring.’ <sup>18</sup>Ge tar binaka pe ke lame Jon, inggono ke uoto ueil, doh ahik pah ke inum me bino, doho tamata uakapa ka kula pare, ‘Inggono kaein me liouana uasa tatan!’ <sup>19</sup>°Doh tar binaka ke lamer Tunar Tamat, ke me ein, kare inum, doho tamata ka kula pare, ‘Banga tar tamatene! Inggono deha uoto ein tunumpe, doha uoto inum bino, doh inggon e matakaluana tasir tamatang kalkale tar maning takis doho tamata uasa!’ Bo na niate puk God ke uakalaharaig a man tar haua ke uakotpokosoig.”

### Iesu ke uatagin tasir tamata ge ahik pah ra tagorong man

<sup>20</sup>Song ke uakekene Iesu tar uelkukur tasir tamatang toro uan uleikinitie ke guata toono tar bureher nitou, teene gisin ahik pah ka

<sup>n</sup> 11.10 Luk 1.76    ° 11.12-13 Luk 16.16    P 11.14 Mal 4.5; Mat 17.10-13; Mak 9.11-13  
<sup>q</sup> 11.19 Mat 9.14

uapalih tenas niuangoul, kara uakenua tar guata tar niguata uasa. <sup>21</sup>Ke kulono pare, “Kuasalikisoumeitir tamatang tar uan i Korasin, doh kuasalikisoumeitir tamatang tar uan i Betsaida! Ge pakene ka guata toigir nitouonine tamiuoum i Tair dohi Saidon, gisinar Tair doho Saidon pake daana tun ka uiuir tenas niguat, kara hiku tar hikhikung ueldolom, kara sorois tar taun tar ualasira pare, ra ueldolomo tun tar niguata uasa ka guatguataig. <sup>22</sup>Bo inggo gine ru hire tamiuoum, tar mareining kedang, a niduh re turung heirin God tasir tamatang Tair dohi Saidon a kikitilik uain tar niduh re turung kotpokoso tamiuoum. <sup>23</sup>Bo inggoumur Kaperneam, tekung namana pare, mung kabe kai katongotigisium i Heuen? Ahik, inggoum ra turung baka uahiuakosium i Hel. Ge pakene ka guata toigir nitouo giniane tamiuoum gala i Sodom, inggono pake moko haraha daan. <sup>24</sup>Bo inggo gine ru hire tamiuoum, tar mareining kedang, a niduh re turung heirin God tasir tamatang Sodom, a kikitilik uain tar niduh re turung kotpokoso tamiuoum.”

### O tamata ra ueltupara to tar pepe uaha tang Iesu

<sup>25</sup>Tar binakono Iesu ke kula pare, “Tamoug, ingga a tamata toiang Heuene dohi kot. Inggo u uatakai totomua ter hauon, ingga ko touaouo tar ineteninanine tasir tamatasit res ninaman, doh res niate, karo ualasira puk tasir tamatasit ra uangoul sira pare, o keketik. <sup>26</sup>O mana tun, Tamoug! Gine te hape ko malara pea e kotpokos peon.”

<sup>27</sup>Doh Iesu ke kula poluk pare, “Tamouguo ke heir tar mamang inetelik totoguo. Ahik me tamata re ate tar tuna God, bo te Tamana puk manasampeono tere ate. Doh ahik me tamata re ate tang Tamanon, bo ter Tuna puk manasampeono tere ate mesir tamatasitie ke ualansiraisir Tunon, teesina puk manasa tera ate.”

<sup>28</sup>“Inggoumeitir tamata rung uoto huatantiehe tun tar bureher niduh, inggoum mung siokor lame totoguo maru heirio me niuangoulung uaha tamiuoum. <sup>29</sup>Inggoum mung uangoul i kukulebanga tonogo uelhireo, karung kale niate to totoguo, ge inggo pe a hamhamasilik, karu uoto kale uahia katongoio, karu uoto ualasira tar hagarir mamaolo tasir tamata mara hikir inete pahe heir me niduh tamiuoum, doh marung kaleoum me niuangoulung uah. <sup>30</sup>Teene nogo uelhireo ahik paho parakukuh, doha inete ru heirio tamiuoum tar huat a mamaol.”

<sup>r</sup> 11.21-22 Ais 23; Isk 26.1–28.26; Jol 3.4-8; Amo 1.9-10; Sek 9.2-4    <sup>s</sup> 11.23 Uak 19.24-28; Ais 14.13-15    <sup>t</sup> 11.24 Mat 10.15; Luk 10.12    <sup>u</sup> 11.25 1Ko 1.26-29    <sup>v</sup> 11.27 Mat 28.18; Jon 1.18; 3.35; 10.15; 17.2    <sup>w</sup> 11.28 Jer 31.25    <sup>x</sup> 11.30 1Jo 5.3

### O gisiameher Parisi ka dangdangata tang Iesu tar Mareining Pepe Uah

**12** <sup>1</sup>Tar binakono Iesu mesno tamatang uakuakeluk ka lihila tar butur ka lebeigir raes-uit nar Mareining Pepe Uah. Doh no tamatang uakuakelukono ka gogo manas, maene ka lous tar raes-uit, kara ein manasampe. <sup>2</sup>Tar binaka ka bangar Parisi tar puhonene, kara kula pare tang Iesu, “Bang, a puh dehene ka guatain nongo tamatang uakuakeluka a sa tar guata to tar Mareining Pepe Uah.”

<sup>3</sup>“Doh Iesu ke kula pare, “Inggoum kung timana manasa toro ueluatata tang Debit tonu uelhire God tar binaka ka gogo mesno tamat. <sup>4</sup>Debit ke lekala tena uma God, kare ein toro bereitinar uahung gere toubuiono mesno tamat, bo o patere puk tera matotong ein tang roon. <sup>5</sup>“Doh inggoum kung timana manasa pono tena ualutut Moses gere kula pare, a mamang Mareining Pepe Uah o patere ra katego tar puhung ualagononene, bo ahik pukumpe God pahe tohotola tasisina ka guata pe pare. <sup>6</sup>“Inggou gine ru hire tamiuoum, a tang siokor tamat e uangoulane ter i ranantiehe na kalekinale tena kalekinaler umang lotu ger dedeil. <sup>7</sup>“Ge pakung ate tunoum tar tengkanar puhene pare, ‘Inggou u malarantiehe tun teremi niueldolomoum tasir gisiameher tamat, e i rana uain tar uahung,’ Inggoum paka hik pah mung tohotola tasisine ahik mes niguata uasa. <sup>8</sup>Ge a Tunar Tamata pe ter Tamata Nomanang tar Mareining Pepe Uah.”

### Iesu ke uauia tar tamat a kikimoror limanan

<sup>9</sup>Doh Iesu ke hiliu tar buturuon, kare lekala tenas umang lotusin, <sup>10</sup>Doha tang siokor tamat a kikimoror liman e uangoul pono tar buturuon. Doho Parisisitie ra bangeaha tang Iesu mara turung tohotola tatanono gete uauia tar tamatonono tar Mareining Pepe Uah, ka dangata pare, “Tar niualagononor Mareining Pepe Uah, inggeig i banotong uauia tasir tamat?”

<sup>11</sup>“Doh Iesu ke kula pare, “Hape ge pake sololoko mena sipsip me kalamiuoum i lolono me tung tar Mareining Pepe Uah, ahikimpe pahe turung kale tauete tatanon? <sup>12</sup>Doha tamat a inete uleik uain poluk tar sipsip, bidouh? Te paara noman. Temaetie a puhung kulon e uauia tagigeig tar poul tar tang giamehe tar Mareining Pepe Uah.” <sup>13</sup>Song ke kula Iesu tar tamatetier kikimoror limana pare, “O hue uamakmakoso tar limoum!” Kare hue uamakmakoson, kare uia tapokisinguar liman

<sup>y</sup> 12.1 Ual 23.25    <sup>z</sup> 12.2 KT 20.10    <sup>a</sup> 12.3-4 1Sa 21.1-6    <sup>b</sup> 12.4 NKP 24.5-9

<sup>c</sup> 12.5 Aha 28.9-10    <sup>d</sup> 12.6 Mat 12.41-42    <sup>e</sup> 12.7 Hos 6.6; Mat 9.13    <sup>f</sup> 12.10 Luk 14.3

<sup>g</sup> 12.11-12 Luk 14.5

misiana tar pang giameh. <sup>14</sup><sup>h</sup>Doho Parisi ka tauete liu tur tar umang lotu, kara la uelkodoh hape mara uuliatung pous tang Iesu.

### Iesu tena tamatang kalekinale tun God

<sup>15</sup>Iesu ke ate tar puhonene, maeit ke hiliu tar uanon, doho bureher manai tamata ka uakeluk tatanon, kare uauiaono tasir tamata uakapasitier momouh, <sup>16</sup><sup>i</sup>kare kula uapopokoho tasisin ahik pah ra uaate tasir tamata tatanon. <sup>17</sup>Ke guatono pare, mare kotpokoso tunur puh ke kulamein God tang propet Aisaia pare,

<sup>18</sup><sup>j</sup>“Gine tenag tamatang kalekinaleo geku kedangain geru malauehriro, karu uahantiehe tun tatanon.

Inggo u turung heir uaponoha tatanono tenag Iabena Dedeil, doh inggon e turung uelhire tauete tenag hagar uaiar kodkodoho toro mamang uanilikane i kot.

<sup>19</sup>Inggon ahik pahe me uelperere keip mo tamata ue e kula ualeik, ue e guata me menemene ualeik tasir tamata tar lel.

<sup>20</sup>O doudoukulik ge ahik mono nitampopokoh, doho marang tago, inggon ahik pahe turung katego uadouh liu, doh inggon ahik pahe turung lomoho toro lam gero marang lomoh.

Inggon e turung kalekinale e tuka gete hahauar hagar uaiar kodkodohane i kot.

<sup>21</sup>Doho tamata ge ahik paho Ju ra turung tagorong mana tatanon, kara uanguangoul tatanono tar me poul tasisin.” *Aisaia 42.1-4*

### Iesu me Belsebul

<sup>22</sup>Tar binakon o tamata ka keipime tar bulout a kut, kara pau tang Iesu, teene re uangoul teil per liouana uasa tatanon. Doh inggono ke uauia tatanon, kare banotong bang huara tapokisinguaon, kare mene huarangua ponompe. <sup>23</sup>Doho tamata uakapa ka lutarantiehe tun tar inete ke guatain Iesu, kara ueldangateis pare, “Inggono dehene here ter tuna Debit ger Kristo?”

<sup>24</sup><sup>k</sup>Bo tar binaka puk ka longoror Parisi tar puhonene, kara kula pare, “A tamata deheit e banotong geil tauete liu tasir liouana uasa, teene na tamata uleikon nu Belsebul, teene re heirheir tar nitampopoko tatanon.”

<sup>25</sup>Bo Iesu puk e ate teresi ninamanasin, maene ke kula pare, “A pang uan gere pakpakaha katongois, kara ueluiliatungeis gisina tera turung taltaliah, doha uan ue o matmatame gera pakaha katongois tar torikir toto tamat, kara ueluiliatunge katongois, gisina ra turung taltaliahangua.

<sup>h</sup> 12.14 Jon 5.16 <sup>i</sup> 12.16 Mat 8.4; Mak 3.12 <sup>j</sup> 12.18 Mat 3.17 <sup>k</sup> 12.24 Mat 9.34; 10.25

26 Ter siokono kompe gete geil tauete liu Satan tang Satan, inggono ke pakpakaha katongoin hape mare tur uapopokoh na gavamanon? 27 Doh getu geil tauete keipo tasir liouana uasa tena nitampopokoho Belsebul te mai re heir tar nitampopokoho tosnomio tamatang uakuakelukoum tar geil tauete liu tasisin? Temaene gisina tera turung bang kedanga tamiuoum. 28<sup>1</sup>Bo gete na Iabena Godonene ru geil tauete keipio tasir liouana uasa, auia, inggoum kung ate manas, na Nitoia God ke pokoso manasaha tamiuoum.”

29 “Ahik me tamata re banotong polaka tena umar tamatetier tampopokoh, kare kale tena ineton, te gete uih tane uapopokoho tun baka uoumono tatanon, song re banotong kale tena mamang inetelikion.”

30<sup>m</sup> “Mai ahik paha kaluana totoguo, inggono nag uelmatano, doh mai ahik pahe poul totoguo tar reihime tasir tamata tang God, inggono tere uataltaliaha puk tasisin. 31<sup>n</sup> Temaene ru hireo tamiuoum pare, nas mamang niguata ue nas nimene uasar tamat, God e banot e kuse luara tananin. Bo a tamata gere uelhire uasa tar Iabena Dedeil na niguata uasaon ahik tun pah ra banotong kuse luaraig. 32 Doh mair tamata re mene mo uelhire uasa tar Tunar Tamat inggono ra banotong kuse luaraig na niguata uasa. Bo mai puk re uelhire uasa tar Iabena Dedeil, inggon ahik pah ra kuse luaraig na niguata uasa gine daan ue gitila i uoum.”

### O douk uasa o uoto ua tar niein uasa

33<sup>o</sup> Iesu ke kula poluk pare, “Geto huang tagala ro douk a uauana roon e uia pon, doh geto hua uasa ro douk a uauana roon e sa pon. O douk ra tuana toin no niuia geta banga toigir kukuanana hape re baka pe. 34<sup>p</sup> Inggoumur matina soi! Hape marung guatoum me Uelhire Uaia? A tamat e uoto uelhire tauete tang hingiar ninamana re moko ue e uoun tar koloun. 35 A tamata uaia, na ninamana uaia e moko tar koloun. Temaene re uoto guatono tar niguata uaia. Doha tamata uasa na bureher ninamana uasa e moko tar koloun. Temaene re uoto guatono tar niguata uasa. 36 Bo inggo gine ru hire tamiuoum, tar mareining kedang God e turung heheke tar mamang uelhirelik ka meneigir tamat. 37 Doh tar noumua katongor uelhire, God e kila totomua a tamata kodkodoho ue a tamata uasa.”

### O gisimeher tamatang ualualasira tar ualatut, doho Parisi ka dangata tang Iesu tar guata me uaparok

38<sup>q</sup> Doho gisimeher tamatang ualualasira tar ualatut, doho Parisi ka lame, kara me dangata tang Iesu pare, “Ir Tang Ualasil, inggeim deh mi

<sup>1</sup> 12.28 Apo 10.38; 1Jo 3.8    <sup>m</sup> 12.30 Mak 9.40; Luk 9.50    <sup>n</sup> 12.31 Hib 6.4-6

<sup>o</sup> 12.33 Mat 7.16-20    <sup>p</sup> 12.34 Mat 3.7; 15.18; Luk 3.7; 6.45    <sup>q</sup> 12.38 Mat 16.1; Luk 11.16; Jon 6.30

marang banga totomua o guata me niuaparoko tar uahire pare, ka heir turuhaia tang God.”

<sup>39</sup>Bo Iesu puk ke kula tapokis pare, “O tamatang daan, gisin o tamata uasa doho mahang longoro tang God. Ra uoto pe tun pare, ra banga baka me uaparok. Bo gisina puk ahik pah ra turung banga me uaparok. Ahik noman, ter sioko komper uaparoko ra turung bangainisina tena uaparoko propeit Jona. <sup>40</sup>Ter siokonor hagar puk tang Jona, inggono ke uangoul i lolono toro balanar buh tar touonor marein, doha touonor boung, doha Tunar Tamat e turung uangoul pono tar touonor marein, doha touonor boung i lolono tar kot. <sup>41</sup>Tar mareining kedang o tamatang Niniva ra turung tur tagu pono tasir tamatang daana tar uelhehek, kara tohotola tasisin. Ter hauon, o Niniva ka longoro toro uelhire ke uelhire tauetein Jona, kara uapalih tenas niguata uasa. Bo gane puk, i uantinana tamiuoum, a tang siok a i rana uain poluk tang Jona. <sup>42</sup>Tar mareining kedang, a kuah a toia a peng Siba e turung tur tagu pono tasir tamatang daan, kare tohotola tasisin. Teene inggono ke la tur tunume tar surunar koto tar me longoro tena niate Solomon ger toia. Bo gane puk i uantinina tamiuoum, a tang siok a i rana uain poluk tang Solomon.”

#### **A liouana uasa ke tapokis poluk**

<sup>43</sup>“Tar binaka re tauete liu turur liouana uasa tar tamat inggon e la uiloho tununguala i lolono toro butur padenen, e sir me buturung pepe uah, bo ahik puk pahe tupar. <sup>44</sup>Kare kula katongoin pare, ‘Inggo dehu tapokis tenag uma geku hiliu baka uoumumein.’ Song re tapokison, dohe la tupara tar um a tabotan, kara delauan, doha nikaleuatoro uakapa tun. <sup>45</sup>Song re laon, kare la keip polukume tar gime mouitir liouan o santiehe uain tatanon, song ra me uangoul tokaha tar buturuon. Uakikilangana tun inggonor tamatonene ke uangoul uasa, bo gine daana puk inggono ke uangoul uasantieh. Ter siokono komper hagar re turung kotpokoso tasir tamata uasang daan.”

#### **Mai tun tinana doho tahinalik Iesu**

<sup>46</sup>Iesu e ueluatata haraha tasir tamata tar binaka ka kotpokoso to me tinanon, doho bung tahin. Gisina ka tur i kalahar, doh ra marang menmene tatanon. <sup>47</sup>Doha tang siokor tamata ke hire tatanono pare, “Tinoumua, doho bung tahimua gisitie ra tur i kalahar, doh gisina ra marang menmene keip totomua.”

<sup>48</sup>Bo Iesu puk ke hire tapokis tar tamateit, kare hire tatanono pare, “Mai tunono tinouguo, doh mais tun ro bung tahiguo?”

<sup>r</sup> 12.39 Mat 16.4; Mak 8.12    <sup>s</sup> 12.40 Jona 1.17    <sup>t</sup> 12.41 Jona 3.5    <sup>u</sup> 12.42 1To 10.1-10  
<sup>v</sup> 12.45 2Pi 2.20

<sup>49</sup>Doh ke uamakosolaono tosono tamatang uakuakeluk, kare kula pare, “Bangane! Gisine teso bung tinouguo, doho bung tahiguo! <sup>50</sup>”<sup>w</sup>Ge mai per tamata re guata tar inete re malauelhirig Tamouguoenah i Heuen, inggono te tahiguo ue a tatahigulikio ue a tinoug.”

**Iesu ke uelhire uaranga tar tamata geke  
dudura tar uatunar raes-uit tar iom**

**13** <sup>1</sup>I muduhia tar mareinon, Iesu ke hiliu tar um, kare lala tar tektekener kodomo uiluiloh i Galili, teke la tabilanguono, kare ualasira tasir tamat. <sup>2</sup>“Doho manai tamatasine ka la uangoul toto tatanon o burehentiehe tun, temaene ke panetono tar bout, kare tabil i lolon. Bosir tamata teka tur i kot. <sup>3</sup>Doh inggono ke uelhire uaranga tasisina tar bureher inet, kare hire pare, “Ualongor, a siokor binak, a tang siokor tamata ke la dudura tar uatunar raes-uit tar iom. <sup>4</sup>Gitie re dudura teil pelaono tar uatuna tar iom, a giniameher uatunar raes-uit ke pungpunga teil tar lel, kara eininguar tetiau. <sup>5</sup>Doha giniameher uatunar raes-uit ke pungpunga teililatie tar butur papalauan, ahik paha kotan. Doh ginina ke tungara ualahur tun, teene a kotana sikoro puk peon. <sup>6</sup>Bo tar binaka puk ke pidir pisara taninin, kare makmakoronguanin, kare matenguampe, teene ge ahik pe me uana ke la huako i lolono tar kot. <sup>7</sup>Doha giniameher uatunar raes-uit ke pungpunga teililatie i uantinanina ro uoho ueluelhung, karo hai tane roono tar raes-uit, kara hikinguanina pah ke banotong hua kai. <sup>8</sup>Bo a giniamehe pukur uatunar raes-uit ke pungpunga teilila tar butur kotan, kare bungbunguanantiehe tun. Doha giniamehe tanininar raes-uit ke bungbunguana tar hangaulur hangaul, doha giniameh a tonomor hangaul, doha giniameh a touonor hangaul. <sup>9</sup>Geta to talingoumua, ingga o longor!”

**A tengkana maene re uelhire uaranga Iesu**

<sup>10</sup>I muduhia, no tamatang uakuakeluk Iesu ka lame tatanon, kara me dangata pare “Ae maene ro uoto uelhire uaranga tasir tamat?”

<sup>11</sup>Doh Iesu ke kula tapokis pare, “Inggoum ka heirisium tar niateng tar uelhire uaouo tar Nitoiang Heuen, bo gisin ahik tagu pah ka heiris. <sup>12</sup>“Gete me tamata ke kale manasa uoum mena inet, God e turung heir baka poluk me nanon, doh inggon e turung bureheng uain. Bo gete me tamat ahik mena inet, God e turung kale liu tar siksikir inetelikinitie ke kale uoumugion. <sup>13</sup>Ter tengkanonene maene ru uoto uelhire uarango tasisina pare, gisina ra bangbanga puk, bo ahik puk pah ra bang parok, doh ra longlongoro kompe, bo ahik puk pah ra longor parok. <sup>14</sup>“Doh

<sup>w</sup> 12.50 Roum 8.29    <sup>x</sup> 13.2 Luk 5.1-3    <sup>y</sup> 13.12 Mat 25.29; Mak 4.25; Luk 8.18; 19.26

<sup>z</sup> 13.14-15 Jon 12.40; Apo 28.26-27

gisinar tamatasine teka uakahara tar puh ke kotpokoso tun pare a man ke kulaig Aisaia tasin pare,

‘Inggoum mung turung longoro toro uelhire tar bureher binak,  
bo ahik puk pah mung turung iate tar tengkana roon.

Doh karung turung banga tar bureher binak,  
bo ahik puk pah mung turung bang paroko me inet.

<sup>15</sup> Ge res ninamana per tamatasinasine ke kotpokos a tuktukar,  
kara pirik tane tar talingas, kara kut pipis.

Mara hik pah ra banotong bang paroko keip tar matas me inet,  
ue ra longoro keip tar talingas,

ue e naman manate res ninamana tar tengkana ro uelhire,  
doh mara hik pah ra turung uiuir tenas niguata uasa,

kara tapokisime totoquo, tar guata uaia tasin.’ ” *Aisaia 6.9-10*

<sup>16</sup> “Bo inggoum puk nogo matang uakuakeluko mung banotong uah,  
re uoto banga per matamiu tar inet, doh re uoto longor paroko per  
talingamiu tar uelhire. <sup>17</sup>Inggou u uamana tun tamiuoum, sioun o bureher  
propeit, doho tamata uaia ka malahirintiehe tun tar banga tar haua rung  
bangagioum, bo ahik puk pah ka bang, doh ka marang longoro tar haua  
rung longorogioum, bo ahik puk pah ka longoro tagu.”

### **Iesu ke uakahara toro uelhire uaranga tar uatunar raes-uit tosono matang uakuakeluk**

<sup>18</sup> “Temaene mung ualongoro uaia manasoum tar tengkana ro uelhire  
uaranga tar uatunar raes-uit geke duduraig tar iom. <sup>19</sup>Gisis ka longoro  
toro uelhire ro menmene teil tar Nitoiang Heuen, bo ahik puk pah ka  
naman manate, gisina te misianar uatunar raes-uit geke pungpunga teilila  
tar lel, doh Satan ke lame, kare me kale liu tar haua ka longoroigisin.

<sup>20</sup> Doh tar uatuna geke pungpunga teilila tar papalauan, ahik paha kotan,  
te misiana tar tamata geke longoro toro uelhire, kare kale uateuele  
keipingua tar niuah. <sup>21</sup>Bo o tabo uanana puk roono maro hiku tun i  
lolono tatanon, doho uoto moko sikoro baka puk. Bo tar binaka puk ra  
heirir tamata tar niduh, kara mamantouo tatanon, teene re uakeluk peono  
tonogo uelhireo, na nitagorong manar tamatonene e punga ualahurungua.

<sup>22</sup> <sup>b</sup>Doh tar uatuna geke pungpunga teilila tar uoho ueluelhung, ginina  
te misianar tamatetie ke longoro tono uelhire God, bo inggono puk ke  
namanantiehe tun tar mamang inetelik tar niuangoulung gane i kot,  
doh ke malarantiehe tun pono tar mani, doh me giniamehemper inet. A  
mamang inetelikininanine teke uapekout tane uakapa tono uelhire God,  
kara hikingua me niein uaia re turung kotpokoso tatanon. <sup>23</sup>Bo a uatunar

<sup>a</sup> 13.16-17 Luk 10.23-24    <sup>b</sup> 13.22 Luk 12.16-21; 1Ti 6.9-10,17



raes-uit puk geke pungpunga teilila tar butur kotan, te misiana tasir tamatasitie ka longoro tono uelhire God, kara naman manate, kara sanga dede tun tang roon. Kare kotpokosonguar niein uaia tasisin, ke ua sira pare, a giniamah a hangaulur hangaul, doha giniamah a tonomor hangaul, doha giniamah a touonor hangaul.”

### **O uelhire uaranga toro garasa uasa ko tungara tar iom**

<sup>24</sup>Iesu ke hire poluk toro giamehe ro uelhire uaranga pare, “A Nitoiang Heuene misiana tar tamatetie ke dudura tar uatunar raes-uitinitier uia tena iom, <sup>25</sup>Bo naboung puk tar binaka ra hohouor tamat, na uelmatanono ke lame, kare me dudur kalehela tar uatunar garasa uasa i uantinanina tar raes-uit, kare hiliu. <sup>26</sup>Doh tar binaka ke tungarar raes-uit, kare hua kai, kare ua manasampe teka bang paroko toin ro garasa uasa. <sup>27</sup>Doh no tamatang kalekinaleono ka lame tatanono, kara me kula pare, “Tamata uleik, a uatuna uaia tun deh giniala ko lebegia tenang iom, bo ia ro la tur ro garasa uasa?” <sup>28</sup>Doh inggono ke kula tasisina pare, ‘A uelmatana dehoneit ke guata pagiare.’ ”

“Doho tamatang kalekinale ka dangata pare, ‘Doho malara ingga mi la us lieuim toro garasa uasa?’ ”

<sup>29</sup>“Kare kulono pare, ‘Ahik, getung us liuoum toro garasa uasa, karung us keip pono me giniamaher raes-uit. <sup>30</sup>Uamaluana tar raes-uit, doho garasa uasa ura siokor hua tokaha bakampe e tuka tar binakang ueuer. Tar binakon u turung hireo tosnogo tamatang kalekinale pare, us liu uakikilanga tar garasa uasa, kara rokokig, karung ualuh taninin, bo mung kale pukuoum tar raes-uit, karung uamokola tenag umang uamoko.’ ”

### **O uelhire uaranga tar uatuna ro douk ra kilain o mastet**

<sup>31</sup>Iesu ke hire poluk tasisina toro giamehe ro uelhire uaranga pare, “A Nitoiang Heuene misiana pare, a tang siokor bulout ke kale tar uatunar mastet, kare la lebe tena iom. <sup>32</sup>A uatunar mastet ter kikitilikintiehe tunur uatuna tar mamang nieinin tar iomo uakap, bo tar binaka puk ro hua kai roon, o la douk uleikingua, temaene o tetiaua ra me uoto toko tang roon, kara tuha tola tenas niu tar ranan.”

### **O uelhire uaranga tar is**

<sup>33</sup>Doh Iesu ke uelhire tauete toro giamehe ro uelhire uaranga pare, “A Nitoiang Heuene misianar sikir is geke kalegir kuah, kare uauelhouara keip tar siokor nouh plaua. Dohi muduhia gininar plaua ke siokor uout kai.”

### **Ae maene ke mene keip Iesu tar uelhire uarang**

<sup>34</sup>A mamang uelhirelik ke uelhireig Iesu tasir tamat, ke uelhire keip uakapa kompe tar uelhire uarang. Ahik tunumpe pah ke peng uelhire

tasisina mo siokoro uelhire mo tabo uelhire uarangan. <sup>35</sup>Ke guatono pare, mare kotpokoso sira tunur inete ke kulameigir propeit pare,

“Inggo u turung guata keip tar uelhire uaranga tar binaka ru ueluelhire tasin, doh inggo u turung hire tasisina tar inete re ouiuouome sioun tun tar binaka ke kotpokosor kot.” Ker 78.2

### A tengkana ro uelhire uaranga toro garasa uasa

<sup>36</sup>Tar binaka ke hiliu Iesu tasir tamat, kare lekala iuma tar um, no uakuakelukono ka lame tatanon, kara me dangata pare, “Hire tamiueim tar tengkana ro uelhire uaranga toro garasa uasa geko tungara tar iom.”

<sup>37</sup>Doh Iesu ke hire tasisina pare, “A tamata geke lebe tar uatuna uaia, inggono ter Tunar Tamat. <sup>38</sup>Doha iomo ter udeilinar uan i kot doha uatuna uaia tesir tamatang tar Nitoiang Heuen, doho garasa uasa tesir tamata gesir nang Satan. <sup>39</sup>Doha uelmatana geke lebe taninin te Satan, doha binakang ueuer ter uadouhinar mareinane tar kot, doho tamatang ueuer tesir anggelou. <sup>40</sup>Misiana tar garasa uasa ra kale toto peig, kara ualuhig toro hue ter siokono sira komper puh re turung kotpokoso tar uadouhinar marein. <sup>41</sup><sup>d</sup>A Tunar Tamat e turung ualatue toсно anggelou mara la kale liu turusina tena Nitoiaono tar mamang inetelikitie re uoto uasuasa teres nitagorong manar tamat, doho tamatasitie ra uoto guata tar niguata uasa. <sup>42</sup><sup>e</sup>Doho anggelou ra turung bakako tasisina toro tukuno hue tar butur ra turung kiring tosin, teeit ra nimaliana pe, kare uelmahingis. <sup>43</sup><sup>f</sup>Doh no tamata God ra turung bala sira tar pisara tena Nitoia Tamas. Geta to talingoumua, ingga o longor!”

### O uelhire uaranga tar bokising mani ger nitouaouo tar iom

<sup>44</sup>Iesu ke kula poluk pare, “A Nitoiang Heuene misiana tar bokising mani ger nitouaouo tar iom. Doha tang siokor tamata ke tupar, kare la touaouo uain poluk. Inggono ke uaha tun, kare la uabulaua tena mamang inetelik, kare la bulaua tar iomonene.”

### O uelhire uaranga toro inekih gero i ranar bulauan

<sup>45</sup>“O giamehe ro uelhire uaranga te pare, a Nitoiang Heuen misiana tar tang siokor tang uabulaua gere sir toro inekih gero i ranar bulauan. <sup>46</sup>Tar binaka ke tuparono toro siok, o bulauana roon o i ranantiehe tun, kare la uabulaua tena mamang inetelik, song ke la bulaua tang roon.”

---

<sup>c</sup> 13.40 Jon 15.6    <sup>d</sup> 13.41 Mat 24.31; 25.31; Mak 13.27    <sup>e</sup> 13.42 Mat 8.12  
<sup>f</sup> 13.43 Dan 12.3

### O uelhire uaranga tar uben

<sup>47</sup>“Doha Nitoiang Heuene misiana pono pare, o gisiamer tamatang uekih ka baka tenas uben i laur, kara huar bureher mamang ian. <sup>48</sup>Tar binaka ke uounur uben, kara reih uahungin i kot, kara la tabilanguasin, kara kedanga tasir ian. Gisisier uia ka utelais tar tolah, doh gisisier sa ka baka liuis. <sup>49</sup>Te misiana kompe re turung pe sira per uadouhinar mareinane i kot. O anggelou ra turung laha, kara me kedanga liu tasir tamata uasa gera uangoul i uantinanina tasir tamata uaia. <sup>50</sup>⁸Kara turung bakalais toro tukun o hue tar butur ra la kiring tosin, teeit ra nimaliana pe, kare uelmahingis.”

### Iesu ke menmene tar niualasirang sioun, doha timuhur niualasir

<sup>51</sup>Doh Iesu ke dangata pare tosno tamatang uakuakeluk, “Inggoum kung naman manate tar mamang inetelikinanine?”

Kara kula tapokisisina pare, “Aa.”

<sup>52</sup>Song ke kula Iesu pagiare, “Temaene o tamatang ualualasira tar ualatut uakapa gera kotpokoso sira pare, o tamatang uakuakeluk tar Nitoiang Heuen, gisina misiana tang tanener uma gere kale tauete tur tar timuhur inet, doha ineter pensiouin tar butur re uoto uamoko tena inet.”

### Iesu ka uelueldein i Nasaret

<sup>53</sup>Doh tar binaka ke menmene uakapa Iesu tar uelhire uaranganine, kare hiliu tar uanon, <sup>54</sup><sup>h</sup>Kare lame tena uan. Kare ualasira to tasir tamata tenas umang lotu. Doh gisis ka lutarantiehe tun, kara ueldangate pare, “Ia ke kale turono tar niate uaiaene, kara niguata popokohonine?” <sup>55</sup><sup>i</sup>Song ka meneng uauanete pare, “Inggono pe deha tuna komper tuhtuha um? Doh inggeig i ate tang Maria te tinanon, doho bung tahinono tes Jems, doh Josep, doh Saimon, doh Judas. <sup>56</sup>Doho bung tatahinalikiono ra uangoul tunane. Iangua ke kale turono tar mamang niate, kara niguata popokohonine?” <sup>57</sup><sup>j</sup>Doh gisina ka hagouo uasa tun, kara ueluelde mata tagorong mana tatanon.

Doh Iesu ke kula pare tasisin, “Na propeit God ra ueltadain toro mamang buturulik, bo tena uan katongon, o tahinalikion, doh tasisina katongo ro matmatame ahik tagu me ueltad.” <sup>58</sup>Doh teene ahik pesina mes nitagorong mana tatanon, ahik tagunguaono pah ke guata to me bureher nitouo tar buturuon.

### Herot e namana tang Iesu pah te Jon ger tang uahuhu

**14** <sup>1</sup>Tar binakon Herot ger toia i Galili ke longoro manasa tar ineteninanine ke guataig Iesu. <sup>2</sup>Kare kula pare tosno tamatang

⁸ 13.50 Mat 13.42; Luk 13.28    <sup>h</sup> 13.54 Jon 7.15    <sup>i</sup> 13.55 Jon 6.42    <sup>j</sup> 13.57 Jon 4.44

kalekinale, “Gine deh te Jon ger tang uahuhu, inggono deh ke tua tapokis tur toro mat, temaene na nitampopokoho sirono pare.”

<sup>3-4</sup>Teene sioun Herot ke kale tang Herodias pare, na kuah. Doh inggonor kuaha na kuaha baka uoum Pilip tahinono Herot. Doh Jon ke kula tang Herot pare, “Ingga ko katego tena ualatut Moses, ko kale pe tar kuaheit!” Temaene ke kusa Herot tang Jon, kare uih tane tatanon, kare uamoko tatanono tar karabus. <sup>5</sup>Doh Herot ke marang uiliatung poust tatanon, bo ke sokoro puk tasir tamatang Ju, teene o burehe ka namana tun tang Jon pare, a propet.

<sup>6</sup>Doh tar binaka ke kotpokosomer marein re namana tapokis Herot tar marein ka pohoin, a tuna Herodias, a kalan, ke me doumane i uoumuha tasir tamatasiner nikil ke me uauaha tang Herot. <sup>7</sup>Temaene Herot ke ualapagaha tatanono pare, e turung heir me hauar inete re dangataiono tatanon. <sup>8</sup>Doh tena niualatoho tinanon, inggono ke dangata tang Herot pare, “Heir kompemeene daana toro luna Jon ger tang uahuhu me peileit.” <sup>9</sup>Doha toia ke ueldolom, karo duh ro balan, bo teene manasa ke ualapagaha to peono tar matasir manai, temaeit ke tangana beilbeiliono tar haua ke dangatainir kuaha kalana tatanon. <sup>10</sup>Temaene, ke ualatuono tar tang siokor soldia ke la tokout toro luna Jon iuma tar umang uih. <sup>11</sup>Doho luna Jon ka uamokolain tar peileit, kara heirin tar kuaha kalan, kare keipinguaono tang tinan. <sup>12</sup>Doh no uakuakeluk Jon ka lame, kara me kale tar tukununon, kara la keu, song ka la, kara la ueluatata tang Iesu.

### Iesu ke ualaein tasir bureher tamat e matoto tar tolimar taosein

<sup>13</sup>Tar binaka ke longoro Iesu toro ueluatata tang Jon, kare panetengua tar bout, kare la tar butur a tabotan me pahen. Doho tamata ka longoro tang Iesu ke la pe tar bout, kara hiliu pono tonoso uan, kara lih uakeluk tatanon i kot. <sup>14</sup>Doh gitie ke la hung pekon, kare banga tasir bureher tamat, doh ke ueldolomontiehe tun tasisin, kare uauia teres momouhusin.

<sup>15</sup>Gitie ke reiu manasa peon, no tamatang uakuakelukono ka lame tatanono, kara me kula pare, “A butur dehene a tabotan, doh inggono gine ke reiu manas. Ueluelutula tasisina ra la toro uaninit ro uahuhut mara bulaua katongosina mes niein.”

<sup>16</sup>Doh Iesu ke kula pare tasisin, “Ae maene ra lasin? Inggoum katongo dehono mung heir me niein tasisin.”

<sup>17</sup>Doh gisina ka kula pare tatanon, “Inggeim deh ahik me mi bureher nieinane. Bo o tolisma kompe ro bereit rasine, doha torikir ian.”

<sup>18</sup>Doh Iesu ke kula pare, “Keipimeane totoguo taninin.” <sup>19</sup><sup>m</sup>Song ke kulono tasir tamata ra tabil i koto toro garas, kare kale toro tolisma ro

<sup>k</sup> 14.3-4 NKP 18.16; 20.21; Luk 3.19-20    <sup>l</sup> 14.5 Mat 21.26    <sup>m</sup> 14.19 Mat 15.35-39; Mak 8.6-10

bereit, kara torikir ian, kare banga kai i Heuen, kare uatakai tang God, kare pispis, kare heir tosno tamatang uakuakeluk, doh gisina ka bul hahai tasir tamata uakap. <sup>20</sup>Doho tamata uakapa ka ein, kara siokor mahmahur. Doho tamatang uakuakeluk ka ute tar siokor hangaul, doha torikir tolaha tang ginitie ke mokomok. <sup>21</sup>Doh gisis ka ein kaelais tar tolimar taosein, o kuah, doho keketik ahik pah ka aha keip taguis, bo gisina ka ein ponompe.

### Iesu ke la i rana tar laur

<sup>22</sup>Doh Iesu ke kula tosno tamatang uakuakeluk ra panete tar bout, kara la uoum tar pang giamehe nar kodom, bo inggon e ueluelu baka tasir tamat. <sup>23</sup><sup>r</sup>I muduhia ke ueltula peono tasir tamat, kare la kai taro tar siusana me pahene tar la lotu. Gitie ke reiu peon, inggon e uangoulumpe me pahen, <sup>24</sup>Doh tar binakonene a bout e uairehe harahahanah i laur, dohe uasusiakain tar butuan, teene a romo ke u tanela tasisin.

<sup>25</sup>Doh na lulein Iesu ke la i rana tar laur tasir tamatang uakuakeluk. <sup>26</sup><sup>o</sup>Doh binaka ka bangasina tatanono re la peha tar laur, gisina ka sokorontiehe tun. Kara kalkaling ualeik tun. Kara kula pare, “A liouan!” <sup>27</sup>Bo Iesu puk ke mene ualahur tasisin pare. “Mu uaongolosioum! Inngo dehon. Ahik pah mung sokor!”

<sup>28</sup>Doh Pita ke mene ke kula pare, “Ir Tamata Noman, ge pare ingga nomanon, kula totoguo maru lahao totomua i rana tar laur.”

<sup>29</sup>Doh Iesu ke kula pare, “Lame.” Doh Pita ke hiuo tur tar bout, kare lihiko i rana tar laur tang Iesu. <sup>30</sup>Bo tar binaka puk ke bangono tar uleikir butuan, kare sokor, kare dududur, kare kula ualeik pare, “Tamata Noman, uaudeil totoguo!”

<sup>31</sup><sup>p</sup>Kare hue ualahurunguako Iesu tar pang limana, kare kusa tatanon, kare kula pare, “Ingga deha kikitilik reng nitagorong man! Ae maene ko tagorong boha?”

<sup>32</sup>Song kura siokor panete rasina tar bout, kare takoutunguar rom. <sup>33</sup>Doh gisit tar bout ka hatup uahiu i koto tar kekenon, kara kula pare, “O mana tun, ingga ter tuna God.”

### Iesu ke uauia tasir bureher momouh o peng Genesaret

<sup>34</sup>Tar Binaka ka sairkoutusina tar kodomo uiluiloh i Galili, kara la hung manas i teh i Genesaret. <sup>35</sup>Doh tar binaka ka la bang parokor tamatang tar buturuono tang Iesu, kara kula tasir gisiamer tamata tar la hireme tasir momouh uakapa tun tar pang uanion, kara keipimeis tatanon. <sup>36</sup><sup>q</sup>Kara dangata uapopokoho tang Iesu, ge para banotong tuha pukusina tono suruna no hikhikuon. Doh gisina uakapasit ka tuha tatanono ka siokor uia tapokis.

<sup>n</sup> 14.23 Luk 6.12; 9.28    <sup>o</sup> 14.26 Luk 24.37    <sup>p</sup> 14.31 Mat 8.26; Mak 4.39

<sup>q</sup> 14.36 Mat 9.20-21

**No uelhire God o i ranantiehe tenas niualasirar mahoh**

**15** <sup>1</sup>Doho Parisi mesir tamatang ualualasira tar ualatut ka la tur i Jerusalem, kara lame tang Iesu. Kara me kula pare, <sup>2</sup>“Ae maene nongo tamatang uakuakeluka ra uoto katego tar ualatutung sioun ger nas ro tubumiueim? Gisin ahik pah ra uoto uabusa tar limas ngohina tar niguatang sioun, song ra ein.”

<sup>3</sup>Bo Iesu puk ke kula tapokis pare, “Doh maene rung uoto katego ponoum tena ualatut God, karung uairana tenas ualatut ro bung tubumiu? <sup>4</sup>‘Ge God pe ke kula pare, ‘Ueltada tang tamoum, doh tinoum, doh mair tamata ahik pahe ueltada tang taman ue tinan, inggono ra turung uiliatung poustin.’<sup>5</sup> <sup>5</sup>Bo inggoum mung uoto kula pare, ‘A tamat e banotong hire tang tamana ue tinan pare, inggo nag inete ru banotong guatain tar poult tamiraoum, bo ku heir manasa tar inetono tang God.’ A tamatonene ahik mena niueltada tang taman, doh tinan. <sup>6</sup>Tar hagarionene, inggoum mung uoto bangan duk tono uelhire God, karung ueltada ter namiuir niguata kung kale turig toso bung tubumiu. <sup>7</sup>Inggoum o tang uelhire kokop! Propeit Aisaia ke kulkula hung tunumpe tamiuoum tar binaka ke kula pare,

<sup>8</sup> ‘O tamatasine ra uataakai keip kompe totoguo tar bilis,  
bo i lolono puk tar koloususin, doh res ninaman e uairehe tun  
totoguo.

<sup>9</sup> Gisin a tabo tengkana ra lotu pe totoguo,  
ter hauono gisina ra ualasira sira tenas ualatutur tamata paha  
nougou.’ ”

*Aisaia 29.13*

**Iesu ke uelhire uakalahara tar inete re banotong guata  
tar tamata mara hik paha delauana tar matana God**

<sup>10</sup>Doh Iesu ke kila totome tasir tamata tatan, kare kula pare tasisin, “Mu ualongor, karung naman manate! <sup>11</sup> ‘A inete gere lako i lolono tar uauanar tamat, ahik pah tere uauia tatanono tar matana God. Bo a inete gere tauete turuha tar uauanono tere guata tatanon, maetingua re la kotpokoson ahik paha delauan.”

<sup>12</sup>Song ka lame no tamatang uakuakelukon, kara me kula pare, “Ingga o ate pare, ko uahagouo uasa pe tasir Parisi tar inete ko menmeneig?”

<sup>13</sup>Doh Iesu ke hire tapokis pare, “A mamang doukulik uakapa ge ahik Tamougouenah i Heuene pah teke lebe ra turung us kaig. <sup>14</sup> ‘Bangan duk tasisin! Gisin o kut, doh nosio tang uoum keipir kut, doh tar binaka re uoum keipir kut tar kut rasin ura siokor sololoko tar tung.”

<sup>r</sup> 15.4 KT 20.12; 21.17; Ual 5.16    <sup>s</sup> 15.4 Bolobolong Tenas Kalekinaler Pater 20.9

<sup>t</sup> 15.11 Mat 12.34    <sup>u</sup> 15.14 Luk 6.39; Roum 2.19

<sup>15</sup>Doh Pita ke dangata pare tatanon, “Uelhire uakalahara tar tengkana ro uelhire uaranga rone tamiueim.”

<sup>16</sup>Doh Iesu ke kula pare, “Ue ge inggoum pe halana ponompe tung naman manate? <sup>17</sup>Ahikoum pah mung banga, a inete gere lako i lolono tar uauanar tamat e lako toro balanon, song re la tauete liu tar tukununon. <sup>18</sup>Ge i lolono pe tar kolounor tamata tere la turur ninamana uasa gere uasa tar tamat. <sup>19</sup>Ge i lolono pe tar kolounor tamat tere la turur ninamana uasa gere uakeip tatanono tar tung pous, karo le ra guata toro ur, doho kamobo ra guata sira pon, kara guatampe tar giniamerher niguata uasa misiana tar uenau, ra boh ue ra mamantouo tar hangasir gisiamer. <sup>20</sup>Ter hagarininanine re banotong guata tar tamat ahik paha delauan. Bo tar ein puk tar binak ahik pah ko uabus tar limoum, a puhon ahik pahe banotong guata tar tamata mara hik paha delauan.”

### **Na nitagorong manar kuah ge ahik paha Ju**

<sup>21</sup>Song ke hiliu Iesu tar uanon, kare la tar pang uan i Tair dohi Saidon. <sup>22</sup>Doha tang siokor kuaha toro matinang Kenan, ahik paha Ju, e uangoul tar buturuono ke lame tang Iesu, kare me kula ualeik kirkiring pare, “Ir Tuna Debit, ueldolomo totoguo! A tuguo ger kuah, e uangoul teilir liouana uasa tatan, dohe hagouo uasa keip tun tar uelmahing.”

<sup>23</sup>Bo Iesu puk ahik mate mene me puh tatanon. Doh no tamatang uakuakelukono ka kula uapopokoho tatanono pare, “Uelueluata liu tatanon! Ge inggono pe gine re kekete teil tagigeig, doh ke uamenemen!”

<sup>24</sup>“Doh Iesu ke kula pare, “God deh ke heir pukuha totoguo tasir tamatang Israelesit geka misiana tasir sipsipsitie ka heil.”

<sup>25</sup>Bo git pukur kuaha ke lame, kare me hatup i uoumuhia tang Iesu, kare kula pare, “Ir Tamata Noman o poul totoguo.”

<sup>26</sup>Doh Iesu ke kula tapokis pare, “Ahik dehono paha uia tar kale tena nieinir keketik, kara uakihaig tasir lo.”

<sup>27</sup>Doh gitir kuaha ke kula tapokis pare, “O mana tunumper Tamata Noman, bo o lo puk pono ra uoto ein tar siksikir niein gere pungpunga uahiu tur i rana tenas teboul ro taneis.”

<sup>28</sup>Song ke kula Iesu pare, “Ingga a kuaha reng nitagorong mana uleik! A haua ro malahiria, ra guata sirain ro malahir pea.” Doh tar binaka kompeon a tunono ke uangua kompe.

### **Iesu ke uauia tasir bureher momouh**

<sup>29</sup>Iesu ke hiliu tar buturuon, kare lihila tar kodom i Galili. Ke lih kai taroono tar hiuhiuon, kare la tabila uahiu. <sup>30</sup>Doho bureher tamata

ka lame tatanono ra keip teil tasir peil, o kut, o pau, o kikumor, doho burehemper mat, kara me uamoko uamatotois tar kekena Iesu mare uauiaono tasisin. <sup>31</sup> <sup>w</sup>Doho tamata ka lutarantiehe tun tar binaka ka banga tasir pau ka mene tapokis pe, karo tamatasitier kikumoro ke udeil tapokisir tukunus, doho peil ka la uaia, doho kut ka bang, doh gisina ka uatakai tenas Godor Israel.

### Iesu ke ualaein tar toto tamat e matoto tar toueitir taosein

<sup>32</sup> <sup>x</sup>Doh Iesu ke kila totome tosno tamatang uakuakeluk, kare kula pare, “Inggou u ueldolomo tasir tamatasine, teene gisina ka uangoul tagu totoguo tar touonor marein, doh gine daan ahik manasasina me inete ra einin. Inggou u de pono matu uelueluata puk tasisin o tabung ualaein geta pungpunga teililasina tar lel.”

<sup>33</sup> Doho tamatang uakuakeluk ka kula pare tatanon, “Ia ring la sir tureim me niein tar buturener padenen maring uauelmatout tar ualaein tasir tamatasiner burburehe puk.”

<sup>34</sup> Doh Iesu ke dangata pare, “Inggoum romio touih ro bereit?”

Kara kulasina pare, “O mouit pukumpe, doha toking iaianalik.”

<sup>35</sup> Song ke kula Iesu tasir tamata ra tabila uahiu i kot mara tabilang ein. <sup>36</sup> Song ke kaleono toro mouit ro bereit doha ian, kare uatakai tun tang God, kare pis taninin, kare heir taninina tasir tamatang uakuakeluk, kara bul pakahasina tasir tamat. <sup>37</sup> Doh gisina uakapa ka ein, kara mahmahur, doho tamatang uakuakeluk ka ute tar mouitir tolah mokomok. <sup>38</sup> Doh gisis ka ein ke matotois tar toueitir taosein, o kuah, doho keketik o tabung aha keip tagu tasisin, bo ka ein tagu ponompe. <sup>39</sup> Song ke uelutula liu Iesu tasir tamat, kare panete tar bout, kare la tar pang uan i Magadan.

### O Parisi ka dangata tang Iesu tar guata me uaparok e la tur i Heuen

**16** <sup>1</sup><sup>y</sup>O gisiameher Parisi doho Sadiusi ka lame tang Iesu, kara me marang uatolau keip tenas puhung dangata tatanono tar guata ualasira tasisina me niuaparok, e la tur i Heuen.

<sup>2</sup> Bo Iesu puk ke hire tapokis tasisina pare, “Tar binaka re hutigir pisar, inggoum mung kula pare, ‘Inggou e turung binaka uaia, teene re kubkubara per langit.’ <sup>3</sup> Doh tar liliuulik, inggoum mung kula pare, ‘Inggou e turung huan, teene a langit e kukurum, kare pilar pil.’ O mana noman, inggoum mung banotong bang paroko uaia tun tar marein, hape re baka pe rung banga to peoum tar langit, bo ahik pukuoum pah mung naman manate tang hingiar uahire, re uahirein Godene daan. <sup>4</sup> <sup>z</sup>O

<sup>w</sup> 15.31 Mak 7.37    <sup>x</sup> 15.32 Mat 14.14    <sup>y</sup> 16.1 Mat 12.38; Luk 11.16    <sup>z</sup> 16.4 Mat 12.39; Luk 11.29



tamatang daan, gisin o tamata uasa, doh gisin ahik pahe uoto uiar balas tang God, ra uoto pe tun pare, ra banga baka me uaparok. Bo gisina puk ahik pah ra banotong banga me uaparok. Ahik noman. Ter sioko komper uaparoko ra turung bangainisina tena uaparoko propeit Jona.” Song ke hiliu Iesu tasisin, kare la.

**Iesu ke uatagin tosno tamatang uakuakeluk  
tenas niualasirar Parisi doho Sadiusi**

<sup>5</sup>Tar binaka ka sairkoutular tamatang uakuakeluk tar pang giamehe nar kodomo tar butur re uangoul Iesu, gisina ka malabobour mata kale tagu mo bereit. <sup>6</sup>“Doh Iesu ke uatagin tasisina pare, “Mu tagin teil, karung tur uapopokoho teres isir Parisi, doho Sadiusi.”

<sup>7</sup>Doh gisina ka ueluelmene katongois, kara kula pare, “Inggono deh here ke kula sira pare, teene ahik pe inggeig pahi kale teil mo bereit.”

<sup>8</sup>Doh Iesu e ate teil manasa tar haua ra ueluelmeneinis, kare dangata pare, “Ae maene rung namanantiehoun pare, ahik pe pah mung kale teil mo bereit? Inggoum a kikitilik tunumpe remi nitagorong man! <sup>9</sup><sup>b</sup>Inggoum halanampe tung naman manate? Ahikoum pah mung namana huara tar binaka ku pispiso toro tolma ro bereit tar tolimar taoseinir tamat? A touihar tolah mokomoko kung utesioum? <sup>10</sup>“Doh hape toro mouit ro bereit gero eisir toueitir taoseinir tamat? A touihar tolah mokomoko kung utesioum? <sup>11</sup>Hapeono maene ahikoum pah mung naman manate tar binaka ku hireo tamiuoum tar tagin teil teres isir Parisi, doho Sadiusi? Inngo ahik pah ku menmene toro bereit noman.” <sup>12</sup>Song ka naman manater tamatang uakuakeluk pare, ahikiono pah ke uatagin tasisina tar kaueke katongois tar isinar bereit, bo tenas niualasirar Parisi, doho Sadiusi.

**Pita ke hire tauete mai tun Iesu**

<sup>13</sup>Doh Iesu ke lala tar pang uan uleik i Sisaria Pilipai tar butur ke dangata toono tosno tamatang uakuakeluk pare, “Mai tunuonener Tunar Tamat, ra uoto kula per tamat?”

<sup>14</sup><sup>d</sup>Kara kulasina pagiare, “O gisimehe ra kula pare, ingga te Jon ger tang uahuu. Doho gisimehe ra kula pare, ingga Elaija, doho gisimehe ra kula pare, ingga Jeremaia ue a tang sioko ponomper propeit.”

<sup>15</sup>Doh Iesu ke dangata tasisina pare, “Bo inggoum hape rung kula pe totoguo mai?”

<sup>16</sup><sup>e</sup>Doh Saimon Pita ke hire tapokis pare, “Ingga te Kristo, a tuna God ger tua.”

---

<sup>a</sup> 16.6 Luk 12.1   <sup>b</sup> 16.9 Mat 14.17-21   <sup>c</sup> 16.10 Mat 15.34-38   <sup>d</sup> 16.14 Mat 14.1-2; Mak 6.14-15; Luk 9.7-8   <sup>e</sup> 16.16 Jon 6.69

<sup>17f</sup>Doh Iesu ke kula pare, “Ingga o banotong uaha Saimon ger tuna Jona, ge a puh peonene ahik pah ke la tur me tamat, bo ke heir katkatongompein Tamouguoenah i Heuen. <sup>18g</sup>Doh inggo gine ru hire totomua, ‘Ingga Pita, o palau, doh toro palaua roon inggo u turung tuh uapono tenag sios.’ Doh na nitampopokoho ro mat ahik paho banotong kale uahiuata tanon. <sup>19h</sup>Inggo u turung heir totomua tar ki nar pirpirik tar Nitotiangu Heuen, doha inete gero uih tane giaane i kot, God e uih tane pono tanininanah i Heuen, doha haua ro luaka liuigiaane i kot, God e luaka liu pono taninin i Heuen.” <sup>20</sup>Song ke kula uapopokoho Iesu tosno tamatang uakuakeluk pare, ahik tun pah ra hirhire ueltebeir me tamata pare, teono pe te Kristo.

### Iesu ke hire pare, e turung mat, kare tua tapokis

<sup>21</sup>Tar binakameon, Iesu ke uakekene tar hire uakalahara tosno tamatang uakuakeluk pare, “Inggo dehu la i Jerusalem, karu turung kale tur me bureher uelmahing tasir mamahoholik, doh tasir patere uleik, doho tamatang ualualasira tar ualatut. Inggo ra turung uiliatung pouuio, bo tar uatouononor marein puk inggo ra turung uatentur tapokis polukuio.”

<sup>22</sup>Doh Pita ke kila liu tang Iesu, kare me uelukur tatanon. Kare kula pare, “Ir Tamata Noman, ahik tun! A puh dehonene ahik pahe banotong kotpokoso totomua!”

<sup>23</sup>Doh Iesu ke tur bangala tang Pita, kare kula pare, “Satan o uareing totoguo! Ingga deho turtur tane puk tenag hagario, teene reng ninamananine ahik pahe la tur tang God, bo tena ninamana pukur tamat.”

<sup>24i</sup>Song ke kula Iesu tosno tamatang uakuakeluk pare, “Gete me tamat e marang uakeluk totoguo, inggono pake de tar inete re malarai, kare huata tena korose, kare uakeluk totoguo. <sup>25j</sup>Ge a tamata pe gere kapil uanono tena nitua, na nituaon e turung rouo tatanon, doh mair tamata re heir tena nitua re uakeluk pe totoguo, inggon e turung tupara tena nitua. <sup>26k</sup>Ge a haua pe re turung kaleinir tamata gete siokor gono tar mamang inetelikane tar kot, kare oroho tena nitua? Ahik manasampe me inete baka poluk re banotong heiriono tar kale tapokis tena nitua. <sup>27l</sup>Ge a Tunar Tamata pe ke uahuhutung lame, menia keip tosno anggelou i lolono tar balbalana na nitampopokoho Taman, kare me heir me niduh ue me buluasir tamat e uelmatout keip to tar haua ka guatainisin. <sup>28O</sup>mana tun, inggo gine ru hire tamiuoum, o gisiameh gisis ra uangoul

<sup>f</sup> 16.17 Gal 1.15-16    <sup>g</sup> 16.18 Jon 1.42; Epe 2.20    <sup>h</sup> 16.19 Mat 18.18; Jon 20.23

<sup>i</sup> 16.24 Mat 10.38; Luk 14.27    <sup>j</sup> 16.25 Mat 10.39; Luk 17.33; Jon 12.25    <sup>k</sup> 16.26 Mat 4.8-9

<sup>l</sup> 16.27 Ker 62.12; NU 24.12; Mat 25.31; Roum 2.6; UGO 22.12

haraha daan, gisin ahik pah ra turung mat e tuka geta bangasina tar Tunar Tamat e la keipime tena Nitoia.”

### A tukununa Iesu ke giamehe siok

**17** <sup>1</sup>Kura karuh bakar tonomor marein song ke keip taro Iesu tas Pita, doh ramamahialik Jems me Jon tar siusan a i ranantieh, kara la uangoul tar buturuono mes pahes. <sup>2</sup><sup>m</sup>Doh gitie ra uakeis uanono pesin, a tukununa Iesu ke uapalih pare, ke giamehe siok. A porenono ke bala sira tar pisara doh na hikhikuono ke gaugaulintiehe tun, kare abeabantiehe misiana tar luh. <sup>3</sup>Doh gisinar tang touono ka bang huara pono tas Elaija me Moses ura ueluatata tur keip tang Iesu.

<sup>4</sup>Doh Pita ke banga, kare kula pare tang Iesu, “Ir Tamata Noman, auia tunumpe ring uangoul pe inggeimane! Geto malara ingga, inggo u turung tuha me touonor taluhane, me sioko me noumua, me siokor nang Moses, doh me siokor nang Elaija.”

<sup>5</sup><sup>n</sup>Gitie re menmene peon, karo me ragom tane ro mahar langit tasisin, o abeabantiehe tun, kara longoro tar men e la tur toro mahar langit, e kula pare, “Gine ter tuguu, u malaelhirintiehe tun tatanon. Mu longoro tatanon.”

<sup>6</sup>Tar binaka ka longoror tamatang uakuakeluk tar menenanine, kara sokorontiehe tun, kara baka uahiuais, ka rakop i kot. <sup>7</sup>Doh Iesu ke lame tasisin, kare tuha tasisin, kare kula pare, “Mu tentur, kara hik pah mung sokor!” <sup>8</sup>Song ka banga kaisin, bo ahik puk pah ka banga me tang giameher tamat, bo Iesu kompe me pahen.

<sup>9</sup>Doh gitie ra la uahiua pekosina tar siusan, Iesu ke kula uapopokoho tasisina pare, “Ahik pah mung hirhire me tamata tar puhene ke ualairain God tamiuoum e tuka geta uatentur tapokisnir Tunar Tamata toro mat.”

<sup>10</sup><sup>o</sup>Doho tamatang uakuakeluk ka dangata pare tang Iesu, “Bo aeono maene ra kular tamatang ualualasira tar ualatut pare, ‘Elaija tere turung la uakikilangame?’ ”

<sup>11</sup>Kare kula Iesu pare, “Elaija e turung la uakikilanga nomaname, kare me turung kaleuatoro tar mamang inetelik. <sup>12</sup><sup>p</sup>Bo inggo gine ru hire tamiuoum pare, Elaija ke la manasame, doho tamat ahik pah ka bang paroko tatanon, ka uakeluk kompe teres nimalar, kara guata tar bureher niguata uasa tatanon. Ter siokono sira kompe ra turung uelsakil pesina, kara uaelmahing tar Tunar Tamat.” <sup>13</sup><sup>q</sup>Song ka naman manater tamatang uakuakeluk pare, inggon e menmene uatuha tola tang Jon ger tang uahuu.

<sup>m</sup> 17.2 2Pi 1.16-18    <sup>n</sup> 17.5 Ual 18.15; Ker 2.7; Ais 42.1; Mat 3.17; Mak 1.11; Luk 3.22

<sup>o</sup> 17.10 Mal 4.5    <sup>p</sup> 17.12 Mat 11.14    <sup>q</sup> 17.13 Luk 1.17

**Iesu ke uauia tar keketik bulout e uangoul teilinir liouana uasa**

<sup>14</sup>Tar binaka ka tapokisahasina tasir manai tamat, a tang siokor bulout ke lame tatanon, kare me hatup uahiu i koto tang Iesu, <sup>15</sup>Kare kula pare, “Ir Tamata Noman o ueldolomo baka tar tuguo, inggon a uoto lolong kapul, dohe uoto mate uasa tunungua, doha bureher binak e uoto pungulaono toro hue ue i laur. <sup>16</sup>Doh inggo ku keipime tatanono tosnongo tamatang uakuakeluka, bo gisina puk ahik pah ka banotong guata uaua tatanon.”

<sup>17</sup>Doh Iesu ke kula pare, “Ah, inggoum deher tamatang daan! Ahik tunumpe me emi nitagorong mana tang God! Remi ninamanoum doh nami niguat ahik tun paha kodkodoh. Paka touihar binaka ru uangoul keipio tamiuoum song rung tagorong manoum? Mate hape ru uangoul uabarah keip pelao tamiuoum? Keipime tar keketik totoguo.” <sup>18</sup>Doh Iesu ke uelkukur tar liouana uasa, kare hiliuinguaono tar keketik, doh tar binakangua kompeono ke uia tapokison.

<sup>19</sup>Dohi muduhia ka lamer tamatang uakuakeluk mes pahes, kara me dangata tang Iesu pare, “Aeono maene ahikieim pah king banotong geil liu tar liouana uasa e la tar keketik?”

<sup>20</sup>Doh inggono ke kula pare tasisin, “Teene inggoum a kikitilik remi nitagorong man. Ge inggo pe gine ru hire tamiuoum toro man geta uleik sira reng nitagorong mana tar uatuna ro douk ra kilain o mastet, ingga o banotong kula tar sisanene pare, ‘O in turane, karo inilala,’ kare turung ininguaon. Doh ahik me siokor inete re turung parakukuhin tamiuoum tar kuat. <sup>21</sup>Bo ter lotu puk manas, doh gete ueilir tamat, song re banotong geil liu tasir inetesinasine, ahik me giameher lele baka poluk.”<sup>t</sup>

**A uatorikinar binaka ke hire Iesu pare, e turung mat, kare tua tapokis**

<sup>22</sup>Tar binaka ka la toto tokahar tamatang uakuakeluk i Galili, kare hire Iesu pare tasisin. “A Tunar Tamata ka uahuhutung heir manasain tar limasir tamat, <sup>23</sup>gera turung uiliatung pous tatanon, bo tar uatouononor marein puk inggono ra turung uatentur tapokisin.” Doho tamatang uakuakeluk ka ueldolomontiehe tun.

**A buluanar takis tar umang lotu ger dedeil**

<sup>24</sup>Tar binaka ka lame Iesu mesno tamatang uakuakeluk i Kaperneam, o tamatang kalkale tar buluanar takis tar umang lotu ger dedeil ka lame tang Pita, kara me dangata pare, “Nami tamatang ualualasiroum e uoto bulaua tagumpe tar buluanar takis tar umang lotu ger dedeil?”

<sup>r</sup> 17.19 Mat 10.1   <sup>s</sup> 17.20 Mat 21.21; Mak 11.23; Luk 17.6; 1Ko 13.2   <sup>t</sup> 17.21 A giniamer bolobolon sioun tabo teilinir 17.21.   <sup>u</sup> 17.22 Mat 16.21   <sup>v</sup> 17.24 KT 30.13; 38.26

<sup>25</sup>Doh Pita ke kula pare, “Aa.”

Tar binaka ke lekala Pita iuma tar um, kare uelhire uakikilanga Iesu pare, “Saimon, hape ro namana pea? O toia toro gavamanane i kot ra uoto kale tur tar takis tosnosio tamata ue tasir gime tamat?”

<sup>26</sup>Doh Pita ke kula pare, “Tasir gime tamat.”

Doh Iesu ke kula poluk pare, “Uelik, nosio tamatasina deh ahik tagu pah ra heir me takis. <sup>27</sup>Bo a sa kompe geti uahagouo uasaeig tasisin, kara nimaliana tagigeig. Innga o la tar kodomo uiluilo h i Galili, karo la uahiu tar iauon, karo reh kai tar uakikilanganar iana gere kalotoin tar iail, dohi lolono tar uauanon e moko teilir mani e matoto tenag buluanar takiso doha noumua. Kale tatanon, karo heir tasisina tenagira buluanar takis raeig, kare guata siranguaon.”

### Mair tamata uleikintieh tar Nitoiang Heuen?

**18** <sup>1</sup> Tar binakon o tamatang uakuakeluk ka lame tang Iesu, kara me dangata pare, “Inggeim mi marang iate pare, mair tamata uleikintiehe tun tar Nitoiang Heuen?”

<sup>2</sup>Doh Iesu ke kilame tar keketik, kare uatur tatanon i uoumuhia tasisin, <sup>3</sup>Kare kula pare, “O mana tun, inggo gine ru hire tamiuoum geta hikoum pah mung uapalih, karung misiana tasir keketik, inggoum ahik pah mung banotong lekala tar Nitoiang Heuen. <sup>4</sup>Temaene mai re kale uahiuain, kare kotpokoso sira tar keketikene, inggono tere turung tamata uleik tar Nitoiang Heuen. <sup>5</sup>Doh mair tamata re uaha uangoul me tang siokor keketik misianene, inggono ke uaha uangoul totogou.”

### Iesu ke uatagin tar niguatang reih tasir gisiameher tamata mare punga res nitagorong man

<sup>6</sup>“Bo gete me tamata puk re guata me keketikisinasine re tagorong mana totogou, e punga na nitagorong mana mare guata me niguata uasa, auiantiehe tatanonor tamata ge paka loloin ro uekuekono mo palaua uleik, kara la uadudurin tar kukurumun.”

<sup>7</sup>“Kuasalik tunumper tamatang gane i kot. Gisina ra uoto uapunga teres nitagorong manar gisiameher tamata mara guata tar niguata uasa. O mana noman a ineteninanine e turung kotpokoso dedempe, bo a ualaueldolomo puk tang mai re turung uakotpokoso tar hagarinin. <sup>8</sup>Doh geta limoumuaono ue a kekeimua re reih totomua tar guata me niguata uasa, tokout liu, karo bak! A uiantiehe geto la pukua ahik me limoum ue ahik me kekeim, karo kale tar nitua gere moko dede. Ter sa geta torikir limoumua doha torikir kekeim, kara baka uadeililaia toro hue rotie ahik

<sup>w</sup> 18.1 Luk 22.24    <sup>x</sup> 18.3 Mat 19.14; Mak 10.15; Luk 18.17    <sup>y</sup> 18.5 Mat 10.40; Luk 10.16; Jon 13.20    <sup>z</sup> 18.8 Mat 5.29-30

paho uoto lomoh. <sup>9</sup>Doh geta matoumuaono re uapung tereng nitagorong mana maro guata tar niguata uasa, kale liu tatanon, karo baka liu. A uiantiehe geto la keip pukua tar pang siokor pang matoum, karo kale tar nitua gere moko dede. Ter sa geto la keipia tar toking pang matoum, kara bakalaia toro hue i Hel.”

### O uelhire uaranga tar sipsip geke heil

<sup>10-11</sup> <sup>a</sup> <sup>b</sup>“Mu tagin teil, getung namana bo inggoum pare, o iinetelik pukur keketikisinasine, karung bangang uelsakil me tang sioko tasisin. Ahik tun. Inngo gine ru hire tamiuoum, tar mamang binakalik i Heuen noso anggelousina ra banga tar porene Tamouguoenah i Heuen.”<sup>c</sup>

<sup>12</sup>“Inggoum mung namana ah, gete me tamata mena hangaulur hangaulur sipsip, doh me sioko tasisin e heil, inggon e hiliu tasisisir lusiour hangaul, doha lusio, kare la sir taneneit ke heil. <sup>13</sup>Inngo gine ru hire tamiuoum, tar binaka re tuparano tatanon, inggon e turung uahantiehe liu tun tanene ke tuparain tasisisir lusiour hangaul doha lusio. <sup>14</sup>Ter siokono komper hagar, Tamamiuoumenah i Heuen e de me tang siokor keketikisinasine mate rou.”

### Hape ro banotong poul pe ingga tang tahim tar binaka re guata me niguata uasa totomua

<sup>15</sup> <sup>d</sup>“Gete guata uasa me tahimua totomua, o la uelhir tatanon, karo la uelhire ualasira tar haua ke guata uasaion. Bo mura uakodkodoh uaouo puk raoum. Gete longorono totomua, ingga ko reih tapokis tang tahim. <sup>16</sup>“Bo geta hikiono pahe longoro totomua, kale me tang sioko ue me tang torik baka polukur tamata tar la tagu totomua mara tang torik ue a tang touonor tamata ra tur keip tar puh ko tohotolaia tatanon, kara bangeah. <sup>17</sup>Doh geta hikiono pahe longoro tasisin, song ro hire ingga tar sios, doh geta hik ponono pahe longoro tasir tamata uakap, karo guata sira tatanono tasisisir ueuenau, doho gisiamer tamata gera tele tar God noman.”

<sup>18</sup> <sup>f</sup>“Inngo u uamana tun tamiuoum, a haua rung uih tanegioumane i kot, God e turung uih tane pono tanininanah i Heuen. Doha mamang inetelik rung luaka liuigioumane i kot, God e turung luaka liu pono taninin i Heuen.”

<sup>19</sup> <sup>g</sup>“Doh inggo u hire poluk pare tamiuoum, gete me tang torikir tamata tamiuoumane i kot ura ueluauiiae tar dangata me inete geura

---

<sup>a</sup> 18.10 Hib 1.14   <sup>b</sup> 18.11 Luk 19.10   <sup>c</sup> 18.10-11 O gisiamer tamatang iate ra namana pare, a giameher puhung uelhire e moko teil pono tar puhene. A puhon e kula pare, “Ter hauon, a Tunar Tamat ke laha tar me kale tapokis tasir tamata geka heil.”

<sup>d</sup> 18.15 Luk 17.3; Gal 6.1   <sup>e</sup> 18.16 Ual 19.15; Jon 8.17   <sup>f</sup> 18.18 Mat 16.19; Jon 20.23  
<sup>g</sup> 18.19 Mak 11.24; Jon 15.7

dangatain ue ura lotuin, Tamouguoenah i Heuen e turung heir tasrasin. <sup>20</sup>Ge a butur pe geura uangoul tokahainir tang torik ue a tang touon, inggo u uangoul tagu i uantinanina tasisin.”

**A inete uleik maene ra kuse luarraig res niguata uasar gisiameh**

<sup>21</sup>Tar binakono ke lame Pita tang Iesu, kare me kula pare, “Ir Tamata Noman gete guata uasang puk pela tahiguo totoguo, a touihar binaka ru kuse luara tapokisio tatanon? Here tuka tar mouitir binaka?”

<sup>22</sup><sup>h</sup>Doh Iesu ke kula pare tatanon. “Ahik, ahik dehono paha mouitir binak, bo a mouitir hangaul, kara mouitir binak.”

<sup>23</sup>“Ge a Nitotiing Heuene pe misiana pare, a siokor binak e uangoulur toia, doh inggono ke marang bangaeha toso tamatang kalekinale geke kalkale puk baka tar mani tatanono mare kale tapokisio taninin.

<sup>24</sup>Inggono ke nihing bangaeha kompe, doh ter binakono ka keip pokosomeinir tang sioko tasisina geke kalkale puk baka tar hangaulur hangaulur mani. <sup>25</sup>Doh gitie ahik peono pah ke matotong heir tapokis tar manionener ululeik puk, kare kula uapopokohor toia tatanono meso bung tun, doh na kuaha pare, ra uabulauais menia keip tenas mamang inetelik tar uakapa tar bulauanar manionener ululeik puk. <sup>26</sup>Doh gitir tamatang kalekinale ke punga uahiu i kot, kare hatup i uoumuhia tar toia, kare kula pare, ‘Ir Tamata Uleik, ingga deho uanguangoul hamas, karo heir baka me binaka totoguo maru turung heir tapokisio tar mani uakapa tun!’ <sup>27</sup>Doh gitir toia ke ueldolomo tatanon, kare uamaluaana tatanon, kara hikingua ponompeono pah ke bulaua tar inete ke kalkale puk bakaig.”

<sup>28</sup>“Bo inggono pukur tamatonene ke tauetela i kalahar, kare la ueltupara tang uanoton geke kalkale puk baka tar mani tatanon, bo a papagalik pukunin. Kare kusa tane tatanon, kare uoho konomo toro uekuekonon, kare kula pare, ‘Ingga pako uamate baka tar mani uakapa tun giniane ko kalkale puk baka turig totoguo.’ <sup>29</sup>Doh git uanotonono ke longoro tar puhung kulonene, kare punga uahiu i kot, kare hatup uahiu tar kekenon, kare kula pare, ‘Ingga deho uanguangoul hamas, karo heir baka me binaka totoguo maru turung heir tapokisio tar mani uakapa tun!’ <sup>30</sup>Doh inggonor tamatonono ke ueluelde, ahik pah ke marang ueldolomo ue e heir me binaka tatanon, kare uamoko tatanono tar umang uih e tuka gete uamate uakapa bakono tar manininanine.”

<sup>31</sup>“Tar binaka ka bangar gisiamehe ro uauanotous rasina tar haua ke kotpokoso kara lutarantiehe tun, kara hagouo uasa, maeit ka lasina tar toia, kara la hire tatanono tar mamang inetelik. <sup>32</sup>Song ke kila tapokisir toia tatanoneitir tamatang kalekinale, kare kula pare, ‘Ingga deha tamatang

<sup>h</sup> 18.22 Luk 17.4

kalekinale uasa. Banga tagu! Uakikilangan ingga ko kiring totoguo, doh inggo ku uamaluana tar mamang inetelik ko kale puk bakagia, teene ko dangata pe ingga. <sup>33</sup>Ingga deh pako ueldolomo tang uanotomene ura uoto kalekinale tokah misiana ku ueldolomo pe inggo totomua.’ <sup>34</sup><sup>i</sup>Doh gitir toia ke nimaliantiehe tun, kare uamokola tar tamatang kalekinaleonene tar umang uih tasir tamata gera turung heir tar uelmahing tatanon e tuka gete uamate uakapa tun bakono tar udeilinear mani.”

<sup>35</sup><sup>j</sup>Doh Iesu ke la uelhire uakapa to pare, “Ter siokono sira kompe re turung guata pe Tamougou i Heuene tasir mamang tamatalik geta hikoum pah mung kuse luara tenas niguata uasa ro bung tahimiu i lolono tar koloumiu.”

### Iesu ke ualasira hape gete uelueluata liuir bulout tena kuah

**19** <sup>1</sup>Gitie ke menmene uakapa baka pe Iesu tar ineteninane, kare hiliu tar pang uan i Galili, kare la tar pang uan i Judia tar pang giamehe nar kodom i Jordan. <sup>2</sup>Doho manai tamata ka uakeluk tatanon, doh inggono ke uauia to tasisina tar buturuon.

<sup>3</sup>Doho gisiameher Parisi ka lame tang Iesu tar me uatolaua tatanon, kara me dangata pare, “Nagi ualatoheig, e uauia tar bulout tar uelueluata liu tena kuaha tena nimalar?”

<sup>4</sup><sup>k</sup>Doh Iesu ke kula pare, “Inggoum kung timana manasa tonu uelhire God gero kula pare, ‘Sioun, sioununtiehe tun tar binaka ke touo God tar mamang inetelik, inggono ke touo tasir tamata pare, a bulout doha kuah.’ <sup>5</sup><sup>l</sup>Doh God ke kula pare, ‘Ter tengkanonene, a bulout e hiliu tang taman, doh tinan, kaura la uangoul tokaha mena kuah, doh rasin ura la kotpokoso pare, a tang siok.’ <sup>6</sup>Gitie ahik manasa pe rasina paha tang torik, bo kura la tang siok, ahik baka poluk me tamata re pakaha tar haua ke uamoko tokahain God.”

<sup>7</sup><sup>m</sup>Doho Parisi ka dangata tatanono pare, “Bo ae maene ke heir Moses tar puhung kula pare, ‘A bulout e banotong bolo mo bolobolong ueltageih toro le, kare uelueluata liuinir kuah?’”

<sup>8</sup>Kare kula Iesu pare, “Teene inggoum a pirikir lumiu, karo mahang longoro tena niualasira God, temaene ke uamaluana Moses tamiuoum tar uelueluata liu tosnomio kuah. Bo sioun puk tar binaka ke touo God tar mamang inetelik, ahik uadeilimpe me puh sira baka pare. <sup>9</sup><sup>n</sup>Doh gete me kuaha me le, ahik pah ke ura keip tar tang giameher bulout, doh na bulouton e uelueluata liu tatanon, kare la le me tang giameher kuah, a buloutonene teke guata toro ur, kare guata tar niguata uasa tena kuaha uakikilang.”

<sup>i</sup> 18.34 Mat 5.25-26    <sup>j</sup> 18.35 Mat 6.15; Mak 11.25; Epe 4.32; Kol 3.13    <sup>k</sup> 19.4 Uak 1.27; 5.2    <sup>l</sup> 19.5 Uak 2.24; Epe 5.31    <sup>m</sup> 19.7 Ual 24.1-4; Mat 5.31    <sup>n</sup> 19.9 Mat 5.32; 1Ko 7.10-11



<sup>10</sup>Doh no tamatang uakuakelukono ka longoro tar puhonene, kara kula tang Iesu pare, “Doh gete baka sira deher puhonene tar bulout mena kuah, auiantiehe deh geta hikir tamata pahe le.”

<sup>11</sup>Doh Iesu ke kula tapokis pare, “A niualasionene ahik pahe la tasir tamata uakap, bo tasisis pukumpe ke heiris God. <sup>12</sup>Ge a burehe per tengkana maene ahikir tamata pah ra le. O gisiamah ahik pah ra le, teene o nipoho tanika manasampe pare, a sar tukunus, o gisiameha ka ualahais mara hik pah ra banotong le, doho gisiameha ka namana tanikampe pare, ra marang uoho tena kalekinaler Nitotiangu Heuen, kara ualagono katongois pare, ahik pah ra le. Bo a tamata puk gere banotong kale toro uelhire rone tere kale.”

### Iesu mesir keketik

<sup>13</sup>Doho gisiamehar tamata ka keipime tasir gisiamehar keketik tang Iesu mare me uaponono tar limana tasisin, kare lotu keip pon. Bo o tamatang uakuakeluk puk ka kula tane tasisin. <sup>14</sup>Bo Iesu puk ke kula pare, “Uamaluaana tasir keketik ra lame totoguo, kara hik pah mung kula tane tasisin, ge a Nitotiangu Heuene pe a nasir babeir tamatonene.” <sup>15</sup>Temaene song ke uaponolaono tar limana tasisin, song ke la.

### A bulout kalan a tang mani ke ueluatata keip tang Iesu

<sup>16</sup>A siokor binak, ke lamer tang siokor bulout a tang mani, kare me kula pare tang Iesu. “Ir Tang Ualasis, hape me hagar uaia paku guataia maru banotong kale tar nitua gere moko dede?”

<sup>17</sup>Doh Iesu ke kula tapokis tatanono pagiare, “Ae maene ro dangata ingga totoguo tang hingiar hagarir uia? A tang siokon siun pukumper uia, God me pahen. Bo geto malara ingga o kale tar nitua gere moko dede, karo uakeluk tena ualatur God.”

<sup>18</sup>Kare dangata polukuono pare, “Hingiar ualatur?”

Kare hire Iesu tatanono pare, “‘Ahik paho tung pous me tamat, doh geto lea ahik paho ura keip tasir le, doh ahik paho uenau, doh ahik paho boho tola tar tang giameh. <sup>19</sup>Karo ueltada tang tamoum, doh tinoum, doho malauehir tang uanotoum misiana ro malauehir peia.’”

<sup>20</sup>Doh gitir bulout ke hire tapokis pare tang Iesu. “A mamang hagarininanit, inggo ku uakeluk uakap, bo me huar inete ru katup harahaio?”

<sup>21</sup>Kare kula Iesu tatanono pare. “Gero malara ingga o tamata uaia sira re malara per Tamata Noman pako baka pea, la, karo la uabulua liu tenang mamang inetelik, karo heir tar mani tasir tiome, maro kale ingga tar bureher inete uaia i Heuen, song ro lame, karo me uakeluk totoguo.”

° 19.14 Mat 18.2-3    P 19.17 NKP 18.5; Luk 10.28    ° 19.18 KT 20.13-16; Ual 5.17-20

° 19.19 Bolobolung Ualatur 5.16; Kale Tapokis 20.12; Nas Kalekinaler Pater 19.18

<sup>22</sup>Doh tar binaka ke longoror buloutonene tar puhonene ke kulain Iesu, inggono ke duhin, kare kaleinir niueldolom, teene inggon a tang manantieh. Kare hiliuingua.

<sup>23</sup>Doh Iesu ke hire tosno tamatang uakuakeluk pare, “O mana tun, inggo gine ru hire poluk tamiuoum, a parakukuhuntiehe tun tar tang mani tar lekala tar Nitoiang Heuen. <sup>24</sup>Inggo gine ru hire uapoul poluk, a kamel ahik pahe parakukuhin tar hikula tar tapokosonar harum, bor tang mani e parakukuh tunin tar lekala tar Nitoiang Heuen.”

<sup>25</sup>Tar binaka ka longoror tamatang uakuakeluk tar puhonene, kara lutarantiehe tun, kara ueldangate katongois pare, “Doh maingua ra banotong uelkarusin?”

<sup>26</sup>“Doh Iesu ke bangala tasisin, kare kula pare, “O tamata ra banoto leu tar puhonene, bo tang God puk, inggon e banotong guata tar mamang inetelik.”

<sup>27</sup>Tar binaka ke kula Iesu pare, kare kula tapokis Pita pare, “Inggeim king hiliu tenami mamang inetelik, doha inete haua ring turung kalegieim?”

<sup>28</sup>“Doh Iesu ke kula pare tasisin, “Inggo gine ru hire tamiuoum toro man, tar binaka re timuh tapokisir mamang inetelik, doha Tunar Tamat e tabila tono tabtabilar toia menia keip tar nibalbalanar nitampopokoho ter binakon, inggoumur tamata gekung uakeluk totoguo, inggoum pono mung turung tabila tar siokor hangaul, doho torik ro tabtabilar nasir toia, karung turung kedanga tar siokor hangaul, doha torikir pang tamatang Israel. <sup>29</sup>Doh maisir tamata ka namana tar hangougou, kara hiliu tonoso um ue o tahis ue o tatahisilik ue o tamas ue o tinas ue o bung tus ue nas mahar kot, gisina tera turung kale me siokor hangaulur hangaul baka polukur inet, dohi muduhia, ra turung kalesina tar nitua gere moko dede tar mamang binakalik. <sup>30</sup>“Bo o burehe pukur tamata gesir tohangas daan tesir tabo hangas tar mareineit re lame, doho bureher tamata gesir tabo hangas daan, gisina tesir tohangas tar mareineit re lame.”

**Iesu ke uelhire uaranga tasir tamatang kalekinale tar iomo bino**

**20** <sup>1</sup>“A Nitoiang Heuene misiana tar tang siokor tamata geke la naliliuolik tun, kare la kila hahai tasir tamatang kalekinale tar me kalekinale tena iomo binoon. <sup>2</sup>O tamatang kalekinalesinasine ka ueluauia tar kale tar sisisiokor denarius<sup>v</sup> tar mareinon, kare kulono tasisina ra la kalekinale manasa tena iomo binoon.”

<sup>3</sup>“Kenua, ke in kai sikoro manasahar pisara kaelainatie nar 9 kilok. Kare laonor tamata uleik tar buturung uelpokos, kare ueltupara tasir

<sup>s</sup> 19.26 Job 42.2    <sup>t</sup> 19.28 Mat 25.31; Luk 22.30; UGO 3.21    <sup>u</sup> 19.30 Mat 20.16; Luk 13.30  
<sup>v</sup> 20.2 A denarius a bulauanar siokor marein tar tang siokor tamatang kalekinale.

gisiamer tamata ra turtur teil pukumpe, ahik pah ra tuha me inet.

<sup>4</sup>Kare kula tasisina pare, 'Inggoum pono mung banotong la kalekinale tar iomo bino maru turung bulaua uamatoto inggo tamiuoum tar haua rung kalekinalein.' Song ka lasin. <sup>5</sup>Doh na mareing uleik, ke la guata polukuono tar siokonon hagar, doh nar 3 kilok a siokono sira kompe. <sup>6</sup>E lang uahuhut manasainir binaka tar 5 kilok, kare la polukuono tar buturung uelpokos, kare la uelutpara tasir gisiamer tamata ra uangoul haraha tar buturuon. Kare dangata tasisina pare, 'Ae maene rung ueluelouroum tar udeilinear marein rung uanguangoul puk peane, kara hik me inete rung guatain?' "

<sup>7</sup>"Kara hiresin pare, 'Ahik uadeil deh me tamata ke hire tamiueim mena kalekinale.' "

"Auia, mung la, karung la kalekinale tenag iomo bino."

<sup>8</sup>"<sup>w</sup>"Gitie ke reiu manasa peon, tanener iomo ke kula tena tamatang uoum keip tasir tamatang kalekinale pare, 'Kila tasir tamatang kalekinale, karo bulaua tasisina tar bulauas, uakekene keip tas geka kila uadouhis, karo uadouh keip tas geka kila uakikilangais.' <sup>9</sup>Doho tamata geka uakekene tar kalekinale nar 5 kilok ka bulaua kahakahais tar sisisiokor denarius. <sup>10</sup>Doh tar binaka ka lamer tamatasis ka kila uakikilangais tar me kalekinale tar me kale tar bulauas, gisina ka namana pare, ra turung kale uairanantieh, bo gisina ka kale puk pono tar sisisiokor denarius. <sup>11</sup>Gitie ka kale pesina tenas mani, kara menemene tar tamata uleik. <sup>12</sup>Ka kula pare, 'O tamata dehesine ka kila uadouhis tar me kalekinale ka me kalekinale puk tar sikin, doh inggeim teking kalekinalentiehe tunumpe tar udeilinear marein, kara pidpidina tagu poluk, doh karo bulaua tagu polukua tar bulauasisina misiana tamiueim!' "

<sup>13</sup>"Kare kula tanener iomo tar tang sioko pare, 'Ualongoro kaloug. Inngo ahik pah ku guata uasa totomua. Bo toro kikilangana puk raeig kira ueluauiiae tar kale tar siokor denarius tar kalekinale tar siokor marein. <sup>14</sup>Kale manasa tar bulauoum karo la. Doh inggo u marang heir pono tar bulauanar tamata geka kila uadouhin tar me kalekinale misianeit ku heir peo totomua. <sup>15</sup>A ineteng totoguo. Ge inggo pe u uakeluk to tereg nimalahir tar bul tenag mani. Getu marang guata uaiao me hagar uaia tasir tamatasinasine, ae maene ro la hagouo uasa ingga?' "

<sup>16</sup><sup>x</sup>Song ke la uadouh keip to Iesu pare, "Ter siokono kompe, o tamata gesir tohangas daan tesir tabo hangas tar mareineit re lame. Doho tamata gesir tabo hangas daan, gisina tesir tohangas tar mareineit re lame."

**A uatouononor binaka ke hire Iesu pare, e turung mat, kare tua tapokis**

<sup>17</sup>Gitie re lang la pe taro Iesu i Jerusalem, inggono ke kila toto sioko baka tar siokor hangaul, doha tang torik no tamatang uakuakeluk, doh

<sup>w</sup> 20.8 NKP 19.13; Ual 24.15    <sup>x</sup> 20.16 Mat 19.30; Mak 10.31

gitie ra la haraha pelasin, Iesu ke hire pare, <sup>18</sup>“Ualongor, inggeig gine ri la taro i Jerusalem tar butur ra turung heir toinir Tunar Tamata tar limasir patere uleik doho tamatang ualualasira tar ualatut. Doh gisina ra turung uelhote pare, inggon e turung mat, <sup>19</sup>kara heirin tasir tamat ahik paho Ju gera turung uauanete tatanon, kara halhaluh, kara uakusa tar korose, bo tar uatouononor marein puk, inggono ra turung uatua tapokisin.”

### **Jems me Jon kura marang kotpokos a toking tamata uleik**

<sup>20</sup>Doh na kuaha Sebedi menia keip tar toking tun ka lame tang Iesu, kare me hatup uahiuu tinas rasina tang Iesu, kare kula pare, e marang dangata tang Iesu tar siokor inet.

<sup>21</sup><sup>z</sup>Doh Iesu ke dangata pare tatanon. “A haua ro malahiria?” Kare hireono pare, “O uauia ingga tar toking tuguo rasine ura la turung tabila uelpakaha toro tokino tabtabil tar noumuar Nitoia? Me tang sioko tar pang mua, doh me tang sioko tar pang kais.”

<sup>22</sup><sup>a</sup>Bo Iesu puk ke kula tapokis pare tas ramamahialik, “A inete kura dangatain raoum e banoto leu teremira ninamana raoum. Ue mura banotong inum tagu raoum tar kapang uelmahing geru turung inumuio?”

Kaura kula rasina pare, “Raeim mira banot.”

<sup>23</sup>Kare hireono pare, “Raoum mura turung inum tagu nomanampe tenagu kapang uelmahingo, bo ahik pukuono paha ineteng totoguo tar kula, mai re tabila tar pang mua, doh tar pang kais. A tabtabilanina ke kaleuatoroig Tamouguo pare, a nasir tamata ke kaleuatorosiono sioun.”

<sup>24</sup>Doh tar binaka ka longoror siokor hangaulur tamatang uakuakeluk tasrasin, gisin ka nimaliana tasrasin. <sup>25</sup><sup>b</sup>Bo Iesu puk ke kila toto tasisina uakapa, kare kula pare. “Inggoum mung ate tasir tamatang gime uan ge ahik paho Ju, noso tamatang uoum keipisina ra uairanais, kara uaikoto tasir gisiameh, doh noso tamata uleikisina ra ualatohontiehe tun, kara uasokor mara longorosin. <sup>26</sup><sup>c</sup>A puhonene paka hik pahe kotpokoso tagu tamiuoum, bo mai pukur tamata re malara pare, e tamata uleik i uantininanin tamiuoum, inggono pake tere kotpokoso pare, a tamatang kalekinale tamiuoum. <sup>27</sup>Doh mair tamata re malara pare, e kotpokos a tohangan tamiuoum, inggono pake tere kotpokoso pare, a tamatang kalekinale tun pukumpe tamiuoum. <sup>28</sup><sup>d</sup>Misiana tar Tunar Tamata ke la peha, ahik pah ke laha mara me kalekinale ueleheirir tamata tatanon, bo inggono ke laha tar me kalekinale ueleheir tasir tamat, kare heir tar tukununa pare, a bulauana tar kale tapokis tur tasir tamata tenas niguata uasa.”

<sup>y</sup> **20.18** Mat 16.21; 17.22-23    <sup>z</sup> **20.21** Mat 19.28; Luk 22.30    <sup>a</sup> **20.22** Mat 26.39; Jon 18.11

<sup>b</sup> **20.25** Luk 22.25-26    <sup>c</sup> **20.26** Mat 23.11; Mak 9.35    <sup>d</sup> **20.28** Luk 22.27; Pil 2.7

### Iesu ke uauia tar tang torikir bulout a toking kut

<sup>29</sup>Gitie ra lang hiliu manasa pe Iesu mesno tamatang uakuakeluk i Jeriko, o bureher tamata ka uakeluk tatanon. <sup>30</sup>Doha tang torikir bulout a toking kut ura tabila tar tektekener lel. Kura longoro rasina tang Iesu e la manasame, kaura uakekene manasampe tar kulkula ualeik pare, “Ir tuna Debit, o ueldolomo tamiraeim.”

<sup>31</sup>Doho tamata ka uelkukur tasrasin, kara kula tasrasin ura tabtabila sikor. Bo rasina puk kura kulkula ualeikintiehe kalehe kompe pare, “Ir tuna Debit, o ueldolomo tamiraeim.”

<sup>32</sup>Song ke tur uangoul Iesu, kare kila tasrasin, kare dangata pare, “A haua ura malarain raoum u guata ueleheirio tamiraoum?”

<sup>33</sup>Kaura kula rasina pare, “Ir Tamata Noman, raeim mira malar, o guata uaia ingga tara matamiraeim.”

<sup>34</sup>Doh Iesu ke ueldolomo tasrasin, kare tuha tara matas rasin. Ahik me manasan, kaura banga uaia rasin, kaura uakelukunga tatanon.

### Iesu ke la lekala i Jerusalem misiana tar toia

**21** <sup>1</sup>Gitie ka la uahuhut manasa pe Iesu mesno tamatang uakuakeluk i Jerusalem, kara la turuha tar uauanilik i Betpage tar Siusanang Oliv ter buturuono ke ualatueto ter Iesu tar tang torikir tamatang uakuakeluk, kare kula pare tasrasin, <sup>2</sup>“Mura la tar uanela ra bang huaralain, doh getura lekala raoum tar uanion, kaura turung banga dedengua kompe tar donki a niuih uatur, e tur keipimpe tar tun, luaka tasrasin, kaura keipimeane totoquo. <sup>3</sup>Doh gete kula me tamata me inet, hire tatanono pare, ‘A Tamata Noman e malara tasrasin,’ mare uamaluana ualahurono tamiraoum tar keipime tasrasin.”

<sup>4</sup>A puhonene ke kotpokoso sira tun tar uakalahara tar puh ke kulameinir propeit pare,

<sup>5</sup>“Hire tar uan uleik i Saion,

‘Banga tenang toia, git re lame totomua!

Inggon a hamhamas e la sirame tar tamat a tabo hangan,

doh inggon e tabila teil tar donki. Aa, inggon e tabila teil tar donki kalan.’”

*Sekaria 9.9*

<sup>6</sup>Doh rasitir toking uakuakeluk kura la guata sira ke kula pe Iesu tasrasin.

<sup>7</sup>Kaura la keipime tar donki tinana doha tun, kaura heig uaponola tenasira hikhiku baraha i rana tar toking donki, kare tabila uaponola Iesu i ran.

<sup>8</sup>O bureher tamata ka liaha tenas hikhikuane i koto tar lel, doho gisiameme ka tokout tar randouk, kara uamoko hahaijala tar lel. <sup>9</sup>Doho tamatasitie ra la uoum teil tatanon, doh gisitie ra uakeluk teil ka kula ualeik pare,

“Hosana! Uaha tar tuna Debit!

God e guata uaia tar tamatonene re lame tar hanganar Tamata Noman. Hosana!

Uatakai tun tar hangana God.”

*Ker 118.25-26; 148.1*

<sup>10</sup>Doh tar binaka ke lekala Iesu i Jerusalem, o tamata uakapa tunane tar uan ka lutarantieh, kare nukur balas, kara ueldangata ueltebeir pare, “Mai tunumper tamatonene?”

<sup>11</sup>Doho manai tamata ka hire pare, gine te propeit Iesu ger peng Nasaret i Galili.

**Iesu ke geil liu tasir tamata ra uabulbulaua  
to tar umang lotu ger dedeil**

<sup>12</sup>Doh Iesu ke la lekala tar umang lotu ger dedeil, kare la geil tauete tasir tamata gera bulbulaua, kara uabulaua to tenas inete tar buturuon, ke kaba dingono tar pateheng mani, doh nas tabtabilasis ra uabulaua tosnosio tetiau. <sup>13</sup><sup>e</sup>Kare kula pare tasisin, “A nibolo uahua dehono tono uelhire God pare, ‘Nag umo ra kilain a umang lotu, bo inggoum puk mung guata sira pare, nas buturung tokouaouor ueuenauon.’ ”

<sup>14</sup>Doho bureher tamatar kut mesir tamatasisier kikumoror limas, doha kekeis ka la to me tang Iesu iuma tar umang lotu ger dedeil, kare uauiaono tasisin. <sup>15</sup>Bo tar binaka puk ka bangar patere uleik, doho tamatang ualualasira tar ualatut tar hagar uaianine ke guataig Iesu, kare tasir keketik pono ra kulkula ualeik pe pare “Hosana! Uatakai tar tuna Debit!” Kare tokouasais tang Iesu. <sup>16</sup><sup>f</sup>Kara dangatasina tang Iesu pare, “Ingga o longor paroko tar haua ra kulkulainisin?”

Kare kula Iesu pare, “Aa, u longor, bo inggoum puk here halana tung timana tena puhung uelhire Godene, ‘Ingga ko ualasira tasir keketik, doho guama tar heir tar uatakai uaiantiehe tun.’ ” <sup>17</sup>Song ke hiliu Iesu tasisin, kare tauetela tar uan, kare lala i Betani teke la hohouono tar boungon.

**Iesu ke soul uasa toro douk o hangana toro  
fig, karo la makmakorongua roon**

<sup>18</sup>Naliliuolik tun, gitie ke tapokis pela Iesu tar uan inggono ke gog. <sup>19</sup>Doh inggono ke banga toro fig o tur tar tektekener lel, kare la uelhir tang roon, bo ahik pukuono pah ke banga me uauana roon, bo a kamanana kompe. Kare kula pare toro douk roon, “Teko tuka, ahik baka poluk me kukuanana re turung alara tur totomua!” Ahik me manasan, karo makmakoro tur puk manasampe ro tukununa ro douk.

<sup>e</sup> 21.13 Ais 56.7; Jer 7.11    <sup>f</sup> 21.16 Ker 8.2

<sup>20</sup>Doho tamatang uakuakeluk ka banga tar puhonene, kara lutarantieh, kara ueldangateis pare, “Hape maene ko makmakoro ualahur tunungua ro douk rone?”

<sup>21</sup><sup>g</sup>Doh Iesu ke kula tapokis pare, “O mana tun, inggo gine ru hire tamiuoum, gete me mi nitagorong manoum, doh ahik pah mung uaruara naman, inggoum mung banotong guata sira tar hagarene ku guataio toro fig, doh ahikiono pah tar puh pukene ka guatain toro fig, bo mung banoto ponompe mung kula tar siusana pare, ‘Tentur, karo bakakoiaako i laur,’ kare turung guata sirono tar puhene kung kulaioum. <sup>22</sup><sup>h</sup>Doh getung tagorong manoum tang God, inggoum mung kale tar huar inete rung dangatain tatanon.”

### Iesu ka dangatain, mai ke uatohangana tatanon

<sup>23</sup>Doh Iesu ke tapokisime tar umang lotu ger dedeil, doh gitie re ualasira peon, noso uleikir pater, doho mamahoholik ka lame tatanon, kara me dangata pare, “Ia ko kale tura tar hanga uleikene, doh mai ke heir totomua tar nitampopokoh, maeit ko banotong guata pagiare?”

<sup>24</sup>Doh Iesu ke kula tapokis pare tasisin, “Inggo u marang dangatangua baka pono tamiuoum tar siokor puhung dangat. Doh getung hire tapokis uaiaoum totoguo, song ru hire pono tamiuoum tang mai ke uatohangana totoguo tar guata tar kalekinalenine.” <sup>25</sup>Song ke dangata Iesu tasisina pare. “Bo na niuahuhu Jon, ia re la tur, tang God ue e la tur puk tasir tamat?”

Doh gisina ka menemene katongois pare, “Hapengua ri kula peeig? Geti hire taroeig pare, ‘E la tur tang God.’ Inggon e turung kula poluk pare tagigeig, ‘Bo aeono maene ahikioum pah kung tagorong mana tatanon?’ <sup>26</sup><sup>i</sup>Bo geti kuleig pare, ‘E la tur tar tamat.’ Ingeig i sokoro me puh gera guatainir tamat, teene gisina ra siokor namana pare, Jon a propeit.” <sup>27</sup>Song ka hire tapokisisina pare tang Iesu, “Inggeim mi tel.”

Kare kula Iesu tasisina pare, “Uelik, inggo ahik pono pahu hire tamiuoum tang mai ke uatohangana totoguo, maeit ru guata tar kalekinaleene.”

### O uelhire uaranga tar toking Tunar Tamat

<sup>28</sup>“Bo hape rung namana peoum tar puhene? A siokor binak e uangoulur bulout doha toking tun, a toking bulout. Maeit, inggono ke lala tanetier mamahoholik uoum, kare kula pare, ‘Ir tug, daan ingga o la, karo la kalekinaleala tar iomo bino.’ <sup>29</sup>Bo ke kula tapokis pukuono pare, ‘U de matu la.’ Bo i muduhia puk inggono ke uiuir tena ninamana, kare

<sup>g</sup> 21.21 Mat 17.20; Luk 17.6; Jon 14.12; 1Ko 13.2 <sup>h</sup> 21.22 Mat 7.7-11; 18.19

<sup>i</sup> 21.26 Mat 14.5

la. <sup>30</sup>Song ke la poluk ra tamas rasin, kare la hire tar uatang giamehenar tun tar siokono komper puh. Kare kulono pare, ‘Aa, tamoug, inggo u la.’ Bo ahik pukuono pah ke la. <sup>31</sup>Hingia tasrasina rasine ke guata tena nimalara ra tamas?”

Kara kulasina pare, “Ger uakikilangan.”

Kare kula Iesu pare tasisin, “Inggo u uamana tun tamiuoum, o tamatang kale tar maning takis doho kuahasitir ura ueltebeir ra la leka uakikilanga tamiuoum tena Nitoia God. <sup>32j</sup>Ge Jon pe ger tang uahuhu ke lame tamiuoum tar me ualasira tamiuoum tar leler kodkodoh. Doh inggoum ahik pah kung tagorong mana tatanon, bosir tamatang kale tar maning takis mesir kuahasisir ura ueltebeir teka tagorong mana tatanon. Inggoum ur Parisi, doho tamata uleik kung bangampe tar puhonene, kara hik dedempe pah kung uiuir teremi ninaman, karung tagorong mana tatanon.”

### **O uelhire uaranga tasir tamata uasa gera kauেকে tar iomo bino**

<sup>33k</sup>Doh Iesu ke hire poluk tasir tamata uleik pare, “Mu ualongoro poluk toro giamehe ro uelhire uarang. A tang siokor tamata ke tuha tena iomo bino, kare ur tane tar pantui, kare koho tar tung ra pouspous toigir kukuananar bino i koboro tar iom, kare tuha tar pang taluhatie tar iom, kare heir baka tasir gisiamer tamata ra kauেকে uangoul, bo inggono ke la baka tar gime uan e uaireh. <sup>34</sup>Doh tar binaka ke lamer binakang kale toto tar kukuanananin, git tanener iomo ke ualatue tosno tamatang kalekinale tar la kale tena kukuauanar binoon. <sup>35</sup>Bo o tamatang kaukaeuke puk tar iomo ka kusa tane tosno tamatang kalekinaleon, kara uiliatung tar tang siok, kara tung pous tar tang giameh, kara bakbak pous tar tang giameh. <sup>36</sup>Song ke ualatue polukuono tasir gisiamer tamatang kalekinale, o burehe uain tas geke ualatue baka uoumulais. Doho tamatang kaukaeuke ka me guata sira kompe tar siokonor hagar misiana ka guata uoum pe tasir uakikilangan. <sup>37</sup>Uadouhina tun, git tanener iomo ke ualatuela tar tun ger bulout tasisin, teene ke namana peono pare, ‘Song ra la ueltada nomanasina tar tuguo.’

<sup>38l</sup>Bo tar binaka puk ka bangar tamatang kaukaeuke tar tunon, kara uelkuleis pare, ‘Gine deh ter tuna tanener iomo gere turung kale uahiua tar iomo bino, ti la, ti uiliatung pous tatanon, mari kale inggeig tar mamang inetelikir nanon.’ <sup>39m</sup>Song ka kusa tane tatanon, kara baka tauete tur tatanono tar iomo bino, kara tung pous.”

<sup>40</sup>Kare dangata Iesu pare, “Doh tar binaka re me pokoso tanener iom, hape re me guata peono tasir tamatasitie ka kaukaeuke tena iomon?”

<sup>41</sup>Kara hire tapokisisina pare, “Inggono dehe turung uiliatung pous nomananguampe tasir tamata uasasinane, kare bulaua mo gisiamer

<sup>j</sup> 21.32 Luk 3.12; 7.29-30    <sup>k</sup> 21.33 Ais 5.1-2    <sup>l</sup> 21.38 Mat 27.18    <sup>m</sup> 21.39 Hib 13.12



tamata tar me kaukeke tar iomo bino gera turung heir tang tanener iomo tar kukuananar bino gete ua.”

<sup>42</sup>“Kare kula Iesu pare tasisin, “Inggoum kung timana manasa tar puhung uelhire gero kula teilin no uelhire God?”

‘O paluaa geke deinir tamatang tuha toro um,  
teene ka namana pe o sa roon, karo iinetelik puk, roon ko uiuirin  
pare, o inete uleik tun.

A Tamata Noman ke guata tar inetenanine  
doha mataia tun, king banga pe inggeim!’ ”

*Ker 118.22-23*

<sup>43</sup>Kare kula ualatumana poluk Iesu pare tosnosio mamahoholikir Ju, “Temaene ru hireo tamiuoum pare, na Nitoia God ra turung kale liuin tamiuoum, kara heirin tasir tamata gera uoto ua tar kukunana uaia gere uauaha tang God. <sup>44</sup>Doh mair tamata re turung punga uahuako toro paluaa roon e turung tapolaka siksikin. Doh mair tamata re turung hungin tang roon e turung tamtamian.”

<sup>45</sup>Tar binaka ka longoro noso tamata uleikir pater, doho Parisi toro uelhire uaranga rone ke hirein Iesu, kara ate pare inggon e menmene tasisin, <sup>46</sup>temaene ka marang kusesina tatanon e la tar karabus, bo ka sokoro puk tasir manai tamata gera tagorong mana pare, Iesu a propeit.

### O uelhire uaranga toro niein uleik toro le

**22** <sup>1</sup>Doh Iesu ke guata poluk toro giamehe ro uelhire uaranga tasir mamahoholik pare, <sup>2</sup>“A Nitoiang Heuene ra banotong uamisiana tolain tar toia geke pugul toro niein uleik tono ler tun ger bulout.

<sup>3</sup>O bureher tamata ka kilais, doh inggono ke ualatue toсно tamatang kalekinale tar la kilame tasir nikil ra lame tar binaka ro taliaha ro niein, bo gisina puk ka de mata lame. <sup>4</sup>Maeit inggono ke ualatue poluk tasir gisiamer tamatang kalekinale, kare heir toro uelhire rone tasisin, ‘Mu la hire tasisitir nikila pare, rog nieino o taliaha manas. O bulumakau, doho katiuo ululeik uelhirisitier nouguo, inggeim king uiliatung pous manas, doha mamang inetelik a nikaleuatoro uakap. Mu lame toro nieinin toro le.’ <sup>5</sup>Bo gisis pukur nikil ka mahang longoro tasisin, kara kalekinale dedempe tonoso kalekinale. A tang sioko ke la tena iom, doha tang giamehe ke la tena kalekinale tar situa. <sup>6</sup>“Doho gisiamer nikil ka kusa tane tasir tamatang kalekinale, kara guata uasa tasisin, kara uiliatung pous. <sup>7</sup>Doh gitir toia ke nimalianantiehe tun, song ke ualatueono toсно tamatang uiliatung teka la uiliatung pous tasisinar tang haluh, kara ualuh meniangua tenas uanisin. <sup>8</sup>Song ke kulono toсно

<sup>n</sup> 21.42 Roum 9.33; 1Pi 2.6-8    <sup>o</sup> 22.6 Mat 21.35

gisiamer tamatang kalekinale pare, ‘O nieinin toro le rone ku puguluio o nikaluator, bo o tamata puk geku kilasio ahik paho tamata uaia tar lame. <sup>9</sup>Temaene mung la puk manasoum toro lele uleik, karung kilame mo bureher tamata ueltebeir gerung ueltuparais.’ ”

<sup>10</sup>“Temaait ka la manasampesisir tamatang kalekinale toro mamang lelelik, kara la kilame tas mais ka ueltuparais, gisisiemper sa, karo uia. Ke pe teil per umang ein to, doh ke uoun tasir tamatasitir nikil. <sup>11</sup>Doh gitir toia ke leke manasampela tar la uelgungum tasir nikil, kare banga tar tang siokor bulout ahik pahe hiku teil me hikhikung toro le. <sup>12</sup>Kare dangata tatanono pare, ‘Kaloug, hape ko leka pe me inggane iuma tar binaka ahik menang hikhikung toro le?’ Bo git pukur bulout ahik pah ke men. <sup>13</sup><sup>p</sup>Doh gitir toia ke kula tosno tamatang kalekinale pare, ‘Uih tane tar toking pang limanon, doha toking pang keken, karung baka tauetela i kalahara tar kitkitupun, tar butur ra kiring tor tamat, teeit ra nimaliana pe, kare uelmahingis.’ ” <sup>14</sup>Doh Iesu ke la uelhire uakapa to pare, “Ge God pe e kila tasir bureh, bo e kedanga puk tasir gisiamer.”

#### A maning takis ra heirin tang Sisa ue ahik?

<sup>15</sup><sup>q</sup>Doho Parisi ka hiliu bak, kara la uelhote uaouo, hape mara tutlour keip tang Iesu me puhpuhung dangat. <sup>16</sup>Song ka ualatuesina tosnosio tamatang uakuakeluk, doho gisiamer tamatasitie ra uoto uakeluk tang Herot ka la tang Iesu. Kara la kulasina pare tatanon, “Ir Tang Ualasil, inggeim mi ate pare, ingga a uauamana tun, doh toro man, ingga o uoto ualasila tena hagar uaia God, doh ahik paho sokoro me tamat, teene ingga ahik paho namana hape re baka per tamat a tohangana ue ahik. <sup>17</sup>Gon, hire tamiueim, hape ro namana pea? Tena ualatut Moses, auiampe ri heir pe inggeig tar maning takis tang Sisar ue ahik?”

<sup>18</sup>Bo Iesu puk e atensioun manasa teres ninamana uasasin, kare kula pare, “Inggoumur tang kokop! Ae maene rung marang tutlouroum totoguo? <sup>19</sup>Ualasila totoguo tar mani nar takis!”

Kara kale ueleheirisina tatanono tar mani.

<sup>20</sup>Kare dangata Iesu pare tasisin, “A poren, kara hangana maiene rung banga tosioum tar mani?”

<sup>21</sup><sup>r</sup>Kara hire tapokisisina pare, “A porene, kara hangana Sisa.”

Song ke kula Iesu pare tasisin, “Uelik, heir tar ineter nang Sisa tang Sisa, karung heir tar ineter nang God tang God.”

<sup>22</sup>Doh binaka ka longorosina tar puhene, kara lutarantiehe tun, song ka hiliu tatanon, kara la.

<sup>p</sup> 22.13 Mat 8.12; 25.30; Luk 13.28    <sup>q</sup> 22.15 Mak 3.6    <sup>r</sup> 22.21 Roum 13.7

### O Sadiusi ra tagorong boho tar nitua tapokis

<sup>23</sup> Tar marein kompeon, o Sadiusi gera tagorong boh tar nitua tapokis tur toro mat, ka lame tang Iesu, <sup>24</sup> Kara me dangata pare. “Ir Tang Ualasil! Moses ke bolo toro uelhire sioun pare, ‘Gete mate liu me tamata tena kuah, bo ahik puk me tun, tahinon e turung le palih tar kuahene mare banotong uakotpokosono mo bung tuna tahinetie ke mat.’ <sup>25</sup> Sioun, o mouitir mamahialik ka uoto uangoulane, doh gitir uoum teke le, kare mat, bo ahik puk me tun. Doh gitir uatantorikin teke le palihingua tena kuahon. <sup>26</sup> Doha siokono dedemper hagar ke kotpokoso tar uatantorikin, doh tar uatantouonon, doh tasisina uakapa tununguamper mamahialik. <sup>27</sup> I muduhia ka mata uakapa baka pesin, kare mate ponor kuah. <sup>28</sup> Gon o hire, gitie ka siokor le pesina tatanon, doh tar marein ra tua tapokisir mat na turung kuaha mainguaon?”

<sup>29</sup> Kare hire tapokis Iesu tasisina pare, “Inggoum deh mung tele tono uelhire God, temaeit mung uatoboul katongosioum, karung tele pono tena nitampopokoho God. <sup>30</sup> Binaka ra tua tapokis turur tamata toro mat, o bulout doho kuah ra turung misiana tasir anggelousinah i Heuen, doh ahik pah ra le. <sup>31</sup> Doh tar puheit rung dangataioum tasir mate ra tua tapokis. Inggoum kung timana manasa tar haua ke hirein God tamiuoum. Inggono ke kula pare, <sup>32</sup> “Inggou ter God a nang Abraham, doha nang Aisak, doha nang Jekop.’ Ge inggono pe ahik pah nas Godor mat, bo nas Godor tua.”

<sup>33</sup> Doh tar binaka ka longoror manai tar puhonene, kara lutarantiehe tun tena niualasiron.

### Hingiar ualatutur nang God ger uleikintieh?

<sup>34</sup> Doh tar binaka ka longoror Parisi pare, Iesu ke uapepe bukubuk tasir Sadiusi, kara la toto tokah. <sup>35</sup> Doha tang sioko tasisin a tang iate tena ualatut Moses ke dangata tar puhung dangata tar uatolaua tatanon. <sup>36</sup> “Ir Tang Ualasil, tena ualatut God hingiar ualatutur uleikintieh?”

<sup>37</sup> Kare hire tapokis Iesu pare, “Inggoum pakung malauelhir tar Tamata Noman nami Godoum tar balamiu uakapa tun, doh tar iabeimiu uakapa tun, doh teremi nihagouu uakapa tun.’ <sup>38</sup> Inggonene ter uakikilanganar ualatut, kare ter uleikintieh uain. <sup>39</sup> Doha uatorikina ter siokono sira kompe tatanono pare, ‘Inggoum pakung malauelhir toso uanotoumiu misiana rung malauelhir katongo pesioum.’ <sup>40</sup> Rasinar toking puh rasine teura uatengkana tar mamang uelhireng ualatutulikir nang Moses, doh nas niualasirar propeit.”

<sup>s</sup> 22.23 Apo 23.8    <sup>t</sup> 22.24 Ual 25.5    <sup>u</sup> 22.32 KT 3.6; Mat 8.11    <sup>v</sup> 22.37 Ual 6.5

<sup>w</sup> 22.39 NKP 19.18; Mat 7.12    <sup>x</sup> 22.40 Roum 13.10; Gal 5.14

**Iesu ke dangata tasir Parisi tar tamata ger Kristo**

<sup>41</sup>Tar binakene ka uiliodoutur Parisi, kare dangata Iesu pare tasisin,  
<sup>42</sup>“Hape rung namana peoum tang Kristo? Hingia ro bungun ke la turion?”

Kara hire tapokisisina pare, “Inggon e la tur toso bunguna Debit.”

<sup>43</sup>Kare dangata Iesu pare, “Doh ae maene ke ualasar Iabena Dedeil tang Debit tar kila tatanono pare, a Tamata Noman. Debit pe ke kula pare,

<sup>44</sup>“God ke kula pare tenag Tamata Noman,  
 tabilane tar pang mua totoguo

e tuka getu uamoko tosnongo uelmatana ra me hatup uahiu tar kekeimua.’” *Ker 110.1*

<sup>45</sup>“Doh gete ke kila Debit tatanono pare, A Tamata Noman, hape maene e uatuna Debit tatanon?”

<sup>46</sup>Doh ahik hagar me kaluasisina ke banotong uelhire hahaua tar puhonene tang Iesu, doh teka tuka tur tunungua ponompesina tar binakon, ahik me tang sioko ke ongolo tun tar dangata tang Iesu me puhung dangat.

**Iesu ke hire tosno tamatang uakuakeluk tar tagin teil tasir tamatang ualualasira tar ualatut, doho Parisi**

**23** <sup>1</sup>Song ke uelhire poluk Iesu tasir manai tamat doh no tamatang uakuakeluk pare, <sup>2</sup>“O tamatang ualualasira tar ualatut, doho Parisi teka palih tang Moses. <sup>3</sup>“Temaene inggoum pakung ueltad, karung uakeluk tar mamang inetelik ra hireigisina tamiuoum, bo ahik pukuoum pah mung guata sira tenas nipilesesin, ge gisina pe ahik pah ra uoto uakeluk tar haua ra uelhirein. <sup>4</sup>Kara uahuata tasir tamata tar bureher niduh, kara hik pah ra marang heir me pang lima tasisina tar huata uelkout tar niduh.”

<sup>5</sup><sup>b</sup>“A mamang inetelik ra guataigisina ra pe kompe pare, mara bangar tamata tasisin. Gisina ra tuha uauleik tar bobokisilik tera uamokoigisina tar tukunus mare uanamana dede tasisina tono uelhire God, doh ra uoto uabarah tar suruna nas siksikir uoh e la baraha dedeko i kot tar uanamana tasisina tang God. <sup>6</sup>Doh gisina ra malahir tar tabtabila uaia uelhir tar niein uleik, doh nas tabtabilar mahoho tar umang lotu. <sup>7</sup>Doh gisina ra uoto pe dede pare, ra uauaha keipis tar ueltada tar butur ra uangoul totor tamat, kara uoto malara pare ra kilais, ‘Tamatang Ualasar.’”

<sup>y</sup> 22.42 Jon 7.42    <sup>z</sup> 22.44 Mat 26.64    <sup>a</sup> 23.3 Mal 2.7-8    <sup>b</sup> 23.5 KT 13.9; Aha 15.38-39; Ual 6.8; Mat 6.1

<sup>8</sup>Bo inggoum puk ahik pah ra kilasioum pare, ‘Tamatang Ualasis,’ ge inggoum pe mung uangoul sira pare, o matahinalik uakap, kara tang siokon siounumpe nami tamatang ualualasir. <sup>9</sup>Kara hik pah mung kila me tamatane i koto pare, ‘Tamoug,’ ge inggoum pe a tang siokon siounumpe Tamamiuenah i Heuen. <sup>10</sup>Kara hik pah mung pe pare ra kilasioum, ‘Tamata Uleik,’ ge a tang siokon sioun pe nami tamata uleikioum nu Kristo. <sup>11</sup>‘Ge nomi tamata uleik peoum paka uangoul sira pare, nomi tamatang kalekinaleoum. <sup>12</sup><sup>d</sup>Mair tamata re kale kai katongoin, inggon ra turung kale uahiuain, doh mai re kale uahiuain, inggono ra turung uairanain.’

**Iesu ke hire tenas niguata uasar tamatang ualualasira  
tar ualatut, doho Parisi tar haua ra uoto guatain**

<sup>13</sup>“Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Ge inggoum pe mung uoto tur tane puk tasir tamata tar lekame tar Nitoiang Heuen, kara hik katongo pah mung lek, doh ahik pono pah mung uamaluana tasisit ra marang lek. <sup>14</sup>Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Inggoum pe mung uoto reih tenas manir kuahasisir nimate liu, karung uoto boho tar kotou tar puhpuhung lotunitier barah. Temaene inggoum ra turung heirisioum tar niduh a uleikintieh. <sup>15</sup>Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Ge inggoum pe mung uoto laere toro laur koutina ro uan ue mung lih i kot tar reihime tar tang siokon siounumper tamata mare kotpokosono nami tamatang uakuakelukoum. Doh tar binaka re kotpokosono pare, a tamatang uakuakeluk manas, inggoum mung uoto ualasila uasantiehe tunungua tatanon, kare la tamata uasantiehe liuinguaono tamiuoum tar la i Hel misiana tamiuoum.”

<sup>16</sup><sup>e</sup>“Mu tagin teil, inggoumeitir kut gesir tamatang uoum keip tasir tamata tar lel! Inggoum o tang kokop! Inggoum mung uoto ualasila pare, gete uamana tolar tamata tena umang lotu God ger dedeil, inggon a iinetelik puk. Bo gete uamana to pukulaono tar goul gere moko tena umang lotu God ger dedeil, song pake guata nomana tar haua ke kulain. <sup>17</sup>Inggoumeitir popouluan, karo kut! Ter hauar inete uleikintiehe tar matana God? Ter goul ue na umang lotu God ger dedeil gere uadedeil tar goul? <sup>18</sup>Doh inggoum kung ualasila pono pare, gete ke uamana tolar tamata toro olta, inggon a iinetelik puk, bo gere uamana tolaono tar uahung gere mok i rana toro olta, song pake guata sira ke kula pe.

<sup>c</sup> 23.11 Mat 20.26; Mak 9.35; Luk 22.26    <sup>d</sup> 23.12 Job 22.29; NU 29.23; Luk 14.11; 18.14

<sup>e</sup> 23.16 Mat 15.14

<sup>19</sup>Inggoumur kut! Ge hingia per uleikintieh? A uahung ue o olta gero uadeheil tar uahung? <sup>20</sup>Temaene tar binaka re uamana tolar tamata toro olta, inggon e uamana tola tang roon, doh tar mamang inetelik re pono teil tang roon. <sup>21</sup>Doh tar binaka re uamana tolaono tar umang lotu ger dedeil, inggon e uamana tola tar umang lotu ger dedeil, doh tang God gere uangoul tar buturuon. <sup>22</sup><sup>f</sup>Doh tar binaka re uamana tolar tamat i Heuen, inggon e uamana tola tono tabtabila God, doh tang gere uoto tabila tang roon.”

<sup>23</sup><sup>g</sup>“Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Gea mamang nieining koboro penit tar iomo re uoto ualingia tar niein, inggoum mung uoto polaka tar siokor hangaul ro mahar, karung heir toro sioko ro mahara tang God. Bo inggoum puk kung hiliu tar burehenar ualatut uleikir nang Moses misiana pare, tar uakodkodoho tar niuangoul, doha hagaring ueldolom, doha nitagorong mana tang God. Ter ualatutuninanine pake terung uakelukugiom, kara hik pah mung hiliu me giniamer hagar uaia pon. <sup>24</sup>Inggoumeitir kut gesir tamatang uoum keip tasir tamat, inggoum mung kusa uanono puk tar ualatutunitir kikitilik, karung bangang duk tar uleikinar ualatut. Inggoum misiana tar tamatetie re banga tar eirieir gere moko teil toro iru, kare uouh liu. Bo ahik pukuono pah ke banga tar tukung kamel gere moko teil toro iru, doh ke inumuon, kare konomo keip uadeilingua.”

<sup>25</sup><sup>h</sup>“Mu tagin teil, inggoumeitir tamatang ualualasira tar ualatut doho Parisi! Inggoum o tang kokop! Ge inggoum pe mung uoto uadelauana puk i kalaharahia tenami kap, doho peileit, bo i lolono puk tamiuoum ahik tun paha delauan, inggoum o uoun tun tar ninamanang kipal, karung uoto namana puk tatamiu. <sup>26</sup>Inggoumur Parisisitir kut! Mu uadelauana baka uoum tar haua re mok i lolono tar balanar kap, doha peileit, song re delauana pon i kalahar.”

<sup>27</sup><sup>i</sup>“Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Inggoum pe misiana tar keuetier nibubun tar bubun gaugauil, kara mataia tun tar nibang, bo i lolono puk tar keu ke uoun tar hirousisis ka matmat, doha burehemper ineter beng. <sup>28</sup><sup>j</sup>Ter siokono sira kompe rung uangoul peoum, o tamata ra banga tar tukunumioum, kara namana pare, o tamata uaiaoun. Bo i lolono puk tamiuoum a uoun tar hagaring guata kokop, doha hagaring mahang longoro tena ualatut God.”

<sup>29</sup>“Mu tagin teil, inggoumeitir tamatang ualualasira tar ualatut, doho Parisi! Inggoum o tang kokop! Inggoum pe mung uoto tuha uaia tun

<sup>f</sup> 23.22 Ais 66.1; Mat 5.34    <sup>g</sup> 23.23 NKP 27.30; Mai 6.8    <sup>h</sup> 23.25 Mak 7.4

<sup>i</sup> 23.27 Apo 23.3    <sup>j</sup> 23.28 Luk 16.15

tenas keuir propeit, karung uamatmate hamas tonoso keuir tamatasier kodkodoh. <sup>30</sup>Karung uoto kula pare, ‘Ge pakung uangouloum tar binaka ka uangoulume ro bungumi, paka hik pah mung poul tasisina tar uatading tar deuatingisir propeit.’ ”

<sup>31</sup>k“Doh tar puhonene, inggoum mung kula katongongualasioum pare, inggoum teso bungusuis ka uiliatung pou tasir propeit. <sup>32</sup>Gon, mung uakapa keip baka tar haua ka uakekene keipimein ro bungumi! <sup>33</sup>Inggoum o soi, karo bung tusur soi! Hapengua marung turung uasiauoum tar binaka re kula God pare, mung laoum i Hel? <sup>34</sup>Doh inggo gine ru hire tamiuoum, inggo u turung heiraha tasir propeit tamiuoum, doho tamatang iate, doho tamatang ualualasira tar ualatut. Bo inggoum puk mung turung uiliatung pou mo gisiamah, karung uakusa mo gisiameh tar korose, karung halhaluh uauelmahing to mo gisiameh tenami umang lotu. Karung turung geil liu tur tasisina tonomio uan, kara turung ualongualasina toro giniameh ro uan. <sup>35</sup>mTemaet a niduh ger eisir tamata geka tung pou tasir tamata uaia, uakekene tur tang Abel e tuka tang Sekaraia ger tuna Berekia, gekung tung pou toioum tar ueltageihinar umang lotu ger dedeil doho olta, e turung pono tamiuoum. <sup>36</sup>Doh inggo gine ru hire tun toro mana tamiuoum, a mamang niduhulikinanine e turung pono tasir tamata ra uangoul daan.”

#### Isu ke ueldolomo tasir tamatang Jerusalem

<sup>37</sup>“Jerusalem, Jerusalem, ingga o uoto uiliatung pou tasir propeit, karo bakbak pou tasisit ke heirihais God totomua. A touihar binaka ku marang kale uiliodouto tosnogo tamata misiana tar paolo tinana gere auin tane toso bung tun tar toking pang titiauan, bo inggoum puk ahik pah kung uoto uamaluana pare, u guato. <sup>38</sup>“Bang! Gine daan God e hiliu tenami umang lotuoum ger dedeil e turung kalilono tok. <sup>39</sup>oDoh gine daanala, inggoum ahik pah mung turung banga baka poluk totoguo e tuka tar binaka getung kuloum pare, ‘God, o guata uaia tatanono gere laha tar hanganar Tamata Noman.’ ”

#### Isu ke hire tar bureher niduh re turung pokos

**24** <sup>1</sup>Doh Iesu ke hiliu tar umang lotu ger dedeil, doh gitie re lang la manasa peon, kara lame no tamatang uakuakelukono tatanon, ka marang uamakoso ualasira tatanono toro tuha uma ka tuhaig toro umang lotu ger dedeil. <sup>2</sup>pDoh Iesu ke hire tapokis tasisina pare, “Mu banga toro uma uakapanine? Inggo gine ru hire tamiuoum pare, ahik mo sioko ro palaua ro turung toko uaponola me giniamah. A palaua uakapa tun ra turung baka uahiuag.”

<sup>k</sup> 23.31 Apo 7.52 <sup>l</sup> 23.33 Mat 3.7; 12.34; Luk 3.7 <sup>m</sup> 23.35 Uak 4.8; 20UTT 24.20-21

<sup>n</sup> 23.38 1To 9.7-8; Jer 22.5 <sup>o</sup> 23.39 Ker 118.26 <sup>p</sup> 24.2 Luk 19.44

<sup>3</sup>Gitie ke tabila uahiua pe Iesu tar Siusan i Oliv, doh no tamatang uakuakelukono ka lame tatanon, kara me dangata uanomo tatanono pare, “Hire tamiueim, mangiha re turung kotpokosor inetenanine, doh kaein me uaparoko re turung uahire uoum tar binaka ro turung tapokisimea, doh tar binaka re kapar kot?”

<sup>4</sup>Doh Iesu ke hire tasisina pare, “Mu tagin teil geta uelourousioum. <sup>5</sup>Ge o burehe per tamata ra turung lame, ra keip teil tar hangouguo, kara me hire pare, ‘Inggote Kristo,’ kara turung uelour mo bureher tamat. <sup>6</sup>Doh inggoum mung turung longoro me uiliatung, doh me uelhireng uiliatung, bo ahik pukuoum pah mung sokor. Ginin e turung kotpokos, bo ahik pukunin pah tere turung uahire pare, ke uahuhutung kapar kot. <sup>7</sup>Doho pang uan ra turung ueluiliatungeis me ro giniamhe ro pang uan, doho pang uan uleik ra turung ueluiliatungeis me ro giniamhe ro pang uan uleik, doha gog doha nun e turung kotpokoso toro butur ueltebeir. <sup>8</sup>Gininar inetenanine e turung kotpokoso tar kot ngohina re uakekene per uelmahingina ro poh.”

<sup>9</sup>“Tar binakon inggoum ra turung kusesioum, kara keipisoum tar uelkodoh, kara heirisoum me niduh, kara tung pousioum, doho mamang uan uakapa tar kot e turung tokouasais tamiuoum, teene rung uakeluk pe inggoum totoguo. <sup>10</sup>Doho bureher tamat e turung punga res nitagorong mana tar binakon, kara turung tangana katongois tosnosio uelmatan, kare uelueltokouasais. <sup>11</sup>Doho bureher propeit bohoboh ra turung kotpokos, kara uelour mo bureher tamat. <sup>12</sup>Doho bureher tamata ra turung hiliu tar hagarang malaelhir tar tang giameh, teene a hagar uasa e turung kotpokoso uauleik. <sup>13</sup>Bo mai pukur tamata re tur uapopokoh e tuka tar uadouhinar marein, inggono tere turung uelkarusin God. <sup>14</sup>Doho Uelhire Uaia tena Nitoia God ra turung uelhire tauetein toro mamang uan uakapane i kot mara longoro toro mana tang Iesu, dohi muduhia kompe e turung kapar kot.”

### A inete uasa tun e turung kotpokos

<sup>15</sup>Iesu ke kula poluk pare, “Inggoum mung turung banga tar inetonene ke kulkulamein propeit Daniel. Inggono ke kula pare, ‘A Tamata Uasantiehe Tun Ger Mamantou e turung uatur tar inete ger ualangong iuma tar umang lotu ger dedeil mare mamantou tatanon.’ Maia ro timana toro uelhire rone pako namnamana hamas, karo naman manate a hauar tengkan. <sup>16</sup>Tar binaka ra bangar tamatasit i Judia e kotpokosor puhon, kara ualo liu ualahurunguala toro siusan. <sup>17</sup>W’Doha tamata gere uangoul tar kukuna um, ahik pahe hiuo uelhir baka

<sup>q</sup> 24.5 Mat 24.23-24; 1Jo 2.18    <sup>r</sup> 24.9 Mat 10.22    <sup>s</sup> 24.11 Mat 24.5,24; 1Jo 4.1

<sup>t</sup> 24.13 Mat 10.22    <sup>u</sup> 24.14 Mat 28.19    <sup>v</sup> 24.15 Dan 9.27; 11.31; 12.11    <sup>w</sup> 24.17 Luk 17.31



poluk tar la kale tar hauar inete re moko tena um. <sup>18</sup>Doha tamata gere uangoul tar iom, inggono ahik baka poluk pahe la tapokis tar la kale tono hikhiku. <sup>19</sup>Doh kuasalik tunur kuaha balakos, doh gisis ra uahuh tasir guam tar binakonene! <sup>20</sup>Mu dangata tenami lotu tang God mara hikir inetenanine pahe turung kotpokoso to tar binakang malahong ue a panguhua uleik ue tar Mareining Pepe Uah. <sup>21</sup><sup>x</sup>Ter hauon, tar binakanin e turung kotpokosor niduhuntiehe tun, e uakekene tur tar binaka ke tuha God tar mamang inetelik e me tuka daan, kara hikingua baka poluk me niduh sira re turung kotpokos. <sup>22</sup>Toro mana tun geta hikir Tamata Noman pahe uapouhina tar binakanin, o tamata uakapa ra turung siokor mamantouis. Bo inggon e namanantiehe tun tasir tamata geke kedangasio sioun, temaene re turung uapuhinono tar binakanin.”

<sup>23</sup><sup>y</sup>“Doh gete me tang siokor tamata re hire tamiuoum pare, ‘Bang! Gine deh te Kristo,’ ue e hire pare, ‘Gila dehon!’ Ahik pah mung tagorong mana tatanon. <sup>24</sup><sup>z</sup>Ge o Kristo bohoboho pe, doho propeit bohoboho pono ra turung kotpokos, doh gisina ra turung guata tar niuaparoko uleik, doha ineteng ualutara mara uelour tasir tamat, doh geta matotosin, gisina ra uelour pono tasir tamata geke kedangais God.”

<sup>25</sup>“Mu ualongor! Inngo ku hire baka uoum tamiuoum sioun. <sup>26</sup>“Temaene geta kulasioum pare. ‘Bang, inggono dehe uangoul tar butur paden,’ doh inggoum ahik pah mung la tar buturuon ue geta kulasina pare, ‘Bang, inggono deh gine re uangoul iuma tar um!’ Inggoum ahik pah mung tagorong mana tenas menesin. <sup>27</sup><sup>b</sup>Ge a Tunar Tamata pe e turung la sirame tar kanaua gere bala koutula tar langit uakap, e uakekene tur tar butur re harhara turuhar pisar, kare la bala uatukako tar butur re la hukor pisar. <sup>28</sup>“Gea butur pe re rikinir tukununar mat, ra ate toin, teene ra uangoul toto per pasukadau.”

<sup>29</sup><sup>d</sup>“I muduhia kompe tar binaka uasananine,

a pisar ahik pahe turung pid,  
 doha bialok ahik pono pahe pid.  
 Doho pitopit ra turung punga turuha i ran,  
 doha mamang inetelik i ran e turung gun.  
*Aisaia 13.10; 34.4; Joel 2.10,31*

<sup>30</sup>“Song re turung kotpokoso na uahirer Tunar Tamata tar langit, doho mamang matina tamata uakapane i kot, ra turung kiringetie ra banga to manasa pela tar Tunar Tamat e lame tar mahar langiting Heuen menia

<sup>x</sup> 24.21 Dan 12.1    <sup>y</sup> 24.23 Mat 24.5    <sup>z</sup> 24.24 Ual 13.1-3; 2Te 2.8-9; UGO 13.13-14

<sup>a</sup> 24.26 Luk 17.23-24    <sup>b</sup> 24.27 Mat 24.37-39    <sup>c</sup> 24.28 Luk 17.37    <sup>d</sup> 24.29 Isk 32.7; 2Pi 3.10; UGO 6.12-13    <sup>e</sup> 24.30 Dan 7.13; Sek 12.10; UGO 1.7

tena nitampopokoh a uleikintieh, doha uleikinar uiniator a mataia tun. <sup>31f</sup>Doho tuil o turung urunguntiehe tun, kare turung ualatueono toсно anggelou ra la kale toto toсно tamatono geke kedangais o nan. O anggelou ra la kale tur tasir tamatasina toro mamang buturulik e la uatuka tar surunar pang uan i kot.”

### Iesu ke uelhire uaranga toro douk, ra kilain o fig

<sup>32</sup>Doh Iesu ke hire poluk pare tasisin, “Inggoum mung banotong kale niate tur tar uelhire uaranga toro fig. Roon o ualasira tamiuoum pare, tar binaka re tiuanar ranan, kare uakoupur kamanan, inggoum mung ate manas, a binaka uaia, kara binakang pispisar e uahuhutung kotpokos. <sup>33</sup>Ter siokono komper hagar getung bangoum tar ineteninanine, inggoum mung ate manasa pare, a binakono ke uahuhut manasain, e marang uakekene manas. <sup>34g</sup>Doh inggo u uamana tun tamiuoum, tar binaka halanar tamatang tar binakono ta mate uakap tere kotpokoso tor mamang inetelikinanine. <sup>35</sup>hI ran, dohi kot ura turung kapa liu, bo nogo uelhireo ahik paho turung kapa liu tagu.”

### Ahik me tamata re ate tar binaka re kotpokosor ineteninanine

<sup>36</sup>i“Ahik me tamata re ate tar marein, doh tar binaka re kotpokosor ineteninanine, doho anggelousinah i ran ahik pono pah ra ate, doha Tuna God<sup>j</sup> ahik pon, bo te Tamana pukuono tere ate. <sup>37</sup>kA hagar geke guatainir tamata tena binaka Noa ter siokono polukumper hagar ra turung guatainisina tar binaka re kotpokosor Tunar Tamat. <sup>38</sup>Tar binaka halanar koto te siluin o tamata ka ein, kara inum, doho bulout, doho kuah ka ueluelee e tuka tar marein ke panete pe Noa tena bout. <sup>39</sup>lKara hik dedempe pah ka bang paroko me inet e tuka ko kotpokoso pe ro silu uleik, karo me reih liu tasisina uakap. Ter siokono sira komper hagar re turung kotpokoso tar binaka re lamer Tunar Tamat. <sup>40</sup>Tar binakon a toking tamat ura turung kalekinale tar iom, doha tang sioko ra turung kale liuin, kara hiliuinir tang giameh. <sup>41</sup>Doha tang torikir kuah ura soko tar pluang bereit, doha tang sioko ra turung kale liuin, kara hiliuinir tang giameh. <sup>42</sup>mTemaene inggoum mung uakuakeis, ge inggoum pe mung tele tar marein re lamein nami Tamata Noman. <sup>43</sup>nMu namana dede tar puhene gete ate umatoto tanener uma tar binaka re lamer ueuenau, inggon e turung uakuakeis, kara hik pahe uamaluan e polakar ueuenau tena umon. <sup>44</sup>Ter siokono sira kompe, inggoum pono mung

<sup>f</sup> 24.31 1Ko 15.52; 1Te 4.16    <sup>g</sup> 24.34 Mat 16.28    <sup>h</sup> 24.35 Mat 5.18    <sup>i</sup> 24.36 Apo 1.7; 1Te 5.1-2    <sup>j</sup> 24.36 O gisiameher tamatang iate ra namana pare, a puhung uelhirenene, “doha Tuna God ahik pon,” taboinene.    <sup>k</sup> 24.37 Uak 6.5-8    <sup>l</sup> 24.39 Uak 7.21-23  
<sup>m</sup> 24.42 Mat 25.13    <sup>n</sup> 24.43 Luk 12.39-40; UGO 16.15

uakuakeis, karung kaleuatoro ponosioum, ge a Tunar Tamata pe e lame tar binak ahikioum pah mung ate teil tena nilameon.”

**O uelhire uaranga tar tamatang kalekinale  
uaia, doha tamatang kalekinale uasa**

<sup>45</sup>Doh Iesu ke kula poluk pare, “Mair tamatang kalekinale na ninamana uaia, kara longlongoro uaia dede tar mamang binakalik? Inggono ter tamata geke uamokoin na tamata uleik tar kaukeke tasir gisiameher tamatang kalekinale tar heir teresi nieinisina tar binaka ka uamoko uamatotoin. <sup>46</sup>A tamatang kalekinaleonene e banotong uaha tun gete tapokisime na tamata uleik, kare me banga re kalekinale peono tar kalekinaleene ka uamoko uatuhain tatanon. <sup>47</sup>Inggo gine ru hire toro mana tamiuoum, a tamata uleik e turung uamoko tatanono tar kaukeke tena mamang inetelikion. <sup>48</sup>Bo ge pakene a tamata uasar tamatang kalekinaleonene, kare kula katongoin pare, ‘Nag tamata uleikio ahik pahe uolong lame.’ <sup>49</sup>Kare uakekene tar halhaluh toso uanoton, kare la ein, kare inum tagu tasisitie ra uoto inumuntiehe tar inum popokoh, <sup>50</sup>Song re la turung tapokisime na tamata uleikiono me marein re teleion, doh tar binak ahikiono pahe ate pare, e lameon. <sup>51</sup>Doh na tamata uleikion e turung mamantouo tununguampe tatanon, kara baka liu tagulain tasir tamata gesir tang kokopo tar butur ra kiring tor tamat teeit ra nimaliana pe, kare uelmahingis.”

**O uelhire uaranga tasir siokor hangaulur kuaha kalan**

**25** <sup>1</sup>P<sup>D</sup>Doh Iesu ke hire poluk pare, “Tar binakon a Nitoiang Heuen e turung misiana tasir siokor hangaulur kuaha kalana geke siokor kale tenas lam tar la ueltupara to tar lele tar buloutene re turung le. <sup>2</sup>A tantolima tasisin ahik paho naman manate, doh gisisir gime tantolima tesir naman manate. <sup>3</sup>Gisis ahik paho naman manate ka kale tenas lam, bo ahik puk pah ka kale me giniamerher uaiuai mara hedongig i muduhia. <sup>4</sup>Doh gisisir naman manate ka itu tenas giniamerher uaiuai tar botol, kara kale keip tenas lam. <sup>5</sup>Doh gitir bulout ahik pah ke uolong pokos, temaene gisisir kuaha ka susua tabil manasampe, kara hohou. <sup>6</sup>Doh nar uantinaninar boung tun ka longorosina tar tamat e kula ualeik pare, ‘A bulout gere le gine manase! Mu lame, karung la ueltupara to tatanonala tar lel.’ ”

<sup>7</sup>“Kara siokor guletenguar siokor hangaulur kuahasin, kara kaleuatoro manasampe tenas lam. <sup>8</sup>Doho kuahasis ahik paho naman manate ka kula pare tasisisir naman manate, ‘Mu heir baka me giniamerher uaiuainitir namiu tamiueim, ge inggeim pe ke biolo nami lam.’ <sup>9</sup>Bo gisis pukur

---

◦ 24.47 Mat 25.21,23 P 25.1 Luk 12.35; UGO 19.7

naman manate ka kula tapokis tasisina pare, ‘Doh geti uelpakah dehe inggeig, ginin ahik pahe la turung uelmatout tagigeig uakap, mung la tar situa, karung la bulaua menamiu.’ ”

<sup>10</sup> “Temaene song ka la bulauasina tenas uaiuai, doh tar binaka tabo harahaisisina teke pokoso tor buloutene re le. Doho tantolimar kuaha geke kaleuatoro teka me leka tagu uoum tatanono toro niein uleik toro le, kara holoroin ro pирpirik. <sup>11</sup> <sup>q</sup>I muduhia ka pokoso kalehesisir gisiameher kuah, kara me kula pare, ‘Ir Tamata Noman, Ir Tamata Noman, puka ueleheir baka tamiueim toro pirik!’ <sup>12</sup> “Bo ke kula tapokis pukuono pare, ‘Ahik nomanampe, inggo u tele tamiuoum.’ ”

<sup>13</sup> “Kare la uakapa to Iesu tena uelhire pare, “Temaene inggoum mung uakuakeis, ge inggoum pe mung tele teil tar marein ue tar binaka re lameinir Tunar Tamat.”

### **Iesu ke uelhire uaranga tar tamatang kalekinale uaia, doha tamatang kalekinale uasa**

<sup>14</sup> “Tar binakon, a Nitoiang Heuen e turung misiana tar tamata geke marang la baka tar gime uan e uaireh, bo ke kila toto baka pukuono tosno tamatang kalekinale, kare heir tasisina toro kalekinale tar kaukeke tena manion, doh tena mamang inetelik. <sup>15</sup> “Tar tang siok tang sioko tasisinasine, inggono ke heir kahakaha tenas kalekinalesin, re banga to pe tenas nikalekinalesin. Tar tang siok inggono ke heir tar tolimar mani, doh tar tang giameh inggono ke heir tar torikir mani, doh tar tang giameh ke heirono tar siokor mani, song ke la. <sup>16</sup> Doh gitir tamata geke kale tar tolimar mani ke la uateuelengua, kare la kalekinale keip tar manionene, kare uakotpokoso uanoto poluk tar giameher tolimar mani. <sup>17</sup> Kara siokono sira kompe ke guata pono per tamatetie geke kale tar torikir mani, ke la uakotpokoso uanoto pono tar giameher torikir mani. <sup>18</sup> Bo gitier tang giamehe geke kale tar siokor mani, ke la kompe, kare la koho tar tung i kot, kare u tane tena mani na tamata uleik.”

<sup>19</sup> “I muduhia ke la baka per puhung barah, nas tamata uleikisina ke tapokisime, kare me bangeaha manas, hape ka guata keip pesina tar mani. <sup>20</sup> Doh gitir tamatang kalekinale geke kale tar tolimar mani, ke lame, kare me heir tar uagiamehenar tolimar mani. Kare kula pare, ‘Ingga ko heir totoguo tar tolimar mani. Bang! Tar maniene ku uakotpokoso uanotoio, inggo ku uakotpokoso uanoto poluk tar giameher tolimar mani.’ <sup>21</sup> <sup>u</sup>Kare kula na tamata uleikono pare, ‘Ingga ter tamatang kalekinale uaia, kara longlongoro uaia tun, kara tang kalekinale keip tar inete kikitilik, temaene inggo u uamokongua totomua o kaukeke me bureher inet. Auia, lame karo me uaha uelkout totoguo.’ ”

<sup>q</sup> 25.11 Luk 13.25-27    <sup>r</sup> 25.12 Mat 7.23    <sup>s</sup> 25.13 Mat 24.42    <sup>t</sup> 25.15 Roum 12.6

<sup>u</sup> 25.21 Mat 24.45-47; Luk 16.10

22 “Song ke lamer tamatang kalekinaleetie ka heirin tar torikir mani, kare me kula pare, ‘Tamata Noman, ingga ko heir totoguo tar torikir mani. Bang! Rasine ter gime torikir mani ku uakotpokoso uanotosio.’  
23 Kare kula na tamata uleikono pare, ‘Ingga ter tamatang kalekinale uaia, kara longlongoro uaia tun, doha tang kalekinale keip tar inete kikitilik, temaene inggo u uamokongua totomua o kauেকে me bureher inet. Auia, lame, karo me uaha uelkout totoguo.’ ”

24 “Maeit ke la kalehemeeitier tamatang kalekinale geke kale tar siokor mani, kare me kula pare, ‘Ir tamata uleik, inggo u ate totomua a tamatang uelhire uapopokoho tar inet, o uoto ueuere toro iomonitie ka lebeigir gime tamat, doh tar mahar kotonitie ka uasisir gime tamata tar uatun, ingga tero me uoto lous tar uauan. 25 Temaene inggo ku sokor, karu la puk manas, karu la touaouo tenang mania i lolono tar kot. Bang! Ginine tenang mania geko heir bakaig.’ ”

26 “Kare kula na tamata uleikono pare, ‘Ingga ter tamatang kalekinale uasa tun, kara pul! Ingga ko ate pare, u uoto ueuero toro iomonitie ahik pah teku leblebeig, karu uoto kale toto tar nieininitie ahik pah teku uasisig. 27 Doh maene ahikia pah ko uamokola tenag manio tar umang mani mare geru tapokisimeo u me banotong kale tapokis tenag maninine menia keip me giniamer mani geke kotpokos?’ 28 Temaene, mung kale liuoum tar manionene tatanon, karung heir tar siokor mani tar tamatang kalekinale geke kale tar hangaulur mani. 29 “Ge tasir tamata uakapa pe ge nas giniamer pukur inet, inggo u turung heir baka poluk me giniamer inete tasisin, kare turung burehenguaisisin. Bor tamata ge ahik tun mena inet ue na iinetelik pukumpe, ginina ra turung kale liu tur kompeig tatanon. 30 “Doh tar tamatang kalekinalener pul, inggoum mung baka tauetelala tatanono i kalahara tar kitkitupun tar butur ra kiring tor tamat, teeit ra nimaliana pe, kare uelmahingis.”

### A Tunar Tamat e turung kedanga tasir tamat

31 x“Tar binaka re turung tapokis polukumer Tunar Tamata ger toia menia tena uniator, doh no anggelou uakapa tun, inggon e turung tabila tonoso tabtabilar toia tar kedanga tasir tamat. 32 yDoho tamata uakapane i kot ra turung la toto tatanon. Kare turung pakahono tasir tamata tar torikir toto misiana kompe re uoto pakaha liu per tamatang kaukaeuke tasir sipsip, e pakaha liu tur tasir sipsip tasir meme. 33 Inggon e turung uamoko tasir sipsip tar pang mua, doho meme tar pang kais. 34 Kare kular toia tasisit tar pang mua pare, ‘Inggoumeit ke guata uaiais Tamouguo, mung me kale tar Nitoia ke kaleuatoroin God tamiuoum, doha

^ 25.29 Mat 13.12; Mak 4.25; Luk 8.18    v 25.30 Mat 8.12; Luk 13.28    \* 25.31 Mat 16.27; 19.28    y 25.32 Isk 34.17; UGO 20.11-13

niuamatoto tanika manasampe tamiuoum sioun tar binaka ka touoinir kot. <sup>35z</sup>Teene sioun inggo ku gog, karung ualaeinoum totoguo, karu malainum, karung heiroum totoguo tar kodom, kara peng tar gime uan, karung keipoum totoguo tonomio um. <sup>36</sup>Ku palapal, karung ualohoum totoguo, karu momouh, karung me kauekoum totoguo, ku uangoul tar karabus, karung me ruh koutoum totoguo.’ ”

<sup>37</sup>“Doh gisisir tamatar kodkodoho ra turung hire tapokis tatanono pare, ‘Ir Tamata Noman, mangiha king bangeim totomua, o gog, karing ualaein totomua ue o malainum, karing heir totomua me kodom? <sup>38</sup>Mangiha tunumpe king bangeim totomua a peng tar gime uan, karing keip ualeka totomua tonomio um ue king banga totomua a palapal, karing ualoho totomua? <sup>39</sup>Mangiha tun king bangeim totomua ko momouh ue ko uangoul tar karabus, karing la ruh kouteim totomua?’ <sup>40</sup>“Doh gitir toia e turung hire tapokis tasisina pare, ‘Inggo gine ru hire tamiuoum, hingiamper binaka kung guata uaia inggoum tar hagarinine me tamata toso bung tahiguosiner kikitilikintieher hangas, inggoum kung guata tola totoguo.’ ”

<sup>41</sup><sup>b</sup>“Kare turung kulono pare tasisit tar pang kais pare, ‘Mu uareingane totoguo, ge mung turung kale peoum tar ineter sa geke heirin God tamiuoum, karung la toro hue ke kaleuatoroin Satan mesno angelou. <sup>42</sup>Ge sioun pe, inggo ku gog, bo inggoum puk ahik pah kung ualaein totoguo, ku malainum, kara hikoum pah kung heir totoguo me kodom. <sup>43</sup>Kara peng tar gime uan, doh ahikoum pah kung keip ualeka tonomio um, ku palapal, kara hikoum pah kung ualoho totoguo, ku momouh, karu uangoul tar karabus, kara hikoum pah kung me ruh kout totoguo.’ ”

<sup>44</sup>“Kara turung kula tapokisisina pare tatanon, ‘Ir Tamata Noman, mangihar binaka king bangeim totomua, o gog ue o malainum ue a peng tar gime uan ue a palapal ue o momouh ue o uangoul tar uih, kara hik pah king poul totomua?’ <sup>45</sup>Kare turung kula tapokisir toia pare, ‘Inggo gine ru hire tamiuoum, hingiamper binaka kung deoum matung poul me kaluasine ro bung tahiguor tabo hangas, inggoum kung de matung poul totoguo.’ <sup>46</sup>“Gisinasine tera turung kulais ra la tar butur re mokor uelmahing uleik tun ge ahik pahe kapa tagu, bo gisitir tamatar kodkodoh tera turung la tar butur re mokor nituang tar mamang binakalik.”

**Noso mamahoholikir pater, doho mamahoholik  
ka uelhote tar tung pous tang Iesu**

**26** <sup>1</sup>Tar binaka ke ualasira uakapa Iesu tar mamang inetelikinanine, kare kula pare toso tamatang uakuakeluk, <sup>2d</sup>“Inggoum mung iate

<sup>z</sup> 25.35 Ais 58.7    <sup>a</sup> 25.40 NU 19.17; Mat 10.42; Mak 9.41    <sup>b</sup> 25.41 Mat 7.23

<sup>c</sup> 25.46 Dan 12.2; Jon 5.29

pare, a torikir marein puk manasa rasit ura mok, karo kotpokoso ro niein uleiking Leke Liu ro Mat.<sup>e</sup> Kara turung uamokoinir Tunar Tamata tar limasir uelmatan, kara turung uakusein tar korose.”

<sup>3</sup>Tar binakon, o mamahoholik, doh nosio mamahoholikir patere ka la toto tena uma uleikir patere uleik, ger hangana tang Kaiapas. <sup>4</sup>Kara uelhote tar sir me hagar mara kusa uanomo tang Iesu, song ra tung pous tatanon. <sup>5</sup>Bo ka kula pukusina pare, “Inggeig ahik pahi banotong guata to tar puhono tar mareining lotu uleik geta bangar tamat, kara nimalian, kara uatentur me ueluelkoi.”

#### **A kuaha ke ding to i Betani tar uaamiamuh toro luna Iesu**

<sup>6</sup>Iesu ke uangoul i Betani, tena uma Saimon ger toba baka sioun. <sup>7</sup><sup>f</sup>Gitie re ein tabila pe Iesu, kare la keipimer kuaha tar botolo mataia e moko teilir uaamiamuh, a i ranantieher bulauan, kare me dingila toro luna Iesu. <sup>8</sup>Doho tamatang uakuakeluk ka banga tar puhonene, kara nimalian, kara ueluedangateis pare, “Ae maene ke ueluelour pukuono tar amiamuh e la? <sup>9</sup>A uaamiamuhono paka uabulauain mara kalein me uleikir mani, kara heirin tasir tiome.”

<sup>10</sup>Bo Iesu puk e atensioun manasa tar haua ra kulkulainisin, maeit ke kula pare, “Dehen tung heirheir me niduh tar kuahene, ge inggono pe ke guata tar hagar uaia tun totoغو. <sup>11</sup><sup>g</sup>Tar mamang binakalik, o tiome ra turung uangoul tagu tamiuoum, bo inggo ahik pahu turung uangoul keip tamiuoum tar mamang binakalik. <sup>12</sup>A haua ke guataion totoغو, ke ding pe tar uaamiamuh, teke guata tar kaleuatoro tanika tar tukunuguo tar keu. <sup>13</sup>Inggo u uamana tun tamiuoum, iamper buturane tar koto uakapa ra uelhire tauetein ro Uelhire Uaia rone, tar haua ke guatainir kuahene ra turung ueluatatain tar namana dede tatanon.”

#### **Judas ke uauia e tangana tang Iesu tar limas nosio mamahoholikir pater**

<sup>14</sup>Doha tang sioko tasir siokor hangaul, doha tang torikir tamatang uakuakeluk a hangana tang Judas Iskariot ke la tasir patere uleik. <sup>15</sup><sup>h</sup>Kare la kula pare, “A haua rung turung heirioum totoغو getu tangano tang Iesu tar limamiuoum?” Doh gisina ka heir tatanono tar touonor hangaulur mani silva. <sup>16</sup>Kare uakekene turungua tar binakonene, Judas ke sirsir manasa me lele hape mare tangana tang Iesu tar limasisin.

#### **Iesu ke ein toro niein uleiking Leke Liu pe ro Mat mesno tamatang uakuakeluk**

<sup>17</sup><sup>i</sup>Tar uakikilanganar mareining toro niein uleik ra kilain O Bereit Ahik me Is. O tamatang uakuakeluk ka lame tang Iesu, kara me dangata

<sup>d</sup> 26.2 KT 12.1-27; Mat 20.18    <sup>e</sup> 26.2 Leke Liu ro Mat a Pasova.    <sup>f</sup> 26.7 Luk 7.37-38

<sup>g</sup> 26.11 Ual 15.11    <sup>h</sup> 26.15 Sek 11.12; Jon 11.57

pare, “Ia me butur ro malara ingga, mi kaleuatoreim maro me ein to ingga toro niein uleiking Leke Liu pe ro Mat?”

<sup>18</sup>Doh Iesu ke hire tasisina pare, “Inggoum mung la i koboro tar uan uleikela, karung la tar tamatene, karung hire pare, ‘A Tang Ualafir ke kula pare, Na binakono ke uahuhut manasain. Inggou mesnogo tamatang uakuakeluk mi me turung ein to tenang uma toro nieining Leke Liu pe ro Mat.’” <sup>19</sup>Maeit o tamatang uakuakeluk ka guata sira manasa ke ualatoho pe Iesu, kara kaleuatoho toro niein roon.

<sup>20</sup>Gitie ke reiu manasa peon, Iesu mesno siokor hangaul, doha tang torikir tamatang uakuakeluk ka tabilang ein. <sup>21</sup>Doh gitie ra ein tabil pesin, kare kula Iesu pare, “Inggou u uamana tun tamiuoum, a tang sioko tamiuoum, e turung tangana totoguo tar limafir uelmatan.”

<sup>22</sup>Doho tamatang uakuakeluk ka longoro tar puhonene, kara ueldolomontiehe tun, kara dangdangata uelture kompela tatanono pare, “Ir Tamata Noman, inggono?”

<sup>23</sup><sup>j</sup>Kare hire tapokis Iesu pare, “A tamata gere turung tangana totoguo tar limafir uelmatan, teene re turung uahu tagu totoguo tono mahar bereit i lolono tar nouh. <sup>24</sup>A Tunar Tamat e turung mat misiana sira kompe ro kulkula teil pe no uelhire God, bo kuanalik tunur tamatene re turung tangana tatanono tar limafir uelmatan. Paka uiantiehe ge pakene ahikir tamatonene pah ka pohoin.”

<sup>25</sup>Doh Judas ter tamata gere tangana tatanono tar limafir uelmatana ke kula pare tatanon, “Ir Tamata Noman, inggono?” Kare hire tapokis Iesu pare, “Te paara ro kula sira peme ingga.”

### **Iesu ke ein keip tosno tamatang uakuakeluk toro uadouhina ro niein**

<sup>26</sup>Gitie ra ein pesin, Iesu ke kale toro bereit, kare heir tar uatakai tang God, kare pis pakah, kare heir tang roono tasir tamatang uakuakeluk, kare kula pare, “Kale, karung ein, roono rone a tukunuguo.”

<sup>27</sup>Kare kaleono tar kap bino, kare heir tar vatakai tang God, kare heir tar kap tasisin, kare kula pare, “Inggoum uakapa mung kale, karung inum to tar kapene. <sup>28</sup><sup>k</sup>Ge ginine pe ter deuatingiguo gere uahail tane tar timuhur uelhote, doh gera uatadingig tasir bureher tamata mare kuse luara God tenas niguata uasasin. <sup>29</sup>Inggou gine ru hire tamiuoum, inggo ahik pahu turung inum baka poluk me bino e tuka tar marein ru inum taguo tar timuhur bino tamiuoum iuma tena Nitoia Tamougou.”

<sup>30</sup><sup>l</sup>Song ka keresina toro kereker, kara lala tar Siusan i Oliv.

<sup>j</sup> 26.23 Ker 41.9    <sup>k</sup> 26.28 KT 24.8; Jer 31.31-34; Sek 9.11; 1Ko 10.16    <sup>l</sup> 26.30 Luk 22.39; Jon 18.1



### Pita e turung uolih e tele tang Iesu

31<sup>m</sup> Song ke hire Iesu tasisina pare, “Tar boungon, inggoum uakapa tun mung turung ualo liu, karung hiliu totoguo, ter hauono no uelhire God ko kula pare,

‘God e turung uiliatung pous tar tamatang kaukaueke tasir sipsip, kara turung ualualo ueltebeiringuar sipsip.’ *Sakaraia 13.7*

32<sup>n</sup> Bo tar binaka puk ra uatua tapokisio, inggo u turung uoumula i Galili.”

33<sup>o</sup> Doh Pita ke hire tauete pare, “Geta siokor tagorong bohosina totomua, kara hiliu, inggo ahik nomanampe pahu turung hiliu tagu totomua.”

34<sup>o</sup> Doh Iesu ke kula pare tang Pita, “Inggo u uamana totomua, daana tar boung tar binaka halanar paolo te koror, ingga o turung uolih uatouono pare, o tele totoguo.”

35<sup>o</sup> Doh Pita ke kula uapopokoho tapokis pare, “Inggo ahik pahu banotong kula pagiar! Auia teilimpe getu mate tagu totomua.” Doh gisisir gisiamehenar tamatang uakuakeluk ka siokor kula sira pon.

### Iesu ke lotu tang God i Getsemani

36<sup>o</sup> Doh Iesu mesno tamatang uakuakeluk ka la tar butur ra kilain i Getsemani, kare kulono tasisina pare, “Mu tabilane geru la bakala inggoala, u la lotu.”

37<sup>o</sup> Doh ke kale taguono tang Pita, doha toking tuna Sebedi nu Jems me Jon. Doh Iesu e hagouo manasa pare, e ueldolomontiehe tun, kare hagouo uasantieh. 38<sup>p</sup> Kare hireono tasisina pare, “O balougou o duhunteiehe tun u hagouo sira pare, u uahuhutung mata tar niueldolom. Mu uangoulane, karung uakuakeis tagu totoguo.” 39<sup>p</sup> Kare la sikoro baka polukulaono tar sikin, kare baka uahiuain, a porenon e bangako i kot, kare lotu pare, “Tamoug! Ge pare banoton, o kale liu tar kapang uelmahingene totoguo. Bo inggo u uakeluk puk tereng nimalara, ahik pah tereg nimalaro.”

40<sup>o</sup> Doh Iesu ke la tapokisime tasir tantouong uakuakeluk, kare me tupara tasisina ra hohouo kompe, kare kula pare tang Pita, “Hapeono maene ahikioumur tang touono pah kung banotong uakuakeis tagu totoguo me sikir barahar binak? 41<sup>o</sup> Uakuakeis dede, karo lotu tang God mara hikia paho punga tar uatolau. A iabener tamat e malar e uakeluk tena nimalara God, bor tukunun a malmaluan.”

42<sup>o</sup> Doh Iesu ke la poluk tar uatorikinar binak, kare la lotu pare, “Tamoug! Geta hikir kapang uelmahingene pah ra banotong kale

---

<sup>m</sup> 26.31 Jon 16.32   <sup>n</sup> 26.32 Mat 28.7,16   <sup>o</sup> 26.34 Mat 26.69-75   <sup>p</sup> 26.38 Jon 12.27

liuin e tuka getu inumo tatanon, auia, reng nimalara.”<sup>43</sup> Ke tapokis polukumeon, kare me tupara tasir tamatang uakuakeluk ra hohou polukumpe, teene gisina ke duhantieher matas tar matahohou, kara hik pah ka banotong gulgulete uangoul.

<sup>44</sup> Maeit Iesu ke hiliu poluk tasisin, kare la lotu poluk, a uatouonono manasar binak, ke la kotouo polukumpe tar siokonor puhung uelhire.  
<sup>45</sup> Song ke tapokisilaono tasir tamatang uakuakeluk, kare kula pare, “Mu hohouo harahampeoum, karung pepe uaha? Bang! A binaka ke pokoso manasa tar Tunar Tamata ra tanganain tar limasir tamata uasa. <sup>46</sup> “Mu tentur geri laeig! Bang! A tamata gere turung tangana totoguo gine manase!”

### Iesu ka kusein

<sup>47</sup> Iesu e mene haraha tar binaka ke me pokoso Judas ger tang sioko pono tasir siokor hangaul, doha tang torikir tamatang uakuakeluk. Doho manai tamata ra la teil tagu tatanono menia keip tenas baenat, doha pus. Gisina ka ualatueisir patere uleik, doh nosio mamahoholikir Ju. <sup>48</sup> Doh Judas geke tangana tang Iesu, ke heir tanika baka tar puhung uahire tasisin pare, “Hingiar tamata ru nguhuiu, inggono teon. Inggoum mung kusa tane tatanon!” <sup>49</sup> Doh Judas ke la uakodkodoho kompeha tang Iesu, kare me kula pare, “Ir Tang Ualasil,” kare la nguh tatanon.

<sup>50</sup> Doh Iesu ke kula pare tatanon. “Kaloug, a inete gero lang guataia, guata manas.” Song ka lahasisir manai tamat, kara me kusa uanono tang Iesu. <sup>51</sup> Doha tang sioko tasisin ra tur tagu tang Iesu, ke reih tauete tono baenat, kare tokout liu tar talingana na tamatang kalekinaler patere uleik. <sup>52</sup> Doh Iesu ke kula pare tatanon. “Uamoko tapokis tonongo baenat tena butur. O tamata gera uiliatung keip toro baenat, gisina tere turung uamateis ro baenat. <sup>53</sup> Inggoum herung tele pare, inggo u banotong dangata tang Tamoug mare heirahaono mo burehentieher angelou mo burehe uain tar siokor hangaul, doha torikir pang tamatang uiliatung, tar me poul totoguo? <sup>54</sup> Bo ahik puk, ter hauon, hapengua mare kotpokoso nomanar puh gere kulkula teil tono Uelhire God pare, a puhon e turung kotpokos?”

<sup>55</sup> “Song ke kula Iesu pare tasir manai tamat, “Ue, ge inggoum pe kung la keipime tenami baenat doh nami pus marung me kusa sira totoguo ngohina tar tamatetier ueuenau ue a tang uiliatung? A mamang marein ku tabilo, karu ualasila to tar umang lotu ger dedeil, kara hikoum pah kung kusa totoguo. <sup>56</sup> Bo a puh pukuninanine ke kotpokoso mare manar puhung uelhire ka boloigir propet.”

<sup>q</sup> 26.46 Jon 14.31    <sup>r</sup> 26.51 Jon 18.26    <sup>s</sup> 26.52 Uak 9.6; UGO 13.10    <sup>t</sup> 26.55 Luk 19.47; 21.37

Doh no tamatang uakuakelukono ka siokor hiliu tatanono kara ualo liu.

### Iesu e tur tar matanar kaunsol

<sup>57</sup>Doho tamata geke kusa tang Iesu, ka keipila tatanono tena uma uleik Kaiapas, ger uleikir patere tar buturung uanguoul totor tamatang ualualasira tar ualatut, doho mamahoholik. <sup>58</sup>Doh Pita ke la uakeluk sikoro bakampela tang Iesu i kalaharahia tar buturung uanguoul, kare la lek i koboro tar buturung uanguoul tena umar patere uleik, kare la tabila tagu tasir tamatang kaukaeke tar umang lotu ger dedeil mare banga hape re turung kotpokoso pe me puh. <sup>59</sup>Doho patere uleik, doho kaunsol uakapa tun ka sirsir mo tamata gera me boho tola me inete ke guatain Iesu mara banotong tung poususin tatanon. <sup>60</sup>Bo ahik puk pah ka banotong tupara me puh. Gitiempe ka tur taute pe mer bureher tamat, kara boho tola tatanono tar puhpuhung uelhire. Ahik tunumpe pah ka banotong tupara me puh ke guataion mare banoto tasisina tar uiliatung pous tatanon. Bo i muduhia puk, a tang torikir bulout kura tur tauet, <sup>61</sup>“kaura kula pare, “A tamata dehene ke kula pare, ‘Inggo u banotong mamantouo tena umang lotu God ger dedeil, karu tuha tapokis kompe tatanono tar touonor marein.’”

<sup>62</sup>Doh nas uleikir patere ke tur kai, kare kula pare, “Ahika menang puh tar uelhire tapokis tar puhpuhung menenine ka tohtohotolaig totomua?” <sup>63</sup>“Bo Iesu puk e tur bolongur kompe. Doh nas uleikir patere ke dangata poluk pare, “Tar hangana God ger tua, hire tamiueim toro man ge pare, te Kristo nomana ingga ger tuna God.” <sup>64</sup>“Doh Iesu ke hire tapokis tatanono pare, “Aa, git ro kula sira pea. Bo inggo gine ru hire tamiuoum. I uoumuhia, inggoum mung turung banga tar Tunar Tamat e tabila tar pang mua tang God ger tang popokoho tun, kare turung lame i rana toro mahar langiting Heuen.”

<sup>65</sup>“Doh git nas uleikir patere ke nimaliana uasa tun tar puhonene, kare kih katongo tono hikhiku, kare kula pare, “Ae maene ri uangoul baka polukeig mo uelhire? Inggoum kung nihing longoro puk tono uelhire uasaono tang God! <sup>66</sup>“Hape rung namana peoum?”

Kara kula tapokisisit pare, “Inggono deha tamata uasa, ra uiliatung pous kompein e mat.”

<sup>67</sup>“Song ka loulousina tar porenon, kara uiliatungin, doho gisimehe ka posposara tatanono. <sup>68</sup>Kara kula pare, “Kristo! Ingga ter tamata ke uaanasain God, gon, ualafir tamiueim tenas niualasirar propet, maiene ke halhaluh totomua!”

### Pita ke uolih pare, e tele tang Iesu

<sup>69</sup>Doh Pita e tabila manasampe i koborohia tar buturung uanguoul, doha tang siokor kuaha na tang kalekinaler patere uleik ke lame tatanon,

---

“ <sup>26.61</sup> Jon 2.19-21    √ <sup>26.63</sup> Ais 53.7; Mat 27.12    \* <sup>26.64</sup> Ker 110.1; Dan 7.13; Mat 24.30  
 × <sup>26.65</sup> Mat 9.3; Jon 10.33    √ <sup>26.66</sup> NKP 24.16; Jon 19.7    \* <sup>26.67</sup> Ais 50.6; 53.5

kare me kula pare, “Ingga deh tena uelueldokout pono Iesu ger peng Nasaret.”

<sup>70</sup>Doh Pita ke uolih, kare kula pare, “Inggo u tele tunungua, a hauoneit ro kulkulaia.”

<sup>71</sup>Kare tauetela toro pirikinar buturung uangangoul, kare banga polukur tang giameher kuah a tang kalekinale pon, kare hire tasir tamatasis ra uangoul tar buturuono pare, “A tamata dehene teke uelueldokout pono tang Iesu ger peng Nasaret.”

<sup>72</sup>Doh Pita ke uolih poluk. Kare kula pare, “Inggo u uamana tun tamiuoum, u tele tunumpe tar tamaton!”

<sup>73</sup>I muduhia sikor, o tamatasis ra tur tar buturuono ka lame tang Pita, kara me kula pare. “O mana deh roon, ingga deh ter tang sioko pono tasisin. Inggeim mi longor paroko to tenang nimene ingga.”

<sup>74</sup>Doh Pita ke kula uapopokoho tasisina pare, “Inggo u uamana tun i rana tamiuoum, u tele tar tamatonene rung kulkulaioum.” Gitie ke kula peon, kare kororongua komper paol. <sup>75</sup>“Song ke namana huara tapokis Pita tena puhung kula Iesu geke kulain tatanon pare, “Tar binaka halanar paolo te koror, ingga o turung hire uatouono pare, o tele totoguo.” Doh Pita ke tauetela i kalahara kare kirkiring ualeikintiehe tunungua.

**27** <sup>1</sup>Naliliuolik tun, o patere uleik uakapa tun doh nosio mamahoholikir Ju ka uelkodoho me puh hape mara uiliatung pous tang Iesu. <sup>2</sup>Ka uihisina tatanono tar tiein, kara keip tatanono tang Pailat ger gavana.

### Judas ke tung pous katongoin

<sup>3</sup>Tar binaka ke banga Judas geke tangana tang Iesu ka touahua pein Iesu tar uelhehek, doh ra turung uiliatung pousin, kare uapalihingua tena ninaman, kare la heir tapokis tar touonor hangaulur mani silva tasir patere uleik mes nosio mamahoholikir Ju. <sup>4</sup>Kare la kula pare, “Inggo deh ku guata uasa ku tangana pe tar tamata giane tamiuoum, inggono deh ahik mena niguata uasa marung uiliatung pousoum tatanon.” Kara kulasina pare, “Ahik paha ineteng tamiueim, a ineteng totomua!”

<sup>5</sup><sup>b</sup>Doh Judas ke baka uahiu i koto tar umang lotu ger dedeil tar mani, kare la, ke la lolo katongoin.

<sup>6</sup>Doho patere uleik ka ur tar mani, kara kula pare, “A manionene, a bulauanar uatadingina ro deuating. Inggeig ahik pahi banotong uamoko tokaha keip tar mani nar umang lotu ger dedeil.” <sup>7</sup>I muduhia ka ueluatata tokaha baka pesin hape ra guata keip pe tar mani, kara bulauanguain noso mahar kotor tamatang tuha tar nouh. Ka bulauain ro mahar koto roono pare, tere toko noso keuir tamatang gime uan. <sup>8</sup>Temaene ra kila harahainir butur kotono pare, O mahar kotong deuating.

<sup>a</sup> 26.75 Mat 26.34    <sup>b</sup> 27.5 Mat 26.14-15; Apo 1.18-19

<sup>9</sup>Doha puhung uelhire geke kulamein propet Jeremaia sioun ke kotpokoso tun pare, o man.

“Gisina ka kale tar touonor hangaulur manionene  
ge teka ueluauia peinir tamatang Israelono pare, ter bulauanon.  
<sup>10</sup> Ka bulaua keipinguampein tono mahar kotor tamatang tuha tar nouh  
misiana ke kula per Tamata Noman totoguo.”

*Jeremaia 32.6; Sakaraia 11.12-13*

### Iesu ka keipin tang Pailat

<sup>11</sup>Doh Iesu e tur manasampe i uoumuhia tar matanar Pailat ger gavana. Kare dangata Pailat tatanono pare, “Ingga tenas toiar Ju?”  
Kare hire tapokis Iesu pare, “Aa, git ro kula sira pea.”

<sup>12</sup> Doho patere uleik mesnosio mamahoholikir Ju ka siokor tohotola tang Iesu tar bureher inet, bo Iesu puk ahik pah ke mene hahaua me puh.

<sup>13</sup> Doh Pailat ke dangata poluk pare, “Ahika paho longoro tar mamang inetelikinine ra siokor tohtohotolaig totomua?”

<sup>14</sup> Bo Iesu puk ahik me sikir mene tatanon, temaene Pailat ke lutarantiehe tun.

### Pailat ke kula tang Iesu ra uakusein tar korose

<sup>15</sup> Doh tar mamang nieinilik gera kilain, Leke Liu ro Mat, Pailat e uoto luaka liu tar tang siokor tamatasitie ra uangoul tar umang uih, ngohina re uoto guatang sioun pe, bo e uatauete pukuono tang hingiar tamata teres malahirir Ju. <sup>16</sup> Doh tar binakon a tang siokor tamat a hangana tang Barabas ra ueliatein pare, a tamata uasa, e uangoul pono tar binakono tar karabus. <sup>17</sup> Temaene tar binaka ka uelpokoso manasar tamat, kare dangata Pailat tasisina pare, “Hingiar tamata rung malahirisium u uataueto, Barabas ue Iesu gera kilain Kristo?” <sup>18</sup> <sup>d</sup> Inggon ke kula sira pare, teene inggon e atensioun pare, o tamata uleiking tasir Ju ka heir tang Iesu tatanon, teene gisina ka gehe tatanon.

<sup>19</sup> Doh tar binaka re tabil haraha Pailat toro tabtabilang uelkodoh, na kuahono ke heirime toro uelhire tatanono pare, “Ingga ahik paho guata me inete tar tamatener kodkodoh. Teene naboung ku bango tatanono toro siokoro borborian, doh ku hagouo tun tar niduh.”

<sup>20</sup> Doho patere uleik mesir mamahoholik ka uatentur tar balasir manai tar dangata tang Pailat mare luaka liuono tang Barabas, kara uiliatung pousin Iesu. <sup>21</sup> Doh Pailat ke dangata tasir manai pare, “Maiar tamata tasrasine rung malarasium u uataueteio?” Kara kula tapokisisina pare, “Barabas!”

---

<sup>c</sup> 27.12 Ais 53.7    <sup>d</sup> 27.18 Jon 11.47-48; 12.19

<sup>22</sup>Doh Pailat ke dangata pare tasisin. “Bo a haua ru guataio tang Iesu gera kilain Kristo?” Kara siokor kula ualeik tarosin pare, “Tina uakusa tatanono tar korose!”

<sup>23</sup>Bo Pailat puk ke dangata pare, “Ae a hauar inete uasa ke guataion?” Kara kula ualeikintiehe tununguasina pare, “Tina uakusa tatanono tar korose!”

<sup>24</sup><sup>e</sup>Tar binaka ke banga Pailat pare, ahik baka poluk me puh re la kodkodohola, doha uiliatung e marang tentur, kare kale tar kodom, kare uabusa uamakaha tar limana tar matasir manai, kare kula pare, “O deuatinginar tamatener kodkodoh ahik paha ineteng totoguo a ineteng tamiouumumpe.”

<sup>25</sup><sup>f</sup>Doho manai tamata ka siokor kula tapokis pare, “Uamaluana toro deuatinginon o pono tamiueim, doho bung tumiu tering turung huata me niduh tonon maton!”

<sup>26</sup>Song ke uatauetela Pailat tang Barabas tasisina, doh tar binaka ka kalkalopis uaelmahing baka pein Iesu, kare heirono tatanono tasir soldia mara la tinesina tatanono tar korose.

### O soldia ka uauanete tang Iesu

<sup>27</sup>Song ka kale no soldia Pailat tang Iesu, kara keip tatanono tena uma uleikir gavana, kara me siokor tur uiloho no soldia uakapa tunon. <sup>28</sup><sup>g</sup>Doh gisina ka kale liu tena hikhikuon, kara ualoho tatanono toro gomono kubkubar. <sup>29</sup>Song ka tuhasina toro taku, ka tuha keipin toro uoho ueluelhung, kara uamokoin toro luna Iesu, kara uamokoin tar puhung douk tar pang mua, song ka hatup uahiua tatanon, kara uauanete pare, “A liuo tun, nas toiar Ju!” <sup>30</sup><sup>h</sup>Kara loulou uapono tatanon, song ka kale tar puhung douk geka uamokoin tar pang mua, kara halhaluh keipin toro lunon. <sup>31</sup>Tar binaka ka uauanete uakapasina tatanon, kara kale liu toro gomon, kara uahiku tapokisig na hikhiku, song ka keip tauete manasampein mara la tine uakusein tar korose.

### Iesu ka tine uakusein tar korose

<sup>32</sup>Doh gitie ka tauete liu pemesina tar uan, kara ueltupara kout tar matat, a hangana tang Saimon ger peng Sairini. Doho soldia ka kula tutupe tatanono tar huata tena korose Iesu. <sup>33</sup>Doh tar binaka ka me la matoto manasasin tar butur ra kilain i Golgota, a tengkanar hanganar buturuono ra kilain, na butur ro lakok. <sup>34</sup><sup>i</sup>Teka heir tosina tang Iesu tar bino ueltek a nihouara tar marasin a uelbarang ra kilain a mur, bo tar binaka puk ke inum taginon, kare de mate inum.

<sup>e</sup> 27.24 Ual 21.6-9    <sup>f</sup> 27.25 Apo 5.28    <sup>g</sup> 27.28 Luk 23.11    <sup>h</sup> 27.30 Ais 50.6

<sup>i</sup> 27.34 Ker 69.21

<sup>35</sup>J muduhia ka tine baka pesina tatanono tar korose, kara uelpakahangua tena hikhikuono tar ueluelpeikie mara ate pare hingia ro gomono ro la tang mai. <sup>36</sup>Song ka tabila uahiuasina tar buturuon, kara uelkaueke pukumpe tatanon. <sup>37</sup>Dohi ranahia toro lunono, ka bolosina tar puhung uelhireng uaate pare, “Gine te Iesu nas Toiar Ju.” <sup>38</sup><sup>k</sup>Doha toking ueuenaua ka tine ponois tar korose i uahuhut tang Iesu, a tang sioko ke kusehia tena korose tar pang mua, doha tang giamehe ke kusehia tena korose tar pang kais.

<sup>39</sup><sup>l</sup>Doho tamatisie ra la siausiauala tatanono ra heir tenas meneng uelsigala tatanon, kara bilbile tar lus. <sup>40</sup><sup>m</sup>Kara kula pare, “Ingga ter tamatang mamantouo tar umang lotu ger dedeil, karo tuha tapokis poluk tar touono pukur marein.” “Ge para tuna Goda, o uelkarus katongoia, karo hio liu tar korose!” <sup>41</sup>Doho patere uleik mesir tamatang ualualasira tar ualatut, doho mamahoholik a siokono puk ponomper hagar ka guatain, kara uauanete pare, <sup>42</sup>“Inggono ke uelkarus tasir gisiamer tamat, bo ahik pukuono pahe banot e uelkarus katongoin. Ahikono pah nas toiar Israel? Gete hio liu turono gine daana tar korose, song ri tagorong maneig tatanon!” <sup>43</sup><sup>n</sup>Inggon e tagorong mana tang God, kare kula pare inggono ter tuna God. Auia, doh gete malara God tatanon, pake poul tatanono gine daan.”

<sup>44</sup>Doha toking ueuenaua geka tine taguis tang Iesu, kura uelsigala sira pono tatanon.

### Iesu ke mat

<sup>45</sup>Doh nar marein uleik, nar 12 kilok, a kitup ke kokopo uakapa tar pang uan uakapa tun, ke la tuka namoloi nar 3 kilok. <sup>46</sup><sup>o</sup>Doh nar moloila, Iesu ke kula ualeik pare, “Iloi, Iloi, lama sabaktani!” A tengkana puhung uelhireonene, e kula pare, “Nag God, nag God, ae maene ko hiliua totoguo?”

<sup>47</sup>Doho gisiamer tamatisie i hutuna ka longor, kara kula pare, “Inggono dehe kila tang Elaija!” <sup>48</sup><sup>p</sup>Doha tang siokor tamata ke ualola, kare kale toro mahar pous, kare uahu tar bino ueltek, kare uamoko tola tar puhung douk, kare hue kai taro tang Iesu mare inum. <sup>49</sup>Bo o gisiamer pukur tamata ka kula pare, “Halan! Ti banga bak, ge pare me poul Elaija tatanon.”

<sup>50</sup>Doh Iesu ke kaling ualeik poluk, kare mat.

<sup>51</sup><sup>q</sup>Doho mahar gomono gero kus i uoumuhia toro olta tar umang lotu ger dedeil ko takih pang torik tur i rana ko me tuk i kot. Doha koto ke

---

<sup>j</sup> 27.35 Ker 22.18   <sup>k</sup> 27.38 Ais 53.12   <sup>l</sup> 27.39 Ker 22.7; 109.25   <sup>m</sup> 27.40 Mat 26.61; Jon 2.19   <sup>n</sup> 27.43 Ker 22.8   <sup>o</sup> 27.46 Ker 22.1   <sup>p</sup> 27.48 Ker 69.21   <sup>q</sup> 27.51 KT 26.31-33; Hib 10.19-20

gun, doha mahar palaua ke tapolaka uelpakah. <sup>52</sup>Doho keu ko takapuk, doho bureher tamatar nang God geka mate sioun ka uatua tapokisis, <sup>53</sup>dohi muduhia ke tentur tapokis pe Iesu toro mat, kara hiliuinguasina tar keu, kara langua i Jerusalem tar butur ka banga tor bureheisir tamata tasisin.

<sup>54</sup>Doh tar binaka ke banga nas tang uoum keipir soldia, doho soldiasisie gisina ka kaukaueke tang Iesu, doh tar giniamer mamang inetelikinitie ke kotpokos, kara sokor, kara kula pare, “Inggono deha Tuna nomanampe God!”

<sup>55</sup>‘Doho burehe kuaha pono, geka kekete turume tang Iesu i Galili, kara poul tatanon, ka banga tur ponompe i reh. <sup>56</sup>Tasir kuahasinasine, a tang sioko hangana tang Maria Makdala, kare Maria gera tinas Jems me Josep, doha ra tinasar toking tuna Sebedi Jems me Jon.

### Iesu ka keuin

<sup>57</sup>Gitie ke molo manasa peon, kare me pokosor tang siokor tang mani a peng Arimatea hangana tang Josep, inggon a tang sioko pono tosono tamatang uakuakeluk Iesu. <sup>58</sup>‘Inggono ke la banga tang Pailat, kare la dangata, ge pare banot e kale tar tukununa Iesu. Doh Pailat ke kula tasir soldia tar heir tar tukununon. <sup>59</sup>Song ke kale Josep tatanono, kare gomo toro mahar gomono gaugauil o timuh, <sup>60</sup>‘kare la uamokola tar tukununa Iesu tar timuhur keu a nanampeon, a nikoho tola toro lebang, song ke tula uatagegelela Josep toro palaua uleik toro matana ro lebanga, kare la. <sup>61</sup>Doh Maria Makdala, doha tang giamehemper Maria ura tabila uahuhut tar keu, kaura bangbanga tar keu.

### O soldia ra kaukaueke tar keu

<sup>62</sup>Doh tar uagiamehenar marein ter Mareining Pepe Uah, noso mamahoholikir patere mesir Parisi ka uiliodout, kara la banga tang Pailat, <sup>63</sup>‘kara la kula pare, “Ir Tamata Uleik, inggeim mi namana dede tar binaka re tua harahar bohoboho giala, inggono ke kula baka pare, ‘Tar touonor marein, inggo u turung tua tapokis.’ <sup>64</sup>Temaene ingga pako heir me puhung kula uapopokoh mara kaueke uaiainir keu e tuka tar uatouononor marein mara hik no tamatang uakuakelukono pah ra banotong la uenaua tar tukununon, kara hire tasir tamata pare, inggono ka uatua tapokisin toro mat. Doho uadouhina ro boho roono rone tero turung santiehe tang gero uakikilangan.”

<sup>65</sup>Doh Pailat ke kula pare tasisin, “Kale mo soldia, karung hire tasisina ra kaueke uaia keip tar keu me hagar uaia tun rung ateioum.”

---

<sup>†</sup> 27.55 Luk 8.2-3    <sup>\*</sup> 27.58 Ual 21.22-23    <sup>†</sup> 27.60 Ais 53.9    <sup>‡</sup> 27.63 Mat 12.40; 16.21; Mak 9.31; 10.33-34; Luk 9.22; 18.31-33; Jon 2.19-21



<sup>66</sup>Song ka lasina tar keu, kara bulut tola toro mahar palaua mara hik me tamata re banotong tula liu, song ka kauেকে uangoulur soldia.

### Iesu ke tua tapokis

**28** <sup>1</sup>I muduhia tar Mareining Pepe Uah, gitie re kih manasa pehainir giameher marein tar uakikilanganar marein tar uik, Maria Makdala mer tang giamehemper Maria kura la banga tar keu. <sup>2</sup>Doha tukung nun ke kotpokoso ualutara, doh na anggelou God ke la turuha i Heuene, kare me tula uatagegele liu toro palau, kare tabila uapono tang roon. <sup>3</sup>Inggono ke bala sira tar kanau, doh na hikhikuon a gaugauilintiehe tun. <sup>4</sup>Doho soldia ka sokorontieh, kara poroporontiehe tun, kara punga uahiu i kot, ka baka sirangua tasir tamatasisie ka mate manas.

<sup>5</sup>Bo a anggelou puk ke kula pare tar toking kuah, “Ahik pah mura sokor. Inngo u ate, raoum mura sir teil tang Iesu geka tinein tar korose. <sup>6</sup>”Inggono taboinane. Inggono ka uatua manasain misiana ke kula baka pe. Mura lame, kaura me banga tar butur ke rikinon. <sup>7</sup>Raoum mura la uateuelengua, kaura la hire tosno tamatang uakuakelukono pare, ‘Inggono ka uatua tapokis manasain toro mat, doh inggono ke la manasa uoum i Galili ter buturuono rung la banga tooum tatanon.’ Auia, inggo ku hire manasa tamiraoum.”

<sup>8</sup>Kaura hiliu uateuelengua kompe rasina tar keu menia keip tar nisokor, kara niuaha uleik, kaura ualualo tar la hire tosno tamatang uakuakelukon.

<sup>9</sup>Doh Iesu ke ueltupara tola tasrasina tar lel, kare kula pare, “Aliuo tun!” Kaura la uahuhutuha rasina, kaura buaka tar kekenon, kaura lotu tatanon. <sup>10</sup>”Song ke kula Iesu pare tasrasin, “Ahik pah mura sokor. Mura la hire toso bung tahiguo ra la i Galili ter buturuono ra la banga tosina totoguo.”

### O soldia ka hire tar haua ke kotpokos

<sup>11</sup>Gitie ura la haraha pelar toking kuah, o gisiameher soldiasitie, ka kaukaueke tar keu, ka la tapokis tar uan uleik, kara la hire tosno mamahoholikir patere tar mamang inetelik ke kotpokos. <sup>12</sup>Doho patere uleik ka la tabila tokaha mesir mamahoholik, kara la uelhote, kara heir tar uleikir mani tasir soldia. <sup>13</sup>Kara kula pare, “Inggoum mung turung kula pare, no tamatang uakuakelukono ka lame naboung, kara me uenaua tar tukununono tar binaka rung hohououm. <sup>14</sup>Doh gete longoror gavana tar puhene, mi turung uakodkodoho keip uoumeim tatanono mara hikoum pahe kusesioum me puh.” <sup>15</sup>Song ka kaler soldia tar mani,

† 28.6 Mat 12.40; 16.21    † 28.10 Mat 26.32

kara guata sira manasampe misiana ka kula peis. Doho ueluatata rone ko la uiloho tasir tamatang Ju e tukampeene daan.

**Iesu ke kotpokoso tosno tamatang uakuakeluk**

<sup>16</sup>xDoh gisisir siokor hangaul, doha tang siokor tamatang uakuakeluk ka la manasampe tar siusaneit, ke kula uamatotoin Iesu tasisina ra lain i Galili. <sup>17</sup>Doh tar binaka ka bangasina tatanon, kara lotu tatanon, bo o gisiamehe puk tasisina res torikir ninaman ge pare, Iesu nomanon. <sup>18</sup>yDoh Iesu ke la uahuhutume tasisin, kare kula pare, “God ke heir totoguo tar hanga uleik, doha nitampopokoho uleik tar kaukeke tar mamang inetelik i Heuene dohi kot. <sup>19</sup>zTemaene pakung laoum toro mamang uanilik, karung la guata tasir tamata nogo tamatang uakuakeluko. Karung uahuhu tasisina tar hangana Tamanon, doha Tunon, doha labena Dedeil. <sup>20</sup>Karung ualasira tasisina tar uakeluk tar mamang inetelik ku ualatohogio tamiuoum. Doh inggo u turung uangoul tagu tamiuoum tar mamang binakalik e tuka tar binaka re kapar kot.”

---

x **28.16** Mat 26.32    y **28.18** Jon 13.3; Epe 1.20-22    z **28.19** Mak 16.15-16; Apo 1.8

# Mak

## O Uelhire Uaia ke boloin Mak

### O bolobolo tang Mak

O uakikilanana ro Uelhire teno bolobolo Mak o kulo pare, “Rone teno Uelhire Uaia Iesu Kristo a tuna God.” Dohi lolono toro bolobolo roon, Iesu ke me tamat a tampopokoho tun, kara tohangana tar guata tar bureher kalekinale.

Inggeig i banga tena nitampopokohon, kare no tang iateono tar binaka re mene ualasira tasir tamat, doh tar binaka re geil liuono tasir liouana uasa, kare tar binaka re kuse luara liuono teres niguata uasar tamat. Iesu e kula katongoin pare, ke laha tar me heir katongo tar tukunun tar bulaua tapokis tasir bureher tamat (Mak 10.45).

Mak e ualuatata uaburehe tena kalekinale Iesu, bo ahik puk pahe ueluatata uaburehe tar menemene ke meneig Iesu ke ualualasira pe tasir tamat: Tar uakikilangan Mak e ueluatata tang Jon ger tang uahuhu, kare Iesu ka uahuhu pein, kare la uedangangua Satan tatanon.

Gine ke bolo toro bolobolo rone, ke ualasira pono tena kelekinale Iesu re mene ualasira pe, kare uauia tasir momouh. Ke la pelar binak, no tamatang uakuakeluk Iesu ka kale niate tur manasa pono tatanon.

Inggeig i banga pono pare, o gisiomeher tamata ka uelmatanangua tang Iesu, kara heiringua tar bureher niduh tatanon. Toro mahar uadohina ro Uelhire Uaia, Mak e ueluatata tang Iesu ke mata pe, kare tua tapokis.

---

**1** <sup>1</sup>Rone o uakekenena ro Uelhire Uaia tang Iesu Kristo ger Tuna God.

### Tar kaleuatoro tar lel

<sup>2</sup>O Uelhire Uaia roono ko pokoso pare, Aisaia ger propet ke me bolo sioun, God ke kula pare,

“Inggo u turung ualatueha tenag ualualatue i uoumuhia totomua  
mare turung kaleuatorono tenang lela.” *Malakai 3.1*

<sup>3</sup>“A uauanar tang siokor tamat e kula ualeik tur tar butur padene pare,

---

<sup>a</sup> 1.3 Ais 40.3

‘Kaleuatoro tena leler Tamata Noman,  
doh tuha uakodkodoho tena lele inggon!’ ”

*Aisaia 40.3*

### **Jon ger Tamatang Uahuhu**

<sup>4b</sup>Inggono Jon ger tamatang uahuhu ke kotpokos, kare uahuhu to tasir tamata tar butur paden, kare mene tauete tar uahuhung uapalih mara kaleliuigir niguata uasa. <sup>5</sup>Doho Ju mesir tamatang Jerusalem, o burehentiehe tasisina ka la tang Jon, kara la hire tauete teres niguata uasa. Kare uahuhu tongua Jon tasisina tar kodom i Jordan. <sup>6c</sup>Doh Jon e uoto hiku tar hikhiku a nituha keip tar ulunar kamel. Doh inggon e uoto beil tar kapokonor bulamakau, dohe uoto ein tasir kakaring menia tar hani a peng lolon. <sup>7d</sup>Inggono ke mene tauete toro uelhire pare, A tang siokor tamat e lame i muduhia totoguo. Na nitampopokohon e i rana uain liu tereg nitampopokoho. Inngo ahik paha tamata uaia maru banot u hatup uahiu, karu luaka tar bungbunguna na suon. <sup>8</sup>Doh inggo u uahuhu tamiuoum tar laur, bo inggon e turung uahuhu keip tamiuoum tar Iabena Dedeil.

### **Jon e uahuhu tang Iesu**

<sup>9</sup>Tar binakanin Iesu ke hiliu manasa i Nasaret gere moko tar pang uan i Galili, inggono ke laha tang Jon, kara me uahuhu toin i Jordan. <sup>10</sup>Gine re boun uahung liu tur peha Iesu tar kodom, kare bangangua i Heuene ke takapuke pe, doha Iabena Dedeil ke la uahiuaha tatanono ngohina tar baluh. <sup>11e</sup>Doh a uauanar tamat ke mene turuha i Heuene pare, “Innga ter Tuguo! Geru malarantiehein, karu uahantiehe tun pono totomua.”

### **Iesu ke la tar butur paden**

<sup>12</sup>Doh ahik me manasan a Iaben a Dedeil ke ueliuila tang Iesu e la i lolono tar butur paden. <sup>13f</sup>Doh Iesu ke uangoul tar buturuono ke matoto tar toueitir hangaulur marein. Doh Satan ke ueduedanga tatanon. Inggono ke uangoul tagu tasir inete roke, doh no anggelou God ka poul ponompe tatanon.

### **Iesu ke uakekene tena kalekinale**

<sup>14g</sup>I muduhia ka uamoko baka pein Jon tar karabus, Iesu ke la i Galili, kare mene tauete tono Uelhire Uaia God. <sup>15h</sup>Inggono ke uelhire pare, “A binaka ke uamakoin God sioun ke kotpokoso manas, doh na Nitoia God ke uahuhut manasain. Inggoumu uapalihisioum, karung tagorong mana pono toro Uelhire Uaia.”

---

<sup>b</sup> 1.4 Apo 13.24; 19.4    <sup>c</sup> 1.6 2To 1.8; Mat 11.8    <sup>d</sup> 1.7 Apo 13.25    <sup>e</sup> 1.11 Ker 2.7; Ais 42.1; Mat 12.18; Mak 9.7    <sup>f</sup> 1.13 Ker 91.11-13    <sup>g</sup> 1.14 Mak 6.17    <sup>h</sup> 1.15 Mat 3.2

### Iesu ke kila toсно tamatang uakuakeluk

<sup>16</sup>Gine re la pela Iesu tar tektekenar kodomo uiluiloh i Galili, kare bang huarangua tas Saimon me Anduru, rasina ramamahialik ura uoto uekih keip pukumpe tasir ian tar uben. Rasin a toking tamatang uekih. <sup>17</sup>“Doh Iesu ke kula tasrasina pare, Raoum mura uakeluku me totoگو maru ualasira tamiraoum tar uekih tasir tamat.” <sup>18</sup>Ahik me manasan, kaura hiliu rasina tenasira uben, kaura uakelukungua tatanon.

<sup>19</sup>Iesu ke la uain sikorola tar sikin, kare bangangua tang Jems me nu Jon, rasina ramamahialik pon, a toking tuna Sebedi. Rasin ura uangoulumpe tenasira bout, ura uma uaia tapokis tenasira uben. <sup>20</sup>Doh Iesu ahik mate uauana bak, ke kila puk manasampe tasrasin. Doh rasina kura hiliuinguampe tara tamas, e uangoul tagu tasir tamatang kalekinaleane tar bout, kaura la uakeluk tang Iesu.

### Iesu ke geil liu tar liouan

<sup>21</sup>Iesu mesir gisiamer tamata ka lala tar uan uelik i Kaperneam. Doh tar binaka ke pokosor Mareining Pepe Uah,<sup>i</sup> Iesu ke haiala iuma tenas umang lotur Ju, kare la mene tauete toro Uelhire Uaia tasir tamat. <sup>22</sup><sup>j</sup>Doh gine ka longoro pesina tena uelhireon, gisina ka lutara uasa tun, teene inggon ahik pahe ualasira sira tasir tamatang ualualasira tar ualatut,<sup>k</sup> bo inggon e ualasira tasir tamata misiana tar tamata ger tohangan.

<sup>23</sup>Doh gane iuma tar umang lotu e uangoulur tang siokor tamata ke hikuinir liouana uasa, inggono ke kula ualeikintiehe tun pare, <sup>24</sup><sup>l</sup>“Iesu ger peng Nasaret! Innga o lang hau? O lang mamantoua tamiueim? Inngo u ate totomua, innga ter tang siokor tamata dedeil a nang God!” <sup>25</sup>Doh Iesu ke uelkukur tatanonor liouan, kare kula pare, “Luar! Ahik paho men, doho hiliu ualahur tatanon!”

<sup>26</sup><sup>m</sup>Maeit a liouana uasa ke uaporoporo tar tamaton, kare kula ualeikintieh, kare tauete liuingua. <sup>27</sup>Gisisir tamata ka siokor lutarantiehe tun, kara ueldangateis pare, “Tieh! A hauene? A niualasira hauonene? A niualasirene ke giamehe siok, inggono ke ualasira ngohina tasisitir tohangan, kare ualatoho pono tasir liouana doho liouana ka longoro tatanon!”

<sup>28</sup><sup>n</sup>Doho ueluatata tang Iesu ko ualo uateuele toro mamang buturulikane tar pang uan i Galili.

### Iesu ke uauia tena uarih Saimon ger kuah

<sup>29</sup>I muduhia Iesu mesir gisiamer tamata ka tauete tur manasa tar umang lotu. Doh ahik me manasan, kare laono tenasira uma Saimon me

<sup>i</sup> 1.21 Nas Mareining Pepe Uahar Ju ter Sarere. <sup>j</sup> 1.22 Mat 7.28-29 <sup>k</sup> 1.22 O tamatang ualualasira tar ualatut ra uoto ualasira tenas niguatar Ju, doh tono ualatoho Moses.

<sup>l</sup> 1.24 Mak 5.7 <sup>m</sup> 1.26 Mak 9.26 <sup>n</sup> 1.28 Mat 4.24

Andru. Doh Jems me Jon kura la tagu pon. <sup>30</sup>Na uarih Saimon e rikin iuma toro uat, e momouh. Doh gisina ka hire ualahur tun tang Iesu pare, “Inggon e momouh.” <sup>31</sup>Maeit Iesu ke lala i tektekena tono uaton, kare kusa uatabila tatanon, doh ahik me manasan, kare arianon. Doh inggonor kuahene teke la tuhangua teres nieininis.

### Iesu ke uauia toro momouh tasir bureher tamat

<sup>32</sup>Nar moloi, gine re hu pekor pisar, o tamatasitir momouh doho nihikung liouana ka keipimeis tang Iesu. <sup>33</sup>Doho manai tamatang toro mamang buturulik i Kapenaum ka la totoane i kalahara toro matana ro pirik mara bang. <sup>34</sup><sup>o</sup>Maeit Iesu ke uauia tasir bureher tamatasis res mamang mat, kare geil liu pono tasir bureher liouana uasa. Gisinar liouana ra ate tatanon, temaeit Iesu ke kula tane tasisin, ahik pah ra men.

### Iesu ke la i Galili

<sup>35</sup><sup>p</sup>Tar uagiomehenar marein, Iesu ke gulete naliliuolik, kare la tar butur amengana mare la lotu tang God. <sup>36</sup>Dohi muduhia Saimon meso uanotono ka la sir uakeluk tatanon. <sup>37</sup>Tar binaka ka la tupara manasasina tatanon, gisina ka la hire pare, “O bureher tamat ra sir totomua.”

<sup>38</sup>Kare kula tapokis Iesu tasisina pare, “Inggeig i la pono toro giniameme ro uan gere uahutunane, maru mene tauete pono toro Uelhire Uaia tasisin. Temaene peono ku lameo.” <sup>39</sup><sup>o</sup>Doh Iesu ke la toro mamang buturulik i Galili, kare mene tauete to toro Uelhire Uaia tasir tamata tonoso umang lotu, kare geil liu tur pono tasir liouana uasa tasir tamat.

### Iesu ke uauia tar tamat a toba

<sup>40</sup>Doha tang siokor tamat a toba ke lame tang Iesu, kare me hatup uahiuangua, kare dangata uapopokoho tatanono pare, “Geto malahiria, ingga o uadelauana totoguo.”

<sup>41</sup>Doh Iesu ke ueldolomontiehe tatanon, kare tuha tatanon, kare kula pare, “Inggo u malar. Ingga o uia.” <sup>42</sup>Gine kompe daan o mata ko hiliu tatanon, kare uia. <sup>43</sup>Doh Iesu ke uelueluata ualahurungua tatanon, kare uatagin uapopokoho pare, <sup>44</sup><sup>r</sup>“Ahik paho hire me siokor tamata tar inete ke pokoso totomua. Bo o la uamakaha puk tar tukunum tang pater, song ro la guata tar uahung tar uakeluk tena ualatut Moses tar uabang manate tasisina pare, ingga ko delauana manas.”

<sup>45</sup>Bo inggono pukur tamatene ke ueluatata ueltebeir toro mamang buturulik tar inete ke kotpokoso tatanon. Te maene Iesu ahik pahe matot e la leka toro uan. Bo e uangoul pukungua toro buturunitir tabotan. Bo o tamatang toro mamang buturulik puk ra la dedempe me tatanon.

<sup>o</sup> 1.34 Mak 3.10-12    <sup>p</sup> 1.35 Mat 14.23; Mak 6.46    <sup>q</sup> 1.39 Mat 4.23; 9.35

<sup>r</sup> 1.44 NKP 14.1-32

### Iesu ke uauia tar tang siokor tamat a mater tukunun

**2** <sup>1</sup>Ke karuh baka per giniamer marein, Iesu ke la tapokis tar uan i Kapenaum. Doho tamata ka longoro pare, inggono ke la polukula tenas uanisin. <sup>2</sup>Maeit o bureher tamata ka me uelpokoso tar umeit re uangoulin Iesu. Doha uma ke uoununtieh, kara hik pono me hagarane i kalahara toro pirik, doh gane iuma tar um Iesu ke mene uakalahara tono uelhire God tasir tamat.

<sup>3</sup>Doho tantoueitir tamata ka pokoso ra huata teil tar tamat a ininteil, e rikin teil tono rikin. <sup>4</sup>Gisin ahik pah ka banoto ra lihilaane tasir tamat tar keipila tar tamata ininteil tang Iesu. Gine ahik pesina pah ka banoto tar keipila tatanon, gisina ka moto kai keip tatanono tar kuku, kara la robongo tar kuku. Doh tar binaka ka robongo pesina tar kuku, gisina song ka uahiuo keipiko tar momouh tono uatane i uoum tang Iesu. <sup>5</sup>Gine ke banga pe Iesu teres nitagorong manasin, inggono ke kula pare tar tamateitir ininteil, “Ir Tug, reng niguata uasa ingga, ka kale liu manasaig.”

<sup>6</sup>Doho gisiamer tamatang ualualasira tar ualatutung tar lotu gera tabila pon, ka uelkula katongois pare, <sup>7</sup>“Ae tun maene re guaton, kare mene sira pare? Inggon e marang hahaua liu tang God? God te me pahena re banot e kale liu tar niguatar sa.”

<sup>8</sup>Bo Iesu ke ate manasa teres ninamanasin, kare kula pare, “Ae maene rung namnamana ueltebeirintiehoum? <sup>9</sup>Hingiar puhung uelhirer malagirintiehe tar kula tar tamatener mater toking keken? Ter kula pare, ‘A niguata uasar noumua ka kale liu manasaig.’ Ue getu kulo pare, ‘O tur, karo kale tonongo rikin, karo la.’ <sup>10</sup>Inggon u guata marung ateoum pare, A Tunar Tamat a tohanganane i kot tar kale liu tar niguata uasa.” Song ke kula pare tar tamateitir ininteil, <sup>11</sup>“Inggon u kula totomua pare, O tur, karo kale tonongo rikin, karo la tenang uan.”

<sup>12</sup>Doh tar binakene ka longorosin, gisina ka bangampe tatanonor ininteil ke tentur pe, kare kale tono rikin, kare la. A puhonene ke guatangua tasisina ka lutarantiehe tunungua, kara uatakaiantiehe tar hangana God, kara kula pare, “Inggeig ahik mati banga tun me puh sira tar inetene ke kotpokoso daan.”

### Iesu ke kila tang Libai

<sup>13</sup>Tar siokor binak Iesu ke la poluk i tehe tar kodomo uiuiloh i Galili. Doho manai tamata ka la polukume tatanon, kare mene ualasiono tasisin. <sup>14</sup>Gine ke uaehe pelaon, kare bangangua tang Livai ger tuna Alpius, e tabila tar buturung kale tar takis. Doh Iesu ke kula tatanono pare, “O tur, karo uakelukume totoguo.” Doh Livai ke tentur puk manas, kare uakelukungua tatanon.

<sup>15</sup>Gine re la tabilang ein pe Iesuane tena uma Livai, o bureher tamatang kale takis, doho bureher tamata uasa ka me ein tagu pono tatanono menia tasir tamatang uakuakelukur nanon. Doho bureher tamata ponosisis ra uoto la tagu pono tang Iesu tar mamang binakalik.

<sup>16</sup>“Doh tar binakon o gisiamer tamatang iate tar ualatur, gera kilais o Parisi<sup>t</sup> ka banga tang Iesu re ein tagu pe tasir tamata uasa, doho tamatang kale takis pon. Kara la dangatangua tasir tamatang uakuakelukur nanono pare, “Ae maene inggon e ein tagu tasir tamatang kale takis, doho tamata uasa?”

<sup>17</sup>Doh Iesu ke longoro tar ueluatatine, kare hire tapokis tasisina pare, O tamatar uia ahik pah ra la tar dokta, bo o tamatasine ra momouh tera la tar dokta. Temaene inggo ahik matu laha tar me kila tasir tamata uai, ku laha tar me kila tasir tamata uasa.

### Iesu ke ueluatata tar niguata tar binakang ueil

<sup>18</sup>A siokor binaka no tamatang uakuakeluk Jon, doho Parisi ka ueil. Temaene o gisiamer tamata ka me dangata tang Iesu pare, “Hapeono maene no tamatang uakuakeluk Jon, doho Parisi ra ueil, bosir tamatang uakuakelukur noumua ahik pah ra ueil tagu?”

<sup>19</sup>Doh Iesu ke hire tapokis tasisina pare, “Hape ra banoto per uanotonar buloutener le timuh ra ueil tar binaka re uangoul taguono tasisin? Gisin ahik pah ra banotong ueil tar binaka re ungoul tagu harahar le timuh tasisin. <sup>20</sup>Bo a binaka puk e turung lame, tar binaka ra me turung kale liuinir buloutener le timuh tasisin, doha mareiniono tera turung ueil tosin.”

<sup>21</sup>Ahik deh me tamata re banot e kaere tola mo mahar gomono timuh mo gomono pensiuun. Gete guatono pare, o mahar gomono timuh o turung uatakihintiehe toro gomono pensiuun. <sup>22</sup>Doh ahik pono me tamata re hedongola me bino timuh tar ineteng hedongor pensiuun. Gete guatono pare, a bino timuh e uatapuaka tar hedongong bino, doh inggon e turung uasuasangua tar bino mer hedongong bino. Ahik dehon! O tamata bo ra hedongola tar bino timuh tar ineteng hedongo ger timuh.

### Iesu ke ueluatata tar niguata tar Mareining Pepe Uah

<sup>23</sup>Tar siokor binaka nar Mareining Pepe Uah, Iesu ke lihila tar iom a nileber raes-uit. Doh gisisir tamatang uakuakelukur nanono ra la tagu teil pon, kara louslous teil pono tar kukuananar raes-uit, kara uelhaule keip tar limas, kara ein. <sup>24</sup>“Doho Parisi ka bang.a, kara dangata tang Iesu pare, Bang! Ae maene ra guatasina tar niguata ge ahik pahe uakeluk tar niguatang tar Mareining Pepe Uah?”

---

<sup>s</sup> 2.16 Mat 11.19    <sup>t</sup> 2.16 O Parisi ra uoto uakeluk kara ualasira tar bureher niualatur doho niualatoh a nang God    <sup>u</sup> 2.24 Ual 23.25



<sup>25</sup> Doh Iesu ke hire tapokis tasisina pare, “Inggoum halana haraha tung timana toro ueluatata tar haua ke guatain Devit sioun, tar binaka ke gogo pe inggono meso uanoton? <sup>26</sup> Tar binakon, Abiatar tere uleik tasir pater, Devit ke la lek iuma tar umang lotu ger nang God, kare la ein tar bereit ger niuadedeil. Ginin e matoto pukig tasir patere tera ein taninin. Bo Devit puk ke la ein, kare heir pono toso uanotona ka ein pon.”

<sup>27</sup> Kare hire poluk Iesu pare, “God ke heir tar Mareining Pepe Uah mare poul tasir tamat, ahik mate touo tasir tamata mara poul tar Mareining Pepe Uah. <sup>28</sup> Maeit a Tunar Tamat tere Tamata Nomana ponompe tar Mareining Pepe Uah.”

### Iesu ke uauia tar tamata kikimoror liman

**3** <sup>1</sup> Iesu ke leka tar umang lotu. Doha tang siokor tamata kikimoror liman e uangoul pon. <sup>2</sup> Doho Parisi ra uakeis uanono kompe tang Iesu mara turung tohotola tatanono gete uauiaono tar tamateitir kikimoror limana tar Mareining Pepe Uah. <sup>3</sup> Iesu ke hire tar tamatar kikimoror limanana pare, “Ingg a tur kaiane i uoum tasir tamat.”

<sup>4</sup> Song ke dangatono tasisitie pare, “A huar uia tar guata to tar Mareining Pepe Uah? Ter guata uia ue ter guata uasa, tar uelkarus tur tar tang giomehe toro mat ue tar uiliatung pous?” Bo gisina puk ahik tun pah ra mene hahau.

<sup>5</sup> Doh Iesu ke bangang nimaliana hahai tasisin, doh inggono ke ueldolomontiehe tasisin, teene gisina o mahang naman manate. Song ke kulono tar tamatener kikimoror limana pare, “O hue uamakmakoso tar limoum.” Kare hue makmakoson, kare la uaianguar liman. <sup>6</sup> Doho Parisi ka tauete liu ualahur puk manasane tar umang lotu, kara la uelhalata keip tosno tamata Herod tar sir me lel mara uiliatung pous tang Iesu.

### O manai ka uakeluk tang Iesu

<sup>7</sup> Iesu mesno tamatang uakuakeluk ka hiliu manas, kara la tar kodomo uiluiloh i Galili, doho manai tamata ka uakeluk pono tatanon. <sup>8</sup> Gisisir manai tamata ra la tur toro mamang buturulikane i Galili, dohi Judia, doh tar uan uleik i Jerusalem, dohi Idumia, doh tar painahia i Jodan menia toro uan gere moko uiloho tar toking uan i Tair me i Saidon. Gisina ka lame tang Iesu, teene ka longoro pesina tar inete ke guataion. <sup>9</sup> Temaeit o tamat o burehentiehe tun ka me tototo. Doh Iesu ke kula tosno tamatang uakuakeluk ra kaleuatoro me bout mare panetono geta kusukusuntiehlar tamata tatanon. <sup>10</sup> Teeit inggono ke uauia manasa tasir bureher tamat, doho tamatasitir momouh ra marang uaheheke uelhir dedempe mara me tuha tatanon.

▼ 2.25 1Sa 21.1-6    ✱ 2.26 NKP 24.5-9    ✕ 2.27 Ual 5.14    ▼ 3.4 Luk 14.3

▲ 3.6 Mat 22.15-16    ▲ 3.10 Mat 14.36

<sup>11</sup> <sup>b</sup>Doh hingiar binaka ra bangar tamatasisir nihikung liouana tatanon, gisina ra punga uahiuane i kot, kara kaling ualeik pare, “Ingga ter tuna God!”

<sup>12</sup> <sup>c</sup>Bo Iesu puk ke kula tane uapopokoho tun tasisinar liouana pare, ahik pah ra hire tauete maion.

### Iesu ke kedanga tar siokor hangaul doha tang torikir aposoul

<sup>13</sup>I muduhia Iesu ke la taro i rana tar siusan, kare kila uelhir tasir tamata ke malarais ra la tagu tatanon. Doh gisina ka lame tatanon. <sup>14</sup>Song ke kedangono tar siokor hangaul, doha tang torikir tamat,<sup>d</sup> kare kula tasisina pare, “Inggo ku kedanga tamiuoum marung uangoul taguoum totoguo. Doh inggo u uelkilo tamiuoum o aposoul maru ualatueo tamiuoum tar mene ualasira toro Uelhire Uaia, <sup>15</sup>doh inggoum mu turung tohangamiu pono tar geil liu tasir liouana uasa.” <sup>16</sup><sup>e</sup>Gisine tesir hangaul doha tang torikir aposoul geke kedangais Iesu;

Saimon geke uelkiloiono pare Pita.

<sup>17</sup><sup>f</sup>Doh Jems me Jon ger toking tuna Sebedi, bo Iesu puk ke kila tasrasina pare, Boanerges (inggon e kula pare, rasin a toking tunar pil).

<sup>18</sup> Doh inggono ke kedanga pono tang Andru me Pilip  
doh Bartolomiu,  
doh Matiu,  
doh Tomas,  
doh Jems ger tuna Alpius,  
doh Tadius,  
doh Saimon gera kilain pare, “a Selot,”<sup>g</sup>

<sup>19</sup> doh Judas Iskariot geke tangana tang Iesu tasir uelmatan.

### Iesu doh Belsebul<sup>h</sup>

<sup>20</sup>Song ke leka tapokisila Iesu ium, doho bureher tamata ka me tototo poluk tar umeit re uangouluion. Te maene Iesu mesno tamatang uakuakeluk ahikingua pah ka matoto ra ein. <sup>21</sup>Tar binak ka longoro ro tahinalikiono tar puhion, gisina ka la marang kila tatanon. Teene o tamata ka hire pono pare, Inggono ke poupouluana manas.

<sup>22</sup><sup>i</sup>Doho gisiameher tamatang ualualasira tar ualatut ka kotpokoso turuha i Jerusalem, kara me kula pare, “Inggono deh ke hikuin Belsebul

<sup>b</sup> 3.11 Luk 4.41    <sup>c</sup> 3.12 Mak 1.34    <sup>d</sup> 3.14 O gisiameher tamatang iate ra namana pare, a puhung uelhire poluk e mokane pare, gere kilasion, o aposoul.    <sup>e</sup> 3.16 Jon 1.42  
<sup>f</sup> 3.17 Luk 9.54    <sup>g</sup> 3.18 A Selot, a tamatang tur tane uapopokoho keip toso tamat tar gavamanang Roum.    <sup>h</sup> 3.19 Belsebul a giameher hangan Satan.    <sup>i</sup> 3.22 Mat 9.34; 10.25

ge nas uleikir liouana uakap. Teono peene re geil liu keipiono tasir liouana uasa.”

<sup>23</sup>Maeit Iesu ke kila tasisin, kare mene tasisina toro uelhire uarangangua pare, “Hape re geil liu katongo pe Satan tang Satan?”  
<sup>24</sup>Ngohina gete me pang uan re uelnimaliana katongois, a pang uanion ahik pahe banoto tar tur uanon. <sup>25</sup>A siokono puk, geto matmatame ra uiluilitungeis, kara uelueltageih, o matmatamesin ahik pono pah ra banotong tur uanon. <sup>26</sup>Doh gete uelsae keip katongoin Satan, inggon ahik pono pahe banotong tur uanon ge na binakang kapa peono ke pokoso manas. <sup>27</sup>Toro mana tun, ahik me tamata re banot e leka uanomo tena umar tamata ger tampopokoh, kare la uenaua mena ineton e tuka gete uih tane bakono tatanon.”

<sup>28</sup>“Inggo u hire tamiuoum toro mana pare, God e banot e kale liu me niguata uasa menia pono me nimene uasa tang God. <sup>29</sup>Bo me tamata gere mene uasa tar laben a Deideil, na niguata uasaon ahik tun pah ra turung kale liuig. Teene na niguata uasaon e turung moko dede tar mamang binakalik.”

<sup>30</sup>Iesu ke kula paar, teene ka kula pesina pare, Inggon a nihikung liouana uasa.

### Mai tinan doho tahinalik Iesu

<sup>31</sup>J<sup>J</sup>Tar binakon o bung tahina Iesu, doh tinana pono ka pokoso manas, kara me turane i kalahara tar umene re uangoulin Iesu, maeit gisina ka ualatue tar tang siokor tamat e la kila me tatanon. <sup>32</sup>Doho tamatasitie ra tabila uiloho tang Iesu ka hire tatanono pare, “Tinoumua meso bung tahim, gisila i kalahara ra lang sir teil totomua.”

<sup>33</sup>Bo Iesu puk ke dangata tapokis pare, “Maisir tinouguo, doh maisir tahiguo?”

<sup>34</sup>Song ke bangbanga hahaiono tasisine ra tabila uiloho tatanon, kare kula pare, “Gisine teso bung tinouguo, doho bung tahig <sup>35</sup>Ge mai pe gere uoto uakeluk dede tena nimalara God, inggono te tahiguo, doho tatahigulikio doha tinaguo.”

### Iesu ke uelhire uaranga tar tamata geke dudura tar uatunar raes-uit

**4** <sup>1</sup><sup>k</sup>Kare la poluk Iesu ke la mene ualasira to tasir tamatane i tektekener kodoimo uiluiloh i Galili. Doho manaiar tamata ka la uangoul uiloho tatanon. Gisina o burehentiehe tun, temaene ke panetengua Iesu tar bout, kare la tabil, teke la menmene turuhaon. Bosir tamata ka tur hahailaane ion i hutun i laur. <sup>2</sup><sup>l</sup>Doh Inggon ke mene

<sup>J</sup> 3.31 Mak 6.3; Jon 2.12; Apo 1.14 <sup>k</sup> 4.1 Mak 3.7-9; Luk 5.1-3 <sup>l</sup> 4.2 Mat 13.34; Mak 4.33-34

ualasira tasisina tar bureher inet i lolono tar uelhire uarang, dohi lolono tena nimene ualasion, inggono ke kula tasisina pare,

<sup>3</sup>“Ualongor! A tang siokor tang kalekinale tar iom, ke la tar lang dudura tena uatunar raes-uit tar iom. <sup>4</sup>Gine re dudura pela inggon, a giniamer uatuna ke duduko tar buturung la, doho tetiaua ka me ein taninin. <sup>5</sup>Doha giniamer uatuna ke dudula tar butur papalauan ahik paha kotan. Doh gininar uatuna ke tungara ualahur, teene a kotana sikoro puk peon. <sup>6</sup>Bo tar binaka puk ke hara pehar pisar, ginina ke siokor makmakor, kare siokor mat, teene ge ahik pe me uana ke hiua uabarah bak. <sup>7</sup>Doha giniamer uatunar uit ke pungpungala i uantinana tar uoho ueluelhung, karo hai tanengua, kara hikingua pah ke ua me kukuanan. <sup>8</sup>Bor giniamer uatunar uit teke pungpungala tar koto uaia. Ginina teke tabuara uaia tun, kare bungbunguanantiehe tun. Doha giniamer taninina ke kuselar touonor hangaul, doha giniamer ke ua tar tonomor hangaul, doha giniamer a hangaulur hangaul.”

<sup>9</sup>Doh Iesu ke kula poluk tasisina pare, “A tamata ger to talingana tar ualongor tere longor.”

#### Maene re uelhire uaranga Iesu

<sup>10</sup>Imuduhia ka la baka per manai, Iesu ke uangoul tagu tosno tamatang uakuakeluk, dohi gisiamer tamat. Doh gisina teka dangata toro tengkana ro uelhire uarang geke uelhire tauetein Iesu.

<sup>11</sup>Doh Iesu ke hire tapokis pare tasisin, “God ke uakalahara manasa tamiuoum tar tengkanar uelhire uaouong tena nitoia God. Bosir tamata gesir gisiamer siok, gisina ra ueluatata pukis tar uelhire uarang.

<sup>12</sup><sup>m</sup>Maeit a haua ger nibolo uahiu, e turung pokoso pare o man.

‘Gisina ra bangampe tar inet,  
bo ahik puk pah ra bang parok,  
doh ra longlorompe,  
bo ahik pah ra naman manate.

Te mara hikisina pah ra tur kauiur liu teres niguata uasa,  
kare kale liu God teres niguata uasasin.’”

*Aisai 6.9-10*

#### Iesu ke uakalahara toro uelhire uaranga tar uatun

<sup>13</sup>Song ke kula Iesu tosno tamatang uakuakeluk pare, “Inggoum ahik pah mu naman manate toro uelhire uaranga rone? Hape marung ateoum tar giniamer uelhire uarang?

<sup>14</sup>Gitir tang kalekinale tar iomo ke dudura tono uelhire God. <sup>15</sup>A uatuna geke duduko tar lel, ngohina tasir tamata geka longoro tono Uelhire God, bo Satana puk ke la ualahur tunume, kare me kale liu toro

<sup>m</sup> 4.12 Apo 28.26-27

uelhire roon <sup>16</sup>Doho gisiamer tamata ngohinar butureitir papalauan geke dudukoigir uatun. Gisina ka longoro tono Uelhire God, doh gisina ka kale ualahur tunugua tang roon, kara uahantieh. <sup>17</sup>Bo teene o uelhire ahik mato hiua uaiaha tasisin, doh ko mokongua puk tar sisikinalikir binak. Tar binaka gere pokosor uelsae ue me nimalianane tasisin, teeit ka kale pesina tono Uelhire God, gisina ra turung hiliu ualahur tun tang roon. <sup>18</sup>Doho gisiamer tamata ngohinar koto geke dudukoigir uatun i rana toro uoho ueluelhung. Gisina teka longoro tono Uelhire God. <sup>19</sup>"Bo gisina puk ra uahantiehe tar niuangoulung gane i kot, doh ra malarantiehe pono menas mani bureh, doh ra mahamaha pono tar bureher inet. Gininanine tere uapekout tane tono Uelhire God, kara hikingua me niein uaia re turung kotpokoso tur tasisin. <sup>20</sup>Doho gisiamer tamata ngohinar koteit ke dudukoigir uatun, doha kotana uaia tun. Teasina teka longor paroko tono uelhire God. Doh ka sanga dede tang roon, kare kotpokosonguar niein uaia tasisin. Ngohina tar kukuanana ke burehe uainintieh, a giniamer a touonor hangaul, doha giniamer a tonomor hangaul, doha giniamer a hangaulur hangaul."

#### O lam ahik pah ra uarakop tanein tar tohen

<sup>21</sup>°Doh Iesu ke uelhire uaranga poluk tasisina pare, "Me tamat e banot e keip ualeka toro lam iuma, kare la uarakop tane tana roono tar tohen ue e uamok i kukulebanga toro uat? Ahik! Inggon e uatoko toro lam i rana toro toktokan.

<sup>22</sup><sup>p</sup>"A hauar inete re moko uaouo, ginina ra turung uakalaharaig, doha hauar inete re gom taneig ra turung pukaig. <sup>23</sup>Mai gere marang ualongor, pake ualongoro mare naman manate!" <sup>24</sup>°Inggono ke mene ualatuman poluk pare, "Namnamana hamas tun tar inete gero longoroin, ge hape ko kedanga pea tasir tamat, te hape ponompe ra turung kedanga peia, bo e la turung i rana uainintiehe puk. <sup>25</sup>°Gete me tamata kaig mena inet, inggono ra turung heirin me giniamer inete poluk. Bor tamata ge ahik me inete tatan, ra turung kale liuig na siksikir inet."

#### O uelhire uaranga tar uatuna geke tungar

<sup>26</sup>Doh Iesu ke kula pono pare, "Na Nitoia God ngohina pare, a tamata ke dudura tar uatuna tena iom. <sup>27</sup>Inggonor tamat e hohouo tar boung, kare gulete tar marein. Tar binakon a uatunanina ke tungara manas, kare tabuar, inggon e telempa hape ke tabuara penin. <sup>28</sup>A koto katongompe re uakotpokoso tananin, e uakikilanga per kamanan, song ter alaran, song re la pokosor kukuanan. <sup>29</sup><sup>s</sup>Tar binaka re la mahohor kukuanan, inggonor

<sup>n</sup> 4.19 Mat 19.23-24   ° 4.21 Mat 5.15; Luk 11.33   <sup>p</sup> 4.22 Mat 10.26; Luk 12.2

<sup>q</sup> 4.24 Mat 7.2   <sup>r</sup> 4.25 Mat 13.12; 25.29; Luk 19.26   <sup>s</sup> 4.29 Jol 3.13; UGO 14.15

tamat e tokout ualahur manasampe, ter hauon a binakang ueuere ke kotpokoso manas.”

### **O uelhire uaranga toro douk ra kilain o mastet**

<sup>30</sup>Doh Iesu ke mene poluk pare tasisin, “A haua paka uamisiana toin tena Nitoia God? Ue hingia ro uelhire uaranga ro banot o uakalahar? <sup>31</sup>Na nitoia God te ngohina toro uatunar mastet gero sasalikintiehe tar mamang uatuna gera lebeigane tar kot. <sup>32</sup>Gine o sasalik tun pe roon, roon o turung hua kai, karo la uleikintiehe uain tar mamang doukane tar iom. A ranana roon e turungn uleik pon, doho tetiaua ra me turung tuha pono tenas niu tar momolouina roon.”

### **Iesu e uelhire uaranga pukumpe**

<sup>33</sup>Iesu ke mene keip tasisina tar bureher uelhire uarang ger siokona sira pare, re mene ualasira pe tasisina toro uelhire mara matotosina tar naman manate. <sup>34</sup>Inggon ahik tun mate mene uakalahara me siokor inetenine ke meneig tasisin. Teeit a mamang menelikir nanon a uelhire uaranga kompe. Bo tar binaka puk ke la pahenaiono mesno tamatang uakuakeluk, inggono song ke mene uakalahara tasisina tar mamang inetelik.

### **Iesu ke kula tar rom e moko bukbuk**

<sup>35</sup>Na moloinar binakon, Iesu ke kula tosno tamatang uakuakeluk pare, “Ti sairkoutula tar pang giomehenar kodom.”

<sup>36</sup>Maeit gisina ka hiliu manasa tasir manai tamat, kara keip tatanon, inggon e panete teilimpe tar bout. O giniamhe ro bout ke la tagu pono tasisin. <sup>37</sup>Doh ahik me manasan, kare u mer pang romo uleik, doha butuana uleik ke puahame i lolono tar bout, kare marang uounungua tar laur.

<sup>38</sup>Bo Iesu puk e hohouo rikinane i uoum tar bout, e dedeke rikin toro dedek. Maeit gisisir tamatang uakuakeluk ra kula tatanono pare, “Tang Ualafir! Inggahik pahosokoro tagu geti dudurieig?”

<sup>39</sup>Gine ke gulete pe Iesu, inggono ke louara tar rom, kare kula pare tar butuan, “Takout manas!” Doho hiarouo manas! Song ke molo uahiur rom, kare la hiarouo tununguaon. <sup>40</sup>Iesu song ke kula tosno tamatang uakuakeluk pare, “Ae maene rung sokoro inggoum? Inggoum halana harahampe tung tagorong man?”

<sup>41</sup>Bo gisina puk ka sokorontiehe tun, kara ueldangata katongois pare, “Mair tamatonene? Maene a romo mer butuana ke longoro nomana tatanon?”

### **Iesu ke geil liu tur tasir liouana uasa tar tamat**

**5** <sup>1</sup>Iesu mesno tamatang uakuakeluk ka la hunguko tar pang giamehenar kodomo uiluiloh i Galili tar painang Gerasa. <sup>2</sup>Doh tar

binaka ke la hiuono tar bout, a tang siokor tamat a nihikung liouana ke tauete turuha toro lebangang mat, kare lame tatanon. <sup>3</sup>Inggonor nihikung liouana e uoto uangoul puk manasampe toro lebangang uamoko tasir mat, doh ahik me tamata re banot e uih tane baka poluk tatanon. <sup>4</sup>Inggono ka uoto tiein tane bakaigir liman, doha toking pang keken, bo inggono puk e uoto salkout tar tiein, kare katego tar pang haeneng tar keken. Doh ahik pono me tamata re banotong kusa tane tatanon. <sup>5</sup>Tar mamang binakalik, tar boung mer marein, inggon e uiloho kompeane tar lebangang mat, dohi rana toro siusan, kare kalkaling ualeik, kare nulnula katongoin tar palau.

<sup>6</sup>Tar binaka ke bang huara to pelaono tang Iesu i reh, inggono ke ualo uelhirila kare la hatup uahiuane i uoum tatanon. <sup>7-8</sup>'Song ke kaling ualeik tun, kare kula pare, Iesu ger tuna God ger i ranantiehe tun, a haua ro marang guataia totoguo? Ingga o uamana tun tang God pare, ahik paho turung uaelmahing totoguo.

Teeit Iesu ke kula manasa pare tar liouana uasa, "Ir liouana uasa! Tauete liu tur tar tamatene."

<sup>9</sup>Song ke dangata Iesu tatanono pare, "Mair hangomua?" Doh inggono ke mene hahaua pare, "Inggeim o manai, ge inggeim pe o bureh." <sup>10</sup>Song ke kula tane uapopokoho poluk tang Iesu pare, ahik pahe ueluelu liuila tasisina me gime butur. <sup>11</sup>Tar buturion, o pang hueit ra einein teil tar pang giomehenar siusan i hutuna tasisin. <sup>12</sup>Doho liouana uasasit ka kula pare tang Iesu, "Kula tamiueim gering la uangoul tagu tasir hueitisila, uamaluana tamiueim gering la hiku tasisin." <sup>13</sup>Doh Iesu ke uamaluana tasisin, maeit gisina ka hiliu tur tar tamat, kara la hiku tasir hueit. Gisisir pang hueit here kaelaisane tar 2,000, ka siokor ualo uahiuoko tar urauanar kodom, kara la siokor dudur.

<sup>14</sup>Doh gisisir tamatang kaueke tasir hueit ka bang, kara ualo liuingua. Kara la ueluatata ueltebeirisin toro uan, doh tar uan uleik. Temaeit o tamata ka longor, kara siokor languako tar la banga tar hauene ke kotpokos. <sup>15</sup>Gine ka la pemesina tang Iesu, gisina ka me banga tar tamata geka hiku bakainir bureher liouana sioun re tabila pe, inggono ke loho tar gomono uaia, kare uia pono na ninaman, doh gisina ka sokorontiehe tun. <sup>16</sup>Gisis ka me banga tar inetene teka la hire tasir gisiamehe tar haua ke kotpokoso tar tamata ger nihikung liouan, doh tar haua ke kotpokoso tasir hueit.

<sup>17</sup>Temaeit gisina ka dangdangata tang Iesu tar hiliu tenas pang uanisin.

<sup>18</sup>Gine re lang panete tapokis pe Iesu tar bout, a tamatene ka hiku bakainir liouana ke dangdangata tatanono pare, Uamalauana totoguo u la tagu totomua!" <sup>19</sup>Doh Iesu ahik mate uamaluana tatanon, bo ke kula

---

<sup>1</sup> 5.7-8 Mak 1.24

puk pare tatanon, “O la tapokis puk tenang uan toso tahimulik, karo la hire tasisina tar mamang inetelik geke guataigir Tamata Noman totomua, ke ueldolomo pe.” <sup>20</sup>Temaeit a tamatono ke hiliu, kare la ueluatata tasir tamatang Dekapolis tar haua ke guataig Iesu tatanon, doho tamata ka siokor lutarang touboul tun.

### Iesu ke uatua tapokis tar kukuahalik, doh tang ger momouh

<sup>21</sup>Tar binaka ke sairkout tapokis polukula Iesu tar bout tar pang giomehenar kodom, o bureher tamata ka la tur uiloho tatanonane tar tektekenar kodom. <sup>22-23</sup>Doha tang siokor tamatang uoum keipane tar umang lotu ger hangana tang Jairus ke lame ke bang huara pe tang Iesu, kare me baka uahuainane tang Iesu, kare me kula uapopokoho tatanono pare, “A tuguo ger kukuahalik e marang mata manas. Ingg a o la uateuele tunume, karo la uaponala tar limoum tatanono mare banoton e uia, kare uangoul baka poluk.”

<sup>24</sup>Maeit Iesu ke la tagungua tatanon, doho burehentiehe ponor tamata ka la tagu tatanon, doh ra kusukus uiloho tun tatanon. <sup>25</sup>Doha tang siokor kuah a tutung bakue e la tagu teil pono tasir manai. Inggonor kuaha ke kaleinir tutung bakue ke banoto toro hangaul, doho torik ro krismas. <sup>26</sup>Inggono ke kale tur tar uleikintieher uelmahing tasir doktasis ke la hahais, kare uakapa to pono tena mani tasisin, doh ahikimpe pahe uia sikor, no maton o ululeik uainintiehe puk. <sup>27</sup>Tar binaka ke longoro kout pe inggono tang Iesu, inggono ke uaheheke turulainane i muduhia tasir tamat, kare la tuha tono hikhikuon. <sup>28</sup>Teene inggono ke namana pare, “Getu tuha pukuo tono hikhikuon, inggo u turung uia manasampe.” <sup>29</sup>Ahik me sikir manasan, o deuating tatanono ko uakenua tar noro tauet, doh inggono ke la hagouo tar tukununa ke hiliu per niduh.

<sup>30</sup>“Doh Iesu ke hagouo uateuele tun ke hiliu per nitampopokoho tatan. Maeit inggono ke tur kauiuirane i uatinanina tasir manai, kare dangata pare, “Mai ke tuha tonogo hikhikuo?”

<sup>31</sup>Doh no tamatang uakuakelukono ka mene tapokis pare, “Ingg a o bang huara ponampe tasir manaisine ra kusukus totomua, karo marang dangatampe, Mai ke tuha totoguo?”

<sup>32</sup>Bo Iesu puk e banga uiloho dedempe tasir tamata tar marang ate pare, mai ke tuha tatanon. <sup>33</sup>Doh gitir kuaha ke ate manasa tar haua ke kotpokoso tatan. Maeit ke lame, kare me bake uahuainane tar kekena Iesu, kare poroporo keip tar nisokor, song ke hire tauete tun toro man. <sup>34</sup>“Doh Iesu ke kula tatanono pare, “Ir tug! Ingg a tereng nitagorong mana ke uauia totomua. O la keip toro hiarou, rongo mata ingga ko kapa manas.”

<sup>20</sup> 5.30 Luk 6.19    <sup>21</sup> 5.34 Mak 10.52; Luk 7.50; 17.19



<sup>35</sup>Gine re menmene haraha pe Iesu, o gisiamer tamata ka la turume tena uma Jairus ger tamatang uoum keipane tar umang lotu. Gisina ka me hire tang Jairus pare, “A tumua deh ke mata manas, ae maene ro guata koutkout baka polukia tar tang ualasi?”

<sup>36</sup>Bo Iesu puk ahik mate namana tun tenas uelhiresin. Inggono ke hirempe tang Jairus pare, “Ahik paho sokor, bo o tagorong mana puk totoguo.” <sup>37</sup>Song ke kula tane Iesu tasir gisiamer tamata pare, ahik pah ra la tagu tatanon. Bo Pita puk manasa mes Jems doh Jon ge tahina Jems teka la tagu tatanon. <sup>38</sup>Tar binaka ka la pokoso pelasina tena umar tamatang uoum keipane tar umang lotu, doh Iesu ke banga teres niueldolomor tamata ra kiring pe. <sup>39</sup>Inggono ke la lekala ium, kare la mene tasir tamat, kare dangata pare, “Ae maene rung kiringioum, karung ualagoreih? A keketik dehene ahik mata mat, e hohouo kompe!”

<sup>40</sup>Doh gisinar tamata ka uanuanio tatanon. Bo inggono puk ke kula tasisina ra tauet i kalahar. Song ke kila ualekalaono tar butur re rikinir kukuahalik tang tamanar keketik, doh tinan menia tena tang touonor tamatang uakuakeluk. <sup>41</sup><sup>w</sup>Inggono ke la kusa tar limanon, kare kula tatanono pare, “Talita Kumi,” (a puhion e kula pare, inggar kukuahalik o gulet) <sup>42</sup>Doh inggonener kukuahalik no siokor hangaul, doho torik manasa no kirismas, inggono ke uolo tentur ualutar, kare latlateil uiloh! Doha toking tinanono kura siokor uahantiehe tun. <sup>43</sup>Bo Iesu puk ke ualatoho tane uapopokoho tasisina pare, ahik pah ra hirhire mo tamata tar puhion, song ke kula tasisina ra heir tatanono me niein mare ein.

### Iesu ka ueldein i Nasaret

**6** <sup>1</sup>Iesu ke hiliu tar uanion, kare la tapokis keip tosono tamatang uakuakeluk i Nasaret ter uan uleikir nanon. <sup>2</sup><sup>x</sup>Doh tar Mareining Pepe Uah, Iesu ke la mene ualasila to tar umang lotu, doho bureher tamata ka lutarantehe tun. Kara ueluedangatais pare, “Ia ke kale turono tar niguataninanine? Hingiar niate uaia ka heirin tatanon? Hape maene re banoton e uatouo tar inetenine? <sup>3</sup>Inggono dehene ter tamata ger tang tuha um ger tuna Maria, doh ter tahina Jems mes Josep, Judas, doh Saimon. Doho bung tahinalikiono ra uangoul taguane tagigeig?” Gisina ka hagouo uasa tatanon, kara hikingua pah ka tagorong mana tatanon.

<sup>4</sup><sup>y</sup>Song ke hire Iesu tasisina pare, “Na propet God ra ueltadainane toro mamang buturulik. Gane puk manasampe tena uan katongono te ahikiono pah ra ueltadain menia ponompeane i uantinanina toso tahinalikion, doh gane katongompe tasisina ro matmatame.” <sup>5</sup>Temaeit inggon ahikingua mate banot e guata to me nitouo tar uanion. Bo inggono puk ke banot e uaponola tar limana tasir gisiamer tamatasisir

<sup>w</sup> 5.41 Luk 7.14    <sup>x</sup> 6.2 Jon 7.15    <sup>y</sup> 6.4 Jon 4.44

momouh, kare uauia tasisin. <sup>6</sup>Doh inggono ke lutarantiehe tun, ahik pesina mes nitagorong mana tatanon.

### **Iesu ke ualatue tasir siokor hangaul, doha tang torikir aposoul**

I muduhia Iesu song ke la hahai toro uuanilik, kare mene ualasira tasir tamata tono Uelhire Uaia God. <sup>7</sup>Inggono ke kila toto tasir siokor hangaul doha tang torikir tamatang uakuakeluk, kare heir tasisina tar nitampopokohong geil liu tasir liouana uasa. Song ke kula tasisina ra la tantan torik tar kalekinale. <sup>8</sup><sup>z</sup>Doh inggono ke kula uapopokoho pono tasisina pare, “Getung laoum, inggoum ahik pah mu kale me inet, bo mu kale puk tenami tukan. Ahik pah mu kale me niein ue me tolah, doh ahik pah mu duk me mani. <sup>9</sup>Mu hikumpe tonomio su, kara hik pah mu hiku uelbabar mo giamehe ro hikhiku. <sup>10</sup>Tar binaka rung la pokosoum tar uan, karung la leka me siokor um, mu uangoul tar umon e tuka tar binaka rung hiliu tar uanion. <sup>11</sup><sup>c</sup>Doh getung laoum tang hingiar uan, doh ahikir tamatang tar uaniono pah ra uaha uangoul tamiuoum ue ra de mata ualongoro tamiuoum, titire liu toro uoung tar uaniono tar kekeimiu tar binaka rung hiliu mara bang parokosina ka guata uasa pe tamiuoum.”

<sup>12</sup>Song ka la hahaisin, kara mene tasisis ra ueltuparis tar uapalih tenas niguat. <sup>13</sup><sup>b</sup>Doh gisina ka geil liu tasir bureher liouana uasa, kara uauia pono tasir bureher momouh ra tunaha keip peis tar uaiuinar oliv.

### **Herot e namana tang Iesu pare, te Jon ger tang uahuhu**

<sup>14</sup><sup>c</sup>Herod ger toia ke longoro tar haua ke kotpokos, teeit ka ueliate tun pein Iesu. Doho gisiomeher tamata ka kula pare, “Iesu te Jon ger tang uahuhu ke tua tapokis tur tar keu, temaene na nitampopokohono tar uatouo tar inet.” <sup>15</sup>O gisiomehe ra kula pare, “Inggono te nu Eilaija.” Bo o burehe puk ra kulampe pare, “Inggono deha propet ngohina tasir propeiting sioun.” <sup>16</sup>Bo tar binaka puk ke longoro Herod tar puhon, inggono ke kula pare, “Inggono deh te Jon, giane ku tokoutuio ro lun, ke tua tapokis tur tar keu!” <sup>17</sup>Ge Herod katongo pe teke ualatoho tasir uiluiliatung tar la reih tang Jon, kara uamokoin tar umang uih, teeit Herod e malarantiehe tang Herodias. Herodias tena kuaha Pilip ge tahinon, doh inggono ke le poluk tatanon. <sup>18</sup><sup>d</sup>Doh Jon e uoto hire tang Herod pare, “Inggono deh ahik paha uia ko kale pe ingga tena kuaha tahim.” <sup>19</sup>Maeit Herodias ke nimalianantiehe tun tang Jon, dohe malahir pare, e tung pous tatanon. Bo ahik puk pahe banot. <sup>20</sup>Teene Herod e sokorontiehe pono tang Jon, kare kaueke pono tatanono gere ate peono tang Jon pare, a tamata kodkodoh, kara dedeil. Herod ahik pahe uoto

<sup>z</sup> 6.8-11 Luk 10.4-11    <sup>a</sup> 6.11 Apo 13.51    <sup>b</sup> 6.13 Jas 5.14    <sup>c</sup> 6.14 Mat 16.14; Mak 8.28; Luk 9.19-20    <sup>d</sup> 6.18 UGO 18.16

hagouo uaia tar binaka gere mene tang Jon, bo inggono puk e uoto uaha tar ualongoro tena menemenon.

<sup>21</sup>Na binaka uaia tun Herodias ke kotpokoso manasa tar guata me inete tang Jon. Tar binaka ke namana tapokis Herod tar binaka ka pohain, inggono ke guata toro iru, kare uairu tosono tamata uleik, mesno tamatang uoum keip tasir tamatang uiliatung, karo mamahoholik i Galili. <sup>22</sup>Tar binaka ke lekamer tuna Herodias ium, kare me doum, inggono ke uauaha tun tang Herod mesno tamatasitir nikila toro iru. Doh gitir toia ke kula pare tar kuaha kalan, “Gero dangata ingga me inete totoغو, inggo u heirompe.”

<sup>23</sup>Doh inggono Herod ke ualpagaha katongoin, kare kula pare, “Ge me haua ro dangatia inggo u turung heir, u banotong uelpakaha tenag mamang inetelik, karu heir totomua.”

<sup>24</sup>Maeit inggonor kuaha kalana ke la tauete ualahur tar um, kare lame tang tinan, kare me kula pare, “A haua ru dangataio?” Doh tinanono ke mene hahaua pare, “Ingga o dangata toro luna Jon ger tang uahuhu.”

<sup>25</sup>Doh ahik me manasan, gitir kuaha kalana ke la tapokisila tar toia. Kare la kula tatanono pare, “Inggo u malara pare, ingga o heir manasene daana totoغو toro luna Jon ger tang uahuhu, ra uamokolain tar peileit.”

<sup>26</sup>Doh nu Herod ger toia ke longor, kare duhuntehein, bo teene inggono ke namana tena niualapagah, kare tesir tamatasitir nikil, temaeit inggon ahik pah ke matot e ut. <sup>27</sup>Doh tar binakene, inggono ke ualatoho tar tang siokor e la kaleha toro luna Jon. Inggonor uiluiliatung ke la manasa tar umang uih, kare la tokout koutungua toro luna Jon, <sup>28</sup>kare la keip tapokisih toro lun, o moko teil tar peileit. Inggono ke me heir tana roono tar kuaha kalan, kare la heiringuaono tang tinan.

<sup>29</sup>Gine ka longoro pe no tamatang uakuakeluk Jon tar puhiono ke kotpokoso pe, gisina ka lame, kara kale tar tukununon, kara la uamokoin toro lebangang mat.

### Iesu ke ualaein tasir tamat e matotois tar tolimar taosein

<sup>30</sup><sup>e</sup>O aposoul ka tapokis manas, kara me tur uiloho tang Iesu, kara me ueluatata tar haua ka guatain, doh hape ka namana pe <sup>31</sup>Song ke kula Iesu tasisina pare, “Inggeig deh paki hiliu baka tasir tamatasine mari la pepe uaha bak.” Inggono ke kula pare, teene o burehe per tamata ra uelueltapokise tasisin, doh gisin ahik menas binakang ein. <sup>32</sup>Maeit gisina ka la panete manasa mes paheis tar bout, kara la tar butur ger tabotan. <sup>33</sup>Bo o tamata burehe puk ka banga tasisina ka hiliu pe, kara bang paroko tasisin, kara ualohia i kot, kara la pokoso uoum tasisin. <sup>34</sup><sup>f</sup>Doh tar binakene ke la hung peko Iesu, inggono ke ueldolomo tasisina ka me

<sup>e</sup> 6.30 Luk 10.17    <sup>f</sup> 6.34 Aha 27.17; Mat 9.36

pokoso uoum pe. Teene gisina ngohina tasir sipsip ge ahik me tamatang kauk. Temaene ke ualasiro Iesu tasisina tar bureher inet.

<sup>35</sup> Doh tar binakonene, inggono ke molointiehe manas. Temaeit ka lame no tamatang ualelukion, kara me kula tang Iesu pare, “Inggono deh ke molointiehe manas. Doha buturene a butur paden, kara hik me uanane. <sup>36</sup> Ueluelutula tasir tamatasine ra la ueltebeir toro uan, kara la sir katongo mes niein.”

<sup>37</sup> Bo Iesu puk ke mene hahaua tasisina pare, “Inggoumumpe rung heir me niein tasisin.”

Doh gisina ka hire tapokis poluk tatanono pare, “Me mani gera bulauain me niein mara la uelmatoutur tamatasine pake la matoto sira tar bulauanar tamata tar tualir bialok. Inggono o malara pare, mi la bulaeim me niein me mani sira paar?”

<sup>38</sup> Doh Iesu ke dangata tasisina pare, “O touiha ro bereit kaisane tamiuoum? Mu la banga tagin.”

Gine ka la banga pesin, gisina ka la hire pare, “O tolina ro bereit rasine, doha torik pukur ian.”

<sup>39</sup> Song ke kula Iesu tasisina pare, “Inggoum mu uatabila toto hahai tasir tamata toro garas.” <sup>40</sup> Temaeit gisina ka tabila manas. Kara tabila pare, o giniamer toto e matoto tar tolimar hangaulur tamat, doho giniamer toto a hangaulur hangaul. <sup>41</sup> Doh Iesu ke kale toro tolina ro bereit, doha torikir iana, kare uataakai i ran, kare kulang uauia tang God. Song ke pis mahmahara tar bereit, kare heir tosno tamatang uakuakeluk mara bul ueltebeirisina tasir tamat. Inggono ke pakaha pono tar toking ianane tasir tamat. <sup>42</sup> Gisina ka siokor ein uakap, kara siokor mahmahur. <sup>43</sup> Doho aposoul ka hedongola tar mokomoko tar siokor hangaul, doha torikir tohen. <sup>44</sup> Gisinasis ka ein tar nieininin ke la banotois tar tolimar taoseinir tamat.

### Iesu ke hai i rana tar laur

<sup>45</sup> Doh ahik me manasan, Iesu ke uapanete tosno tamatang uakuakeluk tar bout, kara tapokisila i Betsaida. Bo inggono ke uangoul, kare kula tasir tamata ra ueluelutageih. <sup>46</sup> <sup>h</sup> I muduhia inggono song ke la kai taro i rana tar siusana me pahen, kare la lotu. <sup>47</sup> Doh nareu tun manas, a bout e boko harahampe i uantinanina tar kodom. Bo Iesu puk e uangoul harampe me pahen i kot. <sup>48</sup> Doh inggono ke banga taro re uasiasiaka peinir bout. Doho tamatang uakuakeluk ka takusing tar hua tutupa tar romo uleik. Doh na lulen Iesu ke la taro tasisin i rana tar laur. Inggono ke lang siaua uadeil puk tasisin. <sup>49</sup> <sup>i</sup> Bo gisina puk ka bang huara tatanono re hai peha tar laur, kara namana pare, a liouanon, kara kalkaling

<sup>s</sup> 6.35-44 Mak 8.1-9    <sup>h</sup> 6.46 Luk 5.16    <sup>i</sup> 6.49 Luk 24.37

ualeikintiehe tun. <sup>50</sup>Gisina ka sokorontiehe tun ka banga pe tatanon. Bo Iesu puk ke mene ualahur tun tasisin, kare kula pare, “Auia dehon, gine te Inngo puk, ahik pah mu sokor.” <sup>51</sup>/Song ke panetono tar bout, kare kapar rom. Gisina ka lutarantiehe tun tar haua ka bangain. <sup>52</sup>Gisin ahik dedempe pah ka naman manate tar inete ke guatain Iesu tar bereit. Gisina pe o mahang ate, kara hik dedempe pah ra tagorong man.

### Iesu ke uauia tasir bureher tamat i Genesaret

<sup>53</sup>Gine ka sairkout pela Iesu mesno tamatang uakuakeluk tar kodomo uiluloh, gisina ka la hungungua i Genesaret, kara la oto tar bout.

<sup>54</sup>Ginampe ka hiua liu pesina tar bout, o bureher tamatang Genesaret ka bang paroko tang Iesu. <sup>55</sup>Kara ualualo ueltebeir toro uan, kara hire tasir tamata uakapa ra keipime tasir momouh tang Iesu tar buturene re uangoulion.

<sup>56</sup>Iampe re la Iesu, gane toro uuanilik, doh gane toro uan uleik ue gane tar tektekenar pang uan, o momouh ra uarikin koutkoutisane toro buturung uabulbulau. Gisina ra dangata uapopokoho tatanono tar uamaluana tasisina tar tuha puk tar surunar gomonor nanon, doh gisin ka tuhtuha tatanono ka siokor uia uakap.

### No uelhire God tero i ranantiehe tenas mener mahoh

**7** <sup>1</sup>O Parisi mesir gisiameher tamatang ualualasira tena ualatutur lotu ka la tur i Jerusalem, kara me tur uiloho tang Iesu. <sup>2</sup><sup>k</sup>Gisina ka me banga tupara pono tasir gisiamehe no tamatang uakuakelukono ka ein pe, bo ahik puk mata uabusa baka uoum tar limas. <sup>3</sup>O Parisi mesir Ju ra uoto uakeluk tenas niguatang sioun pare, geta hikisina pah ra uabusa baka tar limas tar uakeluk tar niguatang sioun, gisin ahik pah ra banotong ein. <sup>4</sup>Tar binaka ra la turumesina tar buturng uabulbulau, gisina ra uahuhu baka uoum tar limas, song ra banotong ein. Doh gisina ra uakeluk pono tar bureher niguat, ngohina pono tar uahuhu nar kap me ro sosopen, doho ketol, kara teboulung ein.

<sup>5</sup>Maeit o Parisi mesir tamatang ualualasira tar ualatut ka dangata tang Iesu pare, Ae maene ahik nongo tamatang uakuakeluka pah ra uangoul, kara uakeluk tagu tenas niguatar mahoh, ahik pah ra uahuhu baka tar limas song ra ein?

<sup>6</sup>Doh Iesus ke hire tapokis tasisina pare, Aisaia ger propet ke uamana nomanampe tar binaka ke uatagin pe tamiuoumur tang pepe boh. Ingon a nibolo pare,

“O tamatasine ra ueltada keip puk totoguo tar uauasa puk,  
bor koulousisin e uairehe tun totoguo

<sup>j</sup> 6.51 Mak 4.39   <sup>k</sup> 7.2 Luk 11.38   <sup>l</sup> 7.4 Mat 23.25

<sup>7</sup> Gisina ra uoto lotu keip totoguo tar lotu a tabo tengkan,  
kara uoto mene ualasira tar ualatut ahik paha nang God.”

*Aisaia 29.13*

<sup>8</sup> Inggoum kung kuse luara manasa tena ualatoho God, karung uoho uanonono puk tar niguatang gane i kot.

<sup>9</sup> Doh Iesu ke hire poluk tasisina pare, “Inggoum mu ate uaia tun tar hagarang uamoko uagele tena ualatoho God marung uakeluk tun tenami niguat! <sup>10</sup> <sup>m</sup>Ge Moses pe ke kula pare, ‘Ueltada tang tamoum me tinoum, doh mair tamata gere guata uasa tar toking tinan, inggono paka uiliatung pousin.’” <sup>11</sup> Bo inggoum puk mu kula pare, ‘Inggon a uia tar tamata gere kula pare tar toking tinan, inggo ueldoloum tun, inggo ahik pahu banot u poul tamiraoum. Ge inggo pe ku heir tar nipoul geku marang heir bakain tamiraoum tang God.’” <sup>12</sup> Doh inggoum ahikingua pah mu uamaluana tatanon e guata me inete tang tinana doh taman. <sup>13</sup> Temaeit inggoum mu uoto guatangua tar niguatang gane i kot tere popokoho uain tena niualatut God. Doh inggoum mu uoto guata tar bureher niguata sira pare.

**Iesu ke uelhire uakalahara tar inete re guata tar  
tamat ahik paha delauana tar matana God**

<sup>14</sup> Iesu ke kila toto uagiomehe poluk tasir tamat tar lame tatanon, kare me kulono tasisina pare, Inggoum uakapa tun mu siokor ualongor, karung naman manate tar puhene. <sup>15-16</sup> <sup>o</sup>A ineteng kalahara tar tamat, kare lala i lolono tatanon, ahik pah tere banotong guata tatanono ahik paha delauana tar matana God. Bo a inete gere tauete tur tar tamat, ginina tere guata tar tamat ahik paha delauan.

<sup>17</sup> Iesu ke hiliu tasir tamatasin, kare la ium. Doh no tamatang uakuakelukono ka dangata tatanono toro tengkana ro uelhire uarang roon. <sup>18</sup> Doh Iesu ke danagata tapokis tasisina pare, “Inggoum ahik pono pah kung naman manate? Ahikioum pah mu ate pare, ahik pe me ineteng kalahara re lekame i lolono tar tamata kare banotong uakotpokoso tar tamata pare, inggon ahik paha delauana tar matana God? <sup>19</sup> Ge ginina pe ahik pahe banot e la hiku tar kolonon, bo ginin e la moko puk toro balanon, kare tauete tur polukumpe tar tukunun.” (Gine ke mene pe Iesu paar, Inggono ke uahirengua pare, a mamang niein uakapa tun “a delauan”.)

<sup>20</sup> Doh Iesu ke hire poluk pare, “A haua gere tauete tur tar tamat, ginina tere guata tar tamat ahik paha delauan. <sup>21-22</sup> Ge a inete pe gere tauete tur tar tamat, ginin e latur tar kolonon, e tauete turur ninamana uasa, a niguatang ur, o ueuenau, tang haluh pous, katego toro le, tang

---

<sup>m</sup> 7.10 KT 20.12; 21.17; Ual 5.16    <sup>n</sup> 7.10 Bolobolong Nas Kalekinaler Pater 20.9  
<sup>o</sup> 7.15-16 Apo 10.14-15

uahahai, ueluelsae, bohoboh, tampolil, gehegeh, ngur, mahang kul, karo tuktukar. <sup>23</sup>A mamang niguata uasalikinine e la tur i lolono tar kolonar tamat, doh teanina tere banotong guata tar tamata ahik paha delauana tar matana God.”

### A kuahang Ponisia e tagorong mana tun tang Iesu

<sup>24</sup>Song ke hiliu Iesu tar uanion, kare la tar butur e uahuhut tar uan uleik i Tair, kare lekangua tar um. Inggono ke de me tamata mate ate re uangoul peon, bo inggon ahik pahe matot e ou. <sup>25</sup>Toro mana tun, ginempe ke longoro kout per tang siokor kuaha ger nihikung liouanar tun pare, Iesu e uangoul tar um. Inggono ke lame, kare me bake uahiuainane i koto tar kekena Iesu. <sup>26</sup>Doh inggonor kuahono ahik paha Ju, a peng Ponisia tar pang uana uleik i Siria. Inggono ke dangata uapopokoho tun tang Iesu tar geil liu tar liouana uasa tar tunon. <sup>27</sup>Iesu ke kulangua tatanono pare, “Uamaluana tasir keketik gera ein uabanoto baka uoum, ge ahik peono paha kodkodoho tar ualaein teres nieinisina tasir lo.”<sup>p</sup>

<sup>28</sup>Bo a kuaha puk ke mene hahaua tatanono pare, Tamata Noman, o lo ra uoto uangoul i kukulebanga tar teboul, kara ein tar siksikir niein ger esir keketik gere pungpung i kot.

<sup>29</sup>Song ke kula Iesu tatanono pare, “Teene ko mene tapokis uaia tun pea, gon o la manas, a liouana uasa ke hiliu manasa tar tumua.”

<sup>30</sup>Maeit gitir kuaha ke la tapokis tena um, kare la banga tar tun, e hohouo uaia kompe toro uat, a liouana ke hiliu manasa tatanon.

### Iesu ke uauia tar tamat a kamelong kara pau

<sup>31</sup>Song ke hiliu Iesu toro uan gere uahuhut i Tair, kare lih koutula tar uan uleik i Saidon, kare la uahiuako tar kodo mo uiluiloh i Galili, song ke la lihila tar painang Dekapolis. <sup>32</sup>Tar buturon, o tamata ka ueliuime tar tang siokor tamata tang Iesu, a tamaton ahik pahe banot e men, kara kamelong. Gisina ka me dangata uapopokoho tang Iesu tar uaponala tar limana tatanono mare uia. <sup>33</sup>Iesu ke keip liu tar tamatonane tasir manai, song ke uamoko tar toking kamot limana tar toking talinganon, kare lou tola tar limana tar nilou, kare tuha tar mianon. <sup>34</sup>Song ke banga kai taro Iesu i Heuen, kare ungang ran, kare kula tar tamaton pare, “Epata!” (A puhung uelhireon e kula pare, “Takapuk!”) <sup>35</sup>Ahik me sikir manasan a toking talinganono kura takapuk, doha mianono song ke guluh, kare uakekenanguaono tar men.

<sup>36</sup><sup>q</sup>Doh Iesu ke ualatoho uapopokoho tun tasisina pare, ahik pah ra hirhire mo tamat. Bo gine puk ke guata uaia peono tasir bureh, o tamata ra ueluatata dedempe tatanon <sup>37</sup><sup>r</sup>O tamata ka siokor lutarang touboul

<sup>p</sup> 7.27 O tamata ahik paho Ju o Ju ka kilais o lo. <sup>q</sup> 7.36 Mak 1.43-45 <sup>r</sup> 7.37 Ais 35.5

tun, kara kula pare, “Inggono deh ke guata uايا tun tar bureher niguat. Gine meniampe ke uايا pono tasir kamelong, doho pau ka mene pon.”

### Iesu ke ualaein tar toto tamat e matoto tar toueitir taoseinir tamat

**8** <sup>1</sup>Tar binakanin o burehentiehe polukur tamata ka la toto polukume tang Iesu. Gine ahik pesina mesi niein mata ein, Iesu ke kila tosno tamatang uakuakeluk, kare kula pare, <sup>2</sup>“Inggono u ueldolomo tun tasir tamatasine, gisina ka uangoul tagu totoguo tar touonor marein, doh ahik manasa mes niein. <sup>3</sup>Geru kula inggo tasisina ra la tosno uan tar binaka ra gog, gisina ra dud tola tar lel, teene o gisiamehe tasisina ka la turume i reh.”

<sup>4</sup>Doh no tamatang uakuakelukono ka kula tapokis pare, “A buturene a tabotan, doh pakiangua ri kale turieig me niein mara ualaeinig tasisin?”

<sup>5</sup>Doh Iesu ke dangata tapokis tasisina pare, “O touiha ro bereit kaesiat tamiuoum?” Doh gisina ka hire tapokis pare, “O mouit rasine ura mok.”

<sup>6</sup>Iesu ke kulangua manasa tasir tamata ra tabila i kot, kare kale toro mouit ro bereit, song ke kulang uايا tang God, kare pispis tar bereit, kare heir tosno tamatang uakuakeluk mara bul tasir tamat. Doh no tamatang uakuakelukono ka guata sirampe. <sup>7</sup>Gisina ra kale teil pono tasir iianalik. Inggono ke kulang uايا pono tananina tang God, kare kula poluk tosno tamatang uakuakeluk ra bul hahai tasisin.

<sup>8</sup>O tamata uakapa tun ka siokor ein umatoto tunis, kara mahmahur. I muduhia o tamatang uakuakeluk ka utela tar mokomok i lolono tar mouitir tohen. <sup>9</sup>Here kaelainane tar 4,000ir tamata ra uangoul tar binakon. Gine ke ueluelu liu baka pe Iesu tasisin. <sup>10</sup>Song ke la panetono mesno tamatang uakuakeluk tar bout, kara lala tar giameher painang Dalmatuna.

### O Parisi ka la dangata me niuahireng Heuen

<sup>11</sup>O Parasi ka lame, kara me dangdangata tang Iesu tar puhpuhung dangat. Gisina ka marang uedanga tang Iesu, gisina ka marang banga me uaparok gere la tur i Heuen. <sup>12</sup>“Inggono ke ungang ran, kare kula pare, “Ae maene ra dangatar tamatang daana me uaparok? Inggono gine ru hire tamiuoum toro mana tun, ahik me uaparoko ra turung heirin tamiuoum.” <sup>13</sup>Song ke hiliuiono tasisin, kare la panete tapokis tar bout, kare sairkout polukula tar pang giomeh.

### O uelhire uaranga teres isir Parisi doh Herot

<sup>14</sup>O tamatang uakuakeluk ka malabobor mata kale tagu me bereit, bo ra kale teil puk manasampe toro siok, ka panete pe tar bout <sup>15</sup>“Doh Iesu

<sup>s</sup> 8.1-9 Mak 6.35-44    <sup>t</sup> 8.12 Mat 12.39; Luk 11.29    <sup>u</sup> 8.15 Luk 12.1



ke uatagin tasisina pare, “Tagin teil! Banga uaia tun teres isir Parisi doh na is Herod.”

<sup>16</sup> Maeit gisina ke uelhalata katongois, kara kula pare, “Here teene dehon ahik pe inggeig pahi kale teil me bereit.” <sup>17</sup> Iesu e ate manas, hape ka ueluelmene peisisin, maeit ke dangata pare, “Ae maene rung ueluedangatasium pare, ahikieig megi bereit? Inggoum halanampe tung bang paroko ue halana tung naman manate?” <sup>18</sup> Inggoum a to matamiuompe, bo maene ahikioum pah mu bang huar. Doh inggoum a to talingoumiu, bo maene ahikioum pah mu longor? Doh maene ahik ponoum pah mu namana dede? <sup>19</sup> “Tar binaka ku pakaho toro tolina ro bereit geke einisir 5,000ir tamat, a touihar tohen kung uauounusium tar mokomok?” Kara kula hahauasina pare, “A hangaul doha torik.”

<sup>20</sup> “Doh tar binaka ku pispisio toro mouit ro bereit geke ualaeinis tar 4,000ir tamat, a touihar tohen kung uauounusium tar mokomok?” Kara kula hahaua polukusina pare, “A mouit.”

<sup>21</sup> Maeit Iesu ke dangata poluk pare tasisin, “Inggoum halanampe tung naman manate?”

#### **Iesu ke uauia to i Betsaeda tar tang siokor tamat a kut**

<sup>22</sup> Gisina ka la me i Betsaeda, doho gisiamer tamata ka keipime tar tang siokor tamat a kut, kara me kula uapopokoho tang Iesu tar tuha tatanon. <sup>23</sup> Doh Iesu ke kusa tar limanar kut. Tar binaka ke loula Iesu tar matanon, kare uaponola tar limana tatanon, song ke dangata tatanono pare, “Ingga o bang huarampe me inet?”

<sup>24</sup> Doh Inggono ke banga kai i ran, kare kula pare, “Inggo u bang huara tasir tamat, gisina ngohina tar douk gere latlateil uiloh.”

<sup>25</sup> Doh Iesu ke uamoko polukula tar toking pang liman tar matanon. Ingonor kut, song ke banga ualuhluh, kare banga uaia tun poluk, kare bang paroko uaia tun tar mamang inetelik. <sup>26</sup> Maeit Iesu ke uelueluata tatanon e la tena uan, kare kula tane pare, “Ahik paho leka tapokis tar uaneitir uleik.”

#### **Pita ke hire tauete pare, mai tun Iesu**

<sup>27</sup> Iesu mesno tamatang uakuakeluk ka hiliu i Galili, kara la uamoto taro toro uaning Sisaria Pilipai. Gine ra lala pelasina tar lel, inggono ke dangata tasisina pare, “O tamata ra kula pare, maio?”

<sup>28</sup> <sup>x</sup> Doh gisina ka hire tapokis pare, “O gisiamer ra kula pare, ingga te Jon ger tang uahuu. Doho gisiamer ra kula pare, ingga Elaija. Doho gisiamer ra kula pare, ingga ter tang siokor propeiting sioun a nang God.”

---

† 8.17 Mak 6.52    † 8.19 Mak 6.41-44    † 8.28 Mak 6.15

<sup>29</sup> Song ke dangata Iesu tasisina pare, “Bo inggoum mu kula pare, maio?”

Doh Pita ke mene hahaua pare, “Ingga te Kristo.”<sup>z</sup>

<sup>30</sup> “Bo Iesu ke kula tane uapopokoho tasisina pare, “Ahik pah mu hirhire ueltebeir me tamata maio.”

### Iesu ke hire pare, e turung mat

<sup>31</sup> Song ke uakekene Iesu tar hire tosno tamatang uakuakeluk pare, “A Tunar Tamat e turung kale uelmahing tar bureher inet, doh noso mahohor Ju, doho patere uleik, doho tamatang ualualasira tar ualatut ra turung ueluelde tatanon. Inggono ra uiliatung poustin. Dohi muduhia tar touonor marein inggon e turung tua tapokis poluk.” <sup>32</sup> Doh gine ke uakalahara uaia tun pe inggono tasisin, Pita ke kusela tatanonane i tekteken, kare la kula pare, inggono paka hik baka pahe mene sira paar. <sup>33</sup> Bo tar binaka puk ke kauiurilaono tosno tamatang uakuakeluk, inggono ke uelkukur tang Pita, kare kula pare, “Hiliu totoguo Satan! Ingga ahik paho uakeluk tena ninamana God, o uakeluk puk teres ninamanar tamat.”

<sup>34</sup> <sup>b</sup> Doh Iesu ke kilame tasir manai tamata menia tosno tamatang uakuakeluk tar lame tatanon, kara me ualongor. Inggono ke kula pare tasisin, “Ge me tamat e marang uakeluk totoguo, inggono pake de tar kapil tar haua re malarai, kare huata tena korose, song re uakeluk totoguo. <sup>35</sup> Gero kapilia tenang nitua totoum katong, inggon e turung rou. Bo gero heiria tenang nitua tar hangougou, doh toro Uelhire Uaia, ingga o turung tupara tenang nitua. <sup>36</sup> Doh gete me tamata re uoho uanonontiehe tar mamang ineteliking gane i kot, na nituaon e turung rou, hapengua re turung poul per mamang inetelik tatanon? <sup>37</sup> Me huar inete re uelmatout tola tar nitua? <sup>38</sup> “Doh mair tamata re matala totoguo, doh tonogo uelhireo tar binakene daan, o tamata ra de tang God, kara guata uasa, a Tunar Tamat e turung matala pono tar tamatono tar binaka re tapokis polukume tena uiniatoro Taman menia tasir anggelou gesir dedeil.”

**9** <sup>1</sup> <sup>d</sup> Doh Iesu ke hire poluk tasisina pare, “Inggo gine ru hire toro mana tamiuoum, o gisiamer tamata kaeisane halana ta mat e tuka tar binaka ra turung banga tena Nitoia God gete kotpokoso keipiha tar nitampopokoh.”

<sup>y</sup> **8.29** Jon 6.68-69    <sup>z</sup> **8.29** A tengkana toro uelpouh Kristo te pare, A tang siokor tamatar nikedang, kare pikuring God tar me kale tapokis tosno tamat.    <sup>a</sup> **8.30** Mak 9.9

<sup>b</sup> **8.34** Mat 10.38-39; Luk 14.27    <sup>c</sup> **8.38** Mat 10.33    <sup>d</sup> **9.1** Mak 13.30

### A tukununa Iesu ke uapalih

<sup>2</sup>Kura karuh bakar tonomor marein, Iesu ke kilo tas Pita, Jems doh Jon, kara la kai taro tar siusan a i ranantieh ge ahik mo tamat. Tar buturiono teke la uapalih tor tukununa Iesuane i uoum tasisin. <sup>3</sup>Na hikhikuono ke la gaugauil, kare balobal, ke gaugauilintiehe uain poluk taninit ra uahuhu turigane i kot. <sup>4</sup>Doh Elaija me Moses kura pokos, kaura me tur tagu tatanon, doho tamatang uakuakeluk ka banga tasrasin ura menmene pe tang Iesu.

<sup>5</sup>Maeit Pita ke kula tang Iesu pare, “Inggono deh auia tun king me uangoul pe inggeimane. Inggeim deh mi tuha me touonor umane, me sioko me noumua, me siokor nang Moses, kare me siokor nang Elaija.” <sup>6</sup>Pita ke tobouluntiehe hape re mene pe, teene gisina ka sokorontiehe tun.

<sup>7</sup>Song ko hiuaha ro mahar langit, karo me gom tane tasisin. Kare mene turuhar tamata toro mahar langit pare, “Gine ter tuguo geru malarantiehein. Mu longoro tatanon!” <sup>8</sup>Ahik me manasana tar binaka ka banga uilohosin, gisin ahik pah ka bang huara baka poluk me tamat, te Iesu puk manasampe me pahen.

<sup>9</sup>Gine ra la uahiua tapokis pekosina tar siusan, Iesu ke kula tane uapopokoho tasisin ahik pah ra ueluatata me tamata tar haua ka bangain, e la tukampe gete la tua tapokis tur bakar Tunar Tamata tar keu. <sup>10</sup>Doh gisina ka uoho uanono toro uelhire roono tatas, kara ueldangata katongois pare, “O uelhire haua roono rone, A tamat e tua tapokis tar keu?”

<sup>11</sup><sup>f</sup>Doh gisina ka dangata tang Iesu pare, “Ae maene ra kular tamatang ualatut pare, Elaija tere turung la baka uoumuha?”

<sup>12</sup><sup>g</sup>Doh Iesu ke mene hahaua tasisina pare, “Roon o man! Elaija e uoum teilimpe tar me uakodkodoho tar mamang inetelik. Bo ae maene ka boloin ro ueluatatang sioun pare, ‘A Tunar Tamata ra turung uaelmahingintiehein, kara uelueldein?’” <sup>13</sup><sup>h</sup>Bo inggo u hire puk tamiuoum pare, Elaija ke la manasaha, doh gisina ka guata tatanono hape ka malara pe, e uakeluk sirampe hape ka bolo uatuha pein.”

### Iesu ke uauia tar tang siokor keketik ger nihikung liouana uasa

<sup>14</sup>Tar binaka ka la hiua pokosokosina tar tenkanar siusan, gisina ka la ueltupara tasir bureher tamata ra uangoul uiloho pe tasir gisiameher tamatang uakuakeluk, doho tamatang ualualasira tar ualatut ra ueluelperere keip tasisin. <sup>15</sup>Gine kompe ka bang huara per tamata tang

<sup>e</sup> 9.2-7 Apo 3.22; 2Pi 1.17-18    <sup>f</sup> 9.11 Mal 3.1    <sup>g</sup> 9.12 Ker 22.1-18; Ais 53.3; Mal 4.5-6

<sup>h</sup> 9.13 Mat 11.14

Iesu, gisina ka lutarang uaha tun, kara siokor ualola tatanon, kara la uamarein uaia tun tatanon. <sup>16</sup>Doh Iesu ke dangata tasisina pare, “A hauene rung ueluelpererisioum?”

<sup>17</sup>Kare kular tang siokor tamatane i uantinanina tasir manai pare, “Tang Ualasis, inggo ku keipime tar tug totomua, inggono ke hikuinir liouan, doh ke uapauingua tatanon. <sup>18</sup>Gere kaleonor liouana uasa tatanon, inggon e uoto baka uahiua tatanon i kot, kare pokosor peropere tar uauan, dohe boho ngungut, kare pagpagolor tukunun. Doh inggo ku me dangata tosnongo tamatang uakuakelukua tar geil liu tar liouana uasaon, doh ahik pah ka banot.”

<sup>19</sup>Doh Iesu ke mene hahaua poluk tasisina pare, “Inggoumur tamatang daan o tagtagorong boholik, paka touihar binaka ru kale peo teremi niduhioum? Keipime tar keketikane totoguo.” <sup>20</sup>Kara keipimeinir keketik tatanon. Doh ahik me manasan tar binaka ke bangonor liouana uasa tang Iesu, inggono ke uaporoporo ualahur tun poluk tar keketik, kare la pung i kot, kare la iiaha teil, kare peroperer uauan.

<sup>21</sup>Doh Iesu ke dangata tang tamanonor keketik pare, “A touihar binaka ke uangouluono pare?”

Kare mene hahaua tamanono pare, “Inggono ke uakekeneina tar binaka re keketik <sup>22</sup>A bureher binaka gitir liouana e uoto uapungala tatanono toro hue ue i laur mare tung pous tatanon. Bo ge paro banoto ingga o guata me inet, auia ingga o ueldolomo tamiueim, doho poul baka tamiueim.”

<sup>23</sup><sup>i</sup>Kare mene hahaua Iesu tatanono pare, “Getu banoto inggo! A tamata gete tagorong man, inggon e banot e guata tar mamang inetelik.”

<sup>24</sup>Doh ahik me manasan gitir tamanonor keketik ke kula ualeik pare, “Inggo u tagorong man! Bo o poul pukua totoguo, ge inggo pe a katupa reg nitagorong man.”

<sup>25</sup>Doh tar binaka ke banga manasa Iesu pare, o tamata ra burburehe uainintiehe tun manas, inggono ke uelkukur tar liouan, kare kula pare, “Inggar liouana tang uapau, doha tang uakamelong, longoro totoguo! O hiliu tar keketikene, kara hik poho tapokis baka polukume tatanono me binak.”

<sup>26</sup><sup>j</sup>Doha liouana ke kaling ualeikintiehe, kare uaporoprontiehe tar keketik, song ke hiliu tatanon. Doh inggonor keketik ke la rikin siarampeane i koto pah ke mat, maeit o bureher tamata ka kula pare, “Inggono deh ke mat.” <sup>27</sup>Bo Iesu ke kusa tar limanonor keketik, kare kusa uatur tatanon, kare tur katongonguaon.

<sup>28</sup>Tar binaka ke la manasa Iesu ium, gisit no tamatang uakuakelukono ka dangata uanomo tatanono pare, “Ae maene inggeim ahik pah king banoto mi geil liu tar liouanon?”

<sup>i</sup> 9.23 Mat 21.21; Mak 11.23    <sup>j</sup> 9.26 Mak 1.26

<sup>29</sup>Kare mene hahaua Iesu pare, “A lotu puk manasampe tere banotong geil liu tar liouana sira pare.”

### **Iesu ke hire uagiomehe poluk pare, e turung mat**

<sup>30</sup><sup>k</sup>Gisina ka hiliu tar uanion, kara la siauala i Galili. Iesu ahik pah ke malar ra ate mo tamat, ia ra uangoulusin, <sup>31</sup><sup>l</sup>teene inggon e marang ualasira tosno tamatang uakuakeluk. Inggono ke hire tasisina pare, “A Tunar Tamata ra turung tanganain tasir tamata mara tung pousin. Dohi muduhia tar touonor marein, inggon e turung tua tapokis poluk.” <sup>32</sup><sup>m</sup>Bo gisina puk ahik pah ka naman manate tar tengkanar puhung uelhireon, doh ra sokoro pono tar dangata uaia tatanon.

### **Mai tunur i ranantieh**

<sup>33</sup>Iesu mesno tamatang uakuakeluk ka la pokos i Kaperneam. Gine ka la leka pesina tar siokor um, Iesu ke dangata tasisina pare, “A hua giala rung ueluelpererisioum tar lel?” <sup>34</sup>Bo gisina puk ahik pah ra men, teene gisina ka ueluelpentantane mai tunur i ranantieh. <sup>35</sup><sup>n</sup>Doh Iesu ke tabila uahiu, kare kila toto tasir hangaul, doha tang torikir aposoul, kare kula pare tasisin, “Gete me tamata re marang uairanain, inggon e kale uahiu katongoin misiana tar tamatang kalekinale gere kalekinale tasir tamata uakap.”

<sup>36</sup>Kare kusa Iesu tar tang siokor keketik, kara uaturin i uantinana tasisin, kare buaka tar keketik, kare hire pare, <sup>37</sup><sup>o</sup>“Mair tamata re uaha keip me tang siokor keketik tar hangoguo, inggon e uaha keip pono totoguo. Doh mai gere uaha totoguo, inggon ahik pahe uaha puk totoguo, bo tar tamata ponene ke ualatueha totoguo.”

<sup>38</sup>Doh Jon ke kula tang Iesu pare, “Tang Ualasi! Inggeim king banga tar tang siokor tamata e geil liu keip tasir liouana uasa tar hangoumua, Doh inggeim king kula tane tatanon, teene inggon ahik pahe uakeluk tagu tagigieg.”

<sup>39</sup>Maeit Iesu ke hire tapokis tasisina pare, “Ahik pah mu tur tane tatanon. Gete guata keipir tamata me nitouo tar hangoguo, inggon ahik pahe turung uasua tar hangoguo. <sup>40</sup><sup>p</sup>Ge mai per tamat ahik pahe uelmatana keip tagigeig, inggono ter uanotoumiuoum. <sup>41</sup><sup>q</sup>Inggo u hire tun tamiuoum toro mana pare, me tamata gere heir tamiuoum me sikir kodomo gerung uakeluk pe inggoum tang Kristo, inggon ahik pahe banotong rouor bulauan.”

### **A niuedanga gere uapunga tar nitagorong man**

<sup>42</sup>“Doh gete guata me tang siokor tamata tasir keketikisine gera tagorong mana totoguo mara guata me niguata uasa, inggono paka uia

---

<sup>k</sup> 9.30 Jon 7.1   <sup>l</sup> 9.31 Mak 8.31; 10.32-34   <sup>m</sup> 9.32 Luk 9.45   <sup>n</sup> 9.35 Mat 20.25-27; Mak 10.43-44; Luk 22.24-26   <sup>o</sup> 9.37 Mat 10.40   <sup>p</sup> 9.40 Mat 12.30; Luk 11.23  
<sup>q</sup> 9.41 Mat 10.42

geta lolo tolain mo palaua uleik toro uekuekonon, kara la uadudurin i laur. <sup>43-44</sup> Gere guatar limoumua, maeit ro guata ingga tar niguata uasa, tokout liu tatanon. Inggon e la uiantiehe uain geto la keipia tar pang siokor pang limoum i Heuen. Inggon e la sa geta pang torikir pang limoumua, kara bakalaia toro hue i Hel tar butur ro luh dede ro hue ahik paho lomoh. <sup>45-46</sup> Doh geter kekeimua re guat, maeit ko guata ingga tar niguata uasa, tokout liu, inggon e la uiantiehe uain geto la ingga pare, a piuk tar uaning uaha geta pang torikir kekeim, kara bakalaia i Hel. <sup>47-48</sup> Gea matoumua re guat, maeit ko guata uasa ingga, uegolo liu! Auiantiehe uain geto la leka keipia tar pang siokor pang matoum tena Nitoia Godo geto la keipia tar toking pang matoum, kara la bakalaia i Hel tar butur ahikir sosoi pah ra mata tagu, doho hue ahik paho oso tagu.”

<sup>49</sup> “Geo tamata uakapa tun pe ra turung uapalih keipis tar teheng toro hue. <sup>50</sup> A teh auia, ra uoto uamokolaig toro mamang uahungulik mare siokor delauanar uahung tar matana God, te misiana sira kompe geto moko ro hue tasir mamang tamatalik. Bo gere kapa pukur linglinginar teh, ahik me tamata re banotong uakotpokoso tapokis tar linglingin. Inggon pake moko teil me tehe totoum maro uangoul keipia toro hiarou tasir gisiameh.”

### Iesu ke uelhire tauete tar niguatang katego toro le

**10** <sup>1</sup> Iesu ke hiliu manasa tar uanene i Kaperneam, kare lala tar pang Judia, song ke sairkoutula i Jordan. Doho burehe polukur tamata ka la uelhirime tatanon, maeit inggono ke guata sira polukumpe re uoto guatang sioun pe. Inggono ke ualasira poluk tasisin.

<sup>2</sup> Doho gisiameher Parisi ka lame tang Iesu tar me uedanga tatanon, kara dangata pare, “Me tamat e banotompe e uaueltageih tono le, kare ueluelutula liu tena kuaha?”

<sup>3</sup> Kare mene hahau Iesu pare, “O hua ro ualatoho ke heirin Moses tamiuoum?”

<sup>4</sup> Doh gisina ka hire tapokis pare, Moses e uamaluana tar tamat e banot e bolo toro pepang ueltageih toro le, kare ueltula liu tena kuah.

<sup>5</sup> Bo Iesu puk ke kula tasisina pare, “Moses ke bolo kompe tar puhung ualatution, teene inggoum o mahang longor. <sup>6</sup> Bo tar binaka puk ke uakekenar mamang inetelik, God ke tuha tar bulout doha kuah. <sup>7-8</sup> Doh a tenkanar puhiono teene, a bulout e turung hiliu tang tinana doh taman, kare la uangoul tokaha mena kuah, kaura pokoso sira pare, a siokon siounur tukunun, kara hik baka poluk paha tang torik. <sup>9</sup> Temaeit mais geke uuelkaloutis God, ahik me tamata re banotong uaueltageih.”

<sup>r</sup> 9.43-44 Mat 5.30    <sup>s</sup> 9.47-48 Ais 66.24; Mat 5.29    <sup>t</sup> 9.50 Mat 5.13; Luk 14.34

<sup>u</sup> 10.4 Ual 24.1-4; Mat 5.31    <sup>v</sup> 10.6 Uak 1.27; 5.2    <sup>w</sup> 10.7-8 Uak 2.24; Epe 5.31-33

<sup>10</sup>I muduhia, Iesu mesno tamatang uakuakeluk ka la uangoul poluk iuma tar um, doh no tamatang uakuakelukono ka dangdangata poluk tatanono tar puhion. <sup>11</sup>\*Doh Iesu ke hire tasisina pare, “Me tamata gere de tena kuah, kare kale palih me tang giomeher kuah, inggono ke guata toro ur, kare guata tar niguata uasa tena kuaha uakikilang. <sup>12</sup>Doh mair kuaha re uelueltula liu tena bulout, kare le me tang giameher bulout, a kuahono ke guata toro ur, kare guata tar niguata uasa tena bulout.”

### Iesu mesir keketik

<sup>13</sup>O tamata ka keip totouahame tasir keketikilik tang Iesu mare la tuha tasisin. Bo o tamatang uakuakeluk puk ka uelkukur tasisin. <sup>14</sup>Bo gine puk ke banga pe Iesu tasisin, Inggono ke nimaliana tasisin, kare kula pare, “Mu uamaluana tasir keketik gera lame totoguo, ahik pah mu kula tane tasisin, ge na Nitoia pe God ter nosir keketik ge ngohinasine. <sup>15</sup>†Inggono u hire tun toro mana tamiuoum pare, Mair tamata ge ahik mena nitagorong mana sira tasir keketikisine, inggon ahik pahe banot e leka tena Nitoia God.” <sup>16</sup>Song ke kila totoono tasir keketik, kare buaka hahai tasisin, kare uamoko tar limana tasisin, kare heir tena niguata uaia God tasisin.

### A tang mani ke ueluatata tang Iesu

<sup>17</sup>Tar binaka ke marang la manasa Iesu, a tang siokor tamata ke ualualome tatanon, kare me baka uahiuainane i uoum tatanon, kare dangata pare, “Tang ualasira uaia! A haua paku guataio maru kale tar nitua gere moko dede?”

<sup>18</sup>Doh Iesu ke mene tapokis pare, “Ae maene ro kula ingga totoguo auia? Ahik me tang siokor tamata me auia, God puk manasamper uia me pahen. <sup>19</sup>‡Inggono ko ate manasampe tonu ualatoho God gero kula pare, Ahik paho uiliatung pou me tamat, doh geto lea ahik paho uraur keip tasir le, doh ahik paho uenau, ahik paho bohoboh, kara hik paho uatouboul boh, doho ueltada tang tamoum me tinoum.”

<sup>20</sup>Kare hire tapokisone tang Iesu pare, “Tang Ualasil! A niualatohonine ku uakeluk turugio tar binaka ru keketik.”

<sup>21</sup>Doh Iesu ke bangahe tatanon, kare malahiritiehe tun tatanon, kare kulangua tatanono pare, “A siokor inete halana ingga to guat, la karo la uabulaua uakapa tun tenang mamang inetelik, karo heir tar mani tasir tiome. Gero guata ingga paar, ingga kaeig me nang inete uaia tun i rana tang God. Song ro uakelukume totoguo.”

<sup>22</sup>Gine ke mene pe Iesu tar puhion, a tamatono ke banga uasa, doh ahik pah ke hagouo uaia, kare hiliu, teene inggon a tang manintieh.

---

\* 10.11 Mat 5.32 † 10.15 Mat 18.3 ‡ 10.19 KT 20.12-17; Ual 5.16-20

<sup>23</sup>Doh Iesu ke uiliangara tapokis toсно tamatang uakuakeluk, kare kula tasisina pare, “A tamata ger tang mani e turung parakukuhuntiehe tunin tar leka tena Nitoia God.”

<sup>24</sup>Doho tamatang uakuakeluk ka lutarantiehe tun tar puhion. Bo Iesu puk ke la kula ualatumana poluk pare, “Ir keketik! Inggona parakukuh tun tar leka tena Nitoia God. <sup>25</sup>A kamel ahik pahe parakukuhin tar hikula tar tapokosonar harum, bor tamata tang mani e parakukuh tunin tar leka tena Nitoia God.”

<sup>26</sup>Doh gisitir tamatang uakuakeluk ka lutara uasa tun poluk, kara ueldangata katongois pare, “Doh maingua re banoto ra uelkarusin?”

<sup>27</sup>Iesu ke bangaehe tasisin, kare kula pare, “Tar nibangang tasir tamat, inggon a parakukuh uasa tun. Bo tang God, ahik me inete re parakukuh.”

<sup>28</sup>Gine ke longoro pe Pita tang Iesu, inggono ke kula pare, “Inggeim king hiliu tenami mamang inetelik, karing uakeluk puk manasa totomua!”

<sup>29</sup>Kare kula tapokis Iesu pare, “Inggo u hire tamiuoum toro mana pare, mair tamata ke hiliu tena um ue o bung tahin ue o bung tatahinalik ue taman ue tinan ue o bung tun ue na butur tar uakeluk totoguo, doh tonogo Uelhire Uaiao, <sup>30</sup>inggon e turung kale uaburehentiehe mo um, mo bung tahin, mo tatahinalik, mo burehe ro bung tinan, mo bung tun, kare me bureher inet, doh me niguata uasa ra turung guataig tatanon. Bo gaat puk i muduhia, gisina ra turung kale tar nitua gere moko dede tar mamang binakalik.”

<sup>31</sup>“O tamata gera banga sirais pare, o tohangasene daan, gisina tera turung uangoul sira pare, o uadohin, doh gisis ra banga sirais pare, o tabo hangasene daan tera turung i ranantieh.”

### **Iesu ke hire uatouon e turung mat, kare tua tapokis**

<sup>32</sup><sup>b</sup>Gisina ka la lih taro i Jerusalem, doh Iesu e uoum teil tasisin. Doh gisis no tamatang uakuakelukono ka sokor, doho tamatasine ra uakuakeluk teil pono tasisina ka uoun tun pono tar nisokor. Doh Iesu ke kila sioko tasir siokor hangaul, doha tang torik. Inggono ke menmene uakalahara poluk tasisina tar inete re la turung pokoso to tatanon i Jerusalem. <sup>33</sup>Inggono ke kula pare, “Ualongor! Inggeig i la taro i Jerusalem kara turung tanganainir Tunar Tamata tasir patere uleik, doho tamatang ualualasira tar ualatut. Doh gisina ra turung uelhote pare, inggon e turung mat, kara heirin tasir tamata ge ahik poho Ju. <sup>34</sup>Doh gisina ra turung uauanete tatanon, kara loulouin, kara halhaluhin, kara tung pousin, dohi muduhia tar touonor marein, inggon e turung tua tapokis poluk.”

<sup>a</sup> 10.31 Mat 20.16; Luk 13.30    <sup>b</sup> 10.32-34 Mak 8.31; 9.31



### Jems me Jon ura malahir pare, teura i ranantieh

<sup>35</sup>Jems me nu Jon ger toking tuna Sebedi kura la me tang Iesu, kaura kula pare tatanon, “Tang Ualasis! Raeim mira malahir pare, ingga o guata sira teremira nimalara raeim.”

<sup>36</sup>Kare mene hahaua Iesu tasrasina pare, “A haua paku guataio tamiraoum?”

<sup>37</sup>Kaura hire tapokis rasina pare, “O uamaluana tamiraeim maira la tabila tagu totomua. Me tang sioko tar pang mua, kare me tang sioko tar pang kais.”

<sup>38</sup>“Kare mene hahaua Iesu tasrasina pare, “Raoum mura tel a hau ura dangatain. Raoum mura banotong inum tagu tar kap geru turung inum tolaio? Doh mura banotong kale tar niuahuhu gera turung uahuhu keipin totoguo?”

<sup>39</sup>“Doh rasina kura mene hahaua pare, “Raeim mira banot!”

Kare hire Iesu tasrasina pare, “Raoum mura turung inum nomana tar kap geru turung inum tolaio, kara turung uahuhuis raoum tar uahuhu gera turung uahuhin totoguo. <sup>40</sup>Bo inggo puk ahik pah teru banot u kula tang mai re turung tabila toro tabtabilang toia i tektekena toro nouguo. Godo ke kale uatoro tar buturunin a nasir tamat inggonompe ke uamatot.”

<sup>41</sup>Doh tar binaka ka longorosinar siokor hangaulur tamatang uakuakeluk tas Jems me Jon, gisina ka uakekena tar nimaliana tas Jems me Jon.

<sup>42</sup>“Maeit Iesu ke kilame tasisin, kare hire pare, “Inggoum mu ate toro uan uakapa daan, o mamang toiang tasir tamata ge ahik poho Ju, gisina ra ualatoho uapopokoho tosnoso tamat, doh nosio tamata uleikisin tera kaeke keip tasir tamatasine i kukulebanga tasisina tar nipetutup mara longorosin.”

<sup>43</sup>Bo gane puk i uantinanina tamiuoum inggono pake giamehe siok. Mai gere marang tamata uleik, inggono pake turung tamatang kalekinale tamiuoum. <sup>44</sup>Doh mair tamata re marang i ranantieh, inggono tere turung tamatang kalkalekinale puk tasir tamata uakapa tun. <sup>45</sup>Temaeit ke lamer Tunar Tamat, inggon ahik pah ke lame pare, mara me kalekinale ueleheirir tamata tatanon. Ahik! Inggono ke lame mare me kalekinale ueleheir tasir tamat, kare heir tena nitua tar bulaua tapokis tasir tamata uakap.

### Iesu ke uauia tar tang siokor kut

<sup>46</sup>Maeit gisina ka la pokoso manas i Jeriko. Doh gine re lang hiliu manasa pe Iesu mesno tamatang uakuakeluk tar uan uleikion, a tang

° 10.38 Mak 14.36; Luk 12.50    <sup>d</sup> 10.39 Apo 12.2; UGO 1.9    ° 10.42 Luk 22.25-26

† 10.43 Mat 23.11; Mak 9.35

siokor tamat a hangana tang Bertimeus ger tuna Timeus, e tabila tar tektekenar lel, kare hinghinga inete tasir tamat. <sup>47</sup>Tar binaka ke longorono tang Iesu ger peng Nasaret ke me la uahuhut pe tatanon, inggon ke uakekene tar kula ualeik pare, “Iesu ger tuna Debit, o ueldolomo totoguo!”

<sup>48</sup>Doh gisisir burehe ka uelkukur tatanon, kara hire pare, “Tabtabila sikor! Ahik paho menemen!” Bo inggono puk e kula ualeikintieh dedempe pare, “Tuna Devid! O ueldolomo totoguo!”

<sup>49</sup>Doh Iesu ke tur, kare hire pare, “Kilame tatanon. Maeit gisina ka kilame tatanon,” kara kula pare, “O uah, karo lame, inggono ke kila totomua.” <sup>50</sup>Kare liur liuionor kut tono hikhiku, kare siaka kai, song ke la la tang Iesu.

<sup>51</sup>Song ke dangata Iesu tatanono pare, “A haua ro malaria u guato totomua?”

Doh Bartimeus ger kut ke mene hahaua pare, “Tang Ualasil! Inngo u marang bang.”

<sup>52</sup><sup>8</sup>Doh Iesu ke kula tatanono pare, “Gon o la, reng nitagorong mana ingga ke uauia totomua.” Doh ahik me manasan, inggon ke bang, kare uakelukunguala tang Iesu tar lel.

### Iesu ke lekala i Jerusalem ngohina tar toia

**11** <sup>1</sup>Tar binaka ka la uahuhut manasasin i Jerusalem, gisina ka la pokoso baka uoum tar toking uan i Betpage, dohi Betani, rasinar toking uan ura uahuhut tar Siusanang Oliv. Doh Iesu ke kilame tena tang torikir tamatang uakuakeluk, <sup>2</sup>kare kula pare, “Raoum mura la tar uaneit i uoum tamiroum. Doh tar binaka mura la leka raoum tar uanion, raoum mura turung tupara tar donki ger kalan, a nilolo tane. Doh inggon a nitabung panpanete harah. Mura luaka tatanon, kaura keipime. <sup>3</sup>Gete dangata me tamata tamiraoum, ‘Ae maene mura guata raoum pare, tar donki?’ Mura hire tapokis pare, ‘A Tamata Noman e malara tatanon, bo e turung heir tapokis ualahur puk.’”

<sup>4</sup>Maeit rasina kura la manas, kaura la tupara tar donki kalan e tur tar lel, a nilolo tane toro pirik. Gine ura luaka tur pe rasina tatanon, <sup>5</sup>o tamata gera tur uahuhut ka dangata tasrasina pare, “A haua mura guatain raoum, maene ura luaka tar donki kalaneit?” <sup>6</sup>Doh rasina kura hire sirampe ke kula pe Iesu tasrasin, song ka uamaluanar tamata tasrasin. <sup>7</sup>Song kura keipime rasina tar donki tang Iesu, kara baka uaponalasina tenas hikhiku tar donki, song ke panete Iesu.

<sup>8</sup>O bureher ponor tamata ka heig tenas gomono tar lel, doho gisiomehe ka heig tar rananar douk ge ka tokout turig toro butur malatahan.

<sup>8</sup> 10.52 Mak 5.34

<sup>9</sup>Gisis ra uoumuoum teil kare gisis i mud ra kulkula ualeik teil pare,  
 “Uatakai tang God!

Guata uaia tatanono geke laha tar hanganar Tamata Noman!

<sup>10</sup>Guata uaia tena nilahar Nitoia ger nang Debit ger tubugieig!

Uatakai tang Godanah i rana tun!”

*Ker 118.25-26; 148.1*

<sup>11</sup>Maeit Iesu ke leke manas i Jerusalem, kare la leke tar umang lotu ger uleik, kare la bangahe ueltebeir tar mamang inetelikane ium. Bo teene ke reiu manasa peon, maene inggono ke la tauete liu polukane tar uan, kare lala i Betani mesno siokor hangaul, doha tang torikir tamatang uakuakeluk.

### Iesu ke soul toro douk fig

<sup>12</sup>Tar uagiomehenar marein, naliuo gine ra lang hiliu manasa pesin i Betani, Iesu ke hagouo tar gog. <sup>13</sup><sup>h</sup>Kare bangala toro douk fig menia tar kamanana roon, maeit inggono ke lala tar la banga ge pare kaeig me kukuanan. Bo tar binaka puk ke lame Iesu toro douk fig, roon ahik poho ua, a kamanana puk, teene a binakon halanar douk te ua. <sup>14</sup>Doh Iesu ke la kula toro douk fig pare, “Ingga ahik paho ua baka poluk, kara einir tamata me kukuanan, ahik tun!” Doh no tamatang uakuakelukono ka longoro ke mene pe inggon.

### Iesu ke geil liu tasir tamatane tar umang lotu ger dedeil

<sup>15</sup>Tar binaka ka la tapokisilasin i Jerusalem, Iesu ke la leka tar umang lotu ger dedeil, kare uakekena tar geil tauete tasir tamatang uabulbulau menia tasir tamatang bulbulau. Inggono ke siokor tula bise tenas tebolusis ra uapuapalih tar mani, kare nosio taluh ponosis ra uabulbulaua tasir tetiau. <sup>16</sup>Kare tur tane pono tasir tamatasis ra marang leka keipime tenas ineteng uabulbulau <sup>17</sup>Song ke menmene ualasiro tasisina pare, No uelhire God o nibolo pare,

“Nag umo ra turung kilain pare,

nas umang lotur mamang tamatalik.

Bo inggoum puk kung uapalih tatanono pare, nas buturung

tokauaouor ueuenau.”

*Aisaia 56.7; Jeramaia 7.11*

<sup>18</sup><sup>i</sup>Doh gisisir patere uleik mesir tamatang ualualasira tar ualatut ka longoro toro uelhire roon, kara sir me hagar tar tung pou tatanon. Bo gisina puk ra sokoro tatanon, teene ka lutarantiehe pesinar manai tena nialasiron. <sup>19</sup>Doh nareiuinar binakon, Iesu mesno tamatang uakuakeluk ka hiliu tar uan uleik i Jerusalem.

<sup>h</sup> 11.13 Luk 13.6    <sup>i</sup> 11.18 Mak 14.1

### O ueluelhirena ro douk fig

<sup>20</sup>Tar uagiomehenar liuo, gine ka la siaua pelasina toro douk fig geke menmenein Iesu, o tamatang uakuakeluk song ka la ate pare, ke maul per kamanana roon, karo mata uatuka toro tenkan. <sup>21</sup>Doh Pita ke namana tapokis hape ke mene pe Iesu toro douk roon, kare kula pare, “Tang Ualasis! O banga toro douk fig rotie ko soul pousuia ko mata manas!

<sup>22</sup>Kare mene hahaua Iesu tasisisna pare, “Mu tagorong mana tang God!<sup>23</sup>Inggo u uamana tun tamiuoum pare, inggoum mu banotompe mu kula tar siusana pare, God e kabekai totomua, kare la bakako i laur, nang niualatoho ingga ra longorompein. A mamang inetelik ra malahirin ter nirtagorong mana puk manasampe, kara hik me namana tortorik i lolono tar balamiu. <sup>24</sup><sup>k</sup>Temaene ru hire polukuo tamiuoum pare, Inggoum mu banoto mu lotu uatuha me inet, doh gerung tagorong manaoum, inggoum mu banotong kale. <sup>25</sup><sup>l</sup>Bo tar binaka puk rung lotuoum, a uakikilangan inggoum mu kuse luara liu baka uoum me inete geke guata uasaig tamiuoum mare kuse luara liu pono tamamiuoumenah i Heuene teremi niguata uasaoum. <sup>26</sup>Ge Tamamiuoum peenah i ran ahik pahe banot e kuse luara teremi niguata uasaoum geta hikioum pah mu kuse luara tar niguata uasa ka guataisir gisiameher tamata tamiuoum.”

### Iesu ka dangatain mai ke uatohangana tatanon

<sup>27</sup>Tar binakanin, Iesu mesno tamatang uakuakeluk ka la pokoso tapokis manasa poluk i Jerusalem. Maeit gine re lala pela Iesuane tena buturur umang lotu ger uleik, a tamata uleiking tasir pater, o tamatang ualualasira tar ualatut, doho gisiameher tamatang uoum keip ka lame tatanon. Gisina ka me dangata uapopokoho tatanono pare,

<sup>28</sup>“Ia ko kale tura tar tohangane, doh mai ke heir totomua tar nitampopokoh, maeit a tohangoum?”

<sup>29</sup>Kare mene hahaua Iesu tasisin pare, “Inggo u turung hire tamiuoum, mai ke heir tar nitampopokohene ru guata keipio getung mene hahauoum tar siokor puhung dangatene ru dangataio. <sup>30</sup>Inggo u dangata tamiuoum pare, Na uahuu Jon e la tur tang God ue ke la tur puk me tamat? Mu hire hahaua totogou.”

<sup>31</sup>Gisina ka ueluelmene katongonguais pare, “Geti kula inggeig pare, ‘E laturon i Heuen,’ inggon e turung dangat, ‘Ae maene ahikieig pah ki tagorong mana tatanon?’ <sup>32</sup>Bo geti hireeig pare, ‘E la tur pukuono me tamat,’ ahik pono pahe banot.” Teeit gisina ra sokoro geta nimalianar tamata tasisin, ge o tamata pe ra kula pare, Jon a propet nomana tunur nang God.

<sup>j</sup> 11.23 Mat 17.20   <sup>k</sup> 11.24 Mat 7.7   <sup>l</sup> 11.25 Mat 6.14-15

<sup>33</sup>Temaene, gisina ka uelhire hahauangua puk pare, “Inggeim deh mi teil!”

Kare hire Iesu tasisisna pare, “Inggo ahik pono pahu banot u hire tamiuoum, tang mai ke heir tar tohanganene ue a nitampopokohene ru guata keipio tar inetenine.”

**O uelhire uaranga tasir tamata ra kaueke tar iomo bino**

**12** <sup>1</sup>Iesu ke ueluatata poluk tasisina pare, “A tang siokor tamata ke lebe tar iomo bino, kare ur tar pantui, kare koho tar tung ra pous toigir kukuananar bino, kare tuha tar pang taluhung kauekane tar iom. Song ke heir bakono tar iomo tasir gisiomeher tamata mara kaueke, kare la tar giomeher pang uan. <sup>2</sup>Tar binakang lous tar kukuananar bino, tanener iomo ke ualatuela tena tamatang kalekinale tasisis ra kauek mare la kaleono me kukuanan. <sup>3</sup>Bo gisis puk ra kaueke tar iomo ka kusa tatanon, kara halhaluhin, song ka uelueluata liu tatanon, ahik mate kale baka me inet.”

<sup>4</sup>“A tanener iomo ke ualatu polukula tar tang giameher tamatang kalekinale tasisin. Bo gisis puk tar iomo ka la haluh polaka baka puk tatanon, kara uamatala tatanon. <sup>5</sup>Doh git tanener iomo ke ualatu polukumpela tar tang giameher tamatang kalekinale, doh inggono teka la uiliatung pousunguain. Inggono ke ualatu polukumpela tasir gisiameh, doho gisiamehe tasisina ka la uiliatung polukumpeis, karo gisiamehe ka uiliatung pousis. <sup>6</sup>A tang sioko puk manasa ke uangoul, inggono ter tunonener tanener iomo gere malaelhiritiehe tunin. Doh inggono ke kula pare, Inggono a tuguo, inggono ra turung ueltadain. Kare ualatu uadouh tatanon.”

<sup>7</sup>“Bo o tamata pukusis ra kaueke tar iomo bino ke uelmene katongois pare, Bang! Git re lame ter tunon, doh inggono tere turung kale uahiuo tar iomene. Mu lame, ti uiliatung pous tatanon, mari turung kale uahieig tar iomene a nagig. <sup>8</sup>“Maeit gisina ka kusa tatanon, kara tung pousin, song ka bakain i behia tar iom.”

<sup>9</sup>Doh me haua baka poluk re guatain tanenar iom? Inggono e turung uiliatung pous tasisis ka kaueke baka tar iomo bino, kare heir mo gisiamehe siok.

<sup>10</sup>Inggoum here halana tung timana tagu tono uelhire God? Roon o hire pare,

“O palaua rone ka deinir tamatang tuh, kara bakain.  
Roono ko uiuirin o inete uleik tun.

<sup>11</sup>A niguatanine, tena niguatar Tamata Noman,  
doh ginin a matmata hamas tun teregi nibangeig.” *Ker 118.22-23*

<sup>m</sup> 12.1 Ais 5.1-2    <sup>n</sup> 12.8 Hib 13.12

<sup>12</sup> Gisitir tamata uleik tasir Ju ra marang kusa tatanon, teene ke mene pe inggono paar, ge gisina pe ka la hagouo sira pare, tera menmene uatuhais, gisina te ngohina tasir tamata uasasisir tamatang kaueke tar iomo toro ueluatat. Bo gisina puk ka sokoro mata tuhtuha tatanon, teene o burehe per tamat. Maeit gisina ka hiliu tatanon, kara la.

### A takis ra heirin tang Sisar ue ahik?

<sup>13</sup> I muduhia o mamahoholik ka ualatuella tasir Parisi mesno tamatang uakuakeluk Herot tang Iesu. Doh gisina ra marang uedanga tatanono mara uakouh tatanono gete mene uasaono me puh, song ra kusesina tatanon. <sup>14</sup> Maeit gisina ka lame tatanon, kara me kula pare, “Tang Ualasilr! Inggeim mi ate, ingga a uauamana tun, ingga ahik paho sokoro me tamat, karo guata tar siokonar niguata tasir tamata uakapa tun, gisisir tohangas ue ahik paho tohangas. Doh nang niualasira e la tunig tena hagar God. Doh ingga o hire baka tamiueim, a kodkodohompeono tar heir tar takis tar gavamaning Roum ue a sa? <sup>15</sup> Inggeim paking bulaua tar takis ue ahik?” Bo Iesu puk ke ate torosio tang kokoposin, kare kula pare, “Maiene rung marang tut louruioum tenami puhung dangatang uedang? Mu ualasira totoguo me siokor maning Roum maru hireo tamiuoum.” <sup>16</sup> Gine ka me heir pesina tar mani, inggono ke dangata pare, “O luna mai rone ka uanasalain, kara hangana mai?”

Kara kulasina pare, “Sisa.”

<sup>17</sup> Kere hire poluk Iesu tasisina pare, “Heirimpe tang Sisar tar inete ger nang Sisar. Bor mamang inetelik ger nang God paka heirimpeig tang God.” Doh gisina ka lutarantiehe tun ke mene hahaua peon.

### O Sadiusi ka dangata tang Iesu tar nitua tapokis

<sup>18</sup> Song ka la kalehemer Sadusi, gisin o toto tamatang Ju gera kula pare, ahik me tua tapokis tar binakang mat. Gisina ka dangata pare, <sup>19</sup> “Tang Ualasilr! Moses ke bolo toro uelhire sioun pare, Geta tamata ke mata liu tena kuah, bo ahik puk me tun, tahinon e turung le kalehe tar kuahono mare uakotpokoso me tuna tahinetie ke mat. <sup>20</sup> Auia, o mouitir mamahialik. Gitir uoum ke le, kare mata liu tar kuah, doh ahik me tun. <sup>21</sup> Maeit gitir uakeluk tatanono ke le kalehe tanoneitir kuaha kamob, doh ahik paha puhung barah, kare mata ponono, doh inggon ahik pono pah ke uakotpokoso baka me keketik. <sup>22</sup> Doh gisina ro mamahialik uakapa ka siokor le kompe tar tang sioko komper kuahon, bo ahik puk me keketik. Doh gitir kuaha ke la mata pon. <sup>23</sup> Doh hapengua geta tua tapokisir tamat, maingua na turung kuaha tatanonor kuah, ge gisina per mouitir mamahialik ka siokor le tatanon?”

° 12.13 Luk 11.53-54    P 12.17 Roum 13.7    q 12.18 Apo 23.8    r 12.19 Ual 25.5

<sup>24</sup>Doh Iesu ke hire tasisinar Sadusi pare, “A niduh re moko tamiuom, teeit inggoum mu tele tono uelhire God, karung tele pono tena nitampopokohon. <sup>25</sup>Ge tar binaka pe ra tua tapokisir tamat, gisin ahik paho le. Gisina ra turung ngohina tasir anggeloung Heuen. <sup>26</sup>Bo tar nitua tapokis, inggoum halanampe tung timana tagu tena nibolobolo Moses toro ueluatatina ro douk geko luh? Ke la bakar puhung barah ke mata baka pe Abraham, Aisak doh Jakob, God ke kula pare tang Moses, Inggona tena God Abraham, na God Aisak, doh na God Jakob. <sup>27</sup>Maeit inggono tenas Godomper tua, doh ahik pah nas Godor tamata gesir mat. Inggoum mu uatoboul katongo kompesioum!”

### Hingiar ualatutur nang God ro uleikintieh

<sup>28</sup>‘A tang siokor tamatang ualualasira tar ualatutur tar lotu e tur pon, kare ualualongoro tar ueluelmener nasir Sadusi mes Iesu. Inggono ke ate pare, Iesu ke mene hahaua uaia, maeit ke dangata pare, “Hingia no ualatoho God ro uleikintiehe tar giniameh?”

<sup>29</sup>Kare mene hahaua Iesu tatanono pare, “O uleikintiehe ro ualatoh te rone,

‘Inggoumur Israel mu ualongoro uaia,  
a Tamata Noman ge nagi Godeig ter tang sioko puk manasar  
Tamata Noman.

<sup>30</sup>Inggoum pakung malaelhir keip tatanonor Tamata Noman ge nagi Godeig tar balamiu uakapa tun menia tar iabemiu uakapa tun, doh teremi ninamana uakapa tun, kare teremi nitampopokoho uakapa tun.’ *Ualatut 6.4-5*

<sup>31</sup>Doh o uatorikina no ualatoho God gero uleikintiehe te rone,  
‘Inggoum pakung malaelhir toso uonotomiu,  
ngohina rung malaelhir katongo pesioum.’

*Nas Kalekinaler Pater 19.18*

Ahik baka poluk mo ualotoh ro uleikintiehe toro torik ro uelhire rasine.”

<sup>32</sup>Doh gitir tamatang ualualasira tar ualatut ke hire tapokis tang Iesu pare, “Tang Ualafir, ingga ko mene uaia tun. Ingga ko mene tun toro man, ko kula pe pare a tang sioko puk manasamper God, kara hik baka poluk me tang giomeh. <sup>33</sup>“Doh inggo u ate, inggon a inete uleik tun tar malara keip tang God toro baloug uakapa tun, doh reg ninamana keip pon, kare tereg nitampopokoh, karu malara pono toso uanotoug ngohina ru malara katongo peio. Gininonine ter inete uleikintiehe poluk geta uahunginir uahung nialuh tar uakeluh tar ualatut.”

° 12.26 KT 3.2,6    † 12.28 Luk 10.25-28    ¨ 12.33 1Sa 15.22; Hos 6.6

<sup>34</sup>Gine ke ate pe Iesu tar tamatono pare, a tamatang ate, Iesu ke kulangua tatanono pare, “Ingga ahik paho uairehe tena Nitoia God.”

Dohi muduhia, ahik baka poluk me tamata ke marang dangata poluk me puhung dangat.

### **Iesu ke dangata tasisina tar tamata geke kedangain God**

<sup>35</sup>I muduhia gine ke menmene ualasira to pe Iesu iuma tar umang lotu ger dedeil, Inggonono ke dangata tasisina pare, “Ae maene ra kular tamatang ualualasira tar ualututung tar lotu pare, tang Kristo a tuna Debit? <sup>36</sup>Ge Debit katongo pe, ke mene keip tena nitampopokohor Iabena Dedeil, kare kula pare,

‘A Tamata Noman ke kula tenag Tamata Nomanono pare,

O tabilane tar pang makoso totoguo

e tuka getu uamoko bako tosnongo uelmatania i kukulebanga tar kekeimua.’ *Ker 110.1*

<sup>37</sup>Gine ke kilo katongo pe Debit tatanono pare, ‘A Tamata Noman,’ hape maene a tuna inggono tatanon?”

Doh gisitir manai tamata ra siokor marang ualongoro uaia tun tatanon.

### **O tamatang ualualasira tar ualutut ra uoto guata uasa**

<sup>38</sup>Doh ginine ter giniamer inete ke mene ualasingiragono tasisina tar binakon. “Tagin teil tasisitir tamatang ualualasira tar ualututung tar lotu! Ge gisina pe ra uoto uaha tun tar latlateil keip tenas hikhiku barah, kara malahir tasir mamang tamatalik ra heir tasisina tar niueltadane tar buturung uabulbulau. <sup>39</sup>Doh gisina ra marang tabila tar tabtabilinitir uleik i uoumuhia tar umang lotu, doh tenas tabtabilar mahohane tar niein uleik. <sup>40</sup>Doh gisina ra tutlour, kara uenaua tenas ineter kuaha nimate liu, kara kokop tane tenas niguata uasa ra kotouo pe tar lotu barahane tar matasir manai. Temaene tar binaka ra kedangaisir tamat, gisinar tamatasine ra turung kale tar uleikintieher uelmahing.”

### **A mani ke heirigir kuaha nimate liu**

<sup>41</sup>Iesu ke la tabila uahuhut tar buturung baka maniane iuma tar umang lotu ger uleik, kare bangahe tasir manai tamata ra me uamoko pe tenas mani tar bokis. Doho bureher tang mani ka me uamoko tar burehentieher mani. <sup>42</sup>Doha tang siokor kuaha tiome, a nimate liu, ke me uamoko pono tar toking mani e matoto tar 2 toia. <sup>43</sup><sup>v</sup>Doh Iesu ke kilame tosono tamatang uakuakeluk, kare hire tasisina pare, “Inggo u uamana tun tamiuoum, gitir kuaha tiome a nimate liu, inggono teke uamoko uaburehentiehe tasir gisiomehe uakapa geka uamoko uoum. <sup>44</sup>Ge gisina

<sup>v</sup> 12.43 2Ko 8.12



pe o tang mani, kara heir puk tar giniamah, kare mokompe nas mani, bo giner kuaha kamob, inggono ke siokor heir tun tar hauar nan, doh ahik baka poluk mena mani ke la mok.”

### Iesu ke hire tar umang lotu ger dedeil e turung tadur

**13** <sup>1</sup>Gine re lang hiliu manasa pe Iesu tar umang lotu ger dedeil tar binakon, na tang siokor tamatang uakuakelukono ke me kula pare, “Tang Ualafir o banga tar uma uleikinitie a mataia tun! Banga pono tar palaua uleikinitie tar pador!”

<sup>2</sup>“Kare kula Iesu tatanono pare, “O uma mataianinanine ra turung dura uahiuoig, doh ahik mo siokoro palaua ro turung toka uaponola mo giameh.”

### Iesu ke hire tar bureher niduh e turung pokos

<sup>3</sup>I muduhia Iesu ke la tabila tar hiihuonar tar Siusanang Oliv tar paina re latur pemer malatahana tar umang lotu ger dedeil. Doh Pita, Jems, Jon, doh Andru ka la uanomo me tatanon, kara me dangata pare, <sup>4</sup>“Mangiha tun re la turung pokosor puhunin? Doh kaempeig me uaparok i uoumuhia tar ualafira tamiueim, mangiha re la turung kotpokosor inetenine pare, o man?”

<sup>5</sup>Doh Iesu ke hire tasisina pare, “Ahik pah mu uamaluana me tamat e keip uaheil teremi ninamanoum, <sup>6</sup>ge o burehe per tamata ra turung lame, ra la keip teil tar hangoguo, gisina ra me hire pare, tesir Kristo, kara turung uelour tasir bureher tamat. <sup>7</sup>Doh tar binaka rung longoroum me uiliatung ue me uelhireng uiliatung, inggoum ahik pah mu por, ginin e turung kotpokoso bakampe, bor binaka puk re turung kapar mamang inetelik ahik dedempe pahe uolong kotokos. <sup>8</sup>Doho pang uan ra turung uiliatung tar giameher pang uan, doho nitoia ra turung uiliatunge keipis me ro giniameh ro nitoia. Doho nun e turung nun, kare kotpokosor gogo uleik e turung pokoso toro giniamehero uan. Bo ginino pukunine tere ualafira tar inete ualafokoro gere turung kotpokos.”

<sup>9</sup>“Bo tar binaka puk re turung uakekenar inetenino tar kotpokos, inggoumu tagin teil! Inggoum ra turung heirilasioum tar buturung kedang, kara la halhaluh tosioum tar umang lotu. Inggoum ra turung tohotolasioum i uoum tasir tamata uleik mesir toia, teeit inggoum kung uakuakeluk totoguo. Doh inggono tenami turung binaka uaiaoum tar uelhire tauete tar hangoguo. <sup>10</sup>Doho Uelhire Uaia roono ra uelhire uatauete baka uoumin toro mamang uanilikane i kot. <sup>11</sup>”Doh tar binakon inggoum ra turung kusesioum, kara keipisoum tar uelkodoh, inggoum ahik pah mu namanantiehe baka uoum tar haua rung uelpouhin. Mu hire

<sup>w</sup> 13.2 Luk 19.44    <sup>x</sup> 13.9 Mat 10.17-20    <sup>y</sup> 13.11 Luk 12.11-12

puk toro uelhire gere heirin God tamiuoum tar binakoneit. Doh inggoum ahik pah terung turung men, bo a Iabena Dedeil tere turung men.”

<sup>12 z</sup>“Doha tamat e turung heir katongompe tang tahina mara tung poustin, doho tamasir keketik ra turung guata sira ponomnpe toso tus tar siokonar niguat. Doho keketik ra turung nimaliana katongo toso tinas, kara turung heiris mara tung poustis. <sup>13 a</sup>“Doho tamata uakapa ra turung tokouasais tamiuoum, teene rung uakeluk peoum totoguo. Bo mais ra tur uapopokoh e tuka tar uadouhinar marein, gisina tere turung uelkarusais God.”

### A inete uasa tun e turung kotpokos

<sup>14 b</sup>Iesu ke kula ualatuman poluk pare, “Mai re timana toro uelhire rone, inggon e namana uaia bak. Inggoum mu turung banga tar inete uasa tun, inggon e turung tur tar butur san. Doh tar binakon, mais gera uangoul i Judia, gisina paka ualo liu taro i rana toro siusan. <sup>15 c</sup>Doh me tamata gere uangoul i kalahara tena um, inggono paka hik pahe leke tapokis iuma tena uma tar la kaleuatoro baka mena inet. <sup>16</sup>Doh me tamata gere uangoul tena iom, inggon ahik baka poluk pahe la tapokis mare la kale baka tono hikhiku. <sup>17 d</sup>Doh kuasalik tun ro kuaha gesir balakos, kare gisis ra uahuh tasir guam tar binakonene! <sup>18</sup>Inggoum pakung lotu tang God mara hikir inetenine pahe kotpokoso to tar binakang malahong, <sup>19 e</sup>ge a binaka penin, e turung kotpokosor niduh uleik tun ge ahik pahe uelmatout keip me niduh geke pokoso bakaoum, e uakikilanga tur ke uatouo pe God tar mamang inetelik e me tukene daan. Dohi muduhia, ahik me niduh sira paar re turung kotpokoso poluk. <sup>20</sup>Toro mana tun, geta hikir Tamata Noman pahe uapouhina tar binakanin, o tamata uakapa ra turung siokor mamantouois. Bo inggono e namanantiehe tun tasir tamata geke kedangasiono sioun, temaene re turung uapuhinono tar binakanin.”

<sup>21</sup>Doh tar binakanin gete me tang siokor tamata re hire tamiuoum pare, ‘Bangane, gine te Kristo!’ Ue e hire pare, ‘Teono gila!’ Ahik pah mu tagorong mana tatanon. <sup>22 f</sup>Ter hauon, o Kristo bohoboh, doho propet bohobocho pono ra turung kotpokos. Doh gisina ra turung guata tar niuaparoko uleik, doha ineteng ualutara uleik geta banotosina mara uelourisir tamata geke kedangais God sioun. <sup>23</sup>Mu tagin teil! Ge inggo pe ku hire baka uoumumpe tamiuoum tar mamang inetelik re turung kotpokos.”

<sup>z</sup> 13.12 Mat 10.21    <sup>a</sup> 13.13 Mat 10.22; Jon 15.21    <sup>b</sup> 13.14 Dan 9.27; 11.31; 12.11

<sup>c</sup> 13.15 Luk 17.31    <sup>d</sup> 13.17 Luk 23.29    <sup>e</sup> 13.19 Dan 12.1; UGO 7.14    <sup>f</sup> 13.22 UGO 13.13

### I muduhia e turung tapokis polukuhar Tunar Tamat

<sup>24</sup> Doh Iesu ke kula poluk pare, “Dohi muduhia tar binaka uasaninanine,

‘a pisar e turung kitup,  
doha bialok ahik pahe pid,

<sup>25</sup> doho pitopit ra turung punga turuha i ran  
doha nitampopokoh i ran ra turung uagunain.’

*Aisaia 13.10; 34.4; Joel 2.10,31; 3.15*

<sup>26</sup> <sup>h</sup> Doh tar binakonene, o tamata uakapa ra turung banga tar Tunar Tamata gete laha i lolono tar mahar langit menia tena nitampopokoh a uleikintiehe, doh tar luhluhunon a mataia tun.”

<sup>27</sup> <sup>i</sup> “Doh inggon e turung ualatue tesno anggelo mara la ur toto uakapa tesno tamatono geke kedangais God sioun, ra kale turis toro mamang buturulikane tar uara surunar koto uakap, dohi ran.”

### Iesu ke uelhire uaranga toro douk ra kilain o fig

<sup>28</sup> Kare hire poluk Iesu tasisina pare, “O douk, ra kilain o fig, o ualasira tamiuoum pare, tar binaka re timuhur ranana roon, kare uakoupur kamanan, inggoum mu ate manas, na binakar pisar e uahuhutung kotpokos. <sup>29</sup> Doha siokono pukompe tar binaka rung bangoum tar inetenine ku menegio, inggoum mu banotong ate manasa tar Tunar Tamata ke uahuhutin tar pokosane toro pirik. <sup>30</sup> Doh inggo u uamana tun tamiuoum pare, o babeir tamatang daan ahik pah ra turung mata uakap e tuka tar binaka re kotpokosor mamang inetelikinine. <sup>31</sup> I rana dohi kot ura turung rou, bo nogo uelhireo ahik paho turung kapa tagu.”

### Mangiha re kotpokosor ineteninonine

<sup>32</sup> Kare hire poluk Iesu tasisina pare, “Ahik me tamata re ate tar binaka re kotpokosor ineteninonine, doho anggelou i ran ahik pono pah ra ate, doha Tunon ahik pon, bo te Tamana manasampeono tere ate. <sup>33</sup> Mu tagin teil! Karung uakeis uanon. Ter hauon inggoum mu telengua mangiha re kotpokosor binakon. <sup>34</sup> Inggon e turung baka sira tar tamata geke la tar laer kare hiliu tena um, inggon e ualatoho baka tesno tamatang kalekinale. Doh inggon e heir baka tenas kalekinale kahakasin, song re hire bakono tar tamata gere kaueke toro pirik, Bangbanga uakeis tagin dedempe gete pokosomeon! <sup>35</sup> <sup>j</sup> Temaeit inggoum mu bangbanga tagin, ge inggoum pe mu turung tele pono mangiha re tapokisime tanener um. Inggono here tapokisime tar reiu ue tar uantinaninar boung ue tar

§ 13.24-25 UGO 6.12-13    <sup>h</sup> 13.26 UGO 1.7    <sup>i</sup> 13.27 Mat 13.41    <sup>j</sup> 13.35 Luk 12.38

binaka ra kororor paol ue tar liliuolik. <sup>36</sup>Bo inggon e turung santiehe getung uamaluanoom e me ueltuparono mu hohouooum <sup>37</sup>A haua ru hireio tamiuoum, inggo u hire pono tasir tamata uakapa tun pare, Mu bangbanga uakeis tagin!”

### O mamahoholik ka uelhote tar tung pous tang Iesu

**14** <sup>1</sup>Doha torik manasar marein rasit ura mok, kare pokoso manasa nas marein uleikir Ju gera kilain, “Leka Liu ro Mat,”<sup>k</sup> doho niein gera kilain, “O Bereit Ahik me Is.” Doh gisitir patere uleik mesir tamatang ualualasira tar ualatut, ka sir me hagar mara kusa uanomo toin Iesu, kara uiliatung pous tatanon. <sup>2</sup>Bo gisina puk ka ueluelkule pare, ahik pah ra guata to me mareinane toro niein uleik, geta uakotpokososina me uelkoi tasir manai, kara mamantouongua tar uan.

<sup>3</sup>Doh tar binaka re uangoul Iesu i Betani, inggon e uangoul tena uma Simon ger toubas sioun. Doh tar binaka re tabilang ein Iesu ium, a kuaha ke lame, e kale teil tar amiamuh a nihedongo tola tar nouh mataia, ginin a i ranantieher bulauan. Doh gitir kuaha ke katego liu tar matanar nouh, kare pikir toro luna Iesu. <sup>4</sup>Doho gisiomehe gera uangoulane ka bang, kara nimalian, kara ueldangata katongois pare, “Ae maene ke dingdinging mamantouo pukuono tar amiamuh pare? <sup>5</sup>A amiamuh dehon e banoto ra uabulauain tar 300 kina, kara heirin tasir tiome.” Doh gisina ka uelkukur tar kuahon.

<sup>6</sup>Bo Iesu ke hire tasisina pare, Uamaluana tatanon. “Ae maene rung uelkukuroum tatanon? Inggono ke guata uaia tun tar inet a mataia totoguo. <sup>7</sup>”O tiome ra turung uangoul tagu dedempe tamiuoum, doh inggoum mu turung poulumpe tasisina me binaka gerung malar. Bo inggo ahik pahu turung uangoul tagu dede tamiuoum. <sup>8</sup>”A kuahene ke guata manasampe tar inete ke banotoin e guat. Inggono ke dingila tar amiamuh toro luguo tar kale uatoro tanika totoguo i uoumuhia tenag binako geta keuio. <sup>9</sup>Inggono u uamana tun tamiuoum pare, ia me buturane tar koto ra uelhire tauetein ro Uelhire Uaia, a inete ke guataiono ra uelhire tauete ponoin tar namana huara tapokis tar kuahene.”

### Judas e tangana tang Iesu tasir patere uleik

<sup>10</sup>Judas Iskariot ger tang sioko tasir siokor hangaul doha tang torikir tamatang uakuakeluk, song ke hiliu tasisin. Doh inggono ke langua tasir patere uleik, kare la tangana tang Iesu tasisin. <sup>11</sup>Doh tar binaka ka longorosinar patere uleik tatanon, gisina ka uahantieh, kara uelhotengua

<sup>k</sup> 14.1 O niein uleik o nasir Ju ra kilain, Leke Liu ro Mat. Uanamana huara dede tar binaka toro mat o uleik ko leka liu tasir Ju i Isip. O Ju ra kialin, A Pasova. Bang toro Bolobolong Kale Tapokis Mahar 12. <sup>1</sup> 14.3 Luk 7.37-38 <sup>m</sup> 14.7 Ual 15.11 <sup>n</sup> 14.8 Jon 19.40

pare, ra turung heir me mani tatanon. Te maene Judas e sirsir me binaka re banotong heir tang Iesu tasisin.

### No niein uleikir Tamata Noman

<sup>12</sup> Tar uakikilanganar marein toro niein uleik ra kilain, “O Bereit Ahik me Is,” ter mareiniono ra tung pous tosina tasir tunar sipsip ra einis toro niein uleik rone, ra kilain, “Leke Liu ro Mat,” gisinar tamatang uakuakeluk tang Iesu ka lame tatanon, kara dangata pare, “Ia ro malara mi la kaleuatoreim toro nieining Leke Liu ro Mat?”

<sup>13</sup> Song ke ualatue Iesu tena toking tamatang uakuakeluk, kare hire tasrasina pare, “Raoum mura la tar uan uleik. Doha bulout gere huata teil tar nouhung kodom, inggon e turung tupara tamiraoum, doh raoum mura uakeluk tatanon. <sup>14</sup> Doh hingiar uma re la lekaion, raoum mura dangata tang tanener um pare, ‘A Tang Ualasis e kula pare, Ia re moko me tina umang ein ru banotong ein to taguo mesnogo tamatang uakuakeluk tar nieining Leke Liu ro Mat?’ <sup>15</sup> Doh gitir tanener um e turung uamakoso tamiraoum tar tina uma uleik i ran gere moko ro teboul, doho tabtabil doho ineteng ein, te mura kaleuatoro to raoum teregi einieg.

<sup>16</sup> Maeit rasinar toking tamatang uakuakeluk kura haijala, kaura la tuparangua tar mamang inetelik ke hireigiono Iesu tasrasin, song kura kaleuatorongua tar niein.

<sup>17</sup> Gitie ke reiu manasa peon, Iesu ke la pokoso mesno siokor hangaul, doha tang torikir tamatang uakuakeluk tar um. <sup>18</sup> Doh gitie ra ein tabila pesin, kare kula Iesu pare, “Inggo u hire tun toro man, a tang sioko tamiuomene rung ein tagu totoguo e turung tangana totoguo tasir uelmatan.”

<sup>19</sup> Doh gisina ka hagouo uaduh, kara dangdangata tang sisioskosina tang Iesu pare, “Inggo ahik, bidouh?”

<sup>20</sup> Doh Iesu ke hire tapokis pare, “Inggon a tang sioko tamiuomener siokor hangaul, doha tang torik. Inggono ter tang sioko geke ein tagu totoguoene daan. <sup>21</sup> A Tunar Tamat e turung la puk ngohina pare, ka bolo pein sioun. Bo a nisa puk e la tar tamatono re turung tangana tar Tunar Tamat. Auiantiehe tar tamatono ge paka hik paha nipoh.”

<sup>22</sup> Doh tar binakene ra einisin, Iesu ke kale toro bereit, kare kulang uauia tun tar hangana God, kare pakaha toro bereit, kare heiringua tosono aposoul, kare kula pare, “Kale taninin, gininanine ter tukunuguo.”

<sup>23</sup> Song ke kale polukuono tar kap bino, kare kulang uauia poluk tar hangana God, kare heir tar kap tasisin, kara inum tang sisioskosin. <sup>24</sup> Doh Iesu ke hire pare, “Gininanine ter deuatingiguo, a deuatingin

---

° 14.12 KT 12.6    P 14.18 Ker 41.9    ° 14.24 KT 24.8; Jer 31.31-34; Sek 9.11; 1Ko 10.16; Hib 9.20

tar uelhote gera ding ueleheirin tasir bureher tamat. <sup>25</sup>Doh inggo u uamana tamiuoum pare, Inggo ahik pahu turung inum baka poluk me kukuananar bino e tuka tar marein ru turung inum to inggo tar timuhur bino tena Nitoia God.” <sup>26</sup>Maeit gisina ka kere manasa toro kereker, song ka la taro i rana tar Siusanang Oliv.

### Iesu ke hire tang Pita e turung uolih

<sup>27</sup>Doh Iesu ke hire tasisina pare, “Inggoum uakapa tun mu turung tagorong boho totoguo, karung turung ualo liu. Ter hauon no uelhire God ko kula pare,

‘Inggo u turung haluh tar tamatang kaukaueke tasir sipsip,  
kara turung ualo liu ueltebeiringuar sipsip.’

*Sekaraia 13.7*

<sup>28</sup>‘Bo tar binaka puk ru tua tapokisio, inggo u turung la uoum tamiuoum i Galili.’

<sup>29</sup>Kare hire tauete Pita pare, “Geta tagorong boho uakapasina totomua, kara hiliu, bo inggo ahik pahu turung hiliu tagu totomua.”

<sup>30</sup>Kare mene hahaua Iesu tatanono pare, “Inggo u uamana totomua, daana tar boung tar binaka halanar paolo te kororo uatorik, ingga o turung uolih uatouono pare, o tele totoguo.”

<sup>31</sup>‘Doh Pita ke mene tapokis uapopokoho tun pare, “Gitiempe ge paku mata taguo totomua, inggo ahik nomana pahu banot u uolih pare, u tele totomua.” Doho gisiomehe ke siokona uakapa pono nas uelhire.

### Iesu ke lotu to i Getsemani

<sup>32</sup>‘Song ka lasina tar butur ra kilain i Getsemani, kare hireono Iesu tesno tamatang uakuakeluk pare, “Mu tabila uangoulane. Inggo u la lotu baka tang God.” <sup>33</sup>Kare kalenguaono tas Pita mes Jems, doh Jon, kara siokor la. Doh Inggono ke kanuhuntiehe tun, kare duhuntiehe tun ponor tukunun. <sup>34</sup>‘Kare hireono tasisina pare, “O balougou o duhuntiehe tun, u hagouo sira pare, u uahuhutung mat. Mu uangoulane, karung kaueke uelkout.”

<sup>35</sup>Doh inggono ke hiliu uairehe sikoro tasisina tar sikin, kare la bake uahiuainane i kot, kare dangata tang God, ge pare banotor binakang uelmahing e leke liu tatanon. <sup>36</sup>‘Kare kula poluk pare, “Papa! Tamoug! Ahik me inete ro uaparakukuhua. O kale liu tar kapang uelmahingene totoguo, bo ahik puk paho uakeluk tereg nimalaro, bo reng nimalarampe.”

<sup>37</sup>Song ke tapokisimeono tasir tang touon, kare me ueltupara tasisina ra hohouo pe. Kare kulono tang Pita pare, “Saimon, ingga o hohouo?

<sup>r</sup> 14.28 Mat 28.16; Mak 16.7    <sup>s</sup> 14.31 Jon 11.16    <sup>t</sup> 14.32 Jon 18.1    <sup>u</sup> 14.34 Jon 12.27

<sup>v</sup> 14.36 Mak 10.38; Jon 6.38

Ingga ahik paho banot o gulete baka me siokor aua, karo kauেকে baka? <sup>38</sup>O kauেকে dede, karo lotu tang God mara hikia paho punga tar niuedang. A iabener tamat e malar, bo a tukununono tere malmaluan.”

<sup>39</sup>Maeit Iesu ke hiliu poluk, kare la lotu poluk tang God ngohina sira kompe ke lotu baka uoum pe. <sup>40</sup>Doh tar binaka ke tapokisimeono tasir tang touon, inggono ke me tupara polukumpe tasisina ra hohou. Teene gisina ka matahohouontiehe tun. Tar binaka ke me ualagura Iesu tasisin, gisina ra tele hape ra mene hahaua pe tatanon.

<sup>41</sup>Inggono ke tapokisime tasisina tar uatouononar binak, kare me kula pare, “Inggoum mu hohouo harah, karung pepe uah? Ke banoto manas! A binaka ke pokoso manasene daan. Bang! A Tunar Tamata ka tangana manasain tasir tamata uasa. <sup>42</sup>Tur! Ti la manas. Bang! Gitie re lame ter tamata ke tangana totoguo!”

### Judas ke tangana tang Iesu tasir tamata uasa

<sup>43</sup>Doh tar binakonene Iesu e menmene harah, Judas ter tang siok tasir siokor hangaul doha tang torik, ke pokoso keipime tasir manai tamata gera keip teil tar baenat, doha pus. Doh gisina teka ualatueisir patere uleik, doho tamatang ualatur, doho mamahoholik. <sup>44</sup>Doh Judas ger tang tanganalik ke heir baka tasisina tar uelhire pare, “Hingiar tamata ru nguhuiu, inggono teon. Inggoum mu kusa uanono tatanon, kurung reih liu, doh mu tur ngungut uaia tun tatanon.”

<sup>45</sup>Doh ahik me manasan, kare pokoso Judasane tang Iesu, kare me kula pare, “Tang Ualasisr! Kare nguhunguaono tatanon.” <sup>46</sup>Maeit gisinar manai ka bang, kara la kusa tang Iesu, kara kusa uanono tatanon. <sup>47</sup>Doha tang sioko gere tur tagu, ke keip tantane tono baenat, kare tokout liu tar talinganar tamatang kalekinale tar tamata uleiking tasir pater.

<sup>48</sup>Doh Iesu ke dangata pare tasisin, “Inggoum kung la keipime tar baenat mer pus tar me kusa totoguo ngohina tar tamatetier ueuenau, kara tang uiliatung? <sup>49</sup>”A mamang mareinilik inggo ku uangoul tagu tamiuoum tar umang lotu ger dedeil, karu ualasisra tasir tamat, doh ahikioum pah kung marang kusa sikoro totoguo. Bo auia mare la siokono sirar puhiono tono uelhire God ko hire pe, hape re turung kotpokoso per mamang inetelik toro man.”

<sup>50</sup>”Doh gisis no tamatang uakuakeluk Iesu ka hiliu manasa tatanon, kara ualo liuinguampe.

<sup>51</sup>Doha tang siokor mamanailik e loho teil tono gomono gaugauil, ke uakelukume tang Iesu ka kusa tanein, <sup>52</sup>bo ke ualo liu tono gomon, kare ualo palapal.

### Iesu ke la tur i uoum tar matasir kaunsil

<sup>53</sup>Maeit gisina ka keipila tang Iesu tar tamata uleiking tasir pater. Doh gisis ponor patere uleik, doho mamahoholik, doho tamatang ualualasisra

---

<sup>w</sup> 14.49 Luk 19.47; 21.37; Jon 18.20    <sup>x</sup> 14.50 Ker 31.11

tar ualatut ka la uelpokos pon iuma tar kaunsil. <sup>54</sup>Doh Pita ke lala uakeluk sikorompe, bo e uarehe sikoro puk tang Iesu, kare la leke tagu tena uan nas uleikir pater, kare la tabila tagu i morene tasir tamatang kalekinale, kare la mahirum tagu toro hue.

<sup>55</sup>Doho patere uleik, doho kaunsil uakapa ka sirsir me tamata tar tohotola tang Iesu me puh mara banotong tung pous tatanon, bo ahik puk pah ka tupara me inet. <sup>56</sup>O bureher tamata ka bohoboho tolaane tar kaunsil tang Iesu, bo nas uelhire pukusin a kahakah, ahik paha siokon. <sup>57</sup>Doho gisiamhe ka tur, kara boho uapoul polukula tasir kaunsil tang Iesu, kara hire pare, <sup>58</sup>“Inggeim king longoro tatanono ke hire pare, ‘Inggo u turung dura liu tar umang lotu ger dedeilene ka tuhainir tamat. Dohi muduhia tar touonor marein u turung tuha tar giameh ahik paho tamata ra tuh.’” <sup>59</sup>Bo nas puhung menesin ahik pono pahe uelmatout.

<sup>60</sup>Doh nas uleikir patere ke tur kai i uoum tasisin, kare dangata tang Iesu pare, “Ingga ahik me puhung hahau tar uelhireinine ra tohotolaig totomua?”

<sup>61</sup>Doh Iesu e tur boulungur pukumpe, ahik pahe mene hahau. Doh nas uleikir patere ke dangata poluk tatanono pare, “Ingga ter Kristo a Tuna Godenah i ran?”

<sup>62</sup>Kare hire hahaua Iesu tatanono pare, “Aa, te inggo! Doh inggoum mu turung banga pono tar Tunar Tamat e tabila tar pang mua tang God ger tampopokoho tun, kare turung la uaponaha toro mahar langiting Heuen.”

<sup>63</sup>Doh git nas uleikir patere ke nimaliana uasa tun, kare kih katongo tonu hikhiku, kare kula pare, “Ae maene ri marang longoro baka polukueig mo giamehe ro uelhire? <sup>64</sup>“Gine kung longoro manasampeoum tena uelhire uasaono tang God. A hau rung namanaioum? A hau ri guataieig tatanon?” Doh gisisir kaunsil uakapa tun ka siokor hire pare, “Inggono dehe ra tung pousin.”

<sup>65</sup>Doh gisitir gisiomehe ka la uakekena manasa tar loulou tatanon, kara rokos tane tar matanon, kara posposarain, kara nunin. Doh gisina ka kula pare, “Paparok! Maingua ke nun totomua?” Doho tamatang tur kaueke ka kale tatanon, kara posposar.

### Pita ke uolih e tele tang Iesu

<sup>66</sup>Pita e uangoulumpeane i kot i moren, doha a tang siokor kuaha ge na tang kalekinaler nas uleikir pater, ke lame. <sup>67</sup>Kare me banga tang Pita re mahirum pe toro hue, kare banga sosogoto tatanon, kare kulono tang Pita pare, “Te ingga deh tena ueldokout pono Iesu ger peng Nasaret.” <sup>68</sup>Doh Pita ke uolih pare, “Inggo u tele tunungua a hauoneit ro kulkulaia.” Kare la uain sikoro Pita i morene toro pirikinar uan, kare

† 14.58 Jon 2.19-21    ‡ 14.64 KT 24.16; Jon 19.7



kororo uasiokonguar paolo tar binakon <sup>69</sup>Doh tar binakono ke banga polukur kuahang kalekinale tang Pita, inggono ke hire poluk tasisine ra uangoulusina pare, “A tamatene ter tang sioko pono tasisin.” <sup>70</sup>Bo Pita ke uolih poluk.

Dohi muduhia sikor, gisis ra tur uahuhut tang Pita ka kula pare, “Ingga dehe ter tang sioko pono tasisin, teene ge ingga pe a peng Galili pon.” <sup>71</sup>Doh Pita ke uakekena tar kula uapopokoho tun, ke uolih pe tasisina pare, “Inggo u uamana tun i ran u tele tar tamatonene rung kulkulaioum.”

<sup>72</sup>Doh ahik me sikir manasan, kare kororo uatorikir paol, kare longoro Pita, song ke namana tapokis manasa tena menemene Iesu, ke kula pe pare, “Daana tar boung, tar binaka halanar paolo te kororo uatorik, inggampe ro turung uolih uatouono pare, ‘Inggo u tele tatanon.’” Doh Pita ke mamahanung tar marang kiring, kare kirkiring ualeikintiengua.

### Iesu ka keipilain tang Pailat

**15** <sup>1</sup>Doh naliliuolik tun o patere uleik, o mamahoholik, doho tamatang ualualasira tar ualatut, mesir kaunsil uakapa ka uelhoute manas, kara uih tang Iesu, song ka keip tatanono ka la heir tang Pailat ger gavana. <sup>2</sup>Doh Pailat ke dangata tatanono pare, “Ingga tenas toiar Ju?” Kare mene hahaua Iesu pare, “Aa, te paar, git ro kula pea.”

<sup>3</sup>Doho patere uleik ka siokor tohotonguala tar bureher inete tang Iesu. <sup>4</sup>Kare dangata poluk Pailat tatanono pare, “Ingga ahik paho bonot o mene hahaua tasisin? Ge ingga pe ko longoro manasa tar bureher puh ka tohotohaig totomua?” <sup>5</sup><sup>b</sup>Bo Iesu puk ahik pah ke mene hahaua mo sioko ro uelhirenit ka meneig, doh Pailat ke lutarantiehe tun.

<sup>6</sup>Doh tar mamang krismasilik toro niein uleikeit, nas niguatar Ju pare, Pailat e uatauete tar tang siokor tamatane iuma tar umang uih, bo e uakeluk puk teres nimalalarar Ju, hingiar tamata ra malauehirinisina tere tauet. <sup>7</sup>Doha tang siokor tamat a hangana tang Barabas tere uangoul pono tar umang uih mesir gisiamehe geka uiliatung keip tar gavaman, kara tung pous tasir tamata tar uiliatunguon. <sup>8</sup>O tamata ka me uelpokos, kara dangata tang Pailat tar guata re uoto guatang sioun pe. <sup>9</sup>Doh Pailat ke uelhire hahaua pare tasisin, “Inggoum mu malara totoguo u uatauete ueleheir tamiuoum tenas toiar Ju?” <sup>10</sup>Teene Pailat ke ate manasa pare, gisinar patere uleik ka gehentiehe tang Iesu, temaene ka tanganasina tatanono tang Pailat. <sup>11</sup><sup>c</sup>Bo o patere uleik puk ka uatentur tar balasir manai pare, kara kila ualeik tang Pailat mare uatauete ueleheir tang Barabas tasisin. <sup>12</sup>Kare dangata poluk Pailat tasisina pare, “Bo ahaua paku guataio tar tamatene rung kilaoum nas toiar Ju?”

<sup>a</sup> 15.1 Luk 22.66   <sup>b</sup> 15.5 Ais 53.7; Mak 14.61   <sup>c</sup> 15.11 Apo 3.13-14

<sup>13</sup>Doh gisina ka kula ualeik poluk taro tatanono pare, “Tina tatanono tar korose!”

<sup>14</sup>Kare dangata poluk Pailat tasisina pare, “Ae? A huar niguata uasa ke guataion?”

Bo gisina puk ra kulkula ualeikintiehe tun pare, “Tina tatanono tar korose!”

<sup>15</sup>Doh Pailat e marang uauaha pono tasir manai, temaene ke uatauete ueleheiriono tang Barabas tasisin. Kare tangana tang Iesu tasir soldia ra kalkalopis tatanon, kara la tina tatanono tar korose.

### O tamatang uiliatung ka uauanete tang Iesu

<sup>16</sup>Maeit o tamatang uiliatung ka keip tang Iesu tar buturane i morene tar uma uleik ger nang gavana, kara kilame tasir gisiameher tamatang uiliatung. <sup>17</sup>Doh gisina ka uahiku tang Iesu toro hikhiku o tabeliah, kara tuha toro taku misiana tono takur toia, ka tuhain toro uoho ueluelhung, kara uamokoin toro luna Iesu. <sup>18</sup>Gisina ka uakekena tar kula tatanono pare, “Auia tun, aliuo tun! Nas toiar Ju!” <sup>19</sup>Gisina ka guata uaburehe paar, song ka halhaluh toro lunono tar puhung pata, kara loulou ponoin, kara hatup uahiu i kot, kara dumdumata uapoul pon tatanon. <sup>20</sup>Doh tar binakene ka la uakapa manasa pesina tar uauanet, song ka kale liuisina toro hikhiku rone ro tabeliah, kara uahiku poluk toro nanon, song ka keipin i kalahara mara la tinasina tatanono tar korose.

### Iesu ka tinain tar korose

<sup>21</sup><sup>d</sup>Gisina ka la ueltuparangua tar tang siokor tamata ke la uelsiaue to tasisinane i kalahara tasisin, inggon a hangana tang Saimon ger peng Sairin. Doho tamatang uiliatung ka petutupe tatanon, ke huata tena korose Iesu. Inggono Saimon tera tamas Alesander me Rufus, doho soldia ka kula tutupe tatanono tar huata tena korose Iesu. <sup>22</sup>Gisina ka keip manasako tang Iesu tar butur ra kilain i Golgota, a tengkanar hanganar buturuono ra kilain, na butur ro lakok. <sup>23</sup>Doh gisina ka marang heir tang Iesu tar bino a nihouara tar marasin ra kilain, a mur, bo inggono puk ke de, ahik mete inum <sup>24</sup><sup>e</sup>Song ka tinasina tatanono tar korose, kara ueluelpeikie tena gomomono tar pilai laki mara ate hingia ro mahar gomono ro la tang mai.

<sup>25</sup>Inggona 9 kiloko naliuoene ka tine taneiono tar korose. <sup>26</sup>Doh gisina ka bolo tar puhung uelhireng uaate, kara uamokoin i rana tar korose. A puhung uelhireon e kula pare, “Nas toiar Ju.” <sup>27</sup>Doh tar binakono ka tinasina tang Iesu tar korose, gisina ka tina pono tar tang torikir ueuenau, a tang sioko tar pang muahia tang Iesu, doha tang giamehe tar

<sup>d</sup> 15.21 Roum 16.13    <sup>e</sup> 15.24 Ker 22.18

pang kais tang Iesu. <sup>28</sup>fDoh no uelhire God ge ka boloin sioun, roon ko pokoso toro man, “Gisina ka kedanga tagu tatanon tasir tamata uasa.” <sup>29</sup>gDoh gisisir tamata gera la siausiauala, ka menmene tenas meneng uelsigala tatanon, kara bilbile tar lus, kara kula pare, “Tieh! Ingga ter tamatang mamantouo tar umang lotu ger dedeil, karo tuha tapokis poluk tar touono pukur marein. <sup>30</sup>O uelkarus katongoia, karo hiua liu tar korose!”

<sup>31</sup>Doho patere uleik mesir tamatang ualualasira tar ualatut ra guata pono tar siokonar niguat, ra ueluanio pe tatanon, kara kula pare, “Inggono ke uelkarus tasir gisiameh, bo ahikiono pehe banot e uelkarus katongoin! <sup>32</sup>Ti uamaluana geri banga bakeig ge pare ter Kristoene, kare nas toiar Israel gete hiua liu turono tar koroseene daan, inggeig song ri tagorong mana tatanon.” Doh rasiner toking tamata geka tine taguis tang Iesu, rasina kura uelsigala pono tatanon.

### Iesu ke mat

<sup>33</sup>Doh nar marein uleik nar 12 kilok, a kitup ke kokop tane tar pang uan uakap, ke la tuka nar 3 kilok nar moloi. <sup>34</sup>hDoh tar binakon, Iesu ke kaling ualeik pare, “Iloi, Iloi lama sabaktani.” A puhung uelhireon e kula pare, “Nagu God, Nagu God, ae maene ko hiliua totoguo?”

<sup>35</sup>O gisiomeher tamatasine ra tur uahuhut ka longor, kara kula pare, “Ualongor! Inggon e kilkila tang Elaija.” <sup>36</sup>iDoha tang siokor tamata ke ualo la, kare la kale tar mahar kekebul, kare uahu tar bino ueltek, kara uamokoin tar puhun douk, kara hue kai taroin tang Iesu mare inum. Doh gitir tamata ke hire pare, “Halan! Ti banga baka gete lame Elaija e me louh uahiu tatanon.”

<sup>37</sup>Doh Iesu ke kaling ualeik, kare mat. <sup>38</sup>Doho mahar gomono uleik gero kus ium tar umang lotu ger dedeil ko takih polaka tur i ran, ko me tuk i kot. <sup>39</sup>Tar binakonene ke mata Iesu, a tang siokor tamata uleik tasir uiluiliatung gere tur i uoumuha tang Iesu, ke longoro tar kaling ualeik, kare banga tatanono ke mata pe, kare kula pare, “O mana tun, inggonene ter tun a God!”

<sup>40</sup>jDoho gisiomeher kuaha gera uangoul pono ka bangbanga tur i reh. A tang sioko tasisin, Maria ger peng Magdala mes nu Maria tinana Jems ger uakeluk, doh Joses, kare Salome. <sup>41</sup>Gisina ro kuahasine teka uakeluk turume tang Iesu i Galili, kara poulpoul pono tatanon. Doho burehempe ro kuaha geka la tur tagume tatanon i Jerusalem, gisina ra uangoul pon.

<sup>f</sup> 15.28 Ais 53.12    <sup>g</sup> 15.29 Ker 22.7; 109.25; Mak 14.58    <sup>h</sup> 15.34 Ker 22.1

<sup>i</sup> 15.36 Ker 69.21    <sup>j</sup> 15.40 Luk 8.2-3

### Iesu ka keuin

<sup>42</sup>A mareinionene ter Mareining Kaleuatoro tar Mareining Pepe Uah,<sup>k</sup> doh inggono ke moloji uakapa manas. <sup>43</sup>Te maeit Josep ger peng Arimatea ke ongol, kare lame tang Pailat, kare me dangat e marang kale tar tukununa Iesu. Inggono Josep a tang siokor tamata uleik pono tar kaunsil, doh ra ueltada ponoin. Doh inggono ter tang sioko re uanguangoul pono tena Nitoia God. <sup>44</sup>Doh Pailat ke lutara ke longoro pe tang Josep pare, ne Iesu ke mata manas, kare kila me tenas tamata uleikir tamatang uiliatung, kare me dangata tatanono pare, “Iesu ke mata nomanampe, ue ahik?” <sup>45</sup>Doh gitir uleiking tasir uiluiliatung ke hire tapokis tatanono pare, “Aa, inggono ke mata dede manas.” Te maeit ke uauia Pailat tang Josep e la kale tar tukununon. <sup>46</sup>I muduhia Josep ke la bulaua toro gomono gaugaul, song ke la louh uahiua tar tukununon, kara gomoin, kara la uamokoin toro lebanga ka kohoinane tar palau. Song ke tula uatagegelelaono Josep toro palaua uelik toro matana ro lebang <sup>47</sup>Doh Maria Makdala me nu Maria tinana Josep kura banga pono tar butur ka uamokoin Iesu.

### Iesu ke tua tapokis

**16** <sup>1</sup>Na reiuinar giameher marein tar binaka re lang kapa manasa per Mareining Pepe Uah,<sup>l</sup> Maria Magdalen, doh Salome, kare Maria ge tinana Jems ka bulaua tar inete amiamuh mara la tunahaig tar tukununa Iesu.

<sup>2</sup>Doh naliliuolik tar uakikilangar marein tar uik,<sup>m</sup> gine re hara pehar pisar, gisina ro kuah ka lala toro lebang. Gisina ka la toro lebangang mat. <sup>3</sup>Gisina ke ueluedangateis pare, “Mai re turung uatagegele liu ueleheir tagigieg toro palaua uleik toro matana ro lebang?” <sup>4</sup>Bo tar binaka puk ka banga kaisin, gisina ka banga manasa toro palau, roon o uleik o niuatagegele liu manasane toro matana ro lebang.

<sup>5</sup>Gine ra leka pelasina toro lebang, gisina ka banga tar tamata kalan e hiku teil tar hikhiku gaugaul, inggon e tabila tar pang muahia. Doh gisina ka lutarantiehe tun. <sup>6</sup>Bo inggono puk ke hire tasisina pare, “Ahik pah mu lutarang sokor! Inggoum mu sir tang Iesu ger peng Nasaret geka tinain tar korose. Inggono deh ka uatua tapokis manasain. Inggon ahik pah kae baka polukinane. Mu bang tar buturene ka uarikinion. <sup>7</sup>Bo inggoum mu la, karung la hire tosno tamatang uakuakelukono menia pono tang Pita pare, inggono ke uoum tamiuoum, ke la uoum i Galili.

<sup>k</sup> 15.42 Tar Mareining Kaleuator tar Mareining Pepe Uah ter Fraide. <sup>l</sup> 16.1 Tar Mareining Pepe Uah ke kapa tar reiu tar 6 kilok. <sup>m</sup> 16.2 Tar mareining uakikilanganar uik ter Sande. <sup>n</sup> 16.7 Mat 26.32; Mak 14.28

Terung la turung banga tooum tatanono ngohina sirampe ke kula pe inggon.”<sup>8</sup> Song ka tauetesis ro kuah, kara ualo liu turane toro lebang, ge gisina pe ka poroporo keip tar nisokoro uleik. Doh gisin ahikinguampe mata hire me tamat, teene gisina ka sokor.

### **Maria ger peng Makdala ke banga tang Iesu**

<sup>9</sup>Doh naliliuolik tar uakikilanganar marein tar uik, i muduhia ke tua tapokis baka pe Iesu, inggono ke kotpokoso uakikilanga tang Maria Magdalen ter kuaha geke geil liu turiono tar mouitir liouana uasa.

<sup>10</sup>Maria ke lame tasir tamata geke uanguangoul tagu sioun tang Iesu, tar binaka ra uangoulung ueldolomosin, kara urung. <sup>11</sup>Doh gine ka longoro pesina tang Maria re hire pe pare, Iesu ke tua tapokis manas, doh inggono ke banga tatanon, bo gisina puk ahikompe mata tagorong mana tatanon.

<sup>12</sup>I muduhia tar puhionene, Iesu ke uagiomehe siokoin, kare kotpokoso poluk tar tang torikir kaluasisina geura lang la i Jerusalem. <sup>13</sup>Doh rasina kura la hire tasir gisiameher tamatang uakuakeluk, bo ahik pukusina pah ka tagorong mana tasrasin.

### **Iesu ke pokoso tasir siokor hangaul, doha tang siok**

<sup>14</sup>Dohi muduhia song ke kotpokoso Iesu tasir siokor hangaul, doha tang sioko tar binaka ra einisin, kare uelkukur tasisin, teene gisina ka tagorong boh, doh ahik pah ka tagorong mana tasir tamata geka banga uoum tatanono ke tua tapokis pe. <sup>15</sup>Doh inggono ke kula tasisina pare, “Inggoum mu la ueltebeir tar koto uakapa tun, karung la hire tauete tonogo Uelhire Uaiao tasir tamata uakap. <sup>16</sup><sup>q</sup>Mair tamat re tagorong mana toro Uehire Uaia, doh ra uahuhuin inggono tera turung uelkarusin. Bo mair tamata ge ahik pehe tagorong mana toro Uelhire Uaia, inggono ra turung uakouhin. <sup>17</sup>Doh God e turung guata tar niparoko tar limasar tamatang tagorong man. Gisina ra turung geil liu keip tar hangougouo tasir liouana uasa, kara turung uelhire pono tar giniameme siokor uelhire. <sup>18</sup><sup>s</sup>Gisina ra turung banoto pono tar kusa tasir soi, doh tar binaka ra inumusina me bilih, gisin ahik pah ra matotong sa. Doh gisina ra turung uapono tar limas tasir momoh, kara turung uia poluk.”

<sup>19</sup><sup>t</sup>Dohi muduhia ke menmene baka pe Iesu ger Tamata Noman tasisin, song ka kale kai taroion i Heuen, kare la tabilahlia tar pang makoso tang God. <sup>20</sup><sup>u</sup>Song ka la uelteibeirir tamatang uakuakeluk, kara mene tauetane toro mamang buturulik, doha Tamata Noman e kalekinale tagu tun tasisin, re uatouo pe tar nitouo tar uatampopokoho toro Uelhire Uaia. O mana tun.

<sup>o</sup> 16.14 1Ko 15.5    <sup>p</sup> 16.15 Apo 1.8    <sup>q</sup> 16.16 Apo 2.38    <sup>r</sup> 16.17 Apo 2.4; 8.7

<sup>s</sup> 16.18 Luk 10.19; Apo 28.3-6    <sup>t</sup> 16.19 Apo 1.9-11; 2.33-34    <sup>u</sup> 16.20 Apo 14.3; Hib 2.3-4

# Luk

## O Uelhire Uaia ke boloin Luk

### No bolobolo Luk

Toro Uelhire Uaia geke boloin Luk, inggeig i banga pare, Iesu ter tamatang kale tapokis tasir Israel, doho gisiamer toto tamat, o bulout, doho kuaha pon. Doh tar binaka re marang uatentur Iesu tena kalekinale, inggono ke hire tasir tamata pare, a Iabena Dedeil ke uatentur tatanono tar mene tauete tono uelhire God gero uia tasir tiome (Luk 4.18). Doh roon o mana tun toro buk rone Luk ke ueluatata uaburehe tang Iesu ke ueldolomo tasir tamatasine ra huata teil pe tar mamang niduhulik, kare guata uangua tasisin.

Gininar inetenine ke guataig Iesu teke guata maeit ka uahantieher toto tamatasiner nanon. Tar binaka ke poha Maria tatanon, o tamata ka uaha tun (Luk 1.42-48 doh Luk 2.10). Doh gine re lang kapa manasa per ueluatata toro buk rone, Iesu ke la i Heuen, doh ginasiner tamata ka uahantiehe tunungua (Luk 24.52).

Luk ter tang sioko puk manasampe ke ueluatata tar bureher inete tena niuangoul Iesu ke uangoul peme. Gininar ueluatatanine ahik pahe moko teil tagu tar giniamer buk. Te Luk puk manasampe ke ueluatata tar bureher inete geke kotpokoso tar binaka ke kotpokoso Iesuane tar kot. Luk puk manasampe ke bolo toro uelhire uaranga geke mene tauetein Iesu ke ueluatata pe tar tamata ger peng Samaria ke poul pe tar tamata geke tupara uasain tasir tamata uasa (Luk 10.30-35). Doho uelhire uaranga pono tar keketik geke hiliu tang taman, kare la uangoul ueltebeir (Luk 15.11-23). Kare na giniamer polukomper uelhire uaranga Iesu. Luk puk manasampe ke ueluatata tar inetenit geke kotpokoso tang Sakius, inggonor tamatane tere uoto kale tar mani tar takis.

Luk e moko teil na bureher mene tar giniamer inete pare, tar hagarang lotu uatampopokoh, doh tena kalekinaler Iabena Dedeil. Kare ter niguatang kusa luara liu tenas niguata uasar tamat. Luk na burehe ponor uelhire ke mene uatuha to ponolaig tar haua ka guataig kuah.

### O uelhire uakalahar

**1** <sup>1</sup>Teopilus o bureher tamata ka uedanga tar uamoko uahiu tar nibolbolo nar mamang inetelik geke guataig God, doh ke kotpokoso sira tun i uantinanina tamiueim, <sup>2</sup>misiana sira kompe ka uelueluahiu pehar tamatang kalekinale tono uelhire God tamiueim, teasinatine teke banga uakikilanga katongo tunur matas.

<sup>3</sup>Temaetingua git tar binakanina sioun inggo ku sirsir hamas uaia tun me paheig tar mamang inetelik, e baka sirono paku bolo uahiu uauelturelao menang nibolobola Teopilus ger tamata uleik. <sup>4</sup>Inggo ku guata pare, maro ate pona toro mana tun tar mamang inetelik geke ualasilaig totomua.

### Jon ger tang uahuhu ka me hirein ra turung poho pein

<sup>5</sup>Tar binakene tang Herot ger toiang Judia, e uangoulur pater a hangana tang Sekaraia, inggon a patere tar paina tang Abia. Elisabet tena kuahon, e la tur toro matina tasir patere pon, bo toro gime matina puk. <sup>6</sup>Rasina tokah a toking tamata uaia, ura uoto guata uakodkodoho dedeane tar matana God, kaura uakeluk uaia tun tena nialatut, doh na nialatohon. <sup>7</sup>Bo rasina puk ahik mo ra bung tus, teeit Elisabet a bouh, doh rasina tokah a toking mahohontiehe tun.

<sup>8</sup>Maeit tar binakonene nas binaka manasar patereng toso bubunguna Abia tar guata tar kalekinale, doh Sekaraia ke la kalekinale sira manasa pono tar pater i uoumuhia tang God iuma tar umang lotu ger dedeil. <sup>9</sup><sup>b</sup>Inggono ka kedanga toin toro bakbaka uadud tar uakeluk tar niguatang tasir patere mare lekala tena umang lotur Tamata Nomana ger uleik tar la ualuh tar adua. <sup>10</sup>Doh tar binakonene o manai tamata uakapa tun ra lotu to i kalahar ra ualuh peigir adua.

<sup>11-12</sup>Doh na angelour Tamata Noman ke me pokoso tang Sekaraia, kare me turuhia tar pang makoso na ro oltang uahung tar adua. Doh Sekaraia ke lutarantiehe keip tun tar nisokoro uleik ke banga pe tar angelou. <sup>13</sup>Bo a angelou puk ke kula tatanono pare, "Sekaraia, ahik paho sokor, ge nang lotu pea ka longoro manasain. Nang kuaha Elisabet e turung poho me tumua me bulout, ingga o turung uelkila tatanono tang Jon. <sup>14</sup>A niuaha uleik tun e turung laha tamiraoum, doh mo bureher tamata pono ra turung uaha uelkout tagu tamiraoum tar binaka ra pohoion. <sup>15</sup>Ge inggono pe e turung kotpokos a tamata uleik tar matanar Tamata Noman. Inggon ahik tun pahe banot e inum me bino ue me inum popokoh, doh inggon e turung uoun tur tar Iabena Dedeil tar binaka halana ta pohoion. <sup>16</sup>Inggon e turung uiuir mo bureher tamatang Israel mara lame tar

<sup>a</sup> 1.1 Apo 1.1   <sup>b</sup> 1.9 KT 30.7   <sup>c</sup> 1.15 Aha 6.2-3

Tamata Noman ge nas Godosin. <sup>17d</sup>Doh inggono e turung haijala uoum teil tar Tamata Noman, dohe keip teil tar nitampopokoho misiana sira tena nitampopokoho Elaija mare uelua keipisir tamasir keketik toso bung tus, doho gisisir mahang longoro ra kale tar kodkodohonar niate mare kaleuatoro tanikais tena nilamer Tamata Noman.”

<sup>18</sup>Doh Sekaraia ke kula tar anggelou pare, “Hape ru matoto pe inggo u ate pare, a puhon e turung pokos? Ge inggo pe ku mahohontiehe tun, doh nagu kuaho ke pipigogolik pon?” <sup>19e</sup>A anggelou ke mene hahaua tatanono pare, “Inggo Gebriel geru uoto tur i uoumuha tang God, doh inggo ka ualatuehaio u me mene totomua, karu me ueliu totomua toro Uelhire Uaia rone. <sup>20</sup>Ualongor, gine ahik pe ingga mato tagorong mana tenag uelhireo gere turung pokoso tun toro mana tena binak, ingga o turung pau, ahik paho banot o men e tuka tar mareinene re pokosor inetenin.”

<sup>21</sup>Tar binakene ra uangougoul harahar tamata tang Sekaraia, gisina ra namnamanaeh, a hauar tengkana, maene ke uaotoungon iuma tar umang lotu ger dedeil. <sup>22</sup>Doh gine ke tauete pemeon inggon ahik pahe matotong mene tasisin. Gisina ka bang paroko sira tatanono ke banga to me inete siok iuma tar umang lotu ger dedeil. Doh inggon e sarsara uagulguluh kompela tar limana tar marang uahire tasisin, bo ahik puk pahe banot e men. <sup>23</sup>Tar binaka ke siokor uakapono tena kalekinale tar umang lotu, song ke la tapokisono tena uan. <sup>24</sup>I muduhia Elisabet na kuahon, ke me balakoso manas, doh tar tolimar bialok, inggono ke uangougoul uaouo kompe iuma tena um. Doh inggono ke kula pare, <sup>25</sup>“Gine ter haua ke guatainir Tamata Nomana totoguo ke ualasira pe tena nimalara totoguo, ke kale liu pe tereg nimatalo i uantinanina tasir manai tamat.”

### A anggelou ke laha tang Maria

<sup>26</sup>Tar uatonomonor bialoko ke balakoso pe Elisabet, God ke ualatueha tang anggelou Gebriel e laha tar pang uan i Galili tar uauanilik ra kilan i Nasaret. <sup>27f</sup>Anggelou Gebriel ke laha tar kuaha ge halana te hohouo keip me bulout. A kuahon a hangana tang Maria ger niualamatot e le tang Josep gere la tur toro matina tang Debit. <sup>28</sup>Doha anggelou ke kula tatanono pare, “A marein uaia tun totomua! Ingga ter niguata uaia tun, a Tamata Noman e uangougoul tagu totomua.”

<sup>29</sup>Tar binaka ke longoro Maria tena uelhireon, inggono ke kanuh, kare namanaehe pare, a uamarein uaia hauon. <sup>30</sup>Song ke kula polukur anggelou tatanono pare, “Maria ahik paho sokor, ge God pe ke guata uaia tun totomua. <sup>31g</sup>Ualongor! Ingga o turung balakos, karo turung poho

<sup>d</sup> 1.17 Mal 3.1; 4.5-6; Mat 17.11-13    <sup>e</sup> 1.19 Dan 8.16; 9.21    <sup>f</sup> 1.27 Mat 1.16,18

<sup>g</sup> 1.31 Ais 7.14; Mat 1.21-23



tar keketik bulout, karo turung uelkila tatanono tang Iesu. <sup>32</sup> <sup>h</sup>Inggon e turung kotpokos a tamata uleik, doh ra turung kilain a tuna God ger i ranantieh. Doh God ger Tamata Noman e turung uatoia tatanon ngohina tang Debit ge tubunon, <sup>33</sup> doh inggono tere turung uoum keip uakodkodoho tasir tamatang Israel tar mamang binakalik, doh na Nitoiaon e turung moko dede.”

<sup>34</sup> Kare kula Maria tar anggelou pare, “Hape re turung pokoso per puhonene ge inggo pe ahik matu hohouo keip me bulout?” <sup>35</sup> Kare mene hahauar anggelou tatanono pare, “A Iabena Dedeil e turung la uaponaha totomua, doh na nitampopokoho God ger i ranantieh e turung ragom tane totomua, maeit a keketik bulout gero turung pohoia ra turung kilain a tuna God, kara dedeil. <sup>36</sup> Elisabet ge tahimulikia ke pigogo nomanampe, kara bouh, bo gine daan a puk, inggon e balakoso teil tar keketik bulout, doh na tonomo manasar bialok. <sup>37</sup> <sup>i</sup>Ge God pe ahik me inete re uaparakukuhin.”

<sup>38</sup> Song ke kula Maria pare, “Inggo tena kuahang kalekinaler Tamata Noman, uamaluana gero pokoso ro uelhire roono totoguo, hape ko kula sira pe ingga.” Song ke hiliuir anggelou tatanon.

### **Maria ke la banga tang Elisabet**

<sup>39</sup> Tar binakoneit Maria ke kaleuator, kare uateuelein tar la tar uauanilik tar ponponina tar pang Judia, <sup>40</sup> kare la lekala tena uma Sekaraia, kare meneng uaha tang Elisabet.

<sup>41</sup> Tar binaka ke longoro Elisabet tena meneng uaha Maria, a guamene re uangoul teil tang Elisabet ke siaka kai keip tar niuah, doh Elisabet ke uoun tun tar Iabena Dedeil, <sup>42</sup> kare mene ualeik ualutara pare, “God ke guata uaiantiehe tun totomua, a i rana uain tasir gisiamehe ro kuah, kare guata uaiantiehe tun tar keketik gero turung pohoia! <sup>43</sup> Inggo deh ahik paha kuaha uaia mare me ruh koutur kuaha gere uatinanain nag Tamata Nomano. <sup>44</sup> Gine ku longoro pe inggo tar meneng uaha ko menegia, a guamene i lolono totoguo ke siaka kai keip tar niuah. <sup>45</sup> Doh ingga ra turung guata uaia tunuia ro tagorong mana teil pe tar haua ke meneinir Tamata Nomana totomua e turung kotpokoso tun toro man.”

### **No kerekereng uatakai Maria**

<sup>46</sup> <sup>j</sup>Kare kula Maria pare,

“A kolouguo e uatakai tar hanganar Tamata Noman.

<sup>47</sup> Doha iabeiguo e uahantiehe tun tang God ge nag tang Uelkarusio.

<sup>48</sup> Teeit ke namana uanono peono tena kuahang kalekinale re kale uahia pein.

---

<sup>h</sup> 1.32-33 2Sa 7.12-13,16; Ais 9.7    <sup>i</sup> 1.37 Uak 18.14    <sup>j</sup> 1.46 1Sa 2.1-10

Uakekena tur daan o mamang babeir tamata ra turung kula totoguo ka guata uaia keipio tar niguata uleik.

49 Ge God pe ter tang sioko ger uleikintiehe na nitampopokoh, kara dedeilir hangan teke guata tar uleikir niguata totoguo.

50 <sup>k</sup>Na niueldolomono e la tasisit ra ueltad, kara longoro tatanon, e uakekena tur pe tar babeir tamatang daan, kare uelueluahiuela tasir tamatang gaat i muduhia.

51 <sup>l</sup>Inggono ke uatouo ualasira keip tar limana tar uleikir nitou, kare geil ueltebeir tasisit re uairana keipis teresir ninaman.

52 <sup>m</sup>Inggono ke guata tasir gisiamer toia ka touahiuais, bo ke kale kai puk tasisit re kale uahiuais.

53 <sup>n</sup>Inggono ke uauoun tasisit ra gogo tar inete uaia, kare uelueluata liu tasir tang inete ra uasabelima teil puk.

54-55 <sup>o</sup>Inggono ke poul i Israel gesno tamatang kalekinaleono tar namana huara tar niueldolomo geke ualapagah keipiono tang Abraham

menia toso bunguna tar mamang binakalik.”

56 Maria ke uangoul tagu tang Elisabet kaelainane tar touonor bialok, song ke tapokis tena uan.

### Jon ger tang uahuhu ka pohoin

57A binaka ke kotpokoso tang Elisabet tar poho manas, doh inggono ke poho tar keketik bulout. 58Doho tamatasit ra uangoul uahuhut, doh gisis re ueliahe keipisiono ka longoro kout tar Tamata Nomana ke ualasira pe tatanono tar niueldolom, doh gisina ka uaha uelkout tagu tatanon.

59<sup>p</sup>Tar uatualinar marein gisina ka laha tar me poko tar kapokonar keketik bulout, doh gisina ka marang uelkila uahiuata tatanono tang Sekaraia ge tamanon. 60Bo tinana pukuono ke mene hahaua tapokis pare, “Ahik! Inggono deh ra kilain tang Jon.”

61Kara kulasina tatanono pare, “Bo ingga puk ahik tun me tahimulik re moko teilir hangonene.” 62Temaetit, gisina ka sarang pau tang tamanar keketik tar uahire tatanon, hingiar hangana re malarai on e uelkila tar tun.

63Inggono ke dangata me ineteng bolo keip, kare bolongua pare, inggono tar hangana te Jon. Doh gisina ka siokor lutarantiehe tun. 64Ahik me sikir manasan, kare mene Sekaraia, kare uakekenengua tar uatakai tang God. 65Gisit ra uangoul uahuhut ka ueltada keip tar nisokoro tang God, doh gane uakapa toro uaning toro ponponina tar pang uan i Judia, o tamata ra siokor mene pono tar puhon. 66Gisit ka longoro tar inetenanine ka

<sup>k</sup> 1.50 Ker 103.13,17 <sup>l</sup> 1.51 2Sa 22.28 <sup>m</sup> 1.52 Job 12.19; 5.11; Ker 147.6

<sup>n</sup> 1.53 Ker 34.10 <sup>o</sup> 1.54-55 Uak 17.7; Ker 98.3; Mai 7.20 <sup>p</sup> 1.59 Uak 17.12; KT 12.3; Luk 2.21

namanaeh, kara kula pare, “A haua tununguampe re turung guatainir keketik gete hua kai.” A puh peonene e uakalahara tena nitampopokohor Tamata Nomana re uangoul teil pe tatanon.

### No kerekere Sekaraia

<sup>67</sup>Doh Sekaraia ge tamanono ke uoun tar Iabena Dedeil, kare hire tauete toro uelhire geke heirinir Iabena Dedeil pare,

<sup>68</sup> <sup>a</sup>“Uatakai tar hanganar Tamata Noman, ger Godong Israel, teeit inggono ke me bulaua tapokis tosno tamat.

<sup>69-70</sup> <sup>r</sup>Ge inggono pe ke heiriha tar tamatang uelkarus ger tampopokoho tun e la tur toro matina tang Debit ge na tamatang kalekinaleono tar me uelkarus tagigeig, ngohina sira ke mene keip peono tosno propet gesir dedeil, ke la tur peme sioun.

<sup>71</sup> <sup>s</sup>Te mare uelkarus turiono tagigeig tosnogio uelmatan, doh tasisit re tokouasais tagigeig.

<sup>72</sup> <sup>i</sup>Inggono ke ualasira tena niueldolomo toso bung tamagigeig, doh tar namana huara tena uelhote ger dedeil.

<sup>73</sup> <sup>a</sup>Ualapagaha geke guata keipiono tang Abraham ge tamagigeig, <sup>74-75</sup> <sup>v</sup>ke uelkarus liu tagigeig tosnogio uelmatan mari banoto i uakeluk keip tar nidedeil, doha nikodkodoho tar matana God tar mamang binakalik ri uangoul pe.

<sup>76-77</sup> <sup>w</sup>Doh inggar tug, God ger i ranantieh e turung guata totomua pare, na propet, ge ingga pe o turung la i uoumuhia tar Tamata Nomana tar kaleuatoro tena lelon, tar ualasira tosno tamata God, hape re matoto pe God e uelkarus tasisin gete kusa luar teres niguata uasasin.

<sup>78-79</sup> <sup>x</sup>Teeit tena niueldolomor Godener nagigeig, temaeit a pisar e turung hara turuha i Heuen e laha tagigeig mare heir me luh tasisit ra uangoul tar kitkitupun, kara uangoulung mat, doh inggon e turung keip tagigeig tena lele ro hiarou.”

<sup>80</sup>Doha keketik ke huang tabuar, kare tampopokoho na nitagorong mana tang God, doh inggono ke uangoul tar butur padenen e tuka tar binaka ke me kotpokoso uakalahara peono tasir Israel.

<sup>a</sup> 1.68 Ker 72.18   <sup>r</sup> 1.69-70 Ker 18.2   <sup>s</sup> 1.71 Ker 106.10   <sup>t</sup> 1.72 Uak 17.7;

Ker 105.8-9   <sup>u</sup> 1.73 Uak 22.16-17   <sup>v</sup> 1.74-75 Tai 2.12-14   <sup>w</sup> 1.76-77 Ais 40.3; Jer 31.34

<sup>x</sup> 1.78-79 Ais 60.1-2

### Iesu ka pohoin

**2** <sup>1</sup>Doh tar binakaninanine o ualatoho popokoho o la tur tang Agustus ger toia, roono ko la uakapa toro pang uan gero mok i kukulebang tar nikauekeng Roun pare, o tamata ra la uamoko tar hangas toro bolobol. <sup>2</sup>Inggonene ter uakikilanganar uamoko hangana tasir tamata tar binaka re tamata uleik Kuirinius i Siria. <sup>3</sup>Doho tamata uakapa tun ra tapokis tonosio uauanilik tar uamoko tar hangas. <sup>4</sup>Temaeit Josep ke hiliu tar uan gera kilain i Nasaret gere mok i Galili, kare la uamoto taro i Judia tena uan Debit gera kilain i Betlehem, ge inggono pe a peng toro matina tang Debit. <sup>5</sup>Inggono ke lang uamoko tara hangas me Maria ger niualamatoto tar le tatanon, doh inggon a balakoso manas.

<sup>6</sup>Doh tar binakene ura uangoul rasin i Betlehem, a binakang poho tar keketik ke pokoso manas. <sup>7</sup>Kare pohonguaono tar uakikilanganar tun, a bulout. Kare auh uiloho tar gomono tatanon. Kare uarikin tatanon i lolono tenas buturung einir bulamakau mesir sipsip, teeit o umang hohouo ke uoun uakap.

### O angelou ka me pokoso tasir tamatang kauেকে tasir sipsip

<sup>8</sup>Tar boungon, o tamatang kauকােকে tasir sipsip ra uangoul, kara kauেকে tonosio sipsip tar butur gere uahuhut i Betlehem. <sup>9</sup>Doh na anggelour Tamata Nomana ke pokos i uoumuhia tasisin, kare balo uilohonguaha na luhur Tamata Noman, ke balantiehe tun, doh gisina ka sokorontiehe tun. <sup>10</sup>Bo a anggelou puk ke kula tasisina pare, “Ahik pah mu sokor! Ualongoro uaia tun, inggo u lang ueliu taueteha toro Uelhire Uaia gero turung keip pokoso tar niuaha uleik tasir mamang tamatalik. <sup>11</sup>Daan nami tang uelkarusium ka poho toin tena uan nu Debit. Inggono te Kristo ger Tamata Noman. <sup>12</sup>Doh gine ter uaparok e la tamiuoum pare, inggoum mu la tupara tar guam ger niauih uiloho tar gomon, kare rikin i lolono tenas buturung ein tor bulamakau mesir sipsip.”

<sup>13</sup>Ahik me manasan, o burehe tunur gisiameher anggelou ka me pokoso pon, kara siokor uatakai tang God pare,

<sup>14</sup>”Uatakai tang God ger i ranantiehe tun.

Doh gane i kot, o moko ro hiarouo tasir tamatasit re malaelhiris God.”

<sup>15</sup>Gitie ka hiliu per anggelou tasisin, kara la tapokis i Heuen, o tamatang kauকােকে tasir sipsip ka ueluelkuleis pare, “Ti siokor la i Betlehem, kari la banga tar inetonene ke kotpokoso geke hireinir Tamata

Nomana tagigeig.”<sup>16</sup> Temaeit gisina ke uateueleis tar la, kara la tupara tang Maria, doh Josep, doha keketik e rikin tenas buturung ein tor bulamakau mesir sipsip. <sup>17</sup>Git ka banga baka pesina tatanon, gisina ka ueluatata tauete toro uelhire hape ka hire peis tar keketik. <sup>18</sup>Doh gisine uakapa tun ka siokor longoro toro uelhire roono ka siokor lutara tun ka hire per tamatang kauেকে tasir sipsip tasisin. <sup>19</sup>Bo Maria puk ke uamoko toto tar mamang inetelikininanine toro balan, kare namanaehe tun hape pake kalahara per uelhirenin. <sup>20</sup>Song ka la tapokisir tamatang kauেকে tasir sipsip ra uatuataakai teil, kara heir tar hangana uleik tang God tar haua geka siokor longoroigisin, kara bang. A mamang inetelik a siokono sira tun hape ka hire peisisin.

### Iesu ka keipin tar umang lotu ger dedeil

<sup>21</sup>“Tar uatualinar marein tar binakeit ka pokoinir kapokonor guam, inggono ka uelkilain tang Iesu. A hangonene ke heirinir anggelou i uoumuhia tar binaka halanono te koup i lolono tang tinan.

<sup>22-24</sup><sup>b</sup>A binaka ke la manasame tang Maria, doh Josep tar guata sira hape re kula pe na ualatut Moses pare, “O kuah ra kale uadelauanais tar matana God i muduhia ra poho pe tar guam.” Temaeit kura keip rasina tang Iesu i Jerusalem kaura la heir tar uahung pare, a torikir matang baluh ue a torikir babaluhulik tar uakeluk tena ualatutur Tamata Noman. Tar binakonene rasina kura heir pono tang Iesu tang God, ter hauono na ualatutur Tamata Noman e kula pare, “O mamang keketik buloutulik gera poho uakikilangais paka heir sirais pare, o nanar Tamata Noman.”

### O uelhire ke mene uatuhain Simeon tang Iesu

<sup>25</sup>Doh tar binakoneit e uangoulur tamat i Jerusalem a hangana tang Simeon. Inggono a tamata kodkodoho tun, kare uoto uakeluk uaia tun tang God, doha Iabena Dedeil e uangoul teil tatanon. Inggono ke uanguangoul tang God e ueliuha tang Kristo tasir Israel. <sup>26</sup>Inggono ke ualasira uakalaharainir Iabena Dedeil pare, inggon ahik pahe uolong mat e tuka gete banga bakono tar tamatang uelkarus geke heir uahiuahainir Tamata Noman. <sup>27</sup>Doh inggono ke keipilainir Iabena Dedeil tar umang lotu ger dedeil. Tar binakonene a toking tinana Iesu kura lekala tar umang lotu ger dedeil tar guata tar uahung, kaura ueliu sira ponola tar guama pare, a uahung e la tang God tar uakeluk tenas ualatutur Ju. <sup>28</sup>Gine ke banga pe Simeon tar guam, kare la buakangua tatanon, kare uataakai tang God, kare e kula pare,

<sup>29-31</sup> “Nag Tamata Nomano ger i ranantieh,

---

<sup>a</sup> 2.19 Luk 2.51    <sup>a</sup> 2.21 Luk 1.31    <sup>b</sup> 2.22-24 KT 12.1-8; 13.2,12    <sup>c</sup> 2.29-31 Ais 52.10; Luk 3.6; Tai 2.11

Inggoene daan song ku unga uaha tun,  
u banot u mata keip toro hiarou,  
ge inggo pe ku banga manasa tatanon, ngohina ko ualapagah pe  
ingga totoguo.

Inggo ku banga katongo manasa tar Tamatang Uelkarus  
geko kedangaia mara bangar tamata uakap.

<sup>32</sup> <sup>d</sup>Inggono ter luh gere turung luh uakalahara toro mana  
gero noumua tasisit ge ahik paho Ju.

Doh inggon e turung heir tar hangana uleik tasir Israel ges nongo  
tamata.”

<sup>33</sup> Maria me Josep kura siokor lutara tun tar haua ke menmene  
uatuhaig Simeon tang Iesu. <sup>34</sup> <sup>e</sup>Kare dangatangua Simeon tang God  
me niguata uaia tasisin, kare kula tang Maria ge tinanono pare, “A  
keketikene teke uamatotoin God tar guata tasir bureher Israel mare  
punga uahiua res nitagorong man, doho gisiamehe ra turung tentur kai  
keip tar nitagorong man, doh inggono tere turung pokoso sira pare, a  
uaparoko tasir tamata mara tapokisime tang God, bo o burehe puk ra  
turung ueluelde tatanon. <sup>35</sup> Temaeit a huar ninamananine re moko  
tar kolousur bureher tamat e turung kotpokoso uakalahar, doh ingga e  
turung kalentieheiar niueldolomo ngohina toro baenat gero turung soup  
pokoso tunula tar koloumua.”

### Ana ke uatakai tang God ke banga pe tang Iesu

<sup>36</sup> Tar binaka tunoneit a propet a hangana tang Ana ke la  
uahuhutume tasisin, inggon a tuna Penuel gere la tur toro matina tang  
Aser. Ana ke le, doh ke uangoul tagu tena bulout toro mouit ro krismas,  
kara mata liuin. <sup>37</sup> Inggono ke uangoulung kamob e tuka ke la tual per  
hangaul, doho toueit no krismas, doh ahik pahe uoto hiliu tagu tar  
umang lotu ger dedeil re uoto lotu pe tar mamang binakalik, kare uoto  
ueil pon. <sup>38</sup> Gine ke me banga peono tar keketik, inggono ke uatakai  
tar hangana God, kare ueluatata tang Iesu tasir tamata uakapasit ra  
uanguangoul tar toia ger niualapagaha tar laha, kare me uelkarus tasir  
Jerusalem.

<sup>39</sup> <sup>f</sup>Tar binaka kura guata uakeluk pe Josep me Maria tar mamang  
inetelik, hape ro kula pe no ualatut God ger Tamata Noman, rasina  
kura tapokis tenasira uan i Nasaret tar pang uan i Galili. <sup>40</sup> Doha  
keketik e huang tabuar, kare me tampopokoh pon. Inggon a tang  
namana tun. Doh na nimalaelhirir Tamata Noman menia tena nipoul  
e moko teil tatanon.

<sup>d</sup> 2.32 Ais 42.6; 49.6; 52.10    <sup>e</sup> 2.34 Ais 8.14; Mat 21.42; 1Pi 2.8    <sup>f</sup> 2.39 Mat 2.23

### Iesu ger keketik ke la tar umang lotu ger dedeil

<sup>41</sup> Tar mamang krismasilik a toking tinanon ura uoto la i Jerusalem toro niein uleik gera kilain, Leke liu ro Mat. <sup>42</sup> Tar binakene no siokor hangaul, doho torik manasa no krismas Iesu, gisina ka la kai taro toro niein misiana ra uoto guatang sioun pe tar niguatan tasir Ju. <sup>43</sup> Tar binaka ke karuh baka per mareinene toro niein, a toking tinanon ura lang la tenasira uan i Nasaret, bo Iesu puk ke uangoul dede i Jerusalem, doh rasin ura tel. <sup>44</sup> Rasin ura namanampe pare, e la tagu teilimpeono tasisin, doh gisina ka la manasa tar siokor marein, song kura bangaehে rasinane i uantinanina toso ra tahisilik, doho ra bung kaluas. <sup>45</sup> Gine ahik pe rasina pah kura uelupar tatanon, rasina kura tapokis poluk i Jerusalem tar la sir tatanon. <sup>46</sup> Kura karuh bakar touonor marein song kura la uelupar to rasina tang Iesu tar buturung uelpokosane tar umang lotu ger dedeil, e tabila tagu tasir tamatang ualualasir, kare dangdangata heke tapokis tasisin. <sup>47</sup> Doho tamatasine ka ualongoro tatanono ka siokor lutarantiehe tun hape re ate uaia tun peono re hahaua pe tenas nidangatasin.

<sup>48</sup> Tar binaka kura bang huara pe tamanon, doh tinanono tatanon, rasina kura lutarantiehe tun. Kare kulangua tinanono pare, “Ir tug! Inggapa paka hik paho guata pare tamiraeim! Raeim me tamoumua kira kanuh tun, kira sirsir pe totomua.”

<sup>49</sup> Doh Iesu ke mene hahaua pare, “Raoum deh pakura ate tun pare, inggo paku uangoul tena uma Tamoug.” <sup>50</sup> Bo rasina puk ahik matura naman manate tar haua ke mene uatuhaion.

<sup>51</sup> <sup>h</sup>I muduhia Iesu ke tapokis tagu i Nasaret tasrasin. Kare tang longoro dede tun tasrasin. Bo tinana pukion, ke uamoko toto tar ineteninanine tar koloun. <sup>52</sup> <sup>i</sup>Doh Iesu ke huang tabuara tunur tukunun, kara tang namana tun, doh God mesir tamat ra malarantiehe tun tatanon.

### Na kalekinale Jon ger tang uahuhu

**3** <sup>1</sup> Taiberias Sisar ke toia tar gavaman i Roum toro hangaul, doho tolima ro krismas. Doh Pontius Pailat teke gavana tar pang uan i Judia, doh Herot ter tamata uleik tar pang uan i Galili, Pilip ge tahinono ter tamata uleik tar pang uan i Ituria, me i Trakonitis, doh Lisantias ter tamata uleik tar pang uan i Abilene. <sup>2</sup> Doh tar binakonene, Anas me Kaiapas ter toking pater geura i rana uain tasir pater, doh no uelhire God ko laha tang Jon ger tuna Sekaraia tar butur paden. <sup>3</sup> <sup>j</sup>Doh inggono ke la uiloho hahai toro uan uakap gere moko uahuhut tar kodom i Jordan.

<sup>§</sup> 2.41 KT 12.24-27; 23.14-17; Ual 16.1-8 <sup>h</sup> 2.51 Luk 2.19 <sup>i</sup> 2.52 1Sa 2.26; NU 3.4

<sup>j</sup> 3.3 Apo 13.24

Kare uelhire tauete toro uelhire tasir tamata tar uapalih, kara tur liu tenas niguata uasa, kara kale tar uahuhu mare kusa luara liu God tar niguata uasar nosisin. <sup>4</sup>Misianar nibolo uahiua peono tono buk propet Aisaia pare,

“A tang siokor tamata gere kila uauleik tur tar butur paden e kula pare,

‘Kaleuatoro tena leler Tamata Noman,  
uakodkodoho tanika toro lel,

<sup>5</sup> o ueltageihina ro siusana ra siokor uig,  
doho siusan mero ponponina ra uamalatahaig,  
doho lele ger pudpudo ra uakodkodohoig,  
doho butur ger sa ra tuha uamamadalouoig,

<sup>6</sup> doho tamata uakapa ra turung banga gete uelkarus God tasir tamat.’ ”

*Aisaia 40.3-5*

### Uapalih tenami niguata uasa!

<sup>7k</sup>Jon ke kula tasir manai tamatasine ka lame mare me uahuhuono tasisina pare, “Inggoum o sa o bung tunar soi! Mai ke uatagin tamiuoum marung banotong ualo liu tena nimaliana God gere turung lame? <sup>8l</sup>Ahik! Bo inggoum puk mu uapalih, karung ueldolomo katongosioum mare ualasisirasioum pare, kung uapalih tenami niguata uasa. Doh ahik pah mu uelkule katongosioum pare, ‘God ahik pahe uabato tagigeig, ge inggeig pe o bunguna Abraham.’ ”

“Inggou gine ru hire tamiuoum, God e matot e guata mo bubunguna Abraham tar paluanine! <sup>9m</sup>Ginempe daan God e kaleuatoro tar uabato tasir tamata ge ahik pah ra uapalih tenas niguata uasa. God e turung uabato tasisina ngohina tar tamata gere kaleuatoro tar kangana tar tokout uahiua tar doukunit ge ahik pahe uauaia me kukuanan, kare ualuh taninina toro hue!”

<sup>10</sup>O tamata ka dangata tang Jon pare, “Bo hape paking guata pe inggeim.”

<sup>11</sup>Jon ke mene hahaua tasisina pare, “Mai kompe ge no torik ro hikhiku, e heir mo sioko tang mai ge ahik mo nan. Doh mai ge mena niein, inggon e heir tagu taninina tang mai ge ahik me en.”

<sup>12n</sup>O tamatang kale tar takis ka la pome tang Jon mare uahuhu taguono tasisin. Gisina ka dangata tatanono pare, “Ir Tang Ualasisir! A haua paking guataiem.”

<sup>13</sup>Doh Jon ke hire tasisina pare, “Kale tur tasir tamata tar touihar buluanar takis manieit ro kulain ro ualatut.”

<sup>k</sup> 3.7 Mat 12.34; 23.33    <sup>l</sup> 3.8 Jon 8.33,39    <sup>m</sup> 3.9 Mat 7.19    <sup>n</sup> 3.12 Luk 7.29



<sup>14</sup>Song ka dangata ponor tamatang uuliatung tatanono pare, “Doha hauangua paking guataiem.”

Kare mene hahaua Jon tasisina pare, “Ahik pah mu petutupe tasir tamata tar heir tamiuoum me mani. Ahik pah mu boho tola mo tamat, mu uaha kompe hape ra bulaua pesioum.”

### **A tang sioko gere i rana uain tang Jon**

<sup>15</sup>O tamata ra uangangoul uatuha tang Kristo tar pokos, doh gisina ra namnamanaehe tang Jon ge pare te Kristo. <sup>16</sup><sup>o</sup>Temaetie Jon ke mene hahaua tasisina pare, “Inggo u uahuhu keip tamiuoum tar kodom, bo a tang sioko ger i ranantiehe uain na nitampopokoho totoguo, inggon e turung lame. Doh inggo ahik pono paha tamata uaia tar luaka tena toking bungbungunar suon, inggono tere turung uahuhu keip tamiuoum tar Iabena Dedeil, doho hue. <sup>17</sup>Inggon e kaleuatoro tar uauelpakaha liu tur tasir tamata uasa tasir tamata uaia misiana tar tamata gere uauelpakaha tar uatunar raes-uitinit re moko teil tar kapokon, doha doukdoukina ge ahik pah ra guata keip taguig me inet. Doh inggon e turung uamoko tasir tamata uaia me butur uaia misiana tar tamatatie re uamoko tar raes-uit iuma tar umang uamoko toto. Bo inggono puk e turung uabato tasir tamata uasa misiana tar tamata gere bakala tar kapokonar raes-uit, doha doukdoukin i lolono mo hue ge ahik me tang siokor tamata re banot e lomoh.” <sup>18</sup>Doh Jon ke mene ualeik uapopokoho tasir tamat tar bureher uelhire, kare hire tauete toro Uelhire Uaia tasisin.

### **Herot ke uamoko tang Jon tar umang uih**

<sup>19</sup><sup>p</sup>Doh Jon ger tang uahuhu ke uelkukur tang Herot ger tamata uleik, teeit ke le peono tang Herodias ge na kuaha tahinon, doh tar burehemper niguata uasa geke guatagion. <sup>20</sup>Temaet Herot ke uamokongua tang Jon tar umang uih, ke uanotongua polukular puhonene tar giniamerher niguata uasanit ke guatagion.

### **Iesu ka uahuhuin**

<sup>21</sup>Tar binaka ka siokor uahuhuisir tamat, Iesu ka uahuhu ponoin, doh gine re lotu peon i Heuene ke takapuk, <sup>22</sup><sup>q</sup>doha Iabena Dedeil ke la uaponaha tatanon misiana tar tukununar baluh, kare mene turuha God i Heuene pare, “Ingga ter tuguo geru malahirintiehe tunin, doh inggo u uaha totomua.”

---

° 3.16 Apo 13.25    p 3.19 Mat 14.3-4; Mak 6.17-18    q 3.22 Jon 1.32

**Gisine ter hangas ro bunguna Iesu**

23<sup>r</sup>Tar binaka ke uakekena Iesu tena kalekinale, inggono kae siralain pare, no touonor hangaul ro krismas re mahoho pe. Inggono ter keketik bulout gera atein pare, a tuna

Josep ter tuna Heli.

24 Heli ter tuna Matat.

Matat ter tuna Libai.

Libai ter tuna Melki.

Melki ter tuna Janai.

Janai ter tuna Josep.

25 Josep ter tuna Matatias.

Matatias ter tuna Amos.

Amos ter tuna Nahum.

Nahum ter tuna Esli.

Esli ter tuna Nagai.

26 Nagai ter tuna Mat.

Mat ter tuna Matatias.

Matatias ter tuna Semein.

Semein ter tuna Josek.

Josek ter tuna Joda.

27 Joda ter tuna Joanan.

Joanan ter tuna Resa.

Resa ter tuna Serubabel.

Serubabel ter tuna Sealtiel.

Sealtiel ter tuna Neri.

28 Neri ter tuna Melki.

Melki ter tuna Adi.

Adi ter tuna Kosam.

Kosam ter tuna Elmadam.

Elmadam ter tuna Er.

29 Er ter tuna Josua.

Josua ter tuna Elieser.

Elieser ter tuna Jorim.

Jorim ter tuna Matat.

Matat ter tuna Libai.

30 Libai ter tuna Simeon.

Simeon ter tuna Juda.

Juda ter tuna Josep.

Josep ter tuna Jonam.

---

<sup>r</sup> 3.23 Luk 4.22; Jon 6.42

- Jonam ter tuna Eliakim.  
 31 Eliakim ter tuna Melea.  
 Melea ter tuna Mena.  
 Mena ter tuna Matata.  
 Matata ter tuna Natan.  
 Natan ter tuna Debit.  
 32 <sup>s</sup>Debit ter tuna Jesi.  
 Jesi ter tuna Obed.  
 Obed ter tuna Boas.  
 Boas ter tuna Salmon.  
 Salmon ter tuna Nason.  
 33 Nason ter tuna Aminadab.  
 Aminadab ter tuna Atmin.  
 Atmin ter tuna Arni.  
 Arni ter tuna Hesron.  
 Hesron ter tuna Peres.  
 Peres ter tuna Juda.  
 34 Juda ter tuna Jekop.  
 Jekop ter tuna Aisak.  
 Aisak ter tuna Abraham.  
 Abraham ter tuna Terah.  
 Terah ter tuna Nahor.  
 35 Nahor ter tuna Serug.  
 Serug ter tuna Reu.  
 Reiu ter tuna Peleg.  
 Peleg ter tuna Eber.  
 Eber ter tuna Sela.  
 36 <sup>t</sup>Sela ter tuna Kainan.  
 Kainan ter tuna Arpaksat.  
 Arpaksat ter tuna Siem.  
 Siem ter tuna Noa.  
 Noa ter tuna Lamek.  
 37 Lamek ter tuna Metusela.  
 Metusela ter tuna Enok.  
 Enok ter tuna Jaret.  
 Jaret ter tuna Mahalalel.  
 Mahalalel ter tuna Kenan.  
 38 <sup>u</sup>Kenan ter tuna Enos.  
 Enos ter tuna Set.  
 Set ter tuna Adam.

---

<sup>s</sup> 3.32 Rut 4.17-22    <sup>t</sup> 3.36 Uak 11.10-26    <sup>u</sup> 3.38 Uak 4.25-26

Adam ter tuna God.

### Satan ke uedanga tang Iesu

**4** <sup>1</sup>Gine ke tapokis tur peha Iesu tar kodom i Jordan, inggono ke uoun tun tar Iabena Dedeil, doh inggono ke keipilainir Iabena Dedeil tar butur paden. <sup>2</sup>Kare la uedangene Satan tatanono tar toueitir hangaulur marein. Tar mamang binakalikinin, Iesu ahik mata ein me niein, doh tar binaka ke la kapa per mareininin, inggono ke gogontieh.

<sup>3</sup>Doh Satan ke kula tatanono pare, “Ge para tuna God nomana ingga, o mene toro palaua rone maro uapalihin o bereit!”

<sup>4</sup>Bo Iesu puk ke kula tatanono pare, “No uelhire God o nibolo pare, ‘A tamat ahik pahe tua to puk re ein pe toro bereit.’ ” *Ualatut 8.3*

<sup>5</sup>Doh Satan ke keipingua poluk taro tatanono tar siusana ger i ranantiehe, kare la ualasira toro mamang nitoialikane i kot tar sisikinalikir binak. <sup>6</sup>Kare kula poluk Satan tatanono pare, “Inggo u turung heir totomua tar nitampopokohong kauek, doha mamang uiniatorong toro nitoianin, ge ginina pe a niheir totoguo, doh inggo u banoto tar heir taninina me tamata geru marang heirin. <sup>7</sup>Temaeit geto hatup uahiua, karo lotu totoguo, ginina uakapa tun a turung noumua.”

<sup>8</sup>Bo Iesu puk ke mene hahaua pare, “No uelhire God o nibolo pare, ‘Loutu tar Tamata Noman, ger God a noumua, karo kalekinale kompe tatanon.’ ” *Ualatut 6.13-14*

<sup>9</sup>Song ke uoum keip poluk Satan tang Iesu i Jerusalem, kare la guata tatanon, maeit re la tur i rana tar butur ger i ranantiehe tar kukunar uamang lotu ger dedeil. Kare kulono tang Iesu pare, “Ge para tuna God nomana ingga, siaka uahiuaokoane! <sup>10</sup>Roon o nibolo tono buk God pare,

‘Inggon e turung ualatoho uatuha totomua tosno anggelou tar kaueke uaia tun totomua.

<sup>11</sup> Gisina ra turung kabe kai totomua tar limas, te mara hikia paho uabir tar kekeim mo palau.’ ” *Ker 91.11-12*

<sup>12</sup>Bo Iesu puk ke kula tatanono pare, “No uelhire God o kula pono pare,

‘Ahik paho uedanga tar Tamata Nomana ger God a noumua.’ ”

*Ualatut 6.16*

<sup>13</sup>Tar binaka ke uedanga uakapa Satan tar mamang uedangalikinine, inggono ke hiliu tatanon e tuka me giameher binaka uaia.

<sup>v</sup> 4.12 1Ko 10.9 <sup>w</sup> 4.13 Hib 2.18; 4.15

### Iesu ke uakekene tena kalekinale

<sup>14</sup>Iesu ke uoun tun tena nitampopokohor Iabena Dedeil ke tapokis pe i Galili, doho tamatang toro pang uaninin ka siokor uolo ueliate tatanon.  
<sup>15</sup>Doh inggono ke menmene ualasira to iuma tonosio umang lotur Ju, doho tamata ka siokor uatakai tatanon.

### Iesu ka uelueldein i Nasaret

<sup>16</sup>Tar binaka ke la Iesu i Nasaret tar uan geke hua kai toin, doh tar Mareining Pepe Uah, inggono ke haiala iuma tenas umang lotur Ju, e uakeluk tompe tena niguata tar Mareining Pepe Uah, kare la tur kai tar timana tono uelhire God. <sup>17</sup>Doh inggono ka heirin toro bolobol o niligun gero nang Aisaia ger propet, inggono ke luaka tang roon, kare tuparangua tar butur ka boloin pare,

<sup>18</sup> “Na Iabena Dedeilir Tamata Noman e uangoul teil totoguo, teeit ke uamatoto peono totoguo tar me uelhire tauete tono Uelhire Uaiaono tasir tamatasisir tiome.

Inggono ke ualatueha totoguo tar me uelhire tauete pare, o tamatasis ra uangoul tar umang uih ra turung uamaluanais, doho kut ra turung banga poluk, doho tamatasis gera uangoul keip tar niduh, e turung mamaolois, kara uah,

<sup>19</sup> doh tar uahire tauete pono tar binaka re ualasira tor Tamata Nomana tena nimalar, kare uelkarus tosno tamat.”

*Aisaia 61.1-2*

<sup>20</sup>Song ke ligun tapokis Iesu toro bolobol, kare heir tapokis tang roono tar tamatang kalekinale tar umang lotu, kare tabil. Doho tamata uakapa tunusine iuma tar umang lotu ra siokor uakeis uanono kompe tatanon.

<sup>21</sup>Song ke uakekenono tar mene tasisina pare, “Daan kung longoro manasoum toro uelhire, roono ko kotpokoso manas o man.”

<sup>22</sup><sup>x</sup>Doho tamatasine ka longoro tar menenine ke mene pe inggono ka siokor uairana tun tatanon, kara lutara tar inete uaianine ke menmenegion. Doh gisina ka ueluelmenengua pare, “Inggeig i ueliate pare, inggonene ter tuna Josep. Hape maene re banotono tar mene tauete tar uelhirenine.”

<sup>23</sup>Kare kula Iesu tasisina pare, “Inggoum here mu turung kula totoguo tar puhung kulene ra uelaten siounin pare, ‘Dokta, ingga deh pako guata uauia katongo baka uoumuia! Guata to ponane tenang pang uan i Nasaret tar niguata geking longorogieim geko guatguata togia i Kaperneam.’

<sup>x</sup> 4.22 Luk 3.23; Jon 6.42

24<sup>y</sup>Bo inggo puk gine ru hire tamiuoum toro man, ‘Ahik me propet ra uaiainane tena uan katong.’”

25<sup>z</sup>“Roono mana tun, tena binaka Elaija o bureher kuaha nimata liu ka malara me nipoul, tar binakoneit ahik me huana ke dur i Israel toro touono ro krismas, kara tonomor bialok, doha gogo uleik ke kotpokoso tar pang uanene. 26<sup>a</sup>Kara hik dedempe Elaija pah ka ualatuelain tar la poul me peng Israel, bo ka ualatue kalehe pukulain tar la poul tar kuaha nimata liu tar gime uan, a peng Sarepat tar pang uan i Saidon. 27<sup>b</sup>Doho burehentieher toba i Israel tena binaka Elisa ger propet, bo God puk ahik mata uauia me peng Israel. Te Naman puk manasa ger peng Siria ka uaiuin.”

28 Tar binaka ka siokor longoror tamatasine iuma tenas umang lotur Ju tar puhonene, gisina ka me nimaliana uasa tun. 29 Gisina ka tur kai, kara tututupe tauete tatanonane tar uuanilik, kara keip taro tatanono tar lulunar siusan geke tuhainir uan i Nasaret, te mara la baka uahuakoiono tar urauan. 30 Bo inggono puk ke la uuelhobourin tasir manai tamat, kare haiala dede.

31 Kare la uahuako i Kaperneam tar uuanilik i Galili, doh tar mamang Marening Pepe Uahener nosir Ju, Iesu e ualasira tasir tamat tono uelhire God. 32<sup>c</sup> Gisina ka lutarantiehe tena niualasiron, teeit no uelhireono to nitampopokoh.

33 Doh gane iuma tenas umang lotur Ju e uangoulur tamata nihikung liouan, kare kaling ualeikinguaono tang Iesu pare, 34<sup>d</sup> “Ih! Iesu ger peng Nasaret! A haua ro marang guata keipia tamiueim, ko lamea tar me binopo tamiueim? Inngo u ate maia, ingga ter tang siokor dedeilir nang God!”

35 Bo Iesu puk ke ualatoho tar liouana uasa pare, “Uakenua tar men, karo hiliu tatanon!” Kare baka uahuanguar liouana tar tamat i uoumuhia tasisinasisir tamat. Kare me tauete liu, ahik mata guata uasa tatanon.

36 Gisiner tamata uakapa ka siokor lutarantieh, kara ueluelkuleis pare, “O meneng haua roono rone? Ingono ke ualatoho keip tena nitampopokoho tasir liouana uasa, kara me tauete liu tatanon.” 37<sup>d</sup>Doho ueluatata tang Iesu ko la ueltebeir toro mamang buturulik.

### Iesu ke poul tasir mamang tamat

38 Iesu ke hiliu tar umang lotu, kare langua tena uma Saimon. Tar binakene tinana na kuah Saimon e momouhantiehe. Doh gisina ka dangata tang Iesu tar me poul tatanon. 39 Temaieit Iesu ke la tur tabara

<sup>y</sup> 4.24 Jon 4.44    <sup>z</sup> 4.25 1To 17.1,7    <sup>a</sup> 4.26 1To 17.8-16    <sup>b</sup> 4.27 2To 5.1-14

<sup>c</sup> 4.32 Mat 7.28-29

tono uaton, kare meneng louara toro mat, karo hiliu ro mata tatanon. Inggon ke tur kaingua kompe, kare kaleuatooro teres nieinisin.

<sup>40</sup>Tar binaka re hu uahiuaakor pisar, o tamata ka me ueliuiha tasir tamatasine res bureher mamang mata tang Iesu. Kare uaponolaono tar limana tasisina uakap, kare uauia tasisin. <sup>41</sup><sup>d</sup>O burehentieher liouana uasa ka hiliu tasir bureher tamat, kara kula ualeik pare, “Ingga ter tuna God!” Bo Iesu puk ke loulouar, kare ualatoho tasisin, ahik pah ra mene baka poluk, ter hauono gisina ra ate inggono ter Kristo.

<sup>42</sup>Tar binakeit re kih pehainir uagah, Iesu ke tauete liu. Ke la pe tar butur tabotan, o tamata ka sirsir tatanon, doh gine ka la tupara pesin, kara marang ut tatanon ahik pahe hiliu tasisin. <sup>43</sup>Bo inggono puk ke kula pare, “Inggo deh paku mene tauete toro Uelhire Uaia tena Nitoia God toro giniameme ro uan pon, temaene pe ka heirihao.” <sup>44</sup><sup>e</sup>Temaait, inggono ke mene tauete uapoul poluk toro Uelhire Uaia iuma tonoso umang lotur Ju i Judia.

### Iesu ke kedanga mo tamatang uakuakeluk

**5** <sup>1</sup><sup>f</sup>A siokor binaka Iesu e tur i tektekena tar kodomo uiluiloh i Genesaret, doho tamata ra kusukus uiloho tatanono tar ualongoro tonu uelhire God, <sup>2</sup>inggono ke banga tar torikir bout tar tektekenar kodom, ka hiliu toisir tamatang uekih, ra uahuhu pe tonosio uben. <sup>3</sup>Iesu ke panete tar siokor bout a nang Saimon, kare dangata tang Saimon tar bele uain sikoro kompe taro i laur tar bout tar uareing i kot, kare tabila uahiuangua Iesu, kare mene ualasira turuha tar bout tasir tamat.

<sup>4</sup>Tar binaka ke menmene uakapon, kare kulangua tang Saimon pare, “Hua uain taro tar tungun, kara uahiuaguir uben mara hua mo ian.”

<sup>5</sup><sup>g</sup>Bo Saimon puk ke mene hahaua pare, “Ir tamata uleik, inggeim king kalekinaletiehe tar udeilir boung, doh ahik mating uahua baka me inet, bo teeit puk ko kula manasa pea, inggo u turung baka uahiuu tagin.”

<sup>6</sup>Kara guata siranguasin, maait ka uahuangua tasir burehentieher ian, doh nas ubenesina e lang uakekena tar takih! <sup>7</sup>Song ka kalkalouokosina toso uanotousisit ra panete teil tar giameher bout tar huaha, kara me poul tasisin, doh gisina ka huaha, kara me ute uauoun tokaha tar toking bout tasir ian, ura marang dudur uadeil pukur toking bout!

<sup>8</sup>Gine ke banga pe Saimon Pita pare, inggono ke hatup uahiuanguainane i uoum tar kekena Iesu, kare kulangua pare, “Hiliu totoguo, Ir Tamata Noman, ge inggo pe a tamata uasa.”

<sup>9</sup>Doh inggon, doho uanotono ka siokor lutarantiehe ka hua per ianasis ka kaleisisin. <sup>10</sup>Doh rasina tes Jems me Jon ger toking tuna Sebedi ter toking tamatang uekih tagu tang Saimon.

<sup>d</sup> 4.41 Mat 8.29; Mak 3.11-12    <sup>e</sup> 4.44 Mat 4.23    <sup>f</sup> 5.1 Mat 13.1-2; Mak 3.9-10

<sup>g</sup> 5.5 Jon 21.3-8

Song ke kulangua Iesu tang Saimon pare, “Ahik paho sokor, gine daan, ingga ahik paho uekih baka poluk mo ian, bo ingga o turung reih pukume tasir tamata totoguo.” <sup>11</sup> h Maeit ka la reih kai manasasina tenas toking bout ka me hung pe, kara hiliu tar mamang inetelik, kara uakeluk tang Iesu.

### Iesu ke uauia tar tamat a toba

<sup>12</sup> Tar binaka ke la uangoul Iesu tar siokor uan toro uanininanine, kare lamer tamata a uoun uakapar tukununa toro toba. Tar binaka ke bangono tang Iesu, inggono ke hatup, kare uasuge uahiuu toro lun i kot, kare dangata tang Iesu pare, “Ir Tamata Noman geto malara, ingga o uadelauana totoguo.”

<sup>13</sup> Doh Iesu ke huela tar liman, kare tuha tatanon, kare kula pare, “Inggo u malar, o delauana manasa ingga.” Doh ahik me sikir manasan, karo kapa no tobaon. <sup>14</sup> Doh Iesu ke ualatoho tanono pare, “Ahik paho ueluatata me tamat, bo o la puk manas, karo la ualasiraia tang pater, karo la guata me uahung tar ualasiraia pare, ko kapa rongo toba, ngohina sira ke ualatoho pe Moses mara atesin.” <sup>15</sup> Bo ro ueluatata puk ka ueliatein ke uauia pe Iesu tatanon, doho bureher tamata ka lame tar me ualongoro tena niualasiron mare uauia pono Iesu teres matasin. <sup>16</sup> Bo a bureher binaka puk, Iesu e uoto hiliu tasisin, e la uoto lotu to tar butur belun.

### Iesu ke uauia tar tamat a mater tukunun

<sup>17</sup> A siokor binakanit ke ualualasira Iesu, o Parisi, doho tamatang ualualasira tar ualutut, gisina ka la tur toro mamang uaning Galili, dohi Judia, dohi Jerusalem, gisinasis teka me tabila uilohatie, kara me ualongor. Doh na nitampopokohor Tamata Noman e uangoul tagu tang Iesu tar uauia tasir momouh. <sup>18</sup> O gisiamer tamata ka lame, ra huata teil toro rikin e rikin teilir tamat a mater tukunun. Doh gisina ra marang kalela iuma tar um mara la uamokoion i uoumuhia tang Iesu, bo ahik puk me hagar, teeit a uma ke uoun tun tasir tamat. <sup>19</sup> Temaeit ka kaete kai tarosina tar kukunar um, kara tes tar mahar kukunar um. Song ka la uahiuu keipikoiono tonon rikin matmatoto tunuko i uoum tang Iesu.

<sup>20</sup> j Tar binaka ke bang paroko Iesu teres nitagorong manasin, inggono ke kula pare, “Kaloug a niguata uasar noumuu ka kusa luar manasaig.”

<sup>21</sup> O Parisi, doho tamatang ualualasira tar ualutut ra uakekena tar namnamanaehe uanomo pare, “A tamatane e menmene uasa tang God! Ahik me tamata re banot e kusa luar me niguata uasa te God puk manasampe.”

<sup>h</sup> 5.11 Mat 19.27    <sup>i</sup> 5.14 NKP 14.1-32    <sup>j</sup> 5.20 Ais 43.25; Luk 7.48



<sup>22</sup>Iesu e ate tar haua ra namnamaigisin, kare dangatangua pare, “Ae maeit rung nammanoum tar inetenanine pare? <sup>23</sup>Ter haua re malagirig totoguo tar kul, ‘A niguata uasar noumua ka kusa luar manasaig,’ ue u kula pare, “Tentur karo la?’ <sup>24</sup><sup>k</sup>Inggo u ualasira tamioum toro mana pare, a Tunar Tamata na nitampopokohane i kot tar kusa luar liu tar niguata uasa.” Kare kulanguaono tar tamatener mater tukununa pare, “Inggo u hire totomua, o tentur, karo kale tonomo rikin, doho la tenang um.”

<sup>25</sup>Ahik me sikir manasan, kare tentur kaieit i uoumuhia tasisin, kare kale kai tono rikin, kare la tena um, e uatuatakai teil tang God. <sup>26</sup>O mamang tamata uakapa ka siokor lutar, kara uatakai tang God. Gisina ke kale keipisir nisokor, kara kula pare, “Inggeim king banga tar inetenine daan a giamehe sioko tun.”

### Iesu ke kila tang Libai

<sup>27</sup>I muduhia ke karuh baka per puhonene, kare hiliu Iesu tar um, kare la bang huara tar tamatang kale toto tar takis mani ger hangana tang Libai. Inggon e tabil iuma tar buturung kale takis. Kare kula Iesu tatanono pare, “Lame, uakelukumeane totoguo mare nagu tamatang uakuakelukuo totomua.” <sup>28</sup>Libai ke tentur, kare hiliu tena mamang inetelik, kare uakeluk tang Iesu.

<sup>29</sup>Kare guatangua Libai toro iru tang Iesu tena um, doho burehentiehe ponor manai tasisiner tamatang kale tar takis, karo gisiamehe ponor gime tamata ka la ponome toro iru roon. <sup>30</sup><sup>l</sup>Bo o gisiamehe pukur Parisi mesir tamatang ualualasira tar ualatut ka me menmene uaburehe tosno tamatang uakuakeluk Iesu, kara kula pare, “Ae maene rung einioum, karung inum keip tasir tamatang kale toto tar takis, doh gisiner tamata uasa.”

<sup>31</sup>Kare kulangua Iesu tasisina pare, “O tamata ge ahik paho momouh, gisin ahik pah tera la tar dokta, bo gisiner momouh tera la tar dokta. <sup>32</sup>Ge inggo pe ahik pah ku laha tar me kila tasir tamata uaia, bo ku la pukuha tar me kila tasir tamatang guata tar niguata uasa mara uapalih.”

### Iesu ke mene tar binakang ueil

<sup>33</sup>Kara kulanguasina tatanono pare, “No tamatang uakuakeluk Jon ra uoto ueil, kara lotu, doha siokono pono tonosio tamatang uakuakelukur Parisi, bo gisiner tamatang uakuakelukur noumua ra inum, kara ein dedempe.”

<sup>34</sup><sup>m</sup>Kare kula Iesu tasisina pare, “Inggoum ahik pah mu banoto mu uaueil tagu toso kaluanar bulout ger le timuh tar ueil tar binakang uaha

<sup>k</sup> 5.24 Jon 5.8   <sup>l</sup> 5.30 Luk 15.1-2   <sup>m</sup> 5.34 Jon 3.29

tono timuh ro leon. <sup>35</sup>Bo a binaka puk e turung lame geta turung kale liuinir tamatener le timuh toso kaluan. Song ter binakono ra turung ueil tosin.”

<sup>36</sup>Inggono ke hire tasisina toro uelhire uaranga rone pare, “Ahik me tang siokor tamata re banot e kale mo mahar timuh ro mahar gomom, kara kaere tolain toro pensioun ro hikhiku. Gete guata sirono pare, inggon e turung uatakih uauleik toro mahar gomono timuh. Doho mahar gomono timuh ahik paho uelmatout keip toro pensioun.

<sup>37</sup>Doh ahik me tang siokor tamata re dingiko me timuhur bino i lolono me pensiounur kapokonar meme ger itung bino. Gete guaton, a bino timuh e turung uatapuaka tar kapokonar meme pensioun, kare sa. Doha bino e turung tading liu. <sup>38</sup>Ahik pah te paar, a timuhur bino paka dingikoigo i lolono me timuhur itung bino. <sup>39</sup>A tamata puk geke inum manasa tar pensiounur bino, inggon ahik pahe uoto malar tar timuhur bino gere kula peono ter bino pensioun ter uia.”

#### Nas Mareining Pepe Uahar Ju

**6** <sup>1</sup>“Tenas Mareining Pepe Uahar Ju, Iesu mesno tamatang uakuakeluk ka lihila tar iomang raes-uit, doh no tamatang uakuakelukono ra katkatego teil tar kukuananar raes-uit, kara uelhaule keip tar limas taninin, kara ein. <sup>2</sup>“Doho gisiamer Parisi ka dangata pare, “Ae maene rung katego inggoum tar ualatut ger nikula tane tar Mareining Pepe Uah.”

<sup>3</sup>Doh Iesu ke mene hahaua tasisina pare, “Inggoum ahik matung timana toro ueluatat, hape ke guata pe Debit tar binaka ka gogo mesno tamat. <sup>4</sup>Inggono ke la leka tena uma God, kare la ein tar bereit ger niheir a uahung tang God, kare heir pono toso uanoton. A bereitinin a nibuk tane pare, o patere puk tera banoto ra ein taninin.” <sup>5</sup>Song ke kula poluk Iesu tasisina pare, “A Tunar Tamat ter tamata re uelik tar Mareining Pepe Uah.”

#### Iesu ke uauia tar bulout ger mater liman

<sup>6</sup>Nar uagiamehenar Mareining Pepe Uah inggono ke la lekala iuma tar umang lotu, kare la ualualasira tasir tamat, doh gane ium e uangoulur bulout ger mater limanener pang mua. <sup>7</sup>O Parisi doho tamatang ualualasira tar ualatut ra banga uanono kompe tatanon mara tula tolain gete uauiaono tar buloutene tar Mareining Pepe Uah. <sup>8</sup>Bo Iesu puk e ateng sioun a haua ra namanainisin, kare kula tar bulout ger mater limana pare, “Tentur! Karo me turane i uoumuhia tasir tamatasine.” Maeit ke tur kaiono, kare la turunguala tasisin.

<sup>n</sup> 6.1 Ual 23.25    <sup>o</sup> 6.2 Jon 5.10    <sup>p</sup> 6.3 1Sa 21.1-6    <sup>q</sup> 6.4 KT 24.5-9

<sup>9</sup>Kare kulangua Iesu tasisina pare, “U dangatanguao tamiuoum ter huar uia tar guata tar Mareining Pepe Uah ro kula pe nosio ualatutur Ju, tar guata uaia ue tar guata uasa tar uelkarus tena nituar tamata ue tar mamantouo tar tamat.” <sup>10</sup>Inggono ke bangaehe uiloho uakapa tun tasisin, kare kulangua tar bulouteit pare, “Uatapadoro tar limoum.” Kare guata siranguaon, doha limanono ke la uia uakapa tun. <sup>11</sup>Bo gisina puk ka nimaliana uasa tun, kara uakekena tar uelhalat katongois, hape paka guata pe tang Iesu.

### Iesu ke bang kedanga tasir aposoul

<sup>12</sup>A siokor marein Iesu ke hiliu, kare la lotu to tang God tar siusan tar udeilir boung. <sup>13</sup>Naliuohia inggono ke kila tosno tamatang uakuakeluk, kara lame tatanon. Inggono ke kedanga tar siokor hangaul, doha tang torikir tamatasine tasisin, kare kila tasisin, o aposoul.

<sup>14</sup>Gisina tes, Saimon geke heirin Iesu tar hangene Pita,  
doh Andru te tahinon,  
o gisiamehe tes Jems,

Jon,  
Pilip,  
Bartolomiu,

<sup>15</sup>doh Matiu me

Tomas,  
Jems a tuna Alpius,  
doh Saimon gera kilain pare, a Selot,<sup>r</sup>

<sup>16</sup>Judas a tuna Jems,

doh Judas Iskariot gere turung heir tang Iesu tosno uelmatan.

### Iesu ke ualualasir, kare uauia tasir tamat

<sup>17</sup>Iesu ke la uahiua keipiha tasisin, kara me tur tar butur malatahan. Doho bureher tamatang uakuakelukur nanon ra uangoul mesir burehentiehe ponor tamata gera la tur toro uan i Judia, dohi Jerusalem, doh tar pain i teh i Tair, dohi Saidon. <sup>18</sup>Gisina ka lame tar me ualongoro tatanon, doh mara me uauia ponois res momouh. Gisiner nihikung liouan, ka uauia ponois. <sup>19</sup>Doho tamata uakapa ka siokor uedanga tar tuha tang Iesu, teene a nitampopokoheit re la tur tatanon e uauia tasisina uakap.

### Iesu ke mene tauete toro Uelhire Uaia

<sup>20</sup>Iesu ke bangala tosno tamatang uakuakeluk kare kula pare,

---

<sup>r</sup> 6.15 “A Selot,” a tamatang tur tane uapopokoho keip tosno tamat tar gavamanang Roum.

“Maisioumur tiome mu turung uah,  
ter hauon a Nitoiaene tang God ter nomiuoum.

21 <sup>s</sup>Maisioum rung gogene daan, inggoum mu turung uah,  
ter hauon inggoum mu turung ein uamahmahurusioum.  
Maisioumene rung kiring daan, mu turung uah  
ter hauon inggoum mu turung uanio.

22 <sup>t</sup>Inggoum mu turung uaha gete tokouasaisir tamata tamiuoum,  
kara aha liu tamiuoum, doh ra meneng uelsigal tamiuoum  
kara ueluelde tamiuoum, teene rung uakeluk pe inggoum tar  
Tunar Tamat.

23 Mu uaha kompe tar binakonene, karung siaksiaka kai keip tar niuah.  
Ter hauono God e turung heir tar uleikir bulauana tamiuoum i Heuen, te  
misiana sira kompe, ka guata uasa per tamata sioun tosno propet God.

24 Inggoumene nami bureher inet, mu tagin teil,  
ter hauon inggoum kung kale manasa uoum tar niuah.

25 Inggoumene remi bureher niein, mu tagin teil,  
ter hauon inggoum mu turung gog.

Inngo u ueldolomo tun tamiuoumeit rung uanioene daan,  
ter hauon inggoum mu turung kiring, karung uangoulung ueldolom.

26 Inngo u ueldolomo tun tamiuoumene ge teka uairanar mamang  
tamatalik tamiuoum,  
te misiana sira kompe ka guata pe ro bung tamamiuoum sioun  
tasir propet bohoboh.”

#### **Malaelhir tosnomio uelmatan**

27 Kare kula Iesu pare, “Bo inggo gine ru hire tamiuoumene rung  
ualongoro totoquo, malara tosno uelmatan, guata uaia tasisit re  
tokouasais totomua, <sup>28</sup> guata uaia tasisit ra soul tamiuoum, lotu tang  
God mare poul tasisine ra guata uasa tamiuoum. <sup>29</sup> Mai re posara tar  
pararomua, tur uiuir keipila tatanono tar pang giameh. Mai re kale liu  
tur totomua tonongo hikhikung malahong, uamaluana tatanono gere kale  
tagu pono inggono tonongo giamehe ro hihikua. <sup>30</sup> Heir me inete tasir  
mamang tamatalikisit ra dangata inete totomua. Gete me tang sioko ke  
kale me noumuar inet, ahik paho hire tatanono tar heir tapokis totomua.  
<sup>31</sup> <sup>u</sup> Guata tar niguata ro malaragia ra guataig totomua.

<sup>32</sup> Geto malara pukua tasir tamatasine ra malara totomua, God ahik  
pahe turung bulaua totomua tar niguatoneit, ge o tamata pesiner sa ra

<sup>s</sup> 6.21 Ker 126.5-6; Ais 61.3; UGO 7.16-17    <sup>t</sup> 6.22 Jon 15.19; 16.2; 1Pi 4.14

<sup>u</sup> 6.31 Mat 7.12

malara puk tas mais ra malara tasisin. <sup>33</sup>Geto guata uaia pukua tasir tamatasine ra guata uaia totomua, God ahik pahe turung bulaua totomua tar niguatoneit, ge o tamata pesiner sa ra guata sira pon. <sup>34</sup>Geto heiria me mani tasisit ra banoto tar heir tapokis totomua, God ahik pahe turung bulaua totomua tar niguatoneit, ge o tamata pesiner sa ra heir tasir tamata uasa mara kale tapokis sira tar mani geka heirin.”

<sup>35</sup>“Mu malaelhir tosnomio uelmatan, karung guata uaia tasisin, karung heir me inete tasisin, kara hik pah mu namana pare, mu turung kale tapokis me inet, song re turung bulaua uaburehentiehe tun God tamiuoum, doh inggoum mu turung kotpokos o bung tuna God ger i ranantieh, ge inggono pe e guata uaia tasir tamata uasa mesir tamata gera tele tang God. <sup>36</sup>Ueldolomo tasir tamata ngohina re uelueldolomo pe God ge Tamamiuoum.”

### A nikedanga tasir tamat

<sup>37</sup>“Ahik paho kedanga tar tamata gete guata me inete mara hikia pah ra kedangaia. Ahik paho ualakouh tar tamata mara hikia pah ra mene uakouhia. Kusa luara liu tar niguata uasa geka guataigir tamata totomua mara kusa luara liuigir niguata uasa geko guatagia. <sup>38</sup>“Heir tasir gisiaméh mare turung heir uaburehentiehe God totomua, kare heir totomua tar bureher ineter uia. Hape ro heir pea tasir gisiaméher tamat, God e turung heir sira pono totomua.”

<sup>39</sup>“Iesu ke hire pono tasisina toro uelhire uaranga pare, “A tamata ger kut ahik pahe banot e uoum keip me tamata ger kut pon, gete guatono pare, rasina tokah ura turung sololo uahuako tar tung. <sup>40</sup>“A tamatang kale tar niate ahik pahe namana pare, tere i rana uain tena tang ualualasir. Bo ge pake uakuakapa hihiriono tena niualasirar tang ualasil, song re banotompe e guata sira hape ka ualasil pein, kare turung pe sira tena tang ualualasil.”

<sup>41</sup>“Ae maene ro banga tar sikir mongmong tar matana tahim, kara hik paho namana huara tar puhung douk uleik re moko teil tar matoum? <sup>42</sup>Gete moko teil me puhung douk tar matoumua, ae maene ro banotong kula tang tahim pare, “Tahig, inggo dehu marang kale liu tar sikir mongmongo gere moko teil tar matoumua.’ Ir tang kokop! Inga bo pake tero kale liu baka uoum tar puhung doukeit re moko tar matoum maro bang huara uaiaa, song ro kale liu tar sikir mongmongo gere moko teil tar matana tahim.”

### O douk kare ter kukuanan

<sup>43</sup>Kare uelhire uaranga poluk Iesu pare, “Geto tabuara ro douk, roon ahik paho uakotpokoso me kukuanana uasa. Bo ge ahik roono paho

<sup>v</sup> 6.37 Mat 6.14    <sup>w</sup> 6.38 Mak 4.24    <sup>x</sup> 6.39 Mat 15.14    <sup>y</sup> 6.40 Mat 10.24-25

tabuar, roon ahik paho uakotpokoso me kukuanana uaia. <sup>44</sup>A douk ra bang paroko tompeig tar kukuanan. Misiana pare, ahik me tang sioko re banot e la lous tur me kukuanana ro douk fig me doukunitir ueluelhung ue me kukuananar bino me doukunitir sa. <sup>45</sup>Doha siokononpe, a tamata ger uia, e turung mene tauete tar uelhire ger uia gere moko teil penina tar kolounon, ter hauon inggon e namana puk tar inetenitir uia. Doha siokono tar tamata ger sa, e turung mene tauete tar uelhire ger sa gere moko teil penina tar kolonon, ter hauon inggon e namana puk tar inetenitir sa. Ge a tamata pe e mene tauete tar haua re moko tatan.”

### A toking tang tuha um

<sup>46</sup>“Doh Iesu ke kula pare, “Geta hikioum pah mu ualongoro totoguo paka hik pah mu kila totoguo pare, “Tamata Noman!” <sup>47</sup>Ingggo u ualasira tasir mamang tamatalik gera lame, kara me ualongoro totoguo, kara guata uakeluk tar inete ru menegio. <sup>48</sup>Gisina ra pe sirangua tar tamata gere tuha tena um, kare koho uailolono tar tung, song ke uaturuko tar um i rana tar paluaa hohot. Geto la keipime ro silu toro butuan gero popokoh, karo me puah, a uma ahik pahe matot e gune sikor, ter hauon inggon a nituha uapopokoho tun. <sup>49</sup>Bosir mamang tamatalik gera ualongoro totoguo, doh ahik pah ra guata uakeluk tar inete ru menegio, gisina ra pe sirangua tar tamata gere tuha uapono tena um i rana tar kot. Doh ahik paha nituha uapopokohor tengkana me butur popokohon. Doh gero la keipime ro silu toro butuan, karo me puah bise, kare me punga uahiuanguar um, kara mamantouontiehein.”

### Iesu ke uauia tena tamatang kalekinaler tamata uleikin tasir soldia

**7** <sup>1</sup>Tar binaka ke mene uakapa baka pe Iesu tasir tamatasine, kare la lekangua i Kaperneam. <sup>2</sup>Doh tar uanion e uangoulur tang siokor tamata uleik tasir tamatang uiliatung i Roum, doh na tamatang kalekinaleon gere malarantiehe tunuion e momouhantiehe tun, kare uahuhutung mata manas. <sup>3</sup>Tar binaka ke longoro koutur tamata uleik tang Iesu, Inggono ke ualatue tasir gisiamer Juisiner mamahoholik tar la dangata tatanono tar lame mare me uauiaono tena tamatang kalekinaleon. <sup>4</sup>Gisina ka la tang Iesu, kara la dangata uapopokoho tun tatanon, kara hire pare, “A tamata uleikionene auia tun, maeit ingga pako poul tatanon. <sup>5</sup>Ter hauon inggon e malarantiehe tasir Ju, kare poul tamiueim tar tuha tenami umang lotu.”

### A tamata uleik e tagorong mana tang Iesu

<sup>6</sup>Song ke la tagu Iesu tasisin. Tar binakeit re lang la uahuhut manasa Iesu tar um, kare ualatuer tamata uleik tasir gisiamer ro kaluana tar

<sup>z</sup> 6.46 Mat 7.21

la kula tang Iesu pare, “Ir Tamata Noman, ahik paho namanantiehe tun tar guata me inet, ter hauon inggo ahik paha tamata uايا tar kaleme totomua tar lame tenag umo. <sup>7</sup>Inggo ku namana sira pare, ahik paha uia tar lame totomua, bo o kula kompe me puh mare la uia nag tamatang kalekinaleo. <sup>8</sup>Ge inggo pe u uangoul pon i kukulebanga tasir tamata uleik, doh nogo soldiao ra uangoul pon i kukulebang tar nikauekeng totoguo. Doh getu kulo me tang siok pare, ‘O la,’ inggon e la, doh getu kulo tar tang giamehe pare, ‘O lame,’ inggon e lame. Doh getu kulo tenag tamatang kalekinale pare, ‘O guata tar kalekinaleene,’ inggon e la guat.”

<sup>9</sup>Tar binaka ke longoro Iesu tar puhene, inggono ke lutarantiehe tatanon, kare kauiurila tasir manai tamata gera uakeluk teil tatanon, kare kula pare, “Inggo gine ru hire tamiuoum, Inggo ahik matu tupara me tamat i Israel misiana tar tamatane ge mena popokohontieher nitagorong man.” <sup>10</sup>Song ka tapokisilar tamatasitir niualatue tar um, kara la tupara tar tamatang kalekinale ke uia manas.

#### Iesu ke uatua tapokis tar mamanailik

<sup>11</sup>Ke karuh bakar sisikinalikir binak, doh Iesu ke la tar uauanilik ra kilain i Nain, doh no tamatang uakuakelukon, doho gisiameher manai tamata ka la tagu tatanon. <sup>12</sup>Gine ke me pokoso pemeono toro pirikinar uauanilik, o tamata ka huata tauete tar tamat a mat, ter tang siokor bulout puk tang tinan, doh tinanon a kamob a nimata liu. Doho manai tunur tamatang tar uauanilik ra la tagu teil tatanon. <sup>13</sup>Tar binaka ke bang huarar Tamata Nomana tar kuah, inggono ke ueldolomo uasa tun tatanon, kare kula tatanono pare, “Ahik paho kiring.” <sup>14</sup>Song ke la taro Iesu, kare la tuhala tena bokisir mat, doh gisit ra huata teil tatanon ka tur, kare kula Iesu pare, “Ir mamanailik,” inggo u kula totomua pare, “Tentur kai!” <sup>15</sup><sup>a</sup>A tamataitir mat ka uatua tapokisin, ke tabila kai, kare uakekena tar men, doh Iesu ke heir tapokis tatanono tang tinan.

<sup>16</sup><sup>b</sup>Gisina ka siokor lutarantiehe tun, kara sokor, kara uatakai tang God pare. “A uleikir propet ke kotpokoso tagigeig, God ke lame tar me poul tosno tamat.” <sup>17</sup>Doho ueluatata rone tang Iesu ko la tauete hahai tur i Judia, doh ko la uiloho tar pang uan uakap.

#### Iesu, doh Jon ger tang uahuhu

<sup>18</sup>No tamatang uakuakeluk Jon ger tang uahuhu ka la hire tar mamang inetelikinine ke guataig Iesu. Maeit Jon ke kila tena tang torikir tamatang uakuakeluk, <sup>19</sup><sup>c</sup>kare ualatue tasrasina tar la dangata tang Iesu pare, “Te inggar tamata gero turung lame ue paking uanguangoul me tang giameh.”

<sup>a</sup> 7.15 <sup>1</sup>To 17.23; <sup>2</sup>To 4.36    <sup>b</sup> 7.16 Luk 1.68    <sup>c</sup> 7.19-20 Ker 40.7; Mal 3.1; UGO 1.8

<sup>20</sup>Tar binaka kura lamer toking tamata tang Iesu, kaura kula pare, “Jon ger tang uahuhu ke ualatué tamiraeim tar me dangata totomua pare, ‘Ingga ter tamata gero turung lame ue paking uangangoul me tang giameh?’”

<sup>21</sup>Tar binaka tunoneit Iesu ke uauia tasir burehesis roso mata tar tukunus, o momouh, doh gisis ka hikung liouan, kare uauia tasir bureher kut. <sup>22</sup><sup>d</sup>Maeit Iesu ke mene hahaua tena toking ualualatué Jon pare, “Mura tapokis, kaura la uahire tang Jon tar haua kura bangain raoum, doh kura longoroin pare, o kut ka bang, o peil ka la uaia, o toba ka delauan, o kamelong ka longor huar, doho mata ka uatua tapokisis, doho tiome ka longoro toro Uelhire Uaia geka uelhire tauetein tasisin. <sup>23</sup>A niguata uaia e la tar tamata ge ahik pahe matala totoguo, bo e uakeluk dede totoguo.”

<sup>24</sup>Tar binaka kura hiliu na toking ualualatué Jon, kare menmene teil Iesu tasir manai tang Jon pare, “Tar binaka kung lalaoum tar butur padenen, a haua kung la marang bangasioum? Here kung la banga tar romo re sasaula pe toro garas? <sup>25</sup>A haua kung la marang bangasioum? Here kung la banga me tamata re hiku teil me hihiku mataia uelhir ger i ranar bulauan? Ahik! O babeir tamata gera hiku tar hihikuninanine ra uangoul tenas umar toia gesir tang mani. <sup>26</sup><sup>e</sup>Bo a haua kung la bangasioum? Tar la bang tar propet? Te paara noman, bo i ranahia puk tar propet. <sup>27</sup>Gine teon geka bolo uatuha tolain pare,

‘Bang! Inggo u turung heir tenag ualualatué i uoumuhia totomua tar uakalahara tenang lela.’

*Malakai 3.1*

<sup>28</sup>Inggo u uamana tun tamiuoum, ahik me tamat ka paho toinane i kot e i rana uain tang Jon. Bo a tamata puk ger tabo hangan tena Nitoia God, inggon tere i rana uain poluk tang Jon.”

<sup>29</sup><sup>f</sup>Tar binaka ka longoror mamang tamatalik, doho tamatang kale takis tonu ueluatata Iesu, ka uah, kara hire tena niguata God a kodkodoho tun, teene ke uahuhu pe Jon tasisin. <sup>30</sup><sup>g</sup>Bosir Parisi, doho tamatang ualualasira tar ualatué ka ueluelde tar haua ke malaelhirin God tasisina ra guat, ge gisina pe ka de pono mata uahuhu tagu Joh tasisin.

<sup>31</sup>Kare mene poluk Iesu pare, “Bo getu marang uelhireo tenas niguatar tamatang daan, hingia ro uelhire uaranga paku mene uatuha tolaio?

<sup>32</sup>Gisina misiana tasir keketikisitie ra tabil i moren, kara kila ualeik toso uanotous pare,

‘Inggeim king u toro pilul, marung doumioum,  
bo inggoum puk ahik matung doum,  
Inggeim king kere tar kerekereng ueldolom,

<sup>d</sup> 7.22 Ais 35.5-6; 61.1; Luk 4.18    <sup>e</sup> 7.26 Luk 1.76    <sup>f</sup> 7.29 Luk 3.12    <sup>g</sup> 7.30 Mat 21.32



doh inggoum ahik matung kiring.’

<sup>33</sup>Ge tar binaka pe ke lame Jon, inggon ke uoto ueil, doh ahik mata inum tar bino, doh inggoum kung kula pare, ‘Inggono ke hikuinir liouana uasa.’ <sup>34</sup><sup>h</sup>Doha Tunar Tamata ke lame, kare me ein, doh ke me inum, doh inggoum kung kula pare, ‘Banga tar tamatane, inggono deha uoto ein tunumpe, doha uoto inum tar bino, doh inggon e matakaluana tasir tamatang kale tar takis, doho tamata uasa.’ <sup>35</sup>Doh na niate uaia God e ualairain a mana tasisit ra uahue, kara uakeluk.”

### Iesu ke ueldolomo tar kuaha ger sa na niguat

<sup>36</sup>A siokor binak, a tang siokor Parisi a hangana tang Saimon ke kila tang Iesu tar me ein tagu tatanon, maeit Iesu ke la tena umar Parisi, kare la tabila tar buturung ein. <sup>37</sup><sup>i</sup>Doha kuaha uasa tar uanono ke longoro tang Iesu ke la ein to pe tena umar Parisi, maeit ke la keipime tar itung amiamuhunitir mataia a nihedongolar amiamuh. <sup>38</sup>Doh gitie re tur pe mer kuah i muduhia tang Iesu, kare kiring tola tar kekenon. Inggono ke uakekene tar uabusa keip tar kekenono tar bulbulunar matan, kare tunaha uakadaka keip tar ulun, song ke nguh tar toking pang kekenon, kare ding tar amiamuh.

<sup>39</sup>Tar binaka ke bangar Parisieit geke kila tatanon, kare namana pare, “Geto mana roono pare, a propeitir tamatane, inggono pake ate mai ke tuha tatanon, ge git per kuah a sa.”

<sup>40</sup>Doh Iesu ke mene tatanon pare, “Saimon, inggo u marang hire totomua tar siokor inet.”

Kare kula Saimon pare, “Hire totoguo tang ualair.”

<sup>41</sup>“A tang siokor tamata gere uoto heir tar mani mare kale tapokis me giniamuhe geke poh, inggono ke heir tar mani tar tang torikir tamat, a tang sioko ke heir umatotoiono tar 100 kina, doha tang giameh ke heir umatotoiono tar 10 kina. <sup>42</sup>Doh rasin ahik pah kura banotong heir uelhir sira tapokis tar mani. Maeit inggono ke hire uaia tun tasrasina tokaha pare, ahik pah ura bulaua tapokis tatanon. Doh hingia tasrasina re turung malarantiehe tun tatanon.”

<sup>43</sup>Saimon ke mene hahaua pare, “Inggo u namana sira teeitono geke kale tar 100 kina.”

Doh Iesu ke kula pare, “Ingga ko uaman.” <sup>44</sup>Kare kauiurila Iesu tar kuah, kare kula tang Saimon pare, “Ko banga tar kuahene? Inggo ku la lame iuma tenang uma, doh ingga ahik mato heir totoguo me laur tar uahuhu keip tar kekeig, bo inggono puk ke uabusa keip tar kekeiguo tar bulbulunar matan, doh ke uakadaka keip tar ulun. <sup>45</sup>Doh ingga ahik mato nguh totoguo, bo tar binaka ku lekameo tar umene, a kuahene, ahik mata

<sup>h</sup> 7.34 Luk 15.2   <sup>i</sup> 7.37 Mat 26.7; Mak 14.3; Jon 12.3

uolong uakenua tar nguh tar kekeiguo. <sup>46</sup>Doh ingga ahik mato pikur me uaiuai toro lugu, bo inggono ke pikur tar amiamuh tar kekeiguo. <sup>47</sup>Temaene, Inggo u hire totomua, a kuanene na bureher niguata uasa, bo ke kusa luara liu puk God taninin, maeit inggono ke ualasira tar uleikintieher nimalara totoguo, bo mai ge ahik paha burehe na niguata uasa ka siokor kusa luaraig, inggon e ualasira puk tar sasalikir nimalar.”

<sup>48</sup>Kare kula Iesu tar kuaha pare, “Inggo ku kusa luara liu tenang niguata uasaa.”

<sup>49</sup>O gisiamer tamatasis ka ein tagu tatanon ra ueluelkule katongois pare, “Maionor tamatane, maeit re kusa luara liuono tenas niguata usar tamat.”

<sup>50</sup>Jesu ke kula tar kuaha pare, “Reng nitagorong mana totoguo ke uauheil totomua, o la keip toro hiarou.”

### O kuaha geka ualakurum tagu tas Iesu

**8** <sup>1</sup>Ke karuh baka per puhonene, Iesu ke haijala hahai toro uan menia toro uauanilik tar uelhire tauete toro Uelhire Uaia gero la tur tena Nitoia God. Doho siokor hangaul, doha tang torikir tamatang uakuakeluk ra ualakurum teilimpe tatanon <sup>2</sup><sup>k</sup>menia tasir gisiamer kuaha pono geke geil liu turis Iesu tasir liouana uasa, kara uauiais res momouh. Gisina tes Maria gera kilain tang Makdala geka geil liu turisir mouitir liouana uasa tatan, <sup>3</sup>doh Joana na kuaha Kusa ger tamatang kaeke tena uma Herot, kare Susana, doho burehemper gisiamer. O kuahasine ka poul keip tasisina ter nosir mani katong.

### O uelhire uaranga tar tamata geke lebe tar uatunar raes-uit

<sup>4</sup>Doh tar binakon o bureher tamata ra la tur toro burehe ro uan, ka lame tang Iesu mara longoro tatanon, inggono ke ueluatata toro uelhire uaranga rone. <sup>5</sup>“A tamata ke la tena iom, kare lang leba tar uatunar raes-uit. Git re kurasa pelaono tar uatun, a giniamer ke duduko tar lel, kara ueihueih uaponor tamata ra la pe tar lel, doho tetiaua ka me ein tar uatun. <sup>6</sup>Doha giniamer uatun ke dud i rana tar papaluan, doh gine ke tungara kai penin, ginina ke matengua, teene ahik pe me laur. <sup>7</sup>Doha giniamer uatuna ke pungpungala i uantinana tar uoho ueluelhung, kare hai tanenguanina tar raes-uit, kara hikinguanina pahe banotong hua kai. <sup>8</sup>Bo a giniamer pukur uatunar raes-uit ke pungala tar kotan, ke hua kai, kare ua tar bureher kukuanana pare, a 100ir uatunar raes-uit ke kotpokoso tur tar siokon siounur uatunar raes-uit.”

Ke mene uakapa pe Iesu toro uelhire rone, inggono ke kula ualeik pare, “Mai ger to talingana tar longor, e longor.” <sup>9</sup>Doh no tamatang

<sup>j</sup> 7.50 Luk 8.48; 18.42 <sup>k</sup> 8.2 Mat 27.55-56; Mak 15.40-41; Luk 23.49

uakuakeluk Iesu ka dangata tatanono tar uakalahara toro uelhire uaranga rone.

<sup>10</sup> Kare kula Iesu pare, “Inggoum ka heirisioum tar niateng tar uelhire uaouo tena Nitoia God, bo o gisiamhe ra longoro puk getu meno toro uelhire uarang, maeit,

‘Ra bangasin, bo ahik puk pah ra banotong bang parok, gisina ra longor, bo ahik puk pah ra banotong longor parok.’” *Aisaia 6.9*

<sup>11</sup> Iesu ke kula poluk pare, “Gine ter tengkana tun ro uelhire uarang pare. A uatunar raes-uit tono uelhire God. <sup>12</sup> Gisit tar lel teasina teka longor, doh Satan ke lame, kare me kale liu tur toro uelhire tar koloususin mara hikisina pah ra tagorong man, doh ra uelkarusis. <sup>13</sup> Gisit tar butur papalauan teasis ra kale keip toro uelhire tar niuaha tar binaka ra longoro tang roon, bo gisina puk ahik pah ra tagorong mana uapopokoh, kara tagorong mana puk tar sikinar binak, bo tar binakang uedanga puk gisin e punga uahiu res nitagorong man. <sup>14</sup> Doha uatuna geke pungpungako i uantinanina tar uoho ueluelhung, ginina te misiana tar tamatatie ke longoro tono uelhire God, bo tar binaka puk ke uangoulionane tar kot inggon e namanantiehe tun puk tar niduh, doh tar inete uaiaane tar koto gere uauaha tatanon. A mamang inetelikinanine teke uapekout tane tono uelhire God, maeit ahikingua na nitagorong manono pahe hua kai. <sup>15</sup> Bo a uatuna geke pungpungako tar kotan te misiana tasir tamatasis ka longoro tun nomana tono uelhire God, kara namana uaia tang roon, kara sanga dede tun, kara uatut mara uakotpokoso tar bureher nguata uaia.”

### O tamata gera guata uaia

<sup>16</sup> <sup>m</sup>“Ahik me tamata re ualuh mo lam, kare kokop tane me inet ue e uamokola i kukulebanga toro uat, bo inggon e uatok i rana toro teboul mara me bangasit ra lekame ro luh pe roon. <sup>17</sup> <sup>n</sup>A huar inete re moko uaou, ginina ra turung uakalaharaig, doha huar inete ra gomo taneig ra turung ateig ue ra puka uakalaharaig. <sup>18</sup> <sup>o</sup>Temaene mu namana uaia tunoum hape rung ualongoro pe. Mai ge kae manasain mena inete ra turung heir uanoto polukin mena giniamhe, mai ge ahik me nana ue a haua ke namana siragion a nan ra turung kale liu turig tatanon.”

### Tinana Iesu, doho bung tahin

<sup>19</sup> Tinana Iesu doho bung tahin ka me marang banga tatanon, bo ahik puk pah ka banotong la uahuhut tatanon, teeit o burehentieher tamata ra uangoul iuma tar um. <sup>20</sup> Doha tang siokor tamata ke hire tatanono pare,

<sup>1</sup> 8.10 Ais 6.9-10   <sup>m</sup> 8.16 Mat 5.15; Luk 11.33   <sup>n</sup> 8.17 Mat 10.26; Luk 12.2

<sup>o</sup> 8.18 Mat 25.29; Luk 19.26

“Tinoumua, doho bung tahim gisila ra tur i kalahar, ra marang banga totomua.” <sup>21</sup>Bo inggono puk ke mene hahaua pare, “Gisit ra longoro tono uelhire God, kara guata uakeluk tes tinouguo, doho bung tahiguo.”

### Iesu ke uahiarouo tar pang rom

<sup>22</sup>Doha siokor marein Iesu ke kula tosno tamatang uakuakeluk pare, “Ti la sairkout tar pang giamehenar kodomo uiluiloh.” Maeit gisina ka panete tar bout, kara hua. <sup>23</sup>Git ra hua pelasin, Iesu ke hohouo manas, doha tukung pang rom ke tentur, kare untiehe tun, kare sasaopoinir bout, kara marang dudurasin.

<sup>24</sup>O tamatang uakuakeluk ka sokor, kara la ualagura tang Iesu, ka kula pare, “Ir tamata uleik, inggeig deh ki hutung dudur!”

Kare tentur kaion, kare louara tar rom, doha butuana uleik, kare la kapar rom, kare hiarouo tununguaon. <sup>25</sup>Doh inggon ke dangata tosno tamatang uakuakeluk pare, “Ia kaeig remi nitagorong manoum.”

Doh gisina ka lutara keip tun tar nisokor, kara ueluedangateis pare, “A tamata hauonene, maeit ke longoror rom, doha butuan tatanon.”

### Iesu ke uauia tar tamata nihikung liouan

<sup>26</sup>Gisino ke uaulais tar painang Gerasa gere moko tar pang giamehenar kodomo uiluiloh i Galili. <sup>27</sup>Tar binaka ke ueih uahuako Iesu toro sarang ion, gitir tamata a peng tar uauanilikion a nihikung liouan ke me tupara tatanon. Tar barahar binak a tamatane ahik mata loho tagu me gomono ue e uangoul iuma me um, bo e uangoul puk i lolono tar lebanganitir nosir mat. <sup>28</sup>Tar binaka ke bangono tang Iesu, inggono ke kaling ualeik, doh ke baka uahuain i hutuna tar kekenon, kare kula ualeikintiehe tun pare, “A hua ro marang guataia totoguo, Iesu ger tuna God ger i ranantiehe tun? Inggo u dangata tutup tun totomua, ahik paho uauelmahing totoguo!” <sup>29</sup>Inggon ke kula pare, teeit Iesu ke kula tar liouana uasa e tauete liu tar tamaton. A bureher binak a liouana uasa e hiku tatanon, doho tamata ra uoto uih tane tatanono toro tiein, doh ra tur kauেকে tatanon, bo inggono puk e reih uatakout dedempe toro tien, doha liouana uasa ke uoum keip tatanono tar butur belun.

<sup>30</sup>Iesu ke dangata tatanon, “Mair hangoumua.”

Kare mene hahauono pare, “Inggeim o manai.” Ter hauon o bureher liouana uasa ka hiku tatanon. <sup>31</sup>Doh gisina ra dangdangata uapoul kompe tang Iesu ahik pahe ualatoho tasisina ra la tar butur kitkitupun ger nosir mat menia tasir liouan.

<sup>32</sup>Doho bureher hueit ra ein ein teil tar hiuhiuon i huhutunalik. Maeit o liouana uasa ra dangata kompe tang Iesu tar uamaluana tasisina tar la hikula tasir hueit, doh Iesu ke uauia tasisin. <sup>33</sup>Tar binaka ka tauete liu tur per liouana uasa tar tamat, kara la hikungua tasir hueit. Doho

hueitisina ka ualo uateuele uahiuako tar hiuhiuono tar butur re mokor kodomo uiuiloh, kara la siokor houp i laur.

<sup>34</sup>Tar binaka ka bangasit ra kaukaueke tasir hueit tar puhonene, gisina ka ualo liu, doh ka la uahire tar uan, doh tar pang uan uiloh. <sup>35</sup>Doho tamata ka la tar la banga tar haua ke kotpokos, kara lamesina tang Iesu, doh gisina ka uelutpara tar tamata geka tauete liu turisir liouana uasa e tabila uahuhut tar kekena Iesu, inggone hiku teil tar hikhiku, doh na ninamanon a kalahara uaia tun, gisina ka bang, kara sokor. <sup>36</sup>Doho tamatasine ka bang, ka la hire tasir gisiamehe hape ke uauia pe Iesu tar tamata ger nihikung liouan. <sup>37</sup>Doho tamatasine ra uangoul uiलो tar pang uan i Gerasa ka dangata tang Iesu tar hiliu tasisin, teene gisina ka sokoro uasa tun.

Maeit Iesu ke panete tar bout, kare hiliu. <sup>38</sup>Bo a tamata geke tauete liu turinir liouana uasa ke dangata tutupe tang Iesu tar la tagu tatanon, bo Iesu puk ke ueluelutula tapokis tatanon, ke kula pare, <sup>39</sup>“Tapokis tenang uan, karo la hire tar mamang inetelik geke guataig God ke poul pe totomua.” Maeit gitir tamata ke hiliu, kare la hire tauete uakapa tun tar uan uleik, hape ke guata pe Iesu tatanon.

#### A keketik ger mat, doha kuaha ger momouh

<sup>40</sup>Song ke panete Iesu tar bout, kare sairkout tapokis poluk tar kodom uiuiloh i Galili, kare me pokoso tar giameher pain, doho bureher tamata ka uaha uangoul tun tatanon, ge gisina pe ka siokor uangoungoul tatanon. <sup>41</sup>Doha tamata uleik tenas umang lotur Ju ke me pokos, a hangana tang Jairus, inggono ke la hatup uahiu i uoumuhia tar kekena Iesu, kare dangata totouaha puk tang Iesu tar lame tena umon, <sup>42</sup>ge inggono pe a tang siokon siounur tun a kuah, here no siokoro hangaul, doho torik no krismas, doh inggon e marang mata manas.

Git re la pela Iesu tena umar tamata uleik, o bureher tamata ra la tagu teil tatanono ra ueluelutabar tun. <sup>43</sup>Doha tang siokor kuaha geke tutung bakue e la tagu teil pono tasir manai. Inggonor kuaha ke tutung bakue tar puhung barah e banoto toro siokor hangaul, doho torik ro krismas, bo ahik puk me tamata ke matotong uauia tatanon. <sup>44</sup>Inggono ke haiala sikoroaha i muduhia tang Iesu, kare me tuha toro suruna no hikhikuon, doh ahik me manasan no matono ko kap, kare uangua.

<sup>45</sup>Doh Iesu ke dangata pare, “Maiene ke me tuha totoguo.”

Doho tamatasine ka siokor uolih tatanon, kare kula Pita pare, “Ir Tamata Uleik, o bureher tamata ra kusukus, kara tabtabarala totomua.”

<sup>46</sup>Bo Iesu puk ke kula tapokis pare, “A tamatampe ke me tuha totoguo, inggo u ate, ge a nitampopokoho pe ke hiliu tur totoguo.”

<sup>47</sup>Gitie ke ate per kuaha pare, Iesu ke ate tatanono ke tuha pe tono hikhikuon, inggono ke sokor, kare poroporo uasa tun, kare la hatup

uahu i hutuna tar kekena Iesu. Doh gane i uoum tasir bureher tamat, inggono ke hire tauete tar tengkana ae maene ke tuhtuhono tatanon. Doh ke hire pono hape ke uia pe, doh no matono ko kapa uateuele tun. <sup>48</sup>P Song ke kula Iesu tatanono pare, “Inggar tug, reng nitagorong mana ke uauia totomua, o la keip toro hiarou.”

<sup>49</sup>Gine re mene haraha pe Iesu, a tamata ke la turume tena uma Jairus ger tamata uleik tar umang lotu, kare hire tang Jarius pare. “A tumua ke mat, ahik paho uabolboloho baka poluk tar tang ualasil.”

<sup>50</sup>Bo Iesu puk ke longoro tar puhonene, kare kula tang Jarius pare, “Ahik paho sokor, tagorong mana kompe, e turung uiaon.”

<sup>51</sup>Tar binaka ke me pokoso Iesu tena uma Jairus, inggon ahik mata uamaluana me tamata tar leka keipila iuma tatanono tes Pita puk manasampe me Jon, doh Jems, kare tamanar keketik me tinan. <sup>52</sup>Doh Iesu ke kula tasir tamatasis ra kiring, kara ueldolomo pare, “Mu uakenua manasa tar kirkiring, ge inggono pe ahik mata mat, inggon e hohouo kompe.”

<sup>53</sup>Doho gisina ka uanuanio tatanon, ra ate pe tar kuaheit ke mat. <sup>54</sup>Bo Iesu puk ke kusa tar limanon, kare kula pare, “Ir keketik, tentur kaiha!” <sup>55</sup>Doha iabenono ke tapokisime tatanon, kare la tentur kaingua kompe, song ke kula Iesu tasisina ra heir me niein tatanon. <sup>56</sup>Doh tinanar kuah, doh tamana kura siokor lutar, bo ke ualatur puk Iesu tasisina pare, “Ahik pah mu hire me tang sioko tar hauene ke kotpokos.”

### Iesu ke heir tar kalekinale tasir aposoul

**9** <sup>1</sup>Tar binaka ke me kila toto Iesu tar siokor hangaul doha tang torikir aposoul, inggono ke heir tar nitampopokoh, kare uatohangana tasisina mara banotong geil tauetesina tasir liouana uasa, kara banotong uauia tar mamang matelik. <sup>2</sup>Doh inggono ke ualatur tasisina tar la uelhire tauete tena Nitoia God, kara uauia tasir momouh. <sup>3</sup><sup>q</sup>Kare kula tasisina pare, “Ahik pah mu kale tagu me inete tar nila, ahik me tukan, ahik mo tolah, ahik me niein, ahik me mani, ahik me giniamer hihikung lohopalih. <sup>4</sup>Uangoul puk manasa tar uma gerung la lekaoum e tuka getung hilioum tar uanion. <sup>5</sup>Ge ahik mo tamata ra uauia tamiuoum, titire liu toro uou tar kekeimiu tar binaka rung hiliu tenas uanisina tar ualasila tasisina pare, God e turung uabato tasisin.” <sup>6</sup>Temaeit gisina ka la hahai toro uan, ka uelhire tauete pe toro Uelhire Uaia, kara uauia tasir tamat.

### Herot ahik mata ate maionene Iesu

<sup>7</sup>Tar binakon, Herot ger toia ke longoro manasa tar ineteninanine ke guataig Iesu, inggono ke tobouluntiehe tun, ter hauon o gisiamеhe ra kula sira pare, Jon ka uatua tapokisin ke mata pe, <sup>8</sup>doho gisiamеhe ra kula pare, Elaija ke kotpokos, doho gisiamеhe ponompe tasisina ra kula pare, A tang siokor propeiting sioun ke me tua tapokis.

<sup>9</sup>Bo Herot puk ke kula pare, “Inggo ku ueliu tang Jon toro mat, ke tokout pe nag tamatang uiliatungio toro lunon! Bo mai pukunguaonene ku longoroio ke guata tar ineteninanine.” Doh inggon ke uedanga tar marang banga tatanon.

### Iesu ke ualaein tasir 5,000ir tamat

<sup>10</sup>Tar binaka ka tapokisilar aposoul, gisina ka la hire tang Iesu tar mamang inetelik ka guataig. Doh Iesu ke kila tagungua tasisin, kara la mes pahes tar uan gera kilain i Betsaida, <sup>11</sup>bo o manai tamata puk ka longoro kout tang Iesu mesno aposoul ra lang la pe, temaeit ka uakeluk tasisin. Inggono ke uauia tasisina tar lame, kare menmene tasisina tar Nitoia ger nang God, kare uauia tas mais gera momouh. <sup>12</sup>Git re lang reiu manasa peon, a siokor hangaul, doha tang torikir aposoul ka lame tang Iesu, kara kula pare, “Ueluelula tasir manai tamatasine mara la toro uauanilik, doh tar pang giamehe mara sir me niein, doh me buturing hohou, ter hauon a buturene ahik me uan.”

<sup>13</sup>Bo Iesu puk ke kula pare, “Mu heir tasisina me niein!”

Kara mene hahauanguasina pare, “Inggeim deh romio tolima puk ro bereit, doha torikir ian, doh ginin ahik pahe matoto ter uia puk manasampe geting laeim, karing la bulaua mes nieinir tamatasine.” <sup>14</sup>(Kaelainane tar 5,000ir bulout ra pepe.)

Bo ke kula puk Iesu tosno tamatang uakuakeluk pare, “Uatabila uahiua tasisina tar toto, a tolimar hangaul tar siokor toto.”

<sup>15</sup>O tamatang uakuakeluk ka guata sir, kara siokor tabila uahiuar tamat. <sup>16</sup>Kare kale Iesu toro tolima ro bereit, doha torikir ian, kare banga kai taro i Heuen, kare kulang uauia tang God, kare pis taninin, song ke heir taninina tasir tamatang uakuakeluk mara bul tasir tamat. <sup>17</sup>Gisina ka siokor ein uabanoto tun, kara la ur totor tamatang uakuakeluk tar siksikir niein geke mok ke la matoto tar siokor hangaul, doha torikir tohen.

### Pita ke kula tang Iesu ter Kristo

<sup>18</sup>A siokor binaka Iesu ke lotu me pahen, doh no tamatang uakuakelukon ra uangoul tagu, kare dangatono tasisina pare, “O tamata ra kula maio.”

---

<sup>r</sup> 9.7 Mat 16.14; Mak 8.28; Luk 9.19   <sup>s</sup> 9.9 Luk 23.8

<sup>19</sup>“Kara mene hahauasina pare, “O gisiamehe ra kula pare, ingga te Jon ger tang uahuhu, o gisiamehe ra kula pare, ingga Elaija, doho gisiamehe ra kula pare, ingga a tang siokor propeiting sioun ko me tua tapokis.”

<sup>20</sup>“Kare dangatono pare, “Bo inggoum katongene mu kula maio.”

Pita ke mene hahaua pare, “Ingga ter Kristo geke heirihain God.”

<sup>21</sup>Maeit Iesu ke ualatoho uapopokoho tasisina pare, “Ahik pah mu hire me tamata tar puhene. <sup>22</sup>“Kare kula polukiono pare, a Tunar Tamat e turung kale tar bureher uelmahing, kara ueluelder mamahoholik mesir patere uleik, doho tamatang ualasira tar ualatut. Doh inggono ra turung tung pousin, doh tar uatouononor marein inggon e turung tua tapokis tur toro mat.”

<sup>23</sup>“Song ke kulono tasisina pare, “Gete me tamata re marang uakeluk totoguo, inggono pake de tar inete re malaraig, kare huata ualataoun tena korose, kare uakeluk totoguo. <sup>24</sup>“Ge a tamata pe gere kapil uanono tena nitua, na nituaon e turung rouo tatanon, bo mai puk gere heir tena nitua re uakeluk pe totoguo, inggon e turung tupara tena nitua. <sup>25</sup>Ge a haua per niuia re turung kaleinir tamata gete siokor gono tar mamang inetelikane tar kot, kare la oroho tena nitua ue e uasuasa katongoin?

<sup>26</sup>“Gete me tamata re matala totoguo, doh tonogo uelhireo, a Tunar Tamat e turung matala pono tatanono tar binaka re la keipime tena uinator, doh tena uinatoro Taman mesir anggelousiner dedeil. <sup>27</sup>Inggo gine ru hire tamiuoum toro man, o gisiamehe tasisine ra turane ahik pah ra mat e tuka geta banga baka tena Nitoia God.”

### Iesu ke kotpokoso keip tar luh

<sup>28</sup>Kura karuh bakar tualir marein ke mene baka pe Iesu tar inetenine, inggono ke kila tagu tas Pita me Jon, doh Jems, kara la taro i rana tar siusana tar la lotu. <sup>29</sup>Gine re lotu peon, a porenono ke uapalih, doh no hikhikuono ko me uapalih pare, o gaugaulintiehe tun, karo abeab. <sup>30</sup>Doha tang torikir tamata tes nu Moses me Elaija <sup>31</sup>“kura kotpokoso keip tar niuinator, kaura uelueluatata keip tang Iesu gete turung mata to i Jerusalem tar niguata geke umatotoin God.

<sup>32</sup>“Pita doha toking uanotono ka matahohouontiehe tun, bo tar binaka puk ka me gulete uaia manasa pesin, gisina ka banga tena niuinatoro Iesu ura tur keip per toking tamata tatanon. <sup>33</sup>Git kura hiliu per toking tamata tang Iesu, Pita ke kula tatanono pare. “Ir Tamat Uleik, auia tunumpe ring uangoul pe inggeimane. Geto malara ingga, inggeim mi turung tuha me touonor taluhane, me sioko me noumua, kare me siokor

<sup>†</sup> 9.19 Luk 9.7-8    <sup>‡</sup> 9.20 Jon 6.68-69    <sup>¶</sup> 9.22 Luk 9.44; 18.32-33    <sup>∗</sup> 9.23 Mat 10.38;

Luk 14.27    <sup>×</sup> 9.24 Mat 10.39; Luk 17.33; Jon 12.25    <sup>∑</sup> 9.26 Mat 10.33; Luk 12.9

<sup>∑</sup> 9.31 Luk 9.22    <sup>∗</sup> 9.32 2Pi 1.16-18



nang Moses, doh me siokor nang Elaija” (Pita ahik pahe ate uaia tar haua re menmenein.)

<sup>34</sup>Gitie re menmene peon, karo me ragom tane ro mahar langit tasisin, doh gisina ka sokoro ka leka pelasit toro mahar langit. <sup>35</sup><sup>b</sup>Kara longoro tar men e la tur toro mahar langit, o kula pare, “Gine ter Tuguo geku kedangain. Longoro tatanon.” <sup>36</sup>Tar binaka ko kapa ro men, o tamatang uakuakeluk ka banga puk tang Iesu me pahene manas. Doh gisina ka uamoko tar inetonene tatas katong. Kara hik mata hire tauete me tamata tar puhunine ka bangaig tar binakon.

### Iesu ke uauia tar keketik bulout

<sup>37</sup>Tar giameher marein tar binaka ka la uahua turuhasina tar siusan, o manai ka me ueltupara tang Iesu. <sup>38</sup>Doha tamat e uangoul tagu pono tasir manai ke kila ualeik pare, “Ir Tang Ualasis, Inngo u dangata uapopokohontiehe tun totomua tar la banga baka tar tuguo ger bulout, ge inggono pe ter tang siokon sioun pukur tuguo. <sup>39</sup>Doha liouana uasa ke hiku tatanon, kara hik me manasan, kare kaling ualeikion. Inngonor liouana ke uaporoporo tatanon, maeit ke la pungon i kot, kare la peroperer uauan, doha liouan e de tun mata hiliu tatanon, dohe mamantouontiehe kompe tatanon. <sup>40</sup>Inngo ku dangata uapopokoho tosnomo tamatang uakuakelukia tar uelueluata tauete liu, bo ahik puk pah ka banot.”

<sup>41</sup>Doh Iesu ke mene hahaua tasisina pare, “Inggoum deho tamatang tagtagorong boho tun, remi ninamanoum, doh nami niguat ahik tun paha kodkodoh. A touihar binaka ru turung pepe keipio tamiuoum, song rung la tagorong manoum totoguo? Ueliuime tar tumeitane totoguo.”

<sup>42</sup>Tar binakene re lamer keketik gitir liouana uasa ke baka uahua tatanon i kot, kare la poropor. Bo Iesu puk ke louar bise tar liouana uasa tar hiliu tar keketik, kare hiliuir liouan. Iesu ke uauia tar keketik bulout, kare heirila tatanono tang taman. <sup>43</sup>Doho tamata uakapa tun ka lutarantiehe tun ka banga pe tena nitampopokoho uleik God.

### Iesu ke hire poluk e turung mat

Tar binakon o tamata uakapa tun ka siokor lutarangua tar mamang inetelik ke guataig Iesu, kare kulono tosnomo tamatang uakuakeluk pare, <sup>44</sup><sup>c</sup>“Ualongoro uaia tun tar puhunine ru hiregio tamiuoum, a Tunar Tamat inggono ra turung ueliuin e la tar limasir tamat.” <sup>45</sup><sup>d</sup>Bo o tamatang uakuakeluk puk ahik mata naman manate a hauonoene ke mene uatuhaiono tasisin. A puhonene ka uamoko uaouoin tasisin, maeit gisina ra toboul haraha tar tengkana ro uelhire roon, doh gisina ka poroko pono tar dangata tatanon.

<sup>b</sup> 9.35 Luk 3.22   <sup>c</sup> 9.44 Luk 9.22   <sup>d</sup> 9.45 Luk 18.34

### Mai re i ranantieh

<sup>46</sup> Kare kotpokosonguar uelperer i uantinanina tasir tamatang uakuakeluk pare, te maiompe re turung i ranantiehe tasisin. <sup>47</sup> Doh Iesu e ate teil tar haua ra namanaigisin, kare kilame tar keketik, kare uatur tatanon i tektekena tatan. <sup>48</sup> <sup>f</sup> Song ke kula Iesu tasisina pare, “Mai re uaha uangoul tar keketikilikene tar hangougou, inggon e uaha uangoul pono totoguo, doh mai re uaha uangoul totoguo, inggon e uaha uangoul tar tamata geke heirihia totoguo. Ter hauon a tamata ge ahik paha tohangana uleik i uantinanina tamiuoum uakap, inggono tere uangoul sira pare, ter i ranantiehe tun.”

<sup>49</sup> Doh Jon ke kula tang Iesu pare, “Ir tang ualasin! Inggeim king banga tar tang siokor tamata geke guata keip tar hangoumua, kare geil liu tasir liouana uasa tasir tamat, doh inggeim king kula tane tatanon, ter hauon inggon ahik paha uanotoumiueim.”

<sup>50</sup> <sup>g</sup> Bo Iesu puk ke kula pare, “Ahik pah mu kula tane, mai ge ahik pahe tur tane tamiuoum, inggono ter uanotoumiuoum.”

### O tamatang tar uan i Samaria ka ueluelde tang Iesu

<sup>51</sup> Gine re lang uahuhut manasa peinir binaka ra kale tapokis pe taroin Iesu i Heuen, inggono ke la petutupe manasa tar la i Jerusalem. <sup>52</sup> Kare ualatue uoum tasir gisiamer tamat, kara la iuma tar uan tar pang uan i Samaria mara kaleuatoro uoum tang Iesu re la peme. <sup>53</sup> Bo o tamatang tar uan puk ahik mata uauia tatanono tar lame, teene re lang la manasa pe Iesu i Jerusalem.

<sup>54</sup> <sup>h</sup> Tar binaka kura banga Jems me Jon ge na toking tamatang uakuakelukono ka de pesina tang Iesu, kaura kula tatanono pare, “Ir Tamata Noman! Innga o malara tamiraeim mira kila uahia mo hue o hiua tur i Heuen, karo ualuh uakapa tasisin.” <sup>55</sup> Bo Iesu puk ke uagegeme, kare uelkukur tasasin. <sup>56</sup> Kara languasina tar giameher uan.

### Iesu ke hire tar niguata ra uakelukulain tatanon

<sup>57</sup> Gine ra haiala pelasina tar lel, kare kular tamata tang Iesu pare, “Inggo u turung uakeluk totomua ia ro lihihiaa.”

<sup>58</sup> Kare kula Iesu tatanono pare, “O lo roke nas lebang, doho tetiaua nas niu. Bor Tunar Tamat ahik mena uma uamatoto tun re hohouin, kara hik me butur re uadedeke toro lun.”

<sup>59</sup> Iesu ke kula tar tang giameher bulout pare, “La uakelukumeane totoguo.” Bo inggono puk ke mene hahaua pare, “Tamata Noman! Umaluana baka totoguo geru la keu baka tang tamoug.”

<sup>e</sup> 9.46 Luk 22.24    <sup>f</sup> 9.48 Mat 10.40    <sup>g</sup> 9.50 Mat 12.30; Luk 11.23    <sup>h</sup> 9.54 2To 1.9-16

<sup>60</sup>Doh Iesu ke kula tanono pare, “Uakeluk totoguo, karo uamaluana tas ge ahik mes nitagorong mana ra keu tosnosio mat. Bo ingga puk o la ueliu tauete toro Uelhire Uaia tena Nitoia God.”

<sup>61</sup><sup>i</sup>A tang giameher tamata ke me kula tang Iesu pare, “Ir Tamata Noman, inggo u turung uakeluk totomua, bo o uamaluana baka kompe totoguo geru la uahire baka toso tahigulik ru hiliu pe.”

<sup>62</sup>Doh Iesu ke kula tatanono pare, “Maiompe gere uakekena tar uakeluk totoguo, kare uiliangara tapokis, inggon ahik pahe banotong kalekinale uaia tun tena Nitoia God.”

### Iesu ke ualatue tosno mouitir hangaulur tamat, doha tang torik

**10** <sup>1</sup>I muduhia tar puhonene, a Tamata Nomana ke uamatoto tasir gime mouitir hangaul, doha tang torikir tamat, kare ualatue tang tang torik tasisina ra uoum tatanono toro mamang uauanilik, kare toro butur re marang lagion. <sup>2</sup><sup>k</sup>Kare kula tasisina pare, “A niein a burehe tar ueuer, bo o tamatang kalekinale puk o pag. Mu dangata tang tanener iomo te mare ualatuehaono mo tamatang kalekinale tar la kale toto tar niein.” <sup>3</sup><sup>l</sup>“Mu la manas! Mu la sirala misiana tar sipsip kalan i uantinanina tasir lo roke. <sup>4</sup><sup>m</sup>Ahik pah mu kale me dukung mani ue me dukung inet ue me giameher toking pang su, doh inggoum ahik pah mu mene uatoro me tang sioko tar lel.

<sup>5</sup>Doh tar binaka rung la lekalaoum me um, inggoum mu kula uakikilanga pare, ‘No uelhiarou God o moko tar umene.’ <sup>6</sup>Gete me tamatang uelhiarou re pepe, no uelhiarou God o moko uaiala tatanon. Geta hikion, no uelhiarou God o tapokis tamiuoum. <sup>7</sup><sup>n</sup>Mu uangoul iuma tar umoneit ro moko ro hiarou, doh mu ein to, karung inum to ue me hauampe gera heirigisina tamiuoum, inggono ter bulauamiuoum rung kalekinale pe tang God. Inggoum ahik pah mu la uangoul hahai toro um.”

<sup>8</sup><sup>o</sup>“Doh getung laoum me uauanilik, doh gisina ra uaha uangoul tamiuoum, mu ein kompe tar niein gera heirigisina tamiuoum. <sup>9</sup>Karung uauia tasir momouh ge kaeis tar buturuon, karung hire tasisina pare. ‘Tar Nitoia ger nang God inggono gine manas i hutuna tamiuoum.’ <sup>10</sup>Bo getung laoum me uan, doh ahik pah ra uaha uangoul tamiuoum, mu la turane tar morenar uan, karung kula pare, <sup>11</sup><sup>p</sup>‘O uou rone tenami uanioum geko rakut tar tatabalanar kekeimiueim, inggeim mi tunaha liu tapokis polukula tamiuoum, teeit inggeim mi marang uaate tamiuoum pare, na Nitoia God gine manas i hutuna tamiuoum, bo inggoum puk mu

<sup>i</sup> 9.61 1To 19.20    <sup>j</sup> 10.1 Mak 6.7    <sup>k</sup> 10.2 Mat 9.37-38; Jon 4.35    <sup>l</sup> 10.3 Mat 10.16

<sup>m</sup> 10.4 Mat 10.7-14; Mak 6.8-11; Luk 9.3-5    <sup>n</sup> 10.7 1Ko 9.6-14; 1Ti 5.18    <sup>o</sup> 10.8 1Ko 10.27

<sup>p</sup> 10.11 Apo 13.51; 18.6

ueluelde.’<sup>12</sup> <sup>q</sup>Inggo gine ru hire tamiuoum pare, ‘Tar binaka re kedanga God tasir tamat, a niuabato tasir tamata tar uanioneit, e turung i rana uain tar niuabato ka guatain tasir tamatang Sodom.’”

### **O tamatasit halana ta uapalih tenas niguat**

<sup>13</sup>Kare kula polukiono pare, “Kuasalikisoumeitir tamatang tar uan i Korasin! Doh kuasalikisioumeitir tamatang tar uan i Betsaida! Ge pakene ka guata toigir nitouonine kung bangagioum i Tair, dohi Saidon, gisina pake sioun tun ka uapalih tenas niguat. Kara hiku tar hikhikung ueldolom, kara sorois tar taun tar ualasira pare, ra ueldolomo tun tar niguata uasa ka guataig. <sup>14</sup>Bo a niduh pukene re turung kedanga keipin God tasir Tair, doho Saidon a kikitilik tanene tamiuoum, ter hauono inggoum kung banga ku guata peo tar nitou, doh inggoum ahik dedempe pah mu ualasira pare, mu ueldolomo tenami niguatar sa. <sup>15</sup>Doh inggoumur tamatang tar uan i Kaperneam, ahik pah mu namana pare, te God re turung kale kai tamiuoum i Heuen, inggon ahik. Inggon e turung baka uahuako tamiuoum i Hel.”

<sup>16</sup>“Kare kula poluk Iesu tosno tamatang uakuakeluk pare, “Gete me tamata re longoro tamiuoum, inggon e longoro totoguo, doh gete me tamata re ueluelde tamiuoum, inggon e ueluelde totoguo, doh gete me tamata re ueluelde totoguo, inggon e ueluelde tang God geke ualatueha totoguo.”

### **O tamatang uakuakeluk ka uah**

<sup>17</sup>A mouitir hangaul, doha tang torikir tamatang uakuakelukusine ka tapokis keip tar niuah, kara kula pare, “Ir Tamata Noman, o liouana uasa ka longoro tun tamiueim tar binaka king ualatoho keipieim tasisina tar hangoumua.”

<sup>18</sup><sup>s</sup>Doh Iesu ke mene hahaua pare, “Inggo ku banga tang Satan ke punga tur peha i Heuen misiana sira tar kanau. <sup>19</sup>Inggo ku heir tar nitampopokoho tamiuoum marung banoto tar ueih uaponola tasir soi uasa, doho hilang, doh marung la pehuaroum tar mamang nitampopokoholik ger nosir uelmatan, doh ahik me inete re uaelmahing tamiuoum. <sup>20</sup>Bo ahik puk pah mu uaha ka longoro per liouana tamiuoum, inggoum mu uaha puk ka bolo peigir hangamiu i Heuen.”

### **Iesu ke uah**

<sup>21</sup>Tar binaka tunionene, Iesu ke uoun tar niuahene re la tur tar Iabena Dedeil, kare kula pare, “Inggo u uatakai totomua, Tamoug, ingga ter

<sup>q</sup> 10.12 Uak 19.24-25; Mat 10.15; 11.24    <sup>r</sup> 10.16 Mat 10.40; Luk 9.48; Jon 5.23

<sup>s</sup> 10.18 Jon 12.31; UGO 12.8-9    <sup>t</sup> 10.19 Ker 91.13; Mak 16.18    <sup>u</sup> 10.20 Pil 4.3; UGO 3.5

Tamata Noman i Heuen, dohi kot, teene ko touaouo pe ingga tar inetenine tasir tamata gesir tang naman, karo tamatang ate, karo ualasira taninina tasir keketik. Aa! Tamoug, gininanine ter inete uaia re uauaha totomua.”

<sup>22</sup> Gine ke lotu uakapa pe Iesu tang God, song ke uakekena tar mene tasir tamata pare, “Tamouguo ke siokor heir tar mamang inetelik totoguo. Ahik me tang sioko re ate hape re baka per Tunon te Tamana puk manasampeono tere ate. Doh ahik me tang sioko re ate hape re baka pe Tamanono ter Tunono puk manasampe, kare tes mais puk geke kedangaisir tunono tesir niualasira uakalahara pon.”

<sup>23</sup> Song ke tur uiuirila Iesu tosno tamatang uakuakeluk, kare la mene uaouo pare, “God ke guata uaia tasisit geka banga tar mamang inetelik kung bangagioum. <sup>24</sup> Gine ru hire tamiuoum pare, o bureher propet, doho toia ka marang banga tar hauanit rung bangagioum, bo ahik puk mata bang luar, doh ka marang ualongoro tar hua kung longorogioum, bo ahik puk pah ka longoro tagu.”

#### O uelhire uaranga tar tamata uaia ger peng Samaria

<sup>25</sup> Doha siokor binak, a tang siokor tamatang ate tar ualatutur nosir Ju, ke tur kai, kare marang uedanga tang Iesu. Inggono ke dangata pare, “Ir Tang Ualasir, A hua paku guataio maru banoto tar kale tar nitua gere moko dedela.”

<sup>26</sup> Doh Iesu ke mene hahaua tanono pare, “A hua ka boloin tonosio ualatutur Ju? Hape ro naman manate pea tang roon.”

<sup>27</sup> Kare mene tapokisir tamateit pare,

“ ‘Malauelhir tar Tamata Nomana ge nang Goda tar koloum uakapa tun,  
doh tar iabeim uakapa tun,  
doh reng nitampopokoho uakapa tun, doh reng ninamana uakapa tun.’

‘Karo malauelhir toso uanotoum misiana ro malara katongo peia.’ ”

*Ualatut 6.5; Nas Kalekinaler Pater 19.18*

<sup>28</sup> Doh Iesu ke mene hahaua pare, “Inggono ko mene uakodkodoh. La, karo la guata sira paar, maro turung uangoul dedela ingga.”

<sup>29</sup> Bo inggono puk e marang uakodkodoho katongoin tar matasir tamat. Temaeitie ke dangatono tang Iesu pare, “Doh maionener uanotouguo.”

<sup>30</sup> Iesu ke mene hahaua poluk pare, “A tamata ke la uahuuako i Jeriko, e la tur i Jerusalem, doh tar binakene re lakoon, kara kusa koutur ueuenaua tatanon, kara laruh liu tena gomomon, kara uiliatang tatanon, kara hiliu tatanono ke mata uapuh.”

† 10.22 Jon 3.35; 10.15    † 10.25 Mat 22.35-40; Luk 18.18    † 10.28 KT 18.5

<sup>31</sup>“Kare lamer paterener nosir Ju tar siokonor lel, doh tar binakene ke bangono tar tamateit, inggono ke lihila tar pang giameh, ke la siauampe tatanon. <sup>32</sup>Doha tang siokor Libai ke la ponome tar buturuon, kare me bang huara tar tamaton, inggon ke lih ponola tar pang giameh, ke la siaua pono tatanon.”

<sup>33</sup>“Bor tamatang Samaria puk ke haijala tar buturuon, kare banga tar tamatono re rikin pe, kare ueldolomo tatanon. <sup>34</sup>Inggono ke la uelhirila tatanon, kare la uamoko tar uaiuai, doha bino i rana tena taktakaron, kare uih tane keip taninina tar mahar gomom. Song ke kihanga tatanono tena donki, kare kalela tatanono tar umang hohou gera bulbulauain, kare la kauেকে to tatanon. <sup>35</sup>Tar giameher marein inggono ke kale tauete tar torikir mani silva, kare heir tang tanener um, kare kula pare, ‘Kauেকে tatanon.’ Doh gete hahauar bulauana tar maniene, inggo u me turung bulaua uadouh totomua tar binaka ru la tapokisime.”

<sup>36</sup>Song ke dangata Iesu tar tamatang tar ualatut pare, “Hape ro namana pea? Hingia tasir tang touonosine ke guata sira pare, ter uanotono tar tamateit ka uiliatunginir ueuenau.”

<sup>37</sup>Kare mene hahauar tamatang tar ualatut pare, “Ter tamata geke ueldolomo tatanon teke guata uiaa.”

Ke hirengua Iesu tanono pare, “La karo la guata sir.”

### Marta, doh Maria

<sup>38</sup>Iesu mesno tamatang uakuakeluk ra la harahampela tenas nila i Jerusalem, kare la pokosola Iesu tar uan gere uangoulinir kuah a hangana tang Marta, kare kila ualeikenguaono tang Iesu e lame iuma tena umon. <sup>39</sup>“Doh Marta tang tahina kuah a hangana tang Maria geke tabila uahuhut tar kekena Iesu, kare ualongoro tar haua re menegion. <sup>40</sup>Bo Marta puk ke namanantiehe tar nikaleuatoronar niein ginit paka guataig, kare me dangata pare, “Ir Tamata Noman, ahikia paho namana ke hiliu pe tahig kuaho totoguo, karu guato me paheig tar kalekinale? Hire tatanon e me poul totoguo!”

<sup>41</sup>Kare kula Iesu tatanono pare, “Marta, Marta, ingga o namnamanantiehe puk, karo hagouo uasa tar mamang inetelik, <sup>42</sup>ahik paho namana uaburbureh, namana puk tar siokor ineter uia. Maria teke kedanga tar hauar uia, doh inggon ahik pah ra turung kale liu turin tatanon.”

### Iesu ke ualasira ra lotu pein God

**11** <sup>1</sup>A siokor marein Iesu ke lotu to tar siokor butur. I muduhia ke lotu uakapa baka peon, kare me kula na tang siokor tamatang

† 10.39 Jon 11.1; 12.2-3    † 10.42 Mat 6.33

uakuakelukono tatanono pare, “Ir Tamata Noman, o ualasira tamiueim pare, hape ring lotu peeim ngohina sira kompe ke ualasira pe Jon tosono tamatang uakuakeluk.”<sup>2</sup> Inggono ke kula tasisina pare, “Tar binaka rung lotuoum, mu lotu pare,

‘Tamamiueim,  
inggeim mi uouongono tar hangoumua.  
Uamaluana tenang Nitoia e laha.

<sup>3</sup> Innga o heiriha tamiueim tar mamang mareinilik tar niein ring ein dedegieim.

<sup>4</sup> O kusa luara liu tar niguata uasar nomiueim, ngohina ring kusa luara pe inggeim tas gera guata tar niguata uasa tamiueim.

Innga dehen to keip tamiueim tar uedang.’ ”

<sup>5</sup> Kare kulanguaono tasisina pare, “Gete me tang sioko tamiuoum e lame me kaluana tatanono tar uantinaninar boung, kare kula pare, ‘Kaloug, heir baka totoguo mo touono ro bereit. <sup>6</sup> Ge a tang sioko per kalougguo ke sabsabalame totoguo, doh inggo ahik uadeil me niein ru heirig tatanon.’ <sup>7</sup> Song re turung mene hahaua kaloumuaetie iuma tar um pare, ‘Ahik paho menmene koutkout totoguo. O pirik o nibel tane manas, doh nogo keketikio inggeim gine manasa tenami uat. Inngo u de tun matu tentur, karu heir totomua me inet.’ <sup>8</sup> Inngo gine ru hire tamiuoum, inggon ahik pahe turung tentur, kare heir tatanono toro bereit, ge a kaluana pe tatanon, bo teene e dangata toutouaha puk peon, maene inggon e tentur uelhir, kare heir uamototo tun re malahir peon.”

<sup>9</sup> “Temaait ru hireo tamiuoum pare, Dangata mara turung heiriono tamiuoum. Mu sir marung tuparoum. Mu dok mara puk e ueleheirin ro pirik tamiuoum. <sup>10</sup> Ge o tamata uakapa pe gera dangata ra kale, mai re sir e tupar, mai re dok o turung takapuk.”

<sup>11</sup> “Ahik uadeil me bulout tamiuoum re banot e heir me tuna me soi tar binaka re dangata me ian. <sup>12</sup> Ue gete dangatar tumua mo tagunung ein, ingga o ate ahik paho banoto heir tatanono me hilang.”

<sup>13</sup> “Bo inggoum pukener tamata uasa, mu uoto heir pono tar inete uaia toso bung tumiu, toro mana tun Tamamiuoumenah i Heuen a tamata uaia tun re heir pe tar Iabena Dedeil tasisit ra dangata tatanon.”

### Iesu, doh Belsebul

<sup>14</sup> A siokor binaka Iesu ke geil tauete liu tar liouana uasa geke uapau tar tamat. Doh gine ke hiliu per liouan, a tamata ger pau ke men, kara lutarar manai. <sup>15</sup> “Bo o gisiamhe puk tasisina ka kula pare, “Inggon e

<sup>a</sup> 11.15 Mat 9.34; 10.25

guata keip tena nitampopokoho Belsebul ge nas uleikir liouana uasa, maeit re geil tauete liu tasir liouan.” <sup>16</sup> <sup>b</sup>O gisiameha ka marang uedanga tatanon, maeit ka dangata me niuaparoko gere la tur i Heuen.

<sup>17</sup>Doh Iesu e ate teres ninamanasin, kare kula pare, “A pang uan gere pakpakahais tar toto, kare uelueluiliatunge katongo kompeis, gisina ra turung mamantouois. O matmatame gera ueluelsae, gisina ra turung ueluelueltageih. <sup>18</sup>Doh ge pake uiliatung katongoin Satan, hape re banoto pe na nitoiaon e uangoul uabarah. Inggou u kula pare, ter hauon inggoumu mu kula pare, inggo ku ueluelutula tauete liu keip tasir liouana tena nitampopokoho Belsebul. <sup>19</sup>Bo geto mana roono te mai ke heir tar nitampopokoho tosnomio tamatang uakuakelukium tar geil liu tasir liouan? Temaene gisinasine tera turung bang kedanga tamiuoum. <sup>20</sup>Bo gete ku guata keipio tar kamot limana God tar geil tauete liu tasir liouan, inggon e ualasira tamiuoum tena Nitoia God ke la manasame tamiuoum. <sup>21</sup>Gete tur kaukeke keipir tamata tampopokoho ter nanar um, kare uahekebe uatoro keipin teno baenat inggon e banoto tar kaukeke tena inetenit re matotoig, <sup>22</sup> <sup>c</sup>e tuka gete me tamata me tampopokohontiehe tun ke me pehuara tatanon, kare laruh liu tena ineteng uiliatungon gere uoto haono toig, kare la uelpakaha keip tena inetono tasir gisiameh.”

<sup>23</sup> <sup>d</sup>Kare kula Iesu pare, “A tamata ge ahik paha uanotouguo, inggon e tur tane toto guo, doh mai ge ahik pahe kale toto taguha toto guo tasir tamat, inggon e uaeluelueltageih tasisin.”

### A liouana geke geil liuin sioun e marang la tapokisime

<sup>24</sup>Iesu e mene harah, kare kula pare, “Tar binaka re la tauete liu tur per liouana tar tamat, inggon e la uiloho tununguala i lolono toro butur padpadenen, e sir me buturung pepe uah, doh ge ahikiono pahe tupar, song re kular liouana pare, ‘Inggou u turung tapokisila tar uma geku hiliu turin.’ <sup>25</sup>Tar binakeit re me pokoson, e me tupara tar um a niuadelauan, doha mamang inetelik ka uamoko uamamaroro tunig re moko pe ium. <sup>26</sup>Song re la kaleme tar gime mouitir liouana gesir santiehe uain tatanon, kara me siokor lek ium, kara me uangoul. Doh na niuangoulur tamaton e la turung santiehe uain.”

### Tasisit ra uaha tun toro man

<sup>27</sup> <sup>e</sup>Gine re mene pela Iesu tar inetenine, kare kula ualeikir kuahane tasir manai pare. “A niguata uaia e la tar kuahene ke poh, kare uahuh totomua.” <sup>28</sup>Iesu ke hahaua pare, “Bo a niguata uaiantiehe puk e hahaua uain e la tasisit geke longoro tono uelhire God, kara la guata uakeluk.”

<sup>b</sup> 11.16 Mat 12.38    <sup>c</sup> 11.22 Kol 2.15    <sup>d</sup> 11.23 Luk 9.50    <sup>e</sup> 11.27 Luk 1.28,42,48



### Na uaparoko Jona

<sup>29</sup>fGine ra burburehe uain per tamat, Iesu ke kula pare, “A babeir tamatane daan a sa nas niguat, ra dangata me nitouo ue me uaparok, bo ahik puk me uaparoko ra turung heirin, tena uaparoko puk manasampe Jona tera heirin. <sup>30</sup>Ge Jona pe ter niuaparoko tasir tamat i Ninive ter siokono komper niuaparoko re turung guatainir Tunar Tamata tasir babeir tamatang daan.”

<sup>31</sup>g“A kuaha toia gere la turume tar pang makoso re hara turuhar pisar, e turung tur kai keip tena binakang kedanga God tasir babeir tamatang daan, kare turung mene uakouh tasisin, ge inggono pe e la tur i rehentiehe tun tar me ualongoro tena ninamana uaia Solomon, doh gine daan a tang sioko gere uleikintiehe uain tang Solomon kaeinane. <sup>32</sup>hO tamatang Ninive ra turung tur kai keip tena binakang kedanga God tasir babeir tamatang daan, kara mene uakouh tasisin, ge gisina pe ka uapalih tenas niguata uasa tar binaka ka longoro tena uelhire Jona, doh gine daan a tang sioko gere i ranantiehe uain tang Jona, kaeinane.”

### A luh gere ualuh uakalahra tar tukunun

<sup>33</sup>i“Ahik me tang sioko re ualuh mo lam, kare uatoko uaou ue e uatok i kukulebanga me nouh. Bo e uatoko tun tang roon i rana toro teboul mara bang huarasis ra lekame iuma tar um. <sup>34</sup>A matoumiuoum tero lam tar tukunumioum. Doh geta uiar matamiuoum, a tukunumioum uakap e uoun pono tar luh. Bo geta sanin, a tukunumioum a uoun pono tar kitup. <sup>35</sup>Mu kaeke uaia katongosioum mara hikir luheit re moko keip tamiuoum pahe kitupin. <sup>36</sup>Temaene gete uoun uakapa tunur tukunumioum tar luh, kara hik me paina re kitupin, a tukunumioum e turung pe sira tar binaka ro bala ro lam tamiuoum.”

### A tonomor niduh

<sup>37</sup>Tar binaka ke mene uakapa Iesu, a Parisi ke dangata tatanono maura me ein tokaha to tena umon, temaeit ke la lekalaon iuma, kare la tabila toro teboul. <sup>38</sup>Bo git pukur Parisi ke bangala tang Iesu ahik pe mata uahuu baka uoum tar limana tar binakang ein, kare lutarangua. <sup>39</sup>Song ke kular Tamata Nomana tatanono pare, “Daan, inggoumur Parisi mu uoto uadelauana tar mudinar kap mer peileit, bo i lolono puk tamiuoum, inggoum kung uoun tar niguatang kupal, kara niguatanitir sa. <sup>40</sup>Inggoumener tuktukar! O mamang tamatalik ra ate tang God pare, teono teke tuh i kalahar, dohi lolono tar inet. <sup>41</sup>Temaeit inggoum pakung heir tasir tiome tar haua re moko teil i lolono tar dis mara delauanar mamang inetelik tamiuoum.”

<sup>f</sup> 11.29 Mat 16.4   <sup>g</sup> 11.31 1To 10.1-10   <sup>h</sup> 11.32 Jona 3.5-10   <sup>i</sup> 11.33 Mak 4.21; Luk 8.16

<sup>42</sup>“Mu tagin teil, inggoumeitir Parisi, ge a mamang nieining koboro penit tar iomo re uoto ualingia tar niein, inggoum mu uoto polaka liu tur tar sisiokor hangaul ro mahara tar siokor hangaul, karung heir tang God, bo inggoum puk kung bangang duk tar guata uakokodoho tasir tamat, doh tar malaelhir tang God. Inggoum pakung guata tar puhunine, doh pakung guata pono tar giniamehenar puh.”

<sup>43</sup>“Mu tagin teil inggoumur Parisi, ter hauon inggoum mu malaelhirintiehe tar tabila toro tabtabila uakosop iuma tar umang lotu, kara mene uaia tosium tar buturung uabulbulau.”

<sup>44</sup>“Mu tagin teil, ter hauon inggoum misiana sira tar matmat ger bulbulutun, kara nitabung uaanas, kara teler tamata ra la ueih uapono pela.”

<sup>45</sup>Kare mene hahauar tamatang ate tar ualatut tang Iesu pare, “Tang Ualafir, tar binaka ro uelhiremea tar inetenine, ingga ko uelsigala tamiueim.”

<sup>46</sup>Iesu ke mene hahau pare, “Doh inggoumener tamatang ate tar ualatut, mu tagin teil, ter hauon inggoum kung uahuata tasisina tar niduhunitir uleikintiehe tun, doh inggoum ahik tun menami sikir nipoul tar uamamahoul tar niduh.”

<sup>47</sup>“Mu tagin teil, ter hauon, inggoum kung tuha tenas lebangang mater propet, doho bung tamas ro tamamiuoum teka tung pous tasisin. <sup>48</sup>Maeit inggoum tekung ualafirampesiuom pare, mu uauia tar haua ka guatais ro bung tamas ro tamamiuoum. Gisina ka tung pous tasir propet, doh inggoum tekung tuha tenas keuisin. <sup>49</sup>Temaieit na niate uaia God e kula pare, ‘Inggou u turung heirihia mo propet, doh mo ualualatue tasisin, doho gisiamehe tasisina ra turung uiliatung pousis, doho gisiamehe ra turung uaelmahingis.’”

<sup>50</sup>“Temaieit giner babeir tamatang daan tere turung kusa manasaisir niguatanine ke sa tar deuatingisir propet uakapa geke uiliatung pousis ke la tur peme ke uakekenena per kot, <sup>51</sup>e uakekene tur toro deuatingina Ebol e la tuka toro deuatingina Sekaraia geke uiliatung pous toin i uantinanina toro oltang uahung, doh tena umang lotu God. Aa! Inggou gine ru hire tun tamiuoum toro man, a babeir tamatang daan tere turung kusa manasaisir mamang niduhuninanine.”

<sup>52</sup>“Mu tagin teil, inggoumur tamatang ate tar ualatut, ter hauon inggoum kung uoho uanono tar lelung kale tar niate tang God, doh inggoum katong halana tung kale tar niateon, karung tur tane tasir tamata gera marang ate pon.”

<sup>53</sup>Tar binakeit ke hiliu Iesu, o Parisi, doho tamatang ualafira tar ualatut ka uakekena tar tur tane uapopokoho tun mara dangdangata keipila tenas nidangat, <sup>54</sup>tar marang uakouh me puh gere mene siauaion.

### Ahik pah mu pe sira tasir Parisi

**12** <sup>1</sup>Tar siokonor binak, o burehentieher manai tamata ka uelpokos. Maeit gisina ka ueluelueihe katongois. Doh Iesu ke mene

uakikilanga baka uoum toсно tamatang uakuakeluk, ke kula pare, “Mu tagin teil tenas niguatar Parisi ge o tang guata kokopo pesin. <sup>2j</sup>A hauar inete ger nigomo uaou, ginin e turung moko uakalahar. Doha hauar inete re moko uaou, ginina ra turung uakalaharaig. <sup>3</sup>A huaa rung mene uanomogioum tar kitup, ra turung longoroig tar marein, doha huaa rung uelhimuk togioum iuma tar um, ra turung uelhire tauete turig i rana tar um.”

### Sokoro puk tang God

<sup>4</sup>“Inggo gine ru hire tamiuoum ro bung kaloug, ahik pah mu sokoro tasisit ra uiliatung pous tar tukunun, dohi muduhia gisin ahik pah ra banotong guata baka poluk me inet. <sup>5</sup>Bo inggo u turung ualasira tamiuoum tang mai pakung sokorioum. Mu sokoro tang God, ge inggono pe e banot e uiliatung pous tar tukunun, kare bakala tamiuoum i Hel. Aa! Inggo ku hire manasa tamiuoum, sokoro tatanon.”

<sup>6</sup>“A tolimar tetetiaualik ra banoto ra uabulauais tar torikir kina. Kara hikimpe me sioko tasisinar tetetiaualik re malabobourin God. <sup>7k</sup>O mana tunumpe, a ulumioumunit tar lumiu a niaha manas, maeit inggoum ahik pah mu sokor, ge inggoum pe mu baka uahahauantiehe tun tasir bureher tetetiaualik.”

### Ahik pah mu matala tang Iesu

<sup>8</sup>“Inggo gine ru hire tamiuoum, mair tamata re hire tauete tasir gisiameher tamat pare, ‘Inggo a nang Iesu,’ a Tunar Tamat e turung hirengua toсно angelou God pare, ‘A tamatane a nouguo.’ <sup>9</sup>Bo mai puk gere kul, e tele todoguoane i kot, inggo u turung kula to i uoum tar matas no angelou God pare, u tele tatanon. <sup>10</sup>Doho tamata uakapa tun gera mene uasa tar Tunar Tamat, gisina ra banotong kusa luara liu kompeis. Bo me tang sioko gere mene uasa tar Iabena Dedeil, inggon ahik pah ra banotong kusa luara liuig na niguat uasa.”

<sup>11l</sup>“Geta reihilasioum tasir tamata uleikisine tonosio umang lotur Ju ue tasir toia ue tasir tamata uleiking tar gavaman, inggoum ahik pah mu namanantiehe tar huaa rung turung hire taueteig ue tar huaa rung turung kulaig. <sup>12</sup>Ge a Iabena Dedeil pe e turung ualasira uoum tamiuoum tar binakoneit hape pakung kula peoum.”

### O uelhire uaranga tar tamat a tang inet

<sup>13</sup>A tang siokane i uantinanina tasir manai tamata ke kula tatanon pare, “Ir Tang Ualasir, o hire baka tang tahiguo maira uelpakaha raeim tena inete ra tamamiu.”

<sup>j</sup> 12.2 Luk 8.17   <sup>k</sup> 12.7 Luk 12.24; Apo 27.34   <sup>l</sup> 12.11 Mak 13.11; Luk 21.12-15

<sup>14</sup>Bo Iesu puk ke mene hahaua tatanono pare, “Kaloug, mai ke uamatoto totoguo ter tamatang kedang ue a tamatang pakaha ueleheir i uantinanina tamiraoum.” <sup>15</sup><sup>m</sup>Song ke kulono tasisina pare, “Mu tagin teil! Doh mu tur uanon, karung kaueke katongosioum tar niguatang kupal, ge na niuangoul tun per tamat ahik pahe pokoso uaia to puk re burehe pe na inet.”

<sup>16</sup>Song ke hireono toro uelhire uaranga tasisina pare, “No mahar kotor tang siokor tamat a tang inet, e tabuara uaia tunur bureher niein tena iom. <sup>17</sup>Doh inggono ke namnamaehe katongoin pare, ‘A haua paku guataio? Ge inggo pe ahik menag buturung uamoko toto meg niein.’

<sup>18</sup>Kare kulono pare, ‘Inggo u turung dura uahiua tonogo umang uamoko toto tar niein, karu turung tuha mo uleikintieh, doh tero umanin teru turung uamoko toto inggo tereg niein, doh nag inete uaia.’ <sup>19</sup>Karu turung kula katongoio pare, ‘Inggo a burehentiehe nag inete uaia ginit re mok e la banotoig tar bureher krismas, e uamalagir tar niuangoul, u ein, karu inum, karu uangoulung uaha kompe.’

<sup>20</sup>Bo God puk ke hire tatanono pare, ‘Ingga a popouluan! Daana tar boung, ingga o turung mat, doh hapengua tar inete geko kaleuatorogia a noum, maingua re turung kale taninin?’ <sup>21</sup><sup>n</sup>A puhonene e turung pokoso tang mai gere uamoko toto mena inete, bo ahik puk paha tang inete tar matana God.”

### Ahik me namnamanantiehe tar ineteng tar kot

<sup>22</sup>Song ke kula Iesu tosno tamatang uakuakeluk pare, “Temaet ru hireo tamiuoum, ahik pah mu namanantiehe tenami niuangoul, kare tar haua pakung einin, doha haua rung ualohoig tar tukumi. <sup>23</sup>Ge a niuangoul pe ter inete uleikintiehe tar niein, kara tukununa ter inete uleikintiehe tar gomon. <sup>24</sup>Namanaehe puk tasir tetiau, gisin ahik pah ra leb ue ra ueuere tagu, kara ahik pono menas umang uamoko toto mes niein, bo Godompe re uoto heir tasisina tar niein. Inggoum tesir inete uleikintiehe tasir tetiau. <sup>25</sup>Mai tamiuoum re uoto namanantiehe tar inetenin, kare namana pare, e banot e uangoul keip uabarah tena niuangoulane tar kot? <sup>26</sup>Gine ahik peoum pah mu banoto mu guata tar ineteniner sasalik, ae maene rung namanantiehoum tar giameher ineteninane.”

<sup>27</sup>“Banga to puk tar purpur re hua pe, ginin ahik pahe kalekinale ue e uakotpokoso tagu me gomono mataia. Inggo gine ru hire tamiuoum, Solomon ger toia a tang inete nomanampe, bo ahik puk mena gomono me mataia sira tar purpur. <sup>28</sup>God e ualoho tar garasanine i moren, doh ginin e tua puk daan, bo tar giameher marein ginina ra tokoutig, kara

<sup>m</sup> 12.15 1Ti 6.9-10    <sup>n</sup> 12.21 Mat 6.19-20

ualuhig. Bo inggoum pukene ahik remi nitagorong mana paha popokoh, inggoum tekung i ranantiehe tun tar purpur, temaene inggoum pakung ate pare, God e turung kaueke uaia tun tamiuoum. <sup>29</sup>Ahik pah mu sirsir teil tar inete rung turung einig, kara hik pah mu sirsir teil tar haua rung turung inumig. Ahik pah mu namanantiehe tar inetenin. <sup>30</sup>O tamata gera tele tang God, ra sirsir teil tar inetenin, bo tamamiuoum puk inggon e ate pare, inggoum mu malara tar inetenin. <sup>31</sup>Bo inggoum puk mu sir baka uoum tena Nitoiaon, song re heirono tamiuoum tar inetenin.”

### A bureher ineter uaia re mok i Heuen

<sup>32</sup>“Inggoumur pang sipsipilikene, ahik pah mu sokor, ge Tamamiuoum pe e uaha re marang heir pe tamiuoum tena Nitoia.”

<sup>33</sup>“<sup>o</sup>Mu uabulaua liu tenami inet, karung heir me mani tasir tiome. Tar puhonene inggoum mu uamoko toto tenami inet i Heuen. Karung kale menami tolaha ge ahik pahe turung mout, karung uamoko toto tenami inete uaia i Heuen. Ge i Heuene pe nami inete uaiaoum ahik pahe banot e kap, kara hik me ueuenau re la uahuhut ue me kih re banotong mamantou. <sup>34</sup>Ge ia pe re mokor inete uaiaoum ter buturuono re moko pono remi nimalaelhiroum.”

<sup>35</sup><sup>p</sup>“Mu kaleuatoro uaia tanikasioum tar la kalekinale, karung ualuh dede tonomio lam, <sup>36</sup>misiana tasir tamata gera uangangoul tenas tamata uleik gete la tapokis turuha toro iru geka guatain toro le. Temaet gete lameon, kare doko toro pipiririk, gisina ra banoto ra puka uateuele toro pirik. <sup>37</sup>Inggon e turung uaia tun tasir tamatasitir tamatang kalekinale gete me ueltuparar tamata uleik ra uakuakeis pesina mangiha re me pokoson. Inggon gine ru hire tamiuoum toro man. Inggon e turung hiku toro hihikung kalekinale, kare kila tasisina ra la tabilala toro teboul, kare turung ualaeiniono tasisin. <sup>38</sup>Inggon e turung uaia tun tasir tamatang kalekinalesine gere me ueltuparais pare, ka kaleuatoro manas. Gitiempe ge pakene e lameono tar uantinaninar boung ue tar lulein.”

<sup>39</sup>“<sup>q</sup>Bo mu naman manate puk pare, ge pake atensioun tanener uma mangiha uamatoto tun re lamer ueuenau, inggon ahik pahe turung uamaluana tena uma ra me polakain. <sup>40</sup>Mu kaleuatorosioum. Ter hauon a Tunar Tamat e turung lame tar binaka ge ahikoum pah mu namana sira pare, e lameon.”

<sup>41</sup>Pita ke dangata pare, “Ir Tamata Noman, o hirhireha ingga toro uelhire uaranga rone tamiueim ue tasir tamata uakap.”

<sup>42</sup>A Tamata Noman ke mene tapokis pare, “Doh mair tamatang kalekinale ge na ninamana uaia, kara uauaman teono tere uamokoin na tamata uleik e kaueke tosono tamatang kalekinalesone tar heir uamatoto

° 12.33 Luk 18.22    p 12.35 Mat 25.1-13    q 12.39 Mat 24.43-44; 1Te 5.2

tun tenas binakang einisin? <sup>43</sup>A tamatang kalekinaleone e banotong uaha tun gete me tuparar tamata uleik re kalekinale pe tar binaka re la tapokisime. <sup>44</sup>Inggo gine ru hire tun tamiuoum toro man. Inggon e turung heir tatanono tar nikaueke tena mamang inetelik. <sup>45</sup>Bo gete kula katongoinir tamatang kalekinale pare, 'Nag tamata uleikio ke puhung barah manasain tar lameane.' Song re uakekene tar halhaluh tasir tamatang kalekinalesiner bulout, doho kuah, kare ein kompe tar niein, kare inum uapopouluanain. <sup>46</sup>Doh na tamata uleikir tamatang kalekinale e turung lame tar marein re teleion, doh tar binak ahikiono pahe ate pare, e lameon. Doh na tamata uleikion e turung mamantouo tununguampe tatanon, kara baka liu tagulain tasir tamata gesir mahang longor."

<sup>47</sup>"A tamatang kalekinaleoneit ra turung halhaluh uaburehein, teeit re ate teil pe tena nimalara na tamata uleik, kara hik pah ke guata sir."

<sup>48</sup>"Bo gere tele tena nimalara na tamata uleik, kare guata tar ineter sa, inggono ra halhaluh uamatoto pukin."

"Mai gera heirin tar bureher inet, inggon ra uahingain tar heir tapokis tar bureher inet. Doh mai gera heirin tar kaeke tar bureher inet, inggono ra dangatain tar kaeke tar burehentiehe tunur inet."

#### **Ahik mo hiarou, bo a ueltageih puk**

<sup>49</sup>"Inggo ku laha tar me ueliu toro hueane i kot, doh ru malarantiehe tun peo, roono o luh manas! <sup>50</sup>'Bo inggo puk paku turung kale baka tar siokor uahuhuene, doh inggo u hagouo uasantiehe tun e tuka getu guata uakapa bak."

<sup>51</sup>"Inggoum kung namana sira pare, ku me keipihao toro hiarouane i kot? Ahik! Inggo ku laha tar uaelueltageih tamiuoum. <sup>52</sup>E uakekena turene daan. O matmatame gesir tang tolima ra turung uaelueltagiaheis. O tang touono ra turung uelsae keip tar tang torik, doha tang torik ura uelsae keip tar tang touon. <sup>53</sup>"Gisina ra turung uelueltagiah pare, a tamasisin e uelsae keip tar tuna ger bulout, doha tunono ger bulout e uelsae keip tang taman. Doha tinanar kuah e uelsae keip tar tuna ger kuah, doha kuah e uelsae keipompe tang tinan. Doh na kuahar tunon e uelsae keip tang enan, doh enanon e uelsae keip tena kuahar tunon."

#### **Naman manate a hauene re turung kotpokos**

<sup>54</sup>Iesu ke kula pare tasir manai tamat, "Getung bang huaroum mo mahar langit o tentur kai liu tur tar butur re hukor pisar, inggoum mu kula puk manasa pare, inggon e turung huan, kare la huanon. <sup>55</sup>Doh tar binaka re u romong tar pang makoso re hara turuhar pisar, karung

<sup>r</sup> 12.44 Mat 25.21,23   <sup>s</sup> 12.47 Jas 4.17   <sup>t</sup> 12.50 Mak 10.38-39   <sup>u</sup> 12.53 Mai 7.6

kuloum pare, inggon e turung pang pisar, kare la uelsuk nomananguaon. <sup>56</sup>Inggoum mu ate tun tar mene ualasira tar hauaninanit re kotpokosoha tar kot, doh tar langit. Inggoum o tang kokop! Hopengua, maeit ahikioum pah mu banoto mu mene uakalahara sira tar binakaninene daan.”

### Guata keip toro hiarouo tang mai re sa totomua

<sup>57</sup>“Ae maeit ahikia paho kedanga katongoia tar huar kodkodoh? <sup>58</sup>Gine ro la keip tokaha manasa pela ingga tar tang tohotola totomua tar tamatang ualongoro tar uelhire, uedanga tar petutup tar ueluauiie keip tatanon, ura la tokaha pela. Gete reihilaono totomua tar tamatang kedang, doha tamatang kedang e ueliuila totomua tenas tamata uleikir polis, kare la bakalar polis totomua tar karabus. <sup>59</sup>Inggou gine ru hire tamiuoum, ingga ahik paho turung tauete liu i kalahar e tuka tar binaka ro bulaua keipia tar uadouhinar mani.”

### Mu uapalih tenami niguata uasa

**13** <sup>1</sup>O tamata gera uangoul tar binakono ka me hire tang Iesu tasir Galili geke tung pousis nu Pailat, ra heir pesina tenas uahung tar umang lotu ger dedeil. <sup>2</sup>“Doh inggono ke mene hahaua tasisina pare, “Inggoum mu namana ka mata per Galilisine gisina teka guata uasantiehe tun tar haua ka guatainir gisimeher Galili, maeit ka kale tar uelmahing? <sup>3</sup>Ahik! Inggou gine ru hire tamiuoum, mu uapalih puk tenami niguata uasa geta hikion, inggoum uakapa tun mu turung mata pon. <sup>4</sup>Ue mu namana sira pono tasir siokor hangaul, doha tualir tamata geke hungis ro taua i Siloam, kara mat, gisina teka guata uasantiehe tun tar haua ka guatainir tamatasine i Jerusalem? <sup>5</sup>Ahik! Inggou gine ru hire tamiuoum, mu uapalih puk tenami niguata uasa geta hikion, inggoum uakapa tun mu turung mata pon.”

<sup>6</sup>Kare hirenguaono toro uelhire uaranga rone pare, “A tamata no douk o hangana toro fig, roon o nilebe tena iomon, doh inggono ke lame, kare me sir me kukuanana tang roon, <sup>7</sup>“doh ahik mata tupar. Song ke hireono tar tamatang kaukeke tar iomo pare, ‘Bang! O uatouonono ro krismas manasa rone daan, doh inggo ku lame tar me banga me kukuanana ro douk fig, doh ahik matu tupara bak. Oboro liu tang roon! Ae maene ro uakapa puk roono tar hihiananar kot?’ ”

<sup>8</sup>“Kare kula na tamatang kalekinaleono pare, ‘Nag tamata uleik, ingga o uamaluana baka poluk tang roono toro krismas rone e tuka getu koho uiloho bako, song ra uamokolaig me ineteng uauia tar kot. <sup>9</sup>Doh geto ua roono me kukuana toro krismas roeit i uoum, auia! Bo geta hikion, song ra oboro liuin roon.’ ”

ˆ 13.2 Jon 9.2    ˆ 13.7 Luk 3.9    × 13.8 2Pi 3.9,15

### Iesu ke uauia tar kuah o sa ro mudin

<sup>10</sup>Tar Mareining Pepe Uah Iesu ke la ualualasira to tar siokor umang lotu ger nosir Ju. <sup>11</sup>Doha kuah e uangoul tagu pon, inggono ke hikuinir liouana uasa geke heir toro mata tar tukununon e matoto toro hangaul, doho tual ro krismas, doh inggon o kokolo ro mudin, kara hik pahe banot e tur uakodkodoh. <sup>12</sup>Tar binaka ke banga Iesu tatanon, inggono ke kilame i uoum, kare kula tanono pare, “Ir kuah, rongo mata ko uia manas.” <sup>13</sup>Song ke uaponala Iesu tar limana tatanon, kara hik me sikir manasan, inggono ke tur kai uakokodoh, kare uatakai tang God.

<sup>14</sup><sup>v</sup>Doha tamata uleiking tenas umang lotur Ju ke nimalian, teene ke guata uaia pe Iesu tar tamata tar Mareining Pepe Uah, temaeit a tamata uleik ke kula pare, “A tonomong sioun deher mareining kalekinale, temaeitie inggoum mu laha tar mareininin mara me guata uaiasioum, doh ahik pah tar Mareining Pepe Uah.”

<sup>15</sup><sup>z</sup>Doha Tamata Noman ke mene hahaua tatanono pare, “Inggoum o tang kokop, ge inggoum pe mu uoto guata uaia tosnomio kau ue o donki tar Mareining Pepe Uah, rung luaka liu tur pe tasisina tar buturung sanga uatur, karung la uainum tasisina tar kodom. <sup>16</sup>Temaeit a kuahene ger tuna Abraham geke uih tane keipin Satan toro hangaul, doho tual ro krismas e banoto ra luaka liuin no mata tar Mareining Pepe Uah.”

<sup>17</sup>Tar binaka ke kulono pare, no uelmatanono ka siokor matalangua, bosir tamata uakapa tun puk ka siokor uahantiehe keip tar mamang niguata uaiantiehe tun ke guatagion.

### Na Nitoia God ngohinar uatunar mastet, doha is

<sup>18</sup>Kare dangata Iesu pare, “Hape re baka pe na Nitoia God? A hauangua paku uamisiana toio? <sup>19</sup>Inggono misiana sira tar uatuna ro mastet geke lebeinir tamata tena iom. Ko hua roon, karo kotpokos o douk, doho tetiaua ka la toko tar ranana roon.”

<sup>20</sup>Doh Iesu ke dangata poluk pare, “A hauangua poluk ru uamisiana tolaio tena Nitoia God? <sup>21</sup>Inggono misiana sira tar is geke uelhouar keipigir kuaha tar bureher palaua. Ginina ke uauout kai uakapa tun tar palaua.”

### O pirik gero kisiong

<sup>22</sup>Song ke lihila Iesu toro uan ueltebeir, kare toro uan menia toro uuanilik re ualualasira pe, re lang la pe i Jerusalem. <sup>23</sup>Doha tang siokor tamata ke dangata tatanono pare, “Ir Tamata Noman! O gisiamehengua pukur tamata ra turung uelkarusis.”

---

<sup>v</sup> 13.14 KT 20.9-10; Ual 5.13-14    <sup>z</sup> 13.15 Luk 14.5



Kare kulono tasisina pare, <sup>24</sup>“Inggo gine ru hire tamiuoum, mu petutupe tar lekala toro pirpirik gero kising, ge o burehentiehe per tamata ra turung uedanga tar lek, bo ahik puk pah ra banotong lek. <sup>25</sup>“Gere tentur komper tanener um, kare holoro toro pirik, doh inggoum mu turung tur i kalahar, karung dokdoko toro pirik, karung kula pare, ‘Ir tamata uleik puka toro pirik!’

Bo inggono puk e turung mene hahaua pare, ‘Inggo u tele tamiuoum, ia rung la turioum.’ <sup>26</sup>Karung turung kulanguaoum pare, ‘Inggeim king ein, karing inum keip totomua, doh ingga ko ualualasira to pono tonomio moreneim.’

<sup>27</sup><sup>b</sup>Bo inggono puk e turung mene hahaua pare, ‘Inggo u tele tamiuoum, doh ia rung la turioum, mu uareingane totoguo, inggoum o tamata uasa uakap!’ ”

<sup>28</sup>“Inggoum mu turung ueluelkiringe, karung eit uarororueit tar liouumiu, getung banga tas Abraham, Aisak, doh Jekop mesir propetisit ka leka tena Nitoia God, bo inggoum pukene ra bakalasioum i kalahar. <sup>29</sup><sup>d</sup>O tamata ra turung la turume tar paina re hara turuhar pisar, doh tar paina re la hukor pisar, doh tar pang kaisana tar paina re hara turuhar pisar, doh tar pang mua tar paina re hara turuhar pisar, kara la turung ein toro niein uleik tena Nitoia God. <sup>30</sup><sup>e</sup>Bo o mana tun! O gisiamehe gera uadouh tun teasina tera turung uakikilang, doho gisiamehe gera uakikilang teasina tera turung uadouh.”

### Isu e ueldolomo tasir tamatang Jerusalem

<sup>31</sup>Tar binakon o gisiameher Parisi ka lame tang Iesu, kara me kula pare, “Hiliu tar uanene, karo lame giamehe siokor uan, ge Herot pe e marang tung pous totomua.”

<sup>32</sup>Kare mene hahaua Iesu pare, “Mu la hire tatanoneitir lo roke pare, ‘Inggo u turung geil tauete liu tasir liouana uasa, karu uauia tasir momouh daan, doh roliuo, kare tar uatouononor marein inggo u turung uakapa tenagu kalekinale.’ <sup>33</sup>Bo inggo puk u la dedempeene daan, doh roliuo, doh tar giameher marein. Ge ahik pe me propet re banot e mata to i behia i Jerusalem!”

<sup>34</sup>“Jerusalem, Jerusalem! Ingga ko uiliatung pous tasir propet, doh ingga ko bakbak pous keip tar palaua tasisine ke ualatuehais Godane totomua. A bureher binak inggo ku marang kale toto toso bung tumua misiana tar paolo tinana re auin tane pe toso bung tun i kukulebanga tar toking titiauan, bo inggoum puk kung de! <sup>35</sup>Bang! Gine daan God e hiliu tenami umang lotuoum ger dedeil e turung kalilono tok. Inggo gine ru

<sup>a</sup> 13.25 Mat 25.10-12   <sup>b</sup> 13.27 Ker 6.8   <sup>c</sup> 13.28 Mat 8.11-12   <sup>d</sup> 13.29 Ker 107.3

<sup>e</sup> 13.30 Mat 19.30

hire tamiuoum, Inggoum ahik pah mu banotong banga tupara baka poluk totoguo e tuka getung la kula bakoum pare,

‘A niguata uايا e la tatanon,  
ge inggono pe ke laha tar hanganar Tamata Noman.’” *Ker 118.26*

### Iesu ke la ein to tena umar Parisi

**14** <sup>1</sup>A siokor Mareining Pepe Uah, Iesu ke la ein to tena umar Parisi gere uleik tasisinar Parisi. Doh inggono ka uakeis uanono uايا tunin. <sup>2</sup>Doh gatie i uoum tatanon e uangoul ponor tamata ger isingir tukunun. <sup>3f</sup>Kare dangata Iesu tar Parisi mer tamatang ualualasira tar ualatut pare, “E uaiamper ualatut tar uايا to tar tamata tar Mareining Pepe Uah.” <sup>4</sup>Bo gisina puk ka uangoul bukuk ahik pah ra men, temaeit ke kusemeono tar tamaton, kare uايا tatanon, kare kula tatanon e la. <sup>5g</sup>Kare dangatono tasisina pare, “Gete me tang sioko tamiuoum re punga uahiuako me tuna ue mena kau tar koue tar Mareining Pepe Uah, inggoum mu turung teuele tar la reih kai liu tur tatanono tar tung.” <sup>6</sup>Doh gisina ahik mata men.

### God e uairana tar tamata gere touahiuain

<sup>7</sup>Tar binaka ke banga Iesu tasir tamatasine ka me tabila kedanga pe tar tabtabilanitir nosir tohangas, kara to ueltadan, inggono ke hire tasisina toro uelhire uaranga rone pare, <sup>8h</sup>“Gete kila me tang sioko me kalamiuoum tar la toro nieing toro le, ingga ahik paho la tabila tar tabtabilanitir nosir tohangas, kara to ueltadan geto niuamatoto manasa ro tabtabila roon me tamata me i rana uain sikoro totomua ger nikila pon. <sup>9</sup>Doh geto la tabila toro tabtabila roon, a tamatane ke guluh toro niein geke kila tokaha tamiraoum e turung lame, kare me kula totomua pare, ‘O heir toro tabtabila roeit tar tamatane.’ Karo turung matala ingga.”

<sup>10</sup>“Bo geta kilai, kale tar uadouhinar butur, maeit gete lahar tamatane ke kila totomua, inggon e turung kula totomua pare, ‘Kaloug in kai taroanaha tar butur uaiantieh.’ Song ra turung uairanampeia tar binaka ra uangoul tokaha ro uanotoumuasitir nikil. <sup>11i</sup>Tasir mamang tamata uakapa tun, mai gere uairana katongoin inggono ra turung touahiuain, doh mai gere touahiuu katongoin inggono ra turung uairanain.”

<sup>12</sup>Song ke kula Iesu tar tamateit ke kilame tatanono toro niein pare, “Geto guluha mo niein, ahik paho kila pokoso toso bung kaloum, o bung tahim ue toso tahimulik ue toso uanotoumusitir tang inete geta kila

<sup>f</sup> 14.3 Luk 6.9   <sup>g</sup> 14.5 Mat 12.11; Luk 13.15   <sup>h</sup> 14.8 NU 25.6-7   <sup>i</sup> 14.11 Mat 23.12; Luk 18.14

tapokis kalehesina totomua tar hahaua tereng nieina. <sup>13</sup>Bo tar binaka gero guata mo niein, kila pokoso tasir tiome, doho sar limas, o peil, karo kut, <sup>14</sup>song ra turung guata uaia tunuia. Gisin ahik nomana pah ra banotong guata hahaua totomua, bo ingga puk o turung kale bulauana tar binaka ra uatua tapokisir tamatar kodkodoh.”

### O uelhire uaranga toro niein uleik

<sup>15</sup><sup>k</sup>Tar binaka ke longoror tang sioko tasisinasit ka tabila keip tang Iesu, inggono ke kula pare, “A niguata uaia e la tar tamateit re turung ein to toro niein uleik tena Nitoia God.”

<sup>16</sup>Iesu ke mene hahaua pare, “A tang siokor tamata ke kaleuatoro toro niein uleik, kare kila pokosome tasir bureher tamat. <sup>17</sup>Tar binakon inggono ke ualatu tena tamatang kalekinale, tar la hire tasisitir nikil, kare la kula pare, ‘Mu lame, a mamang inetelikene daan a nikaleuatoro manas.’

<sup>18</sup>Bo gisina tokaha puk ka siokor pepe boho ueltebeir. A tang sioko ke kula pare, ‘Inggo ku nihing bulaua puk toro mahar kot, doh inggo u la marang bangahe tang roon. Inggo u ueldolomo tun, ahik pahu banot u la.’ <sup>19</sup>A tang giamehe ke kula pare, ‘Inggo ku nihing bulaua puk tar hangaulur kauang kalekinale, doh inggo u la marang uedanga keip tagin tasisina tar iom. Inggo u ueldolomo tun, ahik pahu banot u la.’ <sup>20</sup>‘Kare kular tang giamehe pare, ‘Inggo ku nihing le puk, temaeit ahik pahu banot u lame.’

<sup>21</sup>A tamatang kalekinale ke la tapokisime, kare me hire tapokis tena tamata uleik tar haua ka meneigir tamat. Gine ke longoro pe tanener um, inggono ke nimalian, kare ualatoho tena tamatang kalekinale pare, ‘La tauete ualahur i moren, dohi birum toro uan, karo ueliuime tasir tiome, gisiner sar limas, karo peil, doho kut pon.’ <sup>22</sup>A tamatang ualualatu ke la, kare la guat, kare la kula pare tena tamata uleik, ‘A haua ko ualatohoia ka guata manasain, bo a burehe harahamper buturunitir tabotan.’

<sup>23</sup>Temaeit a tamata uleik ke kula tena tamatang ualualatu pare, ‘La tauete toro lele uleik, doho lele sasalik tar pang uan, karo kila tutupe tasisina tar lame mare turung uoun nag umo. <sup>24</sup>Inggo u hire totomua pare, ahik me tang siokor tamata tasisitir nikila uakikilanga re turung ein tagin me sikir niein toro niein uleik ro nouguo.’ ”

### A hagarang uakeluk tang Iesu

<sup>25</sup>O manai tamata ra siokor la keip tokahala tang Iesu, kare tur kauiurion, kare kula tasisina pare, <sup>26</sup><sup>m</sup>“Gete me tang sioko re marang uakeluk totoguo, na nimalaelhirono totoguo paka i rana uain tena

<sup>j</sup> 14.14 Jon 5.29   <sup>k</sup> 14.15 Luk 13.29   <sup>l</sup> 14.20 1Ko 7.33   <sup>m</sup> 14.26 Luk 9.23

nimalarono tang taman, doh tinan, doh na kuah, doho bung tun, doho bung tatahinalik, doh na niuangoul, bo gete deono tar guata tar niguatonene, inggon ahik pahe banotong kotpokoso nag tamatang uakuakelukio. <sup>27</sup>Doh mair tamata ge ahik pahe huata tena korose, kare uakeluk totoguo, inggon ahik pahe banotong kotpokoso tagu pare, nagu tamatang uakuakelukio.”

<sup>28</sup>“Gete me tang sioko tamiuoum re marang tuha me uleikintiehe tunur um, inggon e tabila baka uoum, kare sir uamatoto re turung baka per bulauana mare bangahe ge pare matoto teil na mani tar uakapa keip. <sup>29</sup>Gete tuha pukiono tar tagele nar um, doh ahik pahe banoto tar tuha uakapa tatanon, o tamata uakap gera banga tatanon, ra turung ueltang ualenge tatanon, kara kula pare, <sup>30</sup>‘A tamatane ke uakekene tar tuh, doh ahik pah ke banoto tar tuha uakap.’”

<sup>31</sup>“Gete me toia ke uiliauh tar la uiliatungeis mer tang giameher toia. Inggon e tabila baka uoum, kare namanaehe ge para banoto teil no hangaulur taosein no tamatang uiliatung tar uelkoi keip tasir torikir hangaulur taosein no tamatang uiliatungur tang giameher toia. <sup>32</sup>Geta hikiono pahe banoto teil tosno hangaulur taosein no tamatang uiliatung tar uelkoi keip tasir torikir hangaulur taosein no tamatang uiliatungur tang giameher toia, inggon e turung ualatue tasir tang uelhiarou tar binaka ra uairehe harahar uelmatana mara banotong uakotpokoso toro hiarou. <sup>33</sup>Te misiana kompe geta hik me tang sioko tamiuoum re kusa luara liu tena mamang inetelik, inggon ahik pahe banoto pare, nagu tamatang uakuakelukio.”

<sup>34</sup>Iesu ke mene dedempe pare, “A teh auia, bo gete kapar linglinginanin, ahik me hagar mare linglinging tehe baka polukunin. <sup>35</sup>Ginin ahik paha uia tar uelhouar keip me ineteng uatabuara tar nieinane tar iom, ginina ra baka tauete liuig. Mair to talingana tere longor.”

### A sipsip geke heil, doha mani niualup

**15** <sup>1</sup>Tar binakonene o tamatang kale toto tar maning takis, doho tamatang guata uasa ka siokor uelpoukos uiloho tar ualongoro tatanon, <sup>2</sup>bo o Parisi puk mesir tamatang ualualasira tar ualatut ra ngur kompe pare, “A tamatane e kilauatoro tasir tamatasiner sa nas niguat, kare ein tagu tasisin.”

<sup>3</sup>Song ke hire Iesu tasisina toro uelhire uaranga rone, <sup>4</sup>“Gete me tang sioko tamiuoum mena 100ir sipsip, kare uaheil tar siok, inggon e hiliu tasir 99ir sipsipane tar butur paden, song re la sir uakeluk tar sipsip geke heil e tukampe gete ueltupara baka tatanon. <sup>5</sup>Doh gete ueltuparion,

<sup>n</sup> 15.2 Luk 5.30    <sup>o</sup> 15.4 Isk 34.11,16; Luk 19.10

inggon e turung uahantiehe tun, kare uaponola tar huhuatan, <sup>6</sup>kare haijala ium. Song re turung kilono toso kaluan, doho uanotono tar pepe tokah, kare kula pare, ‘Mu me uaha uelkout totoguo, inggo ku tupara manasa tenag sipsip geke heil.’ <sup>7</sup>Inggo u hire tamiuoum tar siokonor hagar, a niuah e turung uleikintieh i Heuen gete me tang siokor tamatang guata uasa e uapalih tena niguata uasa. A niuahon e turung uleikintiehe uain tar nuaheit tasir 99ir tamatar kodkodoho ge ahik pah ra marang uapalih.”

<sup>8</sup>Kare kula poluk Iesu pare, “Gete me kuaha mena hangaulur mani, kare ualup me siok, inggon e uahung toro lam, kare io uadelauana tar um, kare sirsir hamas tun e tuka gete la tugar. <sup>9</sup>Doh tar binaka re tuparon, inggon e siokor kila toto tokaha toso bung kaluan, doho gisis i hutun, kare kula pare, ‘Mu me uaha keip totoguo. Inggo ku tupara manasa tenag mani geke lup.’ <sup>10</sup>Inggo u hire tamiuoum pare, tar siokono komper hagar, a niuaha uleik tun tasir anggelousine ra uangoul tang God tar tang siokor tamata gere uapalih tena niguata uasa.”

#### A keketik bulout geke hiliu tang taman

<sup>11</sup>Iesu ke mene poluk pare, “A tang siokor tamat a tang torikir tun a toking bulout. <sup>12</sup>Doha gitier uakeluk ke kula tara tamas pare, ‘Papa o heir uelpakaha tenang inete tamiraeim, karo heir tar huar nouguo.’ Temaeit ke pakahanguaono tena inet i uantinanina tasrasin.”

<sup>13</sup>“I muduhia, a keketikener uakeluk ke siokor kale tena mamang inetelik, kare la uariehe tar gime pang uan, kare la uakapa ueltebeir to tena mani, re uauaha pe tar nimalara uasang tar tukunun. <sup>14</sup>I muduhia ke uakapa baka peono tena mamang inetelik, kare kotpokosor gogo uleik tar pang uan uiloh. Doh inggono ke uakekena manasa tar malara me nipoul. <sup>15</sup>Temaeit inggono ke la, kare la kalekinale tar tamatang tar pang uanion, doha tamatono ke ualatue tatanon e la tenas buturur hueit, kare la uakiha tasisin. <sup>16</sup>Inggono ke gogo uasa tun, doh ke marang ein me niein gere mokomoko re uakiha peono tasir hueit, bo ahik puk mata ein, doh ahik pono me tamata ke heir tatanono me inet.”

<sup>17</sup>“Doh tar binaka ke naman manate tapokision, inggono ke kula pare, ‘O tamatang kalekinalesiner nang tamouguo a burehe res niein e mokomok. Doh inggo gine ru mata tar gog! <sup>18</sup><sup>p</sup>Inggo u turung la tapokis tang tamoug, karu la kula tatanono pare, Papa! Inggo ku guata uasa tang God doh totomua. <sup>19</sup>Inggo ahik baka poluk paha tamata uaia maro banoto ingga o kila totoguo a tum. Guata sira totoguo nang tamatang kalekinale.’ ”

<sup>20</sup>“Temaeit inggono ke tentur kompe, kare la tang taman. Bo tar binaka puk re uairehe harahono tar uan, git tamanono ke bang huarala

tatanon, kare uaha keip tun tar niueldolomo tar tun, kare ualola, kare la buaka kai tatanon, kare uaha tun. <sup>21</sup>Song ke kular tunono pare, ‘Tamoug, inggo ku guata uasa tang God, doh totomua. Inggo ahik baka poluk paha tamata uaiia maro banoto ingga o kila totoguo a tum.’ ”

<sup>22</sup>“Bo tamanono puk ke kula tosno tamatang kalekinale pare, ‘Teuel! Keipime toro hikhiku giat ro mataiantiehe tun, karung me uahiku tatanon. Uamokola tar ring tar kamot limanon, doha su tar kekenon. <sup>23</sup>Keipime tar kau geke ualaein uauleik siokoin, kara me uiliatung pousin. Ti guata toro niein, kari uah. <sup>24</sup>“Ge a keketik peener nouguo ke mat, kare tua tapokis poluk. Inggono ke heil, kara tuparain.’ Song ka uakekenasina tar uah.”

<sup>25</sup>“Tar binakon a tunon ger uoum e uangoul tar iom. Inggono ke me la uahuhut tar um, kare longoro tasir tamata ra kerekere pe, kara doum. <sup>26</sup>Maeit inggono ke kila tar tang siokor tamatang kalekinale, kare dangata tatanono pare. ‘A hauela ra guatain?’ <sup>27</sup>Kare mene hahauono pare, ‘Tahimua ke pokos, doh tamoumua ke uiliatung pous tar kau ger kalan. Ter hauono inggono ke me udeil pokos.’ ”

<sup>28</sup>“Gitir uoum ke tokouasain, kare de tar lekela ium. Temaetit tamanono ke tauete uelhirila, kare la uamamahoul tatanon. <sup>29</sup>Bo inggono puk ke mene tapokis tang tamana pare, ‘Bang! Ke la pe mer mamang krismas, inggo ku kalkalekinale pukumpe totomua, doh ahik pahu longlongoro boho tereng nimalara. Doh ingga ahikimpe mato heir baka tagu totoguo me kalanar me maru guata mo nein, karu uauaha keip tagu toso bung kaloug. <sup>30</sup>Bo tar binaka puk ke uakapa keipir tumuaene tenang mamang inetelikia tasir kuaha re ura pe, kare inum keip, kare lame, ingga ko uiliatung pous ueleheir tatanono tar kau ger niualaein uauleik siok.’ ”

<sup>31</sup>“Doh tamanono ke kula pare, ‘Inggar tug! Ingga ko uangoul ualataun keip totoguo, doha mamang inetelikir nouguo a noumua. <sup>32</sup>Maeit auia tagigeig tar uah, ge tahimua pe ke mat, kare tua tapokis, doh inggono ke heil, kara uelutpara tapokisin.’ ”

### A tamatang kauék ger tang iate

**16** <sup>1</sup>Iesu ke hire tosno tamatang uakuakeluk pare, “A tang siokor tamat a tang mani ura uangoul mena tamatang kauéke tena mamang inetelikion. A siokor binak, gitir tamatang kauéke ka tohotolain pare, ke ueluelour tena inete na tamata uleik. <sup>2</sup>Maeit ke kila ualekelar tang mani tatanon ium, kare dangata pare, ‘A hauene ku longoro koutuio totomua? O bolo uakalahara tun hape ko guata keip pe tenag ineto. Ter hauon ingga ahik baka poluk paho turung kauéke tenag mamang inetelikio.’ ”

<sup>9</sup> 15.24 Epe 2.1,5

<sup>3</sup>“Doha tamatang kaueke ke kula katongoin pare, ‘Nag tamata uleikio ke uakapa totoguo tar kalekinale. A haua paku guataio? Inngo ahik paha tampopokoho tar koho tar tung, doh inngo u matala pono tar dangata me nipoul. <sup>4</sup>Bo inngo u ate manasa tar haua ru guatain, maeit getu kapo tenagu kalekinale, o tamata ra turung kilauatorompela totoguo iuma tonosio um.’”

<sup>5</sup>“Temaieit ke kila tang sisiocono tasir tamatasit ka kalkale puk baka tar inet tena tamata uleikion, kare dangata tar uakikilanganar tamata pare, ‘A touiha uamatoto ko kalkale pukusia tenag tamata uleikio?’ <sup>6</sup>Kare mene hahauaono pare, ‘A 3,200ir lita tar uaiuaianar oliv.’ Song ke kular tamatang kaueke pare, ‘O kaleme tenang bolobol, tabila uahua ualahur, karo bolome 1,200ir lita tar uaiuaianar oliv.’”

<sup>7</sup>“Kare dangatono tar uatang torikina pare, ‘A touiha uamatoto ko kalkale puk bakaisia tenag tamata uleikio?’ Kare mene hahauaono pare. ‘Inngo ku kalkale puk toro 100 ro beik raes-uit.’ Kare hireono tatanono pare, ‘Kale tonongo bolobol, karo bolo puk me tualir hangaul ro beik raes-uit.’”

<sup>8</sup>“Doh na tamata uleikiono ke meneng uairana tena tamatang kaueke ger bohoboh, teeit inggono ke guata keip tun tena niate. Inngo u kula pare, ter hauon o tamatang tar kot, gisin o tang iate tun hape ra kalekinale uaia peane i kot, bo no tamata God ahik pah ra ate uaia tun tagu.”

<sup>9</sup>Kare kula Iesu pare, “Inngo u hire totomua. Guata keip tenang mamang inetelikane tar kot tar poul tasir tamata maro matakaluana tasisin, temaieit geta hik manasa ingga menang inete baka poluk, ingga ra turung kilauatoroia i Heuen.”

<sup>10</sup>“<sup>r</sup>Mai kompe ger uauamana tar kaueke uaia tar ineter sasalik, inggon e banoto pono tar kaueke uaia tar bureher inet. Mai kompe ge ahik paha uauamana tar kaueke tar ineter sasalik, inggon ahik pahe banotong kaueke pono tar bureher inet. <sup>11</sup>Temaieit ge ahikia pah ko kaueke uaia tar mamang inetelikane i kot, ahik me tamata re banotong dangata totomua o kaueka tar ineter i ranar bulauananine ger man re la turuha i Heuen. <sup>12</sup>Doh geta hikia mato kaueke uaia menas ineter gisiamah, maingua re turung heir menang ineta.”

<sup>13</sup>“<sup>s</sup>Ahik me tamata re banot e kalekinale tar tang torikir tamata uleik. Gere guatono paar, inggon e turung tokouasain tar tang siok, kare malara tar tang giameh ue inggon e turung longoro puk tar uakikilanganar tamata uleik, kare de tar uatang torikin. Inggoum ahik pah mu banoto mu kalekinale keip tokaha tang God, doha mani.”

---

<sup>r</sup> 16.10 Luk 19.17-26    <sup>s</sup> 16.13 Mat 6.24

<sup>14</sup>O Parisi gera malarantiehe tun tar mani ka longoro tar inetenin, kara meneng uelsigala tang Iesu, <sup>15</sup>'kare kulono tasisina pare, "Inggoumene mu uahingo tasir tamata tar namana pare, inggoum o kodkodoho tun tar matasisin, bo God e ate uaia tun tar koloumiuoum, a inete re malarantiehe tunigir tamat, gininanine tere ueluelde tunig God."

#### A giameher niualasir

<sup>16</sup>"A ualatut, doh nas nimener propet ka uakelukig ke me tuka tena binaka Jon ger tang uahuhu. Maeit i muduhia tena binaka Jon, o Uelhire Uaia tena Nitoia God ka mene tauete manasain, doho mamang tamatalik ra petutup tar lekala. <sup>17</sup>'Ge i rana pe, dohi kot ura banotong rou, bo gane puk tena ualatut God, ahik me sikir nibolbolono re turung rou."

<sup>18</sup>"Ge me tang sioko ke uelueltula liu tena kuah, kare le tar tang giameher kuah, inggono ke guata toro ur, kare guata uasa tena kuah, doha bulout gere le tar kuaha geke le baka uoum, kara hiliuin, inggono ke guata pono toro ur."

#### A tamata ger tang mani, doh Lasarus

<sup>19</sup>Iesu ke hire pare, "A tang siokor tang mani gere hiku teil toro gomono tabeliaha mataia tun, inggon e uangoul uaia keip tena bureher inete tar mamang binakalik. <sup>20-21</sup>Doh gaat tono piriking lekon, a niuatabilar tiome a hangana tang Lasarus, inggono na bureher loto ke uiloho uakapa tar tukunun, doho lo ka lame, kara me deimdeim tena loton. Doh inggon e marang ein me mokomoko gere punga tur tono teboulung einir tang mani. <sup>22</sup>Tar binaka ke mater tiome, kara huatar angelou tatanono e la tabil tagu tang Abraham i Heuen. Doh gitir tang mani ke mata pon, kara keuin. <sup>23</sup>Inggono ke la i Hel, dohe uelmahingintiehe tunin. Song ke banga huara tolaono tang Lasarus e uairehentiehe re uangoul tagu pe tang Abraham. <sup>24</sup>Song ke kilar tang mani tang Abraham pare, 'Papa Abraham o ueldolomo baka totoguo, karo ualatueha tang Lasarus tar uabutuko tar lulunar kamot liman i lolono tar kodom, kare me uarigirig tar miouguo. Ter hauon inggo ke uelmahingintiehe tunio toro hue rone.'

<sup>25</sup>Bo Abraham puk ke mene hahau pare, 'Inggar tug! O namana huara tapokis tenang niuangoul tar binaka ro tua, ingga ko kale manasa tenang mamang inetelik ger uia, bo Lasarus ke kale tar inetenitir sa, doh daan inggon e uangoul uiaane, bo ingga e uelmahingintiehe tunuia. <sup>26</sup>Dohi uantinanina tamiueim, kare tamiuoum e mokor hagar ger uleikintiehe tun, temaeit ahik me tamata re banoto tar lako totomua, doh ahik me tang sioko tamiuoum re banot e laha tamiueim.'

<sup>1</sup> 16.15 Mat 23.28; Luk 18.9-14    <sup>u</sup> 16.16 Mat 11.12-13    <sup>v</sup> 16.17 Mat 5.18



<sup>27</sup>Song ke mene hahaua polukur tang mani pare, ‘Inggo u dangata poluk totomua tamoug pare, ualatueha tang Lasarus e la tena uma tamouguo, <sup>28</sup>ge a tang tolima per tahiguo ura uangoul harah. Hire tatanon e uatagin tasisina tar uaning uelmahingene mara hikisina pah ra lameane tar binaka ra mat.’

<sup>29</sup>Abraham ke mene hahau pare, ‘Gisina ka ate manasa tono uelhire Moses, doh tasir propet geta malarasina ra turung uakeluk taninin.’

<sup>30</sup>Kare kular tang mani pare, ‘Ahik! Ingga a tamamiueim uakap. Bo gete me tang sioko ke mata uoum, e la hire tasisina mara longorosina tatanon, song ra uapalih.’

<sup>31</sup>Kare kula Abraham tatanono pare, ‘Geka mahang longorosina toro uelhire tang Moses, doh tasir propet, gisin ahikimpe pah ra turung longoro gete lamer tamata geke mata uoum.’ ”

#### A niualasir tar niguata uasa

**17** <sup>1</sup>Iesu ke kula tosno tamatang uakuakeluk pare, “O mana tun a uedanga tasir tamata mara guata tar niguata uasa, e turung lame. Bo a tamata puk gere uakotpokoso tar niuedanganin e tagin teil, God e turung uauelmahingintiehe tun tar tamaton. <sup>2</sup>Gete guatono me tang siokor keketik mare guata tar niguat uasa, auiantiehe tun geta turung uih tane tolain mo palaua uleikintiehe tun toro uekuekon, kara uadudurin i laur. <sup>3</sup>”<sup>w</sup>Temaeit mu kaueke uaia katongosioum. Geke guata uasa tahimua, ingga o uelkukur tatanon, doh gete ueldolomion, kare uapalih tena niguata uasa, ingga o kusa luara liu tena niguata uasaon. <sup>4</sup>Gete guata uasaono totomua tar mouitir binaka tar siokor marein, kare la tapokisiha totomua tar mouitir binak, kare me kula pare, ‘inggo u ueldolomo tun, karu uapalih.’ Ingga o kusa luara liu tena niguata uasaon.”

#### A nitagorong man

<sup>5</sup>O aposoul ka kula tar Tamat Nomana pare, “Uauleik teremi nitagorong maneim!”

<sup>6</sup>\*Kare mene hahauono pare, “Geta sasalik remi nitagorong manoum misiana sira tar uatunar mastet, inggoum mu banotong kula toro kakariuoun rone pare, ‘Us kai katongoia, karo la lebeia i laur!’ Doh roono ro douk o turung longoro tamiuoum.”

#### A tamatang kalekinale

<sup>7</sup>“Gete me tang sioko tamiuoum mena tamatang kalekinale re tau i tar kot ue e kaukaueke tasir sipsip. Inggon ahik pahe kula tena tamatang

<sup>w</sup> 17.3 Mat 18.15 \* 17.6 Mat 17.20; 21.21

kalekinale tar binaka re la tapokis tur peha tar iomo pare, ‘Languahane, karo tabila uahiua tagu tar binakang ein.’<sup>8</sup> Bo Inggon e turung kula pare, ‘Kaleuatoro tereg nieino, karo sik ueleheir tereg nieinio maru ein, karu inum. I muduhia song ro banotong einia, karo inum.’<sup>9</sup> Inggon ahik pahe heir me niuaha re uauia tena tamatang kalekinale ke guata uakeluk pe tar haua ka ualatohoin tatanono tar guat.<sup>10</sup> Doh inggono ter siokono kompe tamiuoum tar binaka rung guata uakapa tar mamang inetelik geke hireig tamiuoum mu guat. Inggoum pakung kula pare, ‘Inggeim o tamatang kalekinale ueltebeir pukumpe, bo mi guata kompe tar kalekinale ka heirin tamiueim tar guat.’”

### A hangaulur toba ka uauiais

<sup>11</sup>Tar binaka re haijala Iesu i Jerusalem, inggono ke lihila toro tui i uantininanin i Samaria dohi Galili. <sup>12</sup>Git re lang la manasa peko inggon i koboro tar siokor uan, doha hangaulur tamata gesir toba ka me ueltpar tatanon. Gisina ka tur i rehe sikor, <sup>13</sup>kara kula ualeik pare, “Tesu ingga a tamata uleik o ueldolomo tamiueim!”

<sup>14</sup>Tar binaka ke banga Iesu tasisin, inggono ke kula pare, “Mu la, karung la ualasira katongosioum tasir pater.”

Doh gine ra la pelasin, gisina ka uia manas. <sup>15</sup>Doha tang sioko tasisina ke banga ke uia pe, kare la tapokisime. Inggon e menmene ualeik teil re uatuatakai pe tang God. <sup>16</sup>Inggono ke me baka uahiuaianane i kot tar kekena Iesu, kare kulang uauia tun tatanon. Doh inggon a peng Samaria. <sup>17</sup>Doh Iesu ke dangata pare, “Inggo ku uauia tasir hangaulur tamat, iareisir gime lusior tamat? <sup>18</sup>Ahik me tang sioko ke tapokisime tar me heir me uatakai tang God te gine puk manasar peng gime uan.” <sup>19</sup>Kare kula Iesu tatanono pare, “Tur kai karo la. God ke uauia totomua ter hauon ingga ko tagorong man.”

### Na Nitoia God e turung laha

<sup>20</sup>A siokor binak o Parisi ka dangata tang Iesu pare, “Mangihar binaka re turung laha na Nitoia God.”

Doh Iesu ke mene hahaua pare, “Ahik me inete ra turung ualasira uakalahara toin gete laha na Nitoia God. <sup>21</sup>Ahik me tamata re turung kula pare, inggon giniehae ue gitiehae, ter hauon na Nitoia God e mok i uantinanina tamiuoum.”

<sup>22</sup>Song ke kula poluk Iesu tosno tamatang uakuakeluk pare, “A binak e turung lame, doh inggoum mu turung malahirintiehe tun tar marang banga tena mareinir Tunar Tamat, bo inggoum puk ahik pah mu turung bang huar. <sup>23</sup>O tamata ra turung hire tamiuoum pare, ‘A Tunar Tamata

<sup>7</sup> 17.13 NKP 13.45-46    <sup>8</sup> 17.14 KT 14.2-3; Mat 8.3-4    <sup>9</sup> 17.23 Mak 13.21; Luk 21.8

gitie ue inggono gine.' Bo inggoum puk ahik pah mu tagorong man, karung ualo uakeluk tasisin. <sup>24</sup>Ge na marein per Tunar Tamat e turung pe sira tar kanau gere balbala uelkaruse, kare turung uabalo kai i rana tar hagar e la tur tar giameher surun e la tuka tar giameher surun. <sup>25</sup>Bo tar uakikilangana puk, a Tunar Tamat e turung kale tur baka uoum me bureher niduh tar bureher inet, doho tamatang daana ra turung ueluelde tatanon."

<sup>26</sup>"Na mareinir Tunar Tamat e turung ngohina sira kompe tena marein Noa. <sup>27</sup>O tamata ra ein, ra inum, kara uelueleis ke la tukampe tar marein ke la leka pe Noa tena parau. Song ko languaha ro silu uleik, karo binopo tasisina uakap. <sup>28</sup><sup>b</sup>Inggon a siokono tena marein Lot. O tamat ra ein, kara inum, kara uabulau, doh ra leb, kara tuha um. <sup>29</sup>Bo a marein pukuoneit ke hiliu Lot i Sodom, ko laha ro hue doha palauanitir ngangaua ke tadura turuha i Heuen, karo me binopo uakapa tasisin. <sup>30</sup>Inggon e turung siokono sira kompe tena mareinir Tunar Tamat gete kotpokoso uakalahar."

<sup>31</sup><sup>c</sup>"Tar binakon a tamata gere uangoul i rana tena um, doh na ineton e mok ium, inggon ahik pahe banot e hiuo uelhir baka poluk tar la kale taninin. Doha tamata gere uangoul tar iom, ahik baka poluk pahe la tapokis tena um tar la kale mena inet."

<sup>32</sup><sup>d</sup>"Mu namana huara tena kuaha Lot. <sup>33</sup><sup>e</sup>Mai gere uedanga tar kusa uanono tena nitua, na nituaono e turung rou. Doh mai gere uamaluaana tena nitua ra kale liuin, inggon e turung kale tapokis. <sup>34</sup>Inggon gine ru hire tamiuoum tar boungoneit, a tang torikir tamat ura turung rikin toro sioko ro uat. A tang siok ra turung kalein, kara turung hiliuinir tang giameh. <sup>35</sup>A tang torikir kuah ura turung uiuir tar sokong kukuanar raes-uit. A tang sioko ra turung kalein, kara turung hiliuinir tang giameh."  
<sup>36</sup>(-)

<sup>37</sup>O tamatang uakuakeluk ka longor, kara dangata pare. "Ir Tamata Noman! Ia re pokoso tor puhon."

Kare mene hahaua Iesu pare, "Me buturumpe gere rikin me tukununar mat ter buturono tera me pepe totor manulabasine ra ein pe tasir mat."

### O uelhire uaranga tar kuaha nimata liu

**18** <sup>1</sup>Song ke hire Iesu tosno tamatang uakuakeluk toro uelhire uaranga mare ualasira tasisina tar lotu keip dede tar nitagorong man, doh ahik pah ra uakenua kout. <sup>2</sup>Iesu ke kula pare, "I lolono tar siokor uan e uangoulur tamatang kedang ge ahik pahe sokoro tang God, kara hik pahe namana tagu tasir tamat. <sup>3</sup>Doh tar uanion e uangoul ponor

<sup>b</sup> 17.28 Uak 18.20; 19.25    <sup>c</sup> 17.31 Mat 24.17-18    <sup>d</sup> 17.32 Uak 19.17,26    <sup>e</sup> 17.33 Luk 9.24  
<sup>f</sup> 18.1 Kol 4.2; 1Te 5.17

kuah a nimata liu. Inggon e uoto lame tar tamatang kedangon, kare me uoto kula pare, ‘O uakodkodoho uaia keip baka totoguo menia tenag uelmatan.’<sup>4-5</sup> Tar uakikilangan, a tamatang kedanga ke ueluelde baka tar poul, bo tar uadouhina puk inggono ke kula katongoin pare, ‘Inggon ahik nomana pahu sokoro tang God, kara hik pono pahu namanantiehe tasir tamat. Bo a kuaha pukener nimata liu e heir dede totoguo tar niduh. Inggon deh paku poul tatanono mare kale tar niuia mara hikiono pahe uamanguh totoguo re la totouaha peme.’ ”

<sup>6</sup>Kare kular Tamata Nomana pare, “Ualongoro ke kula per tamatang kedanga ge ahik paha kodkodoh. Inggono ke heir tar kuaha tar nikodoho ke malarain. <sup>7</sup>Ge God pe e uakodkodoho uateuele tun tosno tamata geke uamatotois gera lotu dede tar mamang marein, doh tar boung ra hingo pe me nikodoho tatanon. <sup>8</sup>Doh inggo gine ru hire tamiuoum pare, God e turung uakotpokoso uateuele tar nikodkodoho tasisin, bo hape puk gete lahar Tunar Tamatane tar kot, inggon e me tuparampe mo tamata ra tagorong mana tatanon.”

### **O uelhire uaranga tar Parisi, doha tamatang kale tar takis**

<sup>9</sup>O gisiameher tamata ra tagorong mana katongois pare, tesir tamata kodkodohontieh, kara touahiuu tasir mamang tamata ueltebeir. Doh Iesu ke hire tasisina toro uelhire uaranga pare, <sup>10</sup>“A tang torikir tamata kura la taro tar umang lotu ger dedeil tar la lotu. A tang siokor Parisi, doha tang giamehe a tamatang kale takis. <sup>11</sup>Gitir Parisi ke tur kai, kare lotu uatuha tatana pare, ‘God inggo u kulang uauia tun totomua, teeit inggo ahik pah misiana tasir gisiameher tamata gesir ueuenau, karo tamata uasa, kare gisis ra ura keip tasir le. Doh inggo ahik pono pah ngohina tagu tar tamatang kale takiseitie. <sup>12</sup>Inggo u uoto ueil uatorik tar siokor uik, karu uoto heir totomua tar sisisiokor hangaul ro mahar tar mamang inetelik ku kaleig.’ ”

<sup>13</sup><sup>h</sup>“Bo git pukur tamatang kale takis e tur uairehe sikoro kompe. Inggon ahik pahe bang a kai sikor i Heuen, bo ke nun kompe toro uaruaron, kare kula pare, ‘God, o ueldolomoha totoguo, ge inggo pe a tamata uasa.’ <sup>14</sup>Inggo gine ru hire tamiuoum tar binaka re la tapokisir tamatang kale takisene tena um, inggono puk manasampe ter tamata kodkodoho tar matana God. Ge a tamata pe gere uairana katongoin, inggono ra turung touahiuain, doh mai gere touahiuu katongoin, inggono ra turung uairanain.”

### **Iesu ke guata uaia tasir keketik**

<sup>15</sup>O tamata ka keip ponome tasir guama mesir keketik tang Iesu mare me uaponono tar limana tasisin. Doh tar binaka ka bangar tamatang uakuakeluk

<sup>s</sup> 18.12 Ais 58.1-4; Mat 23.23 <sup>h</sup> 18.13 Ker 51.1 <sup>i</sup> 18.14 Mat 23.12

pare, kara uakuakur tasisin. <sup>16</sup>Bo Iesu puk ke kilala tasir keketik tatan, kare kula pare, “Ahik pah mu kula tane tasisin, uamaluana tasir keketik gera lame totoguo, ge na Nitoia pe God a nosir keketik sira pare. <sup>17</sup>Inggogine ru hire tamiuoum toro man, a tamata ge ahik pahe kale tena Nitoia God misiana sira tasir keketik, inggon ahik pahe banot e leka tagula.”

### A tamata uleik ger tang mani

<sup>18</sup>Ka tang siokor tamata uleik ke dangata tang Iesu pare, “Ir Tang Ualasis, ingga a tamata uaia tun. A haua paku guataio tar kale tar nitua gere moko dede.”

<sup>19</sup>Kare mene hahaua Iesu pare, “Ae maeit ro kila totoguo a tamata uaia tun? Ahik deh me tamatar uia te God puk manasampe me pahen. <sup>20</sup>Inggogine o ate tar ualatur e kula pare,

‘Ahik paho ura keip tasir le,  
ahik paho uiliatung pous,  
ahik paho uenau,  
ahik paho boho tola,  
ueltada tang tamoum, doh tinoum.’” *Kale Tapokis 20.12; Ualatur 5.6*

<sup>21</sup>Kare kula tapokisir tamata pare, “Tar binaka ru keketikio e me tukene daan, ginina uakapanine ku uakelukumegio.”

<sup>22</sup>Tar binaka ke longoro Iesu, kare kula tatanono pare, “Inggogine o katupa harahampe tar siokor inet. Uabulaua liu tenang mamang inetelik ge kaeig, karo heir tar mani tasir tiome mare turung burehentiehe me nang inete uaia ingga i Heuen, song ro uakelukumeane totoguo.”

<sup>23</sup>Tar binaka ke longorono pare, inggono ke me hagouo uaduh tun, teeit inggono na burehentieher inet.

<sup>24</sup>Iesu ke banga tatanon, kare kula pare, “A parakukuhuntiehe tun tar tang mani tar lekala tena Nitoia God. <sup>25</sup>Bor kamel e banoto tar hikula tar tapokosonar harum, ahik pahe parakukuh sirain tar tang mani gere marang lekala tena Nitoia God.”

<sup>26</sup>Gisis ka longor, kara dangatangua tang Iesu pare, “Bo maingua ra banotong uelkarusin.”

<sup>27</sup>Doh Iesu ke mene hahaua pare, “A haua re matoto leuinir tamata tar kuat, God e banot e kuat.”

<sup>28</sup>Doh Pita ke kula tatanono pare, “Ualongor! Inggeim king hiliu tenami mamang inetelik, karing me uakeluk totomua.”

<sup>29</sup>Kare kula tapokis Iesu pare, “Inggogine ru hire tamiuoum toro man. A tamata gere namana tena Nitoia God, maeit ke hiliu tena uan ue na

<sup>j</sup> 18.17 Mat 18.3    <sup>k</sup> 18.18 Luk 10.25

kuaha ue o bung tahin ue taman ue tinana ue o bung tun, <sup>30</sup>inggono e turung kale uaburehentiehe tun tar ineteninanine tar binakalanine, kare turung kalengua ponompe tar nituang tar mamang binakalikinit re lame.”

### Iesu ke kula poluk pare, e turung mat

<sup>31</sup>Iesu ke kila toto sioko baka tasir hangaul, doha tang torikir tamatang uakuakeluk, kare me hire tasisina pare, “Ualongor! Inggeig i la taro i Jerusalem, doha mamang inetelikinit geka bolo uatuhalaigir propet tar Tunar Tamat, ginin e turung kotpokoso tun toro man. <sup>32</sup>”Inggono ra turung heirin tar limasir tamata ge ahik paho Ju. Doh gisina ra turung uauanet, kara loulou tatanon, kara kalkalopisin, kara uiliatung pous tatanon, <sup>33</sup>bo tar uatouononor marein puk inggon e turung tua tapokis.”

<sup>34</sup>”Bo gisina puk ahik pah ka naman manate tar tengkanar puhon, teetit a tengkanar puhono ka uaouoin, kara hkinguasina pah ka ate tar haua ke hireion.

### Iesu ke uauia tar tamata kut

<sup>35</sup>Gine re la uahuhut manasa peko Iesu i Jeriko, doha tamat a kut e tabila tar tektekenar lel, kare hinga inet. <sup>36</sup>Tar binaka ke longorono tasir manai tamata ka me la pela, kare dangata pare, “A hauene ke kotpokos.”

<sup>37</sup>Kara hiresina tatanono pare, “Iesu ger peng Nasaret git re haiala tar lel.”

<sup>38</sup>Kare kula ualeikinguaono pare, “Iesu ger tuna Debit o ueldolomo totoguo!” <sup>39</sup>Gisit ra uoum teil ka loulouar, kara kula tatanon e pepe bukbuk. Bo inggono puk ke kula ualeikintiehe uain pare, “A tuna Debit, o ueldolomo totoguo!”

<sup>40</sup>Iesu ke tur, kare hire tasir tamata ra la keipime tatanon. Tar binaka ke la uahuhutumeon, kare dangata Iesu tatanono pare, <sup>41</sup>“Ingga o malara a haua ru guataio totomua.”

Kare kula tapokisono pare, “Tamata Noman, inggo u marang bang!”

<sup>42</sup>Kare kula Iesu tatanono pare, “O banga puk manas, reng nitagorong mana ke uauia totomua.” <sup>43</sup>Ahik me sikir manasan, kare bangar tamataner kut, kare uakelukungua tang Iesu e uatuatakai teil tang God. Tar binaka ka bangar tamata uakapa tar haua ke kotpokos, gisina ka uatakai pono tang God.

### Sakeus ger tamatang kale tar takis

**19** <sup>1</sup>Iesu ke lekala i Jeriko, kare haiala i uantinanina tar uan. <sup>2</sup>Doha tamat e uangoul tar uanion a hangana tang Sakeus. Inggono

<sup>1</sup> 18.31 Luk 24.44    <sup>m</sup> 18.32 Luk 9.22,44    <sup>n</sup> 18.34 Mak 9.32

nas uleikir tamatang kale tar takis, doh inggon a tang mani. <sup>3</sup>Inggon e marang banga uasa tun maionene Iesu, bo teeit kompe a tamata puhina peon, maeit ahik pahe banot e bang huar, doh teene pon o manai per tamat. <sup>4</sup>Doh Iesu e lihime tar lelon, temaeit ke ualolaon i uoum, kare la moto toro douk fig mare bang huarala.

<sup>5</sup>Tar binaka ke me la matoto Iesu tang Sakeus, kare tada kai taro i ran, kare kula tatanono pare, “Sakeus o hiuo ualatur puk manasampehaene daan. Inngo u la uangoul tun bakampe daana tenang uma.”

<sup>6</sup>Maeit Sakeus ke longoro kompe, kare hiu, kare me kila keip tang Iesu tar niuah. <sup>7</sup>O mamang tamata uakapa ka banga tar puhon, kara uakekena tar ueluelmene pare, “E la tun manasampeono tena umar tamateitir sa.”

<sup>8</sup>Bo Sakeus puk ke tentur kai, kare kula pare, “Bangar Tamata Noman! Inngo gine manasa ru heir tar maharanar mamang inetelikininer noug e la tasir tiome, doh getu boho me tamata me inet. Inngo u turung bulaua uatoueit tapokis tar bulauana ro boh.”

<sup>9</sup>Maeit ke kula Iesu tatanono pare, “Daan ke laha God tar uelkarus tamiuoum tar umene, teene a tamatane a tuna pono Abraham. <sup>10</sup>Ge a Tuna per Tamat ke lame tar me sir uelhir, kare uelkarus tasir tamata geka heil sira tasir sipsip.”

### O uelhire uaranga tar hangaulur mani

<sup>11</sup>Tar binaka ra ualongoror tamata tena niualasira Iesu, inggono ke hire tasisina toro uelhire uarang, teene inggono ke uahuhut i Jerusalem, doho tamata ra namana pare, na Nitoia God e turung pokoso puk manasampe. <sup>12</sup>Kare kula Iesu pare, “A tamata gere la tur toro matina toia ke kaleuatoro tar la tar giameher pang uan gere uairehentieh. Inggono ke haiala mara la uatoia toin tar pang uanion, song re turung la tapokisime. <sup>13</sup>Tar binaka ke marang hiliuion, inggono ke kila baka tosno hangaulur tamatang kalekinale, kare heir tasisina tar 20 kina hahai, kare kula tasisina pare, ‘Mu uamoko tar maninine mare poho uabureh, e tuka getu tapokisimeo.’ <sup>14</sup>Bo o tamatan tena uan pukion e tokouasais tatanono temaeit gisina ka ualatue uakeluk tasir tamata ra la uakeluk tatanon, tar la kula pare, ‘Inggeim mi de tar tamatane mata kotpokoso sira pare, nami toiaeim.’”

<sup>15</sup>“Bo inggono ka uatoiampein, song ke la tapokis tena uan. Maeit inggono ke kilame tasir tamatang kalekinalesit geka heiris tar mani mare ate a touiha ka uakotpokosoigisin. <sup>16</sup>A uakikilanganar tamata ke lame, kare me kula pare, ‘Ir Tamata Uleik, inggo ku uapoho uanoto tar

° 19.7 Luk 15.2    ¢ 19.8 KT 22.1; Aha 5.6-7    ¤ 19.9 Luk 13.16; Apo 16.31

\* 19.10 Luk 15.4; Jon 3.17; 1Ti 1.15

200 kina tar mani geko heiria.’<sup>17</sup> Doh na tamata uleikiono ke mene hahaua pare ‘Nag tamatang kalekinaleo, ingga ko guata uaia tun! Teeit ko kalekinale uaia keip pea tar mani ger sasalik tun, temaeit gine daan inggo u uamatoto totomua ter tamatang kauেকে tar hangaulur uan uleik.’ ”

<sup>18</sup> “Kare la polukuhar uatang torikinar tamatang kalekinale, kare me kula pare, ‘Ir Tamata Uleik, inggo ku uapoho uanoto tar 100 kina tar mani geko heiria.’<sup>19</sup> Kare mene hahaua na tamata uleikiono pare, ‘Auia tun! Inggo u uamatoto totomua ter tamatang kauেকে tar tolimar uan uleik.’ ”

<sup>20</sup> “Doha tang giameher tamatang kalekinale ke la polukuha, kare me kula pare, ‘Ir Tamata Uleik! Kale tenang maniene, inggo ku gomo uaouo taninina toro mahar gomom, karu uamok.<sup>21</sup> Inggo ku sokoro totomua, teene a ualasokoro pe ingga. Ingga o uoto kale uahuara puk tar haua re kotpokoso tur tenas kalekinaler gisiamehe geka guataig.’ ”

<sup>22</sup> “Kare kula na tamata uleikiono tatanono pare, ‘Ingga a sa! Inggo u kedanga keip totomua tenang uelhire katong. Ingga a tamatang kalekinale uasa, Ingga ko ate pare, inggo a tamat a ualasokor, karu kale uahuara puk tar haua re kotpokoso tur tenas kalekinaler gisiamehe geka guataig.<sup>23</sup> Ae maeit ahikia mato la uamokola tenag manio tar umang mani maru me kaleo me mani geke poho uahahaua tar binaka getu la tapokisime?’<sup>24</sup> Kare kular toia tasir gisiameher tamatang kalekinale pare, ‘Kale liu tar mani tatanon, kara heirig tar tamatang kalekinale geke uapoho uanoto tar 200 kina.’ ”

<sup>25</sup> “Kara kulasina pare, ‘Ahik dehonor tamata uleik, inggono deh ke kale manasa tar 200 kina!’ ”

<sup>26</sup> “Kare kular toia pare, “Inggo gine ru hire pare, maisir tamata geka kalekinale keip uaia tenas bureher inet, gisina ra turung heir uaburehe ponois. Bosir tamata ge ahik pah ka kalekinale keip uaia tenas inet ue gete kae manasa uoumig menas inetesin, ginina ra turung siokor kale liuig.<sup>27</sup> Bo mu ueliu pukumeane tos nogo uelmatanio geka ueluelde matu toiao tasisin, kara me uiliatung pous toisisinane i uoum totoغو.”

<sup>28</sup> I muduhia ke mene uakapa baka pe Iesu, kare la uoumungalala i Jerusalem.

### **Iesu ke kaleuatoro tar lekala i Jerusalem misiana tar toia**

<sup>29</sup> Git re lang uahuhut manasa pe Iesu i Betpage, dohi Betani geura uahuhut tar siusan gera kilain a Siusanang Oliv, Iesu ke ualatue tena toking uakuakeluk, kare kula pare,<sup>30</sup> “Raoum mura la tar uaneit i uoumuhia, kaura la lekala ium, kaura la tupara tar donki kalan a nisanga

<sup>s</sup> 19.17 Luk 16.10 ‘ 19.26 Mat 13.12; Luk 8.18



uatur. Inggon ahik me tang siokor tamata ke panete baka uoum tatanon. Luaka tatanon, kara keipimeinane. <sup>31</sup>Gete me tang sioko re me dangata tamiraoum pare, ‘Ae maeit kura luaka raoum tatanon?’ Mura hire tatanono pare, ‘A Tamata Noman e malara tatanon.’”

<sup>32</sup>Maeit rasina kura la, kaura la tupara sira re moko per mamang inetelik ka hire peis. <sup>33</sup>Gine ura luaka tur pe rasina tar donki. Tanener donki ke dangata tasrasina pare, “Ae maeit ura luaka liu raoum tar donki.”

<sup>34</sup>Kaura mene hahaua rasina pare, “A Tamata Noman e malar e kalekinale keip tatanon.” <sup>35</sup>Doh rasina kura me ueliuime tatanono tang Iesu. Kaura baka uaponala tenasira hikhiku i rana toro pinenar donki, kaura poul tar uapanete tang Iesu tar donki.

<sup>36</sup>Git ke la manasa peko Iesu, o tamata ka heig tenas hikhiku tar lel. <sup>37</sup>Doh tar binaka ke me la uahuhutiono tar lele gere la uahiuako tar Siusan i Oliv, no tamatang uakuakeluk Iesusitir manai ka siokor uatakai keip tar niuaha uleik, kara kulkula ualeik, teene ka banga pesina tar bureher nitouo geke guataig Iesu.

<sup>38</sup>“Gisina ra kulkula pare,

“A niguata uaia e la tar toiaene  
geke laha tar hanganar Tamata Noman!

O hiarou o mok i Heuen,  
doh inggeig i uatakai,

kari uoungono tar hangana God ger i ranantiehe tun!” *Ker 118.26*

<sup>39</sup>O gisimeher Parisi geka uangoul tagu tasir manai tamata ka kula pare tang Iesu, “Ir Tang Ualasil, ingga o uelkukur tosno tamatang uakuakeluk tar puhene ra kulainisin.” <sup>40</sup>Kare mene hahauono tasisina pare, “Inggo gine ru hire tamiuoum geta uangoul bukbukusin, a paluanine tere turung kaling ualeik!”

### Iesu ke kiring tasir tamatang Jerusalem

<sup>41</sup>Gine re lang pokoso peko Iesu i Jerusalem, kare banga tar uan uleik, inggono ke kiring e ueldolom, kare kula pare, <sup>42</sup>“Ge pake gine mu ate tanikoum daana tar haua re banot e heir toro uelhiarou, bo ka touaouo pukin tar matamiuoum. <sup>43</sup>A binak e turung la tunuha tamiuoum, doh nomio uelmatanioum ra turung turtur uiloho tane tar koto tamiuoum mara hikioum pah mu banotong ualo tauete liu. <sup>44</sup>”Doh gisina ra turung ueh uatamtamiana to tamiuoum i koto menia toso bung tumiu i koboro tenami uan uleikoum, kara siokor mamantouo tar uan uleikene, teene inggoum ahik matung bang paroko tar binaka ger nang God ke la peha tamiuoum.”

<sup>u</sup> 19.38 Luk 2.14    <sup>v</sup> 19.44 Luk 21.6

**Iesu ke geil liu tur tasir tamata tar umang lotu ger dedeil**

<sup>45</sup>Song ke la lekala Iesu tar umang lotu ger dedeil, kare la geil tauete tasisit ra uabulbulaua to tar inet ium. <sup>46</sup>Kare hire tasisina pare, “No uelhire God gero nibol o kula pare,

‘Nag umo a uma ra turung lotu toin.’

Bo inggoum kung guata sira tar umon a nosir ueuenau.”

*Aisaia 56.7; Jeramaia 7.11*

<sup>47</sup>“Doha mamang mareinilik Iesu e ualualasira to tar umang lotuono ger dedeil. Bo o patere uleik puk, doho tamatang ualualasira tar ualatut mesir gisiameher tamata uleik ka uedanga tar marang uiliatung pous tang Iesu. <sup>48</sup>Bo ahik puk pah ka tupara me hagar mara guat, teene o tamata ra marang ualongoro uaia tun tar hauanine ke meneig Iesu.

**Nosio tamata uleikir Ju ka dangata tang Iesu**

**20** <sup>1</sup>A siokor binakene re ualasira to pe Iesu tar buturung uelpokosane iuma tar umang lotu ger dedeil, inggono ke la mene tauete toro Uelhire Uaia, doho patere uleik mesir tamatang ualualasira tar ualatut, karo gisiamehe ponor mamahoholik ka siokor lame tatanon, <sup>2</sup>kara kula tang Iesu pare, “Hire tamiueim tang mai ke uatohangana totomua, doh mai ke heir totomua tar nitampopokoh, maeit ko guata tar inetenine.”

<sup>3</sup>Kare mene hahauono pare, “Inggo u dangatangua pono tamiuoum tar nidangat, mu hire totoguo, <sup>4</sup>mai ke heir tar nitampopokoho tang Jon tar uahuhu tasir tamat, God ke heir ue o tamata puk.”

<sup>5</sup>Gisina ka ueluelmene katongois pare, “Hape geti mene hahaueig pare, a nitampopokohor nang Jon e la tur tang God, song re turung dangatono tagigeig pare, ae maeit ahikioum matung tagorong mana tatanon? <sup>6</sup>Bo geti kula hahaueig pare, a nitampopokohoneit tang Jon e la turume tasir tamat, doho tamata uakapa tun ra turung bakbak pous tagigeig tar palau, ter hauon gisina ra tagorong mana tun tang Jon a propet.” <sup>7</sup>Maeit ka kulasina pare tang Iesu. “Inggeim mi tel, ia re la tur na nitampopokoho Jon.”

<sup>8</sup>Kare kula Iesu tasisina pare, “Gine ahik peoum pah mu hire tapokis totoguo, temaeit inggo ahik pono pahu hire tamiuoum, ia re la turur nitampopokohene ru guata keipio tar inetenine.”

<sup>w</sup> 19.47 Luk 21.37

### O uelhire uaranga tasir tamata gera kaueke tar iomo bino

<sup>9</sup>\*Inggono ke mene dedempela tar hire tasir tamata toro uelhire uaranga rone pare. “A tang siokor tamata ke lebe tena iomo bino, kare heir baka tasir gisiamer tamata ra kaueke uangoul, kare hiliu ke la i reh, ke la uangoul tar puhung barah. <sup>10</sup>Doh tar binaka ke uelmurakar bino, inggono ke ualatue tena tang siokor tamatang kalekinale e la tasir tamatasis ra kauek. Inggono ke malauelhir tasisina ra la heirime tatanono me giniamer kukuanar bino. Bo o tamatang kaueke puk ka halhaluh tatanon, kara uelueltura liu tatanon ahik mata kale bak. <sup>11</sup>Inggono ke ualatue poluk tar tang giameh, doh inggono ka la uiliatung ponoin, kara uamatalain, doh ke la tapokis puk ahik mata kale baka me inet. <sup>12</sup>Doh tanener iomo ke ualatue poluk tar utang touononar tamat, doh inggono ka uiliatung uadeuatingin, kara baka tauetein.”

<sup>13</sup>Kare la kular tanener lebe bino pare, “A hauangua paku guataio? Inngo u turung ualatue tar tug geru malauelhirintiehein. Song tera la ueltada to nomanasina tar tuguo.”

<sup>14</sup>“Bo tar binaka puk ka bangar tamatang kaueke bino tatanon, gisina ka uelmene katongois pare, ‘Inggonene ter tang sioko re turung kale uahiu tar iomo binoene, ti uiliatung pous tatanon, kari kale tena ineton.’ <sup>15</sup>Temaeit ka baka tauete turusina tatanono tar iomo bino, kara la tung pous tatanon.”

Kare kulangua Iesu pare, “A hauangua re turung guatain tanener lebe bino tasisin? <sup>16</sup>Inggon e turung lame me uiliatung pous tasir tamatang kaueke tar iomo bino. Kare heir tar iomo bino tasir gisiamer.”

Tar binaka ka longoror tamata ke kula pe Iesu pare, gisina ka kula pare, “God ahik uamalua tar puhonene e kotpokos!”

<sup>17</sup>Doh Iesu ke banga uakodkodohola tasisin, kare kula pare, “Bo ae maene ka bolo uahiuain roono tono bolobolo God pare?

‘O palua geka deinir tamatang tuha toro um  
teene ka namana pe o sa roon,  
karo iinetelik puk, roono ka uiuirin pare, o inete uleik tun.’

*Ker 118.22*

<sup>18</sup>ʸDoh mair tamata re turung punga uahiuako toro palua roon,  
e turung taptapolaka siksikin.  
Doh mair tamata re turung hungin tang roon,  
e turung tamtamian.’”

<sup>19</sup>Ahik me manasan o tang ualasira tar ualatut, doho patere uleik ka bangaehe me hagar tar uih tang Iesu, ter hauon gisina ka ate ke uelhire

\* 20.9 Ais 5.1 ʸ 20.18 Ais 8.14-15

peono toro uelhire uaranga rone o lain tasisin, bo gisina puk ka sokoro tasir tamat.

### Bulaua tar takis tang Sisa

<sup>20</sup> O tamatang ualualasira tar ualatut, doho patere uleik ka uakeis uanono tang Iesu, kara ualatie tasir gisiamer tamata ra la bangbanga uanomo tang Iesu, kara pepe boho pare, o tamata kodkodoh. Gisina ra marang uakouh tang Iesu gete mene siaua me puh mara ueliuilasina tatanono tena nitampopokohor gavamanang Roum. <sup>21</sup> Maeit gisina ka dangata tatanono pare, “Ir tang ualasis! Inggeim mi ate ingga o men, karo ualasira tar hauar kodkodoho tang hingiamper tamata ger tohangana ue ahik paha tohangana, karo ualasira tena niguata God toro mana tun. <sup>22</sup> Auiampeono ri heir pe inggeig tar takis tang Sisar ue ahik.”

<sup>23</sup> Iesu ke ate pare, gisina ra marang tutlour tatanon, kare kula tasisina pare, <sup>24</sup> “Ualasira totoguo me mani, karung hire totoguo maiener nipetut tola, doha hangana mai re moko teil.”

Kara mene hahauasina pare, “Sisa!”

<sup>25</sup> Kare kula Iesu tasisina pare, “Mu heir tang Sisa tar inete ger nan, doha ineter nang God ra heirimpeig tang God.” <sup>26</sup> Doh gisin ahik pah ka banoto tar mene uakouh tatanono tar haueit ke mene toiono tasir manai. Gisina ka me tabila bolongurungua ka lutara pe tar menenin.

### O Sadiusi ka dangata tang Iesu

<sup>27</sup> O gisiamer Sadiusi gera tagorong boho tar nitua tapokis tur toro mat, ka lame tang Iesu, kara me dangata pare, <sup>28</sup> <sup>a</sup> “Ir Tang Ualasis, Moses ke bolo uatua tagigeig pare, ge pake mata liu me tamata mena kuah, bo ahik puk me keketik, a tahinono pake le tar kuaha kamobono mare uakotpokosono mena keketik tahineit ke mat. <sup>29</sup> O mouitir mamahialik ka uangoul. Doh ger uoum ke le tar kuah, kare mat ahik me keketik. <sup>30</sup> <sup>A</sup> uatang torikin ke le kalehe tar kuahon, kare la mata pon. <sup>31</sup> Kare la le polukur uatang touonona tatanon, doha siokono kompe, gisinar mouitir mamahialik ka siokor le tatanon, kara siokor mat. Ahik me tang sioko tasisina ke to tun. <sup>32</sup> Dohi muduhia a kuaha ke la mata pon. <sup>33</sup> Bo tar binakang tua tapokis puk maingua re turung nana tun tar kuahaon, ge gisina per mouitir mamahialik ka siokor le tatanon.”

<sup>34</sup> Iesu ke mene hahaua pare, “O tamatang daan ra le, kara ualeis. <sup>35</sup> Bosir tamatang gaat i uoumuhia gisis re uairanais God, kara uatua tapokisis, ahik pah ra turung le ue ra ualeis. <sup>36</sup> Doh gisin ahik pah ra banoto ra mata baka poluk, ge gisina pe ngohina tasir angelou, karo bung tuna God, teeit ka uatua tapokis peisisin. <sup>37</sup> <sup>b</sup> Bo Moses puk ke

<sup>z</sup> 20.20 Luk 11.54    <sup>a</sup> 20.28 Ual 25.5    <sup>b</sup> 20.37 KT 3.6

ualasira pono tasisit ra mat, kara tua tapokis, inggono ke bolo uahiua hape ke mene tur peha God tatanon i lolono toro hue pare, a Tamata Noman ke kila katongoin pare, ‘Na God Abraham, doh Aisak, doh Jekop.’<sup>38</sup> A Godon ahik pah nas Godor mat. Inggono nas Godor tua. Ge gane pe tatanon, gisin o tua uakap.”

<sup>39</sup>O gisiamer tamatang ualualasira tar ualatut ka kula tang Iesu pare, “Ir tang ualafir, ingga ko heir uaia tun tar puhung mener uia!”

<sup>40</sup>Doh ahik me tang sioko ke ongolo tun tar dangata poluk tatanono me giniamer nidangat.

### Iesu ke dangata tasisina pare, “Mair tuna Debit”

<sup>41</sup>Kare kula Iesu tasisina pare, “Ae maene ra kulasina pare, ‘Inggono e la tur toso bunguna Debit.’<sup>42</sup> <sup>c</sup>Bo Debit ke uakalahara katongoin i lolono tono Bolobolong Ker, ke kula pe pare,

‘A Tamata Noman ke kula tenag Tamata Noman pare,  
Tabilane tar pang mua totoguo,<sup>43</sup> e tuka getu touahiuo tosnongo  
uelmatana i kukulebanga tar kekeimua.’ *Ker 110.1*

<sup>44</sup>Doh gete kila Debit tatanono pare, na Tamata Noman, hape maene re uatuna Debit tatanon.”

### O tamatang ualualasira tar ualatut

<sup>45</sup>Tar binaka ra ualongoror tamata tang Iesu, inggono ke hire toсно tamatang uakuakeluk pare, <sup>46</sup>“Mu tagin teil tasir tamatang ualualasira tar ualatut. Gisina ra uaha tar uiloho keip tar gomnonitir barah, kara malara ra meneng ueltada tois toro buturung uabulbulau, kara uoto malara tar tabtabilanitir nasir tamata uleik iuma tenas umang lotur Ju, kare tar tabtabilaniner nosir tohangas ger to ueltadan tar niein uleik. <sup>47</sup>Gisina ra boh, kara uoto kale uakapa tenas mamang inetelikir kuahar nimata liu, doh ra guata sira pare, o tamata uaia ra kotouo pe tar lotuniner barah mara bangar tamat. O tamata sira pare, ra turung uabatontiehis.”

### A kuaha nimata liu ke heir tena mani

**21** <sup>1</sup>Tar binaka re uangoul Iesu iuma tar umang lotu ger dedeil, kare bangangua tasir tang inete ra uamoko pela tenas mani tar buturung uamoko tar umang lotu. <sup>2</sup>Doh inggono ke banga pono tar kuaha nimata liu a tiome ke la uamoko pono pela tena torikir mani. <sup>3</sup><sup>d</sup>Kare kulangua Iesu pare, “Inggo gine ru hire tun toro man, a kuahener

<sup>c</sup> 20.42-43 Ker 110.1 <sup>d</sup> 21.3 2Ko 8.12

tiome, kara nimata liu ke heir uaburehentiehe uain tasisiner tang mani, <sup>4</sup>o tamatasine re tototoisir mani, ka heir uabanoto puk. Bo inggonener nimata liu ahik baka poluk mena mani ke la moko ke siokor heir liu pe.”

### Iesu ke kula tar umang lotu ger dedeil ra turung durain

<sup>5</sup>Tar binakonene ra ueluatata per gisiameher tamatang uakuakeluk tar umang lotu ger dedeil pare, “Inggon a niuamatmata hamas tar paluanitir mataia, kara inete pononit ka heirig tar uatakai tang God.” Bo Iesu puk ke kula pare, <sup>6</sup>“A hauanine rung bangagioumene daan, gaat i uoumuhia, ahik mo sioko ro palaua ro turung toko uaponola mo giameh, a mamang palaua uakapa tununine ra turung siokor baka uahiuag.”

<sup>7</sup>Kara dangatasina tatanono pare, “Ir Tang Ualafir, mangiha re turung pokosor inetenanine? Doha huar uaparoko re turung uahire i uoumuhia pare, ginin e kotpokos.”

<sup>8</sup>Kare mene hahauono pare, “Mu tagin teil geta me tutlourusium. Ge mo burehe pe ra turung lame tar hangouguo, ra me hire pare, ‘Te inggo.’ Doha binaka ke uahuhutin. Ahik pah mu uakeluk tasisin. <sup>9</sup>Getung longoroum toro uiliatung, kara uelsaeng toro pang uan, ingggoum ahik pah mu sokor. Gininane e kotpokoso uakikilanga manasampe, bo a uadouhinar marein puk ahik pahe turung pokosongua.”

<sup>10</sup>Song ke hire poluk Iesu tasisina pare, “O pang uan ra turung ueluiliatungeis, karo nitoia e turung ueluiliatunge katongois. <sup>11</sup>Doho nun uleik e turung pokos, doh toro giniamer butur e turung kotpokosor gogo uleik, kara uelmata uleik, dohi ran tar langit e turung pokosor niuaparoko uleik, kara inetenitir ualasokoro tun.”

<sup>12</sup>“Bo tar binaka puk halanar inetenanine te kotpokos, gisina ra turung kusa tamiuoum, kara uaelmahingisium, kara ueliuilasium tonosio umang lotu Ju, kara turung keipilasium tar umang uih, kara turung ueliuilasium i uoum tasir toia mesir tamata uleik. Gininane ra turung guataig tamiuoum, teeit rung uakeluk pe totoguo. <sup>13</sup>Inggonene ter binakeit rung turung hireoum tasisina toro Uelhire Uaia. <sup>14</sup><sup>f</sup>Maeit, Inggoum ahik pah mu namanantiehe baka uoum hape rung turung uelturut katongo pesioum tasisin. <sup>15</sup><sup>g</sup>Ge inggo pe u turung heir tamiuoum toro uelhire, kara niate mara hik nomio uelmatanion pah ra banotong tur tane ue ra touahia toro uelhire geru heirio tamiuoum. <sup>16</sup><sup>h</sup>O bung tinamiuoum ponompesit meso bung tahimiu, karo bung kaloumiu, doho bubungumi ra turung ueliu ponola tamiuoum tosnomio uelmatana mara la uiliatung pousis mo gisiamehe tamiuoum. <sup>17</sup>Doho tamata uakap e turung tokouasais tamiuoum, teene rung uakeluk pe inggoum totoguo. <sup>18</sup>Bo ahik puk me siokor kaming ul re turung takaus liu tur tar

<sup>e</sup> 21.6 Luk 19.44   <sup>f</sup> 21.14 Luk 12.11-12   <sup>g</sup> 21.15 Apo 6.10   <sup>h</sup> 21.16 Mat 10.21-22

lumiuoum, kare rou. <sup>19</sup>Inggoum mu tur uanono marung kaleoum tar nitua gere moko dedela.”

### **Gisine ahik paho Ju ra turung mamantou i Jerusalem**

<sup>20</sup>“Tar binaka rung bangoum tasir tamatang uiliatung ra tur uiloh i Jerusalem, inggoum mu turung ate pare, a binakang mamantouo tar uan uleik i Jerusalem ke uahuhut manasain. <sup>21</sup>Temaetit mais ra uangoul i Judia ra ualo liu taro toro sisan, mais ra uangoul i Jerusalem ra hiliu tar uan. Doh gisine ra uangoul i be tar uan ahik pah ra la lekala.”

<sup>22</sup><sup>i</sup>“Ge ter binakang uabato peono mara niuabatoonene e uauelmatout tar mamang inetelik geke bologir propet. <sup>23</sup>A binakoneit e turung binaka uasantiehe tun tasir kuaha balakos, kare tasir kuahasine ra uahuh teil tasir guam! Gea niduh uleik pe e turung pokosane tar kot, ter hauono God e turung nimaliantiehe tun tasir tamatasin. <sup>24</sup><sup>j</sup>Gisina ra turung uiliatung pou keipis tar baenat, kara turung kaleis ra la uangoul sira tasir karabus toro mamang pang uanilik. Doho tamatasis ahik paho Ju tagu ra turung touahiu i Jerusalem e tuka tar binakeit ke uamatotoin God ra la kaueke uatukasin i Jerusalem.”

### **A inetenit re ualasira tar tunar tamata gete tapokisiha**

<sup>25</sup><sup>k</sup>Doh Iesu ke kula poluk pare, “Me niuaparok e turung pokoso tar pisar, doh tar bialok, kare tasir pitopit. O tamatang toro mamang pang uanilikane tar koto uakap ra turung toboul, kara turung sokor, kara turung kanuhuntieh, re gutur uauleik per butuana tar laur. <sup>26</sup>O tamata ra turung sokorontiehe tun, kara mata uapuh, teene gisina ra ate tar inetenitir ualasokoro re uakekena pe tar kotpokosane tar koto uakap. Teeit God e turung uagune tar mamang ineteliking tar langit. <sup>27</sup><sup>l</sup>Tar binakon, gisina ra turung banga tar Tunar Tamat e la uahiuaha i lolono toro mahar langit, inggon e la keipiha tar nitampopokoh, doh na uinatoro uleik. <sup>28</sup>Gete uakekena manasar ineteninane tar kotpokos, inggoum mu siokor tentur kai, doh mu uatada kai tar lumiu, ter hauon a binaka re uelkarus God tamiuoum ke uahuhut manasain!”

### **A niate ra kale turin toro douk fig**

<sup>29</sup>Iesu ke hire tasisina toro uelhire uaranga pare, “Mu bangala toro douk fig, kara douk uakapalanila. <sup>30</sup>Gete uakekenar douk tar uakoup, o tamata uakapa ra ate pare, i muduhia inggon e turung pang pisar. <sup>31</sup>Doh ter siokono kompe getung bangoum tar inetenin re kotpokoso pe, inggoum mu ate teil tena Nitoia God ke uahuhut manasain. <sup>32</sup>Inngo u

<sup>i</sup> 21.22 Jer 5.29; 46.10; Hos 9.7    <sup>j</sup> 21.24 Ker 79.1; UGO 11.2    <sup>k</sup> 21.25 Ais 13.10; Isk 32.7; Jol 2.31; UGO 6.12-13    <sup>l</sup> 21.27 Dan 7.13; Mat 26.64; UGO 1.7

hire tun tamiuoum toro mana pare, a tamatang daan halanampe ta mat, doha inetenina ke kotpokoso manas. <sup>33</sup>A mamang inetelik i rana dohi kot e turung rou, bo nogo uelhireo ahik paho turung kapa liu tagu.”

### No tamatang uakuakeluk Iesu ra tagin teil

<sup>34</sup>Doh Iesu ke kula poluk tosno tamatang uakuakeluk pare, “Bo inggoum puk mu tagin teil getung uamaluanasium tar einintieh, karung inum uabureh, karung la maluan, karung namanantiehe tar ineteng gane tar kot, ge ginina pe tere uapunga uahiua tamiuoum, kara hikingua pah mu ate tar binaka re la ualutarahar Tamata Noman. <sup>35</sup>Ge inggono pe e turung la uaponaha tasir mamang tamatalik gera uangoulane tar koto uakap. <sup>36</sup>Uakeis uanono uaia dede tun, doh mu lotu marung banotoum tar uasiaua liu tar hauaninanit re turung kotpokos, doh marung banoto ponoum tar la tur i uoum tar Tunar Tamat.”

<sup>37</sup>Tar mamang mareinilik Iesu e ualualasira to tasir tamata tar umang lotu ger dedeil, doh tar mamang boungulik inggon e uoto la tauete liu i Jerusalem, e la uoto uangoul tar siusan gera kilain a Siusanang Oliv. <sup>38</sup>Bo o tamata puk ra uoto lame tar mamang liliuolik tar me ualongoro to tatanono tar umang lotu ger dedeil.

### Judas ke uauia tar heir tang Iesu tasir uelmatan

**22** <sup>1</sup>Gine daan ke uahuhut manasainir mareining toro niein uleik, O Bereit Ahik me Is, ra kilain pare, “Leke Liu ro Mat.”<sup>m</sup> <sup>2</sup>Doho patere uleik mesir tamatang ualualasira tar ualatut ra bangaehe me giniamer hagar tar uiliatung pous tang Iesu, ge gisina pe ra sokoro tasir tamat.

<sup>3</sup>Kare la hikungua Satan tang Judas gera uoto kilain tang Iskariot, inggono ter tang sioko tasisinar siokor hangaul, doha tang torik. <sup>4</sup>Doh Judas ke la tasir patere uleik mesir tamata uleikisit ra tur kauেকে tar umang lotu ger dedeil, kare la uelhalata keip tasisina me hagar uaia mare turung heirono tang Iesu tasisin. <sup>5</sup>Gisinasine ka uahantiehe tun, kara uauia tar heir me mani tatanon. <sup>6</sup>Maeit inggono ke heir tar uauia tasisin, kare sirsir me hagar uaia ge ahik mo manai tamata ra uangoul mare heirono tang Iesu tasisin.

### O uadoughina ro niein

<sup>7</sup>A mareining toro niein uleik gera kilain, O Bereit Ahik me Is, ke kotpokoso manasa ter binakonene ra tung pousisir tusur sipsip gera ein

<sup>m</sup> **22.1** O niein uleik o nasir Ju ra kilain, “Leke Liu ro Mat.” Uanamana huara dede tar binaka toro mat o uleik ko leka liu tasir Ju i Isip. O Ju ra kialin, “A Pasova.” Bang toro Bolobolong Kale Tapokis Mahar 12.   <sup>n</sup> **22.3** Jon 13.2,27   <sup>o</sup> **22.7** KT 12.1-27



tois toro niein uleik, Leke Liu ro Mat. <sup>8</sup>Iesu ke ualatue tas Pita, me Jon, kare kula pare, “Mura la, doh mura la kaleuatoro tar butur ri la ein toeig toro niein uleik gera kilain, Leke Liu ro Mat.”

<sup>9</sup>Kaura dangata rasina pare, “Tar butur ro malaraiia mira la kaleuatoro raeim.”

<sup>10-11</sup>Inggono ke mene hahaua pare, “Gine ura leka peko raoum tar uan uleik, kaura turung ueltupara tar bulout e huata teil tar nouh kodom. Mura uakelukungua raoum tatanono tar umeit re la lekalaion, kaura kula tang tanener uma pare, ‘A tang ualualasira ke dangata pare, Ia kaein nas tine umar pokoso geru me ein to keipio tosnogo tamatang uakuakeluk toro niein uleik ra kilain, Leke Liu ro Mat?’ <sup>12</sup>Doh inggon e turung ualasira tamiraoum tar uleikir tine um gere mok i ran, doha mamang inetelik e mokong sioun ter buturuono mura la kaleuatoroin raoum.”

<sup>13</sup>Kaura hiliu rasin, kaura la tupara tar mamang inetelik misiana sirampene ke hire pe Iesu tasrasin. Temaeit rasina kura kaleuatoro toro niein gera kilain, Leke Liu ro Mat.

<sup>14</sup>Tar binakene ke kotpokoso manasar binakang ein, Iesu mesno aposoul ka tabila tokoha toro teboul. <sup>15</sup>Kare kulanguaono tasisina pare, “Inggo u malarantiehe tun tar ein keip tamioum tar mareining Leke Liu ro Mat, song i muduhia inggo u turung kale uelmahing. <sup>16</sup>Temaeit inggo u hire tamioum pare, inggo ahik baka poluk pahu turung ein toro niein roon e tuka gete mana bakar puhono tena Nitoia God.”

<sup>17</sup>I muduhia ke kale peono tar kap bino, kare kulang uauia tang God, kare kula pare, “Mu kale tanene, karung uelpakah tatamiu. <sup>18</sup>Ge inggo pe u hire tamioum pare, inggo ahik baka poluk pahu turung inum tar kukuananar bino e tuka gete laha na Nitoia God.”

<sup>19</sup>Song ke kaleono toro bereit, kare kulang uauia tang God, song ke pis polaka tang roon, kare kula pare, “Gine ter tukunuguo ger niheir uatuha tamioum, mu guata pare, tar namana huara totoguo.” <sup>20</sup>I muduhia ka ein uakapa baka pesin, inggono ke guata tar siokono komper niguat, inggono ke kale tar kap, kare kula pare, “A kap binoene ter timuhur niuelhote tar deuatingiguo geru uatading uatuhaig tamioum.”

<sup>21</sup><sup>p</sup>“Bo a tamata gere turung heir totoguo tasir uelmatan, inggono gine re tabilala tagu tagigeig. <sup>22</sup>Ge a Tunar Tamata pe e turung mata sira hape ke umatoto pe God tatanon, bo kuanalik tunur tamatane re turung tangana tatanono tasir uelmatan.” <sup>23</sup>Kara uakekenasina tar ueluel dangata katongois pare, “Maiane tagigeig re banot e guata pare.”

---

<sup>p</sup> 22.21 Ker 41.9; Jon 13.21-22

### Mai ger i rana uain?

<sup>24</sup> Doh gisina ka uakekene tar ueluelperere katongois pare, te mai tun ra turung bang parokoin pare, ter tohangana uleik.

<sup>25</sup> Jesu ke kula tasisina pare, “Nasio toiar gime tamatasine ge ahik paho Ju ra kaukeke tosnosio tamat, kara petutupe tasisina mara uakelukis. Doh gisisir toiasis ra kaukeke tosnosio tamata ra kila katongois pare, ‘O tamang poul tosnosio tamat.’ <sup>26</sup> “Bo inggoum puk ahik pah mu pe sira tasisinasitir tohangas, ge a tamata pe ger tohangana uleik pake pe sira tar tamatane ge ahik me hangan. Doha tamata uleik pake pe sira tar tamatener nipoho uadouh. Doha tamata uleik pake pe sira tar tamatang kalekinale. <sup>27</sup> “Ge a tamata pe ger to hanagana uleik ra uoto heir toig na niein toro teboul, bo gane, inggo tenami tamatang kalekinaleoum. <sup>28</sup> Inggoumene tekung tur uanono tagu totoguo tar binaka ke kotpokosor niduh geke uedanga totoguo. <sup>29-30</sup> “Te misiana kompe ke heir pe tamouguo totoguo tar nitoia, maeit inggo u uauiangua pono tamiuoum tar kale tar Nitoiaon, karung la ein, karung la inum to tonogo teboulio tenag Nitoia, doh mu turung tabila toro tabtabilang toia, karung kedanga tasir siokor hangaul, doho torik ro matinang Israel.”

<sup>31</sup> Kare kula Jesu pare, “Saimon! Saimon! Satan ke dangata tar uedanga totomua misiana geta koun uaguluhigir raes-uit, kara kale liuigir mongmong. <sup>32</sup> “Bo inggo puk ku lotu ueleheir totomua mara hik reng nitagorong mana pahe pung. Doh tar binaka ro uapalihia tenang niguat, karo tapokisime totoguo, ingga o me uatampopokoho toso bung tahim.”

<sup>33</sup> Kare mene hahaua Pita pare, “Tamata Noman! Inggou ku uiliauh tar la tagu totomua tar umang uih, karu la mat.”

<sup>34</sup> Bo Jesu puk ke mene hahaua pare, “Inggou gine ru hire totomua Pita, tar binaka halanar paolo ta kororo daan, ingga o turung uolih uatouono pare, o tele totoguo.”

<sup>35</sup> “Kare dangatangua Jesu tasisin, “Tar binaka ku ualatuero tamiuoum, inggoum ahik pah mu kale teil me dukung mani, doh me tolaha ue me giameher su, inggoum kung katupa baka me inete.”

Kara mene hahauasin “Ahik uadeil!”

<sup>36</sup> Kare kulono tasisina pare, “Bo gine puk daan gete menami dukung manioum ue me tolaha pon, ra kale taguig, doh geta hikioum menami baenat, uabulaua tenami hikhiku mara bulauain mo baenat. <sup>37</sup> “Ge a nibolo peonene tono uelhire God pare, ‘Temaene inggono ra uataguin tasir tamata uasa.’ Doh inggo u hire tamiuoum inggon e turung

<sup>24</sup> 22.24 Luk 9.46    <sup>25</sup> 22.25 Mat 20.25-27; Mak 10.42-45    <sup>26</sup> 22.26 Mat 23.11; Mak 9.35

<sup>27</sup> 22.27 Jon 13.12-15    <sup>28</sup> 22.30 Mat 19.28    <sup>29</sup> 22.32 Jon 17.15    <sup>30</sup> 22.35 Luk 9.3; 10.4

<sup>31</sup> 22.37 Ais 53.12

kotpokoso totoguo. Aa! A huar nibolo uatuha totoguo gine manasa ke uahuhutin tar kotpokoso pare, o man.”

<sup>38</sup>O tamatang uakuakeluk ka kula pare, “Bang, Ir Tamata Noman! O torik ro baenat rasine.”

Kare mene hahaua Iesu, “Rasin ura matoto manas.”

### Iesu ke la lotu to tar Siusanang Oliv

<sup>39</sup>Iesu ke la sira poluk re uoto lang sioun pe tar Siusanang Oliv, doh no tamatang uakuakelukono ka uakeluk tatanon. <sup>40</sup>Tar binaka ka la pokosoin, inggono ke kula tasisina pare, “Mu lotu mara hikioum pah mu punga me niuedang.”

<sup>41</sup>Kare la uairehe sikoronguaono tar butureit ra uangoulusin, song ke la hatup uahiu, kare lotu pare, <sup>42</sup>“Tamoug geto malara ingga, kale liu tar niduhene totoguo. Bo ahik pukia paho uakeluk tereg nimalaro, o uakelukumpe tereng nimalar.” <sup>43</sup>Doha anggeloung Heuene ke pokoso uakalaharain tatanon, kare me uatampopokoho tatanon. <sup>44</sup>Doh inggono ke hagouo uasa tar niduh, kare lotu uatampopokoho kompela, doha tumaranganono ke sosoro uahiu, ke pe sira tar deuating re simsim uahiua peko tar kot.

<sup>45</sup>Tar binaka ke lotu uakapa peon, kare tentur kai, kare la tapokis tasir tamatang uakuakeluk, inggono ke la tupara tasisina ra hohou, ke tung pousisir niueldolom. <sup>46</sup>Kare dangatono tasisina pare, “Ae maeit rung hohououm? Mu tentur, karung lotu mara hikioum pah mu turung punga me niuedang.”

### O tamata ka la kusa tang Iesu

<sup>47</sup>Tar binaka re mene haraha Iesu tosno tamatang uakuakeluk, kara me pokosohar manai. Doha tamata gera kilain tang Judas ter tang sioko tasisinar hangaul, doha tang torik, inggono tere uoum keip teil tasisin. Inggono ke la taro tang Iesu, kare la nguh tatanon. <sup>48</sup>Bo Iesu puk ke dangata tatanono pare, “Ae maeit ro nguha totoguo, karo heir tar Tunar Tamat tasir uelmatan.”

<sup>49</sup>Tar binaka manasene ka la bang paroko pe no tamatang uakuakeluk Iesu tar puh uasa re marang pokoso pe, kara kula pare, “Ir Tamata Noman, e banotono geting uiliatung keipieim tenami baenat.” <sup>50</sup>Doha tang sioko tasisina ke sebel kout tar talinganener pang mua tena tamatang kalekinaler patere uleik.

<sup>51</sup>Bo Iesu puk ke mene hahaua pare, “Mu uakenua! Ke banoto manasar uiliatung.” Kare tuhala Iesu tar talinganeit, kare uauia tatanon. <sup>52</sup>Song ke kula Iesu tasir patere uleik, doh noso tamata uleikir tamatang tur kaueke tar umang lotu ger dedeil, karo mamahoholikisine ka la uelhirime tatanono pare, “Mu namanoum pare, u uoum keip teilio mo

tamata uasa, maeit kung la keipime tar baenat, doha pus? <sup>53</sup>A mamang binakalik inggo u uoto uangoul tagu tamiuoum tar buturung uelpokos iuma tar uamang lotu ger dedeil, doh inggoum ahik pah kung marang kusa totoguo. Bo gine daana puk na nitampopokohor kitup e uoum keip tamiuoum tar guata uasa.”

### **Pita ke uolih e tele tang Iesu**

<sup>54</sup>Kara kusenguasina tang Iesu, kara keipilain iuma tena umar pater ge nas uleikir pater. Doh Pita e uakuakeluk teil sikoro kompe tasisin, bo ahik puk pahe la uahuhut. <sup>55</sup>Tar binaka ka me pokososin, o tamata ka uout toro hueng mahirum i uantinanina tar buturung uelpokos, kara siokor tabila uiloho tokah, doh Pita ke tabila tagu tasisin. <sup>56</sup>Kare bangangualar kuahang kalekinale tang Pita re balbala pein ro hue. Inggono ke bangaehe uaia tun tatanon, kare kula pare, “A tamata dehene e uoto uangoul tagu tang Iesu.”

<sup>57</sup>Bo inggono puk ke uolih pare, “Ir kuah, inggo dehu tele tun tatanon.”

<sup>58</sup>I muduhia tar sisikinalikir binak, a tang giameher tamata ke banga tupara poluk tatanon, kare kula pare, “Ingga pono ter tang sioko tasisin.” Doh Pita ke uolih poluk, “Inggo ahik paha tang sioko tasisinasit.”

<sup>59</sup>Gine ke karuh sikor baka per puhung barah, a tang giameher tamata ke mene uatampopokoho polukume pare, “O manampe a tamatonene te me Iesu ge a peng Galili peon.”

<sup>60</sup>Pita ke mene hahaua pare, “Inggo u tele tun tar hauaeit ro mene uatuhai.” Git re menmene haraha pe Pita, kare kororor paol. <sup>61</sup>Doha Tamata Nomana ke uagegela tang Pita. Song ke namana huara Pita tonu uelhire Iesu geke mene uakikilangain tatanono pare, “Tar binaka halanar paolo ta kororo daan, ingga o turung uolih uatouono pare, o tele totoguo.” <sup>62</sup>Song ke tauetela Pita i kalahar, kare la kirkiring ualeikintiehe tunungua.

### **Iesu ke tur i uoum tosnosio mamahoholilikir tamat**

<sup>63</sup>O tamatasine ra tur kaueke tang Iesu ra uauanet, kara halhaluh tatanon. <sup>64</sup>Gisina ka rokoso tane tar matanon, kara haluh dedempe, kara hire tatanono pare, “Hire sira tar propet, maiene ke haluh totomua.”

<sup>65</sup>Doh gisina ka menmene tar bureher meneng uelsigala tatanon.

<sup>66</sup>Tar binaka ke harahar pisar, nosio mamahoholilikir Ju ka la toto mesir patere uleik, kare tesir tamatang ualasira tar ualatut, gisina ka la keipiha tang Iesu tar kaunsil. <sup>67</sup>Kara dangata tatanono pare, “Ge pare Kristo nomana, ingga o hire tamiueim.” Kare mene hahauangua Iesu, “Getu hireo tamiuoum, inggoum ahik pah mu tagorong mana totoguo. <sup>68</sup>Doh

† 22.54 Mak 14.53-54    † 22.67 Jon 3.12

getu dangato tamiuoum, inggoum ahik pah mu mene hahau. <sup>69</sup>“Bo gine puk daan, a Tunar Tamat e turung tabila tar pang makoso tang God ger uleikintiehe na nitampopokoh.”

<sup>70</sup>Kara siokor dangatasina pare, “Ingga song ter tuna God nomanampe.”

Kare mene hahauono pare, “Inggoum kung mene hung nomana te inggo nomanampe.”

<sup>71</sup>Kara kulanguasina pare, “Ae maene ri malareig me tang giameher tamata re me mene baka poluk? Ge inggeig pe ki siokor longoro tur manasa tatanono ke mene katongo pe.”

### Iesu ka keipilain tang Pailat

**23** <sup>1</sup>Song ka siokor tenturusin, kara keipila tang Iesu tang Pailat. <sup>2</sup>Kara la uakekena tar tohotola tatanono pare, “Inggeim king tupara tar tamatane ke guata tasir tamata mara hik pah ra uakeluk tar ualatutung tar pang uan. Inggon e kula pare, a sa tar bulaua tola tar takis tang Sisar, kare kula pono pare, Inggono te Kristo ger toia.”

<sup>3</sup>Temaeit ke dangata Pailat tang Iesu pare, “Ingga nas toia nomanar Ju.” Doh Iesu ke mene hahaua pare, “Te paare nomanampeit ro kula pe ingga.”

<sup>4</sup>Song ke uahirela Pailat tasir patere uleik mesir tamata pare, “Inggo ahik matu tupara me tengkana maru kula pare, inggono ke katego tar ualatutung Roum.”

<sup>5</sup>Bo o tamata uleik puk ka mene uapopokoho pare, “Inggono ke uakotpokoso tar bureher niduh re mene ualasira peane i Judia. Inggono ke uakekena turume i Galili, kare la uakapameane i Jerusalem.”

### Iesu ke tur i uoum tang Herot

<sup>6</sup>Tar binaka ke longoro Pailat tar puhonene, kare dangata tasisina tang Iesu ge para peng Galili. <sup>7</sup><sup>b</sup>Tar binaka ke ate inggono pare, Iesu e uangoul tar buturuoneit re kauke teilin Herot, kare kula tasisina ra keipiono tang Herot, ge inggono pe e uangoul pono tar binakon i Jerusalem.

<sup>8</sup>Tar binaka ke banga Herot tang Iesu inggono ke uahantieh, teeit inggono ke puhung barahin tar marang banga tatanon. Teene inggono ke longlongoro kout tar haua ke guatguatagion, dohe malahir pake banga me nitouo gere uatouoion. <sup>9</sup>Maeit ke dangatono tang Iesu tar bureher nidangat, bo Iesu puk ahik mata mene tapokis tatanon. <sup>10</sup>Nosio tamata uleikir pater, doho tamatang ualasira tar ualatut ra tur pon, kara mene uatampopokoho tar uasuasa, kara tohotola tang Iesu. <sup>11</sup>Song ke guata uamatala tun Herot mesno tamatang uiliatung ka uelsigala pe,

<sup>a</sup> 22.69 Apo 7.56    <sup>b</sup> 23.7 Luk 3.1

kara uauanete tang Iesu. Gisina ka uamokola tatanono toro hikhikung toia gero mataia. Song ka ueliu tapokisilain Iesu tang Pailat. <sup>12</sup>Ter mareninguaoneit kura me matakaluana tapokis Herot me Pailat, ge sioun pe, rasin a toking uelmatan.

### Iesu ka uiliatung pousin

<sup>13</sup>Pailat ke kila toto tasir patere uleik mesnosio mamahoholikir Ju, doho manai tamata pon, <sup>14</sup>inggono ke kula tasisina pare, “Inggoum kung keipime tar tang siokor tamatane totoguo, karung kula pare, ke uoum keip uasaono teres ninamanar tamata mara ueluelde tar gavamanang Roum. Inngo ku heheke tatanono tar binaka rung pepeoumane, doh inggo ahik matu tupara me inete me to tengkana re ualasira pare, inggono ke guata uasa tar hauanit kung tula tolasioum tatanono pare, ke guat. <sup>15</sup>A siokono pono tang Herot, ahik mata kula pare, ke guata uasaon, temaeit ke ueliu tapokisahaono tatanono tagigeig. Inggon ahik mata guata me inete mare banotono ra uiliatung pousin. <sup>16-17</sup>Temaeitie, inggo u turung ualatoho pare, ra kalkalopis pukion, song ra uamaluana in e la.”

<sup>18</sup>Kara siokor kula ualeikisina pare, “Kale liu tar tamatane, kara uiliatung pousin. Umaluana tang Barabas e laha tamiueim.” <sup>19</sup>(Barabas ka uamokoin iuma tar umang uih, ge inggono pe ke uatentur tar nimaliana tar gavamanang Roumene i Jerusalem, doh teeit ke uiliatung pous peono tar tamat.) <sup>20</sup>Pailat e marang uamaluana tang Iesu ra uatauetein, temaeit ke hire polukiono tasir tamata pare, inggon ahik mata guata uasa. <sup>21</sup>Bo gisis puk ra kula ualeik pukumpela pare, “Tine uakusa tatanono tar korose, tine uakusa tatanono tar korose!”

<sup>22</sup>Tar uatouonono manasar binakene ke dangatantiehe Pailat tasisin. “Aeon! Haua tun ke guata uasainir tamatane? Inngo deh ahik matu tupara me inete ke guata uasaiono mara uiliatung pousuion. Temaeit, inggo u turung kalkalopis puk tatanon, karu uamaluana tatanon e la.”

<sup>23</sup>Bo gisis puk ra kulkula ualeik, kara dangata uapopokoho tang Pailat tar tina uakusa tang Iesu tar korose. Doh nas nikula ualeikisina ke la uapalih tena ninamana Pailat. <sup>24</sup>Temaeit inggono ke guata uakeluk sira manasa tar haua ka kulainisin. <sup>25</sup>Inggono ke uatauete tar tamata ger niualekala iuma tar umang uih, teeit inggono pe ke uatentur tar nimaliana tar gavamanang Roumene i Jerusalem, kare uiliatung pous pono tar tamat. Inggono teka malarainisin, bo Iesu puk teke uauiaiono ra guata sirain hape ra malara pesin.

### O tamatang uiliatung ka tine tang Iesu tar korose

<sup>26</sup>Gisitir tamatang uiliatung ka uoum keip tang Iesu, kara la. Kara kusa kout tar tamata ra kilain tang Saimon ger peng Sairini. Inggon e lang

laha i Jerusalem e la tur tar pang giamehenar pang uan, doho tamatang uiliatung ka uahuata tatanono tar korose ke huatahia i muduhia tang Iesu. <sup>27</sup>O burehentiehe tunur tamatasine ra uakeluk teil tang Iesu menia pono tasir kuahasit ra ueldolom, kara kiring tatanon. <sup>28</sup>Doh Iesu ke uagegela tasisin, kare kula pare, “Ir kuahang Jerusalem ahik pah mu kiring totoguo, bo mu kiring katongosioum, ter hauon a inete uasa e turung kotpokoso tamiuoum, doho bung tumiu. <sup>29</sup>Ge a binaka pe e turung lame, doh inggoum mu turung kula pare, ‘O kuahasiner bouh, kare gisine ahik pah ka poh, kare gisine ahik pah ka uahuh mo keketik, gisina ra turung uah.’ <sup>30</sup>‘Song ra turung kulanguasina toro siusana pare, ‘Tadura uahiuahane tamiueim!’ Kara kula pono toro ponponina pare, ‘E me kokop tane tamiueim.’ <sup>31</sup>Geta guatar tamata tar inetenine tar binaka ro tua ro douk, a hauangua re turung pokoso tar binaka ro mata roon.”

<sup>32</sup>A tang torikir gime tamat, rasina kura guata tar niguata uasa, ka keip tauete taguis tang Iesu mara la tung pous ponois. <sup>33</sup>Tar binaka manasa ka lamesina tar butur gera kilain pare, “O Lakok,” teka la tine toin Iesu tar korose, kara uakusa kaiaian, kare ter toking tamata uasa pon. A tang sioko ke kusehia tena korose tar pang mua tang Iesu, doha tang giamehe ke kusehia tena korose tar pang kais.

<sup>34</sup>Doh Iesu ke kula pare, “Tamoug! Kusa luara liu tar niguata uasar nosisin, ge gisina pe ra tele tar haua ra guatain.”

Kara uelpakahanguasina tena hikhikuon, kara ueluelpeikier soldia tar baka uadud mara banga tang mai re turung kale tar mahmahar gomomonitir kahakah.

<sup>35</sup>O tamata ra tur, kara uakeis, doh nosio tamata uleikir Ju ka uauanete tatanon. Kara kula pare, “Inggono ke uaudeil tasir gisiamah, auia e la uaudeil katongoion ge pare te inggonompe na Kristo God ger tang siok a nikedang.” <sup>36</sup>O tamatang uiliatung ka me uauanete poluk ponoha tang Iesu. Gisina ka heir tatanono tar bino ueltek. <sup>37</sup>Kara kula pare, “Ge pare nas toia nomanar Ju totomua. O uaudeil katongoia.”

<sup>38</sup>Gane i ranahia tar korose o nitine uakusa ro uahire o nibolo pare, “Gine Tenas Toiar Ju.”

<sup>39</sup>A tang siokor tamata uasa geke kusa ponane ke uelsigala tang Iesu pare, “Ge para Kristo nomana? Ingg pako uaudeil katongoia, kare raeim pon.”

<sup>40</sup>Bo git pukur tang giameher tamata uasa ke louara tatanon, kare kula pare. “Ingg ahik paho sokoro tang God? Ingg o turung mata sira pono tatanon. <sup>41</sup>Inggon auiampe tagiraeig geti ra mat, teeit teregira niguata uasa, bor tamatane, ahik mata guata tagu me inete me sa.” <sup>42</sup>Song ke kula pare, “Iesu namana huara totoguo geto la kotpokoso tenang Nitoia.”

° 23.29 Luk 21.23    d 23.30 Hos 10.8; UGO 6.16    ° 23.34 Ker 22.18; Ais 53.12

† 23.35 Ker 22.7-8    § 23.36 Ker 69.21

<sup>43</sup>Doh Iesu ke mene hahaua tatanon, “O mana tun inggo gine ru hire totomua, daan ingga o turung uangoul tagu totogou i Paradiso.”

#### Iesu ke mat

<sup>44</sup>Tar binakoneit na marein uleik, a kitup ke me kokop tane uakapa tun tar pang uan ke la tuka nar moloi. <sup>45</sup><sup>h</sup>A pisar ahik mata bal. Doho mahar gomono uleik ro nanar umang lotu ger dedeil ko takih polaka pan torik. <sup>46</sup>Doh Iesu ke kaling ualeik pare,

“Tamoug, inggo u heir tar iabeig totomua.”

*Ker 31.5*

Gitie ke kula baka peono pare, kare mat.

<sup>47</sup>Doh nas tamatang uoum keipir tamatang uiliatung ke banga tar hauene ke kotpokos, kare uatakai tang God, kare kula pare, “O mana tun gine ter tamatar kodkodoh.” <sup>48</sup>Tar binaka ka me siokor uelpokosor manai tamata ra lang banga pe tar mamang inetelikinine ke kotpokos, gisina ka nun tar uaruarous tar ualasira teres niueldolom, kara hiliu. <sup>49</sup>Doh gisine uakapar uanotono Iesu mesir kuahasit ka uakeluk turume tatanon i Galili, gisina ra uakeis turume i rehe sikoro tar inetenina ke kotpokoso pe.

#### Iesu ka keuin

<sup>50-51</sup>Tar binakon a tamat a hangana tang Josep a peng Arimatea tar pang uan i Judia, inggon a tamata uaia tun, kara kodkodoho pon, kare uanguangoul tena Nitoia God. Inggon e uangoul teil tagu pono tar kaunsil, bo ahik puk mata uauia teres ninamanasit tar tung pous tang Iesu. <sup>52</sup>Inggono ke la tang Pailat, kare la dangata tar kale tar tukununa Iesu. <sup>53</sup>Maeit inggono ke kale uahiu tur tar tukununa Iesu tar korose, kare la auih uiloho tar gomono gaugauil, song ka uamokolain i lolono toro lebangang mat gero nikoho tar butur palaua hohot, ahik me tang siokor tamata ka keu taguin tang roon. <sup>54</sup>Gine daan, a binakang kaleuatoro tar ineteng tar Mareining Pepe Uaha ke uahuhutung kapa manas, ge a Mareining Pepe Uaha pe ke uahuhut manasain tar uakeken.

<sup>55</sup>O gisiameher kuahasis geka haijala uakeluk turume i Galili tang Iesu tera uangoul pon. Gisina ka uakeluk tang Josep, doh tar binaka manasa ka la pokosolasina toro lebang, gisina ka banga hape ka uarikin uahiu per buloutusis tar tukununa Iesu. <sup>56</sup><sup>i</sup>Song ka la tapokis i Jerusalem, kara la kaleuatoro tar kukuananar busil, doha uaiuainitir muhuia mara la turung tunaha tar tukununa Iesu. Bo gisina puk ka uangoul uaha tar Mareining Pepe Uaha tar uakeluk tar ualatut.

<sup>h</sup> 23.45 Hib 6.19-20; 10.19-20    <sup>i</sup> 23.56 KT 20.10; Ual 5.14



### Iesu ke tua tapokis

**24** <sup>1</sup>Naliliuolik tun tar uakikilangar marein tar uikion, o kuaha ka kale tar inete geka kaleuatoroig, ginitir amiamuh, kara la toro lebangang mat. <sup>2</sup>Gisina ka bang huara toro palaua ka uatagegele liu pein toro lebangang mat. <sup>3</sup>Gine ka leka pekosin ahik mata la tupara tar tukununa Iesu ger Tamata Noman.

<sup>4</sup>Tar binaka ra namnamanaehe turusin, kaura kotpokoso ualutarar toking tamat, kaura me tur uahuhut tasisin. Ura hiku teil tenasira gomnonitir balobal. <sup>5</sup>Doho kuaha ka sokor, kara uasuge uahiua tar pores tar kot. Kaura kular toking tamata tasisina pare, “Ae maeit rung lang siroum tar tamata ger tuaane tenas buturur mat? <sup>6</sup>Inggon ahik baka poluk pah kaeinane. Inggono ke tua tapokis! Namana huara tar haua ke hireiono tamiuoum tar binaka re uangoul tagu haraha tamiuoum i Galili. <sup>7</sup>Inggono ke kula pare, ‘A Tunar Tamata ra turung ueliuilain tasir tamata uasa, ra turung tine uakusein tar korose, doh tar uatouononor marein inggon e turung tua tapokis.’ ”

<sup>8</sup>Doh gisitir kuah song ka namana huara tena uelhireon. <sup>9</sup>Tar binakeit ka la tapokis turumesina toro lebangang mat, gisina ka la hire tar mamang inetelikininanine tasir siokor hangaul, doha tang siok, kare tasir gisiameh. <sup>10</sup>Gisinasiner kuaha tes Maria Makdala, Joana, doh Maria ge tinana Jems, doho gisiamehemper kuah. Gisina teka la hire tasir aposoul. <sup>11</sup>Bo gisina puk ahik mata tagorong mana tasir kuah, teeit gisina ra longoro sira tasisina ra meneng popouluan. <sup>12</sup>Bo Pita puk ke tur kai, kare ualualola toro lebangang mat, kare la uakatela ium, kare banga tar gomono ger niauih uiloho tar tukununa Iesu. A gomnonin e mokong pahene puk. Song ke hiliu Pita, kare namnamanaehe teil tar haua ke kotpokos.

### A tang torikir tamata kura ueltupara tang Iesu

<sup>13</sup>Tar siokono komper mareinon, a tang torikir tamat ura lang la tar uan ra kilain i Emaus. Doha uanon e uairehe sira tar siokor hangaul, doha siokor kilomita ra la tur pemein i Jerusalem. <sup>14</sup>Doh rasin ura ueluelmene teil tar mamang inetelikinit ke kotpokos. <sup>15</sup>Gine ura menmene teil pe rasin, kaura ueluatata tar puhonene, kare pokoso ualutara Iesu, kare me la tagu tasrasin. <sup>16</sup>Bo God puk ke uaouo tara matas rasina mara hik pah ura bang paroko tatanon.

<sup>17</sup>Maeit inggono ke dangata tasrasina pare, “A hau ura uelueluatata teilis raoum gine ura la pela.”

Rasit kura tur uanonongua, doha pores rasina ke ualasira tun tar niueldolom. <sup>18</sup>A tang sioko tasrasin, a hangana tang Kliopas, ke

<sup>j</sup> 24.6 Luk 9.22

dangatala tatanono pare, “Ingga ko nihing pokosane i Jerusalem, maene ro tele tar inetenine ke kotpokoso to tar uan tar binakene.”

<sup>19</sup>Kare dangata Iesu pare, “A inete hauanin.”

Kaura mene hahaua rasina pare, “Bo tar inete ke kotpokoso tang Iesu ger peng Nasaret. Inggon a propet, kara i ranantiehe na nitampopokoho re mene keip pe, kare guata to i uoum tasir tamat, doh tang God, inggono ra uelbang paroko tunin. <sup>20</sup>Doho patere uleik mesnogie tamata uleikeig ka ueliuila tatanono mare mat. Doh gisina ka tine uakusa tatanono tar korose. <sup>21</sup><sup>k</sup>Bo inggeim king tagorong mana teil tun pare, inggono ter tang sioko gere turung bulaua tapokis tasir Israel. Doh me haua pono re uasuasantiehe tagigeig. Inggon a uatouononor marein manasa daan, ke uakekena pemer inetenin. <sup>22</sup>Bo o gisiamehe pukur kuahasine tamiueim ka me ualutara keip tamiueim tenas ueluatat. Gisina ka haiala toro lebangang mat naliliuolik tun, <sup>23</sup>bo ahik puk mata ueltupara tar tukununa Iesu. Gisina ka la tapokisiha, kara me hire tamiueim pare, gisina ka banga tar toking anggelou, doh rasina kura kula pare, Iesu inggono ke tua. <sup>24</sup><sup>l</sup>Song ka la ponomer gisiameher uanotoumieim toro lebangang mat, kara la tupara sira kompeet ka hire per kuah, bo gisina puk halana ta banga tatanon.”

<sup>25</sup>Kare kula Iesu tasrasina pare, “Inggoum deho tuktukara harahampe, inggoum halanampe tung tagorong mana tar inete geke bolo uahiuagir propet ka mene tauete pe pare, <sup>26</sup><sup>m</sup>Inggonene Kristo, e turung huata tar burehentieher uelmahing, song re turung lekala tena uiniator.” <sup>27</sup><sup>n</sup>Doh inggono ke mene ualasira tasrasina e uakekena tur pe tang Moses, doho propet uakap, kare mene uakalahara pono hape re kula peninar uelhire ger nang God gere uelhire uatuha katongo tatanon.

<sup>28</sup>Git ra la uahuhut pesina tar uaneit ra lang lain, Iesu ke guata sira pare, e lang uoum liu tasrasin. <sup>29</sup>Bo kura menmene tane hamas puk rasina tatanon, kaura kula pare, “Uangoul tagu tamiraeim gere lang hu manasa per pisar, kare kitup manason.” Song ke la leka tagumpela Iesu tar uangoul tagu tasrasin.

<sup>30</sup>Tar binakeit ke tabila tagu Iesu tasrasina toro teboul, kare kale toro bereit, kare heir tar uauia tang God, kare pis polaka tang roon, kare uakekena tar heir tasrasin. <sup>31</sup>Song ke kalahara ramatas rasin, kaura bang paroko tatanon, bo inggono puk ke tabo ualutarain tasrasin.

<sup>32</sup>Kaura ueluelmeneis rasina pare, “Inggono ke uatentur tara balagiraeig tar binaka ke memene toanaha tar lel, kare uakalahara tagiraeig tono uelhire God.” <sup>33</sup>Kura tentur kai kompe rasin, kaura la tapokis manas i Jerusalem. Te kura la ueltupara to rasina tasir aposoulusiner siokor

<sup>k</sup> 24.21 Luk 19.11; Apo 1.6 <sup>l</sup> 24.24 Jon 20.3-10 <sup>m</sup> 24.26 Luk 9.22 <sup>n</sup> 24.27 Ker 22.1-21; Ais 53

hangaul, doha tang siok, karo gisiamehesine ra uangoul tagu tasisina ra siokor pepe tokah <sup>34</sup>°kara kulkula tasrasina pare, “O mana tun! A Tamata Noman ke tua tapokis, kare kotpokoso to tang Saimon.”

<sup>35</sup> Song kura hire rasina tar haua ke kotpokoso to tasrasina tar lel, doh hape pono kura bang paroko pe rasina tang Iesu tar binaka ke pis toro bereit.

### Iesu ke kotpokoso toсно tamatang uakuakeluk

<sup>36</sup> Tar binakene ra ueluelmene peisisin, Iesu ke me tur i uantinana tasisin, kare kula pare, “O hiarou o moko tamiuoum.” <sup>37</sup>°Doh gisina ka siokor kasian, kara sokor, ka namana sira pare, ka bang huara me iabener tamat, <sup>38</sup> kare kula Iesu tasisina pare, “Ae maeit kung kasianoum, karung tortorik ninaman? <sup>39</sup> Ge Inngo puk peonene, bangame tar toking limouguo, doha toking kekeiguo. Tuha totoquo, doh mu bang. A iaben ahik tagu me tukunun, doh me hirona sira ngohina rung banga peoum totoquo.”

<sup>40</sup> Tar binaka ke kula uakapa peono pare, kare ualasingua tasisina tar toking liman, doha toking keken. <sup>41</sup> Gisina ka uahantiehe tun, kara lutara ke tua tapokis pe Iesu, bo halana haraha puk ta tagorong man ge paro mana tun roon. Kare dangatono tasisina pare, “Kaeig me ineteng einane tamiuoum.” <sup>42</sup> Kara heirisina tatanono toro mahar ian o moh, <sup>43</sup> kare kaleono tang roon, kare ein toane ra uangoul pesin.

<sup>44</sup> Inggono ke kula tasisina pare, “Gine ter haua ku hireio tamiuoum tar binaka ru pepe tagu haraha tamiuoum. A mamang inetelik ra me uakotpokosoig a man, teaninanitir nibolo uatuha totoquo tena ualatur Moses, doho propet, kare toro bukung kereker.” <sup>45</sup> Song ke uatakapuk Iesu teres ninamanasina mara banotosina tar naman manate tonu uelhire God. <sup>46</sup> Inggono ke hire tasisina pare, “Gine te hape ka hire pelaion. Kristo e turung kale uelmahing, kare turung tua tapokis tur toro mat tar uatouononor marein. <sup>47</sup> A hanganono ra turung uelhire tauetein toro mamang pang uan uakapa tun, e uakekena tur i Jerusalem tasir tamata tar uapalih mara kusa luarraig nas niguata uasa. <sup>48</sup> Inggoum kung siokor banga tar ineteninane.”

<sup>49</sup> <sup>49</sup> Inngo u turung heiruha tamiuoum tar haua ke ualagahain Tamoug. Doh inggoum mu uangoul kompeane tar uan uleik e tuka tar binaka rung kaleoum tena nitampopokoho God gere la tur i Heuen.”

### Iesu ka kale tapokis taroin i Heuen

<sup>50</sup> Tar binaka ke uoum keipila Iesu tasisina toro mok i Betani, inggono ke hue kai tar toking liman, kare mene uaia tasisin. <sup>51</sup> Tar binakeit re

---

° 24.34 1Ko 15.4-5    ° 24.37 Mat 14.26    ° 24.44 Luk 9.22    ° 24.48 Jon 15.27; Apo 1.8  
 ° 24.49 Jon 14.16; 15.26; Apo 1.4

menmene uaiaono tasisin, kare hiliuon, kare kale kaingua God tatanon i Heuen. <sup>52</sup>No tamatang uakuakelukono ka uatakai i rana tatanon, kara la tapokis keip tar niuaha uleik i Jerusalem. <sup>53</sup>Doh gisinasine ra uangoul ualataono tar umang lotu ger dedeil tar uatakai tang God.

# Jon

## O uelhire uaia ke boloin Jon

### O bolobolo tang Jon

Jon inggono te kaluana tun Iesu kare uahuhutuntiehe tun. Toro touono ro krismas Jon ke uangoul tagu tang Iesu. Doh Jon ke banga tena niguata Iesu. Doh ke tagorong manangua tang Iesu a God (Jon 1.1-18). Inggono ke bolo toro Uelhire Uaia mara turung tagorong mana ponor gisiamer tamat (Jon 20.31).

Jon ke banga tar bureher inete uaia uelhirinitier uiantiehe tun ke guataig Iesu (Jon 21.25). Iesu ke guata uaia tasir tamata gesir moumouh (Jon 4.43-54). Iesu ke lala i rana tar laur (Jon 6.14-24). Inggono ke heir tar niein tasir tamat ke siauais tar tolimir taosein (Jon 6.15). Doh Iesu ke me tua tapokos poluk git ke mate baka pe (Jon 20). Jon e mene uakalahara sira tar inetenine ke kotpokoso te misiana sira kompe tar giniamer bukunine toro Uelhir Uaia.

Bo ra mahar inete uleik tun i lolono tono bolobolo Jon ahik paho menmene tun tagu tar niguata uaia.

A bureher mahar e menmene kalehe puk tena menmene Iesu. Ngohina sira pare, (Jon 13-17) a nibolo uahiuala na bounginahia, kare la matenguaon. Jon ke namana tena menmene Iesu pare, auia tun (Jon 3.34). Doh inggeig paki uauia tena menmene Iesu. Geti tagorong mana inggeig tena menmenon, song ri turung uangoul tagueig tang God i Heuen tar mamang binakalik. Bo gete haikieig pahi uakeluk tang Iesu, God e turung heir me uabang manate tagigieg (Jon 3.36).

Iesus ke mate mari la uangoul tagueig tang God i Heuen (Jon 3.16). Temeait inggeig paki siokor hire tauete liu tenagi niguata uasa tang God. Doh temeait inggeig paki kilame tang Iesu i lolono tenagi niuangoul. Song ri turung pokosieig o butuna God (Jon 1.12).

---

### O Uelhire gero tua

**1** <sup>1</sup>Tar uakikilanganar binak o moko ro Uelhire, doh roono ro Uelhire o moko tang God, doh roono ro Uelhire te God. <sup>2</sup>Doh

---

<sup>a</sup> 1.1 Jon 17.5; 1Jo 1.1-2; UGO 19.13

tar uakikilanganar binak, roon o uangoul tagu tang God. <sup>3</sup><sup>b</sup>Roono ko uakotpokoso tar mamang inetelik, ge pakene taboin roon, a mamang inetelikinine ahik pahe matot e kotpokos. <sup>4</sup><sup>c</sup>I lolono tatanon e mokor nitua, doh inggonor nitua e luh uakubara tasir tamata uakap. <sup>5</sup><sup>d</sup>Doh tar kitup, inggonor Luh e luh uakubara tar mamang buturulik. Doha kitup ahik pahe matot e ragom tane tatanon.

<sup>6</sup><sup>e</sup>Doha tang siokor tamata hangana tang Jon, inggono ke ualatuehain God. <sup>7</sup>Inggono ke laha tar me hire tasir tamata toro mana tar luh, maeit o tamata ra turung longoro tur tatanono tar luh, kara tagorong man. <sup>8</sup>A luh ahik pah te Jon inggono ke la pukuha tar me hire tasir tamata toro mana tar luh. <sup>9</sup><sup>f</sup>Doha luhonener mana gere luh uakubara tasir tamata uakap, e laha i kot.

<sup>10</sup>O Uelhire roono ko uangoulane i kot, doha mamang inetelikane i kot, ko uakotpokosoig roon, bo o tamata pukane i kot, ahik pah ka ate tun tang roon. <sup>11</sup>Doh inggono ke laha tasir tamatang tena uan, bo gisina puk ahik mata banga uaia tatanon. <sup>12</sup>Bo o tamata pukusine ka banga uaia, kara tagorong mana tatanon, inggono ke heir tasisina tar uauia pare, o bung tuna God. <sup>13</sup><sup>g</sup>Ge gisina pe ro bung tunon ahik pah ka kotpokoso tar nimalara tasir tamata ue o bung tamas, bo gisina ka pokoso tena nimalara God.

<sup>14</sup><sup>h</sup>O Uelhire ko pokos a tamat, karo me uangoul tagu tagigeig, inggeim king banga tena uleikir nitampopokohon, a hamhamasalik, <sup>i</sup> kara uauaman. Inggonor nitampopokoho ter nanar keketik bulout ger tang siok geke la tur tang God.

<sup>15</sup>Doh Jon ke kula ualeik, kare hire tauete tun toro mana pare, “Inggono, teene geku hireo tamiuoum, a tamata gere lame i mud totoguo inggono ter i rana uainintiehe tun, teeit inggon e uangoulung sioun totoguo.” <sup>16</sup>A hamhamas, kara uauaman, maeit a nitabila uaia e la tur tatanon e laha tagigeig.

<sup>17</sup><sup>j</sup>A ualatut ke heirihaiig God tang Moses, bo a hamhamas, karo uauaman e la tur tang Iesu Kristo. <sup>18</sup><sup>k</sup>Ahik me tang sioko ke banga tang God, bo God ger Tuna God ger Keketik Bulout, ger tang siok, inggono tere uangoul uahuhut tang Taman. Inggono teke uaate tagigeig tatanon.

### Jon ger tang uahuhu ke hire tasir tamata tang Iesu

<sup>19</sup>Gine te Jon ger uauamana ke hire toro mana tasir patere mesir Libai tar binaka ka ualatue mer Ju gera uangoul i Jerusalem tasisin, kara

<sup>b</sup> 1.3 1Ko 8.6; Kol 1.16-17; Hib 1.2    <sup>c</sup> 1.4 Jon 5.26    <sup>d</sup> 1.5 Jon 3.19    <sup>e</sup> 1.6 Mat 3.1; Luk 1.13-17,76    <sup>f</sup> 1.9 Jon 8.12    <sup>g</sup> 1.13 Jon 2.11; 3.3-6; 1Pi 1.23    <sup>h</sup> 1.14 Pil 2.7

<sup>i</sup> 1.14 hamhamas. Tok Pisin “marimari” English “kindness, grace, grasia.”

<sup>j</sup> 1.17 KT 34.28; Roum 6.14    <sup>k</sup> 1.18 KT 33.20; Jon 6.46; 1Ti 6.16

me dangatanguasina pare, “Ingga te mai?” <sup>20</sup>Jon ke hire uakodkodoho kompe, kare hire uakalahara pare, “Inggo ahik pah te Kristo.” <sup>21</sup>Temaeit ka la dangatanguasina pare, “Bo ingga te Elaija ger propeiting sioun? Ue ingga ter propeit?” Kare hire tapokisono pare, “Inggo ahik!” <sup>22</sup>“Ingga o hire tapokis tamiueim me puh maring la hire inggeim tasir tamata geka ualatueme tamiueim, ingga te mai tun ue hape ro kila katongo peia?” <sup>23</sup>Kare hirengua Jon tasisina tar puhung uelhire geke kulain Aisaia ger propeit pare,

“Inggo ter uauanar tang siokor tamata gere kula ualeik tur tar butur padene pare,  
‘Uakodkodoho tena leler Tamata Noman.’ ” *Aisaia 40.3*

<sup>24</sup>Doho gisiamer Parisi gesir niualatueme ka dangatangua tang Jon pare, <sup>25</sup>“Ae maeit ro kula ahik pah Kristo, doh Elaija, doh ahik pono pah ter propeit, bo maeit ro uahuhua tasir tamat?”

<sup>26</sup>Kare hire tapokis Jon pare, “Inggo u uahuhu keip puk tar kodom, bo i uantinanina tamiuoum kaeinir tang siokor tamata mung teleioum. <sup>27</sup>“Inggono tere turung la uakelukume totoguo. Doh inggo ahik pahu matot u luaka liu tar bungbunguna na suon.” <sup>28</sup>A niguatanin ke siokor kotpokoso to i Betani tar pang giamehe nar kodom i Jodan teke uahuhu to Jon tasir tamat.

<sup>29</sup>“Tar uagiamehenar marein Jon ke banga tang Iesu re la peme tatanon, kare kula pare, “Banga tena Tunar Sipsip God<sup>o</sup> gere kale liu tar niguata uasaane i kot. <sup>30</sup>“Teono, teene geku hireio tamiuoum e turung uakelukume totoguo, bo inggono puk ter mamahoholik totoguo, teeit inggon e uangoulung sioun. <sup>31</sup>Sioun inggo u tele tatanon, bo ter puh puk inggo ku me uahuhu keip puk tar kodomo mara ate uamatotor Israel tatanon.”

<sup>32</sup>“Kare hire tauete Jon pare, “Inggo ku banga tar Iabena Dedeil ke la turuha i Heuen ke la siraha misiana tar baluh, kare me toko tatanon, kare pepe dedengua. <sup>33</sup>Doh tar binakon inggo ahik pah ku ate tatanon, bo God geke heiriha totoguo tar me uahuhu keip tar kodom, inggono teke hire totoguo pare, ‘Ingga o turung banga tar Iabena Dedeil e hiuoha, kare me toko tar tamat, kare pepe dedengua, inggono ter tang sioko re turung uahuhu keip tar Dedeilir Iaben.’ <sup>34</sup>“Doh inggo ku banga tar inete ke pokoso tun toro man. Doh inggo gine ru hire tamiuoum a buloutene ter Tuna God noman.”

---

<sup>1</sup> 1.21 Ual 18.15,18; Mat 11.14    <sup>m</sup> 1.27 Jon 1.15    <sup>n</sup> 1.29 Ais 53.6-7; 1Pi 1.18-19

<sup>o</sup> 1.29 “Na Tunar Sipsip God.” O Ju ra uahung tasir sipsip tang God tar kale liu teres niguata uasa.    <sup>p</sup> 1.30 Jon 1.15    <sup>q</sup> 1.32 Mat 3.16    <sup>r</sup> 1.34 Mat 3.17

### A tang torikir tamata kura uakeluk tang Iesu

<sup>35</sup>Doh nar uagiamehener marein Jon, doh na tang torikir tamatang uakuakeluk ra pepe poluk tar buturuon. <sup>36</sup>\*Kare banganguaono tang Iesu ke me siaua pela tasisin, kare kula pare, “Banga tena Tunar Sipsip God!” <sup>37</sup>Doh na toking tamatang uakuakeluk Jon kura longoro ke kula peono pare, kaura uakelukungua tang Iesu.

<sup>38</sup>Kare uiliangarungua Iesu, kare banga tasrasin ura uakeluk peme tatanon, kare dangata pare, “A hau ura siris raoum?” Kaura kula rasina pare. “Ia ro uangoula, Rabai?” (Tera kila peinir Tang Ualasis).

<sup>39</sup>“Mura lame maura me banga raoum.” Doh rasina kura uakeluk tatanono nar moloi, kaura la banga tar butur re uangoulon, kara uelgungumungua ke la tuka nareiu bolboloh.

<sup>40</sup>“Doh Andru tahina Saimon Pita inggono ter tang sioko tasrasina gekura longoro tar haua ke hirein Jon, kaura uakeluk tang Iesu. <sup>41</sup>Doh ahik me manasan, kare sir Andru tang tahina tang Saimon, e marang uahire uakikilanga tatanono pare, “Raeim kira tupara manasa tar Mesaia” (tera kila pein Kristo). Kare keipinguaono Andru tang tahina tang Iesu.

<sup>42</sup>“Kare banga Iesu tatanono, kare kula pare, “Ingga Saimon ger tuna Jon, ingga ra kilanguaia tang Sipas” (tera kila pein Pita).

<sup>43</sup>Nar uagiamehenar marein Iesu ke la i Galili, kare ueltuparungua tang Pilip, kare kula pare tatanon, “Uakelukumeane totoguo.” <sup>44</sup>Pilip te mes Andru, doh Pita ra uangoul tokaha tar siokor uan i Betsaida.

<sup>45</sup>“Doh Pilip ke ueltupara tang Nataniel, kare hire tatanono pare, “Inggeim king ueltupara manasa tar tamata geke bolo umatotoin Moses i lolono tar ualatut, doho propeit pon, inggono te Iesu ger peng Nasaret ger tuna Josep.”

<sup>46</sup>Bo Nataniel puk ke kula tapokis tang Pilip pare, “A haua here song re turung pokoso me inete uaia i Nasaret bo?”

Kare kula tapokis Pilip pare, “Lame maro me banga.”

<sup>47</sup>Iesu ke banga tang Nataniel ke me la uahuhut pe tatanon, kare kula pare, “Banga tar tamatene inggono ter peng Israel tun, doh inggon ahik paha bohoboh.”

<sup>48</sup>Kare dangata Nataniel tang Iesu pare, “Ae maene ro atea totoguo?”

Kare hire tapokis Iesu pare, “Inggo ku banga totomua o pepe i kukulebanga toro momolouina na ro fig.”<sup>w</sup>

<sup>49</sup>\*Kare kulangua Nataniel tang Iesu pare, “Ir Tang Ualasis, ingga ter Tuna God. Ingga tenas Toiar Israel!”

---

<sup>s</sup> 1.36 Jon 1.29    <sup>t</sup> 1.40 Mat 4.18-20    <sup>u</sup> 1.42 Mat 16.18    <sup>v</sup> 1.45 Ual 18.18; Ais 7.14; 9.6; Jer 23.5; Isk 34.23    <sup>w</sup> 1.48 o fig. O douk o tur i Israel, o tamat ra ein tar kukuanana roon  
<sup>x</sup> 1.49 Mat 14.33; 16.16; Mak 3.11



<sup>50</sup>Kare kula Iesu tang Nataniel pare, “Ingga ko tagorong mana totoguo, teeit ku hire peo pare, ku banga to totomua toro momolouina ro fig, kare la pokoso Pilip, kare hire totomua totoguo. Doh ingga o turung banga me inet a uleikintiehe tar inetonene.” <sup>51</sup>⁷Kare mene ualatumana poluk Iesu pare, “Inggo gine ru hire tun tamiuoum toro man. Inggoum mung turung bang i Heuen e takapuk. Doh no anggelou God ra turung kaete kai, kara turung hiuoha tar keketik bulout ger Tunar Tamat.”

### Iesu ke uapalih tar kodomo tar bino

**2** <sup>1</sup>Kura karuh bakar torikir marein, kara guatanguain ro le tar siokor uaning Galili ra kilain i Kena. Doh tinana Iesu e uangoul tagu pon. <sup>2</sup>Doh Iesu mesno tamatang uakuakeluk ka kila ponois tar me uangoul tagu tar binakene toro le. <sup>3</sup>Doh tar binaka ke kapar bino, tinana Iesu ke kula pare tar tun, “Gisin ahik baka poluk mes bino.”

<sup>4</sup>⁴Kare hire tapokis Iesu pare, “Tinoug! Ae maene ko lamea totoguo? Nag binako halana te pokos.”

<sup>5</sup>Kare kula tinanono pare tasir tamatang kalekinale, “Mu guata uakeluk kompe tar inete re hiregiono tamiuoum.”

<sup>6</sup>Doh tar umon e tokor tonomor nouh palau a itung kodom, kare tar uabusa tar inete tar niguatang tasir Ju. Doh tar itung kodomonin a siok e matot e kale tar 100ir lita.

<sup>7</sup>Kare kula Iesu tasir tamatang kalekinale pare, “Mu kale tar nouh paluanine, karung la itu me kodom.” Doh gisina ka itu uauoun tunungua taninin, <sup>8</sup>kare kulono tasisina pare, “Ding uapuhina sikoro tar kodom, karung keip tar tamata geke guluh toro le.” Kara keipinguasina tar kodomo tar tamata geke guluh toro le.

<sup>9</sup>Doh gine ke inum tagin peono taninin, a kodomo ke la uapalih tar bino. Doh inggon ahik pahe ate, ia ka kale turigir bino, bo o tamatang kalekinale puk geke keipime tar kodom, gisina tera ate. Doha tamata geke guluh toro le ke kila tar buloutene ke le, <sup>10</sup>kare kula pare tatanon, “Tar inete sira pare, o tamata ra uoto bul uakikilanga tar binoniner uia, song i muduhia tar binaka ra inum uapopouluana sikoro manasa peisisin, song re kale tauetono tanininer bino ahik paha uia tun, bo ingga ko patoho tar bino uaia tun, song gine daana ko kale taueta taninin.”

<sup>11</sup>Inggonene ter uakikilanganar uahire ke guatain Iesu. Inggono ke guata to i Galili tar uan i Kena teke uakalahara toono tena nitampopokoh. Doh no tamatang uakuakelukono ka bang, kara tagorong manangua tatanon.

⁷ 1.51 Uak 28.12    ⁸ 2.4 Jon 7.30; 8.20

<sup>12</sup> <sup>a</sup>I muduhia Iesu me tinan, doho bung tahin, doh no tamatang uakuakeluk ka la tar siokor uan i Kaperneam, kara la uangoul sikoro baka tar uanon.

**Iesu ke geil tauete tasir tamatang uabulbulau  
iuma tar umang lotu ger dedeil**

<sup>13</sup> <sup>b</sup>Tar binaka ko la matotoin ros niein uleikir Ju gera kilain, Leke Liu ro Mat, <sup>c</sup> Iesu ke la i Jerusalem. <sup>14</sup> Dohi uma tena morener umang lotu ger dedeil, inggono ke la ueltupara tasir tamata ra uabulbulaua tasir kau meisir sipsip, doho baluh. Doho gisiameha ra tabila tar patehe ra ueluapalihe tenas mani. <sup>d</sup> <sup>15</sup> Doh Iesu ke tuha tar kalopis, kare geil tauete keip tasisin, doh nosio sipsip, karo kau iuma tena morener umang lotu ger dedeil, kare ualahur tasisina ra hiliu, kare sarasara ueltebeir tenas manisine ra uelueluapalihe, kare kaba ding tar pateh. <sup>16</sup> Kare kula tasisine ra uabulbulaua tasir baluh pare, “Kale liu tasir inetesineane, ahik pah mung guata tena uma Tamouguo pare, a umang bulbulaua to.”

<sup>17</sup> <sup>e</sup> Doh no tamatang uakuakelukono ka namana tapokisingua tar puhung uelhire geke boloin pare, “Reg uleikir nimalaro tenang uma, inggo u ueltadantiehe tun tenang uma tar kaeuke misiana toro hue gane i lolono toro baloug.”

<sup>18</sup> Temaeitie o Ju gesir mahoho ka ualahur tatanono pare, “Ingga o touo tagin me inete maring ate inggeim pare, ingga a tohangoum ko guata pe tar puhonene?”

<sup>19</sup> <sup>f</sup> Doh Iesu ke hire tapokis pare, “Mu dura tar umang lotuener dedeil, karu turung uatentur tapokiso tatanono tar touonor marein.” <sup>20</sup> Kara hire tapokisir Ju pare, “A umang lotuene dedeil ke kale toro toueit, doho tonomo ro hangaul ro krismas ka tuha pein. Doh ingga o tagorong manampe pare, o uatentur tar umang lotuonener dedeil tar touonor marein puk?” <sup>21</sup> <sup>g</sup> Bo Iesu puk ke mene uatuha tola tar umang lotu ger dedeil tar tukununa katong. <sup>22</sup> <sup>h</sup> Doh tar binaka ke mate Iesu, kare tua tapokis, no tamatang uakuakelukono ka namana tapokis ke hire baka pe Iesu tar puhonene, kara tagorong mana toro bolobol, karo uelhire ke hirein Iesu.

<sup>23</sup> <sup>i</sup> Doh tar binaka re uangoul haraha Iesu i Jerusalem tar guata toro niein uleik, Leke Liu ro Mat, o bureher tamata ka tagorong mana tatanon, teeit gisina ka banga tar nitouo ke guatagion. <sup>24</sup> Bo Iesu puk ahik

---

<sup>a</sup> 2.12 Mat 4.13    <sup>b</sup> 2.13 KT 12.1-27    <sup>c</sup> 2.13 O niein uleik o nasir Ju ra kilain, “Leke Liu ro Mat.” O uanamana huara dede tar binaka toro mat o uleik ko leka liu tasir Ju i Isip. O Ju ra kil, a “Pasova.” Timana toro Bolobolong Kale Tapokis Mahar 12.    <sup>d</sup> 2.14 O sipsip, kau, doho baluh, kara mani ra guata keipig a uahung tang God tar umang lotu ger dedeil.    <sup>e</sup> 2.17 Ker 69.9    <sup>f</sup> 2.19 Mat 26.61; 27.40    <sup>g</sup> 2.21 1Ko 6.19    <sup>h</sup> 2.22 Luk 24.6-8; Jon 12.16  
<sup>i</sup> 2.23 Jon 7.31

pah ke uamoko tun tena nitagorong mana tasir tamat, teene inggon e ate uakapa tun tasisin. <sup>25</sup>Doh inggon ahik pono pah ke malara me tamat e uelhire ualasila tatanono tasir tamat, teeit inggon e ate tar haua re moko teres ninamanasin.

### Nikodemus ke me tupara tang Iesu

**3** <sup>1</sup>A tang siokor tamata hangana tang Nikodemus inggono ter tang sioko ponor Parisi, kare ter tang sioko pono tasir mamahoholiking Ju. <sup>2</sup>A siokor boung Nikodemus ke la tang Iesu, kare kula pare “Tang Ualasilr!” Inggeim mi ate totomua, ingga ter ualualasir o la tur tang God, teeit ahik me tang sioko re matot e touo me inete misiana ko guata pea. A tamat e guata puk gete uangoul teil God tatanon.

<sup>3</sup>Kare kula Iesu pare, “Inggo gine ru hire tun tamiuoum toro man, ahik me tang sioko re matot e bang huara Tena Nitoia God e banoto geta paho baka polukin.”

<sup>4</sup>Kare kula Nikodemus pare, “Bo hape puk tar tamata ger mahoho manas, hape ra poho uagiamehe poluk pein? Ge inggono pe ahik pahe matot e hiku tapokis toro pohpohono tinan. Hape ra la poho uagiamehe poluk peinir tamat?”

<sup>5</sup>Kare kula tapokis Iesu pare, “Inggo u hire totomua toro man, ahik me tang sioko re matot e leke Tena Nitoia God, e matoto tun gete pohor kodom, doha Iabene tatanon. <sup>6</sup><sup>m</sup>A nituaene tasir tamata ke kotpokoso tur tasir tamat, bo a nituaener nanar Iabene ke kotpokoso tur tar Iabene Dedeil. <sup>7</sup>Ahik paho lutar getu hireo totomua pare, inggoum ra poho uapoul polukusioum. <sup>8</sup>A rom e u tar butur re malarain. Doh ingga o longoro tar ururungunon, bo ingga puk o tele tar butur re tenkana turur rom ue ia re lauaturkon. Inggono ter siokono puk tasir tamata uakapa geka poho turis tar Iabene Dedeil.”

<sup>9</sup>Kare kula Nikodemus pare, “Hapengua re turung pokoso per inetenin?”

<sup>10</sup>Kare kula Iesu pare, “Ingga ter tang ualualasira ra ueltadainir Israel, ingga ahik paho naman manate tar inetenine? <sup>11</sup>Inggo u hire totomua toro man. Inggeim mi mene tar inete ring atein, karing hire tar inete king bangain, bo inggoum puk ahik pah kung kale tar haua king hiregieim tamiuoum. <sup>12</sup>Inggoum ahik pah kung tagorong mana tar binaka ku hire uamatoto tamiuoum tar ineteng gane i kot. Hapengua rung tagorong mana peoum getu hire uamatoto tamiuoum tar ineteng Heuen? <sup>13</sup>Ahik me tang sioko re matotong la i Heuen ter Tunar Tamata puk manasa gere la turuha i Heuen. <sup>14</sup><sup>n</sup>Misiana ke uakuse kai pe Moses tar soi i rana tar

<sup>j</sup> 3.1 Jon 7.50; 19.39   <sup>k</sup> 3.3 Mat 18.3; 1Pi 1.23   <sup>l</sup> 3.5 Isk 36.25-27   <sup>m</sup> 3.6 Jon 1.13  
<sup>n</sup> 3.14 Aha 21.9; Jon 8.28; 12.32

puhung douk tar butur padenen, doh ter siokono kompe tar Tunar Tamat ra uakusa kaia ponoin i ran. <sup>15</sup>°Maeit mair tamata re tagorong mana tatanon, inggon e kale tar nitua gere moko dedengua.”

<sup>16</sup>°“God e malaelhirintiehe tun tasir tamatane i kot, kare heir tar tuna ger keketik bulout a tang siok. Mais uakapa tun ra tagorong mana tatanon, ahik pah ra turung mat, ge a nitua pe e moko dedengua tasisin. <sup>17</sup>°Teene God ahik pah ke heiriha tar tun tar me kedanga tasir tamatane i kot gera uangoul uasa. Bo God ke heiriha tar tun tar me uelkarus tasisin.”

<sup>18</sup>°“O tamata gera tagorong mana tar tuna God ger keketik bulout, gisin ahik pah ra kedangais pare, ka guata uasa, bo mais ahik pah ra tagorong man, ka kedanga uoumis pare, ka guata uasa, teeit gisin ahik pah ka tagorong mana tar Tuna God ger keketik bulout a tang siok. <sup>19</sup>°Ter tengkana teene, maeit ka kedangaisisin; ‘a luh ke hiuoha i kot, bo gisina puk ahik pah ka malara tar luh. Gisina ra malara tar kitup, teeit gisina ka guata tar ineteniner sa.’ <sup>20</sup>°Mais uakapa tun ka guata tar ineteniner sa, gisin e tokouasais tar luh. Doh ahik pah ra turung la uahuhut tar luh, teene inggonor luh e turung ualasira uakalahara tar mamang niguata uasalik ra guataisisin. <sup>21</sup>°Bo mais ra uangoulur uauaman, gisina teka lame tar luh, teene a inete geke guataigisin, e ualasira pare, e la tur tang God.”

### Iesu me Jon ger tang uahuhu

<sup>22</sup>°I muduhia tar inetenine Iesu mesno tamatang uakuakeluk ka la tar butur i Judia teka la uangoul sikoro bakasin, kara uahuhu tasir tamat.

<sup>23</sup>°Doh Jon e uahuhu pono tasir tamat i Ainon a buturuon e uahuhut i Salim, teeit tar buturuon a bureher kodom. Karo bureher tamata ra la uelhir tatanono mare uahuuono tasisin. <sup>24</sup>°Tar binaka halana Herot te uamoko tang Jon tar karabus. <sup>25</sup>°Doho gisiamuhe no tamatang uakuakeluk Jon ka uelperere mer tang siokor Ju tar niguatang tar uahuhur nasir Ju. <sup>26</sup>°Temaet gisina ka lame tang Jon, kara me kula pare, “Ir Tang Ualasil! Inggga o namana huara tar tamata, giala totomua tar pang giamehener kodom i Jodan ger tang siok geko menmene uamatotoia? Ingggon e uahuhu pon, doho tamata uakapa ka siokor hiliu totomua, kara la kompe tatanon.”

<sup>27</sup>°Kare kula tapokis Jon pare, “A tamat e matoto kompe e kale tar haua ke heirin God tatanon. <sup>28</sup>°Inggoum katongo kung longoro ku hire peo. Ingggo ahik pah ter Kristo, bo inggo ka heir uoumuhaio tar me kaleuatoro tena lelon. <sup>29</sup>°Ramatang bulout timuh geura le, a bulout tena kuaha manasampe tar kuahon. Doh kaluanonor buloutener le timuh

° 3.15 Jon 20.31    ° 3.16 Jon 3.36; 10.28; Roum 5.8; 8.32; 1Jo 4.9-10    ° 3.17 Luk 19.10  
 ° 3.18 Jon 5.24    ° 3.19 Jon 1.5,9; 8.12    ° 3.22 Jon 4.1-2    ° 3.28 Mat 11.10; Jon 1.20

geke me poul tatanon ke tur, kare ualongoro tatanon, kare uahantiehe tun tar binaka ke longoro tar uauanar buloutonener le timuh. Inggono ter siokono kompe inggo u uahantiehe pon. <sup>30</sup>A hanganono tere turung i rana, kara hangouguo tera turung uaikotoin.”

### A tang sioko geke la tur i Heuen

<sup>31</sup>“A tang sioko geke la turuha i Heuen, inggono tere i ranantiehe tun tasir tamata uakap. Doh mai ger peng gane i kot, inggono ter nanar kot, kare mene umatoto tar ineteng gane i kot. Bo a tang sioko geke la turuha i Heuen, inggono ter i ranantiehe tasisina uakap. <sup>32</sup>“Inggon e hire tar inete ke bangaig, kare longoroig, bo ahik puk me tang sioko ke kale tar inete ke menegion. <sup>33</sup>Bo mai ke sanga dede tar haua ke menegion, inggon e ualasira pare, God a uauaman. <sup>34</sup>Gitir tang sioko geke heirihain God e mene tena uelhire God, teene God ke siokor heir uadeil uakapa tun tar labenon. <sup>35</sup>“God Tamanon e malauelhirintiehe tun tar Tun, kare heir keip tatanono tar nitampopokoho tar mamang inetelik. <sup>36</sup>“Mais ra tagorong mana tar Tuna God, gisina ra kale tar nitua gere moko dedengua, bo mais gera ueluelde tar Tuna God, gisin ahik pah ra turung kale tar nituaono ge na nimaliana pe God e turung moko dedengua tasisin.”

### Iesu mer kuahang Samaria

**4** <sup>1</sup>“O Parisi ka longoro pare, Iesu ke uahuhu tasir bureher tamat, kare guata tasisina pare, no tamatang uakuakeluk kara la burehentiehe uain tasir nang Jon. <sup>2</sup>Bo Iesu katong ahik pah ke uahuhu tasir tamat, no tamatang uakuakeluk pukuono teka guat. <sup>3</sup>Doh Iesu ke ate pare, o Parisi ka ate kout tatanon, temaeit inggono ke hiliu i Judia, kare la tapokis poluk i Galili. <sup>4</sup>Bo tar lele pukene ke uakelukuion, ke lih polakala tar pang uan i Samaria.

<sup>5</sup>“Dohi Samaria Iesu ke me pokoso tar siokor uan ra kilain i Saikar, inggono tere uahuhut toro mahar kot geke heirin Jekop tar tuna tang Josep. <sup>6</sup>Doh na koue Jekop e moko tar buturuon. Doh Iesu ke maluana ka la pe tar puhung barah, temaeit inggono ke me tabila uahangua i tektekene tar koue. Doh inggono kaelainane nar mareing uleik, <sup>7</sup>ter binaka ponono ke lamer kuahang Samaria e lang itu kodom, kare kulangua Iesu tatanono pare, “Uouh baka meg kodomong inumo.” <sup>8</sup>Ter binakonene no tamatang uakuakeluk Iesu ka la bulbulaua niein tar uan.

<sup>9</sup>“Doh gitir kuahang Samaria ke kula pare, “Inggo ku lutara tun ko dangata pea me kodomong inum, ge ingga pe a peng Ju, doh inggo a

<sup>v</sup> 3.31 Jon 8.23    <sup>w</sup> 3.32 Jon 3.11    <sup>x</sup> 3.35 Mat 11.27; Jon 5.20    <sup>y</sup> 3.36 Jon 3.16-18; 1Jo 5.12    <sup>z</sup> 4.1 Jon 3.22    <sup>a</sup> 4.5 Uak 33.19; Jos 24.32    <sup>b</sup> 4.9 Esr 4.1-5

kuahang Samaria.” Teene o Ju mesir Samaria ahik pah ra ueldokout tokah.

<sup>10</sup>cKare kula tapokis Iesu pare, “Ingga o tele tar haua ke heirin God, karo tele maionene re hinga totomua me kodomong inum. Bo ge pako atea, ingga pake tero hinga totoguo maru heiro totomua tar kodomong tar nitua.”

<sup>11</sup>Kare kular kuaha pare, “Ir tamata uleik, doh ia ro turung kale tura tar kodom gere heir tar nitua? Ge a koue pe a i lolon, doh ingga ahik menang ineteng itu keip. <sup>12</sup>dIngga ter i ranantiehe tang Jekop ge tubumiueim geke heir tamiueim tar koueene, kare ininum tatanono meso bung tun gesir keketik bulout, karo no kau, karo no sipsip?”

<sup>13</sup>Kare kula Iesu pare, “Mais ra inum tar kodomene, gisina ra turung kamadaka poluk, <sup>14</sup>ebo mais ra inum tar kodom geru turung heirio, gisin ahik pah ra turung kamadaka uapoul poluk.”

<sup>15</sup>Kare kular kuaha tatanono pare, “Ir tamata uleik ingga o heir totoguo tar kodomono mara hikinguao pahu kamadaka uapoul, kara hik pono pahu matot u tapokisime tar me itu kodomo poluk.”

<sup>16</sup>Kare kula Iesu tatanono pare, “La, karo la kila tenang bulout, kaura tapokisime.”

<sup>17</sup>Kare hire tapokisir kuahono pare, “Inggo ahik menagu bulout.”

Kare kula Iesu tatanono pare, “Ingga o uamana tun, ko hire pe pare, ahik menang bulout, <sup>18</sup>bo ingga puk nang tang tolimir bulout, doh tar bulouteit ro kale teilia, inggon ahik pah tenang bulout tuna. Ingga ko hire nomana totoguo toro man.”

<sup>19</sup>Kare kular kuahono pare, “Ir tamata uleik, inggo song ku ate, ingga a propet. <sup>20</sup>fO bubungumiueim ra uoto lotu to tang God ganah i rana tar sisanene, bo inggoumur Ju mung kula pare, i Jerusalem ter uan ri lotu toeig tang God.”

<sup>21</sup>Kare hire tapokis Iesu pare, “Ingga o tagorong mana totoguo, a binak e turung pokoso tasir tamata pare, ahik pah ra turung lotu to i rana tar sisanene ue i Jerusalem tang God ge Tamagigeig. <sup>22</sup>gInggoumur Samaria ahik pah mung ate umatoto tang mai rung lotuin, bo inggeimir Ju mi ate umatoto tang mai ring lotuin. Doh inggeimir Ju mi ate pono hape re uelkarus pe God tasir tamat, ge a puh peono teke la tur tasir Ju. <sup>23</sup>A binak e lame, doha binakono gine ke pokoso manas, doho tamatang lotu nomana ra turung lotu tang Tamagigeig tar Iabena Dedeil,<sup>h</sup> doh toro man. God e malara tasir tamatasine ra lotu tatanon. <sup>24</sup>iGod a iaben, kare mais ra lotu tatanon, gisina ra lotu keip tar Iabene Dedeil, doh toro man.”

<sup>c</sup> 4.10 Jon 7.37-38; UGO 21.6 <sup>d</sup> 4.12 Jon 8.53 <sup>e</sup> 4.14 Jon 6.35 <sup>f</sup> 4.20 Ual 12.5-14; Ker 122.1-5 <sup>g</sup> 4.22 2To 17.29-41; Ais 2.3; Roum 9.4-5 <sup>h</sup> 4.23 O gisiamer tamata ra uoto bolobol tar puhene “tar Iabena Dedeil” pare, “tar iabeisisin.” <sup>i</sup> 4.24 Roum 12.1; 2Ko 3.17; Pil 3.3

<sup>25</sup>Kare kular kuaha pare, “Inggo u ate tar Mesaia e laha, ra kilain tang Kristo, doh tar binaka re lahaon inggon e turung uakalahara tagigeig tar mamang inetelik.”

<sup>26</sup><sup>j</sup>Kare kula Iesu pare, “Inggo teene ru menmene totomua.”

### **O tamatang uakuakeluk ka pokoso tapokis poluk tang Iesu**

<sup>27</sup>Iesu ke mene tar puhonene, kara pokoso tapokisingua no tamatang uakuakelukon, kara me lutara ka banga pe tatanono re menmene pe tar kuah, bo ahik puk me tang sioko tasisina ke dangata pare, “A haua ro malaraiia ue ae maene ro ueluatata keipa tar kuahene?”

<sup>28</sup>Song ke laonor kuah ke hiliu tena itung kodom, kare langua tar uan. Doh inggonor kuaha ke la hire tasir mamahoholik pare, <sup>29</sup>“Mu lame marung me bangoum tar tamata ke hire totoguo tar mamang inetelikinine ku guatguatagio. Hape rung namana peoum, inggono here ter Kristo?”

<sup>30</sup>Temaeit gisitir tamata ka hiliu tar uan tar la banga tang Iesu.

<sup>31</sup>Doh tar binakono no tamatang uakuakeluk Iesu ra ualualahur tatanono pare, “Tang Ualafir, ein baka tar niein!”

<sup>32</sup>Bo inggono puk ke kula tapokis pare, “Inggo reg nieining ein, ginit ahikioum pah mung ate uamatot.”

<sup>33</sup>Temaeit gisit no tamatang uakuakelukono ka ueldangata katongois, “A hau, here me tamata manasa ke heir mena nieinon?”

<sup>34</sup><sup>k</sup>Kare kula Iesu pare tasisin, “Regu nieino te pare, inggo u guata uakeluk tena nimalara God geke heiriha totoguo, karu uakapa baka tena kalekinaleon. <sup>35</sup><sup>l</sup>Inggoum mung uoto kula pare, ‘A toueit bakar bialok, song ter binakang ueuer.’ Bo inggo gine ru hire tamiuoum, puka tar matamiu, karung bang i koboro ke matoto manasainir binakang ueuer.

<sup>36</sup>A tamata geke ueuere tar niein, inggono ka bulauain, kare uamoko toto tar nieining tar nitua gere moko dedengua. Maeit mai ke lebe tar iom, kare mai ke ueuer, rasin ura turung siokor uaha tokaha tar siokonor binak. <sup>37</sup>Temaeit roono rone ro uelhire o mana tun pare, a tang sioko re leb, kara tang sioko re ueuer. <sup>38</sup>Inggo ku ualatue tamiuoum tar la ueuer, doh inggoum ahik pah kung kalekinale tagu tar iomon. Doh inggoum kung kale niein to puk tenas kalekinaler gisiameh.”

### **O bureher Samaria ka tagorong man**

<sup>39</sup>O bureher Samaria tar uanonene ka tagorong mana tang Iesu, teeit ke hire per kuaha pare, “Inggono ke hire tauete tar mamang inetelik ku guatguatagio sioun.” <sup>40</sup>Temaene tar binaka ka lamer Samaria tang Iesu, gisina ka petutup tun tatanono tar uangoul tagu tasisin. Doh inggono ke uangoul tagungua tasisina tar torikir marein.

<sup>j</sup> 4.26 Mak 14.61-62    <sup>k</sup> 4.34 Jon 6.38    <sup>l</sup> 4.35 Luk 10.2

<sup>41</sup>Doho burehengua poluk ka tagorong man, teeit tar inetenine ke menegion. <sup>42</sup><sup>m</sup>Kara kulanguasina tar kuaha pare, “Inggeim ahik pah king tagorong mana puk ko me hire pea tamiueim, bo inggeim king longoro katongo pono tena uelhireon, karing tagorong man, doh inggeim mi ate manasa tar tamatonene ter Tamatang Uauheil tasir tamata uakapane i kot.”

**Iesu ke uauia tar keketik bulout a tunar  
tang siokor uleiking tar gauaman**

<sup>43</sup>Kura karuh bakar torikir marein, kare hiliu Iesu ke la i Galili. <sup>44</sup><sup>n</sup>Doh Iesu ke kula baka sioun pare, “A propet ahik pah ra ueltadain tena pang uan katong.” <sup>45</sup><sup>o</sup>Doh tar binaka ke la pokoso Iesu i Galili, o tamata ka uaha uangoul tatanon, teeit gisina ka uangoul tagu pono tar binaka ka guata toin ro nieining Leke Liu ro Mat i Jerusalem, kara la banga tar mamang inetelik ke guatagiono toro niein roon.

<sup>46</sup><sup>p</sup>Song ke la tapokis Iesu i Galili tar uan i Kena geke uapalih toono tar kodomo tar bino. Dohi Kena a tang siokor uleiking tar gavaman e uangoul, doha tunon a keketik bulout e momouh e uangoul tar uan i Kaperneam. <sup>47</sup><sup>q</sup>Doh tar binaka ke longorono tang Iesu ke la tur pe i Judia tar lame i Galili, inggono ke la tang Iesu, kare ualahur tatanono tar lame i Kaperneam mare me uariana tar tunono ger keketik bulout, teeit a tunon e uahuhutung mat.

<sup>48</sup><sup>r</sup>Kare kula Iesu tatanono pare, “Inggoumur tamat ahik pah mung tagorong mana totoguo ue halana tung banga tar uahire, kara inete ra touoin.”

<sup>49</sup>Kare kular tamatang tar gavaman pare, “Tamata Uleik o lame, tira la gete mater tuguo.”

<sup>50</sup><sup>s</sup>Kare kula Iesu pare, “A tumua e turung uia.”

Doh inggonor tamata ke tagorong mana ke hire pe Iesu, kare la. <sup>51</sup>Doh tar binaka re lalaono tar lel, no gisiamer ualualatueono ka ueltupara kout tatanon, kara hire pare, “A tumua ger keketik bulout ke uia manas.”

<sup>52</sup>Kare dangatanguaonor tamatang tar gauaman pare, “Mangiha tunur binaka ke uiar tuguo?” Kara hiresina pare, “Nerau tar binaka ke balara sikoror pisar, teke ariana toon.” <sup>53</sup>Doh tamanon e ate tar binaka ke balara sikoror pisar, inggono ter binaka tun ke hire Iesu pare, “A tumua e turung uia.” Temaetit inggonor tamat, doho gisiamehesine ra uangoul iuma tar um, ka tagorong manangua tang Iesu.

<sup>54</sup><sup>t</sup>Inggonene ter uatorikinar nitouo geke guata toin Iesu i Galili tar binaka ke la turume i Judia.

---

<sup>m</sup> 4.42 1Jo 4.14   <sup>n</sup> 4.44 Mat 13.57   <sup>o</sup> 4.45 Jon 2.23   <sup>p</sup> 4.46 Jon 2.1-11   <sup>q</sup> 4.47 Mat 8.5-6  
<sup>r</sup> 4.48 Jon 2.18; 1Ko 1.22   <sup>s</sup> 4.50 Mat 8.13   <sup>t</sup> 4.54 Jon 2.11



### Iesu ke guata uaia to tar tamata tar mour i Betsaida

**5** <sup>1</sup>I muduhia Iesu ke la i Jerusalem tar marein uleik tenas lotur Ju. <sup>2</sup>Dohi Jerusalem e uahuhut toro pirik, ra kilain Noso Pirpirikir Sipsip, menia pono tar tolimar sungkaka nisanga manas e mokor mour, doh inggono ra kilain pare, toro uelhireng Ju, “i Betsaida.” <sup>3</sup>Doh tar buturuon o bureher tamata ra rikin keip teres mate tar sungkakanine i tektekene tar mour. O gisiamhe tasisin o kut, o peil, karo gisiameh o ininteil. Gisina ra uanguangoul tar laur gete uamonmonih kai.” <sup>4</sup>(-) <sup>5</sup>Doha tang siokor tamat e rikin, inggono ke rikin tono mate toro touono ro hangaul, doho tual ro krismas. <sup>6</sup>Doh Iesu ke banga tar tamaton, kare ate pare, inggono ke rikin tono mate tar puhung barah, kare dangatangua tatanono pare, “Ingga o malar o uia?”

<sup>7</sup>Kare hire tapokisono pare, “Ir tamata uleik ahik me tang sioko re poul totoguo tar hiuako tar mour tar binaka re uamonmonih uakekener kodom. Doho gisiamhe ra lala tane totoguo tar binaka ru marang hiuako tar laur.”

<sup>8</sup>Kare kula Iesu tatanon, “Tur kai, karo kale tonong rikin, karo la.”

<sup>9</sup>Doh ahik me manasan, inggonor tamata ke uia, kare kale kai tono rikin, kare la. A inetonene ke pokoso to tar Mareining Pepe Uah, <sup>10</sup>“temaeit gisisir Ju ka kula tar tamata geke guata uaiain pare, “Daan A Mareining Pepe Uah, doh ahik paha uia tar ualatur namieim ro kalkale teil pea tonongo rikin.”

<sup>11</sup>Bo inggono puk ke kula tapokis pare, “A tamatene ke guata uaia totoguo, ke kula pare, ‘Kale tonong rikin, karo la.’ ”

<sup>12</sup>Kara dangatanguasina tatanono pare, “Mair tamatonene ke kula totomua pare, ‘O kale kai tonong rikin, karo la?’ ”

<sup>13</sup>Bo a tamata pukene ka guata uaiain, ahik pahe ate tang Iesu, teeit o burehe per tamata tar uanon, doh Iesu ke uauelhoubourin tasir tamat.

<sup>14</sup>I muduhia Iesu ke ueltupara to tar tamatonono tar uamang lotu, kare kula pare tatanon, “Bang, ingga ko uia manas, karo uakenuangua tar guata uapoul tar niguatar sa, maeit a ineteniner sa uasa tun ahik pahe pokoso totomua.” <sup>15</sup>Doh inggonor tamata ke hiliu, kare la hire tasir Ju pare, “A tamata geke guata uaia totoguo, inggono te Iesu puk.”

<sup>16</sup>Temaeit gisinar Ju ra mamangusulungua tang Iesu, teene inggono ke guata to tar inetenin tar Mareining Pepe Uah. <sup>17</sup>Bo Iesu puk ke kula

---

<sup>u</sup> **5.3** O gisiamheer tamatang iate ra namana pare, a giameher puh e moko pono tar puhene. Doha puhon e hire pare, ‘Gisina ra uanguangoul tar binaka re monmonih kair kodom. Doh tar binakono na tang siokor angelou God e hiuako i lolono tar mour, kare uamonmonih kai tar kodom. Doh mair tamata re hiuo uakikilangako tar kodomo tar binakon inggono tere tupara manasa tono mater tamatene o kapu dedengua.’

<sup>v</sup> **5.8** Mat 9.6    <sup>w</sup> **5.10** Neh 13.19; Jer 17.21

tasisina pare, “Tamouguo e kalekinale dede kompela, temaene inggo u kalekinale sira ponompela.” <sup>18</sup> \*Doho Ju ka longoro tar puhonene, kara suruntiehenguais res nimaliana tar tung poustang Iesu, kara kula pare, “Tar uakikilangan Iesu ke katego tar ualatumung tar Mareining Pepe Uah, doh gine daan inggono ke kula poluk pare, a Tamana tang God, kare guata katongoin pare, e uelmatout tang God.”

### Iesu a tohagana tar guata tena kalekinale God

<sup>19</sup> \*Temaait ke la kulangua Iesu tasisina pare, “Inggo gine ru hire tamiuoum toro man, a Tuna God ahik pahe matot e guata me inete me pahen, inggon e guata puk tar huar inete re bangain re guatain Taman, a haua re guatain Tamanon, inggon e la guata sira pon. <sup>20</sup> Temaene, Tamanon e malauelhirintiehe tar Tun, kare ualasira tatanono tar mamang niguatalikir nana katong. Doh Inggon e turung ualasira tatanono tar uleikintieher inete taninine. Doh inggoum uakapa mung turung lutarantiehe tun. <sup>21</sup> Te misiana puk tang Tamanono re uatentur tapokis pe tasir mat, kare heir tasisina tar nitua, te misiana pono tar Tunon e heir tar nitua tang mai re malarain. <sup>22</sup> \*Tamanon ahik pahe kedanga me tang siok, bo ke heir puk tar nitampopokoho tar Tun tere siokor kedang. <sup>23</sup> \*Maeit o tamata uakapa tun ra turung uatakaia tar Tunon misiana ra uoto uatakaia pesina tang Tamanon. Mai ge ahik pahe uatakaia tar Tunon, inggon ahik pono pahe uatakaia tang Tamanono geke heiriha tatanon.”

<sup>24</sup> <sup>b</sup> “Inggo u hire tun tamiuoum toro man, mai re longoro tar haua ru hireio, kare tagorong mana tatanonene ke heiriha totoquo, inggono na nitua e moko dedengua, doh inggon ahik pah ra turung kedangain pare, ke guata uasa, inggono ke hiliu uoum toro mat, kare kale tar nitua gere moko dede.”

<sup>25</sup> “Inggo u hire tun tamiuoum toro man, a binak e turung pokos, doh inggono gine ke pokoso manas, doho tamata geka mate manasa ra turung longoro tar uauanar Tuna God, kare mais ka longoro ra turung kale tar nitua. <sup>26</sup> A nitua e la tur tang Tamanono katong, doh inggono ter siokono kompe tar Tunon. Inggono ke heir tar uauia tatanono mare kale teilono tena nitua katongo pon. <sup>27</sup> Doh Tamanono ke heir tar nitampopokoho tar Tun ger keketik bulout mare kedanga tenas niuangoulur tamat, teeit inggon a Tunar Tamat. <sup>28</sup> Ahik pah mung lutara tar puhene, a binak e turung kotpokoso tasir tamatasine ka mat, kare gisine i lolono tar keu ra turung longoro pono tar uauanon. <sup>29</sup> \*Kara turung tentur liu tonosio keu. Doh mais ka guata uaia ra turung tentur tapokis, kara kale tar nitua

\* 5.18 Mat 26.4; Jon 7.1; 10.30    <sup>y</sup> 5.19 Jon 5.30    <sup>z</sup> 5.22 Jon 5.27; Apo 10.42

<sup>a</sup> 5.23 Pil 2.10-11; 1Jo 2.23    <sup>b</sup> 5.24 Jon 3.15-18    <sup>c</sup> 5.29 Dan 12.2; Mat 16.27; Apo 24.15

gere moko dede, bo mais ka guata uasa ra turung tentur tapokis, kara kedangais pare, o tamata uasa.”

### Iesu ter Tuna God

<sup>30</sup>“Kare kula poluk Iesu pare, “Inggo ahik pahu matot u guata me inete teregu ninamana katong. Inggo u uakeluk to puk tar uelhire, ku kale turig tang Tamoug. Temaene ru kedango tenas niuangoulur tamat, kare nag nikedango a kodkodoh, teeit inggo ahik pahu guata katongo tereg nimalar, bo u guata puk tena nimalara Tamoug geke heiriha totoguo. <sup>31</sup>Getu hire tauete katongo pukuo tenagu kalekinale, kare nagu niuangoul, a inete geru menegio ahik pah ra tagorong manaig pare, a man. <sup>32</sup>Bo a tang giamehe<sup>e</sup> gine re uangoul, inggono teke hire uamatoto tamiuoum totoguo, doh inggo u ate tar inete geke mene uamatoto tolagiono totoguo, ginin a man.”

<sup>33</sup>“Inggoum kung ualatueme tasir tamata tang Jon, kare hireono tamiuoum toro man. <sup>34</sup>Bo inggo katong ahik pahu namana me tamat e me mene ueleheir totoguo. Inggo ku mene puk tar puhonene mara uaudeilisioum. <sup>35</sup>Doh Jon misiana toro lam gero luh, karo uabalo uakalahar, doh inggoum mung malara puk tar sisikinalikir binaka tar uaha tatanonor luh. <sup>36</sup>Bo nagu uelhire pukuonine ku uelhire taueteig, a i rana uain ter nang Jon. A inetenine ru guatagio ter inetenin ke heirig Tamougou tar guat, ginina tere ualasira pare, Tamougou ke heiriha totoguo. <sup>37</sup><sup>g</sup>Doh Tamougou geke heiriha totoguo inggono teke uatur uakalahara totoguo. Inggoum ahik pah mung matoto mung longoro tar uauanon ue mung banga tar porenon. <sup>38</sup>Doh na uelhireon ahik pahe matot e moko tamiuoum, teeit inggoum ahik pah mung tagorong mana tar tang sioko geke heirihain God.”

<sup>39</sup><sup>h</sup>“Inggoum mung timana uaia tun tono uelhire God, teeit inggoum mung namana pare, ginina tere heir tar nitua gere moko dedengua tamiuoum. Doh ginina tere ueluelhire uamatoto teil kompe totoguo. <sup>40</sup>Bo inggoum puk ahik pah kung malara tar lame totoguo tar me kale tar nituaon.”

<sup>41</sup>“Inggo ahik pah ku malara ra uatakair tamata totoguo. <sup>42</sup>Bo inggo puk u ate i lolono tar koloumiuoum ahik pah mung malaelhir tang God. <sup>43</sup>Inggo ku la tur tang Tamoug, karu mene tar mamang inetelikir nanon, bo inggoum puk ahik pah kung malara totoguo, bo gete la pukumer tang giameher tamata kare me mene katongoin, inggoum mung malara tun tatanon. <sup>44</sup>Inggoum mung malara ra uatakair gisiameher tamata tamiuoum, bo inggoum katongo puk mung de tar uatolaua tar kale me

<sup>d</sup> 5.30 Jon 5.19; 6.38    <sup>e</sup> 5.32 Tar puh pare, ‘a tang giameh’ Iesu e ueluatata tang God puk.

<sup>f</sup> 5.36 Jon 3.2; 14.11    <sup>g</sup> 5.37 Mat 3.17; Jon 5.32; 8.18    <sup>h</sup> 5.39 Luk 24.27

uatakai e la tur tang God ge me pahen. Doh hapengua rung tagorong mana peoum totoguo?”

<sup>45</sup>“Ahik pah mung namnamana tola pare, u turung hireo tang Tamoug pare, inggoum kung uangoul uasa. A tamata gere turung hire tamioum pare, kung uangoul uasa, inggono te Moses. Doh inggono ter tamata rung tagorong mana teilioum pare, tere turung poul tamioum. <sup>46</sup><sup>i</sup>Doh ge parung tagorong mana nomanoum tang Moses, inggoum pakung tagorong mana pono totoguo, teeit inggono ke bolo tar uelhire gere uelhire teil totoguo. <sup>47</sup>Bo geta hikioum pah mung tagorong mana tar haua ke boloin Moses, doh getu mene inggo hapengua rung tagorong mana peoum tar haua ku ualasiragio?”

### Iesu ke ualaein tasir tamata ke siauais tar tolimir taosein

**6** <sup>1</sup>I muduhia Iesu ke hua kout tar pang giamehener kodom i Galili, a giameher hanganar kodomon i Taiberias. <sup>2</sup>Doho bureher tamata ra uakeluk teil tatanon, teeit gisina ka banga tar nitouo ke guata peon, kare uauia tasisine resi mat. <sup>3</sup>Doh Iesu ke kaete kaia tar ponponin mesno tamatang uakuakeluk, kara la tabila totongua. <sup>4</sup>Doh tar binakono ko uahuhut ponoin ro niein uleik tasir Ju, “Leke Liu ro Mat.”<sup>j</sup> <sup>5</sup>Doh Iesu ke uatadain, kare banga tasir burehentieher tamata ra uakeluk teil pe tatanon, kare kula pare tang Pilip, “Tangua ri bulaua tureig me niein mare uelmatout tasir tamatasine mara ein?” <sup>6</sup>Iesu e marang uatolaua tang Pilip, maene ke dangata tatanono pare, teeit inggon e ate manasa hape re turung guata pe.

<sup>7</sup>Kare kula Pilip pare, “Tasir tamata uakapa tunusine tar kale mes siksikir niein e matoto leu pono tar 200ir kina tar bulaua me bereit.” <sup>8</sup>Doha tang giamehe na tamatang uakuakeluk Iesu, Andru tahina Saimon Pita ke hire tang Iesu pare, <sup>9</sup>“A tang siokor keketik kaeinane inggono no tolina ro bebereitilik ka tuha keipig tar raes-bali, kara torikir ian, bo e matoto leue puk tasir tamatasine.”

<sup>10</sup>Kare kula Iesu tosno tamatang uakuakeluk pare, “Uatabila toto tasir tamat.” Doh tar buturuon a gargarasanan, temaeit o tamata uakapa tun ka siokor tabila uahiu i kot. Doh gisina kaelaisane tar tolimar taoseinir bulout.

<sup>11</sup>Song ke kale Iesu tar bereitinin, kare heir tar niuaha tang God taninin, kare bul taninina tasir tamatasine ra tabil, kare guata sira poluk tar ian. Doh gisina ka siokor uelmatout uaia uakapa tunis teres nimalar. <sup>12</sup>Ka la mahmahur uakapa manasasin, kare kula Iesu tosno tamatang

<sup>i</sup> 5.46 Apo 3.22    <sup>j</sup> 6.4 O niein uleik o nasir Ju ra kilain, “Leke Liu ro Mat.” O uanamana huara dede tar binaka toro mat o uleik ko leka liu tasir Ju i Isip. O Ju ra kil, “o Pasova.” Timana toro Bolobolong Kale Tapokis Mahar 12.

uakuakeluk pare, “Mu kale toto tar nieininine ke mokomoko mara hik me giniameme ra ueluelourig.”<sup>13</sup> Temaeit gisina ka kale toto manasa tar bereit geke tuha keipig tar raes-bali geke mokomok, kara ongo uauoun tar hangaul, kara torikir tohen.

<sup>14</sup>Ka banga per tamata ke touo pe Iesu tar inetonene ke kotpokos, kara kulangua pare, “Roono mana tun, inggono ter Propeit gere lang laha tar kot!”<sup>k</sup> <sup>15</sup><sup>l</sup>Doh Iesu e ate tasisinar tamata ra marang uelhote tar me petutup ualahur tatanono pare, e toia tasisin, temaeit inggono ke hiliu, kare la tar ponponin me pahen.

### Iesu ke haiala i rana tar laur

<sup>16</sup>Ke reiu manason, kara hiuoko no tamatang uakuakeluk Iesu tar tektekener kodom i Galili. <sup>17</sup>Doh inggono ke reiu kitup manas, kare halanampe Iesu te laha tasisin, kara panetenguasina tar bout, kara la uoum tar pang giamehe nar kodom i Kaperneam. <sup>18</sup>Doh ahik me manasan, kare unguar uasul, kare uleik ponor butuanane tar kodom. <sup>19</sup>Doh gisina no tamatang uakuakeluk Iesu ka hua tar puhung barah sikoro kaelain tar tolim ue a tonomor kilomita, kara bangangua tang Iesu re haia pe me i rana tar laur, e la uelhirime tar bout. Doh gisina no tamatang uakuakeluk Iesu ka sokorontiehe tun. <sup>20</sup>Kare kula Iesu tasisina pare, “Ahik pah mung sokor, inggo dehon!” <sup>21</sup>Doh gisina ka uah, kara uapanete tatanono tar bout. Doh ahik me manasan, kare la hungukor bout tar buturene ra lang lasin.

### O tamata ka sir uakeluk tang Iesu

<sup>22</sup>Nar uagiamehenar marein, o tamatasine ka uangoul tar pang giamehener tektekener kodom, ka ate pare, Iesu ahik pah ke panete tagu tar bout tosno tamatang uakuakeluk, ka hiliuin. Doh gisinar tamata ra ate pono pare, a sioko puk manasamper bout re boko tar buturuon. <sup>23</sup>Bo o gisiameher tamata puk ka hua turuha toro bout i Taiberias, kara me hua babataha tar butur geke ein tor tamata tar bereit geke uahuuigir Tamata Noman. <sup>24</sup>Doh tar binaka ka banga bataba manasar tamata tang Iesu mesno tamatang uakuakeluk, gisina ka panete toro bout, kara hua i Kaperneam tar sir tang Iesu.

### Iesu tero bereit gero tua

<sup>25</sup>Tar binaka ka tupara manasar tamata tang Iesu tar pang giamehener kodom, gisina ka dangata tatanono pare, “Tang Ualasis, mangiha ko me pokosaane?”

<sup>26</sup>Kare hire tapokis Iesu pare, “Inggo gine ru hire tamiuoum toro man, inggoum ahik pah mung sir teil totoquo, teeit kung banga peoum

<sup>k</sup> 6.14 Banga Toro Bolobolong Ualatut 18.15; 18.18 <sup>l</sup> 6.15 Jon 18.36

tar inete ku tougio, bo inggoum mung sir teil totoguo, teeit kung ein peoum tar bereit, kare la unga uaha tun remi nimalar. <sup>27</sup><sup>m</sup>Ahik pah mung kalekinale puk tar nieininine re uoto benge ualahur. Bo mung kalekinale kompe tar nieininine re uoto moko dede, kare heir tar nitua gere moko dedengua. Doh ter Tunar Tamat inggono tere turung heir tamiuoum tar nieininine, teeit God Tamanon ke uamoko tar nitampopokoh i rana tatanon.”

<sup>28</sup>Doh gisitir tamata ka dangata tang Iesu pare, “A huar giniamer kalekinale pono ring guatageim re malarai God?”

<sup>29</sup>“Kare hire tapokis Iesu pare, “Ter kalekinale re malarain God tamiuoum tar guata teene: Tagorong mana tar tang siok geke heirhaion.”

<sup>30</sup>“Temaait ka dangatanguasinar tamata pare, “A huar inete ro turung touoia, maeit ring bangeim, karing tagorong mana totomua? A hua ro turung guataia? <sup>31</sup><sup>p</sup>O bungumiueim ka ein to tar mana<sup>q</sup> tar butur padenen ter siokono kompe toro bolobolo ro hire pe pare, ‘Inggono ke heir tasisina tar bereiting Heuen ka ein.’”<sup>r</sup>

<sup>32</sup>Kare kula Iesu pare, “Inggono gine ru hire tun tamiuoum toro man, inggon ahik pah te Moses ke heir tamiuoum tar bereit re la tur i Heuen, inggono te Tamouguo teke heir tamiuoum tar bereit noman gere la tur i Heuen. <sup>33</sup>O sioko ro bereit ke heirin God, teono tere la turuha i Heuen, kare me heir tar nituaane i kot.”

<sup>34</sup>Kara kulanguar tamata pare, “Tamata Uleik heir toro bereit roono tamiueim tar mamang binakalik.”

<sup>35</sup>Song ke kula Iesu pare, “Inggono tero bereit gero heir tar nitua. Mair tamata re lame totoguo ahik pahe turung gogo tagu, doh mai pono re tagorong mana totoguo ahik pono pahe turung kamadak. <sup>36</sup>Bo inggono giane manasa ku hire tanika tamiuoum, inggoum kung banga totoguo, kare halana harahampe tung tagorong man. <sup>37</sup>O tamata uakapa gere heirimeis Tamouguo totoguo ra turung lame totoguo. Doh inggono ahik pahu matot u de tang mai re lame totoguo. <sup>38</sup>Inggono ku la turuha i Heuen tar me guata tar inete ke malarai God totoguo tar me guat. Ahik pahu guata tar inete teregu nimalara katong. <sup>39</sup>Ginine ter inete ke malaragir tang sioko geke heirha totoguo tar me guat. O tamatasine ke heiris God totoguo ahik pah ra matotong heil tur totoguo, inggono u turung uatua tapokis tasisina tar uadouhinar marein. <sup>40</sup>Doh mais ka banga tar Tuna God, kara tagorong mana tatanono gisina ra kale tar nitua gere moko dedengua, karu turung uatua tapokiso tasisina tar uadouhinar marein tere malara pe Tamouguo.”

<sup>m</sup> 6.27 Jon 6.48-58    <sup>n</sup> 6.29 1Jo 3.23    <sup>o</sup> 6.30 Mat 16.1; Jon 2.18    <sup>p</sup> 6.31 Aha 11.7-9

<sup>q</sup> 6.31 “mana” a niein ke heirig God sioun tasir Ju tar binak gisina ra uangoul tagu tang Moses tar butur padpaden    <sup>r</sup> 6.31 Bolobolong Kale Tapokis 16.4; Bolobolong Ker 78.24

<sup>s</sup> 6.35 Jon 4.14    <sup>t</sup> 6.39 Jon 10.28-29; 17.12

<sup>41</sup>Doho Ju ka uakekenengua tar mene ngurungur tang Iesu, kare tokouasais, teeit ke kula peono pare, “Inggo tero bereit geko la turuha i Heuen.” <sup>42</sup>“Kara kulanguar Ju pare, “Ge inggono peene Iesu a tuna Josep, inggeig pe i ate tang tamanon, doh tinanon. Ae maene re kulono pare, ‘Inggo u la turuha i Heuen?’ ”

<sup>43</sup>Kare kula Iesu pare, “Ahik pah mung mene ngurungur katongosium, <sup>44</sup>“Tamouguo teene ke heiriha totoguo. Ahik me tang sioko re banotong lame totoguo, te gete keip tunumpeme Tamouguo tatanono totoguo, karu turung uatentur tapokiso tatanon e tua tar uadouhinar marein. <sup>45</sup>“Ge sioun pe o propeit ka bolo pare, ‘God e turung ualasira tasir tamata uakap.’<sup>x</sup> Mais ra longoro tang God, kara kale niate to tatanon, ra lame totoguo. <sup>46</sup>“Ahik me tang sioko ke banga tang God ter tang sioko puk manasampe gere la tur tatanono teke banga tang Taman.”

<sup>47</sup>“<sup>z</sup>Inggo gine ru hire tamiuoum toro man, mai re tagorong man, na nituaon e moko dedengua. <sup>48</sup>“Inggo tero bereiting tar nitua. <sup>49</sup>O bungumiuoum ka ein to tar mana tar butur padenen, bo gisina puk ka mate dedempe. <sup>50</sup>Rone tero bereit geko la turuha i Heuen, mair tamata re ein toro bereit roon ahik pahe turung mat. <sup>51</sup>Inggo tero bereit gero tua geko la turuha i Heuen, mai re ein toro bereit roon, inggon e turung tua dedengua. O bereit roono ter tukunuguo geru turung heirin, maeit ra turung kaler tamata uakapane i koto tar nitua.”

<sup>52</sup>Doh gisinar Ju ke uelsukur balas, kara uakekenengua tar menemene katongois, kara kula pare, “Hapengua re heir katongo peonor tamatene tar tukununa tagigeig mari ein?”

<sup>53</sup>Kare kula Iesu pare, “Inggo u hire tun tamiuoum toro man, ge ahikioum pah mung ein tar tukununar Tuna God ger Tunar Tamat, karung inum tar deuatinginon, inggoum tar tukunumi ahik me nitua kaein. <sup>54</sup>Bo mais ra uoto ein tar tukunuguo, kara inum tar deuatingiguo ra turung kale tar nitua gere moko dedengua, karu turung uatentur tapokiso tasisina tar uadouhinar marein. <sup>55</sup>A tukunuguo ter niein nomana tun, kara deuatingiguo ter inum nomana tun. <sup>56</sup>Mai re ein tar tukunuguo, kare inum tar deuatingiguo, inggon e uangoul tokaha keip totoguo, doh inggo u uangoul tokaha keip tatanon. <sup>57</sup>“Tamouguo ger tua teke heiriha totoguo, temaeit ru uangoulo te Tamoug, temaeit mai re ein totoguo e turung uangoul pon teeit totoguo. <sup>58</sup>Inggo ahik pah misiana ro bereit geka einis ro bungumiuoum gisina ka ein, bo ra turung mate kout puk, bo inggo tero bereit gero la turuha i Heuen, mai re ein toro bereit roon e turung tua dedenguampela.”

<sup>59</sup>Iesu ke hire to tar mamang inetelikinine tar binaka ke ualasira to iuma tenas umang lotur Ju i Kaperneam.

---

<sup>u</sup> 6.42 Mat 13.55    <sup>v</sup> 6.44 Jon 6.65    <sup>w</sup> 6.45 Ais 54.13    <sup>x</sup> 6.45 No bolobolo Aisaia 54.13  
<sup>y</sup> 6.46 Jon 1.18    <sup>z</sup> 6.47 Jon 3.15-16    <sup>a</sup> 6.48 Jon 6.32,58    <sup>b</sup> 6.57 1Jo 3.24

### O bureher tamata gera uakuakeluk teil tang Iesu ka hiliu tatanon

<sup>60</sup>O bureher tamatasine ra uakuakeluk teil tang Iesu ka longoro tar niualsironin, kara kula pare, “A inetenine ka mene ualasilaig a parakukuh, maingua re longor, kare naman manate tar ualasilanin?”

<sup>61</sup>Doh ahik me tamata ke hire tang Iesu, bo inggono ke ate katongo pare, gisina ra mene ngurungur tar puhonene, kare kulangua Iesu tosno tamatang uakuakeluk pare, “A haua ke la duhunguasioum tar niualasironene? <sup>62</sup>Doh gete paaron, inggoum e turung duh ponosioum getung banga tar Tunar Tamata ger Tuna God gete tapokis i Heuen tar uan gere la turin. <sup>63</sup>A Iabena God tere heir tar nitua, bo na nitampopokohor tamat ahik pah tere heir tar nitua. Bo o uelhire geku hireio tamiuoum roono to iaben, karo tua. <sup>64</sup>“Bo o gisiamehe puk tamiuoum ahik pah ra tagorong man.” (Iesu e ateng sioun manasampe tas mais ahik pah ra tagorong man, kare tang mai ka kouruin tar heir tatanono tasir tamatang uelpus.)

<sup>65</sup><sup>d</sup>Kare kula poluk Iesu pare, “Gine ter tengkana ru hireio tamiuoum, ahik me tang sioko re banotong lame totoguo, e banoto tun gete heir Tamouguo tatanono totoguo.”

<sup>66</sup>Tar binaka ke mene Iesu tar puhonene, o bureher tamatasine ra uakuakeluk teil tatanono ka de tatanon, kara uanua manasa tar uakeluk tatanon. <sup>67</sup>Kare dangatangua Iesu tasir hangaul, kara tang torik no tamatang uakuakeluk pare, “Bo inggoum mung marang hiliu pon?”

<sup>68</sup><sup>e</sup>Kare kula tapokis Saimon Pita pare, “Tamata Noman maingua ring la uatuhasieim? Ge ingga pe tero kale teil toro uelhire gero heir tar nitua gere moko dedengua. <sup>69</sup>Inggeim mi tagorong man, karing ate pare, ingga ter tang siokor dedeil ro la tur tang God.”

<sup>70</sup>Kare hire tapokis Iesu pare, “Doh inggo ku kedanga tamiuoum a hangaul, kara tang torik, bo a tang sioko puk tamiuoum nas uleikir liouana uasa!” <sup>71</sup>Iesu e menmene uatuha tola tang Judas ger tuna Saimon Iskariot. Judas inggono ter tang sioko tasir hangaul, kara tang torik no tamatang uakuakeluk Iesu. Inggono tere turung heir tang Iesu pare, e mat.

### Iesu meso bung tahin

**7** <sup>1</sup>I muduhia Iesu ke latlateil uiloh i Galili, inggon ahik pah ke marang latlateilila i Judia, teeit o Ju ra marang tung pous tatanon. <sup>2</sup><sup>g</sup>Doh nas marein uleiking lotur Ju, ra kilain, “O niein uelik toro umang uamuamoul,” sisikinalik dehe pokos. <sup>3</sup>Maeit o bung tahina Iesu ka kula pare tatanon, “Ingga deho hiliuane, karo la i Judia maeit ra bangar

<sup>c</sup> 6.64 Jon 13.11    <sup>d</sup> 6.65 Jon 6.44    <sup>e</sup> 6.68-69 Mat 16.16    <sup>f</sup> 7.1 Jon 5.18    <sup>g</sup> 7.2 NKP 23.34



tamatasine ra uakuakeluk totomua me inete gero touoia. <sup>4</sup>A tamata gere malara ra ueliatein ahik pahe matot e touaouo tar inete re guatain, gete ingga ro guatguata tar inetenin ualasira katongoiaane i koto mara uelateia.” <sup>5</sup><sup>h</sup>Teetit gisis ro bung tahina Iesu ahik pono pah ka tagorong mana tatanon.

<sup>6</sup>Kare kula Iesu toso bung tahina pare, “Nagu binaka tuno<sup>i</sup> halana te kotpokos. Bo a mamang binakalik puk a namiuoum, <sup>7</sup>O tamatang gane i kot ahik pahe matot e tokouasa taguis tamiuoum. Gisin e tokouasa pukis totoguo, teetit inggo u uoto hire tauete tar inetenine ra guataigisinar sa. <sup>8</sup>Bo mung la kompe toro niein uleik roon, bo inggo ahik pahu uolong la tagu toro niein uleik roon, teetit nagu binaka tuno halana te pokos.”

<sup>9</sup>Ke kula baka Iesu tar puhonene, kara hiliu tongua ro bung tahinono tatanon i Galili.

<sup>10</sup>Dohi muduhia puk tar binaka ka la bakasit ro bung tahinono toro niein uleik roon, song ke la uakeluk Iesu. Bo ke uahuahoubour teil kompein tasisina toro niein uleik roon.

<sup>11</sup>Doho Ju ra sir puk teilimpe tang Iesu gane toro niein uleik roon, kara ueldangatampeis pare, “Iareion?” <sup>12</sup>Doh gane tasir manaiasin o burehe ra ueluelhimukeis, ra kular gisimehe pare, “Inggono dehe uoto boho tasir tamat.” <sup>13</sup>Bo ahik puk me tang siokor tamata re ongolo tar mene uakalahara tang Iesu, teetit gisina ra sokoro tasir Ju.

### Iesu ke ualasira to toro niein uleik

<sup>14</sup>Tar binaka ko la uahuhut sikoro manasalain roono ro niein uleik i uantinanin, Iesu ke la tar umang lotu ger dedeil, kare uakekene tar ualasir. <sup>15</sup><sup>j</sup>Doh gisisir Ju ka lutar, kara kula pare, “Hape maene re atentiehe uaia tunur tamatene, ge inggono pe ahik baka pah ke la me buturing kale niate?”

<sup>16</sup><sup>k</sup>Kare kula tapokis Iesu pare, “A ualasaranine ru ualsiragio ahik paha nouguo katong, bor ualasaranin e la tur tang God geke heiriha totoguo. <sup>17</sup>Doh geta kedangar tamata tar haua ra guatain re malarain God, gisina ra turung naman manate tenag ualasiro e la tur tang God, ahik paha nouguo katong. <sup>18</sup><sup>l</sup>Doh mais ra ualasira teres ninamana katong, gisina ra marang uairana katongo kompeis, bo mai re uoto keip kaia tar hanganar tang siok geke heiriha tatanon, inggon e hire toro man. Doh ahik uadeil mo boho kaein tatanon. <sup>19</sup><sup>m</sup>Moses ke heir tamiuoum tar ualatut, bo ahik puk me tang sioko tamiuoum ke ueltad, kare uakeluk tar ualatutunin. Ae maene mung marang tung pousoum totoguo?”

---

<sup>h</sup> 7.5 Apo 1.14 <sup>i</sup> 7.6 tar puhene, “nagu binaka tuno,” e hire pare, na binaka Iesu tar mate tar korose, halana te matotoin <sup>j</sup> 7.15 Mat 13.54; Luk 2.47 <sup>k</sup> 7.16 Jon 12.49; 14.10 <sup>l</sup> 7.18 Jon 8.50 <sup>m</sup> 7.19 Apo 7.53; Roum 2.21-24

<sup>20</sup>“Doh gisisir tamata ka kula tapokis pare, “A liouana uasa ke hiku totomua, bo mai re marang tung pous totomua?”

<sup>21</sup>Kare kula Iesu tasisina pare, “Inggo ku guata tar siokor nitouo, doh inggoum kung siokor lutarantiehe tun. <sup>22</sup>°Bo Moses ke heir tamiuoum tar ualatut tar poko tar kapokous ro bung tumiu gesir keketik bulout. O man Moses ahik pah teke heir tamiuoum, o bungumioum ka uakekene tar puhon. Doh gine daan inggoum mung poko tar kapokousur guam gesir bulout tar Mareining Pepe Uah. <sup>23</sup>°Geta pokoin ro kapokonor gugumalikener bulout tar Mareining Pepe Uah, inggon a uia mara hik na ualatut Moses pah ra kategoig. Doh ae maene rung nimalianoum totoguo getu guata uaiia tar tukununa uakapa tunur tang siokor tamata tar Mareining Pepe Uah? <sup>24</sup>Mu luara tar kedanga hape re baka per inet, bo mung kodoho kompe hape re la kodkodoho pelar inet.”

### O mana tun Iesu ter Kristo noman

<sup>25</sup>O gisiameher tamata gera uangoul i Jerusalem ra ueluelkule pare, “Ter tamata dehene gera marang tung pousisir tamat. <sup>26</sup>Bo inggono puk gine harahampe re ualasira to tar kakalaharan mara bangar tamata, kara longoro tatanon, doh ahik me tang sioko re kula tane sikoro tatanon. O tamatang uoum keip hera ate uaiia manasa pare, inggono here ter Kristo noman. <sup>27</sup>°Bo inggeig puk i ate, ia re la turur tamatonene, doh gete lahar Kristo ahik me tang sioko re ate ia ke la turon.”

<sup>28</sup>°Tar binaka re uelhire ualasira Iesu iuma tar umang lotu ger dedeil, inggono ke mene ualeik kirkiring tun, kare kulkula pare, “Inggoum mung ate uaiia tun totoguo, doh ia ru la turo. Inggo ahik pah ku laha teregu nimalara katong. Gine ke heiriha totoguo a uauaman, mung teleioum. <sup>29</sup>Bo inggo u ate tatanon, teeit inggo u la tur tatanon, doh inggono teke ualatueha totoguo.”

<sup>30</sup>°Temaait ka longoro per tamat, ke mene pe Iesu tar puhon, kara marang tur tane, kara kusa tatanon, bo ahik puk me tang sioko tasisina ke la uahuhut tar baka me pang lim, teeit na binakono halana te matotoin. <sup>31</sup>Bo o burehe pukur tamata ka tagorong mana tang Iesu, kara kula pare, “Doh hape tar binaka re lahar Kristo, inggon e turung touo me burehentieher inete taninine ke guataigir tamatonene?”

### O tamatang babata tar umang lotu ger dedeil ka ualatueis tar me kusa tane tang Iesu

<sup>32</sup>O Parisi ka longoro tasir bureher tamata ra ueluelhimuke peis tar ineteninanine tang Iesu, temaait gisisir patere uleik, doho Parisi ka hire tasir

<sup>n</sup> 7.20 Jon 8.48; 10.20    <sup>o</sup> 7.22 Uak 17.9-13; KT 12.3    <sup>p</sup> 7.23 Jon 5.8-10,16

<sup>q</sup> 7.27 Jon 7.41; 9.29    <sup>r</sup> 7.28 Mat 11.27; Jon 8.55    <sup>s</sup> 7.30 Jon 7.44

tamatang babatane tar umang lotu ger dedeil tar kusa tane tang Iesu. <sup>33</sup>Doh Iesu ke kula pare, “Inggo u turung uangoul keip tamiuoum me sisikinalik pukur binak, song ru turung la tapokis tar tang siokene ke ualatueha totoguo. <sup>34</sup>Doh inggoum mung turung sir totoguo, bo ahik puk pah mung turung tupara totoguo, doh ahik pono pah mung matoto mung lame tar buturene ru uangoulio.”

<sup>35</sup>Doh gisisir Ju ka uelueldangate katongonguais pare, “Doh iangua re turung laono mara hikeig pahi matotong banga tupara tatanon? A hau! E turung la toro uan uleik i Grik tar butur gera uangoul nogio tamateig, kare turung ualasira tasir tamatang Grik? <sup>36</sup>A hauanguar tengkana maene ke mene sirono pare, inggoum mung turung sir totoguo, bo ahik puk pah mung turung tupara totoguo, doh ahik pono pah mung matoto mung lame tar buturene ru uangoulio?”

### Iesu ke mene tar kodomong tar nitua

<sup>37</sup>Nar uadouhinar marein toro niein uleik roon, kare ter marein pono ra ueltadantiehini, Iesu ke tur kai, kare mene ualeik pare, “Uamaluana tang mai re kamadak e lame totoguo mare inumuon. <sup>38</sup>Mai re tagorong mana totoguo, a kodomene re nor gere heir tar nitua e turung tatading liu tur tar kolonor tamaton, tero hire teil pe ro bolobol.” <sup>39</sup>Wesu e menmene uamatoto tola tar puhonene tar Iabena Dedeil. Doh tar binakonene a Iabena Dedel halana haraha ta heirin, teeit Iesu halana haraha ta uatentur kai keipin tar uinator, bo i muduhia mais ka tagorong mana tang Iesu ra turung kale tar Iabena Dedeil.

### O tamata ka tur uelpakaha tar torikir pain

<sup>40</sup>xO tamata ka longoro tar uelhirenina ke mene pe Iesu, doho gisiamehe tasisina ka kulangua pare, “A tamatene, inggono ter Propet noman.”<sup>y</sup> <sup>41</sup>Doho gisiamehe ka kula pare, “Inggono ter Kristo.”

Bo o gisiamehe puk ra kula harahampe pare, “A Kristo ahik pahe turung la tur i Galili. <sup>42</sup>No uelhire God geke boloin o hire teil pare, ‘A Kristo e turung kotpokoso tur toso bunguna Debit ger toia, kara turung poho toin i Betlehem ter uan geke uangoulin Debit.’” <sup>43</sup>Temaeit o tamata ka tur uelpakahangua tar torikir pain, teeit gisin a kahakaha res ninaman, ra naman tagin pe tang Iesu. <sup>44</sup>Doho gisiamehe tasisina ra marang tur tane, kara kusa tatanon e la tar karabus, bo ahik puk me tang sioko tasisina ke la uahuhut tar kusa tane tatanon.

### O gisiameher tamatang uoum keip tasir Ju ahik pah ra tagorong man

<sup>45</sup>O tamatang babata tar umang lotu ger dedeil ka tapokisila tasir patere uleik, karo Parisi, kara dangataisisina pare, “Ae maene ahikioum pah kung keipime tang Iesu?”

<sup>†</sup> 7.34 Jon 8.21; 13.36    <sup>‡</sup> 7.37 NKP 23.36; Ais 55.1; Jon 4.14    <sup>‡</sup> 7.38 Ais 58.11

<sup>‡</sup> 7.39 Jon 16.7; 20.22; Apo 2.4    <sup>‡</sup> 7.40 Jon 6.14    <sup>‡</sup> 7.40 Banga Toro Bolobolong Ualatut 18.15; 18.18    <sup>‡</sup> 7.41 Jon 1.46    <sup>‡</sup> 7.42 Ker 89.3-4; Mai 5.2

<sup>46</sup> <sup>b</sup>Kara hire tapokisir tamatang babatane tar umang lotu ger dedeil pare, “A menenine ke menegion a i ranantieh, ahik me tang sioko re matot e mene sira tar ueluelhirenine ke menegion.”

<sup>47</sup>Kara dangatar Parisi pare, “Doh inggono ke uelour pono tamiuoum?  
<sup>48</sup> <sup>c</sup>A tang touhir tamatang uoum keip ue mo Parisi ka tagorong mana tatanon? Ahik me tang siok. <sup>49</sup>Bo o maniasine ahik pah ra ate me sisikinalik tena ualatut Moses, God e ate teil manasa tasisin e turung biniris.”

<sup>50</sup> <sup>d</sup>A tang siokor Parisi Nikodemus geke la banga tang Iesu sioun e uangoul tagu pono tar toto tamaton, inggono ke hire toso uanotonono pare, <sup>51</sup>“A ualatutur nagigeig ahik pahe kedanga tar tamata ke kouh tar binaka halana ta longoroahain, kare halana ta atein a haua ke guatain.”

<sup>52</sup> <sup>e</sup>Doh gisit ro uanotonono ka dangata tapokis tatanono pare, “Ge ingga pe a peng Galili pono? Timana toro bolobolo maro atea, ahik pe me propeit re la tur i Galili.” <sup>53</sup>Song ka siokor la tapokisir tamata tonoso uan.

#### A kuaha ka tuparain ke ura keip tar bulout ger le

**8** <sup>1</sup>Iesu ke la tar Siusanang Oliv. <sup>2</sup>Bo naliliuolik puk inggono ke la tapokis tar umang lotu ger dedeil, doho tamata uakapa tun ka siokor la toto uelhir tatanon, kare tabila uahuono, kare menene ualasira tasisin. <sup>3</sup>Doho tamatang ualasira tar ualatut, doho Parisi ka keipime tar kuaha ka tuparain pare, ke uangoul uasa keip tar bulout a le. Doh gisina ka ualahur tatanono tar tur i uoum tasisinar toto tamat, <sup>4</sup>kara hiresina tang Iesu pare, “Ir tang ualafir, a kuahene ka tuparain ke ura keip tar bulout, ahik pah tena bulouton. <sup>5</sup>Doh tar ualatutur nang Moses e kula pare, ‘O kuaha uakapa tun gera guata pare, ra bakbak pousis tar palau.’ Hapengua ro kula pea ring guata peeim?”

<sup>6</sup>Gisina ra dangdangata puk tar marang uelour tang Iesu, maeit ra turung polukusina me puh, re pe siauaion. Bo Iesu puk ke kokolo uahiu, kare uakekene tar bolo keip tar kamot limanane i kot. <sup>7</sup><sup>8</sup>Doh tar binakene ra dangdangata puk pelasina tar puhung dangata tang Iesu, inggono ke tur kai, kare kula tasisina pare, “Mai me tang sioko tamiuoum ge ahik mate guata tagu me niguataniner sa, inggono tere baka uakikilanga me palaua tatanon.” <sup>8</sup>Song ke kokolo poluk Iesu, kare bolo poluk tar kot.

<sup>9</sup>Doh gisine ka ualongoro tang Iesu ka hiliu tantang sisiokongua o mamahoholik baka uoum song tesir gisiameher tamat. <sup>10</sup>Kara hiliu to tar kuaha tang Iesu e tur i uoum tatanon. Doh Iesu ke tur kai poluk, kare dangata tar kuah, “Ir kuah ia kaeisisin? Ahik me tang sioko ke kedanga totomua ko guata uasa?”

<sup>b</sup> 7.46 Mak 1.22   <sup>c</sup> 7.48 Jon 12.42   <sup>d</sup> 7.50 Jon 3.1-2   <sup>e</sup> 7.52 Jon 7.41-42   <sup>f</sup> 8.5 KT 20.10; Ual 22.22-24   <sup>g</sup> 8.7 Ual 17.7

<sup>11</sup> <sup>h</sup>Kare kular kuaha pare, “Ir tamata uleik ahik me tang siok.”

Song ke kula Iesu tatanono pare, “Inggo ahik pono pahu kedanga totomua pare, ko guata uasa, bo ingga o la, doh ahik paho la guata uasa ue o uangoul uasa baka poluk.”

### Iesu tere luh uakubara tar uanene i kot

<sup>12</sup> <sup>i</sup>Iesu ke menmene poluk tasir Parisi, kare kula pare, “Inggo ter luh gere luh uakubara tar uanene i kot, mai re uakeluk totoguo ahik pahe matot e uangoul tar kitup, bo inggon e turung kale tar luh gere heir tar nitua.”

<sup>13</sup> Doho Parisi ka kula tang Iesu pare, “Doh gitie ko mene uamatoto katongo peia pare, ‘Ingga ter tang sioko puk manasa ro matoto mene tar ineteniner man.’ Bo a haua puk ko menegia ahik paha man!”

<sup>14</sup> <sup>j</sup>Kare kula tapokis Iesu pare, “Aa, inggo ku mene katongo nomanaio tar ineteninane, bo ginina puk a man, ge inggo pe u ate ia ru la tur, karu ate ia ru turung la, bo inggoum mung tel, ia ru la turo, kare ia ru turung lao. <sup>15</sup> <sup>k</sup>Inggoum mung uoto kedanga, ra uoto kedanga peisir tamata uakap, bo inggo ahik pahu kedanga tagu me tang siok. <sup>16</sup> <sup>l</sup>Bo getu guato tar kedang inggo u kedanga toro man, teeit inggo ahik pah me paheig, Tamougouo geke heiraha totoguo e uangoul tagu totoguo.

<sup>17</sup> <sup>m</sup>Nami ualatutoum e hire teil pare, ‘Getura hirer tang torikir tamata tar siokonon inet, inggoum mung malar, karung uakeluk tar haua kura hireis rasin.’ <sup>18</sup> <sup>n</sup>Inggo u uoto mene tauete tenagu kalekinale, kare nagu niguata katong, doh Tamougouo geke heiraha totoguo e uoto poul pono tar hire tauete tar kalekinale, kara niguatar nougo?”

<sup>19</sup> <sup>o</sup>Kara dangatanguasina pare, “Ia kae pein tamoumua?”

Kare hire tapokis Iesu, “Inggoum mung tele totoguo ue tang Tamougouo, ge pakung ateoum totoguo, inggoum pakung ate pono tang Tamougouo.”

<sup>20</sup> <sup>o</sup>Iesu ke mene to tar ineteninane tar binaka ke menmene ualafir iuma tar umang lotu ger dedeil e uahuhut tar butur re mokor mani gera bakbakaig tar uahung, bo ahik puk me tang sioko ke tur, kare kusa tane tatanon, teeit na binaka tunono halana te kotpokos.

### Inggoum ahik pah mung matoto mung lame tar buturene ru lao

<sup>21</sup> <sup>p</sup>Iesu ke hire uagiamehe poluk tasir tamata pare, “Inggo u turung hiliu tamiuoum, doh inggoum mung turung sir totoguo, bo inggoum puk mung turung mat teremi niguata uasa, doh ahik pah mung matoto mung lame tar buturene ru lao.”

---

<sup>h</sup> 8.11 Jon 5.14 <sup>i</sup> 8.12 Ais 49.6; Jon 1.4-9; 9.5; 12.46 <sup>j</sup> 8.14 Jon 5.31-32; 7.28 <sup>k</sup> 8.15 Jon 12.47 <sup>l</sup> 8.16 Jon 5.30; 8.29 <sup>m</sup> 8.17 Ual 19.15 <sup>n</sup> 8.18 1Jo 5.9  
<sup>o</sup> 8.20 Jon 7.30 <sup>p</sup> 8.21 Jon 7.34; 13.33

<sup>22</sup> Temaeit gisisir Ju ka ueldangata katongois pare, “A hau! Iesu here turung tung pou katongoin? Maene ke kula sirono pare, ‘Inggoum ahik pah mung matoto mung la tar buturene ru lao?’ ”

<sup>23</sup> <sup>q</sup>Kare hire Iesu pare, “Inggoumur tamat o peng tar uanene i kot, bo inggo u la turuha i Heuen, inggoum o peng gane i kot, bo inggo ahik paha peng gane i kot. <sup>24</sup> Temaeit ku hireo tamiuoum pare, ‘Inggoum mung turung mat teremi niguata uasa, kara niuangoul uasa. Inggoum mung turung mat teremi niguata uasa geta hik pah mung tagorong mana totoguo, ge inggo pe teo.’ ”

<sup>25</sup> Doh gisina ka dangata tatanono pare, “Ge ingga pe te mai?”

Kare hire tapokis Iesu tasisina pare, “Inggo ku hire katongo manasaio tar uakikilangan. <sup>26</sup> Doh inggo nagu bureher mene paku mene uamatotolaig tenami niguata inggoum, bo inggo ku hire puk tasir tamata tar inete ku longoro turig tar tang sioko geke heiriha totoguo, doh inggon e mene toro man.” <sup>27</sup> O tamat ahik pah ka naman manate, ke menmene uamatoto pe Iesu tasisina tang Taman.

<sup>28</sup> <sup>r</sup> Temaeit Iesu ke kula tasisina pare, “Tar binaka rung uakusa kaioum i ran tar Tunar Tamat, inggoum mung turung ate pare, inggo teo, song mung turung ate ponoum pare, tar ineteninanine ru guatagio ahik pah teregu ninamana katong, bo inggo u mene kompe tar inete ke ualatohoig Tamoug totoguo. <sup>29</sup> Doha tang siokene ke heiriha totoguo e uangoul keip totoguo, doh inggon ahik pahe matot e hiliu totoguo me paheig, teeit inggo u uoto guata tar inetenine re malaragion.”

<sup>30</sup> Tar binaka ke mene Iesu tar ineteninanine o bureher tamata ka tagorong mana tatanon.

### **O uelhire gero man o turung luaka liu teres niguata uasar tamat**

<sup>31</sup> Temaeit Iesu ke hire tasir Ju geka tagorong mana tatanono pare, “Gerung ueltada dedempela inggoum, karung uakeluk tun tar haua ku ualsiragio, inggoum tesir tamatang uakuakeluk tunur nouguo. <sup>32</sup> Song mung turung atengua inggoum toro uelhire gero man, doh roono ro uelhire gero man tero turung uatauete tamiuoum tar karabus, karung uangoulung uah.”

<sup>33</sup> <sup>s</sup> Doh gisinar Ju ka hire tapokis pare, “Inggeim o bunguna Abraham, ahik me tang sioko tamiueim ka kalein tar karabus, bo ae maene ro kula ra turung uatauetesieim?”

<sup>34</sup> <sup>t</sup> Kare kula tapokis Iesu pare, “Inggo u hire tun tamiuoum toro man, o tamata uakapa tun gera uangoul keip tar niguata uasa, gisina ra karabus teil manasa tar niguata uasa. <sup>35</sup> A tamatang kalekinale ahik pahe matot e uangoul keip dede tang tanener um, bor tunono tun tera

<sup>q</sup> 8.23 Jon 3.31   <sup>r</sup> 8.28 Jon 3.14   <sup>s</sup> 8.33 Mat 3.9   <sup>t</sup> 8.34 Roum 6.16,20

uangoul keip dedein tar mamang binakalik. <sup>36</sup>Temaeit gete uataueter Tunono tamiuoum, inggoum song rung uangoul uaia tun. <sup>37</sup>Inggou u ate tun tamiuoum ro bunguna Abraham, bo inggoum puk mung marang tung poustotoguo, teeit inggoum ahik pah mung malara tar haua ku ualsiragio. <sup>38</sup>Inggou ku hire tamiuoum tar haua ke ualasiraig Tamoug, bo inggoum mung guata tar haua ke hireig tamamiu.”

<sup>39</sup>“Doh gisina ka hire tapokis tang Iesu pare, “Inggeim king uatubuna tang Abraham.”

Kare kula Iesu pare, “Ge paro bung tuna nomana Abraham tamiuoum, inggoum pakung guata uakeluk sira tar inetenine ke guatagion. <sup>40</sup>Inggou ter tamata ku hire tamiuoum toro man geku longoro turin tang God, bo inggoum puk mung marang tung poustotoguo. Abraham ahik pah ke guata sira tagu pare. <sup>41</sup>“Temaeit inggoum here mung guata kompe tar inete ka guataig ro bung tamamiu katong.”

Bo gisina puk ka hire tapokis pare, “Inggeim ahik pah misiana tasir gisameher keketik ge ahik pah ra ate uamatoto toso tamas. Inggeim mi ate a tamamiu tang God. Inggono ter tang sioko manasampe ring ateieim pare, a tamamiu.”

<sup>42</sup>Kare kula tapokis Iesu tasisina pare, “Ge pare tamamiuoum nomana tang God, inggoum pakung malaelhir pono totoguo, ge inggo pe teru la tur tang God, temaene rung banga tupara inggoum totoguo daan. Inggou ahik pah ku laha teregu nimalara katong. God ke ualatueha totoguo. <sup>43</sup>Doh inggoum ahik pah kung naman manate tar haua ku menmeneio, teeit inggoum ahik pah kung marang longoro uaia tar haua ku mene ualsiragio. <sup>44</sup>“Doh inggoum tosono bung keketik Satan te tamamiuoum ger tang sa. Inggoum mung marang uakeluk tun tar haua re malaraion. Inggon a tang uelpus manasampe ke uakekene pemer binak. Inggono no uelmatana toro uauaman, teeit o uauaman ahik pahoko tagu tatanon. Doh binaka re bohon, inggon e ualasira katongo kompein re baka pe, teeit inggon a bohoboh, tamana ro boh. <sup>45</sup>Bo inggo u uoto hire tamiuoum toro man, temaeit ahikioum pah kung tagorong mana totoguo. <sup>46</sup>“Mai tamiuoum re banot e hire toro mana pare, inggo ku kouh tar niguata uasa? Bo ge pare ku hireo toro man, doh ae maene ahikioum pah mung tagorong mana totoguo? <sup>47</sup>“A tamata ger nang God ke longoro tar uelhire ke hireig God. Bo inggoum ahik pah kung longoro tar haua ke hireig God, teeit inggoum ahik pahoko nang God.”

---

“ 8.39 Mat 3.9    ʋ 8.41 Ais 63.16    ʋ 8.44 1Jo 3.8    \* 8.46 2Ko 5.21; 1Pi 2.22  
ʋ 8.47 1Jo 4.6

### Iesu a i ranantiehe tang Abraham

48<sup>z</sup>O Ju ka dangata tang Iesu pare, “Geting kuleim pare, ingga a peng Samaria, kare hikung liouana uasaia, inggeim ahik pah king kula uaia?”

49Kare kula tapokis Iesu pare, “Ahik me liouana uasa kaein totoguo. Inggo u ueltada tang Tamoug, bo inggoum ahik pah kung ueltada totoguo. 50Inggo ahik pahu marang uairana katongoio, kara ueltadaio, a tang sioko tere malara pare, ra uairanaio, kara ueltadaio, inggono ter tang kedang. 51<sup>a</sup>Doh inggo gine ru hire tun tamiuoum toro man, mai re ueltada, kare uakeluk tun tenagu niualasiro, inggon ahik pahe turung mate tagu, e turung tua dede.”

52O Ju ka kula tang Iesu pare, “Gine daan inggeim song king ate tun toro man, ingga ke hikur liouana uasa! Ge Abraham pe ke mat, karo propeit ka mate pon, doh ingga o kula harahampe pare, ‘Mai re uakeluk, kare ueltada tenagu niualasiro, inggon ahik pahe turung mat.’ ”

53“Ingga o namana ter i ranantiehe tang Abraham ge tubumiueim? Inggono ke mat, karo propet pono ka mat, hape ro nomana pea, ingga te mai?”

54Kare kula tapokis Iesu pare, “Getu uairana katongoio, a uairanon a tabo tengkan. A tang siok geke uairana totoguo, inggono te Tamougou, doh inggoum mung kula tatanono pare nami God. 55Inggoum ahik pah mung ate uaia tun tatanon, bo inggo u ate tatanon. Ge pakene u kulo pare, u tele tatanon, inggo paka bohoboho misiana tamiuoum. Bo inggo u ate tatanon, karu ueltada tar haua re kulaion. 56Tubumioum Abraham ke uahantiehe tun re turung banga pe tar binaka ru lameo, kara heiuing uain ro bala tar binaka ke banga manas.”

57O Ju ka longoro, kara kulangua tatanono pare, “Ingga ahik pah ko banga sikoro baka tang Abraham! Ge ingga pe ahik pah rongo hangaul tolisma baka rongo kirismas.”

58<sup>b</sup>Kare kula tapokis Iesu pare, “Inggo gine ru hire tun tamiuoum toro man, i uoumuhia tar binaka halana Abraham ta pohoin, inggo u uangoul manas.”<sup>c</sup>

59Tar binaka ke mene Iesu tar puhon, o tamata ka kale tenas palau, ra marang bakbak pous tatanon, bo Iesu puk ke uahuahoubour ueltebeirin, kare hiliuingua tar umang lotu ger dedeil.

### Iesu ke guata uaia tar tamat a kut

9<sup>1</sup>Tar binaka re haijala Iesu, inggono ke banga tar tamat a kutung sioun tar binaka ka pohoin. 2<sup>d</sup>Doh no tamatang uakuakelukono ka

<sup>z</sup> 8.48 Mak 3.21-22    <sup>a</sup> 8.51 Jon 5.24    <sup>b</sup> 8.58 Jon 1.1    <sup>c</sup> 8.58 tar puh pare, “inggo teo,” a hangana God ka boloin sioun tono uelhire God    <sup>d</sup> 9.2 Isk 18.20; Luk 13.2,4



dangata tatanon, “Tang Ualasis mai ke uangoul uasa, kare guata uasa, maene a kutur tamatene tar binaka ka pohoin, inggono katongo ue ter toking tinanon?”

<sup>3</sup>Kare hire tapokis Iesu pare, “Inggon ahik pah ter tamatene ke guata uasa, doh ahik pono pah ter toking tinanono kura guata uasa, maene ke kuton. A tamatene ke kut mara ualasisa toin na nitampopokoho God tatanon. <sup>4</sup>Gine daan a marein uaia tun tagigeig tar guata tena kalekinaler tang siokene ke ualatuaha totoguo. A boung e lame tar binak ahik me tang sioko re kalekinale. <sup>5</sup>Gine ru pepe peoane i kot, inggo ter luh gere luh uakubara tar uanene i kot.”

<sup>6</sup>I muduhia ke kula pe Iesu pare, kare lou i kot, kare houara tar nilouina tar koto ke la misianangua tar luai, kare tunahanguaono taninina tar matanar tamatener kut. <sup>7</sup>Song ke hire tar tamatono pare, “La karo la huhu tar koue i Siloam” (A tengkar hangene i Siloam e kula pare, Ualatu). Temaeit gitir tamata ke la huhu, kare tapokisime ke banga uaia manas.

<sup>8</sup>O tamata gesir peng tena uanon, karo gisiameher tamata geke banga tatanono re uoto hinghinga pe tar mani mer inete tasir tamata sioun, ka dangatangua pare, “Inggono ter tamata kompe gianer uoto hing?”

O gisiamehe ka kula pare, “Inggono teon.” Bo gisitir gisiamehe teka kula pare, “Ahik inggono ra banga sira pukin tatanon.”

<sup>9</sup>Doh inggonor tamatono ke mene uahire katongoin pare, “Inggono teene!”

<sup>10</sup>Kara dangatanguasina tatanon, “Hape tun maene ko banga ingga?”

<sup>11</sup>Kare hire tapokisono pare, “A tamat, hangana tang Iesu ke houara tar nilouina tar kot, kare tunaha tar matougou, kare kula totoguo u la huhu tar koue i Siloam, temaeit inggo ku la, doh ahik me manasana ku huhu uakapa peo, karu banga dede puk manas.”

<sup>12</sup>Kara dangata polukusina tatanono pare, “Ia kaeinir tamatonene?” Kare hire tapokisono pare, “Inggono u telengua.”

### **O Parisi ka dangdangata haka tar kut geke guata uaia**

<sup>13</sup>Song ka keipinguasinar tamata tasir Parisi tar tamata geke kut bak. <sup>14</sup>Doh tar binakonene ke houara Iesu tar nilouina tar kot, kare guata uaia tar matanon, a Mareining Pepe Uah. <sup>15</sup>Temaeitingua ka dangdangata hakar Parisi tar tamatono pare, “Hape tun maene ko banga ingga?”

Kare hireono pare, “Inggono ke kale tar luai, kare tunaha tar matougou, karu la huhuo, kare uala dede puk manasar matoug.”

<sup>16</sup>O gisiameher Parisi ka kulangua pare, “A tamatonene ahik pah ke ueltada tar Mareining Pepe Uah, ge inggono pe ahik pahe la tur tang

° 9.3 Jon 11.4    † 9.5 Mat 5.14; Jon 8.12    § 9.6 Mak 8.23

God.” Bo o gisiamhe teka kula pare, “A tamata ger tamata uasa ahik pahe matot e touo me inete sira pare.” Kara la uelpakahanguasina tar torikir pain.

<sup>17</sup>hDoh gisinar Parisi ka dangata uagiamhe poluk tar tamaton pare, “A tamateit ke guata uaia tar matoumua, hape ro kila pea tatanon?”

Kare hire tapokisono pare, “Inggon a Propet.”

<sup>18</sup>O Ju ka tagorong boho pare, inggono pe teger kut, doh gine daan inggon a bang, temaeit gisina ka kila tar toking tinanon. <sup>19</sup>Kara dangata tasrasina pare, “Ter tumiraoumene geura kulain pare, a kut tar binaka ka pohoin? Doh ae maene re bangonene daan?”

<sup>20</sup>Doh rasitir toking tinanono kura hire tapokis pare, “Raeim mira ate, inggonene ter tumiraeim, doh inggon a kut ka poho pein. <sup>21</sup>Bo mira tele puk hape maene ke uiar matanon, kare bang, kaira tele pono mai ke uala tar matanon. Dangata tatanon, inggono deha mahoho manas e matot e mene katong.” <sup>22</sup>Rasitir toking tinanono kura kula puk pare, teeit rasin ura sokoro tasir Ju geka uelhote manasa pesina pare, ge me tang sioko re tagorong mana, kare kula pare, “Tesu ter Kristo,” inggono ra uelueluata liuin tar umang lotu. <sup>23</sup>Temaene kura kular toking tinanono pare, “Dangata tatanon, inggono deha mahoh e matot e mene katong.”

<sup>24</sup>Temaeit tar giameher binak, gisina ka kila tar tamatonene geke kut bak, kara kula pare tatanon. “Ualapagaha katongoia tang God pare, ingga o turung hire toro man. Inggeim mi ate tar tamaton a tamata uasa.”

<sup>25</sup>Kare kula tapokisono pare, “Inggo u tel ge para tamata uasaon, bo ter sioko pukur inete ru ateio pare, inggo a kut, doh gine daan inggo a bang.”

<sup>26</sup>Kara dangatanguasina pare, “A haua ke guataiono totomua? Hape ke guata peono maene ko banga ingga?”

<sup>27</sup>Kare hire tapokisono pare, “Inggo ku hire manasa tamiuoum, doh inggoum ahik pah kung marang longoro totoguo. Ae maene rung marang ualongoro uapoul polukoum? E baka siron, inggoum herung malara pono no tamatang uakuakelukono tamiuoum.”

<sup>28</sup>Doh gisina ka uangingio, kara uamuamin tatanono, kara kula pare, “Ingga tena tamatang uakuakelukon, bo inggeim no tamatang uakuakeluk Moses. <sup>29</sup>Doh inggeim mi ate God ke menmene tang Moses, doh mi tel ia re la turur tamatonene.”

<sup>30</sup>Doh gitir tamata ke hire tapokis pare, “Inggo ku lutarantiehe tunungua kung uelhire uagis poluk peoum pare, mung tele tar tamatene ke guata uaia tar matougou, karung kula pono pare, mung tel, ia re la turon. <sup>31</sup>Inggeig i siokor ate pare, God ahik pahe longoro tasir tamata uasa, bo God e longoro tasir tamata gera ueltada tatanono kara guata

<sup>h</sup> 9.17 Jon 4.19 <sup>i</sup> 9.31 Ker 34.15

tar haua re malaraiion. <sup>32</sup>Doh ke uakekene pemer kot ahik me tang sioko ka longoro kout bakain mono ueluatata pare, ke guata uaia me tamata ger kut tar binaka pohoin. <sup>33</sup>Ge pakene ahik God pahe heiriha tar tamatonene, inggono paka hik pahe guata me inet.”

<sup>34</sup><sup>j</sup>Doh gisisir Parisi ka kula tapokis pare, “Ingga ka pohoia, karo bour keip tar niguata uasa. Ingga tero marang ualasira tamiueim!” Kara uelueltulanguaisina tatanono tar umang lotu.

#### O tamata ge ahik pah ra tagorong man gisina misiana tasir kut

<sup>35</sup>Tar binaka ke longoro Iesu pare, ka uelueltula peion, inggono ke la uelutpara tatanon, kare dangata tatanon, “Ingga o tagorong mana tar Tunar Tamat?”

<sup>36</sup>Kare hire tapokisone pare, “Ir tamata uleik, hire totoguo maionor Tunar Tamat, maeit ru tagorong mana taguo!”

<sup>37</sup>Iesu ke hirengua tatanono pare, “Ingga ko banga tatanon, doh inggono teener tang sioko re menmene keip totomuaene daan.”

<sup>38</sup>Kare kulanguar tamatono pare, “Tamata Noman, inggo u tagorong man.” Kare hatup uahuangua i uoum tang Iesu.

<sup>39</sup>Kare kula Iesu pare, “Ingga ku laha i koto tar me kedang, maeit gisisir kut ra turung bang, kare maisir bang, ra turung kut.”

<sup>40</sup><sup>k</sup>O gisimeher Parisi gera uangoul tagu tang Iesu ka longoro ke kula peono pare, kara dangatangua tatanono pare, “Ingga o kula tamiueim o kut pon?”

<sup>41</sup>Kare hire tapokis Iesu tasisina pare, “Ge paro kut nomanoum, Inggoum paka hik pah mung kouh tar niguata uasa, bo inggoum mung kula harahampe pare, o bang, temaeit inggoum kung kouh.”

#### O uelhire uaranga tar tamatang kauেকে tasir sipsip

**10** <sup>1</sup>Iesu ke kula pare, “Ingga u hire tun tamiuoum toro man, a tamata ge ahik pahe leka uamatoto tur toro pirpirikinar olol, kare leka kout ueltebeir puk, inggon a ueuenau, kara uoto leka uanomo toro um. <sup>2</sup>Bo a tamata gere leke tur tun toro pirik, inggono ter tang kauেকে sipsip. <sup>3</sup>A tamata gere tur kauেকে toro pirik e puka ueleheir tatanono toro pirpirik, doho sipsip ra longor paroko tar uauanar tang kauেকে gete kilkila tang sisiokono tar hangasisin, kare uoum keip tauete tasisin. <sup>4</sup>Doh gete siokor uatauete uakapono tosno sipsip, inggon e uoum keipingua tasisin, doh gisina ra uakeluk tatanon, teene gisina ra longor paroko tar alialinginar uuanon. <sup>5</sup>Doh gisin ahik pah ra matotong uakeluk me tang giamehe siokor tamat, ra turung ualo liu tatanon, teeit gisin ahik pah ra longor paroko tar alialinginar uuanon.”

<sup>j</sup> 9.34 Ker 51.5    <sup>k</sup> 9.40 Mat 15.14

<sup>6</sup>Iesu ke ueluatata tasisina toro uelhire uaranga roon, bo ahik puk pah ka naman manate tar tengkana ro ueluatata roon.

### Iesu ter tang kaueke sipsip

<sup>7</sup>Temaeit Iesu ke hire uapoul poluk pare, “Inggo u hire tun tamiuoum toro man, inggo tero pirik o nasir sipsip. <sup>8</sup><sup>l</sup>O tamata geka la uakikilanga me totoguo gisin o ueuenau, karo uoto leke uanomo tar kale tar mamang inetelik, bo gisis pukur sipsip ahik pah ka longoro tasisin. <sup>9</sup>Inggo tero pirik, doh mair tamata re leke turume totoguo, inggon e turung udeil, kare turung lekleke uelapokise mare sir mena niein uaia. <sup>10</sup>Bor ueuenau e la pukume tar me uenau, kare tung pous, kare mamantou, bo inggo ku lame tar me heir tar nitua mare uoun tunur nitua tasisina uakap.”

<sup>11</sup><sup>m</sup>“Inggo katongo ter tang kaueke uaia tasir sipsip. A tang kaueke tasir sipsip e turung heir katongo tar tukununa tar poul tasir sipsip. <sup>12</sup><sup>n</sup>A tamata gere kalekinale tasir sipsip tar marang mani puk, inggon ahik pah misiana tar tamata gesir nana tun tasisin. Doh gete bangar tamatonene ra bulbulauain tar kaueke tasir sipsip me lo roke gete lame, inggon e turung ualo liu tasir sipsip. Kare me geilgeil ueltebeirir lo roke tasir sipsip, kare ein tasisin. <sup>13</sup>Doha tamatonene ahik pahe namana tun tar kaueke uaia tasir sipsip, teeit inggono ra bulbulaua pukin tar kaueke tasisin.”

<sup>14</sup>“Inggo katongo ter tang kaueke uaia tasir sipsip. Inggo u ate tosnogo sipsip, doh nogo sipsipo ra ate pono totoguo. <sup>15</sup><sup>o</sup>Ter siokono puk tang Tamougou re ate pe totoguo, doh inggo pon u ate tang Tamoug. Doh inggo u turung heir katongo tar tukunug tar poul tasir sipsip. <sup>16</sup><sup>p</sup>Doh inggo nougo gisiamhe ponor sipsip, bo ahik puk pah ra uangoul teil tar ololene, doh inggo u turung keip ualeke ponome tasisinane. Doh gisina ra turung longor paroko tar uauougou, kare turung siokongua pukur olol, kara tang sioko pukur tang kaueke tasir sipsip.”

<sup>17</sup><sup>q</sup>“Doh Tamougou e malaelhirintiehe tun totoguo, teeit inggo u heir tar tukunug, karu turung kale tapokis poluk tar nitua. <sup>18</sup>Inggo teru matoto teil manasampe tar heir me uauia tar heir tereg nitua, kare tar kale tapokis tereg nituaene totoguo ru turung guata pe. Teke ualatoho pe tamougou totoguo ru turung guata pe.”

<sup>19</sup>O Ju ka longoro poluk tar uelhirenin, kare la kahakahangua poluk res ninaman. <sup>20</sup>O burehe tasisina ka kula pare, “A liouana uasa ke hiku tatanon, kare uapopouluana tatanon. Ae maene rung longoroum tatanon?” <sup>21</sup>Bo gisisir gisiamhe teka kula pare, “A tamata geke hikur liouana uasa tatanon, ahik pahe matot e mene tar inete sira pare, e matotor liouana uasa e uauia tar tamata ger kut?”

<sup>l</sup> 10.8 Jer 23.1-2; Isk 34.2-3    <sup>m</sup> 10.11 Ker 23.1; UGO 7.17    <sup>n</sup> 10.12 Apo 20.29  
<sup>o</sup> 10.15 Mat 11.27; 1Jo 3.16    <sup>p</sup> 10.16 Ais 56.8; Isk 34.23    <sup>q</sup> 10.17 Pil 2.8-9

### Iesu ka uelueldein

<sup>22</sup>Tar binakonene a marein uleiking tar lotu i Jerusalem tar namana tapokis sioun tar binak ka pukain kara uamatotoinir umang lotu ger dedeil pare, na uma God. Doha binakon e uoto pokoso to tar binakang pang rom. <sup>23</sup>Doh Iesu e lihila tar umang lotu ger dedeil e haiala tar paranda, ra kilain pare, “Na Paranda Solomon.” <sup>24</sup>Kara la tur uilohonguar Ju tatanon, kara dangata pare, “Mangiha tunur binaka ro hire uakalahara tuna tamiueim pare, ingga te mai tun? Ingga o hire uakalahara tun tamiueim, ge pare te inggar Kristo.”

<sup>25</sup>Kare hire tapokis Iesu pare, “Inggo ku hire manasa tamiuoum, bo inggoum puk ahik pah kung tagorong man. A nitouo geku guatagio tar hangana Tamoug, e ualasira tamiuoum pare, maio. <sup>26</sup>Bo inggoum puk ahik pah mung tagorong man, teeit inggoum ahik pah tesir sipsipir nouguo. <sup>27</sup>Nogu sipsipo ra longor paroko tar uauouguo, inggo u ate tasisin, kare gisina ra uakeluk totoguo. <sup>28</sup>Inggo u heir tasisina tar nitua gere moko dede, doh gisin ahik pah ra mate tagu, kara hik me tang siok re matot e uenaua tur tasisina tar limouguo. <sup>29</sup>Tamouguo ke heir tosnogo sipsipo, inggono ter i ranantiehe tar mamang inetelik, doh ahik me tang sioko re matotong uenaua tosnogo sipsipo tar limana Tamoug. <sup>30</sup>Doh raeim me Tamoug a tang siok.”

<sup>31</sup>Temaene o Ju ka longoro ke mene peono paar, kara kale poluk tenas palaua tar marang bakpous tang Iesu. <sup>32</sup>Kare kula Iesu tasisina pare, “Inggo ku guata tun tar bureher kalekinale uaia, hingia me sioko taninina rung marang bakpous uelhirioum totoguo?”

<sup>33</sup>“Kara hire tapokisir Ju pare, “Inggeim ahik pah mi marang bakpous totomua tar palau, teeit ko guata pea tar kalekinale uaia, bo inggeim mi marang bakpous totomua, teeit ingga ko uelsigal tang God, karo kula pare, a siokono tatanon, ge ingga pe a tamata puk ahik paha God.”

<sup>34</sup>“Kare hire tapokis Iesu tasisina pare, “A puh ka boloin tenami ualatutoum, God ke kula pare, ‘Inggoum o god.’ <sup>35</sup>Doho bolobolo gero nang God ge ahik paho matotong uapalih, o hire teil pare, maisir tamata gera kale tono uelhire God, ‘Gisina tesir god.’ <sup>36</sup>Doh ae maene rung kula inggoum totoguo ku uelsigala tang God. A hau! Teeit ku kula peo pare, ter Tuna God? Inggo ter tang sioko ka kedangaio, kara ualatuehaioane i kot. <sup>37</sup>Doh ge ahiko pah ku guata tar inete ke malarai Tamouguo tar kuat, song ahikoum pah mung tagorong mana totoguo. <sup>38</sup>“Bo gete ku guata inggo tar haua ke guataig Tamoug, gitiempe ahik peoum pah mung tagorong mana totoguo, bo mung tagorong mana kompe tar inete geru guatagio. Song mung turung ateoum, karung naman manate pare,

† 10.28 Jon 3.16; 6.39    § 10.33 KT 24.16    † 10.34 Ker 82.6    ¨ 10.38 Jon 14.10-11

Tamouguo e uangoul tokaha keip totoguo, doh inggo u uangoul tokaha keip tang Tamoug.”

<sup>39</sup>Doh gisinar Ju ka marang kusa tane poluk tang Iesu, bo inggono puk ke hiliu tasisin.

<sup>40</sup>Song ke la tapokis Iesu, kare la sairkout tar kodom i Jodan tar butur ke uahuu uakikilanga to Jon tasir tamat, teke la uangoulono tar buturuon, <sup>41</sup>karo bureher tamata ka lame tatanon, kara me kula tatanono pare, “Jon ahik pah ke touo tagu me inet, bo a mamang inetelik puk ke hiregiono tagigeig tar tamatene, ginin a mana noman.” <sup>42</sup>Doh tar buturuon o bureher tamata ka tagorong mana tang Iesu.

### Lasarus kaluana Iesu ke mate manas

**11** <sup>1</sup>A tang siokor tamat hangana tang Lasarus e momouh. Inggon e uangoul tar uan uleik i Betani, tar uan re uangoul Maria me tahina kuaha Marta. <sup>2</sup>Maria ter kuaha geke ding tar uaiuai amiamuh tar kekener Tamata Noman, kare tuntunaha ueltebeir keip tar uluna taninin. Lasarus ger momouh, inggono te tatahinalik tun tas Maria me Marta. <sup>3</sup>Temaetit ramatahina kuaha kura heirila toro uelhire tang Iesu pare, “Tamata Noman! Kaloumua gero malauelhirintiehe tunin e momouh.”

<sup>4</sup>Tar binaka ke me longoro Iesu, kare kulangua pare, “O momouh roon ahik paho uamata tang Lasarus, roon o turung ualasira tasir tamata mara banga tena uiniator o God, karo ualasira uakalahara tar uinatoro ger nanar tuna God.” <sup>5</sup>Iesu e malauelhirintiehe tun toso matmatatahinalik Marta me tahina kuaha Maria, doh Lasarus. <sup>6</sup>Bo tar binaka puk ke ate peono pare, Lasarus e momouh, inggono ke uangoul baka poluk tar uaneit re uangoulin tar torikir marein. <sup>7</sup>Song ke kula Iesu tosno tamatang uakuakeluk pare, “Inggeig i la tapokis i Judia tar uan i Betani.”

<sup>8</sup>Doh no tamatang uakuakelukono ka kula pare, “Ahik paha puhung barah tar binaka ka marang bakbak pousur tamatang tar uonono totomua tar palau, doh ingga gine poluk ro uiliauh tar marang tapokis i Judia?”

<sup>9</sup>Kare kula tapokis Iesu pare, “A pisar e pid tur tar liuo e tuka tar reiu. Gete sabalar tamata tar marein, inggon ahik pahe matotong tukain, teeit inggon e kalaharar matana tar luh ger nanar uanenei kot. <sup>10</sup>Bo me tang sioko gere sabala tar boung, inggon e turung tukain, ge ahik pe me luh re poul tatanono tar banga uakubar.” <sup>11</sup>Iesu ke mene baka pare, kare la mene tumana poluk, “Kalougigeig Lasarus e hohou, bo inggo puk u la turung ualagur tatanon.”

<sup>12</sup>Doh no tamatang uakuakelukono ka hire tapokis pare, “Tamata Noman, ge pakene e hohou pukuon, inggono pake arian, kare uia.” <sup>13</sup>No

∨ 10.40 Jon 1.28   ∞ 11.1 Luk 10.38-39   × 11.2 Jon 12.3   ∨ 11.4 Jon 9.3

tamatang uakuakeluk Iesu ka namana pare, Iesu ke kula nomana tang Lasarus e hohou noman, bo Iesu ke kula tang Lasarus ke mat.

<sup>14</sup> Temaeit Iesu ke la mene uakalaharangua tasisina pare, “Lasarus ke mat. <sup>15</sup> Bo inggo puk ku namana tamiuoum, karu uaha pono pare, inggo ahik pah ku uangoul keip tatanono tar binakon, maeit rung turung tagorong manoum, bo ti la kompe tatanonene daan.”

<sup>16</sup> <sup>z</sup> Doh Tomas gera kilkila ponoin tang Didimas ke kula tasir gisiameher tamatang uakuakeluk pare, “Auia! Inggeig i siokor la uakeluk tar tang ualasira mari la siokor mata keipeig tatanon.”

**Iesu ke kula pare, “Inggo ter nitua tapokis, inggo ter nitua.”**

<sup>17</sup> Tar binaka ka la pokoso manasa Iesu i Betani, inggono ke longoro kout pare, ke karuh manasar toueitir marein ka keu manasa pein Lasarus. <sup>18</sup> I Betani e uahuhut i Jerusalem e banoto tar touonor kilomita. <sup>19</sup> O bureher Ju ka lame tar me uamamahoul tas ramatahina kuaha Marta me Maria re sir peis tara tatahisilik. <sup>20</sup> Doh tar binaka ke longoro Marta pare, Iesu e la manasame, inggono ke tauete tar la uelupara kout tatanon. Bo Maria teke uangoul uoum ium. <sup>21</sup> Marta ke kulangua tang Iesu pare, “Tamata Noman! Ge pakene o uangoul tagua, tatahiguliko paka hik pahe mat. <sup>22</sup> Bo inggo u atempeene daan, God e turung heir tar huar inete ro dangataia tatanon.”

<sup>23</sup> Doh Iesu ke kula pare, “Tatahimulika e turung tentur tapokis, kare tua.”

<sup>24</sup> <sup>a</sup> Doh Marta ke kula tapokis pare, “Inggo u ate pare, inggon e turung tua tapokis tar uadouhinar marein menia tasir tamata uakap.”

<sup>25</sup> Kare kula poluk Iesu tang Marta pare, “Inggo ter nitua tapokis, doh inggo ter nitua. Mais ka tagorong mana totoguo, doh ka mate manas, ra turung kale tar nitua. <sup>26</sup> Doho tamata uakapa gera uangoul, kara tagorong mana totoguo ahik pah ra turung mat. Marta ingga o tagorong mana tar puhonene?”

<sup>27</sup> <sup>b</sup> Marta ke hire tapokis pare, “Aa! Tamata Noman! Inggo u tagorong man ingga ter Kristo, a Tuna God geka heirihainane i kot.”

**Iesu ke ueldolomo kirkiring tun**

<sup>28</sup> Marta ke mene baka tar puhonene, kare la tapokisingua tang tahina kuaha tang Maria, kare la menmene hamas tatanono me pahen. Marta ke hire tatanono pare, “A tang ualasira gala, doh inggono ke dangata totomua.” <sup>29</sup> Maria ke longoro kompe ke hire pe tahina kuaha pare, kare tentur kaia uateuteuel, kare la uelhir tang Iesu.

<sup>30</sup> Bo Iesu puk halana haraha te me pokoso tar uanonene, e uangoul harahampe tar butur geke la uelupara to Marta tatanon. <sup>31</sup> Doh gisisir

---

<sup>z</sup> 11.16 Mak 14.31    <sup>a</sup> 11.24 Jon 6.40    <sup>b</sup> 11.27 Jon 6.69

Ju gera uanguangoul keip, kara uamamahoul tang Maria ka uakeluk tatanono tar binaka ke tentur uateuelon, kare tauet. Gisina ra naman e lang kiring toono tar keu.

<sup>32</sup>Bo Maria e lang la uelhir tang Iesu. Doh tar binaka ke la ueltupara manasa peono tang Iesu, inggono ke la hatup uahiuangua tar kekenon, kare kula pare, “Tamata Noman! Ge pakene o uangoul tagua tatahiguliko pake haik pahe matotong mat.”

<sup>33</sup>Gine ke banga pe Iesu tang Maria pare, ke kiring pe, kare gisisir Ju ka la keipime tatanono ka siokor kiring pon, Iesu ko uelsukuntiehe tun ro balan, kare marang kiringingua pon. <sup>34</sup>Kare dangatanguaono Iesu tasisina pare, “Ia kung keuoum tatanon?” Kara hiresina pare, “Tamata Noman! Lame, me bang.” <sup>35</sup>Iesu ke kiring. <sup>36</sup>Temaeit gisisir Ju ka kulangua pare, “Bang! Inggono tena nimalaelhir tatanon a uleik tun.”

<sup>37</sup>Bo o gisiamehe puk tasisina ka kula pare, “Inggono ke guata uaia tasisiner kut, kara banga uaia, bo ae maene ahikiono pahe marang poul tang Lasarus mare haik pahe mat?”

#### Iesu ke uatua tapokis tang Lasarus

<sup>38</sup>Iesu, inggono ke hagou uasantiehe tun poluk, kare la toro lebangang uamokong mat, inggonor keu o lebang, karo palau o uleik tera uauain tanein toro matana ro lebang. <sup>39</sup>Kare kula Iesu pare, “Uain liu toro palau.”

Doh Marta ge tatahinalik Lasarus ke hire pare, “Tamata Noman! Gane e turung amuh pikir beng geke karuh manasa per toueitir marein ka keu peion!”

<sup>40</sup>Doh Iesu ke kula tatanono pare, “Ahiko pah ku hire baka uoum totomua pare, ‘Ge paro tagorong mana, ingga o turung banga tena nitampopokoho God?’ ”

<sup>41</sup>Maeit gisina ka uain liu toro palaua toro lebang, song ke tada kai Iesu i ran, kare kula pare, “Tamoug, inggo u uatakai tun totomua ko me longoro pe totoguo. <sup>42</sup>Inggo u ate totomua o uoto longoro totoguo. Bo inggo u mene keip puk tar inetenina tasir tamatasine, maeit gisina ra turung tagorong mana pare, ingga ko heiriha totoguo.”

<sup>43</sup>I muduhia ke mene baka pe Iesu pare, Kare kula ualeik kirkiring tun i rana pare, “Lasarus, tauet!” <sup>44</sup>Doh inggonor mat ke tauet. Doha limanon, doha keken a niauih uiloho tar mahar gomon, karo mahar giameh o niauih uiloho pono toro lunon.<sup>d</sup>

Kare kula Iesu tasisina pare, “Luaka liu tar gomomonit tatanon, karung uamaluana tatanono gere la.”

<sup>c</sup> 11.37 Jon 9.6-7    <sup>d</sup> 11.44 nas niguatar Ju tar binaka ra keu tar tukununar tamat



### O tamata uleik ka uelhote tar tung pous tang Iesu

<sup>45</sup> O bureher Ju geka latagu me tang Maria, ka banga tar haua ke guatain Iesu, gisina ka tagorong mana tatanon. <sup>46</sup> Bo o gisiamehe puk tasisina ka la tasir Parisi, kara hire tasisina tar haua ke guatain Iesu. <sup>47</sup> Temaeit gisisir Parisi, karo patere uleik ka tabila, kara kila toto tasir mamahoholiking Ju, kara dangata pare, “Hape ri guata pe inggeig? A tamatene ke touo tar bureher inet. <sup>48</sup> Geti uamaluaneig tatanono tar guata tar ineteninanine, o tamata uakapa tun ra turung tagorong mana tatanon, kara turung langua mer tamatang Roum, kara me kale liu tar umang lotu ger dedeil tagigeig, doh nagi pang uan!”

<sup>49</sup> A tang siokor tamat a hangana tang Kaiapas, inggono tenas uleikir pater tar binakon, inggono ke kula tasisina pare, “Inggoum ahik pah mung ate me inet! <sup>50</sup> Inggoum ahik pah mung bang huara pare, auiantiehe tun tar tang siokor tamata gete mate tasir tamata uakap, kare tar pang uan uakapa geta mamantouoin.”

<sup>51</sup> Kaiapas ahik pah ke mene tar ninamanonene me pahen, inggono tenas uleikir pater tar binakono ke hirhire uoum teil pe tono uelhire God misianar propet pare, “Iesu e turung mata tar poul tasir tamatang Ju, <sup>52</sup> doh ahik pah tasisina pukur Ju, bo inggono ke mata pono tar keip toto tapokis tosno bung keketik God geka taltaliah, kare guata tasisina pare, a tang siok.”

<sup>53</sup> Temaeit tar marein kompeon, gisina ka uakekene manasa tar halata tar tung pous tang Iesu. <sup>54</sup> Temaeit Iesu ahik manasa pahe la uakalahar tunin i uantinanina tasir Ju, inggono ke hiliu tar buturuon, kare la tar uan e uahuhut tar butur padenene tar uan ra kilain i Epraim, kare uangoul tar buturuono mesno tamatang uakuakeluk.

<sup>55</sup> Binaka ko uahuhut manasain ros nieinir Ju, Leke Liu ro Mat, o bureher tamatang tar pang uanono ka la i Jerusalem tar uadelauana katongois tang God. <sup>56</sup> Doho tamata ra sir kompe tang Iesu iuma tar umang lotu ger dedeil, kara ueluel dangata katongois pare, “Hape rung namana peoum, inggono ke la tagumpeme toro niein uleik rone?” <sup>57</sup> Bo o patere uleik puk, karo Parisi ka heir manasa tar ualatoho pare, “Gete me tang sioko re ate, ia kare uangoul Iesu, inggon e me hire tasisina, song ra la kusa tanesina tatanon e la tar karabus.”

### Maria ke ding tar uaiuai amiamuh tar kekene Iesu

**12** <sup>1</sup> A tonomo baka polukur marein, song ra guatain ro niein, “Leke Liu ro Mat,” Iesu ke la i Betani tar butur re uangoul Lasarus

<sup>e</sup> 11.45 Jon 7.31    <sup>f</sup> 11.46 Luk 16.31    <sup>g</sup> 11.52 Jon 10.16    <sup>h</sup> 11.53 Jon 5.18

<sup>i</sup> 12.1 Jon 11.1,43

(Lasarus tege ke uatua tapokisin Iesu). <sup>2</sup>J<sup>j</sup>Doho niein uleik ka ein tokaha keipinisina tang Iesu nareiu tar buturuon. Doh Marta teke poul tar sik tar niein, doh Lasarus ter tang sioko ponor tamata ke ein keip tang Iesu. <sup>3</sup>k<sup>k</sup>Doh Maria ke keipime iuma tar uaiuai a muhiantiehe tun e tuka koutula i uantinin, a i ranar bulauan, a nituha keip toro dodoukulik ra kilain o nard. Inggono ke ding tar uaiuaia tar kekene Iesu, kare tuntunaha ueltebeir keip tar uluna taninin. Doha amuhunar uaiuaia ke amuh pirik uakapane iuma tar um.

<sup>4</sup>Doh na tang siokor tamatang uakuakeluk Iesu, Judas Iskariot ter tamata gere turung heir tang Iesu toro mat, ke kula pare, <sup>5</sup>“Ae maene ahikir uaiuaieit pah ka uabulauain mara heirigir mani tasir tiome?” A uaiuaion a i rana tunumpe. <sup>6</sup>Bo Judas puk ahik pah ke namana tun tar poul tasir tiome, inggono ke mene puk tar puhonene, teeit inggon a ueuenau, ge inggono pe tere kaukeke tenas manir tamatang uakuakeluk, kare uoto uenaua katongo tapokis taninin.

<sup>7</sup>Iesu ke longoro ke kula peono tar puhonene, kare kula tapokisingua pare, “Uamaluaana tar kuahene. Auia tun tatanono tar uamoko tanik tar uaiuai amiamuhene totoguo mare moko tanikono tar marein gera turung keuio. <sup>8</sup>l<sup>l</sup>O tiome ra turung uangoul tagu tamiuoum tar mamang binakalik, bo inggo ahik pahu matot u uangoul tagu tamiuoum tar mamang binakalik.”

### O patere uleik ka uelhote tar tung pous tang Lasarus

<sup>9</sup>O manai tamata ka longoro pare, Iesu e pepe i Betani, temaeit gisina ka la tar banga tatanon, doh ahik pah tatanono puk, bo tang Lasarus pono geka uatua tapokisin. <sup>10</sup>Temaeit o patere uleik ka uelhote tar tung pous pono tang Lasarus. <sup>11</sup>m<sup>m</sup>Teeit o bureher Ju ka banga tar inete ke guatain Iesu tang Lasarus, kara hiliuingua tasisin, kara tagorong mana puk manasa tang Iesu.

### Iesu ke leka sirala i Jerusalem misiana tar toia

<sup>12</sup>Doh nar uagiamehener marein, o manaiar Jus ka lame i Jerusalem toro nieining Leke Liu ro Mat, ka longoro pare, Iesu e lame i Jerusalem. <sup>13</sup>n<sup>n</sup>Temaeit gisina ka kale tenas rang deit, kara tauete tar ueltupara to tar lele tatanon, kara kulkula ualeik teil pare,

“Uatakai tang God!

God guata uaia tar tang sioko geke laha tar hanganar Tamata  
Noman!

<sup>j</sup> 12.2 Luk 10.40    <sup>k</sup> 12.3 Luk 7.37-38    <sup>l</sup> 12.8 Ual 15.11    <sup>m</sup> 12.11 Jon 11.45

<sup>n</sup> 12.13 Jon 1.49

God guata uaia tenas toiar Israel!”

*Ker 118.25-26; Sepanaia 3.15*

<sup>14</sup>Iesu ke tupara tar donki, kare tabilala i rana tatanon. Te misiana puk ro uhire teil pe no uelhire God geke boloin sioun pare,

<sup>15</sup>“Ahik pah mung sokoror tamatang Jerusalem!

Nami toiaoum, gine re lame, e tabila teil i rana tar kalanar donki.”

*Sekaraia 9.9*

<sup>16</sup>“Doh tar binakonene no tamatang uakuakeluk Iesu ahik pah ka naman manate, bo i muduhia puk binaka ke tentur tapokis pe Iesu, kare heir God tar uinatoro tatanon, song ka namana tapokisisina pare, no uelhire God geke boloin sioun o hire teil tang Iesu, kare tar inetenine ka guataig tatanon.

#### **O tamata ka ueluatata tar inete ke guatain Iesu**

<sup>17</sup>Doho tamatasine ka uangoul tagu tar binaka ke uatua tapokis Iesu tang Lasarus, kare kula tatanono pare, e tauete liu toro lebangang mat, gisina ka hirhire ueltebeir tar haua ke guatain Iesu. <sup>18</sup>Temaene gisinar manaa ka la uelhir tatanon, teeit gisina ka longoro tar nitouo uleikene ke guataion. <sup>19</sup>Temaait o Parisi ka ueluelmene ueltebeir katongois, kara kula pare, “Kung banga manasoum! Ahik baka puk me inete re turung kodkodoho tagigeig! Ge o tamata uakapa peane i koto ra uakeluk kompe tatanon!”

#### **O gisiameher tamatang Grik ra marang banga tang Iesu**

<sup>20</sup>O gisiameher tamatang Grik pono geke lame i Jerusalem tar me lotu toro niein uleiking Leke Liu ro Mat. <sup>21</sup>Gisina ka la uelhir tang Pilip ger peng Betsaida i Galili, kara kula tatanono pare, “Tamata uleik, inggeim mi marang banga tang Iesu.” <sup>22</sup>Pilip ke la hirengua tang Andru, kaura la hire tokahangua tang Iesu.

<sup>23</sup><sup>P</sup>Iesu ke hire tapokisingua tasrasina pare, “A binaka gine ke pokoso manasa tar Tunar Tamat tar kale tar uleikir uinator. <sup>24</sup><sup>q</sup>Inggo gine ru hire tun tamiuoum toro man, gete haikir uatunar raes-uit pah ra uapungain i kot, kare mat, inggon e moko sira kompe pare, a siok, bo gete maton, inggon e turung tungara, kare turung bour uaburehe tun. <sup>25</sup><sup>r</sup>Mair tamata re malaelhirintiehe tun tena nitua katongene daan re uangoul pe, na nituaon e turung rouo tatanon, bo mair tamata re tokouasain tena nituaene daan re uangoul pe, inggon e turung kale dedengua tena nitua.

<sup>26</sup>Mai re kalekinale totoguo inggon e uakeluk totoguo, doh inggono

° 12.16 Jon 2.22    P 12.23 Jon 13.31-32; 17.1    q 12.24 1Ko 15.36    r 12.25 Mat 16.25

nagu ualualatueo e turung uangoul tagungua tar mamang buturulik ru uangoulo. Doh Tamouguo e turung uatakai tang mai re kalekinale totoguo.

### Iesu ke mene tauete katongo tonu mat

<sup>27</sup>Gine daan inggo u hagou uasa tunumpe. Hapengua ru mene peo? Ue a hau u mene pare, Tamoug! Uauheil totoguo tar binakene? Bo ahik pukumpe, temaene pe ku la uamatotoha inggo tar binakene, maru me kale uelmahing. <sup>28</sup>Tamoug! O heir tar uinatoro tar hangoum!”

Doha uau ke mene turuha i Heuen pare, “Inggo ku uinatoro manasa tar hangoug, karu turung heir uapoul poluk.”

<sup>29</sup>Doho manai tamatasine ra uahuhut ka longoro tar uauon, karo gisiamehe ka kulangua pare, inggon a pil. Bo o gisiamehe teka kula pare, “Inggon a anggelou ke menmene tatanon.”

<sup>30</sup>Bo Iesu puk ke kulangua pare, “O uelhire rone kung longoroium daan, ahik paho poul totoguo roon o poul tamiuoum. <sup>31</sup>Gine daana ter binaka manasa tar kedanga tasir tamatane i kot, kare gine daana ter binaka pono ra turung baka taueteinir tamatene re uoum keip i kot. <sup>32</sup>“Doh binaka ra uakusa kaiiao i ran ter binakono ru turung reih totome inggo tasir tamata uakap.” <sup>33</sup>“Iesu ke mene tar puhonene mare ualasira hape re turung mate pe.

<sup>34</sup>“O manai ka kula tapokisingua pare, “Nami ualatuteim e hire teil tang Kristo ahik pahe matotong mate tagu. Doh ae maene ro kula pare, ‘A Tunar Tamata ra turung uakusa kaiain i ran? Maionener Tunar Tamat?’ ”

<sup>35</sup>“Song ke kulangua Iesu pare, “A luh e uangoul tagu puk tamiuoum tar sisikinalikir binak, temaeit la teil keip dedempela tatanon tar binaka ro kale teil tar luh mare haikir kitup pahe matot e ragom tane totomua. Bo mai re la teil tar kitup ahik pahe ate ia re lihihia. <sup>36</sup>“Temaeit mung tagorong mana tar luh tar binaka re moko teil harahono tamiuoum, maeit inggoum tesno tamatar luh.”

### O bureher Ju ka tagorong mana tang Iesu

I muduhia ke mene pe Iesu pare, kare haijala uaounguain tasin. <sup>37</sup>Doh Iesu ke guata to tun tar nitou uleikinine tar matas tunusin, doh ahikimpe pah ra tagorong man. <sup>38</sup>Temaeit a haua geke menein Aisaia ger propet ke pokoso nomana tun, ke kula pe pare,

“Tamata Noman! Mai re tagorong mana tenami uelhireieim?  
Mai ka ualairain tena nitampopokohor Tamata Noman?”

*Aisaia 53.1*

\* 12.27 Ker 6.3; 42.5; Mat 26.38 † 12.32 Jon 3.14 ‡ 12.33 Jon 19.6 § 12.34 Ker 110.4; Ais 9.7; Dan 7.14 ¶ 12.35 Jon 8.12 × 12.36 Epe 5.8

<sup>39</sup>Temaeit ahik ponosina pah ka tagorong mana tun, teeit Aisaia ke kula pono pare,

<sup>40</sup>“God ke uakut tar matasisin,  
kare uaboubour teres ninamanasin,  
maeit a matasisin ahik pahe matotong bang,  
kara hik pah ra matotong naman manate,  
kara la tapokisime totoguo  
tar uauia tasisin.”

*Aisaia 6.10*

<sup>41</sup><sup>v</sup>Aisaia ke mene puk pare, teeit inggono ke banga tena uinatoro Iesu, kare mene uamatoto tatanon.

<sup>42</sup><sup>z</sup>Bo o burehe nomanamper tamata, karo tamata uleiking tasir Ju ka tagorong mana tang Iesu, bo teeit kompe tasir Parisi, gisin ahikingua pah ra marang hire uakalahara pare, ra tagorong mana tatanon. Teeit gisina ra sokoro geta ueluelutuluu turis tenas umang lotur Ju. <sup>43</sup><sup>a</sup>“Doh gisinar Ju ra malarantiehe uain tun tar uatakai gere la katongo tapokis tasir tamat, tang gere la tang God.

#### **O uelhire geke mene tauetein Iesu o turung kedanga tenas niguatar tamat**

<sup>44</sup>Iesu ke kula ualeik kirkiring tun pare, “Mai ke tagorong mana totoguo ahik pah ko tagorong mana puk totoguo, bo ingga o tagorong mana pono tang maiene ke ualatueha totoguo. <sup>45</sup><sup>b</sup>Mai ke banga totoguo inggono ke banga pono tang maiene ke heiriha totoguo. <sup>46</sup>Inggo ku la siraha tar luhane i kot, maeit mai re tagorong mana totoguo ahik pahe uangoul tar kitup. <sup>47</sup><sup>c</sup>Doh ge me tang sioko ke longoro tenagu uelhireo, doh ahik pah ke ueltad, kare uakeluk taninin, inggo ahik pahu turung kedanga tatanon, teeit inggo ahik pah ku laha tar me kedanga tasir tamatane i kot, bo inggo ku laha tar me uaudeil tasisinane i kot.”

<sup>48</sup>“A binaka tar kedang e moko tas mais ka de totoguo, kara de tenagu uelhireo. Doha uelhirenina tere turung kedanga tasisina tar uadouhinar marein. <sup>49</sup>Doha inetenine ku ualasingragio ahik paha nouguo katong. Tamouguo geke heiriha totoguo teke ualatoho totoguo, hape ru mene pe, kare hape ru hire pe. <sup>50</sup>Doh inggo u ate teil pare, a nitua gere moko dedengua e la tur tar ualatohor nang Tamouguo. Temaeit a haua ru menegio ter inetenina ke heirig Tamouguo tar mene tauet.”

#### **Iesu ke uahuhu tar kekeis no tamatang uakuakeluk**

**13** <sup>1</sup>Tar binaka ko uahuhutin ro niein uleik ro nasir Ju, ra kilain, “Leke Liu ro Mat,” Iesu ke ate manasa pare, ke uahuhut manasain

<sup>v</sup> 12.41 Ais 6.1    <sup>z</sup> 12.42 Jon 9.22    <sup>a</sup> 12.43 Jon 5.44    <sup>b</sup> 12.45 Jon 14.9    <sup>c</sup> 12.47 Jon 3.17

na binaka tar hiliuane i kot, kare la tapokis tang Taman. Inggon e uoto malaelhirintiehe tun tasir tamatasine i koto gesir nanon, kare malaelhirintiehe tun tasisin e la tuka tar uadouhinar nituaane i kot. <sup>2</sup><sup>d</sup>Iesu mesno tamatang uakuakeluk ra ein nareiu, doh Satan e hounhoun ualahur manasa tang Judas Iskariot ger tuna Saimon mare heir tang Iesu tasir uelmatan. <sup>3</sup><sup>e</sup>Iesu e ate tang Tamana ke heir tatanono tar nitampopokoh a i rana tar mamang inetelik, doh inggono ke la tur tang God, kare la tapokis poluk tang God. <sup>4</sup>Temaeit toro niein nareiu Iesu ke tentur, kare liur liu toro uakikilangana ro hikhiku, kare kale toro uakadak, kare pus tang roon. <sup>5</sup>Song ke itu tar kodomo tar nouh, kare uakekene tar uabusa tar kekeis no tamatang uakuakeluk, kare uakadaka keip toro uakadaka gere pus teilin.

<sup>6</sup>Iesu ke lame tang Saimon Pita, kare dangata Pita tatanono pare, “Tamata Noman, ingga o marang uahuhu pono tar kekeiguo?”

<sup>7</sup>Doh Iesu ke hire tapokis pare, “Ingga ahik paho naman manate tar haua ru guataioene daan, bo i muduhia puk song ro naman manate ingga.”

<sup>8</sup>Kare kula Pita pare, “Ingga ahik tun paho matotong uahuhu tagu tar kekeiguo!”

Kare kula tapokis Iesu pare, “Gete haiko pahu uahuhu tar kekeimua, ingga ahik paho matotong uangoul tabara dede tagu totoguo!”

<sup>9</sup>Saimon Pita ke kula tapokisingua pare, “Tamata Noman ahik paho uahuhu puk tar kekeiguo, bo o uahuhu pono tar limouguo, karo luguo pon!”

<sup>10</sup><sup>f</sup>Kare kula Iesu pare, “A tamata geke huhu uoum, inggon e uahuhu puk tar keken, ge a tukununa peon a delauan. Doh inggoum o delauan, bo ahik puk pah inggoum uakap.”

<sup>11</sup>Ge Iesu pe e ate teil tang mai re turung heir tatanono tasir uelmatan, temaeit ke mene sira pare, “Bo ahik puk pah inggoum uakapar delauan.”

<sup>12</sup>Tar binaka ke uahuhu uakapono tar kekeisisin, inggono ke hiku tapokis tono hikhiku, kare tabila tapokis, kare dangata tasisina pare, “Inggoum kung naman manate tar hauene ku guataio tamiuoum?”

<sup>13</sup>Inggoum mung kila totoguo pare, ‘A Tang Ualasisir, kara Tamata Noman,’ doha puhon a kodkodoho tun, teeit inggo te paara ru baka pe. <sup>14</sup><sup>g</sup>Ge pare, nami Tamata Nomanoum totoguo, kare nami Tang Ualasiroum ke uahuhu tar kekeimium, inggoum mung turung uelueluahuhue katongo ponosium tar kekeimiu. <sup>15</sup><sup>h</sup>Inggo ku guata puk marung banga to inggoum, karung guata sira misiana ku guata peo tamiuoum. <sup>16</sup><sup>i</sup>Inggo gine ru hire tun tamiuoum toro man, a tamatang kalekinale ahik pah

<sup>d</sup> 13.2 Luk 22.3; Jon 13.27    <sup>e</sup> 13.3 Jon 3.35; 16.28    <sup>f</sup> 13.10 Jon 6.64,70-71; 15.3

<sup>g</sup> 13.14 Mat 20.28; Luk 22.27    <sup>h</sup> 13.15 Pil 2.5; Kol 3.13; 1Pi 2.21    <sup>i</sup> 13.16 Mat 10.24

tere i rana tena tang kaukek. Doha ualualatue ahik pono pah tere i rana tang mai ke ualatue tatanon. <sup>17</sup>Doh gine daan kung ate peoum tar inetenin, inggoum mung turung kale tar niguata uايا getung guata taninin.”

<sup>18</sup><sup>j</sup>“Inggou ahik pah ku menmene uamatoto tamiuoum uakap, inggo u ate tas mais ku kedangais. Bo git mare pokoso tunono toro mana ka bolo peiono sioun pare, ‘Mai geira ein tokaha raeim torogo bereito inggono tere turung tar mud totoguo.’ <sup>19</sup><sup>k</sup>Inggou u hire tanika puk tamiuoum, maeit gete kotpokoso manasar inetonene, inggoum mung turung tagorong mana pare, inggo teo. <sup>20</sup><sup>l</sup>Inggou gine ru hire tun toro man, mai re uaha uangoul me tamata geru heirihai, inggon e turung uaha uangoul totoguo, doh mai re uaha uangoul totoguo, inggon e turung uaha uangoul pono tang maene ke ualatueha totoguo.”

<sup>21</sup>I muduhia ke mene baka pe Iesu pare, inggono ko uelsuk uasa tun ro balana, kare hire uakalahara puk manasa pare, “Inggou gine ru hire tamiuoum toro man. A tang sioko tamiuoum e turung tangana totoguo tasir uelmatan.”

<sup>22</sup>Doh no tamatang uakuakelukono ka ueluelbangeis, teeit gisin ahik pah ra ate tang maionene re kulkula uamatotoin Iesu. <sup>23</sup>A tang sioko na tamatang uakuakeluk Iesu gere malaelhirintiehe tunin, inggono tere tabila uahuhut tatanon. <sup>24</sup>Saimon Pita ke sarala tatanono tar dangata uايا tang Iesu pare, mai tunumpe re kulkula uamatotoion. <sup>25</sup>Temaeit inggonene na tamatang uakuakelukono Iesu ke in uahuhutula tatanon, kare dangata pare, “Tamata Noman maion?”

<sup>26</sup>Iesu ke hire tapokis pare, “Inggou u turung uahu toro mahar bereit tar kap. Doha tamata geru heirio tang roon, inggono teon.” Maeit Iesu ke kale manasa toro mahar bereit, kare uahu tang roon, kare heir tang Judas Iskariot ger tuna Saimon. <sup>27</sup><sup>m</sup>Doh ahik me manasana ke kale peono toro mahar bereit, kare hiku manasa Satan tatanon. Kare kula Iesu tatanono pare, “A inete gero marang guataia, ingga o guata uateuel.”

<sup>28</sup>Bo ahik puk me tang sioko tasisinasine ra ein ke naman manate, ae maene ke kula sira Iesu paara tang Judas. <sup>29</sup>Inggono Judas tere uoto kauেকে tenas manisin, temaeit o gisiamhe ka namana pare, ke kulono tatanon e la bulaua me ineteng toro niein ue me inete ra me heirig tasir tiome. <sup>30</sup>Judas ke kale toro mahar bereit geke heirin Iesu, kare uahiauain tasisina. Tar binakonene a boung.

### **Iesu ke heir tar timuhur ualatut tosno tamatang uakuakeluk**

<sup>31</sup><sup>n</sup>Tar binaka ke hiliu Judas, kare kulangua Iesu pare, “Gine daan a Tunar Tamat e kale manasa tar uleikir uinator, doh God ke kale tur pono

<sup>j</sup> 13.18 Ker 41.9   <sup>k</sup> 13.19 Jon 14.29; 16.4   <sup>l</sup> 13.20 Mat 10.40   <sup>m</sup> 13.27 Jon 13.2  
<sup>n</sup> 13.31 Jon 12.23

tar uleikir uinatoro tar tun. <sup>32</sup>°Gete kale tur God tar uinatoro tatanon, God e turung heir tar uinatoro tar keketik bulout tatana katong. God e heir ualahur tun tar uinatoro tatanon.”

<sup>33</sup>°Kare kula poluk Iesu pare, “Nogo keketik, inggo u pepe keip puk tamiuoum tar sisikinalik tunene daan. Inggoum mung turung sir totoguo. Inggou gine ru hire tamiuoum ku hire uoum pe tasir Ju, a buturene ru laio inggoum ahik pah mung matoto mung lame.”

<sup>34</sup>°“Inggou gine ru heir tamiuoum tar timuhur ualatut, mung uelmalauelhiresioum misiana ru malauelhirintiehe tun peo tamiuoum, temaeit inggoum mung uelmalauelhiresioum. <sup>35</sup>Getung uelmalauelhiresioum o tamata uakapa tun ra turung atengua pare, inggoum tosnogo tamatang uakuakeluko.”

### Pita e turung uolih boho pare, e tele tang Iesu

<sup>36</sup>Saimon Pita ke dangata tang Iesu pare, “Tamata Noman! Ia ro laa?”

Kare hire tapokis Iesu pare, “Inggou ahik paho matotong uakelukume gine daan tar buturene ru laio, bo i muduhia ingga o turung uakelukume totoguo.”

<sup>37</sup>Pita ke dangata poluk pare, “Tamata Noman, ae maene ahiko pahu matotong uakeluk totomuaene daan? Inggou u turung heir katongo tar tukunug tar mata totomua!”

<sup>38</sup>Kare dangata tapokis Iesu pare, “Inggou o namana sirampe o turung heir katongo tar tukunum tar mate totoguo? Inggou gine ru hire totomua toro man, tar binaka halanar paolo te koror, ingga o turung uolih uatouono pare, o tele totoguo.”

### Iesu tenas leler tamata tar la tang Tamanon

**14** <sup>1</sup>Iesu ke hire tosnogo tamatang uakuakeluk pare, “Inggoum ahik pahe pikir balamiu, karung malioh, mung tagorong mana kompe tang God, karung tagorong mana pono totoguo. <sup>2</sup>Tena uma Tamougou a bureher tina um, doh inggo gine ru la kaleuatoro menami butuoum. Inggou pake haik pahu hire tamiuoum, ge pakene ahikinina paha man. <sup>3</sup>Doh getu kaleuatoro uakapa manaso tenami butuoum, inggo u turung tapokisiha, karu me kale tamiuoum marung me uangoul taguoum totoguo tar buturene ru uangoulo. <sup>4</sup>Doh inggoum mung ate, ia ru lao, kare tar lele re la tar butuoum.”

### Iesu ter lel re la tang Taman

<sup>5</sup>Temaeit Tomas ke la kula pare, “Tamata Noman! Inggeim ahik pah mi ate ia ro laa, bo hape puk maring ate inggeim tar lel?”

° 13.32 Jon 17.5    ° 13.33 Jon 7.33-34    ° 13.34 Jon 15.12,17; 1Jo 3.23; 2Jo 5

° 14.3 Jon 12.26



<sup>6</sup>Kare hire Iesu tatanono pare, “Inggo ter lel, o man, kara nitua. Ahik me tang siokor tamata re matotong la dedengua pukume tang Tamouguo e matoto gete lih tur tunume totoguo. <sup>7</sup>Ge parung ate uaia nomanoum totoguo, inggoum mung turung ate uaia pono tang Tamouguo. Bo gine puk daan inggoum mung ate tatanon, karung banga tatanon.”

<sup>8</sup>Pilip ke dangata tatanono pare, “Tamata Noman uamakaha tamiueim tang Tamoum maring uaheim.”

<sup>9</sup>Kare kula tapokis Iesu pare, “Pilip, inggo ku uangoul keip manasa tamiuoum tar puhung barah, doh ingga halana harahampe to ate, maio? Mair tamata ke banga totoguo, inggono ke banga tang Tamouguo. Bo ae maene ro dangata tar marang banga tatanon? <sup>10</sup>Ingga ahik paho tagorong mana pare, inggo u uangoul teil tang Tamoug, doh Tamouguo e uangoul teil totoguo? A menenine ru uelhiregio ahik paha nouguo katong, bo ginin a nang Tamouguo gere uangoul teil totoguo. <sup>11</sup>Mu tagorong mana kompe totoguo. Getu hireo pare, inggo u uangoul teil tang Tamoug, doh Tamouguo e uangoul teil totoguo ue mung tagorong mana kompe gekung banga manasa peoum tar haua ku touogio.”

<sup>12</sup><sup>x</sup>Inggo gine ru hire tun tamiuoum toro man, mai re tagorong mana totoguo, inggon e turung guata pono tar siokonor kalekinalenine ku guatagio ue e matotong guata ponompe me uleik uainir kalekinalenine taninine, teeit inggo u turung la tang Tamoug. <sup>13</sup>Doh inggo u turung guata tar haua rung dangata tolagioum tar hangouguo maeit na uinatoro Tamouguo ra turung banga toin tar tun. <sup>14</sup>Getung dangata tolaoum me inete tar hangouguo, inggo u guat.”

### Isu ke ualapagah e turung heir tar Iabene Dedeil

<sup>15</sup><sup>z</sup>Getung malaelhiroum totoguo inggoum mung turung longoro tar haua ku ualatohogio. <sup>16</sup>Doh inggo u turung dangata tang Tamoug e heir me tang giameher nipou, mare uangoul tagu tamiuoum tar mamang binakalik. <sup>17</sup><sup>b</sup>Inggono ter Iabene Dedeil ger uauaman. O tamatang gane i kot ahik pah ra malara tatanon, teeit gisin ahik pah ka bang ue ra ate tatanon. Bo inggoum mung ate tatanon, teeit inggon e uangoul tokaha keip tamiuoum, doh inggon e turung uangoul i lolono tamiuoum. <sup>18</sup>Doh inggo ahik pahu matotong hiliu ueltebeir puk tamiuoum misiana tar legur. Inggo u turung tapokisime tamiuoum. <sup>19</sup>Tar sisikinalik tunur binak, o tamatang gane i kot ahik pah ra matotong banga uapoul totoguo, bo inggoum mung turung banga totoguo a tua, doh inggoum pono mung turung tua. <sup>20</sup><sup>c</sup>Doh gete pokoso manasar mareinon, inggoum mung turung ate pare, inggo u uangoul teil tang

<sup>s</sup> 14.6 Jon 11.25; Roum 5.1-2    <sup>t</sup> 14.7 Jon 8.19    <sup>u</sup> 14.9 Jon 12.45; Kol 1.15; Hib 1.3

<sup>v</sup> 14.10 Jon 12.49    <sup>w</sup> 14.11 Jon 10.38    <sup>x</sup> 14.12 Mak 16.19-20    <sup>y</sup> 14.13 Mat 7.7;

Jon 15.16    <sup>z</sup> 14.15 Jon 15.10; 1Jo 5.3    <sup>a</sup> 14.16 Jon 14.26; 15.26; 16.7    <sup>b</sup> 14.17 Jon 16.13

<sup>c</sup> 14.20 Jon 17.21-23

Tamoug, doh inggoum mung uangoul teil totoguo, doh inggo u uangoul teil tamiuoum. <sup>21</sup>Mai re ate tenagu ualatoho, kare uakeluk taninin, inggono tere malauelhirintiehe tun totoguo. Tamouguo e turung malauelhirintiehe pono tang mai re malauelhirintiehe totoguo, doh inggo u malauelhirintiehe pono tatanon, karu uamakaha katongoio tatanon.”

<sup>22</sup>Doh Judas (ahik pah Judas Iskariot) ke dangata pare, “Tamata Noman! Ae maene ro turung uamakaha katongoia tamiueim puk, doh ahik paho uamakaha katongoia tasir tamata uakapa tunane i kot?”

<sup>23</sup>Doh Iesu ke kula tapokis pare, “Ge me tamata re malauelhirintiehe tun totoguo, kare longoro tun tenag niualasiro Tamouguo e turung malauelhirintiehe pono tatanon, doh raeim mira laha tatanon, kaira me tuha mena mira uma tatanon. <sup>24</sup>“Mair tamat ahik pah ke malauelhirintiehe tun totoguo, inggon ahik pah ke longoro tar haua ku ualasiiragio. A ineteninanine ku ualasiiragio ahik paha nouguo katong, ginin a nang Tamouguo geke heirihia totoguo.”

<sup>25</sup>“Inggo u hire puk tamiuoumene daana ru uangoul keip haraha pe. <sup>26</sup>Bo a nipoul e la tur tar Iabena Dedeil gere turung heirihain Tamouguo tar hangouguo. Inggon e turung ualasiira tamiuoum tar mamang inetelik marung namana dedeoum tar mamang inetelik geku hiregio tamiuoum. <sup>27</sup>Doh inggo gine ru hiliu to toro hiarouo tamiuoum, kara uelhiarouonene ru heirio ahik pah misiana tar uelhiarouonine ra uoto guataigir tamata uakapane i kot, temaeit ahik pahe duhur balamiu ue mung sokor.”

<sup>28</sup>“Doh inggoum kung longoro manasa ku hire peo tamiuoum, ‘Inggo gine manasa ru hiliu, bo u turung tapokis polukumpeme tamiuoum.’ Ge parung malauelhiroum totoguo, inggoum mung uah, teeit inggo u la tapokis tang Tamoug, ge Inggono pe a i rana uain totoguo. <sup>29</sup>“Doha inetenin halana te kotpokos, inggo ku hire tanika puk manasa tamiuoum, maeit gete kotpokoso manasar inetonene, inggoum mung turung tagorong man. <sup>30</sup>Inggo ahik pahu matotong menmene keip tamiuoum tar puhung barah, teeit a tamata uleik gere kauke teilane i kot, gine manasa re lame, inggon ahik mena nitampopokoho me i rana uain totoguo. <sup>31</sup>Doho tamata uakapa tunane i koto ra turung iatengua pare, inggo u malauelhirintiehe tun tang Tamoug, temaene ru guata sira tunuo tar mamang inetelik ke ualatoho peono totoguo. Gon tur, ti la manas.”

#### Iesu ke uelhire uaranga tolain toro uoho to ranan

**15** <sup>1</sup>“Inggo tero uoho bino nomana tun, doh Tamouguo te tanener iomo bino. <sup>2</sup>“Inggon e uoto bura liu tar ranananine totoguo ge ahik pahe uoto ua tagu, kare uoto bura uadelauana tar ranananine re uoto ua mare bungbunguan.”

<sup>d</sup> 14.24 Jon 7.16    <sup>e</sup> 14.28 Jon 20.17    <sup>f</sup> 14.29 Jon 13.19    <sup>g</sup> 15.2 Mat 3.10

<sup>3</sup>“Bo inggoum kung delauana manas, teeit ku heir peo tar ualasilanine tamiuoum. <sup>4</sup>Mu uangoul tabara dede totoguo, doh inggo u turung uangoul tabara pono tamiuoum. A ranan ahik pahe matot e bungbunuana katong, e bungbunuana kompe gete tur teil toro tukunun. Ter siokono kompe, ahik me kukuanana re matotong ua katongo tamiuoum, e matoto getung uangoul tabaroum totoguo.”

<sup>5</sup>“Inggoum tero uoho bino, doh inggoum ter ranan. Mais ra uangoul tabara totoguo, doh inggo u uangoul tabara tasisin, gisin ra turung bungbunuanantieh. Bo gete taboio gisin ahik pah ra matotong guata me inet. <sup>6</sup><sup>h</sup>Doh mais ahik pah ra uangoul tabara totoguo, gisina te misianangua tar rananane ra uoto bura liu turig toro tukunun, kare turung makmakoro, kara bakalaig toro hue. <sup>7</sup>Ge rung uangoul tabara dedeoum totoguo, karung uakeluk tar haua ku ualsiragio, inggoum mung banotong dangata me inete ueltebeir rung malarai, inggoum ra turung heirisoum. <sup>8</sup><sup>i</sup>Gininanine e ualasila tar uinatoror nang Tamougou, teeit ke bunguanantiehe per kukuanana tamiuoum, kare ualasila pono pare, inggoum tosnogo tamatang uakuakeluko.”

<sup>9</sup>“Doh inggo u malaelhirintiehe tun tamiuoum misiana re malaelhirintiehe pe Tamougou totoguo. Gine daan uangoul keip dedengua tar uelmalaelhirener nouguo. <sup>10</sup><sup>j</sup>Doh ge pare, kung uakeluk nomanoum tenagu ualatuto, inggoum mung uangoul keip dedengua tar uelmalaelhirener nouguo ter siokono ku uakeluk tun peo tena ualatoho Tamoug, temaeit a uelmalaelhirener nanon e moko dedengua totoguo.”

<sup>11</sup>“Inggoum ku hire tamiuoum mare turung moko tun reg niuaho tamiuoum, kare la unga uaha tun remi niuah. <sup>12</sup><sup>k</sup>Doh inggo gine ru ualatut tamiuoum; “Uelmalaelhiresioum misiana ru malaelhirintiehe peo tamiuoum.” <sup>13</sup><sup>l</sup>Doh ter i ranan nimalaelhirintiehe tun tar tamata toso bung uanoton, inggon e heir tar tukununa katongo tasisin. <sup>14</sup><sup>m</sup>Inggoum teso bung kalougou getung uakelukoum tar ualatut geku hiregio tamiuoum. <sup>15</sup>Doh inggo ahik manasa pahu kila uapoul tamiuoum pare, o tamatang kalekinale puk, teeit a tamatang kalekinale ahik pahe ate tar haua re guatain na tang kauek. Temaeit inggo u kilangua tamiuoum pare, o bung kaloug, teeit inggo ku hire luaka uakapa tar mamang inetelik geke hireig Tamoug totoguo. <sup>16</sup>Inggoum ahik pah tekung kedanga totoguo, bo inggo teku kedanga tamiuoum, karu heir tamiuoum tar kalekinale tar la, karung ua me bureher kukuanana. A kukuanana gere moko dedengua. Song re heir Tamougou tar mamang inetelik tamiuoum gerung dangata tolaig tar hangougou. <sup>17</sup><sup>n</sup>Doh nag ualatuto tamiuoum teene, mung uelmalaelhiresioum.”

<sup>h</sup> 15.6 Mat 7.19; 13.42 <sup>i</sup> 15.8 Mat 5.16 <sup>j</sup> 15.10 Jon 14.15; 1Jo 2.5 <sup>k</sup> 15.12 Jon 13.34

<sup>l</sup> 15.13 Jon 10.11; 1Jo 3.16 <sup>m</sup> 15.14 Mat 12.50 <sup>n</sup> 15.17 Jon 13.34

### Iesu ke ualatut tosono tamatang uakuakeluk

18 “Gete siokor tokouasaisir tamatang gane i kot tamiuoum, inggoum mung namana huarangua kompe pare, gisina ke tokouasa uakikilangais totoguo. 19<sup>o</sup>Doh ge paro peng koto nomanoum o tamatang gane i kot ra turung malauelhirintiehe tun tamiuoum misiana re malauelhirintiehe peono toso uanoton. Bo inggo ku kedanga liu manasa tamiuoumane i kot. Temaeit inggoum ahik pah ter namiu tatanon. Temaeit puk re tokouasaisir tamatang gane i koto tamiuoum. 20<sup>p</sup>Mu namana huara kompe ku hire peo tamiuoum. Ahik me tamatang kalekinale re i rana liu tena tang kaek. Geta guata uasar tamata totoguo, gisina ra turung guata uasa pono tamiuoum. Bo geta longorosin, kara uakeluk tar haua ku ualasiragio, gisina ra turung longor, kara uakeluk pono tar niualasirar namiuoum. 21 Gisina ra turung guata tar hagaraninanine tamiuoum, teeit totoguo, ge gisina pe ra tele tang maiene ke heiriha totoguo. 22 Ge pakene ahiko pah ku me menmene baka uoum tasisin, gisina pake haik pah ra kouh teres niguata uasa. Doh gine daan gisin ahik manasa me lele ra lihin tar touaouo teres niguata uasa. 23<sup>q</sup>Mai re tokouasain totoguo inggon e tokouasa ponoin tang Tamouguo. 24 Ge pakene ahiko pahu me kalekinale kudul i uantinanina tasisina tar inetenine ahik me tang sioko re matot e guat, gisina pake haik pah ra kouh keip teres niguata uasa. Bo gine daan gisina ka bangampe tar inete ku guatagio, kare tokouasa dedempeis tamiraeim me Tamoug. 25<sup>r</sup>Bo ginina ke pokoso puk, maeit a haua geka boloin tenas ualatutusin e pokoso nomana tun. A tabo tengkana tun re tokouasa peisisina totoguo.”

26<sup>s</sup>“Binaka re lahar nipoul geru heir turuhaio tang Tamoug, inggono ter labena ger uauaman gere la tur tang Tamouguo. Inggon tere me hirhire tauete teil totoguo. 27Doh inggoum mung turung hirhire tauete teil pono tasir tamata totoguo, ge inggoum pe kung uangoul keip tur totoguo tar uakekenen.”

**16** 1 “Inggo u malar ahik remi nitagorong manoum pahe punga kout, temaeit ku hireo tamiuoum tar ineteninanine. 2<sup>t</sup>Ge inggoum pe ra turung uelueltula liu turusiuoum tenas umang lotur Ju, doha binak e turung pokosome tas mais ra tung pouis tamiuoum ra turung namana pare, ka poul tang God tar uahung. 3<sup>u</sup>Gisina ra guata tar inetenina tamiuoum, teeit gisina ra tele tang Tamouguo ue totoguo. 4<sup>v</sup>Bo inggo u hire tanika puk tamiuoum tar inetenin, maeit gete la matoto manasainir binaka tasisina tar guata tar inetonene, inggoum mung turung naman manatengua kompe tar haua ku hireio tamiuoum. Inggo ahik pah ku

<sup>o</sup> 15.19 Jon 17.14    <sup>p</sup> 15.20 Jon 13.16    <sup>q</sup> 15.23 Luk 10.16    <sup>r</sup> 15.25 Ker 35.19; 69.4

<sup>s</sup> 15.26 Jon 14.26    <sup>t</sup> 16.2 Mat 24.9; Luk 6.22; Jon 9.22    <sup>u</sup> 16.3 Jon 15.21

marang hire tamiuoum tar ineteninanine tar uakikilangan, teeit inggo ku pepe keip tamiuoum.”

### Na kalekinaler Iabena Dedeil

<sup>5</sup>“Inggo gine ru la tapokis manasa tang mai geke heiriha totoguo, ahik me tang sioko tamiuoum re dangat, ‘Ia ru lao?’ <sup>6</sup>Doh gine daan inggoum mung uangoul keip tar niueldolom. <sup>7</sup>Bo inggo gine ru hire tun tamiuoum toro man, romio uiaoum getu hiliuo tamiuoum, teeit gete haiko pahu hiliu, inggonor Nipoul ahik pahe matotong laha tamiuoum. Bo getu hiliuo, inggo u la turung heiriha tatanonor Nipoul tamiuoum. <sup>8</sup>Doh, gete la manasahaon, Inggon e me turung uakouh tasir tamata uakapa tunane i koto teres niguata uasa, kare ualasira uakalahar tar huar ineter kodkodoh, doh tena nikedanga God. <sup>9</sup>A Iabene Dedeil e uakouh tenas niguata uasasin, teeit gisin ahik pah ra tagorong mana totoguo ger Kristo. <sup>10</sup>Kare ualasira uakalahara pono tar huar ineter kodkodoh, teeit inggo u tapokis tang Tamoug tar uan ge ahikoum pah mung matotong banga uapoul totoguo. <sup>11</sup>”Doha Iabene Dedeil e ualasira uakalahara pono tena nikedanga God, teeit a tamatang uoum keipane i koto ka kedanga manasain.”

<sup>12</sup> <sup>x</sup>“Inggo nagu bureher uelhire ru marang mene baka polukig tamiuoum, bo a burburehentiehe puk tamiuoum tar longorene daan. <sup>13</sup>Bo gete la pukuhar Iabene ger uauaman, inggono tere me uoum keip tamiuoum toro uauaman. Inggon ahik pahe me mene tena uelhire katong, bo inggon e me mene tauete puk tar hua ke longoroin, kare hire tamiuoum tar inete re turung lame. <sup>14</sup>Doh inggonor Iabena Dedeil e keipiha tar uinatoro totoguo, teeit inggon e kale teil tar hua ku meneio, kare hire taninina tamiuoum. <sup>15</sup>A mamang inetelik ger nang Tamougou a nouguo, temaetie ku kula siro pare, a Iaben e turung kale tar hua ku meneio, kare hire tananina tamiuoum.”

### A niueldolom e turung lame, song re lamer niuah

<sup>16</sup> <sup>y</sup>“Ahik me manasan, kare haik manasoum pah mung banga uapoul totoguo, kare haik me manasan, karung me banga tapokisoum totoguo.”

<sup>17</sup>Doh no gisiameher tamatang uakuakelukono ka ueluedangata katongonguais pare, “A hauanguar tengkana, maeit ke mene Iesu pare? Inggono ke hire tagigeig pare, ‘Ahik me manasan, kare haik manasoum pah mung banga uapoul totoguo, kare haik me manasan, karung me banga tapokisoum totoguo,’ kare kula pono pare, ‘teeit inggo u la tang Tamoug.’ <sup>18</sup>A hauanguar tengkanar puhonene, ‘Ahik me manasan?’ Inggeim ahik pah king naman manate tar hua ke meneion.”

† 16.7 Jon 14.16    \* 16.11 Jon 12.31    x 16.12 1Ko 3.1-2    † 16.16 Jon 14.19

<sup>19</sup>Iesu ke ate pare, gisina ra marang dangata tatanono tar puhonene, tmaeit ke kulono tasisina pare, “Inggoum mung ueluehdangata katongosioum, a haua tunur tengkana, maeit ku meno pare, ‘Ahik me manasan, kare haik manasoum pah mung banga uapoul totoguo, kare haik me manasan, karung me banga tapokisoum totoguo?’ <sup>20</sup>Inggou gine ru hire tun tamiuoum toro man. Inggoum mung turung kiring, karung maligom. Bo o tamata uakapa pukane i koto ra turung uahantiehe tun. Inggoum mung turung ueldolom, bo a niuehdolomo pukur emiuoum e turung uapalih tar niuah. <sup>21</sup>Tar binaka re marang pohor kuah, inggono ke pokoso manasa na binaka tar kale uelmahing, bo binaka puk re poho uakapon, inggon e malabobour tar uelmahing, teeit inggono ke uahantiehe tun ke kotpokoso manasa per keketikane i kot. <sup>22</sup>Inggono ter siokono puk tamiuoum. Gine daan inggoum mung ueldolomo tun. Doh inggo u me turung banga poluk tamiuoum, doh inggoum mung turung uah, ahik me tamata re matot e kale liu teremi niuahoum. <sup>23</sup>“Doh tar mareinonene inggoum ahik pah mung turung dangata uapoul me inete totoguo. Inggou u uamana tun tamiuoum. Tamougou e turung heir tamiuoum tar haua rung dangata tolagioum tar hangougou. <sup>24</sup>Doh ke tukene daan, inggoum halana tung dangata tola me haua tar hangougou. Dangat! Marung turung kale inggoum, maeit re la unga uaha tun remi niuaha inggoum.”

### Iesu ke pehuara manasa tar koto uakap

<sup>25</sup>“Inggou ku me mene keip puk tamiuoum tar uelhire uarang. Bo a binak e turung lame, ter binakon inggo ahik pahu turung uelhire uaranga tola me inet, inggo u me turung uelhire luaka tar mamang inetelik tamiuoum tang Tamoug. <sup>26</sup>Ter binakono rung dangata tolaoum tar mamang inetelik tar hangougou tang Tamougou, inggo ahik pahu kula pare, u dangata ueleheir tamiuoum me inete tang Tamoug. <sup>27</sup>“Tamougou katongompe re malauelhir tamiuoum, teeit inggoum mung malauelhirintiehe tun totoguo, karung tagorong mana pare, inggo u la tur tatanon. <sup>28</sup>Inggou teru la tur tang Tamoug, karu lahane i kot, doh gine daan inggo u hiliu polukane i kot u la tapokis tang Tamoug.”

<sup>29</sup>Song gisis no tamatang uakuakeluk Iesu ka kulangua pare, “Gine daan, ingga song ko mene luaka tun, ahik pah ko uelhire uarang. <sup>30</sup>Inggeim song king bang paroko ponene daan pare, ingga o ate uakapa tun tar mamang inetelik, doh ingga o uoto hire tauete uakikilanga tar inete re marang dangatainir tamat. Teenina teke guata tamiueim, maeit king tagorong mana pare, ingga o la tur tang God.”

<sup>z</sup> 16.23 Mat 7.7    <sup>a</sup> 16.27 Jon 14.21,23

<sup>31</sup>Doh Iesu ke kula tapokisingua tasisina pare, “Song kung tagorong manene daan? <sup>32</sup><sup>b</sup>Ualongorongua, a binak e lame, doh inggono gine manas, doh inggoum mung turung uelueltageih ueltebeir. Inggoum mung la kahakaha tonomio uan, doh inggoum mung turung hiliu totoguo me paheig. Bo ahik pukumpe pah me paheig, teeit Tamougou e uangoul keip totoguo.

<sup>33</sup><sup>c</sup>Inggou ku hire puk tamiuoum tar ineteninanine, maeit mung turung uangoul keipoum tar uelhiarouor nouguo. Doh gane i kot, inggoum mung turung kale tar uelmahing, bo mung uaongolo kompesioum, karung uah. Ge inggo pe gine ku pehuara manasa tar koto uakap.”

### Iesu ke lotu tang Taman

**17** <sup>1</sup>I muduhia ke mene uakapa baka pe Iesu, inggono ke banga kariatig i Heuen, kare kula pare, “Tamoug a binaka gine manasa ke pokos, uatakaiantiehe tunungua tar hanganar Tum, maeit re turung uatakaiantiehe tunungua ponono tar hangoumua. <sup>2</sup>Ge ingga pe ko heir tatanono tar nitampopokohong kauek a i rana liu tasir tamata uakap, maeit re turung heirono tar nitua gere moko dedengua tasir tamatasine ko heirisia tatanon. <sup>3</sup><sup>d</sup>Doha nitua gere moko dedengua, o tamata gera kale tar nituaonene, gisina ra turung ate totomua, ingga ter tang sioko manasamper God noman, karo ate pono tang Iesu Kristo geko heirihaia. <sup>4</sup><sup>e</sup>Inggou ku heir tar uleik tunur uinatoro totomua gane i kot, ku uakuakapa hihir tun pe tar kalekinale geko hiregia totoguo. <sup>5</sup><sup>f</sup>Tamoug! Uatakaiantiehe tunungua totoguo i uoum totomua menia tar uinatoro geku uangoul keipimeio totomua binaka halanar kot te pokos.”

<sup>6</sup>Inggou ku ualasira tun hape ro baka pea tasisine ko heirisia totoguoane i kot. Gisin o noumua. Inggou ko heir tasisina totoguo, gisina ka longoro tun, kara uakeluk tenang uelhirea. <sup>7</sup>Gine daan gisina song ka ate pare, a mamang inetelik geko heirigia totoguo e la tur totomua. <sup>8</sup>Inggou ku ualasira tasisina tar uelhire geko heirigia totoguo, doh gisina ka kale taninin. Gisina ra ate uaia tun pare, inggo tekou la tur nomanaha totomua, kara tagorong mana pono pare, ingga ko heiriha totoguo.”

<sup>9</sup>Inggou u lotu tasisin. Inggou ahik pahu lotu tasir tamata uakap, bo inggo u lotu puk tasisine ko heirisia totoguo, teeit gisin o noumua. <sup>10</sup>Gisine uakapa tun totoguo o noumua, kare gisis uakapa tun totomua o nouguo, doha hangougou e turung kale uinatoro to tasisin. <sup>11</sup>Doh gine daan inggo u laha totomua, inggo ahik pahu uangoul manasa tunane i kot, bo gisina ra turung uangoul dedeane i kot. Tamamiueim ingga a dedeil. Uaudeil tasisina tar nitampopokohonor hangoum tar hangene

<sup>b</sup> 16.32 Mat 26.31,56    <sup>c</sup> 16.33 Jon 14.27; Roum 5.1; 1Jo 5.4    <sup>d</sup> 17.3 1Jo 5.20

<sup>e</sup> 17.4 Jon 4.34    <sup>f</sup> 17.5 Jon 1.1

ko heiria totoguo, maeit gisina ra la misiana pare, a tang sioko misiana tagiraeigir tang sioko pe. <sup>12</sup>Binaka ku uangoul keipo tasisin, inggo ku kauke, karu uauheil tasisina tar hangene ko heiria totoguo, inggo ku kauke tun tasisin, bo a tang sioko puk tasisina ka uamatotoin pare, e heil, maeit o bolobol geke boloin o la turung pokoso tun toro man.”

<sup>13</sup>“Inggo gine manasa ru laha totomua, bo u lotu tanika baka kompe tar inetenine ru uangoul haraha peane i kot, maeit regu niuah e la uoun tunungua tar koloususin. <sup>14</sup>Inggo ku heir tasisina tenang uelhirea, doho tamatane i koto ke tokouasais tasisin, teeit gisin ahik paho tamatang gane i kot te misiana kompe totoguo ahik pono paha peng gane i kot. <sup>15</sup>Inggo ahik pahu dangata totomua tar kale liu tasisinane i kot, bo u lotu kompe mara kapil uaiasisin, kara uheil tar tang sa. <sup>16</sup>Doh gisin ahik paho peng gane i kot ter siokono kompe totoguo ahik pono paha peng gane i kot. <sup>17</sup>Uadeheil tur tanika tasisina toro man tonongo uelhire gero man. <sup>18</sup>Inggo ku heir tasisinane i kot ter siokono kompe ingga ko heir ponohe totoguoane i kot. <sup>19</sup>Doh inggo ku heir katongo manasaio Totomua tar poul tasisina mara heir katongo ponoisisina Totomua, maeit gisina ra turung dedeil tun toro man.”

#### **Iesu e lotu tasir tamata uakapa gera turung tagorong mana tatanon**

<sup>20</sup>“Inggo u lotu tosnogo tamatang uakuakeluk, bo ahik pah tasisina puk tas mais ponompe ra turung tagorong mana totoguo tar ualansirar nasisin. <sup>21</sup>Tamoug, inggo u lotu pono mara uangoul sirasin a tang siok misiana ro uangoul teil pea totoguo, doh inggo u uangoul teil totomua. Inggo u lotu pono mara uangoul teil tokahasina tagiraeig tokah. Song, ra turung tagorong manar tamatane i koto pare, ingga ko heiriha totoguo.”

<sup>22</sup><sup>j</sup>“Inggo ku heir tasisina tar siokono komper uinatorene ko heiria totoguo, maeit gisina ra turung uangoul sir a tang sioko misiana tagiraeigir tang sioko pe. <sup>23</sup>Inggo u turung uangoul teil tasisina, doh ingga o turung uangoul teil totoguo, maeit gisina ra turung pokoso sira tun pare, a tang siok. Song ra turung atenguar tamata uakapa tun pare, ingga ko heiriha totoguo, karo malauehirintiehe pono tasisina misiana ro malauehirintiehe pe totoguo.”

<sup>24</sup>“Tamoug, inggo u malara tasir tamatasine ko heirisia totoguo tar me uangoul tagu tar buturene ru pepeo. Inggo u malara tasisina ra banga tar uinatorene ko heiria totoguo binaka halanar koto te pokos.”

<sup>25</sup>“Tamoug, ingga ter tang sioko manasamper kodkodoh. O tamatang gane i kot ahik pah ka ate Totomua, bo inggo u ate Totomua, karo tamatasine ra tagorong mana totomua, ra ate pare, ingga teko heiriha totoguo. <sup>26</sup>Inggo ku uaate tasisina totomua, karu turung uatentiehe

§ 17.12 Jon 6.39; 13.18    <sup>h</sup> 17.15 Mat 6.13; 2Te 3.3    <sup>i</sup> 17.18 Jon 20.21    <sup>j</sup> 17.22 Apo 4.32



dedempe, maeit reng nimalauelhiria totoguo e turung moko tasisin, doh inggo katongo ponompe u turung uangoul teil tasisin.”

### Iesu ka kusa tanein

**18** <sup>1</sup>Binaka ke lotu uakapa pe Iesu, inggono mesno tamatang uakuakeluk ka la, kara la sairkout tar kodom i Kidron. Doh tar pang giameher pain e turur lebe oliv, doh Iesu mesno tamatang uakuakeluk teka la tar lebe olivon. <sup>2</sup>Doh Judas gere turung tangana tang Iesu tasir uelmatan, e ate tar buturuon, teeit a bureher binak, Iesu mesno tamatang uakuakeluk ra la uoto pepe tar buturuon. <sup>3</sup>Temaeit Judas ke la keip ualasira tar buturuono tasir manaiar tamatang uiluiatungung Roum, karo gisimeher tamatang babata gera uoto tur kaukeke tar umang lotu ger dedeil, gisina ka ualatueisir patere uleik, karo Parisi. Doh gisina ra bita teil tar bit, kara lam, kare nas ineteng uiliatung.

<sup>4</sup>Iesu e ate teil uakapa tun tar haua re turung pokoso tatan, temaeit inggono ke tur uakalaharalain i uoum tasisina, kare dangat, “Maionene rung sirioum?”

<sup>5</sup>Kara hire tapokisisin, “Iesu ger peng Nasaret.”

Kare hire tapokison, “Inggo teene!” Doh Judas gere turung tangana tang Iesu tasir uelmatan e tur keip manasa tasisin. <sup>6</sup>Doh tar binaka ke hire pe Iesu pare, “Inggo teene,” gisina ka siokor pungang tar mudula i kot. <sup>7</sup>Kare dangata poluk Iesu tasisin, “Maiono rung sirioum?” Kara hire tapokis polukusin, “Iesu ger peng Nasaret.”

<sup>8</sup>Iesu ke hire tapokis poluk tasisin, “Inggo ku hire manasa tamiuoum, inggo teo. Doh ge parung sir teiloum totoguo, uamaluana tasir tamatasine ra la.” <sup>9</sup><sup>k</sup>Inggono ke mene puk pare, maeit a haua geke meneiono sioun e turung pokoso noman. “Tamoug, inggo ahik pahu matot u uaheil me tang sioko tasisine ko heirisia totoguo.”

<sup>10</sup>Doh Saimon Pita e uasipa teil toro baenat, kare reih tauete tang room, kare tokout sebeke tar pang muar talingana na tamatang kalekinaler patere uleik. A hanganonener tamatang kalekinale nu Markus. <sup>11</sup><sup>k</sup>Kare kula Iesu tang Pita pare, “Uasipa tapokis tonong baenat. Ingga o naman ahiko pahu turung inum tola tar kap gere moko teilir uelmahing geke heirin Tamoug totoguo?”

### Iesu ka keipin tang Anas

<sup>12</sup>Song gisisir tamatang uiliatungung Roum, kare noso ualualatouk, karo noso tamatang babatar Ju ka kusa tang Iesu, kara uih tane to tar toking limanon i mud. <sup>13</sup>Kara keip uakikilangangua tatanon tang Anas. Inggono tena uarih Kaiapas gere uleik teil tasir patere tar binakon.

<sup>k</sup> 18.9 Jon 17.12 <sup>1</sup> 18.11 Mat 26.39

14<sup>m</sup>Inggono Kaiapas teke heir tar ninamana tasir tamatang Ju pare, auiantiehe tun gete matar tang sioko tasir tamata uakap.

### Pita ke uolih, e tele tang Iesu

15 Saimon Pita mer tang giamehe na tamatang uakuakeluk Iesu kura uakeluk tasisin. Gitir tang giameh e ate uaia tunin nas uleikir pater, temaeit ke la leke tagumpeko iuma tena morene nas uleikir pater. 16 Bo Pita teke tur uangoulane i morene toro pirik. Song gitir tang giamehe gere ate uaia tunin nas uleikir patere ke tapokisila i morene, kare hire tar kuahene re kaueke toro pirik, song ke keip uasolomeono tang Pita ium. 17 Doha kuahonene toro pirik ke dangata pare tang Pita, “Ingga deh ter tang sioko pono na tamatang uakuakeluk Iesu, bidouh?”

Kare hire tapokis Pita pare, “Ahik! Inggo ahik tagu!”

18 Doha binakon a malahongo ke hiu, temaeit gisisir tamatang kalekinale, karo tamatang babata ka uout keip tar kalingoho toro hue, kara tur uiloho ra mahirum pe, temaeit Pita ke la tur tagu ponola tasisin, e mahirum pon.

### Nas uleikir patere ke dangdangata haka tang Iesu

19 Doh git nas uleikir patere uakapa tun ke dangdangata haka tang Iesu toсно tamatang uakuakeluk, kare hape tena niualasiron.

20 Kare hire tapokis Iesu pare, “Inggo u uoto menmene to tar matasir tamata uakapa tun tar uanene i kot, doh nagu ualasira uakapa tuno ra uoto guata toig toro umang lotu, kari iuma tar umang lotu ger dedeil tar butur ra siokor uelgogounur Ju uakapa tun, ahik pah ku mene uaouo me inet i behia. 21 Bo ae maene ro dangdangata haka ingga totoquo? Dangata tasir tamatasine ka longoro tar haua ku ualasingo tasisin. Gisina ra ate tar haua ku menmenegio.”

22 Ke mene pe Iesu tar puhonene, kara tang siokor tamatang babata ke posara tar pararanon, kare kula pare, “Ae maene ko mene sira tar puhonene tenas uleikir pater?”

23 Kare kulangua Iesu tatanono pare, “Ge pare, ku mene inggo me inete me sa, hire tasisine uakapa tun a hauon. Bo ge para manar haua ku menegio, ae maene ko posara totoquo?”

24 Song ke heirila Anas tatanono tang Kaiapas ge nasi uleikir pater. A niuih tane harahamper toking liman.

### Pita ke uolih uagiameh poluk, e tele tang Iesu

25 Pita e mahirum tur harahampe, temaeit o gisiamehe ka dangata poluk tatanono pare, “Ingga deh ter tang sioko pono na tamatang uakuakeluk Iesu, bidouh?”

<sup>m</sup> 18.14 Jon 11.49-51

Bo Pita puk ke la uolihintiehengua pare, “Ahik! Inggono ahik!”

<sup>26</sup>Doh na tang siokor ualualatuer uleiking tasir patere uakap e pepe pon. Doha ualualatueonene a tahinalik tar tamata geke tokout sebekin Pitar talingan. Inggono ke kula pare, “Inggono u namana sira ku banga toala totomua me Iesu tar lebe oliv?”

<sup>27</sup>Kare uolih poluk Pita, “Ahik.” Doh ahik me manasana, kare kororor paol.

### Iesu ka keipilain tang Pailat

<sup>28</sup>Naliliuolik tun Iesu ka keip turin tena uma Kaiapas, kara keipilain tena uma Pailat. Doho Ju ahik pah ka lekela iuma tar umonene, teeit gisin ahik pah ra marang katego tar ualatutung toro niein uleiking Leke Liu ro Mat, geta hikingua pah ra turung ein. <sup>29</sup>Temaait Pailat ke tauete uelhir tasisin, kare dangata pare, “A haua kung poluk uelhirioum ke guata uasainir tamatene?”

<sup>30</sup>Doh gisina ka hire tapokis pare, “Ge pakene ahikiono paha tamata uasa, inggeim pake haik pah mi keipime tatanono totomua.”

<sup>31</sup><sup>o</sup>Doh Pailat ke kula tapokis tasisina pare, “Mu me kale tatanono marung la kodohoum tang hingiar ualatutur namiuoum ke kategogion.”

Bo gisit pukur Ju ka hire tapokis pare, “Inggeim ahik pah ra tanganasieim tar uamoko me tang siokor tamata toro mat.” <sup>32</sup><sup>p</sup>Gininanine ke kotpokoso puk mare uakalahara tun toro mana tar haua ke menein Iesu, hape re turung mate pe.

<sup>33</sup>Song ke tapokis polukula Pailat ium, kare kila tang Iesu, kare dangata tatanono pare, “Inggono tenas toiar Ju?”

<sup>34</sup>Kare kula tapokis Iesu pare, “A noumua katongomper puhung dangatono ue mo gisimehe ka hire ueleheir totomua totoguo?”

<sup>35</sup><sup>q</sup>Kare kula tapokis Pailat pare, “Inggono ahik paha peng Ju? Gisina nongo tamata katonga, kare nos uleikir pater, gisina teka keipimeane totomua totoguo. A hauonene ko guataia?”

<sup>36</sup>Kare kula Iesu pare, “Nag nitoiao ahik pah gane tagu i kot. Ge pakene ganeon i kot, nougu tamatang uakuakeluko paka uiliatung tar uelkarus totoguo mare haik me tamata re kusa ueleheir totoguo tasir Ju. Bo nag Nitoiao ahik paha peng gane tar uanene i kot.”

<sup>37</sup>Temaait git Pailat ke dangata tatanono pare, “Temaait ingga a toia?”

Kare kula tapokis poluk Iesu pare, “Inggono teko kila totoguo a toia. Temaene ka pohoio, karu laha i kot, tar me hire tasir tamata uakapa tun toro man, doh mais uakapa tun ra uakeluk toro uelhire gero man, gisina ra longoro totoguo.”

### Pailat ke luaka kare uatauete tang Barabas tar umang karabus

<sup>38</sup>“A hauar tengkanana ro man?” Teke dangata pe Pailat. Ke dangata bakono tar puhonene, kare tauete uelhir poluk tasir Ju, kare

<sup>n</sup> 18.27 Jon 13.38   <sup>o</sup> 18.31 Jon 19.6-7   <sup>p</sup> 18.32 Jon 3.14; 12.33   <sup>q</sup> 18.35 Jon 1.11

hire tasisina pare, “Inggo ahik pah ku tupara me siokor inete ke guata uasainir tamatene. <sup>39</sup>Bo tar uakeluk puk tenami niguata, kara niuangoulur namiuoum ru uoto guata peo tar mamang binakalik tena binaka ro niein uleiking Leke Liu ro Mat. Inggo u uoto luaka, karu uatauete tar tang siokor tamata tar karabus teremi nimalaroum. Doh inggoum mung malar u luako, karu uatauete tenas toiar Ju?”

<sup>40</sup>Doh gisina ka siokor kula ualeikintiehe tunungua pare, “Ahik! Ahik pah teon! Inggeim mi malar o luaka, karo uatauete tang Barabas!” Barabas a tang uelpus, kara ueuenau.

### Pailat ke heir tasisina tang Iesu mara uakusain tar korose

**19** <sup>1</sup>Song ke kula Pailat tasir tamatang uiliatung ra keip tang Iesu, kara la kalkalopis<sup>r</sup> tatanon. <sup>2</sup><sup>s</sup>Doho tamatang uiliatung ka kale toro uoho misiana toro uelhung, kara tuha sira tang roono tono takur toia, kara uamokoin toro luna Iesu, kara ualoho toro mahar gomono tabeliaha tatanon. <sup>3</sup>Kara la menmene ueltapokisie kompe pare, “A marein uaia tun nas toiar Ju.” Kara nun tar pararanon.

<sup>4</sup>Doh Pailat ke tauete uelhir poluk tasir Ju, kare kula pare, “Bang inggo gine ru turung keip tauete manasame tang Iesu tamiuoum marung ateoum pare, inggo ahik pah ku tupara me inete ke guata uasaion.”

<sup>5</sup>Maeit Iesu ke tauet a niauih ro luna toro uoho ueluelhung, kare loho teil toro mahar gomono tabeliah, song ke kula Pailat tasisina pare, “Ter tamata teene!”

<sup>6</sup>Tar binaka ka bangar tamata uleiking tasir patere, karo tamatang babata tang Iesu, kara kula ualeikingua pare, “Uakusa kai tatanono tar korose! Uakusa kai tatanono tar korose!”

Bo Pailat puk ke kula tapokis pare, “Mu me kale tatanono marung uakusa kaia katongoum tatanono tar korose, teeit inggo ahik pah ku tupara me inete ke guata uasaion.”

<sup>7</sup>Doh gisisir Ju ka hire tapokis pare, “Inggeim nami siokor ualatut e kula teil pare, inggon e mat, teeit inggono ke kula katongoin a tuna God.”

<sup>8</sup>Doh ke longoro pe Pailat tar puhonene, inggono ke la sokorontiehengua. <sup>9</sup><sup>t</sup>Pailat ke leke tapokis poluk iuma tar uma ger nang gauaman, kare dangata tang Iesu, “Ingga, ia ro la tur?” Bo Iesu puk ahik pah ke mene hahaua tatanon. <sup>10</sup>Kare kula Pailat pare, “Ingga ahik paho marang mene hahahaua totoguo? Ingga ahik paho ate pare, inggo pe teru kale teil tar nitampopoko? Inggo u matot u luaka liu totomua, karo tauet, karu matoto pon u kula ra uakusaia i rana tar korose.”

<sup>r</sup> 19.1 Nas kalopisir Roum ka tuhain toro let doh tar surun ka uamokoigir sikiskir hain a man <sup>s</sup> 19.2 Luk 23.11 <sup>t</sup> 19.9 Mat 27.12

<sup>11</sup>“Iesu ke kula tapokis pare, “Ingga pake haik paho matot o kale uahiua totoguo ge pakene ahik God pah ke heir totomua tar nitampopokoh, karo kaueke tar mamang inetelik. Temeait a tamatene ke heir totoguo tar limoumua inggon e kouh tar niguata uasaniner santiehe tun.”

<sup>12</sup>“Doh ke longoro pe Pailat tar puhon, inggono ke marang sir me hagar mara luakain Iesu mare la. Bo gisis pukur Ju ka kula ualeikintiehe tun pare, “A tamata geke guata katongoin pare, a toia, inggon e tokouasain tang Sisa. Geto luaka ingga, karo uatauete tar tamatene, ingga ahik pah kaloum tang Sisa.”

<sup>13</sup>Doh ke longoro pe Pailat ka mene pesina pare, kare keip tauetengua tang Iesu, kare la tabila tono tabtabilar tang kedang. A buturuono ra kilain pare, o palaua mamadelau. O Ju ra kila tang roono pare, Gabata.

<sup>14</sup>Doh inggono ke uahuhut sikoro manasalainir marein uelik tar kaleuatoro toro niein ueliking Leke Liu ro Mat. Doh Pailat ke kula tasir tamata pare, “Bang! Tenami Toia!”

<sup>15</sup>Doh gisina ka kula ualeik pare, “Tung pous tatanon! Tung pous tatanon! Uakusa kai tatanono tar korose!”

Kare dangata poluk Pailat tasisina pare, “Inggoum mung malar u uakusa kaio tenami Toiaoum tar korose?”

Doh gisis nosi uleikir patere ka kula tapokis pare, “Inggeim nami tang sioko komper toia Sisa.” <sup>16</sup>Temeait Pailat ke heir tang Iesu tar limasisina mara uakusaina tatanon i rana tar korose.

### Iesu ka uakusain i rana tar korose

Temeait gisisir tamatang uiliatung tera kaueke teilingua tatanon, <sup>17</sup>Iesu ka uahuata katongoin tena korose, kare hiliu tar uan uleik, kare me pokoso tar butur ra kilain, “Na buturur Lakok.” Doh toro uelhireng Ju ra kilainir buturuon i Golgota. <sup>18</sup>Ter buturuono teka la uakusa kaia toiono tar korose menia tar tang torik ponor tamat, rasina ka uaturunguais nasira korose i uara tektekene ter nang Iesu, a nang Iesu ke tur i uantinanin.

<sup>19</sup>Doh Pailat ke bolo tar puhung uahire, kara uamokoin i rana tar korose. Ka boloin pare, “Iesu ger peng Nasaret nas toiar Ju.” <sup>20</sup>Doha puhung uahireono ka boloin toro uelhireng Ju, Latin, dohi Grik. O bureher Ju ka banga tar puhung uahireonene, teeit a buturuonene ka uakusain Iesu tar korose e uahuhut tar uan uleik.

<sup>21</sup>Temeait gisis nosi tamata uleikir patereng Ju ka la tang Pailat, kara hire pare, “Ahik paho bolo pare, ‘Nas toiar Ju.’ Bolo pare, ‘A tamatene ke kula pare, inggo nas toiar Ju.’ ”

---

<sup>u</sup> 19.11 Jon 10.18; Apo 2.23; Roum 13.1    <sup>v</sup> 19.12 Luk 23.2; Apo 17.7

<sup>22</sup>Doh Pailat ke kula tapokis pare, “A haua geku bolo manasaio uamaluana gere moko sirono ka bolo pein.”

<sup>23</sup>Doh tar binaka ka uakusa kaia manasa per tamatang uiliatung tang Iesu tar korose, gisina ka kale tena hikhikuono, kara uelbule katongois taninina tar toueitir pain. A tang siok tang sioko tasisin e kale tono mahar. Gisina ka kale liu pono tono hikhikuono gero barah geke tuha keip pukin toro mahar sioko ro mahar gomono nikaere uatuk i sirun, ahik paho niuauelbabeir tagu. <sup>24</sup>“Temaeit gisisir tamatang uiliatung ka uelkule katongonguais pare, “Inggeig ahik pahi kihkih tang roono me mahmahar, inggeig i ueluelpeikie mari bangeig tang mai re kale tang roon.” Doha puhonene ke pokoso puk mare la hung tuninir puh geke boloin pare, “Gisina ka uelbule katongois tenag hihikuo, kara ueluelpeikie tonogo gomono.” Teka guata siramper tamatang uiliatung paar.

<sup>25</sup><sup>x</sup>Doh gisine ra tur uahuhut tena korose Iesu, Maria tinana Iesu, tahina kuaha Maria ge na kuaha Klopas, kare Maria ger peng Makdala. <sup>26</sup><sup>y</sup>Doh Iesu ke banga tang tinan, kara tamatang uakuakeluk gere malauehirintiehe tunuion ura tur tokaha pe, maeit ke kulanguaono tang tinana pare, “Inggoneit a tumua.” <sup>27</sup>Song ke kula tena tamatang uakuakeluk pare, “Inggoneit te tinoumua.” Doh uakekene turungua tar binakono gitir tamatang uakuakeluk ke keip tena uma tang Maria.

### Iesu ke mat

<sup>28</sup><sup>z</sup>Iesu ke ate manasa pare, a mamang inetelik ka guatguata hihir tun manasaig, maeit a puh geke boloin sioun e pokos tun toro man. Kare kulangua Iesu pare, “Inggo ku kamadak.” <sup>29</sup><sup>a</sup>Doha itung kodom e tok a uoun tar bino ueltek, temaeit o pous ka uahuin taninina, kara uih tolain tar puhung douk ra kilain, o hisop, kara hue kaiatigin tar uauana Iesu. <sup>30</sup>Doh Iesu ke inum tar bino ueltek, kare kula pare, “Ginina ke kapkapa hihir manas.” Song ke kokolo uahiua, kare mat.

### Iesu ka soupin ro kapkapanu toro bel

<sup>31</sup><sup>b</sup>A mareinonene a mareining kaleuator, doh tar uagiamehener marein a Mareining Pepe Uah. Kare ter marein pono ra maligomo tunin, temaeit gisisir Ju ka de mate kusa uatukur tukunusisina tar korose tar Mareining Pepe Uah, kara dangatanguasina tang Pailat pare, ra haluh goigir kekeisisina mara mata ualahur, kara kale uahiuaigir tukunus. <sup>32</sup>Temaeit gisisir tamatang uiliatung ka la, kara haluh go tar kekenener uakikilangan, song ka uiuh uelhirila tar tang giameh. <sup>33</sup>Bo ka me la

<sup>w</sup> 19.24 Ker 22.18    <sup>x</sup> 19.25 Mat 27.55-56    <sup>y</sup> 19.26 Jon 13.23    <sup>z</sup> 19.28 Ker 22.15

<sup>a</sup> 19.29 Ker 69.21    <sup>b</sup> 19.31 Ual 21.22-23

manasa pemesina tang Iesu. Gisina ka banga pare, inggono ke mata manas, temaeit gisin ahik pah ka haluh go tagu tar kekenon. <sup>34</sup>Bo a tang sioko pukur tamatang uiliatung ke soup toro bele tar kapkapana Iesu, doh ahik me manasan, kare tit taueter deuating, kara kodom. <sup>35</sup><sup>c</sup>A tang sioko ke uakeis uanono tun tar mamang inetelikininanine ke hire uakalahara tunungua, doha hau ke hiregion, ginin a man, ginin ka hire taueteig, maeit rung tagorong mana uakapoum. <sup>36</sup><sup>d</sup>Doha puhonene ke kotpokoso puk mare manar puh geke boloin toro bolobol pare, “Ahik mo sioko ro hironono ra turung kategoin.” <sup>37</sup><sup>e</sup>Kara giameher puh ka boloin pare, “Gisina ra turung banga tar tang sioko geke soupisisin.”

### Iesu ka keuin

<sup>38</sup>Song ke dangata Josep ger peng Arimatea tang Pailat ge pare matoton e uahue tatanon e kale tar tukununa Iesu. Josep inggono ter tang siokor pono na tamatang uakuakeluk Iesu, bo e uaouo kompein, teeit inggon e sokoro tasir Ju. Pailat ke uahue tatanon, temaeit song ke me kale liu Josep tar tukununa Iesu. <sup>39</sup><sup>f</sup>Doh Nikodemus inggon te geke me banga baka uoum tang Iesu naboung, inggono teke la tagume tang Josep. Inggono e kale teil tar uaiuaia a amuh uaiantiehe tun, ka tuha keipin tar bultanana ro torik ro douk ra kilais o mur, doho alo. Doha niduhunon e matoto tar toueitir hangaulur kilogram. <sup>40</sup>Josep me Nikodemus kura kale tar tukununa Iesu, kaura tunaha tatanono tar uaiuai amiamuhuntiehe tun, kaura auih uiloho tar gomono tatanono misiana ra uoto guata per Ju tar kaleuatoro tar tukununar tamata gera keuin. <sup>41</sup>Doha iom e moko uahuhut tar butur ke mata to Iesu. Dohi kobor tar iomon o moko ro lebangang mat o timuh tun, halana me tang siokor mat ka la uamokoin tar buturuon. <sup>42</sup>Doha binakono ke uahuhutuntiehe manasain re uakekene per Mareining Pepe Uah. Temaeit gisina ka keip puk manasala tar tukununa Iesu toro lebangang mata roon, teeit roono tero moko uahuhut.

### Iesu ke tua tapokis

**20** <sup>1</sup>Naliliuolik kitkitup tun a uakikilangar marein tar uik Maria Makdala ke la tar keu, kare banga toro palua ka uain liu turin toro matana ro lebang. <sup>2</sup>Temaeit inggono ke ualola tas Saimon Pita mer tang giameher tamatang uakuakeluk gere malauehirintiehe tunin Iesu, kare la hire tasrasina pare, “O tamata ka keip liu tar tukununar Tamata Nomana toro lebangang mat, doh inggeim ahik pah mi ate ia ka uamokosina tatanon.”

<sup>c</sup> 19.35 Jon 21.24    <sup>d</sup> 19.36 KT 12.46; Aha 9.12; Ker 34.20    <sup>e</sup> 19.37 Sek 12.10; UGO 1.7  
<sup>f</sup> 19.39 Jon 3.1-2

<sup>3</sup>Maeit Pita mer tang giameher tamatang uakuakeluk kura la toro lebanga geke uamokoinir tukununa Iesu. <sup>4</sup>Rasina kura siokor ualualo tokaha tun, bo git pukur tang giameher tamatang uakuakeluk ke ualualo liu tang Pita, kare la kotpokoso uoum toro lebangang mat. <sup>5</sup>Inggono ke la kokolo, kare uakatako, kare banga tar gomono geke auih uilohoig tatanon, bo ahik puk pah ke lek. <sup>6</sup>Song ke me ualo pokoso Saimon Pita, kare me solo dedengua iuma toro lebang, kare banga tar gomono geke auih uilohoig tatanono re rikin pe. <sup>7</sup>Kare banga pono toro mahar gomono geke auih uilohoin toro luna Iesu, o rikin sioko tar mahar gomono geke auih uilohoig tatanon, bo roono puk o niligun. <sup>8</sup>Song gitir tang giameher tamatang uakuakeluk geke la pokoso uakikilanga toro lebangang mat ke solo ponoko, kare bang, kare tagorong man. <sup>9</sup><sup>g</sup>Gisina halana harahampe ta naman manate toro bolobol gero hire pare, “Inggon e turung tua tapokis tur toro mat.”<sup>h</sup> <sup>10</sup>Song kura la tapokis rasinar toking tamatang uakuakeluk ium.

### Iesu ke uamakahain tang Maria Makdala

<sup>11</sup>Maria e kiring tur toro matana ro lebangang mat. Doh gine re kiring peon, inggono ke kokolo, kare uakatako i lolono toro lebang, <sup>12</sup>kare banga tar tang torikir angelou ura hiku teil tonosira hikhiku gaugauil ura tabila tar butur geke uarikinir tukununa Iesu. A tang siok e tabila tar butur ke lunganahiaon, kara tang giamehe tar kekenehiaon. <sup>13</sup>Rasin kura dangata tatanono pare, “Ir kuah! Ae maene ro kiringa?”

Kare hire tapokisono pare, “Teeit gisina ka kale liu tenag Tamata Nomano, doh inggo u telengua tar butur ka uamokosina tatanon.”

<sup>14</sup><sup>i</sup>Song ke uiliangara tapokisono, kare bangangua tang Iesu re tur pe. Bo ahik puk pah ke bang paroko pare, teonon.

<sup>15</sup>Kare dangata Iesu tatanono pare, “Ir kuah! Ae maene ro kiringa? Maionene ro siria?”

Doh Maria ke namana pare, inggono ter tang babata tar iom, maeit ke kula tatanono pare, “Tamata uleik ge pare ko kale liua tatanon, hire totoguo, ia ko uamoka tatanon maru la kaleo tatanon.”

<sup>16</sup>Doh Iesu ke kila tatanono pare, “Maria!” Maria ke uiliangara uelhir tatanon, kare meneng Hibru tatanono pare, “Rabonai!” (Tera kila peinir “Tang Ualasinir.”)

<sup>17</sup><sup>j</sup>Kare kula Iesu tatanono pare, “Uakenua manasa tar tuha totoguo, ge halana peo tu la tapokis tang Tamoug, bo o la kompe toso bung tahiguo, karo la hire tasisina pare, inggo u la tapokis manas i rana tang Tamoug ge Tamamiuoum pon, kare nagu God, kare nami God ponoum.”

<sup>g</sup> 20.9 Apo 2.24-32; 1Ko 15.4 <sup>h</sup> 20.9 Bolobolong Ker 16.10 <sup>i</sup> 20.14 Luk 24.16; Jon 21.4  
<sup>j</sup> 20.17 Roum 8.29; Hib 2.11-12



<sup>18</sup>Temaeit Maria Makdala ke la hire tasir tamatang uakuakeluk ke banga pe tar Tamata Noman, kare hire tasisina tar puh geke hirein Iesu tatanon.

### Iesu ke uamakahain tosno tamatang uakuakeluk

<sup>19</sup>Gisisir tamatang uakuakeluk ka sokoro tasir Ju, temaeit gisina ka la siokor uelgogoun kompe tar siokor um, kara holoro uanono tun tar pirik. Doh tar uakikilangar marein tar uikiono nareiu Iesu ke me pokos, kare me tur i uantinanina tasisina, kare kula pare, “O hiarouo tamiuoum uakapa tun.” <sup>20</sup><sup>k</sup>Ke mene bakono tar puhonene, song ke uamakaha tar tatabalanar liman, kara kapkapan. Doh gisisir tamatang uakuakeluk ka uahantiehe tun ka banga pe tar Tamata Noman. <sup>21</sup>Song ke kula uagiamehe poluk Iesu pare, “O hiarouo tamiuoum uakapa tun. Tamouguo ke heirihia totoguo ter siokono kompe inggo u heir ponola tamiuoum.” <sup>22</sup>Song ke ula tar romo tasisin, kare kula pare, “Kale tar Iabene Dedeil. <sup>23</sup><sup>l</sup>Getung kale liuoum teres niguata uasar tamat, ginin e hiliu, bo ge ahikioum pah mung kale liu taninina tasisin, ginin ahik pah ke hiliu.”

### Iesu ke uamakahain tang Tomas

<sup>24</sup>Tomas gera kilkila ponoin tang Didimas inggono ter tang sioko pono tasir hangaul, kara tang torik no tamatang uakuakeluk Iesu, inggono taboin ke me pokoso pe Iesu. <sup>25</sup>Temaeit gisisir gisiamehe no tamatang uakuakeluk Iesu ka hire tatanono ke me pokoso pe pare, “Inggeim king banga tar Tamata Noman.” Bo Tomas puk ke kula pare, “Ahik tun pahu matot u tagorong man, e banoto tun baka getu banga tar potonor loto ka tina peinir tatabalanar limanon, karu uasoloko tar kamot limoug tar butur geke tinain, kare tar kapkapanon.”

<sup>26</sup>Ke karuh bakar mouitir marein, doh gisis no tamatang uakuakeluk Iesu ra siokor uelgogoun poluk tar umon, doh Tomas e pepe tagu manasa tasisin. A pirik ka holoro uanono tunig, bo Iesu puk ke lekame, kare me tur i uantinanina tasisin, kare kula pare, “O hiarouo tamiuoum uakapa tun.” <sup>27</sup>Song ke kula tang Tomas pare. “Uasolome tar kamot limoumane, banga tar tatabalanar limouguo, hueme tar limoum toro kapkapouguo. Uanua manasa tar tagorong boh, bo ingga o tagorong man.”

<sup>28</sup>Tomas ke kulangua tatanono pare, “Nag Tamata Noman, kare nag God!”

<sup>29</sup><sup>m</sup>Song ke kula Iesu tatanono pare, “Ingga ko tagorong mana, teeit ko banga pe totoguo, a niguata uايا e la tas mais halana ta banga totoguo, kara tagorong man.”

### A tengkana maeit ka boloin ro bolobolo roon

<sup>30</sup>Iesu ke guata to tar giniamer burehener nitouo tar matas tun no tamatang uakuakeluk, bo inggo puk ahik pah ku siokor bolo uahua

<sup>k</sup> 20.20 Jon 16.22; 1Jo 1.1    <sup>l</sup> 20.23 Mat 16.19    <sup>m</sup> 20.29 1Pi 1.8

taninina toro bolobolo rone. <sup>31</sup>Bo gininer giniamhe ku bolo pukugio, maeit rung tagorong manoum pare, Iesu ter Kristo a Tuna God. Doh kung tagorong mana peoum, inggoum mung kalengua tar nitua tar hanganon.

**Iesu ke uamakahain tasir mouitir tamatang uakuakeluk**

**21** <sup>1</sup>Iesu ke uamakaha uagiamhe polukin tosno tamatang uakuakeluk tar tektekener kodom i Galili. A puhono ke kotpokoso tun pare, <sup>2</sup>Saimon Pita, Tomas gera kilkilain tang Didimas, Nataniel ger peng Kena tar pang Galili, kara toking bulout ger toking tuna Sebedi, kara tang torik baka polukur tamatang uakuakeluk.

<sup>3</sup>Tar uakikilan, Saimon Pita ke kula pare, “Inggou u la uekih.”

Kara siokor kulasit ro uanotonono pare, “Inggeim mi la tagu totomua.” Temaeit gisina ka la siokor huangua tar bout. Bo gisina puk ka uakapa tar deilir boung ahik pah ka uahua baka mo ian.

<sup>4</sup>Doh gine re kih pehainir uagah, Iesu e tur manasane i teh, bo no tamatang uakuakeluk pukuon ahik pah ka ate pare, inggono te Iesu.

<sup>5</sup>Song ke dangatono tasisin, “Ro bung kaloug! Ka hua baka mo ian?”

Kara hire tapokisisin, “Ahik tun!”

<sup>6</sup>Kare hireono tasisin, “Mu baka uahua tar ubene tar pang muahia tar bout marung uahuaoum mo sisiokon.” Temaeit gisina ka uahua tar uben, kare puluhis tar reih kai, teeit o burehentiehe per iana ka hua.

<sup>7</sup>PA tang siokor tamatang uakuakeluk gere malaelhirintiehe tunin Iesu ke hire tang Pita pare, “Gine bo ter Tamata Noman.” Bo tar binaka pukuon, Pita ke kale liu tono gomom, doh gine ke longoro pe Pita pare, inggono ter Tamata Noman, inggono ke gomo tapokisin tono gomom, kare siak i laur.

<sup>8</sup>Doh gisisir gisiamheer tamatang uakuakeluk ka reih uahung keip tar bout tar ubene ke uoun tasir ian. Gisin ahik pah ra uairehe tun tar papadakan, inggono gane kompela tar gagauilin ngohina pare, a 100ir mita.

<sup>9</sup>Doh tar binaka ka hung manasasin i kot, kara la hui, gisina ka banga toro hue o kakauer, kare rikin teilir ian, kara bereit. <sup>10</sup>Song ke kula Iesu tasisina pare, “Keipime mo gisiamheer ianasit, kung nihing uahuais.”

<sup>11</sup><sup>q</sup>Saimon Pita ke boun tapokisitig tar bout, kare la reih rurus keip uahunguha tar ubene tasir ian. Inggonor ubene ke uoun tun tasir iana uleik kaelais tar 153ir. Gisin o burehentiehe nomana bo ahik puk pah ka raprapata tar uben.

<sup>12</sup>Kare kula Iesu tasisina pare, “Mu lame, karung me ein.” Doh ahik me tang sioko ke ongolo tar dangata tatanono pare, “Ingga mai?” Teeit gisina ra ate inggono ter Tamata Noman. <sup>13</sup>Maeit song ke la kale Iesu toro bereit, kare heir tasisina, kare guata sira poluk paara tar ian.

<sup>n</sup> 20.31 Jon 3.15; Roum 1.17; 1Jo 5.13    <sup>o</sup> 21.3-6 Luk 5.4-7    <sup>p</sup> 21.7 Mat 14.29; Jon 13.23

<sup>q</sup> 21.11 Luk 5.6

<sup>14</sup>Inggonene ter uatouononor binaka manasa ke uamakaha katongo pein Iesu tosno tamatang uakuakeluk i muduhia ke tentur tapokis pe toro mat.

### Iesu ke menmene tang Pita

<sup>15</sup>Tar binaka ka ein uakapa manasasin, kare dangata Iesu tang Pita pare, “Saimon Pita, ingga a tuna Jon, ingga o malaelhirintiehe nomanampe totoguo tasisine?”

Kare hire tapokison, “Aa, Tamata Noman, ingga o ate pare, inggo u malaelhirintiehe tun totomua.”

Kare kula Iesu pare, “Ualaein tosnogo tunar sipsipo.”

<sup>16</sup>Kare dangata uagiamhe poluk Iesu, “Saimon, ingga a tuna Jon, ingga o malaelhirintiehe nomanampe totoguo?”

Inggono ke hire tapokis poluk pare, “Aa, Tamata Noman, ingga o ate pare, inggo u malaelhirintiehe tun totomua.”

Kare kula poluk Iesu, “Kaeke tosnogo sipsipo.”

<sup>17</sup>A uatouonono manasa ke dangata poluk Iesu pare, “Saimon, ingga a tuna Jon, ingga o malaelhirintiehe nomanampe totoguo?”

Pita ahik manasa pahe uaha uaia tun, teeit ke dangata uatouono tun pe Iesu tatanono pare, “Ingga o malaelhirintiehe nomanampe totoguo?” Temaeit ke kulanguaono tatanono pare, “Tamata Noman, ingga o ate tar mamang inetelik, karo ate pare, inggo u malaelhirintiehe tun totomua.”

Kare kula Iesu tatanono pare, “Ualaein tosnogo sipsipo. <sup>18</sup>Doh inggo gine ru hire tun totomua toro man. Tar binaka ro kalana ingga, ingga o uoto hiku, karo loho katongo, karo sabala ueltebeir tar butur ro malarain, bo tar binaka puk ro mahoho manasa, ingga o turung hue ueleheir tar limoum, kare me tamata sioko re uahiku, kare ualoho ueleheir totomua, kare uoum keip totomua, kare sabala keip totomua tar buturene ro deia mato la.” <sup>19</sup>Iesu ke mene puk pare, mare ualasira hape re turung mate pe Pita tar uatakai tar hangana God. Song ke kula Iesu tatanono pare, “Uakeluk totoguo.”

### Iesu mesno gisiamer tamatang uakuakeluk

<sup>20</sup>Pita ke uageg, kare banga tar tang siokor tamatang uakuakeluk gere malaelhirintiehe tunin Iesu, re la uakeluk peme tasrasin. (Doh inggono te geke uain uahuhut ponola toro luna toro uaruaronono Iesu, kare dangat, “Tamata Noman, maiono re turung tangana totomua tasir uelmatan?”)

<sup>21</sup>Doh ke banga pe Pita tatanon, kare dangata tang Iesu pare, “Tamata Noman, hape tar tamatene?”

<sup>r</sup> 21.14 Jon 20.19,26   <sup>s</sup> 21.16 Apo 20.28   <sup>t</sup> 21.19 Mat 16.24-25; 2Pi 1.14

<sup>u</sup> 21.20 Jon 13.23-25

<sup>22</sup>Iesu ke hire tapokis tang Pita pare, “Ge pakene u malaro inggono pake tua dede e tuka tar binaka ru la tapokisimeo, doh inggon ahik paha ineteng totomua, ingga o uakeluk totoguo.” <sup>23</sup>Temaeit o ueluatata ko haijala ueltebeir tosono tamatang uakuakeluk Iesu pare, a tamatang uakuakelukonene ahik pahe turung mate tagu. Bo Iesu puk ahik pah ke kula tatanono pare, ahik pahe turung mata tagu, inggono ke kula pare, “Ge pakene u malaro, inggono pake tua dede e tuka tar binaka ru la tapokisimeo, doh inggon ahik paha ineteng totomua.”

<sup>24</sup>ʻDoh inggonene ter tang siokor tamatang uakuakeluk ke menmene tar inetenanine, kare ter tang sioko pono ke bolo uahiua taninin. Doh inggeig i ate pare, a haua ke hiregion, ginina man. <sup>25</sup>ʻBo a burehe nomanamper giniamerh inete ke guataig Iesu ge pakene ra bolo sisioke uahiua uakapa tuniginin, inggo u namana siro pare, a mamang buturulikane koto pake matoto leue uakapa tar uamoko tar bolobolonin.

---

<sup>v</sup> 21.24 Jon 19.35    <sup>w</sup> 21.25 Jon 20.30

# Aposoul

## Nas kalekinaler Aposoul

O bolobolo rone, 'Nas Kalekinaler Aposoul' o mene ualatumana toro Uelhira Uaia ke boloin Luk. Luk teke bolo pono toro bolobolo rone. Toro bolobolo rone, inggeig i banga tar Iabena Dedeil e ualasira tar lele tasir Aposoul, kara mene tauete tono Uelhira Uaia Iesu i Jerusalem dohi Judia, kari Samaria, kare toro mamang buturulikane tar koto uakap (Apo 1.8).

Nas kalekinaler Aposoul o ueluatata toso tamatang tagorong mana Iesu ke uakikilanga tur pe i Judia, kara la burburehe uainane tar koto uakap. Roon o ualasira pono tena kalekinale Kristo, kare nas niuangoulur tamata gera uakeluk tatanon. Iesu ke uaelmatout sira tun tar ualapagaha geke guata keipin God tasir Israele sioun.

A siokor inete uleik tun ro menmenein ro bolobolo rone tena kalekinaler Iabena Dedeil ge na Iabena God. Tar uakikilanga a Iabena Dedeil ke laha tasir uakuakelukur nang Iesu tar mareining Pentikos. Dohi muduhia, song ke uakodkodohono teres ninamanasin, kare uatampopokoho tasisin.

Toro bolobolo rone, inggeig i banga pono tar bureher barahir menemener nasir aposoul ka mene taueteig tar binaka ra marang mene tauete tono Uelhira Uaia Iesu, dohi bureher tamata ka tagorong mana toro uelhira.

O bolobolo tasir aposoul e moko teilir ueluatatar nasir aposoul, bo a burehentiehe pukur menemener mana te tar inete kura guataig Pita me Poul.

Pita ter tang sioko tasir aposoul geke lala tagu teil tang Iesu. Bo Poul ahik pah ke lala tagu teil tang Iesu, inggono ke pentampopokohia tar touahia toso tamata Iesu, bo Iesu puk ke kilo tatanon, kare uakotpokoso sira tatanono pare, ter uakikilanga tunungua tar ueliu tauete tono uelhira.

---

## Iesu ke ualapagah e turung heirihia tar Iabena Dedeil

**1** <sup>1</sup> Teopilus, o uakikilangana ro bolobolo geku boloi, o menemene tar mamang inetelik ke guataig Iesu, kara haua ke ualasiraig tar binaka ke uakeken, <sup>2</sup> e tuka ke kale pe taro God tatanon i Heuen. Bo tar binaka puk re uangoul haraha Iesu, inggono ke ualatut toso aposoul

---

<sup>a</sup> 1.1 Luk 1.3    <sup>b</sup> 1.2 Mak 16.19; Luk 24.49-51

tar niualasira ke heirigir Iabena Dedeil. <sup>3</sup><sup>e</sup>I muduhia ke mate peono tar korose, kare tua, inggono ke me ualairain tasisina tar bureher hagar mara tagorong manasina pare, inggono ke tua tapokis. Inggono ke kotpokoso tasisina tar bureher binak i lolono tar toueitir hangaulur marein ke uangoul baka pe, kare mene uakalahara pono tasisina tena Nitoia God.

<sup>4</sup><sup>d</sup>Tar siokor binak Iesu ke me ein tagu tosono aposoul, kare ualatohongua tasisina pare, “Inggoum ahik pah mu hiliu i Jerusalem, mu pepe uangoul baka tar Iabena Dedeil geku ualapagahaio tamiuoum e turung heirihain God ge tamamiuoum. <sup>5</sup><sup>e</sup>Jon ger tang uahuhu e uahuhu keip tar kodom, bo inggoum ahik pahi reh God e turung uahuhu keip tamiuoum tar Iabena Dedeil.”

### Iesu ka kalein i ran

<sup>6</sup><sup>f</sup>A siokor binaka gisina ka la toto poluk, kara dangata tang Iesu pare, “Tamata Noman, here ter binakono ro heiria tamiueimir Israel nami pang uan sioko maring tampopokoho maring turung kaeuke katongosiem tenami pang uan?”

<sup>7</sup><sup>g</sup>Bo inggono puk ke kula pare tasisin, “Inggon ahik paha ineteng tamiuoum tar marang ate tar marein, doha binaka geke uamatoto keipin God ge tamouguo tena nitampopokoh. <sup>8</sup><sup>h</sup>Bo inggoum puk mu turung kale tar nitampopokoho tar binaka re lahar Iabena Dedeil tamiuoum, doh inggoum tosnogo tamatang mene tauetoane i Jerusalem, doh tar pang uan i Judia dohi Samaria, kare toro mamang buturulikane tar kot.”

<sup>9</sup><sup>i</sup>I muduhia ke menemene baka peono tasisina pare, gisina ra uakeis turumpe ke kale kai pe God tatanon, karo uaouo ro mahar langit tatanon.

<sup>10</sup><sup>j</sup>Doh gine ra uakeis uanono pe tarosina tar langit, a toking tamat ura hiku teil tar gomono gaugauil kura me tur tagu tasisin, <sup>11</sup><sup>k</sup>kaura kula pare, “Ir tamatang Galili, ae maene rung turuoum, karung uakeis taro i rana tar langit? Iesuene kung bangaoum ka me kale liu taroin i Heuen, inggon e turung la tapokis sira polukuha hope kung banga peoumene daana ke la peon.”

### A tamata geka uamatotoin tar palih tang Judas

<sup>12</sup><sup>l</sup>Song ka tapokisikosin i Jerusalem, ka hiliu tar Siusan i Oliv. A siusan e uairehe sikor i Jerusalem, e matotoin tar siokor kilomita. <sup>13</sup><sup>m</sup>Tar binaka ka la pokososin, gisina ka lala uamoto poluk taro i rana tar tine uma gera uoto uangoulinisin. Gisis ra uangoul tar binakono tes Pita, Jon,

<sup>c</sup> 1.3 Luk 24.36-49; Apo 10.41 <sup>d</sup> 1.4 Luk 24.49; Jon 14.16-17; Apo 2.33 <sup>e</sup> 1.5 Mat 3.11

<sup>f</sup> 1.6 Luk 24.21 <sup>g</sup> 1.7 Mak 13.32 <sup>h</sup> 1.8 Mat 28.19; Luk 24.48 <sup>i</sup> 1.11 Mat 26.64;

Luk 21.27 <sup>j</sup> 1.12 Luk 24.50-53 <sup>k</sup> 1.13 Mat 10.2-4

Jems, doh Andru, Pilip, doh Tomas, Bartolomiu, doh Matiu, Jems ger tuna Alpius, doh Saimon ger peng tar toto tamat, ra kilais o Selot, doh Judas ger tuna Jems. <sup>14</sup>Gisina ra uoto siokor la toto tar lotu tokah menia pono tasir gisiamer kuah, doh Maria ge tinana Iesu, doho bung tahin.

<sup>15</sup>Tar binakanin, o tamatasine ka tagorong mana tang Iesu ke la matotois tar 120. Pita ke turane i uantinanina tasisin, kare kula pare, <sup>16-17</sup><sup>l</sup>“Ro bung tahig! Sioununtieh, o uelhire geke uataueteinir Iabena Dedeil tar uauana Debit, o lain tang Judas geke uoum keip ualasira tasir uelmatan geke la kuse tang Iesu, ko kotpokoso manasa pare, o man. Inggono ter tang sioko pono tar toto tamatene tagigeig, kare kalekinale tagu pono tagigeig.”

<sup>18</sup><sup>m</sup>Inggono ke bulaua keip tar mani geke bulauaig tena niguata uasaono toro mahar kot. Doh tar buturuono teke pungono ko uoum ro lun kare mat, a tukununono ke tapuak, doha kabeleng balanono ke siokor lua tauet. <sup>19</sup>O tamata uakapa tun i Jerusalem ka siokor ate tar puhon, maeit ka uelkilangua tar buturuon i Akeldama. Doh tonosio uelhiresin inggon e kula pare, a butur malatahanang deuating.

<sup>20</sup>“I lolono toro bolobolong Kereker, Pita ke kula pare, “Pare teka bolo peinir puhon, ‘Na uanion e turung tabotan, ahik me tamata ra turung uamaluain e turung uangoul tar buturuon.’ Kara bolo ponoin pare, ‘Uamaluana me tang giameher tamatang uoum keip gere palih tatanon.’”

<sup>21-22</sup><sup>o</sup>“Maeit inggon auia tun geti uamatoto palihieig me tamata geke uanguangoul, kare banga tagu tagigeig tar mamang binakalikinine ke latlateil tagu pe Iesu tagigeig, e uakikilanga tur pe tar binaka ke uahuhu pe Jon ger tang uahuhu tasir tamat e la tuka ka kale liu tur pein Iesu tagigeig, ke la pe i Heuen.”

<sup>23</sup>Maeit gisina ka uatagin tar tang torikir tamat, Josep gera uoto kila ponoin tang Barsabas, gera ueliate ponoin pare, te Jastus, doh nu Matias. <sup>24-25</sup>Gisina song ka lotu pare, “Tamata Noman, Inggono o ate tar kolous uakapa tunur mamang tamatalik. Ualasira tamiueim, mai tunur kaluasir toking tamata rasine ko uamatotoia tar pokoso sira pare, a aposoul, tar kale palih tar hagar ke hiliuin Judas, ke la pe tar uan ke malahirin e la uangoul.”

<sup>26</sup>Doh gisina song ka bakbaka uadud tar lot, doha loto ke dudula tang Matias, maeit Matias teke uanotongua poluk tar hangaul doha tang siokor aposoulsis ka uangoul ke hiliu pe Judas.

<sup>1</sup> 1.16-17 Ker 41.9    <sup>m</sup> 1.18 Mat 27.3-8    <sup>n</sup> 1.20 Ker 69.25; 109.8    <sup>o</sup> 1.21-22 Mak 1.9; 16.19; Jon 15.27

### A Iabena Dedeil ke laha nar Pentikos

**2** <sup>1P</sup>Tar binaka ke pokosor mareining tar Pentikos, gisine ra tagorong mana tang Iesu mesir aposoul ra siokor uangoul toto tar siokor um. <sup>2</sup>Ahik me sikir manasan, a alinganar inete ngohina tar romo uleik ke la turuha i Heuen, ke me uauoun tar umene ra uangoulinisin. <sup>3</sup><sup>q</sup>Gisina ka bang huara toro hue, a inete ngohinar luhuluh, bo ke me lala uelpakah puk, kare me mok i rana tar lus uakapa tunusin. <sup>4</sup><sup>r</sup>Gisina ka siokor uoun tar Iabena Dedeil, inggono ke guatangua tasisina ra mene tar giniameme siokor uelhire.

<sup>5</sup>O gisiamemer Jung toro giniameme ro pang uan tar koto uakap ra uangoul pon i Jerusalem, gisis ra uoto lotu pono tang God. <sup>6</sup>Tar binaka ka longorosina ra uelhire kahakaha pesina tar giniameme siokor uelhire, gisina ka siokor la toto. Gisina ka siokor lutara tun, teene ka longoro pesina ra uelhire kahakaha pesina tenas uelhiresin.

<sup>7</sup>Gisinar gisiamemer Ju ka lutar, kara namanaehe, kara kula pare, “Gisina dehesine ra uoto uelhire toro uelhireng Galili. <sup>8-9</sup>Doh maeit ri longoro inggeig ra menesina tonogio uelhire inggeig? Ingeig deho tamatang toro mamang uan, o gisiamem o peng Partia, i Midia, dohi Elam, o gisiamem o peng toro uan i Mesopotemia, dohi Judia, doh tar pang uan i Kapadosia, i Pontus, doh tar pang uan i Esia, <sup>10-11</sup>doh tar uan i Prigia me i Pampilia, o tamatang tar pang uan i Isip, menia tasir tamatang tar uan i Libia gere moko uahuhut tar uan uleik i Sairini. O gisiameme tagigeig geki pokoso tur i Roum, o Ju, doho tamata geke uapalih pare, o Ju, o gisiamem o peng Krit, doh tar uan i Arebia. Ingeig i siokor longoro ra uelhire tauete pesina tar bureher niguatar nang God tonogio uelhire katongo inggeig.”

<sup>12</sup>Gisina ka lutar, kara toboul, kara ueldangata katongois pare, “Hope re uahuahire per puhonene?”

<sup>13</sup>O gisiamehengua tasisina ka ueltang ualeng tasisin, kara kula pare, “Here ka inum dehesina me bureher bino.”

### Pita ke mene uamaroro tasir tamat

<sup>14</sup>Song ke tentur kai keip Pita tasir gime hangaul, doha tang siokor aposoul, kare mene uauleik tar uamaroro tasisina pare, “Inggoum ro uanotougener Ju, doh maisioumene rung uangoul i Jerusalem, uamaluana geru mene uamaroro inggo tar puhene tamiuoum, ualongoro uaia tun tar haua ru meneio. <sup>15</sup>O tamatasine ahik pah ka popouluana me inum, ngohina kung naman tagin pe inggoum. Gine daan aliuo harah, inggono song re 9 kiloko puk. <sup>16</sup>Bo a puhene ke kotpokosene daan, inggono ke mene tauete ponoin Joel ger propeit sioun, ke kula pe pare,

<sup>p</sup> 2.1 KT 23.15-21; Ual 16.9-11    <sup>q</sup> 2.3 Mat 3.11    <sup>r</sup> 2.4 Mak 16.17; Apo 4.31; 10.44-46; 19.6



- 17 God ke kula pare, ‘Tar uadouhinar marein,  
 inggo u turung uauoun tasir mamang tamatalik tenag Iabena  
 Dedeil.  
 O bung tamamiuoum, o kuah, doho bulout ra turung mene tauete  
 tonogo uelhireo ngohina tasir propeit.  
 Doh nomio bulout kalanioum ra turung banga tar inete ngohina  
 tar borborian,  
 doho mahoho ra turung borboriana tar bureher borborian.
- 18 Doh tar binakon, Inggo u turung uauoun tenag Iabena Dedeil  
 tosnogo tamatang kalekinale, o bulout doho kuah.  
 Tar mareininin Inggo u turung dingiha tenag Iabena Dedeil tasisin,  
 doh gisina ra turung mene sira tasir propet.
- 19 Inggo u turung uatouo tar bureher inet, kara uaparok i Heuen, doh  
 gane i kot,  
 doh tar binakon a deuating, karo hue doho diku uleik o turung  
 pokos.
- 20 A pisar e turung kitup,  
 doha bialok e turung kubara sira tar deuating,  
 i muduhia song re kotpokoso na mareinir Tamata Noman ger  
 tampopokoho tun.
- 21 Doh mais ra turung kila ualeik tar hanganar Tamata Nomana me  
 nipoul,  
 gisina tera turung udeil.’ ” *Joel 2.28-32*
- 22 Doh Pita ke mene ualatumana poluk pare, “Inggoum ro  
 uanoutougener Ju mu ualongoro uaia tun tar puhene. Iesu ger peng  
 Nasaret, a tamata giamehe sioko tun, doh inggono teke uamatotoin God  
 tar laha tagigeig, ke me ualasira pe tar uaparok, kare guata tar nitou tar  
 ualasira tena nitampopokoho God. Doh inggoum kung siokor ate manas.
- 23 A tamatonene ke heir sira manasampehain God tena nimalar, doh  
 na niate, doh inggoum menia tenas nipoulur tamata uasa, kung tung  
 pous tatanon, ke me mate pe tar korose. 24 Bo God puk ke uatua tapokis  
 tatanon, ke kale liu tur pe tatanono tar uelmahinging mat, teeit o mat  
 o matoto leue tar kuse uanono tatanon. 25 Ngohina sira ke mene uatuha  
 pono pe Debit tatanon, ke kula pe pare,

‘Inggo ku bang huara tar Tamata Noman e uangoul uahuhut dede  
 totoguo.

Inggo ahik pahu sokor, karu por,  
 teeit inggon e uangoul tabara totoguo.

- 26 Temaeit inggo u uaha tun ru mene pe,  
 doh inggo u turung pepe uangoul sira keip tar nitagorong mana  
 hope ke ualapagah pe God.

27 Teeit ingga ahik paho turung uamaluana totoguo u turung mate dede,  
 doh ahik pono paho turung uamaluana tenang tamatang  
 kalekinale ger dedeil,  
 e benga to tar keu.

28 Ingga ko ualasira manasa totoguo teru kale tar nitua gere moko dede.

Ge inggo pe u kale tar niuaha uleik tar uangoul tagu totomua.’”

*Ker 16.8-11*

29<sup>s</sup>“Ro bung kaloug, uauia geru uakalahara bako pare, tubugigeig Debit ger mahoho uleik ke mate doh ka keuin, doh na keuion e moko harampe e tuka daan. 30<sup>t</sup>Bo inggono puk a propeit, ke ate baka ke ualapagah katongo pe God tatanono pare, e turung guata me tang siokor bubungunon e tabila palih tono tabtabilon. 31<sup>u</sup>Debit ke ate uoum tar inete re turung pokos, inggono ke mene tauete tang Kristo e turung tua tapokis. God ahik pahe turung uelsakil tatanon mare mate dede, doh ahikir tukununa pahe turung beng.”

32<sup>v</sup>“God ke uatua tapokis tang Iesu, doh inggeim uakapene teking siokor banga tun tar matamiu. 33<sup>w</sup>Iesu ka kale kai taroin i Heuen, kare la tabila tar pang makoso tang God. Doh God ger tamanono ke heir tatanono tar labena Dedeil geke ualapagahain pare, e turung heir, doh Iesu teke dingiha tar labena Dedeil, doh inggon, teene kung bangaoum, karung longor. 34-35<sup>x</sup>Debit ahik pah teka kale kai taroin i ran, bo teke mene tauete puk pare,

‘A Tamata Nomana ke kula pare tenag Tamata Nomano,

Tabilane tar pang makoshia totoguo

e tuka tar binaka ru guato tosnongo uelmatana ra pehuarais,

kara uangoul i kukulebanga tenang nikaueke ingga.’” *Ker 110.1*

36<sup>x</sup>“Temaetit inggoum ro uanotougenger Ju pakung ate uaua tun toro mana pare, God teke guata tang Iesu gekung uiliatung pousisoum pare, a Tamata Noman, doh ter Kristo.”

37<sup>y</sup>Tar binaka ka longoro per tamata tar puhon, gisina ka kanuh, kara ueldolom, maeit ka kulangua tang Pita mesir gisiameher aposoul pare, “Ro bung tahimiueim, me hauangua paking guataieim?”

38<sup>z</sup>Pita ke mene hahaua tasisina pare, “Siokor inggoum uakapa tun mu uapalih tenami niguat, karung uamaluana gering uahuhu keipieim tamiuoum tar hangana Iesu geke heirihain God, e me uelkarus toсно

<sup>s</sup> 2.29 1To 2.10 <sup>t</sup> 2.30 2Sa 7.12; Ker 89.3-4; 132.11 <sup>u</sup> 2.31 Ker 16.10 <sup>v</sup> 2.33 Apo 5.32; 7.55-56 <sup>w</sup> 2.34-35 Ker 110.1 <sup>x</sup> 2.36 Apo 5.30-31

tamaton, maeit re kuse luara liu God teremi niguata uasaoum. Marung turung kaleoum tar Iabena Dedeil. <sup>39</sup>ʸA niualapagahonene e lain tamiuoum uakapa meso bubungumi menia pono tasisis ra uangoul i reh gere turung kila pokosoisir Tamata Noman ge nagi God inggeig.”

<sup>40</sup>Pita ke meneng uatagin tasisina tar bureher menemen, kare mene uapopokoho tasisina pare, “Uelkarus liu katongosioum tar niguata uasang tar babeir tamatang daan.” <sup>41</sup>\*Maeit gisis ka tagorong mana tena menemene Pita, ka siokor uahuhunguais, doh here ka la matotois tar 3,000ir tamata baka poluk ka la uanoto tasisinar tamatang tagorong mana tang Iesu tar binakon.

### A nipepe tokahang tasir tamatang tagorong man

<sup>42</sup>“Gisina ra siokor ualongoro uaia tun tenas niualasirar aposoul, kara pepe tokaha pono tar namana huara tapokis toro uadouhina ro ein geke guatain Iesu, kara lotu tokah.

<sup>43</sup>O tamata uakapa tun i Jerusalem ka uoun tar niueltadang sokoro ra banga pe tasir aposoul ra guata pe tar giniameme siokor nitou, kara uaparok. <sup>44</sup><sup>b</sup>O tamatang tagorong mana uakapa tun ra siokor pepe tokah, kara ueluelheirie hamas tunis tenas inet. <sup>45</sup>Gisina ra uabulaua tenas inet, kara heir tar mani tang hingiar tamata re katupa tar niein ue a inet.

<sup>46-47</sup><sup>c</sup>A mamang mareinilik gisina ra pepe tokaha dedempe tar umang lotu ger dedeil. Gisina ra uoto ein bereit to dedempe tonosio um tar namana huara tono uadouhina ro ein Iesu, kara siokor ein tokah, kara uaha tun, kara uelbuleis teres niein, kara uatakai tang God ra pepe tokaha pe. Doho tamata uakapa tun ka siokor hagouo uaia tasisin. Doha Tamata Nomana ke uelkarus tur tasir burehe tenas niguata uasa tar uaburehe dedempe tasisin.

### Pita ke uauia tar tamat a mater keken

**3** <sup>1</sup>Tar siokor binak, nar moloi, tar binakang lotu, Pita me Jon kura lang lotu tar umang lotu ger dedeil. <sup>2</sup>Doh a tang siokor tamat a mateng siounur toking kekena tar binaka ka pohoin, ra la uoto uatabilain i uoum toro pirpirikinar umang lotu ger dedeil gera kilain o pirpirik mataia mare hingo mena mani tasir tamata gera lekela iuma tena uma God. <sup>3</sup>Doh tar binaka ke bang huarono tas Pita me Jon ura marang leke pela toro pirpirik, inggono ke dangata tasrasina mena mani. <sup>4</sup><sup>d</sup>Doh Pita me Jon kura banga uanono tatanon, kare kula Pita tatanono pare, “Bangameane tamiraeim.”

<sup>5</sup>Maeit inggono ke banga uanono tasrasin, e naman ura heir rasina me inete tatanon.

ʸ 2.39 Ais 57.19    ʒ 2.41 Apo 2.47; 4.4    <sup>a</sup> 2.42 Apo 20.7    <sup>b</sup> 2.44 Apo 4.32-35

<sup>c</sup> 2.46-47 Apo 6.7; 11.21    <sup>d</sup> 3.4 Apo 14.9

<sup>6</sup>Bo Pita puk ke kula pare tatanon, “Inggo ahik menag mani, bo a haua puk gere moko toto guo, inggo u heir totomua. Tar hangana Iesu Kristo ger peng Nasaret, ingga o tentur doho la.” <sup>7</sup>Doh Pita ke kuse tar limanon, kare reih uatentur tatanon. Ahik me manasan, a ueltumaninar kekenono ke uia, kare tampopokoh. <sup>8</sup>Kare siaksiaka kai teilion, kare tur katong, kare la, kare la tagula iuma tar umang lotu tasrasin. Inggon e lampela, kare siaksiaka kai teil, kare uatakai tar hangana God. <sup>9-10</sup>Doho tamata gera uangoul tar binakono ka siokor bang paroko tatanono pare, ter tamata gere uoto tabila toro pirpirik mataia ger uoto hinga mani, doho tamata ka siokor lutara tar tamatono ke uia pe.

### Pita e uelhire tasir tamat iuma tar umang lotu ger dedeil

<sup>11</sup>Doh tar binaka re kuse teiliono tas Pita me Jon, o tamata ka siokor lutar, kara siokor ualola tar la banga tatanon. Rasin ura uangoul tar buturung uangoungoul ra kilain, na paranda Solomon. <sup>12</sup>Tar binaka ke banga Pita tasir tamata ka la toto pe, inggono ke kula tasisina pare, “Ir tamatang Israel, ae maene kung lutaroum? Ae maene rung uakeis uanonoum tamiraeim? Raeim ahik pah kira uauia keip tar tamatene me mira nitampopokoh ue teene kira guata pe raeim tar inete uaia gere uauaha tang God, maene ke laon. Ahik! <sup>13</sup>Na God Abraham, Aisak doh Jekop, doh nasi God ro bung tamamiuoum ke guata pare, mare uatakai tar tun Iesu gekung ueliuilaioum tang Pailat mara la uiliatung pousin, karung ueluelde ke marang uamaluana pe Pailat tatanon e la. <sup>14</sup>Kung ueluelde tar tamata ger dedeil, kara tamata kodkodoh, bo kung malahir tang Pailat e uamaluana tar tang haluh pous tamata tere lame tamiuoum. <sup>15</sup>Maeit te inggoumumpe tekung uiliatung pous tar tamatang heir tar nitua, bo God puk ke uatua tapokis tatanon. Doh raeim tekira banga tun maene ira mene tauet. <sup>16</sup>A Tamatener rung ateioum, karung banga ke tampopokoho tur per tukununon tar hangana Iesu Kristo ger peng Nasaret, kara nitagorong mana tatanon, temaene ke uia uakapa tunion. Doh inggoum kung siokor banga ke pokoso per puhonene.

<sup>17</sup>Ro bung tahig, inggoum mesnomio tamatang uoum keip ahik pah kung ate mai tun Iesu, maene kung guata pare. <sup>18</sup>Bo a haua puk kung guataioum, e me uakeluk sirampe tono uelhire God geka mene taueteinir propeit pare, ‘Iesu Kristo ger tamatang uelkarus geke heirihaion e turung kale uelmahing, kare turung mat.’ <sup>19</sup>hTemaait inggoum mu uapalih, karung hiliu tenami niguata uasa, karung tapokisime tang God mare kuse luara liuiono teremi niguata uasaoum mare kotpokosor nihagouo uaia tamiuoum gere la tur tang God. <sup>20</sup>Song re turung heirihaono

<sup>e</sup> 3.6 Apo 4.10; 16.18    <sup>f</sup> 3.13 KT 3.6,15; Luk 23.13-25; Apo 2.23    <sup>g</sup> 3.17 Luk 23.34; 1Ti 1.13    <sup>h</sup> 3.19 Apo 2.38

tamiuoum tang Iesu ger tamatang uelkarus geke uamatotoion. <sup>21</sup>Bo inggono puk e uangoul bak i Heuen e tuka tar binaka ke uamatotoin God gete uatimuh uakapa baka tar mamang inetelik. Song re turung lahaon, ngohina sira ke ualapagah pe God tasir propeit sioun, maene ka mene tauete tar puhon.

<sup>22</sup><sup>i</sup>Ge Moses pe ke kula pare, ‘A Tamata Noman ge nami God inggoum e turung uakotpokoso me propeit ngohina totoguo, e la tur i uantinanina tamiuoum, doh inggoum mu longor, karung uakeluk tar mamang inetelik re kulagiono tamiuoum. God e turung heiraha tatanono tamiuoum ngohina sira ke heir peha totoguo tamiuoum.’ <sup>23</sup>‘Bo a tamata puk ge ahik pahe longor, kara hik pahe uakeluk tena ualatoho inggon, a tamatono ra turung aha liu turin tosno tamat.’<sup>j</sup>

<sup>24</sup>Ge o bureher propeit uakapa tun pe, ke uakikilanga tur pe tang Samuel, ka siokor mene tauete tar inetenine re kotkotpokosolaene daan. <sup>25</sup><sup>k</sup>Inggoum tesu bubungusur propeit. Inggoum terung uangoul teil i lolono tar ualapagah geke guata keipin God toso bung tubumiuoum. Ke kula pe tang Abraham pare, ‘Toso bubungumua, o tamata uakapa tunane tar koto ra turung guata uaias.’ <sup>26</sup><sup>l</sup>Maeit God ke heir uakikilangaha tena tamatang kalekinale tamiuoumur Israel mare me guata uaiia tamiuoum marung turung tar mud teremi niguata uasa.”

#### Pita me Jon ka uamokois tar umang uih

**4** <sup>1</sup>Gitie ura menmene pe Pita me Jon tasir tamat, o pater, doho tamata uleiking tasir tamatang uiliatung gera kauেকে tar umang lotu ger dedeil, doho Sadiusi ka lame tasasin. <sup>2</sup>Gisina ka nimaliana uasa tun, teene rasina kura mene ualasin, kaura mene tauete pono tang Iesu pare, a tamatang uatua tapokis tasir tamat. <sup>3</sup>Rasina ka kuseis, kara uamokois tar umang uih, doh teene ke reiu manasa peon, maene kura uangoul rasina ke la tuka tar giameher marein. <sup>4</sup><sup>m</sup>Bo o burehe pukur tamatasine ka longoro toro uelhire roono ka tagorong man. Maeit gisis ka tagorong mana ke la banotois tar 5,000.

<sup>5</sup>Tar uagiamehenar marein o tamatang uoum keip, doho mamahoholiking tasir Ju, karo tamatang ualasira tar ualatut ka la toto i Jerusalem. <sup>6</sup>Anas ger pater a i rana uain tasir patere uakap e uangoul tagu pon menia tang Kaiapas, doh Jon me Aleksander ger toking tahina Anas menia pono tasir gisimehe ro bung tahinalikion. <sup>7</sup>Gisina ka heir tar ualatoho pare, ra keipimeis Pita me Jon i uoum tasisin, kara heheke tasrasina pare, “Mai tun ke heir tar nitampopokoho tamiraoum, doha hangana maiene ura guata keipin raoum?”

<sup>i</sup> 3.22-23 Ual 18.15,18-19    <sup>j</sup> 3.23 Bolobolong tenas Kalekinaler Pater 23.29

<sup>k</sup> 3.25 Uak 22.18    <sup>l</sup> 3.26 Apo 13.46    <sup>m</sup> 4.4 Apo 2.41

<sup>8</sup>Doh Pita ge a uoun pe tar Iabena Dedeil ke kula pare, “Ir tamatang uoum keip, doh nosio mamahoholikir tamat! <sup>9</sup>Inggoum mu dangdangata tar inete uaia gekira guatain raeim tar tamata ger mater kekena? Mu dangatoum, hope ka guata uaia peion? <sup>10</sup>Temaeit inggoumene, doho Ju uakapa pakung ate pare, inggono ter hangana Iesu Kristo ger peng Nasaret gekung uiliatung posuioum, bo ke uatua tapokis pukin God, maeit kung bangoum tar tamatene ke uia, kare tur.

<sup>11</sup>°Iesu ter tang siok ka uelhirein tonu uelhire God pare,

‘Inggono ngohina toro palua geke deinir tamatang tuh,  
bo roono puk tero palua i rana uain tar ginameher palua  
uakapa tun.’”

*Ker 118.22*

<sup>12</sup><sup>p</sup>“Ahik baka poluk me tamatane tar koto re banot e uelkarus tagigeig te Iesu puk manasampe geka heirihain tar me uelkarus tagigeig uakap.”

<sup>13</sup>Tar binak ka banga pesina tas Pita me Jon ahik pe mesira nisokor, ge gisina pe ra ate pare, rasin ahik pah kura kale niate to tagu tar sikul, rasin a toking tamata ueltebeir puk. Gisina ka bang paroko pono tasrasina pare, te kura uakuakeluk teil pono tang Iesu. <sup>14</sup>Bo gine puk ka banga pesina tar tamata geka uauia re tur tagu pe tasrasin, gisin ahik pah ka mene baka poluk me puh. <sup>15</sup>Temaeit gisina ka ualatoho tasrasina tar hiliu baka tar tine umang kedang. Song ka la tokaha polukusin tar uelkodoh pare, <sup>16</sup>“Me haua paki guataieig tar toking tamata rasine? Ingeig ahik pahi banot i guata me puh ge o tamatang Jerusalem pe ka ueliate tar nitouo uaia kura guatguataig rasin, doh inggeig ahik pahi banot i uolih. <sup>17</sup>Bo tar tur tane puk tar puhonene mara hikir tamata ueltebeir pah ra ate, inggeig paki mene uapopokoho tasrasina tar uakenua tar mene ualasira baka poluk mo tamata tar hangana Iesu.”

<sup>18</sup>°Song ka kila ualeka polukis rasin, kara la kula tane uapopokohois pare, “Ahik baka poluk pah ura mene tauete ue ura ualasira keip tar hangana Iesu.”

<sup>19</sup>°Bo Pita puk me Jon kura kula pare, “Mu namanaehe baka ge para uiaono tar matana God, tamiraeim tar longoro tamiuoum, doh ahik pah God. <sup>20</sup>Ge raeim pe ahik pah mira banoto mira uakenua tar mene tauete tar inete kira longoroig doh kira bang.”

<sup>21</sup>I muduhia tar ginameher meneng uasokor ka meneigisin, rasin song ka uamaluanais ura tauet. Gisin ahik pah ka banoto ra namana uamatoto hope ra uauelmahing pe tasrasin, teene o tamata ra siokor uatakai manasa tang God, tar haua ka bangaig ke kotpokos. <sup>22</sup>Ge a tamata pe geka uatouoin na niuia ko siaua ponoin no krismas tar toueitir hangaul.

<sup>n</sup> 4.10 Apo 3.6,13-16    ° 4.11 Ker 118.22    <sup>p</sup> 4.12 Mat 1.21    <sup>q</sup> 4.18 Apo 5.28

<sup>r</sup> 4.19 Apo 5.29

### Nasi lotur tamatang tagorong man

<sup>23</sup>I muduhia tar binaka ka uamaluanar tamatang uoum keip tasir Ju tas Pita me Jon, rasina kura la tapokis tasir tamatang tagorong man, kaura la ueluatata tasisina hope ka kulkula per patere uleik mesnosio mamahoholikir Ju tasrasin.

<sup>24</sup>Tar binaka ka longorosina tar puhonene, gisina ka siokor lotu tokaha tang God, kara kula pare, “Tamata Noman, ingga teko tou i rana dohi kot, menia tar teh, doh tar mamang inetelik re moko keip teil tananin. <sup>25</sup>A Iabena Dedeil ke heir tonongo uelhirea tang Debit ge nang tamatang kalekinalea. Debit ge tamamiueim ke kula pare,

‘Ae maene o mamang tamataliking toro mamang pang uan ra siokor nimalianantiehe tun,

kara marang guata tenas inete ger sa, a tabo tengkan?

<sup>26</sup>O mamang toiang tar koto uakap ra tur tar marang uiliatung, doho tamatang uoum keip tasir tamata ra la toto tar uelkoi keip tang God ger Tamata Noman,

kara uelkoi keip pono tar tamat geke uelpikurin God.’ ” *Ker 2.1-2*

<sup>27</sup>“Na menemene Debit ke kotpokosene daan pare, a mana tun, temaeit Herot me Pontius Pailat kura la tokaha keip tasir tamatasit ahik paho Ju tagu menia pono tasir tamatang Israel i lolono tar uan uleik i Jerusalem tar ueluumoke me ninamana tar uiliatung pous tang Iesu ge nang tamatang kalekinalea ger dedeil geko uelpikurin. <sup>28</sup>“Gisina ra guata uakelul puk tar haua ko namana keipia tereng nitampopokoh, doh reng nimalara pare, e turung kotpokos. <sup>29</sup>“God ger Tamata Noman, gine daan ingga o namanaehe tar uasokoronine ra meneig tamiueim, karo uaongolo tamiueim nongo tamatang kalekinalea mara hiekeim pah mi sokoro tar mene tauete tonongo uelhirea. <sup>30</sup>Ingga o hueha tar limoum tar uauia tasir tamat, karo guata me nitouo keip tar hangana Iesu ger dedeil ge nang tamatang kalekinalea.”

<sup>31</sup>Ginempe ka uakapa pesina tar lotu, a umene ra uangoulinisin ka uagunain, Doh gisina ka uoun tar Iabena Dedeil, kara ongolongua ra mene tauete pe tono uelhire God.

### O tamatang tagorong mana ra uelheirie tenas inet

<sup>32</sup>“O mamang tamatang tagorong manalik ke siokor ueluaie tunis, kara sioko tun res ninaman. Ahik me tang sioko re kula pare, tena inet a nana

<sup>s</sup> 4.24 KT 20.11; Neh 9.6; Ker 146.6    <sup>t</sup> 4.27 Mat 27.1-2; Luk 23.7-11; Apo 3.13

<sup>u</sup> 4.28 Apo 2.23    <sup>v</sup> 4.29 Epe 6.19    <sup>w</sup> 4.32 Apo 2.44

me pahen, bo ra uelheirie puk tun tenas inet. <sup>33</sup>O aposoul ra mene keip tar nitampopokoho ra mene tauete pe tang Iesu ger Tamata Nomana ke tua tapokis pe, doh God e poul keip tun tena nimalara tasisin. <sup>34-35</sup><sup>x</sup>Gisin ahik pah ra katupa me inet, teene ge o tamata pesine nas kot, doh nosio uma ka uabulaua tananin, kara keipime tar mani tasir aposoul, doh gisina tera heir tang mai gere katupa tar inet.

<sup>36</sup>A tang sioko tasisinar tamatang tagorong man, a hangana tang Josep, a peng toro matina tasir Libai, e la tur i Saiprus, geka uelkilainir aposoul pare, Banabas (doha puhonene Banabas e kula pare, “A tamatang uapopokoh tasir tamat”). <sup>37</sup>Inggono teke uabulaua tonono mahar kot, kare heir tar mani tasir aposoul.

### Ananaias me Sapira kura boh

**5** <sup>1</sup>Bo a tang sioko pukur tamat a hangana tang Ananaias mena kuah, a hangana tang Sapira, kura uabulaua pono tonosira mahar kot. <sup>2</sup>Bo Ananaias puk ke la heir tar giniameme pukur mani tasir aposoul, kare uoho dede tar giniamemeh, kare hire tasisina pare, “Teenina uakapa puk manasanin.” Doh na kuahon e ate teil ponompe ke guata peono paar, teene rasina kura uelhote tar uoho uanono tar ginameher mani.

<sup>3</sup>Maeit Pita ke kula pare, “Ananaias! Ingga ko uoun ro baloum tang Satan, maene ro marang boho ingga tar Iabena Dedeil, karo hiliu tar giniamemeh mani pare, a noum geka bulauaig tonongo mahar koto ingga? <sup>4</sup>A mahar kotonin a noumua geto marang uabulaua ue ahik paho uabulau. Dohi muduhia geto marang uabulaua tanin, ingga song ro matotong guata ueltebeir tenang mani hope ro malara pe, Ae maene ko namana, karo guata sira pare? Ingga dehe ko boho tang God, ahik pah tamiueim.”

<sup>5</sup>Tar binaka ke longoro pe Ananaias tar puhon, inggono ke mate ualutara puk manasampe. Doho tamata geka longoro tar puhonene ke kotpokoso pe, gisina ke uohoisir nisokoro uleik.

<sup>6</sup>Song ka lamer tamata kalan, kara gomo tar tukununa Ananaias, kara keip tauet, kara la keu.

<sup>7</sup>I muduhia kura karuh baka per touonor aua, na kuahono ke leka ponome ium, e telempe tar puhene ke kotpokos. <sup>8</sup>Pita ke dangata tatanono pare, “Hire totoguo ter bulauana puk manasampe ro mahar kotonine gekura uabulauais raoum me Ananaias?” Kare kulono pare, “Te paare nomanampe. Ter bulauana nomanampe.”

<sup>9</sup>Maeit ke kula Pita tatanono pare, “hope maene kura ueluauias raoum tar uedanga tena Iabena Dedeil God? Bang! O tamata geka la keu baka uoum tenang bulouta gisine manasa toro pirik, doh gisina ra turung kabe tauete poluk totomua.”

<sup>x</sup> 4.34-35 Apo 2.45   <sup>y</sup> 5.2 Apo 4.34-35   <sup>z</sup> 5.3 Jon 13.2



<sup>10</sup> Ginempe ke mene uakapa pe Pita, inggono ke mate ualutara pon, kare punga uahiua puk manasampeane i uahuhut tar kekena Pita. Song ka lekemer tamata kalan, kara me banga tatanono re rikin pe, gisina ka uelkabe tauete poluk tatanon, kara la keu tabarampein tena bulout.

<sup>11</sup> Doh gisinar tamatang tagorong mana mesir gisiamehemper tamata geka longoro tar puhono ke kotpokoso pe, ka uoun tar nisokor.

### O aposoul ka uauia tasir bureh

<sup>12</sup> <sup>a</sup>O aposoul ka guata tar bureher nitou, kara niparoko ger giniamehe sioko tunane tasir tamat. Doho mamang tamatang tagorong mana ra uoto uangoul tokaha tar tine umane tar umang lotu ger dedeil gera kilain, na paranda Solomon. <sup>13</sup> O bureher tamata ra uairana tasisin, bo ra sokoro puk tar uataguis tasisin. <sup>14</sup> Bo o gisiamehe puk ponomper tamata mesir kuaha ka tagorong mana tang Iesu ger Tamata Noman, kare uanoto tagu polukis tasisin.

<sup>15</sup> Temaeit a puhonene ke guatangua tasir tamata ka keip pokoso tasir tamatasiner momouh, kara me uarikin keipis tar uatane tar lel mare me turung ragom taner momolouinar tukununa Pita gete me lihila tar buturuon.

<sup>16</sup> O gisiameher tamatang toro uan ulekinine i tekteken i Jerusalem, ka keip toto ponome tonosio tamatasiner momouh, doh gisitir nihikung liouan, Doh ka me siokor uia pon.

### O aposoul ka kale uelmahing

<sup>17</sup> Bo a patere ger i rana uain tasir patere uakap meso bung uanoton gesir Sadiusi, gisina ka gehe uasa tun. <sup>18</sup> Maeit gisina ka kuse tasir aposoul, kara uamokois tar karabus ger nasir tamata uakap. <sup>19</sup> <sup>b</sup>Bo naboung puk na anggelour Tamata Nomana ke me puka toro pirpirik, kare ueliu tauete tasisin. <sup>20</sup> Kare kula pare, “La, karung la iuma tar umang lotu ger dedeil, karung la hire luaka tun tasir tamata tar timuhur nitua.”

<sup>21</sup> O aposoul ka longoro hape ka kula peis, maeit naliliuolik gisina ka la tar umang lotu ger dedeil, kara la mene ualasira tasir tamat.

Tar binaka ke pokosor patere ger i ran meso bung uanoton, gisina ka kila tar tabila tokahang ueluatata tasir tamatang uoum keip mesir mamahoholikisiner tohangasing tasir Ju. Gisina ka ualatie tasir tamatang kaueke tar la tar karabus mara la ueliuime tasir aposoulane tasisin. <sup>22</sup> Bo gine puk ka la pokoso pesin, gisina ka la mahang sirsir teil tasir aposoul. Maeit gisina ka la tapokis tar buturung tabila tokahang ueluatat, kara la hire pare, <sup>23</sup> “Inggeim king la tupara tar karabus a

<sup>a</sup> 5.12 Apo 2.43; 14.3    <sup>b</sup> 5.19 Apo 12.7-10

niholoro uaia nomanampe meniampe tasir tamatang tur kauেকে ra turumpe tar pirpirik, bo tar binaka puk king puka inggeim, inggeim ahik pah king tupara me tang siokor tamat ium.”

<sup>24</sup>Gine ka longoro pesina ka ueluatata peis paar, a tamata uleik tasir soldia tar umang lotu ger dedeil menia tar tamata uleiking tasir patere kura tobouluntiehe tun, kaura namanaehe tar haua tun re uahireinir puhon.

<sup>25</sup>Song ke pokoso turumer tang siokor tamata tar umang lotu ger dedeil, kare me kula pare, “Ualongor! O tamata gekung uamokosium tar uih, gisila ra tur iuma tar umang lotu ger dedeil, kara mene ualasira tasir tamata tang Iesu.”

<sup>26</sup>Maeit a tamata uleik tasir tamatang uiliatung mesno uiluiliatung ka la tar umang lotu ger dedeil, kara la ueliuime tasir aposoul tenas tine umar tamata uleik. Bo gisina puk ahik mata uaelmahing tasir aposoul, teene gisina ka sokoro geta bakbak pousur tamata tasisin.

<sup>27</sup>Song ka me ueliuilaisir aposoul tasir tamata uleik mare heheker tamata uleiking tasir patere tasisin. <sup>28</sup>“A tamata uleiking tasir patere ke kula pare, “Inggeim king ualatoho tane tamiuoum pare, ahik baka poluk pah mu mene ualasira tar hangon, bo inggoum puk kung uauoun tasir tamatang Israel tenami niualasir, karung marang baktula ponola tamiueim pare, teking uiliatung pous pono tatanon.”

<sup>29</sup>“Kare mene hahauangua Pita mesir gisiamer aposoul pare, “Inggeim mi uakeluk puk manasampe tonu uelhire God, doh ahik pah mono uelhire me tamat. <sup>30</sup>Nas God ro bung tubugigeig geke uatua tapokis tang Iesu gekung uiliatung pousisium, kung tine uakuse pe tatanono tar korose. <sup>31</sup>“God ke kale kai taro i Heuene tatanon, tar la tabila tena pang makoso God. Inggono ke uataakai tatanon, kare heir tatanon tar hangan, ‘A tunar toia, kara tang uelkarus,’ mare poul tasir Israel mara banotong uapalihisin tenas niguat, kara la tang God, maeit re kuse luara liuono teres niguata uasasin. <sup>32</sup>Inggeimene teking banga tun tar inetenin menia pono tar Iabena Dedeil geke heirihain God tasir tamata geke longoro tatanon.”

<sup>33</sup>Tar binaka ka longoror tamata uleik tar puhon, gisina ka nimaliana uasa tun, kara marang siokor tung pous tasisin. <sup>34</sup>Bo a tang sioko pukur Parisi, a hangana tang Gamaliel, a tamatang ualualasira tar ualatut gera siokor ueltadainir tamata uakap ke tentur kaiane i uantinana tasir tamata uleik, kare ualatoho pare, ra keip tauete sikoro bakaisir aposoul i kalahara tar sikinar binak. <sup>35</sup>Ka tauete bakar aposoul i kalahar, song ke kulono tasir gisiamer Parisi pare, “Ro bung uanotoug, bangbanga hamas tun tar huar rung marang guatain tasir tamatasine. <sup>36</sup>“Ahik

<sup>e</sup> 5.28 Mat 27.25    <sup>d</sup> 5.29 Apo 4.19    <sup>e</sup> 5.31 Apo 2.33-34; Epe 1.20; Hib 2.10; 12.2

<sup>f</sup> 5.36 Apo 21.38

pah sioununtieh, ke guata Teudas pare, a tamata uleik, doh here kaelais tar 400ir tamata ka tagorong mana tatanon, kara uakeluk tatanono tar ueluelde tar gavamaning Roum. Inggono ka uiliatung pousin, kara lala uelpakahingua no tamatasis ka uakeluk tatanon, kara hikingua pah ka guata baka me inet. <sup>37</sup>I muduhia tatanon, Judas ger peng Galili ke uakotpokoso pono tar puh, tar binakang aha tasir tamat, kare uoum keip tasir tamata tar ueluelde pono tar gavamaning Roum. Inggono ka uiliatung pous ponoin, doh no tamatono ka lala uelpakah pon.”

<sup>38</sup>“Temaene tar puhene, inggo gine ru ualatut tamiuoum pare, Hiliu! Umaluana tasisina gera la! Ge para niguatonene a nana puk me tamat, inggon e la kapampe. <sup>39</sup>Bo ge para nang Godor niguatonene, inggoum ahik pah mu banoto mu tur tane, inggoum mu la ueltuparangua pare, mu tur tane tang God.”

<sup>40</sup>Doh gisinar tamata uleik ka siokor uauia tena menemene Gamaliel. Gisina song ka kila ualeke tapokisila iuma tasir aposoul, kara me halhaluhis toro uohong haluh. Song ka ualatoho tasisina pare, ahik baka poluk pah ra mene tauete baka poluk tar hangana Iesu, kara kula tasisina ra la.

<sup>41</sup><sup>h</sup>Maeit o aposoul ka hiliu keip tasisina tar niuah, teene God e uaha tun tasisina ka uamatala peis, ka kale uelmahing pe tar hangana Iesu. <sup>42</sup>Re la per mamang marein, gisin ahik pah ra uakenua tar mene ualasira toane tar umang lotu ger dedeil, doh ganempe toro mamang umalik ra uatakai pe toro Uelhire Uaia pare, Iesu te Kristo.

### O mouitir tamatang poul ka uamatotois

**6** <sup>1</sup><sup>i</sup>Tar binakanin, o tamatang tagorong mana ka burehentiehe uain. Doho Jusine ra ate toro uelhireng Grik ka menmeneng nimaliana tasir Jusiner peng Israel tun ra uelhire toro uelhireng Hibu, teene o kuaha nimate liuing Grik ahik pah ra uoto kale tagu me nipoul tar mamang binakalik gera buligir niein.

<sup>2</sup>Maeit o aposoul ka kila toto tasir tamatang tagorong man, song ka kula pare, “Inggon ahik pahe turung kodkodoho tamiueimir aposoul tar hiliu tar mene tauete tono uelhire God, karing uangoulung bul puk tasir kuaha nimate liu.

<sup>3</sup>Temaait ro bung tahimiueim! Uamatoto me mouitir tamat i uantinanina tatamiu gera ateis pare, ra uoun tun tar Iabena Dedeil, karo tang naman. Inggeim mi turung uamatoto tasisin tar guata tar kalekinalenin. <sup>4</sup>Karing turung uamoko tun teremi ninamana tar lotu, kare tar kalekinale toro uelhire ro nang God.”

<sup>5</sup>A ninaman taginiono ke uauaha tasisina uakap. Gisina ka uamatoto tang Stiben, inggon a tamatang tagorong mana tun tang God, kare uoun

§ 5.40 Apo 4.18    <sup>h</sup> 5.41 Mat 5.10-12; 1Pi 4.13    <sup>i</sup> 6.1 Apo 4.35

tar Iabena Dedeil. Gisina ka uamatoto pono tang Pilip, Prokorus, Nikanor, Timon, doh Parmenas, kare Nikolas ger peng Antiok, inggono ke uapalih, kare lotu tagu tasir Ju. <sup>6</sup>Gisinar tamatang tagorong mana uakapa ka uatur tasir niuamatot i uoum tasir aposoul, doh gisina ka siokor uaponala tar limas i rana tasisin, kara heir tenas lotusin.

<sup>7</sup>Doh temaeit no uelhire God, song ko la ueltebeir. Doho tamatang tagorong man i Jerusalem ka burehe uateuele tun, karo burehe ponor patere song ka tagorong mana pono tang Iesu.

### Stiben ka kusein

<sup>8</sup>God ke uauoun tun tar nitampopokoho tang Stiben, kare poul tatanon ke uakotpokoso tar bureher nitou i uantinanina tasir bureher tamat. <sup>9</sup>Bo o gisiameher tamata ka tur tane tatanon, gisisir Ju tar umang lotur nasir Ju gera kilain nas umang lotur Ju ge ahik paho karabus, ka ueluelperer, o Jung Sairini, doho Aleksandria menia pono tasir tamatang tar pang uan i Silisia, dohi Esia. O tamatasina ka uakekena tar ueluelperere keip tang Stiben, <sup>10</sup>kbo ahik puk pah ra banoto tena niate uaiaon gere la tur tar Iabena Dedeil.

<sup>11</sup>Maeit gisina ka menmene uahoun uanomo tasir gisiameher tamata tar kula pare, “Inggeim king longoro tang Stiben ke menmene uasa pe tang Moses, doh tang God.”

<sup>12</sup>Doh gisina ka uatenturungua tar balasir tamata mesir mamahoholik, karo tamatang ualasira tar ualatut. Gisina ka kuse tang Stiben, kara keipila tatanono tenas kibungur mahohong Ju gera kilais, o Sanhidran. <sup>13</sup>Gisina ka uamatoto tasir tamata tar boho tola tatanono pare, “A tamatene ahik tun pahe banotong uakenua tar meneng ueluelde tar buturener dedeil, kare ueluelde pono tar ualatut. <sup>14</sup>Doh inggeim king longoro pono tatanon e kula pare, a tamatene ra kilain tang Iesu e turung mamantouo tar umene, kare uapalih tena niualatut Moses geke uelueluahiueme tagigeig.”

<sup>15</sup>Doho tamata gera tabila tar kibungene ra siokor banga uanono kompe tang Stiben, kara banga tang Stiben ke uapalih per poren, ke ngohina tar porenar anggelou.

### Na menemene hahaua Stiben tasir Sanhidran

**7** <sup>1</sup>Song ke dangatar patere ger i ran tatanono pare, “A menemenenine ra tohtoholaig totomua a manampe?”

<sup>2</sup>Doh Stiben ke mene hahaua pare, “Ro bung tahigulik mesnogo mamahoholik, mu ualongoro totoguo! Nagi God inggeig ger tampopokoho tun ke ualasira toin i Mesopotemia tang Abraham ge tamagigeig tar

<sup>j</sup> 6.7 Apo 2.41; 16.5 <sup>k</sup> 6.10 Luk 21.15 <sup>l</sup> 7.2-3 Uak 11.31; 12.1

binaka halana te la i Haran. <sup>3</sup>Doh God ke kula tatanono pare, ‘Hiliu tenang pang uan, karo tahimulik, doho la toro mahar koto geru turung hireio totomua.’ <sup>4m</sup>Maeit inggono ke hiliu tonosio mahar kotor Kaldia, kare la uangoul i Haran.”

“I muduhia ke mate pe tamanon, God ke ueliuime tatanono toro mahar koto rone rung uangouluoum daan. <sup>5n</sup>God ahik mate heir me sikir koto toro mahar koto roono tatanon pare, o nan. Tar binakon Abraham ahik me tun, bo God puk ke ualapagah tatanono pare, inggono meso bubunguna ra turung kale toro mahar koto roon. <sup>6o</sup>God ke menmene tatanono pare, ‘O bubungumua ra la turung uangoul tar pang uan ahik paha nasisin, doh gisina ra turung uakarabuis, kara guata uasais e banoto toro 400 ro krismas. <sup>7p</sup>Bo inggo puk u turung uauelmahing tasir tamata gera uakarabus tasisin, dohi muduhia gisina ra turung hiliu tar uanion, kara me lotu to tar buturene totoguo.’<sup>q</sup> <sup>8r</sup>Song ke kula God tang Abraham tar poko tar tukunun. A puhono tere uabang paroko tar niualapagah ke guata keipin God tatanon. Doh Abraham ke uakotpokosongua tang Aisak, i muduhia tar tualir marein ka poho peion, inggono ka pokoin. I muduhia Aisak teke uatamanain Jekop, doh Jekop teka uatamanaisir hangaul, doha tang torikir tamat, gisina teso bung tubugigeig.”

<sup>9s</sup>“Gisina ro bung tubugigeig ka nimalianang gehe tang Josep, temaene ka uabulauasina tatanono pare, a karabus tasir Isip. Bo God puk e uangoul tagu tatanon, kare uelkarusungua tatanono tar mamang binaka uasa. <sup>10t</sup>Inggono ke heir tar ninamana uaia, kare uamalagir tang Josep tar kale tur tang Pero ger toiang Isip tar hangana uleik, maeit ke guatangua tatanono tere uoum keip i Isip, kare kaueke tono uma uakaponor toia.”

<sup>11u</sup>“I muduhia a gogo uleik ke ualo i Isip, dohi Kenan, kare uakotpokosongua tar binaka uasa tasir tamat, maeit o bung tubugigeig ahik tun pah ka banotong tupara me niein. <sup>12v</sup>Tar binaka ke longoro Jekop pare, a raes-uit e mok i Isip, inggono ke ualatue toso bung tubugigeig tar la banga tagin. <sup>13w</sup>Tar uatorikinar nila tasisin, Josep ke uahire tasisina pare, mai tun, doh Pero ke la ate pono toso tahinalik Josep. <sup>14x</sup>I muduhia tar puhonene, Josep ke ualatue ra la kalein taman menia toso bubungun. Gisin o mouitir hangaul, doho tang tolima uakap. <sup>15y</sup>Maeit Jekop ke la uahiuako i Isip. I muduhia inggono ke mate to tar uaniono meso bung tubugigeig. <sup>16z</sup>A tukunusisina ka keip tapokisimpeig

<sup>m</sup> 7.4 Uak 11.31–12.5    <sup>n</sup> 7.5 Uak 12.7; 15.18; 17.8    <sup>o</sup> 7.6-7 Uak 15.13-14; KT 12.40

<sup>p</sup> 7.7 KT 3.12    <sup>q</sup> 7.7 Bolobolong Uakeken 12.7    <sup>r</sup> 7.8 Uak 17.9-14; 21.4    <sup>s</sup> 7.9 Uak 37.11,28; 39.2,21-23    <sup>t</sup> 7.10 Uak 41.37-44    <sup>u</sup> 7.11 Uak 41.54; 42.1-2    <sup>v</sup> 7.13 Uak 45.1-4,16

<sup>w</sup> 7.14 Uak 45.9-11; 46.27    <sup>x</sup> 7.15 Uak 46.1-7; 49.33    <sup>y</sup> 7.16 Uak 23.2-20; 33.19; Jos 24.32

i Sekem, kara la keuimpeis tar lebang geke bulaua keipiono tar mani, ke bulaua tur toso bung tuna Hamon.”

<sup>17z</sup>“I muduhia tar bureher krismas ke la pe, o tamatang Israel ka burehentiehe tun, doh na niualapagah God geke guata keipin tang Abraham ke hutung pokoso manas. <sup>18</sup>Tar binakanin, a tang giamehe manasar tamata re toia i Isip, doh inggon ahik pah ke ate tagu tang Josep. <sup>19a</sup>A toiaono ke tutlour tosnogio tamateig, kare guata uasa pono tasisin. Inggono ke petutupe pono tasisina tar baka tauete toso tususiner nihing poho mara mat.”

<sup>20b</sup>“Tar binakanin teka poho to ponoin Moses, doh inggon a siokor keketik tun. I lolono tar touonor bialok, a toking tinanon kura kaueke bakampe tatanon. <sup>21c</sup>Tar binak ka la uamokoion i kalahar, a tuna Pero ger kuaha ke la kale tatanon, kare kaueke uauleik sira pare, a tuna tatanon. <sup>22</sup>Moses ka ualairain tar bureher niateng Isip, doh inggono ke tampopokoho tun tar men, kara na nipiles.”

<sup>23</sup>“Tar binaka ro toueitir hangaul no krismas Moses, inggono ke namana huara tar la ruh kout baka toso tamat. <sup>24d</sup>Inggono ke banga tar tang siokor tamatang Isip re uiliatung pe tar tang siokor tamatang Israel, maeit inggono ke la tar poul tatanon, doh inggono ke uelturut tatanon, kare uiliatung pousungua tar peng Isip. <sup>25</sup>Moses ke namana ra bang parokosina pare, God ke heiriha tatanono tar uelkarus tasisin, bo gisina puk ahik.”

<sup>26</sup>“Tar uagiamehenar marein, Moses ke me ueltupar tar toking peng Israel ura uiliatunge peis. Inggono ke uedanga tar poporo tasrasin, kare kula pare, ‘Tang torik! Raoum deh ramamahialik, ae maene re uiliatungeis raoum?’ ”

<sup>27</sup>“Bo a tamata pukene re guata uasa tar tang giamehe ke tula bise liu tang Moses, kare kula pare, ‘Mai ke guata totomua pare, tero tamatang uoum keip, karo tamatang kedanga tamiueim? <sup>28e</sup>Ingga deh hero marang uiliatung pous sira totoguo ko uiliatung pous pe tar peng Isip nerau?’ <sup>29f</sup>Tar binak ke longorono tar puhon, inggono ke sokoro gete ate Pero, kare ualonguala i Midia. Teke la uangoul sirono pare, a pokos, kare lengua. Inggono ke uakotpokosongua tar tang torikir tun.”

<sup>30g</sup>“I muduhia kura la baka pe ro toueitir hangaul ro krismas, God ke pokoso sira pare, a angelou tang Moses. Inggono ke pokos i lolono toro luhluhuna ro hue tar ranana ro douk, o tur tar butur padenen gere moko uahuhut tar siusan i Sainai. <sup>31</sup>Tar binaka ke bangon, inggono ke lutara tun, ae maene ahik ro douk paho luh. Gine re la uahuhut pelaono tar la banga uaia, inggono ke longoro tar Tamata Nomana re kula pe pare,

<sup>z</sup> 7.17-18 KT 1.7-8    <sup>a</sup> 7.19 KT 1.11-22    <sup>b</sup> 7.20 KT 2.2    <sup>c</sup> 7.21 KT 2.3-10    <sup>d</sup> 7.24 KT 2.11-15  
<sup>e</sup> 7.28 KT 2.14    <sup>f</sup> 7.29 KT 2.21-22; 18.3-4    <sup>g</sup> 7.30-34 KT 3.1-10

32 'Inggo tenas God ro bung tamoumua, na God Abraham, Aisak, doh Jekop.' Doh Moses ke poroporo tun re sokoro pe, doh ahikingua pahe marang banga uelhir. 33 Song ke kular Tamata Nomana tatanono pare, 'Liur liu tenang su ge a butur koto peene ro turia a koto dedeil. 34 Inggo ku banga tun ra guata uasa peis nogo tamat i Isip. Inggo ku longoro tenas nikiringisin, maeit ku la uahiuaha tar me kale tapokis tasisin. Lameene daan, inggo u turung ualatue totomua tar tapokis i Isip.' "

35 <sup>h</sup>Doh Stiben ke mene tumana poluk pare, "Moses te geka ueluelde turin i Isip, kara kulain pare, 'Mai ke uamatoto totomua tero uoum keip karo tamatang kedanga tamiueim?' Bo inggono puk teke ueliuilain God tar uoum keip, kare uelkarus tur tasisin i Isip tar binaka ke kotpokoso sira God tar angelou i lolono toro luhluhuna ro hue i rana toro douk. 36 <sup>i</sup>Moses ke keip tauete liu tur tasisin i Isip. Ke guata to pe tar bureher nitou i Isip, doh tar butur ra kilain, a laur kubkubar, kari lolono toro toueit ro hangaul ro krismas tar butur padenen."

37 <sup>j</sup>"A tamatonene Moses, te geke kula tasir Israel pare, 'God e turung uakotpokoso me propeit e la tur katongo tamiuoum e turung ngohina totoguo.' 38 <sup>k</sup>Moses ke uangoul tokaha tagu tasir Israel toro butur padenen menia pono tar angelou geke mene to tatanono tar sisan i Sainai, doho bung tubugigeig, doh inggono teke kalkale tar uelhire ger tua mare uelueluahiueme tagigeig."

39 "Bo o bung tubugigeig puk ka de mata longoro tatanon, ka ueluelde tatanon, dohi lolono teres ninamanasin, gisina ra marang tapokis pukumpe i Isip. 40 <sup>l</sup>Maeit gisina ka kula tang Aron pare, 'Tuha menami godo inggeim gere turung uoum keip tamiueim, bo Moses geke ueliu tauete tur i Isip tamiueim, inggeim mi tele uamatot, kare hauon.' 41 <sup>m</sup>Doh ter binakanin teka tuha tosina toro kaesa ngohina tar tunar kau. Gisina ka ueliuime tar uahung tang roon, kara guata tokaha toro niein uleik tar uatakai tar haua ka tuha katongoin."

42 "Bo God puk ke nimaliana tasisin, kara hik pah ke namana baka poluk tasisina ra lotu pe tasir pitopit. Gininanine e uakeluk tar haua ka boloin i lolono tonosio bolobolor propeit pare,

'Ir tamatang Israel, kung uangoul pe inggoum toro toueit ro hangaul  
ro krismas tar butur paden,  
inggoum kung heir baka tagu me uahung totoguo?

43 Inggoum kung huathuata teil tena taluh Molek ger god bohoboh  
menia tar kaesang tar godo pitopit, Refan  
gekung tuhasioum pare, mu lotu tatanon.

<sup>h</sup> 7.35 KT 2.14    <sup>i</sup> 7.36 KT 7.3; 14.21; Aha 14.33    <sup>j</sup> 7.37 Ual 18.15    <sup>k</sup> 7.38 KT 19.3

<sup>l</sup> 7.40 KT 32.1    <sup>m</sup> 7.41 KT 32.2-6

Maeit inggo u turung kale liu tamiuoum,  
 karu turung ueliuila tamiuoum toro mokong tar pang giameh i  
 Babilon.’ ” *Amos 5.25-27*

<sup>44</sup>Doh Stiben ke mene tumana poluk pare, “O bung tamagigeig ra kalkale teilimpeane tar padenena tar taluhung lotu. Inggonor taluh ka tuha uakeluk sirampein, hape ke longoro pe Moses ke ualatoho pe God tatanon. <sup>45</sup>”Gine ka kale baka pesina tar taluhung lotu, Josua ke uoum keip toso bung tamagigeig, ka la keip menia tar taluhung lotu tar binaka ka kalesina tar mahmahar kotong toro pang uan geke geil liuis God. Inggono ke mokane tar koto ke la tuka tena binaka Debit, <sup>46</sup>°geke uauaha tang God, kare dangata tang God pare, e tuha mena uma na God Jekop.”  
<sup>47</sup><sup>p</sup>“Bo Solomon puk teke tuha tar umon. <sup>48</sup>Bo God puk ger i ranantieh ahik pahe uoto uangoul tagu toro umang lotuniner uleik ger nituhang tamat, ngohina sira ka hire per propeit ke kula pe God pare,

<sup>49</sup>“I Heuene tonogo tabtabilo,  
 dohi koto tenag buturung uatoko keke inggo.  
 Hingiangua me nituha uma rung tuhaioum menag umo?  
 Ia kaein nag umang pepe uaho?

<sup>50</sup> Ge inggo pe teku tuha tar mamang inetelik.’ ” *Aisaia 66.1*

<sup>51</sup>“Doh Stiben ke mene tumana poluk pare, “Inggoum deho tamata mahang longor! Inggoum deh halanampe tung uapalih tenami niguat, karung longoro tang God. Inggoum mu ueluelde dedempe tar haua re uedangaigir Iabena Dedeil tar uahire tamiuoum, mu uakeluk sira kompe toso bung tubumi ka guata uoum pe.”

<sup>52</sup><sup>s</sup>“O bung tamamiuoum ka ueluelde, kara uauelmahing tasir propeit uakapa tun. Gisina ka uiliatung pous pono tas geke hire tauete tena nipokosor tamata ger kodkodoh. Doh gine daana ke pokoso peon, inggoum kung ueliuila tatanono tar limasir uelmatan, kara tung pousin.  
<sup>53</sup>Inggoumene teka ualasisiraisir angelou tar ualatur nang God, bo ahik puk pah kung uakeluk tananin.”

### Stiben ka bakbak pousin tar palau

<sup>54</sup>Tar binak ka longorosina ke mene pe Stiben paar, gisina ka eiteit uelkaiiue tar liuous ra nimaliana pe. <sup>55</sup>“Bo Stiben puk ke uoun tar Iabena Dedeil, ke banga kai taro i Heuen, kare bang huara tena nitampopokoho God, doh Iesu e tur tabara tar pang makoso tang God. <sup>56</sup>“Doh Stiben ke kula pare, “Bang! Inggo u bang huar i Heuene ke takapuk, doha Tunar Tamat e tur tar pang makosohia tang God.”

<sup>n</sup> 7.45 Jos 3.14-17   <sup>o</sup> 7.46 2Sa 7.1-16   <sup>p</sup> 7.47 1To 6.1-38   <sup>q</sup> 7.49-50 Ais 66.1-2

<sup>r</sup> 7.51 Ais 63.10   <sup>s</sup> 7.52 Mat 23.31   <sup>t</sup> 7.55 Ker 110.1   <sup>u</sup> 7.56 Kol 3.1



<sup>57</sup>Maeit gine ka longoro pesina ke kula pe inggono paar, gisina ka siokor kula ualeikintiehe tun, kara takop tane tar talingas. Doh gisina ka siokor tentur, kara siokor ualola, kara kuse tang Stiben. <sup>58</sup>Gisina ka keip liu tatanonane tar uan uleik, kara la bakbak pous tatanono tar palau tar uiliatung pous tatanon. Doh gisis ka bohboho tola tang Stiben ka siokor hiliu to tenas hikhiku tar tang siokor tamata kalan, a hangana tang Sol.

<sup>59</sup>Tar binakene ra bakbak pous pesina tang Stiben, Stiben ke lotu pare, “Iesu nag Tamata Nomano, kale tar iabeiguo.” <sup>60</sup>”Song ke hatup uahiu, kare mene pare, “Tamata Noman, ahik paho bak tulala tar niguata uasaene tasisin.” Gine ke mene baka peono pagiar, kare mat.

**8** <sup>1</sup>Doh Sol tere uangoul tar binakon, inggono ke uauia tun ka uiliatung pous peion.

### Sol ke guata uasa tasir tamatang tagorong man

Tar mareinionene ka uiliatung pousin Stiben, gisinar uelmatan ka uakikilanga tar guata uasa tasir tamatang tagorong manasine ra uangoul i Jerusalem.

Maeit o burehe tasisinar tamatang tagorong mana ka lala ueltebeirila tar pang uan i Judia me i Samaria, bosir aposoul puk ahik tagu. <sup>2</sup>O gisiamer tamatasine ra uakeluk tena ualatut God ka ueldolomo uasa tun tang Stiben, kara keu baka tatanon. <sup>3</sup>”Bo Sol puk ke uakekene manasa tar mamantouo tasir tamatang tagorong man. Inggono ke la hahai toro mamang uma uakap, kare reih tauete tasir kuah, doho bulout, kare ueliu tasisina tar karabus.

### Pilip ke la uangoul i Samaria

<sup>4</sup>O tamatang tagorong manasis ka ualualo ueltebeir, gisina ka mene ualasira toro Uelhire Uaia tang hingiamper uan ra lain. <sup>5</sup>Pilip ke la uahiuako tar uan uleik i Samaria, kare la uelhire tauete tar hangana Kristo.

<sup>6</sup>Tar binaka ka longoror manai tamata ke mene pe Pilip, kara banga tar bureher nitouo ke guatagion, gisina ka me siokor ualongoro uahuhut tun tatanon. <sup>7</sup>O bureher tamatasiner nihikung liouana ka kula ualeiking mate ka hiliu per liouana uasa tasisin, doho bureher tamatasiner mater tukunus ka uia. <sup>8</sup>Maeit tar uan uleik i Samaria, o tamata ka siokor uah.

### Saimon ger tang bilih

<sup>9</sup>A tang siokor tamat a hangana tang Saimon, a tang bilih e uoto guata tar bureher bilih tar bureher binakane tar uan uleik, doho tamatang Samaria ka bang, kara namnamana uabureh. Inggon e uoto meneng uasalain pare,

---

ˆ 7.60 Luk 23.34    ˆ 8.3 Apo 9.1,13; 22.4; 26.9-11

a tamata tohangana tun. <sup>10</sup>Doho tamatasiner i ranar hangas, doh gisiner tamata ueltebeir puk ra siokor uairana tun tatanon, kara siokor ualongor, kara kula pare, “A nitampopokoho ger nang God ger tampopokoho tun e moko tar tamatene!” <sup>11</sup>Maeit gisina ra uakeluk tatanon, teene gisina ka banga tar bureher giniameme siokor inete ke guatagion.

<sup>12</sup>Bo tar binaka puk ke mene tauete Pilip toro Uelhire Uaiang tena Nitoia God menia tar hangana Iesu Kristo, gisina ka siokor tagorong man, kara siokor uahuhunguais, o kuahampe, doho bulout. <sup>13</sup>Saimono pon, ke tagorong man, kara uahuhu ponoin. Doh inggono ke uakuakeluk teilingua pono tang Pilip tang hingiar butur re la, teene ke banga peono tar bureher nitouo ke guataig Pilip, kare lutara uasa tun.

<sup>14</sup>Tar binak ka longoror aposoul gera uoto uangoul i Jerusalem pare, o tamatang Samaria ka tagorong mana tono uelhire God, gisina ka ueliuila tas Pita me Jon tasisin. <sup>15</sup>Tar binaka kura la pokoso rasin, rasina kura lotu ueleheir tasisin mara kalesin tar Iabena Dedeil. <sup>16</sup>Teene a Iabena Dedeil halana te la uapono taguha tasisin. Gisina ka uahuhu keip pukis tar hangana Iesu ger Tamata Noman. <sup>17</sup>\*Song kura uapona Pita me Jon tara limas tasisin, song ka kalesina tar Iabena Dedeil.

<sup>18</sup>Gine ke banga pe Saimon ka kale pesina tar Iabena Dedeil kura uapono pela Pita me Jon tara limas tasisin, inggono ke hue ueleheir tasrasina tar mani, <sup>19</sup>kare kula pare, “Mura heir pono tar nitampopokohono totoguo mare kale pono me tamata tar Iabena Dedeil getu uapona inggo tar limoug tatanon.”

<sup>20</sup>Doh Pita ke kula hahaua tatanono pare, “Ingga ra turung haluh pous keipia tenang mani, teeit ko namana pe ingga ra banotoinir inete geke heirin God ra bulaua keipin tar mani. <sup>21</sup>Ingga ahik paho banoto kale tagu tar kalekinaleene, teeit ingga ahik paho uia ro baloum tar matana God. <sup>22</sup>Uapalih tenang niguata uasa, doho lotu tar Tamata Noman. Inggono here turung ueldolomompe totomua tar ninamana uasaeit toro baloumua. <sup>23</sup>Ge inggo pe u banga totomua pare, ko uoun tun tar ninamanang geh, kara niguata uasa e rokos tane tun totomua.”

<sup>24</sup>Song ke mene hahaua Saimon pare, “Loutu ueleheir totoguo tar Tamata Noman mara hik me inete ko menegia re kotpokoso totoguo.”

<sup>25</sup>Tar binaka kura mene tauete Pita me Jon tono uelhirer Tamata Noman, kaura hire tauete pon tar bureher inete ke guataig God, song kura la tapokis poluk Pita me Jon i Jerusalem, kaura menmene tauete teilimpela tono uelhirer Tamata Nomana toro burehe ro uaning Samaria.

### **Pilip ke uelhire ualasira toro Uelhire Uaia tar tamatang Itiopia**

<sup>26</sup>Na angelour Tamata Nomana ke kula tang Pilip pare, “Kale uatoro karo lihila tar pang makos, uakeluk tar leng tar butur padenen gere

---

\* 8.17 Apo 19.6

lih turuko i Jerusalem, e lako i Gasa.” 27Maeit Pilip ke kaleuatoro kare la. Doh gine re lih pekoono tar lelon, inggono ke uelupar tar tamatang Itiopia a niualah, inggon a tamata uleik tun tasir tamatang kauke tena umang mani Kandas. (Kandas a kuaha toiang Itiopia.) Inggono ke la taro i Jerusalem tar la lotu. 28Inggon e panete teilimpe tena karis, e lang tapokis tena uan, kare menmene uakeluk teil toro bolobol gero nang Aisaia. 29A Iabena Dedeil ke kula tang Pilip pare, “La! Karo la tur uahuhut tar karisenah.”

30Song ke ualo uahuhutula Pilip tar karis, kare la longoro tar tamatono re menmene uakeluk pe tono bolobolo Aisaia ger propeit. Kare dangatangua Pilip tatanono pare, “Ingga o naman manatampe tar haueit ro menmene uakelukin?” 31Kare kulono pare, “Inggo deh paku ate ge pake mene uakalahara me tamata totaguo.” Song ke uadangata inggono tang Pilip tar me tabila tagu tatanon. 32Doha puhung bolobolene re menmene uakelukuion e kulkula pare,

“Inggono ngohina tar sipsipene ra keipin ra la uiliatung pousin.  
Inggon a hamhamasalik ngohina tar tunar sipsipene ra koutigir  
ulun,  
doh ahik pah ke mene sikoro bak.

33Inggono ka uamatala tunin, ahik pe mata kedanga uaiiaig na niguat.  
Inggono ke mat, doh halana me tun,  
kara kale liu manasainane tar kot.”

*Aisaia 53.7-8*

34Gine ke mene uakeluk baka peono toro bolobolo roon, inggonor peng Itiopia song ke dangata tang Pilip pare, “Hire tun baka totaguo, mai tunene re menmeneinir propeit, inggon e menmene katongoin ue e menmene me tamata siok?”

35Song ke mene uakalahar Pilip tar puhonene ke menein Aisaia, kare uelhire tauete pono tatanono toro Uelhire Uaia gero menmene tang Iesu.

36<sup>y</sup>Gine ra ualo pelasina tar lel, gisina ka la pokosola tar kodom, kare la kular tamatang Itiopia tang Pilip pare, “Bang! A kodomo gine, a haua re tur tane totaguo, maene ahiko pah ra uahuhuio?” 37Doh inggono ke ualatoho tar karis ra uatokoin. Song kura siokor hiuoko rasina me Pilip tar kodom, kare uahuhu Pilip tatanon.

38-39Gine kura hiliu pe rasina tar kodom, na Iabena Dedeilir Tamata Nomana ke me kale liu ualutara kompe tang Pilip, doh inggoneitir tamata uleik ahik pah ke bang huara baka poluk tatanon. Bo gine puk ra ualo pelasina tar karis, inggon e uaha tun, kare uatakai tang God.

<sup>y</sup> 8.36 Apo 10.47

<sup>40</sup>Bo Pilip puk ke la pokoso ualutara tar siokor uan uleik ra kilain i Asdot, kare lala ueltebeir toro giniameme ro uan uleik, kare la mene tauete toro Uelhire Uaia ke la tuk i Sisaria.

### Sol ke uapalih tena niguat

**9** <sup>1-2</sup>Tar binakanin i Jerusalem, Sol e mene uasokoro dedempe tar marang mamantou, kare uamate tosno tamatang tagorong manar Tamata Noman. Inggono ke la tar pater ger i ran, tar kale mo bolobolong tonosio umang lotur Ju i Damaskus mare kale me nipoul gete tuparono mo tamata gera uakeluk tena lele Kristo, o bulout ue o kuah, inggon e marang kuse tasisin, kare la uamoko tasisina tar umang uih i Jerusalem.

<sup>3</sup>Maeit Sol ke la i Damaskus, gine re lang uahuhut manasa peon, a luh ke balo ualutara turuha tatanon i Heuen. <sup>4</sup>Inggono ke punga uahiuane i kot, kare longoro tar tamata re kula pe tatanono pare, “Sol! Sol! Ae maene ro guata uasa ingga totoguo?”

<sup>5</sup>Kare dangata Sol pare, “Ingga pe mai ter Tamata Nomana?”

Kare mene hahauar tamata pare, “Inggo te Iesu, teene ro guatguata uasaia. <sup>6</sup>Tentur kaiene daan, karo la leka tar uan uleik, song ra turung hireia tar haua ro la turung guatain.”

<sup>7</sup>Doho tamatasine ra la tagu teil tang Sol ka siokor lutara tun, doh ahik pah ka mene me puh, gisina ka longoro ponompe tar tamata ke mene pe, bo ahik puk pah ka bang huara me tamat. <sup>8</sup>Sol ke tentur kai turane i kot, bo tar binaka puk ke marang uatauala inggono tar matan, inggon ahik pahe banot e bang huara me inet. Maeit gisina ka kuse tar limanon, kara keipilain i Damaskus. <sup>9</sup>Inggono ke kut tar touonor marein, doh ahik pono pahe ein ue e inum me inet.

<sup>10</sup>Tar uan uleik i Damaskus, e uangoulur tang siokor tamatang tagorong mana tar Tamata Noman, a hangana tang Ananias. A Tamata Nomana ke mene tatanon i lolono tar siokor borborian, ke kula pare, “Ananias!”

Kare mene hahauono pare, “Tamata Noman inggo gine.”

<sup>11</sup>Kare kular Tamata Nomana tatanono pare, “La tena uma Judas gere toko tar lele ra kilain, ‘A lele makmakos,’ karo la dangata tar tamata ger peng Tasius ger hangana tang Sol, ge inggono pe e lotu totoguoene daan.

<sup>12</sup>Sol ke borborian, kare banga tar tamat a hangana tang Ananias, ke lame, kare me uaponola tar limana tatanon mare banga tapokis.”

<sup>13</sup>Kare mene hahaua Ananias pare, “Tamata Noman, inggo deh ku longoro tar bureher ueluatata tar tamatono re uoto uauelmahing pe tosnongo tamata ingga i Jerusalem. <sup>14</sup>Doh gine ke la pemeonane, inggon e uakeluk tar ualatohong tar pater ger i ran, tar kuse, kare uamoko tar karabus tang mai gere tagorong mana totomua.”

<sup>z</sup> 8.40 Apo 21.8    <sup>a</sup> 9.1-2 Apo 8.3

<sup>15</sup><sup>b</sup>Bo a Tamata Nomana puk ke kula tang Ananias pare, “La! A tamatonene ke pokoso sira manasa pare, nag tamatang kalekinaleo, tar ueliu hahai tar hangouguo tasir tamata ge ahik paho Ju mesnosio toia menia pono tasir Israel. <sup>16</sup><sup>c</sup>Inggo u turung ualasira tatanono hape re turung baka per niduh re turung kalegiono tar ueliu tauete tar hangouguo.”

<sup>17</sup>Maeit ke la Ananias, kare la leke tar umon. Ke la uapono tar limana tang Sol, kare kula pare, “Tahiguo Sol, Iesu ger Tamata Noman geke kotpokoso to totomua tar lele tar binaka ko lang lameaane teke ueliuime totoguoane totomua maro banga tapokisia, karo uoun tar Iabena Dedeil.”

<sup>18-19</sup>Ahik me sikir manasan, a inete ngohina tar karongonar ian ke takapeis liu tur tar matana Sol, song ke bang huara tapokis poluk. Inggono ke tentur kai song ka uahuuin. I muduhia ke ein baka peono song ke tampopokoho poluk.

#### **Sol ke mene tauete toro Uelhire Uaia i Damaskus dohi Jerusalem**

Sol ke uangoul tagu bakampe tar ginameher marein tasir tamatang tagorong man i Damaskus. <sup>20</sup>Ahik paha puhung barah ke uangoul peon, kare uakikilanga manasa tar mene tauete toro Uelhire Uaia iuma tonosio umang lotur Ju pare, Iesu ter tuna God. <sup>21</sup><sup>d</sup>O tamata uakapa tunusine ka longoro tatanono ka siokor lutarang toboul tun, kara ueldangateis pare, “A tamata dehene te giane ke mamantouo uasa tun tasir tamatang uakeluk tang Iesu i Jerusalem. Doh inggono teke lame tar me kuse mo tamatane gera tagorong mana tang Iesu, song re ueliuila tar pater ger i ran mara uamokoisinsina tar karabus.”

<sup>22</sup><sup>e</sup>Bo Sol puk ke kotpokoso pare, a tang mene uapopokoho tun. Na niuabang manateono tang Iesu pare, te Kristo a kalahara tun. Doh gisisir Ju ra uangoul i Damaskus ahik tun pah ka banotong mene hahaua me puh tar touahiu tatanon.

<sup>23</sup>I muduhia ke karuh baka per bureher marein, o gisiameher Ju ka ueluauiiae tar uiliatung pous tang Sol. <sup>24</sup>Maeit tar boung, doh tar marein gisina ra tur kaueke tar pipirikinar uan uleik, bo Sol puk ke ate kout teres ninamanasin. <sup>25</sup><sup>f</sup>A siokor boung no tamatang uakuakelukion ka poul tatanono tar hiliu tar uan uleik, gisina ka uahiu keip tatanono tar tohene uleik e tabila teil, ka uahiuakoin tar siokor hagarin tar padoronar uan uleik, song ke lalampe.

<sup>26</sup><sup>g</sup>Tar binaka ke lameon i Jerusalem, inggono ke uedanga tar uataguin tasir tamatang uakuakeluk, bo gisina puk ka siokor sokoro tatanon, kara hik pah ra tagorong mana tatanono pare, inggono ke tamatang tagorong

<sup>b</sup> 9.15 Apo 26.2,6; 27.24; Roum 1.5    <sup>c</sup> 9.16 2Ko 11.23-28    <sup>d</sup> 9.21 Apo 8.3

<sup>e</sup> 9.22 Apo 18.28    <sup>f</sup> 9.25 2Ko 11.32-33    <sup>g</sup> 9.26 Gal 1.17-19

mana pono tang Iesu. <sup>27h</sup>Bo Banabas puk ke keip tatanon mare la mene keip tatanono tasir aposoul. Banabas ke hire uaia tasisina hape ke banga pe Sol tar Tamata Noman, doh hape ke mene per Tamata Noman tatanon, kare ongolo tar mene tauete tar hangana Iesu i Damaskus. <sup>28</sup>Maeit song ke uangoul tagu Sol tasisin, kara hik me inete ke uakoutkout tatanono re la teil pe i Jerusalem, kare ongolo tun tar mene tauete to tar hanganar Tamata Noman.

<sup>29</sup>Inggon e uoto uelperere keip tasir Jusine ra ate toro uelhireng Grik, maeit gisina ka uedanga tar uiliatung pous tatanon. <sup>30</sup>Tar binaka ka ater tamatang tagorong man tar puhon, gisina ka keip tang Sol tar uan uleik i Sisaria, kara la ueliuila tatanono tar uan uleik i Tasus.

<sup>31</sup>Tar binakaninane o tamatang tagorong manang toro mamang buturulik i Judia, Galili dohi Samaria ke pokosoisir binaka uaia, kare popokoho tun res nitagorong man, ra ueltada tun tar Tamata Nomanane ra uangoul pe, kara Iabena Dedeil e uatampopokoho pono tasisin, doh gisina ka burehe uain, kara uangoul keip puk tar nisokoro tar Tamata Noman.

#### **Pita ke uauia tang Ainias**

<sup>32</sup>Pita ke la teil toro mamang buturulik tar pang uanion, inggono ke la uahiua ponoko tar uan uleik i Lida tar la banga tosno tamata God tar uanion. <sup>33</sup>Tar uan uleikion, inggono ke la ueltupar tar tang siokor tamat a mater tukunun, a hangana tang Ainias, inggon ahik pah ke banot e tentur liu tono uat e banoto toro tual ro krismas.

<sup>34</sup>Pita ke kula pare tatanon, "Ainias, Iesu Kristo e uauia totomua, Tentur kai, karo kaleuatoro tenang ineteng rikin." Ahik me sikir manasan, Ainias ke tentur kai. <sup>35</sup>O mamang tamatalikisine ra uangoul i Lida, dohi Saron ka siokor bang, kara siokor tagorong mana tar Tamata Noman.

#### **Pita ke uatua tapokis tang Tabita**

<sup>36</sup>Tar uan uleik i Jopa e uangoulur tang siokor kuahang tagorong man a hangana tang Tabita (toro uelhireng Grik inggono ra kilain Dokas). Inggon e uoto guata uaia tun, kare poul tasir tiome.

<sup>37</sup>Tar siokor binak, inggono ke momouh, kare mat, inggono ka uahuhu uaiainir tukunun, kara uarikin tar tine um i ran. <sup>38</sup>Lida e uahuhut i Jopa, maeit tar binaka ka longoro per tamatang tagorong manang Jopa tang Pita pare, e uangoul i Lida, gisina ka ualatue tar tang torikir tamata tar la kula uapopokoho tang Pita pare, "Ingga o la uateuele tunume!"

<sup>39</sup>Maeit Pita ke la tagu tasrasin, doh tar binaka ke la pokoson, inggono ka la keip kaein i rana tar tine um. O mamang kuaha nimate liu uakapa

---

<sup>h</sup> 9.27 1Ko 9.1

tun ka tur uiloho tatanon, kara ualasira tar hikhiku mer gomono geke tuhtuha bakaig Dokas, tar binaka re uangoul tagu haraha tasisin.

<sup>40</sup>Pita ke kula tasisina tar siokor tauete liu tar tine um, kare hatup uahiu, kare lotu, song ke kauiurila tar tukununar mat, kare kula pare, “Tabita! Tentur kai.” Inggono ke uatauala tar matan, doh tar binaka ke bang huara inggono tang Pita, Inggono ke tabil. <sup>41</sup>Pita ke huela tar limana tatanon, kare kuse uatentur tatanon. Song ke kila ualeke tapokisilaono tasir tamatang tagorong mana mesir kuaha nimate liu, kare la ualasira tasisina pare Tabita a tua. <sup>42</sup>A puhonene ka ueliateinane i Jopa, doho bureher tamata ka tagorong mana tar Tamata Noman.

<sup>43</sup>I muduhia tar puhon Pita ke uangoul uabarah sikoro bakampe i Jopa, ke uangoul tagu tar tamatang tuha keip tar kapokousur kau tar inet, inggon a hangana tang Saimon.

### Kornilius ke ualatue ra la kilain Pita

**10** <sup>1</sup>Tar uan uleik i Sisaria e uangoulur tang siokor tamat a hangana tang Kornilius, inggon a tamata uleik tasir tamatang uiluiliatung, o uiluiliatungung Itali. <sup>2</sup>Inggono meso bung tuna doh gisine pono ra uangoul tagu tatanono ra siokor ueltad, kara sokoro tun tang God. Inggono e uoto heir tena bureher mani tasir tiome, kare uoto lotu pono tang God tar giniamer binak.

<sup>3</sup>Tar siokor binak, kaelainane nar tri kilok namoloi, inggono ke banga tar borborian. Inggono ke banga uaia tun tena anggelou God ke laha tatanon, kare me kula pare, “Kornilius!”

<sup>4</sup>Kornilius ke banga uanonong sokoro tatanon, kare kula pare, “A hauonor Tamata Noman?”

Kare kular anggelou pare, “God ahik pahe malabobour tenang lotua, kare nang niheir tasir tiome. <sup>5</sup>Gine daan ingga o ualatue mo tamata tar la i Jopa, tar la kila tapokisime tar tang siokor tamat a hangana tang Saimon Pita.

<sup>6</sup>Inggono e uangoul tagu tang Saimon ger tamatang tuha keip tar inete tar kapokousur kau gere tokouahuhut na um i teh.”

<sup>7</sup>Tar binaka ke hiliuir anggelou tang Kornilius, Inggono ke kila tena toking tamatang kalekinale, doh na tamatang uiliatung gere uoto lotu pon gere uoto kaueke tatanon.

<sup>8</sup>Inggono ke siokor hire tun tar mamang inetelik ke kotpokoso tatanon, kare ualatue tasisina tar la i Jopa.

### Na niboriana Pita

<sup>9</sup>Kaelainane na marein uleik tar uagiamehenar marein, gine ra lang uahuhut pe no tamata Konilius tar uan uleik i Jopa, Pita ke kaete kai taro tar kukunar uma mare la lotu.

<sup>10</sup>Inggono ke hagouo tar gog, e marang ein me inet, bo gine puk ra kaleuatoro haraha peigir nieining tar moloi, inggono ke banga tar siokor borborian. <sup>11</sup>Inggono ke bang i Heuene ke takapuk, kare bangono tar inete ke la uahiuaha i kot. Inggono ngohina paho mahar gomono uleik, o nilolo ro toueitir gon. <sup>12</sup>I lolono toro mahar gomono roon, ra moko teil uakapa tunur inetesiner tuar pang toueitir pang kekeis menia ponompe tasir paleng gane tar kot, karo tetiaua pon. <sup>13</sup>Song ke longoro Pita tar uauanar tamata re kula pe tatanono pare, “Pita! Tentur kai doho uiliatung pous karo ein.”

<sup>14</sup><sup>i</sup>Doh Pita ke mene hahaua pare, “Tamata Noman! Inngo ahik nomanampe pahu banot, ge inggo pe halanampe tu ein tagu me inet gere hireigir ualatutur nasir Ju pare, ahik paha delauan.”

<sup>15</sup><sup>j</sup>Kare kula uagiameme polukur uauanar tamata pare, “Ahik paho kula me inete geke uadelauanain God pare, ahik paha delauan.”

<sup>16</sup>A puhono ke kotpokoso uatouon, doh ahik me sikir manasan, o mahar gomono ka kale kai tapokis taroin i Heuen.

<sup>17</sup>Tar binaka re namnamanaehe Pita tar haua tun re hirhireinir borborianon, o tamata geke ualatuemeis Kornilius ka me tupara manasa tena uma Saimon, kara me turane toro pirik. <sup>18</sup>Gisina ka dangata taro ge pare uangoul Saimon gera kilain Pita tar umon. <sup>19</sup>Gine re namnamanaehe pe Pita tar borborian, a Iabena Dedeil ke me kula tatanono pare, “Saimon, a tang touonor tamata ra lang sir teil totomua. <sup>20</sup>Maeit ingga o tentur, doho la uahiuako i kot, ge inggo pe ku ueliuime tasisin.”

<sup>21</sup>Maeit Pita ke hiuoko, kare la kula tasisina pare, “A tamatene rung sirioum te inggo puk manasampe, a haua tun rung malarasioum?”

<sup>22</sup>Kara mene hahauasina pare, “A tang siokor tamat a hangana tang Kornilius, ke ualatu me tamiueim, inggon a tamat uleik tasir tamatang uiliatung, doh inggon a tamata uaia, kare sokoro tun tang God. O bureher Ju ra ueltada tun tatanon. Na angelou God ke kula tatanono tar kila totomua mare ualongoro inggono tar haua ro meneia.” <sup>23</sup>Song ke kila ualeka Pita tasisina tar um, kare kaueke tasisina tar boungon.

### Pita ke la tena uma Kornilius

Tar uagiamehenar marein Pita ke la tagu tasisin, menia pono tasir gisiamehar Jusinir tamatang tagorong manang Jopa ka la tagu pon. <sup>24</sup>Tar uatorikinar marein inggono ke la pokos i Sisaria. Doh Kornilius e tur uangoulumpe tasisin. Inggono ke kila toto toso bung tahinalik, doho bung kaluana tun. <sup>25</sup>Gine ke lang leke pela Pita ium, Kornilius ke la tantane tatanon, kare hatup uahiuane tar kekena Pita tar ueltada

<sup>i</sup> 10.14 NKP 11.1-47; Isk 4.14    <sup>j</sup> 10.15 Mak 7.15,19



tatanon. <sup>26</sup> <sup>k</sup>Bo Pita puk ke kuse uatur tatanon, kare kula pare, “Tentur kai, ge inggo pe a tamata puk pon.”

<sup>27</sup> Pita ke mene baka tatanon, kare lekala ium, kare la ueltupar tasir bureher tamata ra uangoul toto pe. <sup>28</sup> Inggono ke kula pare tasisin.

“Inggoum mu siokor atempe pare, inggeimir Ju ahik pah mi banoto mi uangoul tokaha keip tasir tamata ge ahik paho Ju tagu, doh ahik pono pah mi banoto tar la uahuhut tasisin. Bo God puk ke ualasira totoguo pare, ahik pahu banot u kula me tamata pare, ahik paha delauan.

<sup>29</sup> Maeit gine ka la kila peio, inggo ahikimpe pah ku kulang de bak. Doh inggo u marang dangata bak, ae maene ko ualatue ingga ra la kilaio?”

<sup>30-31</sup> Doh Kornilius ke mene hahaua pare, “A toueitir marein manasa kura karuh, inggo uangoulumpeane tenag um, karu lotu, kaelain tar siokonor binakene daan, nar tiri kilok namoloi. Ahik me sikir manasan, a tang siokor tamat e hiku teil tar hikhiku abeab, ke me turane i uoum totoguo, kare kula pare, ‘Kornilius, God ke longoro tenang lotua, kare namana huara tun tar haua ko heirheirigia tasir tiome. <sup>32</sup> Ualatue me tamat e la kila tang Saimon Pita. Inggon e uangoul tang Saimon ger tang tuha keip tar kapokousur kau gere uangoul uahuhut i teh.’ <sup>33</sup> Temaeit inggo ku uateuele tunuio tar ualatue ra la kilaia, doh inggon auia tun ko la pe me ingga. Gine daan, inggeim siokor gine tar matana God tar ualongoro tar haua ke ualatohoigir Tamata Nomana totomua tar me ueluatata tamiueim.”

<sup>34</sup> <sup>l</sup>Song ke uakikilanga Pita tar mene pare, “Inngoene daana song ku ate tun toro mana pare, God ahik pahe malara puk tasir gisiamer tamat, <sup>35</sup> bo e siokor malara uakapa tun tasir mamang tamatalik toro mamang matin gera sokoro tang God, kara uia nas niguat. <sup>36</sup> Inggoum kung ate manasa toro uelhire geke heirihain God tasir tamatang Israel pare, O Uelhire Uaia tar uelhiarou o la tur tang Iesu Kristo, Iesu Kristo ter Tamata Nomana tasir tamata uakapa tun. <sup>37</sup> <sup>m</sup>Inggoum kung ate tar haua ke kotpokoso toro mamang buturulik i Judia, ke uakikilanga tur pe i Galili, i muduhia ke uelhire tauete pe Jon tasir tamata tar uahuu. <sup>38</sup> <sup>n</sup>Inggoum mu ate tang Iesu ger peng Nasaret geke heirin God tar Iabena Dedeil, kara nitampopokoh. Inggoum mu ate hape ke la hahai peono toro mamang buturulik re guata uaipe, kare uauia tasisis re uangoul teilisir liouana uasa, teene God e uangoul tagu tatanon.”

<sup>39</sup> “Inggeim teking bangbanga tun tar mamang niguatalik ke guatagiono tonosio pang uanir Ju, dohi Jerusalem gisina ka uiliatung pous tatanon, kara tine uakuse tatanono tar korose. <sup>40</sup> Bo God puk ke uatua tapokis tatanono tar uatouononor marein, kare guata tatanono

<sup>k</sup> 10.26 Apo 14.13-15; UGO 19.10 <sup>l</sup> 10.34 Ual 10.17; Roum 2.11 <sup>m</sup> 10.37 Mat 4.12-17  
<sup>n</sup> 10.38 Mat 3.16; Luk 4.17-21

ka banga baka polukin. <sup>41-42</sup>°Ahik paho tamata uakapa tun ka bang, bo ke uakalahara pukin tamiueimene ke uamatotois God tar uelhire tauete tonon uelhireon. Doh inggeimener niuamatoto teking ein karing inum tagu tatanon. I muduhia ke tua tapokis baka peon, inggono ke ualatoho tamiueim tar uelhire tauete tasir tamata pare, inggono teke uamatotoin God tere turung tamatang kedanga tasir tua doho mat. <sup>43</sup>°O mamang propeit ka mene tauete pare, o mana tun, o tamata gera tagorong mana tatanon, God e kuse luar keip tar hangana Iesu teres niguata uasasin.”

<sup>44</sup>°Ginempe re menmene haraha pe Pita paar, A Iabena Dedeil ke huihoa tasisis ra ualongoro tatanon. <sup>45</sup>Bo o Jusiner tamatang tagorong man gera la tagu teil tang Pita ka siokor lutara tun pare, a Iabena Dedeil ka heir ponoin tasisine ahik paho Ju. <sup>46</sup>°O Jusine ra la tagu teil tang Pita ka longoro tasisina ra uelhire pe tar mamang uelhireng toro giniamhe ro uan, kara uataakai tang God.

<sup>47</sup>Song ke kula Pita pare, “Ahik baka poluk me tamata re banot e tur tane tasisina mata uahuhu keipis tar kodom. Gisinasine ka kale pono tar Iabena Dedeil ngohina tagigeig.”

<sup>48</sup>°Maeit inggono ke ualatoho pare, gisina ra uahuhu keipis tar hangana Iesu Kristo. I muduhia ke kapa baka per uahuhu, song ka dangatasina tang Pita tar uangoul tagu baka poluk tasisina me giniamher marein.

### Pita ke tapokis i Jerusalem, kare la ueluatata tar inete ke guataig tena uma Kornilius

**11** <sup>1</sup>O aposoul mesir tamatang tagorong mana gera uangoul i Judia ka longoro pare, o tamata ge ahik paho Ju ka tagorong mana pono tena uelhire God.

<sup>2-3</sup>°Maeit gine ke la pe taro Pita i Jerusalem, o tamatang tagorong manasiner nipoko ka nimaliana tatanon, kara kula pare, “Ae maene ko la ingga tenas umasit ahik paho nipok ge ahik paho delauan, karo la ein tagu tasisin?”

<sup>4</sup>Maeit Pita ke uakikilanga tar mene uakalahara tasisina tar mamang inetelik hape ke kotpokoso pe. <sup>5</sup>°Inggono ke hire tasisina pare, “Inggo u uangoul tar uan uleik i Jopa, karu lotu, dohi lolono tar borborian, inggo ku banga tar inete ngohina toro mahar gomono ka uahiuu turuhain i Heuen, o nilolo ro toueitir gon. Doh ko huiho uahuhut tunuha tar butur ru uangoulio. <sup>6</sup>Inggo ku bangala i lolono tang roon, karu banga tasir ineteng tar kotosiner pang toueitir pang kekeis, o inetesiner roke, o pale

---

° 10.41-42 Luk 24.42-43; Apo 1.8; 17.31; 1Pi 4.5    ° 10.43 Ais 53.5-6; Jer 31.34; Apo 2.38  
 ° 10.44 Apo 11.15; 15.8    ° 10.46 Apo 2.4; 19.6    ° 10.48 Apo 19.5    ° 11.2-3 Apo 10.28; Gal 2.12    ° 11.5-15 Apo 10.9-48

mesir tetiuang tar hagar. <sup>7</sup>Song ku longoro tar tamata re kula pe totoguo pare, ‘Pita! Tentur kai karo uiliatung pouš doho ein.’ ”

<sup>8</sup>“Karu mene hahaua inggo pare, ‘Ahik nomanamper Tamata Noman! Inggo halanampe tu ein tagu me inete ge ahik paha delauan.’ ”

<sup>9</sup>“Kare mene uagiamehe tur polukuhar tamat i Heuen pare, ‘Ingga ahik paho kula me inete geke uadelauanain God pare, ahik paha delauan.’

<sup>10</sup>A puhonene ke kotpokoso uatouon, song ka reih kai tapokis poluk taroin roon i Heuen. <sup>11</sup>Tar siokonor binakon, a tang touonor tamat geke ualatue turumeis i Sisaria ka me pokoso manasa tar umene ru uangoulio. <sup>12</sup>A Iabena Dedeil ke me hire totoguo pare, ahik pahu namnamana uaburburehe tar la tagu tasisin. Maeit a tang tonomor tamatang tagorong man ka la tagu totoguo, karing la leka tena uma Kornilius. <sup>13</sup>Inggon ke ueluatata tamiueim hape ke kotpokoso to per angelou tatanon iuma tena um, kare kula pare, ‘Ualatue me tamat e la kila tang Saimon gera kilain Pita. <sup>14</sup>’Inggon e turung ueliuime toro Uelhire Uaia totomua, doh toro uelhire roon, God e turung uelkarus totomua meniampe tasir tamatasine ra uangoul tenang uma.’ ”

<sup>15</sup>“Ginempe ku uakikilanga pe inggo tar men, a Iabena Dedeil ke la uaponaha tasisin ngohina ke la uoum peha tagigeig tar uakikilangan. <sup>16</sup>”<sup>x</sup>Song ku la namana huario tar haua ke kulainir Tamata Noman, ke kula pe pare, Jon ke uahuhu keip tar kodom, bo inggoum mu turung uahuhu keip tar Iabena Dedeil. <sup>17</sup>Maeit geke heir God tasisina tar inete ke heir ponoin tagigeigene ri tagorong mana pe tang Iesu Kristo ger Tamata Noman, doh inggo te hape ru baka pe maru banot u tur tane tena kalekinale God?”

<sup>18</sup>”Tar binaka ka longorosina tar puhon, gisina ahik baka poluk menas puhung men. Gisina ka uatakai tang God, kara kula pare, “Auia, God song ke uamaluaana pono tasir tamata ge ahik paho Ju ka uapalih, kara kale pono tar nitua.”

### O Uelhire Uaia ko lame i Antiok

<sup>19</sup>”O tamatang tagorong mana geke ualualo uelpakah tar niguata uasa ka guataig tasisin i muduhia tar binaka ka uiliatung pouš baka pein Stiben, ka lala uatuk i Ponisia, Saiprus, dohi Antiok, ra hirhire teil pono toro Uelhire Uaia tasisin pukur Ju. <sup>20</sup>Bo o gisimehe puk tasisinar tamatang tagorong manasine, o tamatang Saiprus me i Sairini teka uolo la ponoko i Antiok, gisina ka la menmene pono tasir tamata ge ahik paho Ju. Gisina ka ueluatatais toro Uelhire Uaia tang Iesu ger Tamata Noman. <sup>21</sup>Doha Tamata Noman e poul tun tasisit ka ueliu tauete toro Uelhire

<sup>v</sup> 11.14 Apo 16.31    <sup>w</sup> 11.15 Apo 2.4    <sup>x</sup> 11.16 Apo 1.5    <sup>y</sup> 11.18 Apo 13.48; 14.27

<sup>z</sup> 11.19 Apo 8.1-4

Uaia, maeit o bureher tamata ge ahik paho Ju ka tagorong mana pon, kara uakeluk tar Tamata Noman.

<sup>22</sup> <sup>a</sup>O tamatang tagorong manasine i Jerusalem, ka me ate tar puhonene, maeit ka ueliuila tang Banabas i Antiok. <sup>23</sup> Tar binaka ke la pokoso inggon, kare la banga re guata uaia pe God tasir tamat, kare hape re poul pe tasisin, inggono ke uaha tun. Inggono ke mene uapopokoho tasisina tar uakeluk dede tar Tamata Noman. <sup>24</sup> Banabas a tamata uaia tun, kare uoun tun tar Iabena Dedeil, doha nitagorong man, maeit o bureher tamata ka tagorong mana tar Tamata Noman.

<sup>25-26</sup> <sup>b</sup> Song ke la Banabas i Tasius tar la sir tang Sol, doh tar binaka ke la tupara inggono tatanon, inggono ke keipila tatanon i Antiok. Maeit toro udeil ro krismas, Banabas me Sol kura uangoul tokaha keip tasir tamatang tagorong man, kaura mene ualasira tasir bureher tamat. Gane i Antiok, o tamatang tagorong man teka kila uakikilangais pare, o tamatang uakuakeluk tang Kristo.

<sup>27</sup> Tar binakon, o gisiameher propeit ka laha i Antiok, ra la turuha i Jerusalem. <sup>28</sup> <sup>c</sup> A tang sioko tasisin a hangana tang Agabus, ke tentur kai, kare mene keip tena nitampopokohor Iabena Dedeil. Inggono ke uatagin pare, “A gogo uleik e turung kotpokoso toro mamang buturulikane tar koto uakap.”

(A puhonene ke kotpokoso tar binaka re toia Klodius ger Sisa i Roum.)

<sup>29</sup> Maeit o tamatang tagorong mana ka longoro pe tar puhon, ka ueluauiiae tar heir uabanoto tar nipoul hape ra banoto pe tasir tamatang tagorong mana gera uangoul i Judia. <sup>30</sup> <sup>d</sup> A puhono gisina ka guat, kara heir tagu tas Banabas me Sol tenas inet, e la tasir mamahoholik i Jerusalem.

**Herot ke uiliatung pous tang Jems, kare uamoko tang Pita tar umang uih**

**12** <sup>1</sup> Tar siokonor binakon, Herot ke kale tasir gisiameher tamatang tagorong mana tar marang guata uasa tasisin. <sup>2</sup> Inggono ke ualatoho tena tamata ke la uiliatung pous keip toro baenat tang Jems ge tahina Jon. <sup>3</sup> Tar binaka ke bangono pare, o tamata uleiking tasir Ju ka uah, inggono ke namana pono tar kula mo tamatang uiliatung tar kuse pono tang Pita mare tung pous pono inggono tatanon. A puhonene ke kotpokoso to tar binaka ka uahainir mareining toro ein ra kilain, A Bereit Ahik me Is.

<sup>4</sup> I muduhia ka kuse baka pein Pita, Herot ke uamoko tatanon iuma tar karabus, kare uamoko tasir tantang toueitir tamatang uiliatung tar tur kaueke tatanon. Herot ke namana pare, e turung kedanga to tatanono gete karuh bakar mareining Leke liu ro Mat.

<sup>a</sup> 11.22 Apo 4.36   <sup>b</sup> 11.25-26 Apo 9.30   <sup>c</sup> 11.28 Apo 21.10   <sup>d</sup> 11.30 Apo 12.25

<sup>5</sup>Maeit Pita ka uoho uanonoin tar karabus, bosir tamatang tagorong mana puk ka lotu uapopokoho dede tang God ra namana pe tatanon.

**Na angelou God ke poul tang Pita tar hiliu tar umang uih**

<sup>6</sup>Na bounguhia tar mareinene ka uamatotoin pare, ra kedanga toin Pita, Pita e hohou i uantinanina tar toking tamatang uiliatung, a toking niuelole tokaha keip tang Pita menia tar toking tamatang tur kauek ura turumpe toro pirpirik. <sup>7</sup>Ahik me sikir manas, na angelour Tamata Nomana ke pokos, doha luh ke balo uakalaharane tar tine tar karabus. Inggono ke haka tar kapkapana Pita, tar ualagura tatanon, kare kula pare, “Tentur uateuel!” Doha tiein ke lup liu tar limana Pita. <sup>8</sup>Song ke kula polukur angelou pare, “Hiku tenang gomom, doh nang pang su.” Doh Pita ke guata sirampe, kare kula polukur angelou tatanono pare, “Gomo uaiiaia tonongo mahar gomomong kokop, karo uakelukume totoquo.”

<sup>9</sup>Pita ke uakeluk tauete tatanonane tar karabus, inggon e tele tun hape re la kotpokoso per puhene re guatainir angelou, inggon e namana pare, e borborian.

<sup>10</sup><sup>e</sup>Rasina kura siauala tar uakikilanganar tamatang tur kauek, song a tang giameh, kaura lala toro pirpirik haen gera lihilain tar uan uleik. Roono ko takapuka katong, kaura la tauete rasin. Rasina kura lihila tar siokor buturung la, ahik me sikir manasan a angelou ke la hiliu tang Pita.

<sup>11</sup>Song ke naman manate Pita, kare kula pare, “Inggono song ku ate toro mana pare, Godompe ke heiriha tena angelou tar me kale liu tur totoquo tang Herot, doh tar ninamana ka namanaigir Ju ra turung guataig totoquo.”

<sup>12</sup>Tar binaka ke la namnaman ate pe inggon, inggono ke langua tena uma Maria ge tinana Jon-Mak, a umono tera uoto uangoulur bureher tamat kara siokor lotu tokah. <sup>13</sup>Pita ke la gotoro toro piriking kalahar, doha tang siokor kuahang kalekinale a hangana tang Roda ke la uelhirime tar me bang. <sup>14</sup>Gine ke la longor paroko pe inggono tar uauana Pita, inggono ke uaha tun, kare ualo tapokisila. Inggono ahik mate puka baka toro pirpirik, bo ke hire ualeik puk manasala pare, “Pita gila toro pirpirik!”

<sup>15</sup>Kara kular tamata pare, tatanon, “Inggono ko popouluana?”

Bo gine puka ke peng tampopkoho pe inggono pare, inggono Pita nomanampe, gisina ka kulangua pare, “Inggono deh ko banga puk tena angelouon.”

<sup>16</sup>Bo Pita puk ke gotoro dedempe toro pirpirik, doh tar binak ka pukasina toro pirpirik, kara banga tatanon, gisina ka lutarang toboul tun.

---

<sup>e</sup> 12.10 Apo 5.19

<sup>17</sup>Pita ke sarang pau tasisin mara hik pah ra men, kare ueluatatungua tasisina hape ke ueliu tauete per Tamata Nomana tatanono tar karabus. Doh inggono ke kula poluk pare, “Hire tang Jems mesir gisiamene ro bung tahigigeig tar hauene ke kotpokos.” Song ke hiliuono ke la pe tar giameher uan.

<sup>18</sup><sup>f</sup>Tar uagiamehenar marein, o tamatang uiliatung ka ueltoboul uasa tun hape maene ke taboin Pita. <sup>19</sup>I muduhia Herot ke ualatoho pare, ra sirin Pita toro mamang buturulik, bo ahik puk pah ka tuparain. Maeit Herot ke heheke tasir tamatang tur kauek, song ke ualatoho pare, gisina ra uiliatung pousis.

### Herot ke mat

I muduhia Herot ke hiliu i Judia, kare la uangoul bak i Sisaria tar sikinar binak.

<sup>20</sup>Inggono ke menmeneng nimaliana keip tasir tamatang Tair mesir Saidon tar puhung barah, maeit gisina ka la toto tar uamatoto tonosio tamat tar la mene tang Herot. Gisina ka uamamahoul baka tang Blastus ge na tamata uleikir toia mare poul tasisina tar la uakotpokoso me nipepe tokahang uelhiarou, teeit nasi toking pang uanisina ra uoto kale tur teres niein i Judia.

<sup>21</sup>Maeit Herot ke uamatoto tar siokor marein, doh tar mareinion, inggono ke hiku tena hikhikung toianiner i ranar bulauan, kare tabila tono tabtabil, kare menmene tasir tamat. <sup>22</sup>O tamata ka siokor uaha tena menemene inggon, kara siokor mene uauleik pare, “Gine deh re menmene ter uauana god, ahik paha tamata puk.”

<sup>23</sup><sup>g</sup>Ahik me sikir manasan, na angelou God ke uamomouh uasa tun tatanon, doho sosoilik ka ein tar tukununon, kare mat, teene inggon ahik mate uatakai tar hangana God.

<sup>24</sup><sup>h</sup>Bo o tamatang tagorong mana puk ka la hire tauete toro Uelhire Uaia, song o burehe dedemper tamata ka longor, kara tagorong mana toro uelhire gero la tur tang God.

<sup>25</sup><sup>i</sup>Tar binaka kura uakapa Banabas me Sol tenasira kalekinale, rasina kura hiliu i Jerusalem kaura la i Antiok, rasin kura kila tagu pono tang Jon ger hangan giamehe tang Mak.

### A Iabena Dedeil, doho tamatang tagorong mana ka ualatue tas Banabas me Sol tar kalekinale

**13** <sup>1</sup>O toto tamatang tagorong man i Antiok ra uangoul tagu ponor gisiamene propeit mesir gisiamene tang ualafir, doha hangasisina teenine. Banabas, Simeon ger hangan giamehe tang Niga,

<sup>f</sup> 12.18 Apo 5.22-24   <sup>g</sup> 12.23 Dan 5.20   <sup>h</sup> 12.24 Ais 55.11   <sup>i</sup> 12.25 Apo 11.29-30; 15.37

doh Lusius ger peng tar uan i Sairini, kare Manain gekura siokor uleik tokaha me Herot ger toia, doha uadouhin Sol. <sup>2</sup><sup>j</sup>Gisina ka siokor lotu tokah, kara ueil, doha Iabena Dedeil ke kula pare, “Inggoum mu uatur sioko manasampe tas Banabas me Sol tar kalekinaleene ku kila uelhirio tasrasin.” <sup>3</sup><sup>k</sup>Maeit gine ka ueil pelasin, gisina ka uaponala tar limas tasrasina song ka lotu, song ka kula tasrasin ura la.

#### **Banabas me Sol kura uelhire tauete toro Uelhire Uaia i Saiprus**

<sup>4</sup>A Iabena Dedeil ke keip uahiuako tas Banabas me Sol i Selusia te kura la panete to rasina tar parau, kaura la tar tor i Saiprus. <sup>5</sup><sup>l</sup>Tar binaka kura la pokoso rasin i Salamis, rasina kura la mene tauete tono uelhire Godane iuma tonosio umang lotur Ju. Jon-Mak e la tagu teilimpe tasrasina tar poul tasrasin.

<sup>6</sup>Rasina kura la uakapa toro mamang buturulikane tar tor, kaura la pokos i Pafos. Doh tar uanion, rasina kura la ueltupara tar tang siokor tamat a tang bilih, kara propeit bohoboh, inggon a hangana tang Bar-Iesu. <sup>7</sup>Inggon e uoto kalekinale pono tang Sergius Paulus ger tang kaueke tar toron. Inggon Sergius a tamatang ate tun, inggono ke ualatue ra la kilais Banabas me Sol, teene inggono ke marang ualongoro tena uelhire God. <sup>8</sup>Bo Bar-Iesu puk e marang tur tane tas Banabas me Sol, (toro uelhireng Grik inggono ra kilain Elimas) inggon e menmene tane tar tamata uleik mare ahik pahe tagorong mana tang Iesu. <sup>9</sup>Doh Sol ger hangan giamehe tang Poul ger uoun tun tar Iabena Dedeil ke uakeis uanono tang Elimas, kare kula pare, <sup>10</sup>“Ingga deha tuna Satan, kara uelmatan tar inete ger man! Ingga ko uoun tar boh, kara tang tutlour keip tar niguata uasa. Ingga deho uoto uapalih tar inete uaia ger nang God mare la kotpokoso pare, ahik paha man. <sup>11</sup><sup>m</sup>Gine daan a limana God e turung uauelmahing totomua. Ingga o turung kut, o turung uangoul puk ahik paho turung banga tagu tar balbalanar pisara tar barah sikoror binak.”

Ahik me sikir manasan, inggono ke kut manas ngohina pahe uangoul me kitupun, kare araha ueltebeir tar sir me tamat tar kuse tar limanon mare ualasira tar lel. <sup>12</sup>Tar binaka ke banga per tamata uleik tar hauene ke kotpokos, inggono ke tagorong man, teene inggono ke kasiana tun na ninamana ke longoro pe tono uelhire God.

#### **Banabas me Sol kura la mene tauete toro Uelhire Uaia tar pang uan i Pisidia**

<sup>13</sup><sup>n</sup>Poul mes gisis ra la tagu teil tatanon ka hiliu i Pafos, gisina ka panete tar parau ka lala tar uan uleik i Perga gere moko tar pang uan

<sup>j</sup> 13.2 Apo 9.15   <sup>k</sup> 13.3 Apo 6.6   <sup>l</sup> 13.5 Apo 12.12; 15.39   <sup>m</sup> 13.11 Apo 9.8

<sup>n</sup> 13.13 Apo 15.38

i Pampilia teke la hiliu to Jon-Mak tasisina ke tapokis pe i Jerusalem. <sup>14</sup>Gisina ka la tur i Perga, kara lala tar uan uleik i Antiok gere moko tar pang uan i Pisidia. Tar Mareining Pepe Uah, gisina ka la leke tar umang lotur nasir Ju, kara la tabil. <sup>15</sup>I muduhia ka mene uakeluk baka peig na ualatut Moses, kare nas bolobolor propeit, o mamahoholiking tar umang lotu ka heiruha toro uelhire tas Poul o kula pare, “Ro bung tahig, gete kaein me tang sioko tamiuoum re marang mene baka tamiueim me meneng poul tar uatampopokoho tamiueim, auia e menempe.”

<sup>16</sup>Maeit Poul ke tentur kai, kare hue kai tar limana mara ualongorosin, song ke kulono pare, “Ir tamatang Israel, doh inggoumene ahik paho Ju tagu rung uoto lotu tang God mu ualongoro totoguo! <sup>17</sup>°Nagi God inggeig ke uamatoto toso bung tamagigeig, doh inggono ke uabour uaburehentiehe tasisin, tar binaka ra uangoulusin i Isip. Inggono ke poul keip tasisina tena nitampopokoh uleik, ke keip tauete tur pe tasisina tar pang uanion.

<sup>18</sup>°Ke la uahuhutin toro toueitir hangaul ro krismas ka lih pelasina toro butur padenen, doh God ke uatut re banga pe tenas niguatasin, ahik teilimpesina pah ka uakeluk tun tena nimalaron. <sup>19</sup>°Inggono ke mamantouo toro mouit ro matina tamat gera uangoul i Kenan, kare heir tenas kotosina toso tamata pare, a nos. <sup>20</sup>°Doha puhono ke kalein toro 450 ro krismas.”

“I muduhia tar puhonene, God ke uamatoto tasir tamatang kedang tar uoum keip toso tamaton, ke la tuka pe tena binaka Samuel ger propeit. <sup>21</sup>°Tar binaka re uoum keip haraha pe Samuel tasisin, gisina ka malahir menasi toia, doh God ke heir tasisina tang Sol ger tuna Kis gere la tur toro matina tang Benjamin. Inggono ke uoum keip tasisina toro toueit ro hangaul ro krismas.”

<sup>22</sup>°“I muduhia God ke kale liu tang Sol, kare uatoia palih tang Debit. Inggono ke uahire tanik a tamata haua Debit, kare kula pare, ‘Inggo ku tupara tang Debit ger tuna Jesi pare, teku malarairo. Inggono tere turung guata tar inete geru malaragio e guaton.’ ”

<sup>23</sup>°“Maeit God ke guata sira hope ke ualapagah pe sioun, ke kula pe pare, toso bubunguna Debit, God e turung uamatoto tar tang siokor tamat gere turung uelkarus tagigeig. Inggono ke ueliiuha tatanon i Israel. Doha tamatonono te Iesu. <sup>24</sup>°Tar binaka halana Iesu te uakeken tena kalekinale, Jon ger tang uahuhu ke uelhire tauete tasir tamata uakapa tun i Israel tar uapalih tar niuangoul, kara uahuhuis. <sup>25</sup>°Gine re langlang uakapa manasa pe Jon tena kalekinale, inggono song ke kula pare,

° 13.17 KT 1.7; 6.6; 12.51    ° 13.18 Aha 14.34; Ual 1.31-32    ° 13.19 Ual 7.1; Jos 14.1

° 13.20 Ked 2.16; 1Sa 3.20    ° 13.21 1Sa 8.5,19; 10.20-24    ° 13.22 1Sa 13.14; 16.12;

Ker 89.20    ° 13.23 2Sa 7.12-16    ° 13.24 Mat 3.1-2    ° 13.25 Jon 1.20,27



‘Inggoum mu namana pare, inggo mai? Inggo ahik pah ter tamata geke ualapagahain God tar heiriha. Inggon e turung lampeha i muduhia, inggo ahik pono paha tamata uaia maru banoto tar kale liu tar bungbunguna na suon.’ ”

<sup>26</sup>Poul ke mene tumana poluk pare, “Ro uanoutougener peng Israel gesir bubunguna Abraham, doh inggoumene ahik paho Ju, bo mu sokoro puk tang God, no Uelhire Uaiang uelkarus God tasir tamat ka heirihain tagigeig. <sup>27</sup>O tamatang Jerusalem mesnosio tamat uleik ahik tun pah ka bang paroko tang Iesu pare, te Kristo. Bo gine puk ka uiliatung pous pesina tatanon, gisina ka uauelmatout sira tun tenas menemener propeit gera uoto mene uakeluk dedeig tar mamang Mareniliking Pepe Uah. <sup>28</sup>\*Gisin ahik teilimpe pah ka ueltupar me tengkana tun mara uiliatung pousuion, gisina ka petutupe tang Pailat tar uiliatung pousumpe tatanon.”

<sup>29</sup>”“Tar binaka ka guata uakeluk uakapa tun pesina tar huar nibolo uatua tatanon, gisina ka kale uahua tur tatanono tar korose, kara la keu tatanon. <sup>30</sup>Bo God puk ke uatua tapokis tatanon. <sup>31</sup>”O tamatasine gesir tang uakuakeluk, ka la tagu sioun tatanono ke la tur pe tar pang uan i Galili, ke la pe tar uan uleik i Jerusalem. Gisina teka banga tar matas tatanon, ke tua tapokis pe, kara lala tagu teil tatanono tar bureher marein, kara hirhire teil tosnogio tamateig.”

<sup>32</sup>“Inggeim mi hirhire teil tamiuoum toro Uelhire Uaia, tar hua ke ualapagahain God toso bung tamageig pare, e turung guat, doh inggono ke guata manasa tagigeigene ro bung tusisin. <sup>33</sup>Inggono ke guata tar puhono ke uatua tapokis pe tang Iesu. E uakeluk sirampe ka bolo peion i lolono toro uatorikina ro bolobolong ker. Inggono ka boloin pare,

‘Ingga ter tuguo, daan inggo te Tamoumua manas.’ ”

*Ker 2.7*

<sup>34</sup>“God ke uatua tapokis tatanon, doh inggon ahik pahe turung mate baka poluk mare la beng, e uakeluk sira ke mene pe God pare,

‘Inggo u turung guata uaia tamiuoum nogo tamat  
ngohina sira ku ualapagah keip pe tang Debit pare,  
u turung guat.’ ”

*Aisaia 55.3*

<sup>35</sup>“Maeit Debit ke mene poluk i lolono toro giamehe ro bolobolo pare,

‘Ingga ahik paho turung uamaluana tenang tamata dedeil  
e turung bengga to tar keu.’ ”

*Ker 16.10*

<sup>36</sup>“Ge tar binaka pe, kare tua Debit, inggono ke guata tun tar inete ke malahirig God tatanon e guat. I muduhia inggono song ke mat, kara keu

× 13.28 Mat 27.22-23    √ 13.29 Mat 27.59-60    º 13.31 Apo 1.3,8

tagumpein toso bung taman, kare bengar tukunun. <sup>37</sup>Bor tamatene ke uatua tapokisin God ahik pah ke benga to tagur tukununa tar keu.”

<sup>38</sup>“Temaeit inggoum ro bung tahig, inggo u malahir pare, pakung ateoum pare, te Iesu puk manas, song re banoto God e kuse luara liu teremi niguata uasaoum. <sup>39</sup>“Na ualatut Moses ahik pah tere banot e kuse luar teremi niguata uasaoum, bo tar tagorong mana puk manasampe tang Iesu, song ra kuse luara liuig remi niguata uasaoum. <sup>40</sup>Temaeit inggoum mu kaueke katongosioum mara hik me inetenine ka menmeneigir propeit re kotpokoso tamiuoum, <sup>41</sup>ge a propeit pe ke kula pare,

‘Ualongor! Inggoumener tang tagorong boholik mu turung namanaehe baka teil, karung mat.

Inggoum mu turung lutar,

Ingo u turung guata me inete tamiuoum tar binaka rung uangoul harah.

Me tamat e turung uakalaharampe tamiuoum tar haua ru turung guataio,

bo inggoum puk ahik dedempe pah mu turung tagorong man.’ ”

*Habakuk 1.5*

<sup>42</sup>Gine ura marang hiliu manasa pe Poul me Banabas tar umang lotu, o tamata ka kula poluk tasrasina tar me turung mene ualasira poluk tar puhpuhunina tasisina tar uagiamehenar Mareining Pepe Uah.

<sup>43</sup>Tar binaka ka kular tamata uleiking tar umang lotu tasir tamata tar uelueltageih, o bureher Ju mesir tamatasine ahik paho Ju tagu geka uapalih pukis pare, o Ju, kara lotu dede pono tang God, ka uakeluk tas Poul me Banabas. Rasina kura mene uapoul poluk tasisina tar tagorong mana dedempe, ge God pe e malaelhir tasisin, kare kuse luara teres niguata uasasin.

<sup>44</sup>Maeit tar uagiamehenar Mareining Pepe Uah, o tamata uakapa tunane tar uan uleik ka sokor la toto tar me ualongoro tono uelhirer Tamata Noman. <sup>45</sup>Gine ka banga per tamata uleiking tasir Ju ka burehentiehe per tamat, gisina ka gehe tun, kara menmeneng uelsigala tar haua ke menmeneig Poul.

<sup>46</sup><sup>b</sup>Bo Poul me Banabas puk ahik pah kura sokoro tasisin, rasina kura mene hahaua tasisina pare, “God ke ualatoho tamiraeim tar uahire uakikilanga tamiuoum tar nitua gere moko dede. Doh gine rung de pe inggoum tar kale tar nituaon, raeim mira turung uahire puk manasa tasir tamata ge ahik paho Ju tagu. <sup>47</sup>Ge a Tamata Nomana pe ke ualatoho tamiraeim pare,

<sup>a</sup> 13.39 Roum 10.4    <sup>b</sup> 13.46 Apo 3.26; 18.6

‘Inggo ku uamatoto totomua pare,  
tero luh gero uakubara tasir tamatis ahik paho Ju tagu  
maro banota o keip tena niuelkarus God tar koto uakap.’”

*Aisaia 49.6*

<sup>48</sup>Tar binak ka longoror tamatis ahik paho Ju tagu tar puhonene, gisina ka siokor uah, kara siokor uataakai tono uelhirer Tamata Noman. Doho tamata geke uamatotois God tar kale tar nitua gere moko dede, ka siokor tagorong man.

<sup>49</sup>No uelhirer Tamata Nomana ko la ueltebeir tar pang uanion. <sup>50</sup>Bo o Ju puk ka menmeneng ualualahua tasir kuaha tohangas gera lotu dede mesir tamata uleik tar uan uleikiono tar tur tane tas Banabas me Sol. Maeit gisitir tamata ge ahik paho Ju ka petutupe tasir gisiameher tamat tar guata uasa tas Poul me Banabas, kara uelueltula liu tasrasina tenas uan.

<sup>51</sup><sup>c</sup>Maeit rasina kura titire liu tar uoung tar koto tara kekeis tar ualasira pare, gisin ahik mata guata uaia tasrasin. Rasina kura hiliu, kaura langua i Aikoniam.

<sup>52</sup>Bo a Iabena Dedeil puk ke uoun tun tasir tamatang Antiokosine ka tagorong mana tang Iesu, doh gisina ka uaha tun.

#### **Poul me Banabas kura la mene tauete to toro Uelhire Uaia i Aikoniam**

**14** <sup>1</sup>Tar uan uleik i Aikoniam, Poul me Banabas kura guata sira poluk ngohina kura guata uoum pe i Antiok, rasina kura la leke poluk tenas umang lotur Ju. Tar umang lotuon, rasina kura mene uaia tun, maeit o bureher Ju, doh gisis ahik paho Ju tagu ka siokor tagorong mana tono uelhirer Tamata Noman. <sup>2</sup>Bo o gisiamehe puk ge ahik mata tagorong mana tagu, gisina ka uatentur tar balasir tamatasine ahik paho Ju tagu, maeit gisina ka uapalih teres ninaman, kare la tokouasanguais tasir tamatang tagorong man.

<sup>3</sup><sup>d</sup>Maeit Poul me Banabas kura uangoul bakampe tar bureher marein, doh ura ongolo tun ura mene ualasira pe tono uelhirer Tamata Noman, temaene a Tamata Nomana ke poul tun tasrasina tar uatouo tar bureher nitou, kara niparoko uleik mara ater tamata pare, a haua ka menmeneig tang Iesu a man. <sup>4</sup>Bo o tamata pukane tar uan uleik ahik pah ra uauia tokah, kara la uelpakahangua tar torikir pain, o gisiamehe ka uakeluk tasir Ju, doho gisiamehe ka uakeluk tasrasin ger toking aposoul. <sup>5</sup><sup>e</sup>Karo gisiameher Ju mesir gisiameher tamatasine ahik paho Ju tagu meniampe tosnosio tamata uleik ka uelhote uanomo tar guata uasa tas Poul me Banabas, kara marang bakbak pous tasrasin maura mat. <sup>6</sup>Bo rasina puk

<sup>c</sup> 13.51 Mat 10.14; Apo 18.6   <sup>d</sup> 14.3 Mak 16.20; Hib 2.4   <sup>e</sup> 14.5 Apo 14.19

kura ate kout, kaura ualonguala tar toking uan uleiking Likonia gera kilais i Listra me i Debe meniampe toro ginamehe ro uan gere moko uahuhut tar toking uan uleik rasin. <sup>7</sup>Doh toro uaninin, rasina kura la mene tauete dedempe toro Uelhire Uaia.

**Poul me Banabas kura la uangoul i Listra me i Derbe**

<sup>8</sup>Tar uan uleik i Listra, Poul ke mene ualasira to tar siokor butur tasir tamata toro Uelhire Uaia, doh tar uan uleikion, a tansiokor tamat a mate turur toking pang kekena tar binak ka pohoin, kara hik pahe banotong la katong.

<sup>9-10</sup>Inggon e ualongoro uaia tun re menmene pe Poul. Doh Poul ke banga uanono tatanon, kare banga pare, inggonor mater keken e tagorong mana pare, e banoto ra uauiaian, kare kulangua tatanono pare, “Tahig! Tentur kai.” Doh gine ke mene pe Poul tatanono paar, inggono ke siaka kai, kare uakekena tar la.

<sup>11</sup><sup>f</sup>Gine ka banga per tamata tar hua ke guatain Poul, gisina ka siokor mene ualeik pare, toro uelhiring Likonia, “O godo ka la uahiuaha tagigeig ngohina tasir tamat!”

<sup>12</sup>Gisina ka uelkilangua tang Banabas pare, nu Sus, doh Poul ka uelkilain tang Hermes, teene inggon a tamatang men. <sup>13</sup>Na umang lotu Sus ge nas godosin e tokohia i kalahara tar uan uleik, doha patereng tar umang lotuono ke keipimeane toro pirpirikinar uan uleik tasir kau makana mer kalanguh nirokoso tar me guata tokaha keip tasir tamata me uahung e la tas Poul me Banabas.

<sup>14</sup>Bo tar binaka puk kura longoro rasina tar puhon, rasina kura kihkih tenasira hikhiku, kaura ualo tauetela tasir tamat, kaura mene ualeik pare, <sup>15</sup><sup>g</sup>“Ro bung kalomiraem! Ae maene rung guata inggoum pare? Raeim deha toking tamata puk pon, ngohina tamiuoum. Raeim kira ueliu pukume toro Uelhire Uaia, tar lang hire teil tamiuoum tar hiliu tasir godu bohoboh, ge gisina pe ahik pah ra banotong poul tamiuoum, karung lotu tang God ger tua geke tou i Heuene, dohi kot, kare touo pono tar teh meniampe tasir mamang inetelik gera mok i teh, doh tar kot. <sup>16</sup><sup>h</sup>Sioun inggono ke uamaluana tasir tamata uakapa ra uakeluk teres nimalar, teene inggeig ahik pah ki ate tatanon. <sup>17</sup><sup>i</sup>Bo Inggono puk ke ualasin tar bureher hagar. Inggono ke ualasin pare, ter God uaia, re heir tur peha i Heuene tar huan, kare uakotpokoso pono tar niein. Inggono ke heir tar bureher niein tagigeig, kare uauoun tagigeig tar niuah.” <sup>18</sup>Gine kura mene pe Poul me Banabas tar menemenenin, rasina ke puluhe uadeil pukis tar tur tane tasisina mata heir tar uahung tarasin.

<sup>f</sup> 14.11 Apo 28.6   <sup>g</sup> 14.15 Ker 146.6; Apo 10.26   <sup>h</sup> 14.16 Apo 17.30   <sup>i</sup> 14.17 Jer 5.24

<sup>19j</sup>Bo i muduhia puk, o gisiamer Jung Antiok me i Aikoniam ka lame i Listra, kara me hounhoun tasir tamata pare, Poul me Banabas ura bohboho puk tasisin. Maeit gisina ka bakbak pousungua tang Poul tar palau. Doh gisina ka namana pare, ke maton, maeit ka reih tauetela i kalahara tatanono tar uan uleik. <sup>20</sup>Bo o tamatang tagorong mana puk ka me tur uiloho tatanon, song ke tentur kaion, kare la tapokis polukula iuma tar uan uleik. Tar uagiamehenar marein, rasina me Banabas kura hiliu i Listra, kaura la i Debe.

<sup>21</sup>I Debe rasina kura la mene ualasira pono toro Uelhire Uaia, doho bureher tamata ka tagorong man. <sup>22k</sup>Rasina song kura tapokis polukula i Listra me i Ikoniam dohi Antiok tar mene uatampopokoho tasir tamatang tagorong mana tar tur uapopokoho teres nitagorong mana tang Iesu. Rasina kura hire pono tasisina pare, “Inggeig i turung kale tar bureher niduh, song ri banoto tar la leke tena Nitoia God.”

<sup>23</sup>Doh rasina kura umatoto ueleheiringua tasisina tasir mamahoholiking tasir mamang toto tamataliking lotu. Rasina kura lotu, kaura ueil tar uamoko tasisinar mamahoholik tena nikaueke Iesu mara tampopokohosin ge rasina pe ura tagorong mana pare, gisina tera turung uoum keip tasir tamatang tagorong man.

#### **Poul me Banabas kura tapokisila i Antiok tar pang uan i Siria**

<sup>24</sup>I muduhia rasina kura lih tapokisila i Pisidia, kaura la pokos i Pampilia. <sup>25</sup>Gine kura mene ualasira baka pe rasina toro Uelhire Uaia i Pega, rasina song kura lihiko i Atalia. <sup>26l</sup>Tar uan i Atalia te kura panete tur rasina tar parau tar la tapokis i Antiok gekura la tur rasina sioun, doho tamatang tagorong man tar uaniono teka lotu tang God tar kaukeke tasrasin, ge gisina pe teka ualatue tasrasina tar la uelhire tauete toro Uelhire Uaia. Doh rasina kura la uakapa manasa tar kalekinaleon.

<sup>27m</sup>Tar binaka kura me pokoso Poul me Banabas i Antiok, rasina kura kila toto tasir tamatang lotu. Rasina kura ueluatata tasisina hape ke uamalagir pe God tasisin ahik paho Ju tagu, maene ka tagorong mana pon. <sup>28</sup>Rasina kura uangoul tagu tasisinar tamatang tagorong mana tar puhung barah.

#### **A tabila tokaha tasir toto tamatang lotu ke kotpokos i Jerusalem**

**15** <sup>1n</sup>I muduhia o gisiamer tamatang Judia ka laha i Antiok, kara me mene ualasira tasir tamatang tagorong man, kara kula pare, “Ge ahikioum pah ra pokoigir kapokoumiu ngohina re kulkula pe na ualatut Moses, God ahik pahe banotong uelkarus tamiuoum.”

<sup>j</sup> 14.19 Apo 17.13; 2Ko 11.25    <sup>k</sup> 14.22 Apo 15.32; 1Te 3.3    <sup>l</sup> 14.26 Apo 13.1-2  
<sup>m</sup> 14.27 Apo 15.4,12    <sup>n</sup> 15.1 Gal 5.2

<sup>2</sup>°Doh Poul me Banabas ahik tun pah kura uaha tar niualasiranin, kaura uelperere keip tasisin. Maeit o toto tamatang lotu ka uauia tar ueliuila tasrasina mesir gisiameher tamatang tagorong man i Jerusalem mara la uelkodoh baka tar puhono mesir aposoul, doho mamahoholik.

<sup>3</sup>O toto tamatang lotu ka poul tasisina mara la, doh gisina ka lihila tar pang uan i Ponisia me i Samaria, kara uahuahire teilila hape ka tagorong mana per tamata ge ahik paho Ju tagu tang God. Gine ka longoro per tamatang tagorong man, gisina ka siokor uaha tun.

<sup>4</sup>°Tar binak ka la pokososin i Jerusalem, o aposoul mesir mamahoholik, doho toto tamatang lotu ka uaha uangoul tun tasisin, maeit gisina ka ueluatata tasisina hape ke guata pe God tasir tamata ka la ueliu pelasina toro Uelhire Uaia.

<sup>5</sup>Bo o gisiameher tamatang tagorong mana tang Iesu gesir Parisi ka tentur kai, kara kula pare, “O tamata ge ahik paho Ju tagu paka poka bakaisir kapokous, kara uakeluk pono tena ualatut Moses.”

<sup>6</sup>Maeit o aposoul mesir mamahoholik ka tabila tokaha tar uakodkodoho tar puhon. <sup>7</sup>¶I muduhia ke la per bureher menemen, Pita ke tentur kai, kare mene uakodkodoho tasisina pare, “Ro bung tahig, inggoum kung ate manasa pare, ahik pah sioununtieh God ke uamatoto totoguo i uantinanina tamiuoum, tar la mene ualasira toro Uelhire Uaia tasir tamata ge ahik paho Ju tagu, doh gisina ka tagorong man.

<sup>8</sup>°God puk manasa tere ate tar kolousur tamat, inggono teke malahir tasisin, maeit ke heiriha tasisina tar Iabena Dedeil ngohina ke heir uoum pe tagigeig. <sup>9</sup>Inggon ahik pahe banga sira pare, tasisin o gisiamehe sioko tagigeig. Gine ka tagorong mana pesin, inggono ke uadedeil manasa tar koloususin. <sup>10</sup>°Ae maeit rung marang uedangoum tang God, rung marang uamoko pe tar niduh uleik tasir tamatasine ahik paho Ju tagu? Ingeigene meso bung tamagig ahik pono pah ki banoto tar uangoul keip tar niduhon. <sup>11</sup>°Ge inggeig pe paki siokor tagorong mana pare, Iesu ger Tamata Noman e turung siokor uelkarus keip tena nimalar, kare na niueldolomo tasir tamata uakap gera tagorong mana tatanon.”

<sup>12</sup>Song ka siokor tabtabila sikorosin, kara ualongoro tas Poul me Banabas kura ueluatata pe tasisin, hape ke poul pe God tasrasin, maeit kura uatouo tar bureher nitouo tasir tamatasis ahik paho Ju tagu.

<sup>13</sup>°Tar binaka kura ueluatata uakapa pe rasin, Jems ke mene uauleik pare, “Ro bung tahig, mu ualongoro totoguo, <sup>14</sup>Saimon Pita ke ueluatata manasa tagigeig hape ke ualasira pe God tena nimalara tasir tamatasis ahik paho Ju tagu. Doh inggono ter uakikilanganar binaka ke uamatoto inggono toсно tamat i uantinanina tasir tamatasis ahik paho Ju tagu.

° 15.2 Gal 2.1    ¶ 15.4 Apo 14.27    ¶ 15.7 Apo 10.1-43    ° 15.8 Apo 10.44; 11.15

° 15.10 Mat 11.30; Gal 3.10    ° 15.11 Gal 2.16; Epe 2.5-8    ° 15.13 Gal 2.9

15 Doh nosio uelhirer propeit teko uahire ponompe tar puhono ka bolo pein pare,

16 'I muduhia tar inetenine, inggo u turung tapokisiha.

Na Nitoia Debit ke ngohina tar taluhene ke tador,  
bo inggo puk u me turung tuha uaia tapokis tena nitoiaon.

17 Doho tamata gera uangoul harah,

gisina ra turung hingo me nipoul tar Tamata Noman  
menia pono tasir tamatasis ahik paho Ju tagu geku uamatotasio  
pare, nogo tamat.

A puhonene teke meneinir Tamata Noman.

18 Doh gininanine ka ueliate turig sioun.' ” *Aisaia 45.21; Amos 9.11-12*

19 “Temaait inggo u namana sira pare, inggeig paka hik pahi uamoko me niduh tang mai ge ahik paha Ju tagu, bo ke tagorong mana puk tang God. 20 Bo inggeig paki bolo puk mo bolobolo tasisin, tar uahire tasisina tar toub tar niein ge ahik paha delauan ger niheiring uahung tasir godo bohoboh, kara hik pah ra ura ueltebeir, doh ahik pono pah ra ein tasir inetesisir tua gesir nilolo pousur uekuekous, kara toubungua pono tar deuating. 21 Ge na ualatut pe Moses ka mene ualasira turig sioun toro mamang uan uleik uakap, kara mene uakeluk ponoigane tonosio mamang umang lotur Ju tar mamang Mareiniliking Pepe Uah.”

### **Nosio bolobolor mamahoholik ko la tasir tamatasis ahik paho Ju tagu**

22 Song ka uamatotor aposoul mesir mamahoholik, doho toto tamatang lotu tonosio tamata katong menia tas Poul me Banabas tar la i Antiok. Gisina ka uamatoto tang Judas gera kilain tang Basabas, doh Sailas, rasina ter toking mamahoholik tasir tamatang tagorong man.

23 Gisina teka keip toro bolobol, o nibolo pare, “O bolobolo rone o la tur tasir aposoul mesir mamahoholik geso bung tahimiuoum. Roon o la tamiuoumur tamata ge ahik paho Ju tagu, bo kung tagorong mana puk, inggoumene rung uangoul i Antiok, Siria dohi Silisia.

A marein uaia tun tamiuoum.

24 Inggeim king me longoro pare, o gisiamehe tamiueim ka lame tamiuoum, kara me mene tar poko tar kapakon, doh inggoum ahik pah kung hagouo uaia. Bo inggeim puk ahik pah teking kula tasisin. 25 Maeit inggeim king ueluauiiae tar uamatoto mo tamat tar lame tamiuoum, gisina ra la keip menia ponome tas Poul me Banabas ger toking kalomiueim tun. 26 Rasina ter toking tamata gekura heir tun tara tukunus tar mene tauete tar hangana Iesu Kristo ger Tamata Noman.

---

∨ 15.20 KT 34.15-17; NKP 17.10-16

<sup>27</sup>Temaeit inggeim king ueliuila tas Judas me Sailas maura me hire katongo tun tar hauene king menmeneiem toro bolobol. <sup>28</sup> <sup>w</sup>A Iabena Dedeil teke heir tar ninamana tamiueim pare, inggoum paka hik pah ra heir baka polukusioum me giniamer niduh e uanoto baka poluk tar inetenine ka bolo uahiuag.

<sup>29</sup>Inggoum mu toub me niein ge me niheir pare, a uahung tasir godo bohoboh, karung toub pono tar deuating, doh tasir inete gesir tua gesir nilolo pousur uekuekous, karung uakenua pono tar ura ueltebeir. Inggoum mu turung uangoul uaia tun getung uakeluk tun tar puhpuhunin. A uia tun manasa bidouh!”

<sup>30</sup>Maeit gisina ka hiliu i Jerusalem, kara la i Antiok. Gisina ka la kila toto tasir toto tamatang lotu, song ka heir tasisina toro bolobol. <sup>31</sup> Gine ka menmene uakeluk pesina toro bolobol, o tamatasine ahik paho Ju tagu ka siokor uaha tun ka longoro pe tar menemeneng uatampopokoho tasisin.

<sup>32</sup>Judas me Sailas kura menmene uaburehe sikoro tasisina tar uatampopokoho tasisin, teene rasin a toking propeit pon. <sup>33-34</sup> I muduhia ke karuh baka per giniamer marein, o tamatang tagorong man i Antiok, song ka kula tas Judas me Sailas tar tapokis, rasina ka kulais ura tapokis keip toro hiarou o la tur tasisina tar tapokisila tas geka ueliuime tarasin.

<sup>35</sup>Bo Poul puk me Banabas kura uangoul dedempe i Antiok mesir gisiamer tamatang tagorong mana tar mene ualasis, kaura uelhire tauete baka poluk tono uelhirer Tamata Noman.

### **Poul me Banabas kura la uelpakah**

<sup>36</sup>Tar siokor binak, Poul ke kula tang Banabas pare, “Raeig deh ira la tapokis uelhir baka poluk toro uan uleik gekira mene ualasisra uoumig tono Uelhire Uaiar Tamata Noman, maira bangaehe menia pono raeig tasir tamatang tagorong mana hape kara uangoul pe.” <sup>37</sup> <sup>x</sup>Doh Banabas ke malahir pare Jon-Mak pake la tagu tarasin, <sup>38</sup> <sup>y</sup>bo Poul puk ke kula pare, “Inggono deh ahik paha ninamana uaia tar kila tagu tatanon, ge inggono pe ke hiliu to baka uoum i Pampilia tagiraeig, Inggon ahik pah ke kalekinale ualuluhara tagu.”

<sup>39</sup>Maeit rasina kura ueluelperere tar puhon, kaura la uelpakahingua. Banabas ke kila tagumpe tang Jon-Mak, rasina kura la panete tar parau, kaura la i Saiprus. <sup>40</sup>Bo Poul puk teke kila tang Sailas, kaura la. O tamatang tagorong manang Antiok ka lotu, kara uamoko tarasin tena nikaueker Tamata Noman. <sup>41</sup>Song ke lihila Poul i Siria, dohi Silisia, kare mene uatampopokoho teres nitagorong manar toto tamatang lotu.

<sup>w</sup> 15.28 Mat 23.4   <sup>x</sup> 15.37 Apo 12.12,25   <sup>y</sup> 15.38 Apo 13.13; Kol 4.10



### Timoti ke la tagu tas Poul me Sailas

**16** <sup>1</sup>Poul ke lame i Debe, song i Listra, doh tar uanion e uangoulur tang siokor tamat a hangana tang Timoti. Timoti tang tinan a peng Ju, kara kuahang tagorong man, bo tamana pukion a peng Grik. <sup>2</sup><sup>a</sup>O bureher tamatang tagorong man i Ikoniam me i Listra ra uoto ueltada tun tatanon, kara uoto meneng uairana tun tatanon. <sup>3</sup>Poul ke malahir tatanono pare, e la tagu tatanon, maeit ke poko tar kapokona inggon, teene o bureher Ju ra uangoul tar buturuon, doh ra ueliate pare, inggono tang taman a peng Grik. <sup>4</sup><sup>b</sup>Gine ka la hahai pesina toro uaninin, gisina ka ueliu hahai tar ninamana geka uauia toinir aposoul mesir mamahoholik i Jerusalem mara uakelukur tamat. <sup>5</sup>Maeit o toto tamatang lotu ka tampopokoho tun tar tagorong man, kara burburehe uain tar mamang marein.

### Poul ke banga tar tamatang Masedonia i lolono tar borborian

<sup>6</sup>Poul, doh Sailas kura lihila i uantinanin tar pang uan i Prigia, dohi Galesia, rasin ke tur taneisir Iabena Dedeil matura uelhire tauete toro Uelhire Uaia tar pang uan i Esia. <sup>7</sup>Tar binak ka lala uahuhut pesina tar pang uan i Misia, gisina ka marang uedanga pono tar lala tar pang uan i Bitinia, bo na Iabena puk Iesu ke tur tane tasisina tar la. <sup>8</sup>Maeit gisina ka lih uagel i Misia, kara lih uahuako i Troas. <sup>9</sup>Doh naboung tar binakon, Poul ke banga tar borboriana tar tamatang Masedonia e uaduadangata pare tatanon, “Ingga o lame i Masedonia, karo me poul tamiueim.”

<sup>10</sup>I muduhia ke banga baka pe Poul tar borborianon, inggeim king kaleuatoro puk manasampe, karing la puk manas i Masedonia. Inggeim king naman manate puk manasampe pare, God ke kula tamiueim tar la uelhire tauete toro Uelhire Uaia tasisin.

### Lidia ke uapalih tena niguat

<sup>11</sup>Inggeim king panete tar parau, king hiliu i Troas, karing ualo uakodkodohola i Samotres, doh tar uagiamehenar marein, inggeim king la pokos i Neapolis. <sup>12</sup>King hiliueim tar uanion, king lih i kot, karing la pokosongua i Pilipai, a uan geka uatenturinin tamatang Roum, doh tere keiping uan uleik tar pang uan i Masedonia. Doh inggeim king uangoul sikoro baka tar uaniono tar uagiamehenar marein.

<sup>13</sup>Doh tar Mareining Pepe Uah inggeim king tauetela toro pirikinar uan uleik, karing lihila tar siokor kodom, doha buturuon ra uoto la totoinir Ju tar lotu tokah. Inggeim king la tabila uahiu, karing uakekena tar mene tasir kuaha gera uangoul totong sioun tar buturuon. <sup>14</sup>A tang

<sup>z</sup> 16.1 Apo 14.6; 2Ti 1.5    <sup>a</sup> 16.2 Pil 2.19-22    <sup>b</sup> 16.4 Apo 15.23-29    <sup>c</sup> 16.6 Apo 18.23

siokor kuaha tasisin, a hangana tang Lidia, inggon e uoto uabulaua tar gomono tabeliah a peng Taiataira, doh inggon e uoto lotu pono tang God. A Tamata Nomana ke uatakapuka toro balanono mare uakelukiono tena menemene Poul. <sup>15</sup>Tar binaka ka uahuuiono meso bubungunasis ra uangoul tagu tatanon, inggono ke dangatangua tamiueim tar lala tena umon. Inggono ke kula pare tamiueim, “Ge kung banga siroum totoguo pare, a kuahang tagorong mana tar Tamata Noman, inggoum mu me uangoul tagu totoguo tenag um.” Maeit inggono ke petutupe tun tamiueim.

### **Poul me Sailas ka uamokois tar karabus**

<sup>16</sup>Maeit a siokor binak inggeim mi lang la tar buturung lotu, doha tang siokor kuaha ger karabus ke ueltupar tamiueim. Inggonor kuah e uangoul teilinir liouan a giamehe siok, maeit inggon e banoto tar hire tauete tar inete ge halana te kotpokos. Inggono ra uoto bulauain tar bureher mani e laig tasir tamatasit ra kaukeke tatanon.

<sup>17</sup><sup>d</sup>A kuahono ke uakeluk tas Poul, kare menmene uauleik teil pare, “O tamatasine tosno tamatang kalekinaler God ger i ranantieh. Gisina tera uahuahire teil tamiuoum tar lelung uakeluk mare kale tapokis God tamiuoum!” <sup>18</sup>A kuahono ke guata paara tar bureher marein, doh Poul ke manguha tar longoro re guata peon, maeit ke tur banga uelhir tatanon, kare kula tar liouan a giamehe sioko pare, “Tar hangana Iesu Kristo, inggo u ualatoho totomua o hiliu tatanon!” Maeit tar binakampeon a liouana giamehe sioko ke hiliu tatanon.

<sup>19</sup>Tar binaka ka bangar tamataasis ra kaukeke tar kuahono tar puhon, gisina ka ate pare, ahik baka poluk menas hagarang kale mani. Maeit ka kuse tas Poul me Sailas, kara reihila tasrasina tar buturung uabulbulaua to ium tasir tamata uleik tar uan uleik. <sup>20</sup><sup>e</sup>Gisina ka ueliuila tasrasina tasir tamatang kedangang Roum, kara la hire pare, “A toking tamata rasine a toking peng Ju, doh rasin ura uakotpokoso tar nitabila uasaane tenagi uan uleikieig. <sup>21</sup>Rasin ura ualasira tar niguata giameher siok ahik paha kodkodoho keip tenagi niguatigane i Roum.”

<sup>22-23</sup><sup>f</sup>Maeit o bureher tamata ka uanoto tasisinasit ra kaukeke tar kuaha tar marang guata uasa tas Poul me Sailas. Doho tamatang kedanga ka ualatohongua pare, ra kihkihig nasira gomono rasin, kara halhaluhis, song ra uamokois tar karabus, kara ualatohoinir tamatang tur kaukeke tar karabus tar kaukeke uaia tun tasrasin. <sup>24</sup>Gine ke longoro pe inggono ka ualatoho pein paar, inggono ke ueliuiguala tas Poul me Sailas tar karabus gere mok i uantinanina tun tasrasin, kare taoun tane tara kekeis rasina tar pang douk.

<sup>d</sup> 16.17 Mak 1.24   <sup>e</sup> 16.20 Mak 13.9   <sup>f</sup> 16.22-23 2Ko 11.25; 1Te 2.2

<sup>25</sup>Kaelainane nar uantinaninar boung, Poul me Sailas kura lotu, kaura kerekere tar kerekere tang God, kara ualongoromper gisiamer tamatasisir karabus tasrasin.

<sup>26</sup>Ahik me sikir manasan, kare pokosor siokor nun uleik geke uagune uakapangua pe tar umang karabus. Doha pирpirikinar umang karabus ke siokor takapuk, kara mamang tieinilik geke uih taneig tasir karabus ke siokor takaluak. <sup>27</sup><sup>s</sup>Giner tamatang tur kaueke ke me gulete pon, doh gine ke me banga peono tar pирpirik uakapa tun re takapuka pe, inggono ke laruh tauete puk manasampe tono baenat, kare marang uiliatung pous katongoin, teene inggon e namana pare, ka siokor ualo taueter tamatasiner karabus. <sup>28</sup>Bo Poul puk ke mene ualeikila pare, “Ahik paho uaelmahing katongoia! Inggeim deh ginempe ring siokor uangoul!”

<sup>29</sup>Song ke kila ualeikir tamatang tur kaueke tar umang karabus me tamat e keipime mo lam, doh inggono ke poroporo uasa tun tar nisokor, kare ualo ualekela ium, kare la baka uahiunane i uahuhut tas Poul me Sailas. <sup>30</sup><sup>h</sup>Inggono song ke ueliu tauete tasrasina, song ke dangata tasrasina pare, “Tang torik! Hape ru guata pe inggo mara uelkarusio?”

<sup>31</sup>Kaura mene hahaua rasina pare, “Tagorong mana tang Iesu ger Tamata Noman mare uelkarusiono totomua meniampe tasisis ra uangoul tagu tenang uma.”

<sup>32</sup>Maeit Poul me Sailas song kura mene tauete tono uelhirer Tamata Nomana tatanon meniampe tasir tamatasis ra uangoul tagu tena umon. <sup>33</sup>Tar boungon inggonor tamatang tur kaueke tasir karabus ke kila tas Poul me Sailas, kare la guata uaia teresira loto rasin. Ahik me sikir manasan inggono meso bubungunasis ra uangoul tagu tatanono ka siokor uahuhuis. <sup>34</sup>Inggono ke ueliuila tena uma tasrasin, kare la ualaein. Doh inggono meso bubunguna ka siokor uaha ka tagorong mana pe tang God.

<sup>35</sup>Gine ke la marein manasa peon, o tamatang kedanga ka ualatoho tosnosio tamatang uiliatung tar la ualatoho tar tamatang tur kaueke tasir karabus, kara la kula pare, “Uamaluana tar toking tamata rasis geura tauet.”

<sup>36</sup>Maeit a tamatang tur kaueke tasir karabus ke la hire tang Poul pare, “O tang kedanga ka ualatoho pare, ra uataueteis raoum me Sailas. Gine daan raoum mura la keip tar niuah.”

<sup>37</sup>Bo Poul puk ke kula tasir tamatang uiliatung pare, “Gisina ka halhaluh to tamiraeim tar matasir manai, doh ahik pah ka kedanga to bakais raeim me tabila tokah, kara uamoko tamiraeim tar karabus, ge raeim pe a toking peng gane pon i Roum. Doh gine daan, ae maene ra marang uelueluula uanomo pukusina tamiraeim? Ahik nomanampe! Uamaluanampe tasisina gera la katongome, kara me keip tauete katongo tamiraeim.”

---

<sup>s</sup> 16.27 Apo 12.18-19    <sup>h</sup> 16.30 Apo 2.37

<sup>38</sup>Gisitir tamatang uiliatung ka la uahire tasir tang kedang, tar binaka ka la longorosina pare, Poul me Sailas a toking peng Roum pon, gisina ka siokor lutara tun, kara sokor. <sup>39</sup>Maeit gisina ka lame, kara me hire tas Poul me Sailas pare, gisina ra ueldolomo tun ka guata pe pare, kara ueliu tauetengua tasrasin, kara kula pare, tasrasin ura hiliu tar uan uleik.

<sup>40</sup>Maeit gine kura tauete tur pe rasina tar karabus, rasina kura langua tena uma Lidia te kura la ueltupara to rasina tasir gisiamer tamatang tagorong man kaura mene uapopokoho tasisin. I muduhia song kura hiliu rasin.

### Poul me Sailas kura la uangoul i Tesalonaika

**17** <sup>1</sup>Poul me Sailas kura lihila i Ampolis me i Apolonia, kaura la pokosola i Tesalonaika gere toko nasi umang lotur Ju. <sup>2-3</sup>Poul ke la lekela ium ngohina re uoto guatang sioun pe, dohi lolono tar touonor uik tar mamang Mareining Pepe Uah, inggon ke mene tar uabang manate pare, tang Kristo ke malahir pe God tatanon e turung mat, kare tua tapokis, kare kula pono pare,

“Iesuene ru hirhireio tamiuoum inggono ter Kristo.”

<sup>4</sup>O gisiamer Ju ka tagorong man, kara uanotongua tas Poul me Sailas menia tasir bureher tamat ge ahik paho Ju gera uoto lotu tang God, doho burehe ponor kuahasitir tohangas, <sup>5</sup>bo o gisiamer mamahoholiking tasir Ju puk ka gehe uasa tun, maeit ka kila toto tasir tamata uasaane tar buturung uabulbulau. Gisina ka menmene uahoun tasisin, kara uakotpokosongua tar nimalianane tar uan uleik. Gisina ka ualola tena uma Jeson, kara Poulaka toro pirik tar sir tas Poul me Sailas mara ueliu tauetelaisane tar matasir manai.

<sup>6</sup>Bo gine puk ka la bataba pesina tasrasin, gisina ka reihila tang Jeson mesir gisiamer tamatang tagorong manane tasir tamata uleiking tar uan uleik, kara kulkula uauleik teil pare, “O tamata geka uakotpokoso tar niguata uasaane tar koto uakapa tun teesine manasa ka me pokoso daan. <sup>7</sup><sup>i</sup>Doh Jeson teke uauia tasisina tar me uangoul tena umon. Gisina ra guata tar niguat ahik pahe uakeluk tena ualatut Sisa, gisina ra kula pare, a tang giameher toia te Iesu.”

<sup>8</sup>Tar binaka ka longorosina pare, o tamata uakapa tun mesir tamata uleiking tar uan uleik ka siokor ualagoreih keip tar nimaliana uleik. <sup>9</sup>Gisina song ka kulangua tang Jeson meso bung kaluana tar bulaua tar mani tar puhon. Song ka uamaluamampeis ka la.

### Poul me Sailas kura la tar uan uleik i Beria

<sup>10</sup>Na boungunar binakon, o tamatang tagorong mana ka ueliuila tas Poul me Sailas i Beria. Gine kura la pokoso pe rasin, rasina kura lala poluk tenasi umang lotur Ju.

<sup>i</sup> 17.7 Luk 23.2; Jon 19.12

<sup>11</sup>Doho Jung tar uan uleikion o tamata uaiantiehe poluk tasir Jung Tesalonaika, teene gisina ka marang siokor ualongoro tun tar haua ke menmeneig Poul, kara marang tintiman uaia tun tono uelhire God tar mamang mareinilik mara ate tun ge para mana re mene tauete pe Poul. <sup>12</sup>O bureher Ju ka tagorong man menia ponompe tasir gisiameher kuahasitir tohangas ge ahik paho Ju, doho burehe ponor bulout.

<sup>13</sup>Bo tar binaka puk ka longoror Jung Tesalonaika pare, Poul ke la mene tauete poluk tono Uelhire God i Beria, gisina ka la ponola, kara la hounhoun tasisin, kara uaelueltebeir teres ninamanasin. <sup>14</sup>O tamatang tagorong mana ka ueliu uateuele tunuko tang Poul i teh mare la panete me parau, bo Sailas puk me Timoti kura uangoul uoum i Beria. <sup>15</sup>O tamata geka ueltutueko tang Poul ka la ueliu tang Poul i Athens, gisina ka tapokis keip toro mene tas Sailas me Timoti pare, pakura uakeluk uateuele tunuko tang Poul.

#### **Poul ke mene tauete toro Uelhire Uaia i Athens**

<sup>16</sup>Gine re pepe uangoul pe Poul tas Timoti me Sailas, inggon ahik pah ke hagouo uaia re banga to pe tar bureher kaesa ter godo bohobohane tar uan uleik i Athens.

<sup>17</sup><sup>j</sup>Maeit inggono ke la tenasi umang lotur Ju, kare la uelhalat keip tasir Ju, karo tamatang Grik gera uoto lotu tang God, kare mene to pono tasir tamata ueltebeirane tar buturung uabulaua to tar inet. <sup>18</sup>Doho pang tamatang iate ra kilais o Epikurian mesir Stoik ka uelperere keip tang Poul. O gisiamehe ka dangata pare, “A haua tun re marang uedangaigir uoto menene? Inggono deh here marang meneng uelturut poluk mo gisiamehe siokor god.” Gisina ra mene paar, teene Poul e menmene ualasira toro Uelhire Uaia tang Iesu, doh tar nitua tapokis.

<sup>19</sup>Maeit gisina ka kila tatanon, kara ueliuila tatanono tar butur ra tabila tokahar tamatang kedang gera kilais o Areopagus, kara la kula to tar matasisina pare, “Inggeim deh mi marang ate uaia pono tar hauene ro menmene ualasira teilia? <sup>20</sup>Inggadeh gine ro ueliuime tar ginamehe siokor ninamana teremi nilongoreim, doh inggeim mi marang ate uaia hape tun re kulkula penin.”

<sup>21</sup>Doho bureheisir tamatang Athens mesir tamatang toro giniamer pang uan gera uangoul tar uan uleikion ka uakapa tenas binaka tar uangoul puk ra ualongoro pe, kara ueluatata tar timuhur ninamananin.

<sup>22</sup>Maeit Poul ke tentur kaiane i uantinanina tenas tabila tokahar Areopagus, kare kula pare, “Ir Tamatang Athens, inggo u banga tamiuoum pare, mu tampopokoho tun tenami niguata tar lotu. <sup>23</sup>Gine ku latlateil uiloho pe inggo, inggo ku bangbanga hamas tun

---

<sup>j</sup> 17.17 Apo 18.19

tar inetenine rung uoto lotugioum. Inggo ku la ueltupara pono toro oltang uahung e moko teilir nibolobol a nibolo pare, ‘O nanar god geri teleieig.’ Inggoum mu lotu tar god ge ahik pah mu ateioum, doh inggono ter Godene ru hirhireio tamiuoum!”

<sup>24</sup> <sup>k</sup>“Inggono ter God geke tuha tar koto uakap meniampe tar mamang inetelikinine re moko tar kot, inggono ter Godong Heuen, doh gane i kot, doh inggon ahik pahe uangoul toro umang lotuniner nituhang tamat. <sup>25</sup> <sup>l</sup>Inggon ahik pahe katupa tagu me siokor inet, doh ahik pono pahe malahir tagu me nipoulung tagigeig, ge inggono pe tere heir tasir tamata uakapa tun tar nitua, a romene ri ungaieig, kara mamang inetelik. <sup>26</sup> O mamang tamatalikisine ra uangoul tar koto ke uabour turusiono tar tang sioko pukur tamat. Godompe ke uamatoto tenas binakasina, doh ia ra uangoul.”

<sup>27</sup> <sup>m</sup>“God ke guata pare, mara sirir tamata uakapa tun tatanon ge para tupara tatanon, bo inggono puk ahikimpe pahe uairehe tagigeigir tang siok tang siok. <sup>28</sup> Ge maene pe ri uangoulieig o tua o tamat te inggon. Ngohina sira ka kula pe nomio tamatang tut kerekere inggoum pare, ‘Inggeig teso bung tunon.’ <sup>29</sup> <sup>n</sup>Temaeit i uangoul sireig pare, o bung tuna God, bo inggeig puk ahik pahi namana sira pare, tang God here ngohinar kaesa ka tuha keipig tar gol mer silva ue a palau.”

<sup>30</sup> “Sioun o tamat ahik pah ra ate uaia tang God, doh inggono ke bangang duk puk tar puhon. Bo gine daana puk God e malahir tasir tamata uakapa tunane tar koto tar uapalih tenas niguat. <sup>31</sup> <sup>o</sup>Ge inggono pe ke uamatoto manasa tar binaka re turung kedanga keip tar nikodkodoho tasir mamang tamatalikane tar koto uakap. Inggono ke uamatoto sioun tun tar tamata gere turung uoum keip tar mareining kedangon. God ke uabang manate tar puhono tasir mamang tamatalik ke kale tapokis tur pe tatanono toro mat.”

<sup>32</sup> Tar binak ka longoro pesina pare, Iesu ka uatua tapokisin, o gisiamehe tasisina ka uanio. Bo o gisiamehe puk tasisina ka kula pare, “Inggeim mi marang ualongoro baka poluk tar puhon.”

<sup>33</sup> Maeit Poul ke hiliu tasisin. <sup>34</sup> Bo o gisiamehe puk tasisina ka tagorong man, kara la tagungua tang Poul. Dionisius ter tang sioko pono tasisin ka tagorong man, inggono ter tang sioko tasir Areopagus, kara tang sioko ponor kuah a hangana tang Damaris menia pono tasir gisiameh.

<sup>k</sup> 17.24-25 1To 8.27; Apo 7.48 <sup>l</sup> 17.25 Ker 50.12 <sup>m</sup> 17.27 Ker 145.18; Jer 23.23  
<sup>n</sup> 17.29 Ais 40.18-20; 44.10-17; Apo 19.26 <sup>o</sup> 17.31 Ker 96.13

Poul ke la mene ualasira toro Uelhire Uaia i Korin

**18** <sup>1</sup>I muduhia Poul ke hiliu i Atens, kare la tar uan uleik i Korin. <sup>2</sup><sup>p</sup>Tar uan uleikion inggono ke la ueltupar tar tang siokor peng Ju a hangana tang Akuila, inggono ka poho toin i Pontus. Bo Akuila puk me Prisila, ge na kuahon, kura nihing hiliu tur pukume i Itali, teene Sisa Klodius ke heir tauete tar ualatoho pare, o Ju uakapa tun ra siokor hiliu tar uan uleik i Roum. <sup>3</sup><sup>q</sup>Doh Poul a tang bung tar taluh, temaene ke lang bangono tasrasin, ge rasina pe a toking tang bung pono toro taluh. Inggono ke la uangoul tagu, kare kalekinale uelkout tasrasin. <sup>4</sup>Bo tar mamang Marening Pepe Uah inggon e menmene tasir Ju mesir tamat ge ahik paho Juane iuma tar umang lotu, kare uelhalata keip pono tasisin mara tagorong mana tang Iesu Kristo.

<sup>5</sup>Tar binaka kura la turume Sailas me Timoti i Masedonia, Poul song ahik tun pahe uasaluhe tar mene ualasira toro Uelhire Uaia, inggon e mene tar mamang binakalik tar uakalahara tasir Ju pare, Iesu te Kristo. <sup>6</sup>Bo tar binaka puk ahikir Ju pah ka tagorong man, kara menmene uasa tang Poul, inggono ke titire liu toro uou tena gomon, kare kula pare tasisin, “Ge ahikioum pah mu uapalih tenami niguat, a nisa e moko manasampe tamiuoum katong! Inngo ku uedanga manasa tar haua ka uamatatoin totoguo u guat. Gine daan inggo u la uelhir puk manasa tasir tamatisin ahik paho Ju tagu.”

<sup>7</sup>Poul ke hiliu tenasi umang lotur Ju, kare lala tena uma Titius Jastus, inggon ahik paha Ju, dohe uoto lotu pono tang God, doh na umon e tokouahuhut tenasi umang lotur Ju.

<sup>8</sup>Doh Krispus ger tamata uleik tenas umang lotur Ju. Inggono meso bubungunasis ra uangoul tena umon ka siokor tagorong mana tun tar Tamata Noman menia ponompe tasir bureher tamatang Korin geke longoro tang Poul, ka siokor tagorong mana pon, kara siokor uahuhuis.

<sup>9</sup>Tar siokor boung, a Tamata Nomana ke menmene tang Poul i lolono tar borborian. Inggono ke kula pare, “Innga ahik paho sokor. O mene dedempe, ahik paho uangoul bukuk. <sup>10</sup><sup>t</sup>Gane ahik me tamata re banot e uiliatung totomua, ge inggo pe u uangoul tagu totomua, doh inggo nogo burehe ponor tamata ra uangoulane tar uan uleik.”

<sup>11</sup>Maeit Poul ke uangoul tar uan uleikiono toro sioko ro krismas, kara tonomo baka polukur bialok re mene ualasira pe tasir tamata tono uelhire God.

<sup>12</sup>Bo tar binaka puk re tamata uleik Galio tar pang uan i Akaia, O Ju uakapang Korin ka siokor uauia tar nimaliana tang Poul, kara ueliuila

<sup>p</sup> 18.2 Roum 16.3   <sup>q</sup> 18.3 Apo 20.34   <sup>r</sup> 18.5 Apo 17.14-15   <sup>s</sup> 18.6 Apo 13.46,51; 20.26  
<sup>t</sup> 18.10 Jos 1.9; Ais 41.10

tatanono tar umang kedang, kara la kula pare, <sup>13</sup>“A tamatene e menmene uamoho teil tasir tamata tar lelung lotu tang God, a hagarinin ahik pahe uakeluk tenas ualaturu Ju.”

<sup>14</sup>Ginempe re marang mene hahaua pe Poul, Galio ke kula tasir Ju pare, “Inggo u banotong ualongoro tamiuoum getung menemene inggoum me puh ka tokolekinane tar ualaturung Roum ue me niguata uasantiehe tun ka guatain. <sup>15</sup>Bo gine rung memene puk peoum tar puhpuhung dangat, kara niualasira mer hangan, inggoum mu la uelkodikodoho keip katongosioum tenami niualaturu. Inggo ahik pahu banoto teru tamatang kedanga tar nguatanin.”

<sup>16</sup>Maeit inggono ke ualatoho tasisina ra keip liuisane tar umang kedang. <sup>17</sup>Gisina song ka tur kauiurila tang Sostenes ger tamata uleik tar umang lotu, kara uiliaturung to tatanon i uoum tar buturung kedang. Bo Galio puk ahik dedempe mate ualasila me haua pake guatain.

#### **Poul ke la tapokisila i Antiok tar pang uan i Siria**

<sup>18</sup>“Poul ke uangoul tar bureher marein i Korin. Inggono ke marang la, maeit inggono ke hiliu tasir tamatang lotu, inggono ke lako tar uan uleik i Senkria, kare la panete tar parau tar la tar pang uan i Siria. Prisila me Akuila te kura la tagu tatanon. Bo tar binaka puk, kare uangoul harahon i Senkria inggono ke kout tar ulun, teene inggono ke guata keip tang God tar ualapagah. <sup>19</sup>Gisina ka la pokos i Epeses, tar uaniono teke la hiliu to Poul tas Prisila me Akuila. Inggono ke la leke tar umang lotu, kare la mene uakalahara uaia tasir Ju tang Iesu. <sup>20</sup>Tar binak ka kulasina tatanon e uangoul tagu baka poluk tasisin, inggono ke de. <sup>21</sup>Bo gine puk ke marang hiliu peono tasisin, inggono ke ualapagah katongoin tasisina pare, “Gete malahir God inggo u turung tapokis polukume.”

Song ke panete tar parau tar hiliu i Epeses. <sup>22</sup>Tar binaka ke la pokosono tar uan uleik i Sisaria gere moko tar pang uan i Siria, Poul ke hiuo tar parau. Inggono ke la taro i Jerusalem, kare la uamarein uleik tasir tamatang lotu, song ke lala uahiuako i Antiok.

<sup>23</sup>I muduhia ke uangoul baka peon i Antiok, Poul song ke la tur tar uanion, kare lala hahaila toro mamang uaning toro mamang buturulik tar pang uan i Galesia me i Prigia, tar mene uatampopokoho tasir mamang tamatalik tar tagorong mana dedempe tang Iesu.

#### **Apolos ke mene tauete toro Uelhire Uaia i Epeses**

<sup>24</sup>A tang siokor tamatang Ju, a hangana tang Apolos, a peng tar uan uleik i Aleksandria, ke lame i Epeses. Inggon a tamatang ate, dohe ate uaia tun tonu uelhire God. <sup>25</sup>Inggon a niualasira uaia tun tena hagarir

<sup>u</sup> 18.18 Aha 6.18; Apo 21.24



Tamata Noman, dohe uoto uaha tun tar binaka re mene tauet, kare mene ualasira toro mana tang Iesu. Bo a hagarang uahuhu puk re atein Apolos ter uahuhu geke ualansirain Jon ger tang uahuhu. <sup>26</sup>Inggon ahik tun pahe sokoro ke uakikilanga pe tar menane tar umang lotu, doh gine kura longoro pe Prisila me Akuila tatanon, rasina kura kilala tatanono tenasira um, kaura poul tatanono mare ate uakodkodoho tena hagarir Tamata Noman.

<sup>27</sup>Tar binaka ke marang la Apolos tar pang uan i Akaia, o tamatang lotu ka mene uapopokoho tatanon, kara bolo ponola tasir tamatang lotung tar uanion tar turung kaueke uaia tatanon. Gine ke la pokoso pe inggon, inggono ke la uatampopokoho tasir tamatang lotusis ka tagorong mana keip puk tena nipoulur Tamata Noman.

<sup>28</sup><sup>v</sup>Inggono ke uelperere keip tasir Ju i uoum tar matasir manai tar mene ualasira tur tunane toro bolobol tono uelhire God pare, Iesu te Kristo.

#### Poul ke mene tauete toro Uelhire Uaia i Epeses

**19** <sup>1</sup><sup>w</sup>Tar binaka re uangoul Apolos i Korin, Poul ke lala toro lenenit re moko toro beluna ro mokong tar pang uan song ke la pokos i Epeses. Tar uan uleikion inggono ke la ueltupar tasir tamatang tagorong man, <sup>2</sup><sup>x</sup>kare la dangata tasisina pare, “Inggoum kung kale pono tar Iabena Dedeil tar binaka kung tagorong mana?”

Gisina ka mene hahaua pare, “Ahik! Inggeim deh ahik uadeilimpe pah king ate tagu me Iabena Dedeil.”

<sup>3</sup>Maeit Poul ke dangata tasisina pare, “Bo hingiar niuahuhu kung kaleioum?” Kara hiresina pare, “Tero uahuhu geke ualansirain Jon.”

<sup>4</sup><sup>y</sup>Kare kula Poul tasisina pare, “Na niuahuhu Jon a uahuhung uapalih tar niguat. Inggono ke kula tasir tamata tar tagorong mana tar tamata gere turung uakelukuha tatanon, inggono te Iesu.”

<sup>5</sup>Gine ka longoro pesina tar puhon, gisina ka siokor uahuhu keipinguais tar hangana Iesu ger Tamata Noman. <sup>6</sup><sup>z</sup>Tar binaka ke uaponala Poul tar limana tasisin, a Iabena Dedeil ke laha tasisin, doh gisina ka uelhirengua tar ginameher uelhireng toro ginamehe ro uan, kara uelhire sira tasir propeit. <sup>7</sup>Gisin o siokor hangaul, doha tang torikir bulout uakapangua.

<sup>8</sup>Poul ke la leke tenas umang lotur Ju, doh ahik tun pahe meneng sokoro re mene tauete pe toro Uelhire Uaia ke la matotoin tar touonor bialok, inggono ke uelhalata keip tasir tamat tar uakalahara tena Nitoia God tasisinar Ju.

<sup>v</sup> 18.28 Apo 9.22   <sup>w</sup> 19.1 1Ko 3.6   <sup>x</sup> 19.2 Apo 8.16   <sup>y</sup> 19.4 Mat 3.11   <sup>z</sup> 19.6 Apo 8.17; 10.44,46

<sup>9</sup>Bo o burehe pukur Ju ka mahang longor. Gisina ka de mata tagorong man, kara menmene uasa pono tena hagarir Tamata Nomanane i uoum tasir bureher tamat. Maeit Poul ke hiliu tasisin. Inggono ke kila liu tasir tamatang tagorong man, kara la toto tar uelhalata tokahane iuma tena umang kale niate Tiranus tar mamang mareinilik. <sup>10</sup>Inggono e uoto guata paar, doh ke la banoto manasain toro torik ro krismas. Inggono ke guata pare, mara siokor longoror Ju mesir tamatasis ahik paho Ju gera uangoul tar pang uanionene i Esia tono uelhirer Tamata Noman.

**O Bung tuna Sikeva ka marang uedanga tar  
geil liu tasir liouana uasa tasir tamat**

<sup>11</sup><sup>a</sup>God ke guata tang Poul mare guata tar bureher nitouo popokoh. <sup>12</sup><sup>b</sup>Maeit a mahar gomono gera uarautig tang Poul ka keip ponoig tar uauia keip tasir momouh, doh res matesin ke la uia, karo liouana uasa ka hiliu pono tasisin ra uangoul teilis.

<sup>13</sup>Bo o gisiamehe pukur Ju ra latlateil pono tar geil liu pono tasir liouana uasaane tasir tamat. Gisina ka uedanga tar mene keip pono tar hangana Iesu ger Tamata Noman tasisir nihikung liouan. Gisina ra uoto kula pare, “Tar hangana Iesu gere uoto mene tauetein Poul, inggo u ualatoho totomua tar hiliu.” <sup>14</sup>Gisis ra uoto guata pagiar tesir mouitir bung tuna Sikeva ger patere uleiking tasir Ju. <sup>15</sup>Bo a siokor binaka puk a liouana uasa ke mene hahaua tasisina pare, “Inggo u ate tang Iesu, karu ate pono tang Poul, bo inggoumene te maisioum?”

<sup>16</sup>Maeit a tamatoneit re uangoul teilinir liouana uasa ke pehuara ke uiliatung pe tasisin. Inggono ke uiliatung uasa tun tasisin, gisina ka ueldedeuating uakap, kara ualo tauete turane ium o palapal.

<sup>17</sup><sup>c</sup>Tar binak ka ueliater Ju mesir tamata ge ahik paho Juisine ra uangoul i Epeses tar puhon, a nisokoro uleik tun ke kotpokoso tasisin, kara siokor uatakai tun tar hangana Iesu ger Tamata Noman. <sup>18</sup>O burehe tasisin ka tagorong mana song ka la katongome, kara me siokor uatauete tenas niguata uasa. <sup>19</sup>O gisiamehe geka uoto tuha bilih bak, ka la toto pon, kara siokor ualuh to tar matasir manai tenas bolobolong tuha bilih. A bolobolonin ke la matotoigir bulauana tar 50,000ir silva mani. <sup>20</sup>Maeit no uelhirer Tamata Noman ko kalekinale uapopokohane tasir tamat, kara ueliu ueltebeirinane toro mamang butur.

<sup>21</sup><sup>d</sup>I muduhia ke kotpokoso baka per puhpuhunin, Poul ke namana tar la i Jerusalem, ke naman e lihila tar pang uan i Masedonia me i Akaia. Inggono ke kula pare, “I muduhia getu la pokoso baka inggo i Jerusalem, inggo u la turung bangaeha pon i Roum.”

<sup>22</sup>Inggono ke ualatuengua tas Timoti me Irastus ge na toking tamatang poulion tar la i Masedonia, bo inggono ke uangoul sikoro baka tar pang uan i Esia.

<sup>a</sup> 19.11 Apo 14.3   <sup>b</sup> 19.12 Apo 5.15   <sup>c</sup> 19.17 Apo 5.11   <sup>d</sup> 19.21 Apo 23.11; Roum 1.13

### O tamatang tuha tasir godo boboho ka nimaliana tang Poul

<sup>23</sup> Tar binakon o gisiameher tamatane i Epeses ke tokouasais tasisine ra uakeluk tar niualasira gere laig tang Iesu. <sup>24</sup> A tansiokor tamat a hangana tang Demetrius, inggon e uoto tuha keip tar silva toro uumalik ngohina tena umang lotu Artemis. Doh gisis ra uoto kalekinale tatanono ra uoto kale tun tar mani uleik. <sup>25</sup> Doh Demetrius ke kila toto tasisin menia ponompe tasisis ra uoto guata pono tar siokonor kalekinalenin, kara tabila tokoh, kare kula inggono pare, “Inggoum mu ate tun pare, inggeig i uoto kale tun tar mani uleik ri uoto uabulaua pe tar inetenin. <sup>26</sup> Doh inggoum kung banga, karung longoro manasa tar haua re guataig Poul. Inggono ke uapalih tun tasir bureher tamat i Epeses, kare gane toro burehe ro butur i Esia! Inggono e kula pare, ‘O godosiner nituhang tamat ahik paho godo noman.’ <sup>27</sup> Na nisar menemenenin e banot e uasuasa tenagi hagaring kale manieig menia pono tenagi umang lotueigene ri uoto lotu toin tang Artemis ge nagi godo inggeig menia pono tar hanganon e turung sa pon. Gane i Esia, kare toro mamang pang uan uakap, ra siokor lotu nomana tatanon. Bo no uelhire puk Poul o banot o uasuasa tar hanganon.”

<sup>28</sup> Gine ka longoro pesina tar puhon. Gisina ka nimaliana uasa tun, kara uakekena tar menmene uauleik pare, “Artemis ge nagi godo inggeigener Epeses ter tampopokoho tun!”

<sup>29</sup> Ahik me sikir manasan, o tamata uakapane iuma tar uan uleik ka siokor menmene uauleik. Gisina ka reih tas Gaius me Aristarkus ger toking peng Masedonia geura la tagu teil tang Poul, gisina ka siokor lala tar umang tabila tokoh. <sup>30</sup> Poul ke marang uakalaharain tasir tamatasin, bosir tamatang tagorong mana puk ahik pah ka uamaluana tatanon. <sup>31</sup> O gisiamehe ponomper tamata uleiking gane tar pang uanion gera matakaluana tang Poul, ka heirime toro uelhire tar kula tane uapopokoho tatanono pare, ahik pahe lala tar umang tabila tokoh.

<sup>32</sup> Gine o burehe pesin, gisin ahik paha kodkodoho res ninaman. Gisina ke uelueltebeir nas nimene uauleik, doho burehe tasisin ahik pono pah ra ate ae maene ka la tokahala tar buturuon. <sup>33</sup> Gisinar Ju ka tultula bisela tang Aleksander, kara uaturinane i uoum tasir tamat, doho gisiamehe ra menmene ualeiking ualatoho tatanon. Aleksander ke uedanga tar marang mene uakodkodoho baka tasisin. <sup>34</sup> Bo gine puk ka la ate pesinar tamatang Epeses pare, inggon a peng Ju, gisina ke kalenguaisir torikir aua tar menmene uauleik pare, “Artemis ge nagi godo inggeigir Epeses ter tampopokoho tun!”

<sup>35</sup> Song ke kula taner tamatang kaueke tar uan uleik tasisina tar turtur sikor, kare kula pare, “Ir tamatang Epeses, o tamata uakapa tun

---

° 19.23 2Ko 1.8    ° 19.29 Apo 20.4; 27.2; Kol 4.10; Plm 24

ra ueliate pare, o tamatang tar uan uleikene i Epeses tera kaueke tena umang lotu Artemis ger godo tampopokoho tun meniampe tono kaesaon geko pung uahua turuha i Heuen.

<sup>36</sup>Temaene a niateninanine ahik me tamata re uolih pare, e tel, inggoum pakung pepe sikoro kompe, kara hik pah mu guata me inet.

<sup>37</sup>Inggoum kung ueliuime tasir tamatasineane, bo gisina puk ahik pah ka menmene uasa tenagi godo inggeig, kara hik pono pah ka uenaua tur me inetane tena umang lotuon.

<sup>38</sup>Ge pare ka banga Demetrius mes gisis re kalekinale tokahais me puh uasa ka guata uasainisin, gisina paka la tar umang kedang, kara la banga tasir tang kedang mara uakodkodoh. <sup>39</sup>Ge kae ponoin me giameher inete rung marang mene ponoium, ginina paka uakodkodoho to ponoig tar binakang tabila tokaha tasir tamatane tar uan uleik. <sup>40</sup>Inngo u mene tar puhene, teene mo tamata gera banga tar niguata uasaene daan, gisina ra la banga sira pare, a ualagoreih keip tar nimaliana uleikion. Inggeig ahik pahi banot i turung uakalahara uaia tasisinar tamata uleiking Roum tar puhon, teene a tabila tokahene ahik tun me tengkana me uia tun.”

<sup>41</sup>I muduhia ke menmene baka per tamatang kaueke tar uan uleik tar puhon, inggono song ke kula tasir tamata ra la tonosio uan.

#### Poul ke lihila i Masedonia me i Grik

**20** <sup>1</sup>Gine ke la kapa baka pe nas menemene uauleikir tamat, Poul song ke kila toto tasir tamatang tagorong mana tar lame tatanon. I muduhia ke mene uatampopokoho baka peono tasisin, inggono song ke heir tar niuaha tar hiliu manasa tasisina tar la i Masedonia.

<sup>2</sup>Inggono ke lihila tar pang uan i Masedonia, kare la menmene uatampopokoho tasir tamatang tar uanion, kare la pokosonguala tar pang uan i Grik. <sup>3</sup>Inggono ke la uangoulungua tar pang uanion tar touonor bialok. Inggono ke marang panete tar parau tar marang la i Siria, bo teene o Ju ka uelkule uanomo tar uiliatung pous tatanon, maeit inggono ke namanangua tar la tapokisila i Masedonia. <sup>4</sup>Gine ke marang tapokis pe inggon, a tang siokor tamat a hangana tang Sopater ger tuna Pirus a peng tar uan uleik i Beria teke ueltutue tagu tatanono menia pono tas Aristarkus me Sekundus ger toking peng tar uan uleik i Tesalonaika, doh Gaius ger peng Debe, doh Timoti, kare Tikikus me Tropimus ger toking peng tar pang uan i Esia. <sup>5</sup>O tamatasinasine ka la uoum, kara la pepe uangoul tamiueim tar uan uleik i Troas. <sup>6</sup>Inggeim king panete tur tar parau i Pilipai i muduhia ko kapa baka pe ro niein uleiking tar bereit ge ahik me is. Kura karuh bakar tolimar marein, song king la ueltupar toeim i Troas tasisin, karing uangoul baka poluk tar mouitir marein.

#### Poul ke uatua tapokis to tang Iutikus i Troas

<sup>7</sup>Tar uakikilanganar marein tar uik inggeim king la toto tokaha keip tasir gisiameher tamatang tagorong mana tar ein tokaha tar bereit tar

namana tapokis toro uadouhina ro ein ke guatainir Tamata Noman. Poul ke menmene uabarah tasir tamata ke la tuka nar uantininar boung, teene inggono ke ate pare e hiliu tar uagiamehenar marein.

<sup>8</sup>A tine umang ranene ring uangoul totoieim, e luhur bureher luhung uakubar.

<sup>9</sup>Doha tang siokor tamat a mamanailik, a hangana tang Iutikus e tabila uahuhut toro uindou. Gine ke menmene uabarah pela Poul inggono ke hohou. Tar binaka ke la hohouontiehe manasa peon, inggono ke punga uahiuu tur tar puhung tine umon, kara me kale toinane i kot a mate manas. <sup>10</sup>Maeit Poul ke la uahiuako, kare la hatup uahiuane tatanon, kare buaka tatanon, kare kula pare, “Inggoum ahik pah mu sokor, ge inggono pe a tua.”

<sup>11</sup>Poul song ke tapokis poluk taro i rana tar tine um, song ka la ueluelpise toro bereit, song ka ein. Inggono ke menmene tasisina ke la tuka naliuo, song ke hiliu tasisin.

<sup>12</sup>Gisis ro bung tahinalik Iutikus gesir tamatang tagorong mana ka hagouo uaia tun, kara keipila tatanon ium a tua.

### **Poul ke hiliu i Troas, kare la i Miletus**

<sup>13</sup>Inggeim king hiliu tang Poul, karing la panete uoum tar parau, karing la inggeim king la hungungua tar uan uleik i Asos teking la pepe uangoulieim tatanon. Poul ke namana tanika tar ninamanon, teene inggono ke marang lihiko i kot tar lala i Asos. <sup>14</sup>Tar binaka ke la uelupar to peono tamiueim i Asos, inggeim song king la siokor panete poluk tar parau. Song king siokor la tar uan uleik i Mitilini. <sup>15</sup>Tar uagiamehenar marein, inggeim king ualo poluk tar parau, karing la hung tar uan e uahuhut i Kios. Tar giameher marein inggeim king ualo kout taro i Samos, kare tar uagiamehenar marein, song king la pokoseim i Miletus. <sup>16</sup>Poul inggono ke uamoko tanika manasa tena ninamana tar ualo siau i Epeses mara hik me marein ra la uangoul baka polukig tar pang uan i Esia mare la banoto tar la pokoso uateuel i Jerusalem mare la tuparain tena mareinir Pentikos.

### **Poul ke kilala tasir mamahoholiking Epeses**

<sup>17</sup><sup>g</sup>Tar binaka king la pokoseim i Miletus, Poul ke heirila toro uelhire tasir mamahoholiking Epeses gera uoum keip tasir tamatang tagorong mana tar me ualongoro baka tatanon.

<sup>18</sup><sup>h</sup>Tar binaka ka me pokososin, inggono ke kula pare tasisin, “Inggoum mu ate uaia tun tenag niuangoulio, hope ku uangoul tagu pe tamiuoum e uakikilanga tar binaka ku kotpokoso tar pang uanene i Esia. <sup>19</sup>Inggoum

---

<sup>g</sup> 20.17 Apo 18.21    <sup>h</sup> 20.18 Apo 18.19–19.10

mu ate pare, a bureher binak o Ju ra uoto uelhote tar mamantouo totoguo, doh inggo ku uoto kale tun tar bureher niduh, karu uoto kiring tar bureher binak. Bo inggo puk u uoto kale uahiuao, karu kalekinale puk tar Tamata Noman. <sup>20</sup>Inggoum mu ate pare, inggo ahik tun pah ku toutouana tar hire tauete me inete tar poul tamiuoum, bo inggo puk ku siokor mene ualasira to tun tamiuoum tar matasir manai, doh gane tonomio uma katongoum.

<sup>21</sup>Inggo ku siokor mene ualasira tun tasir Ju, doho Grik tar uapalih tenas niguat, kara uakeluk tang God, kara siokor tagorong mana tang Iesu Kristo.

<sup>22</sup>Doh gine daan, inggo u uakeluk tena nimalarar Iabena Dedeil, inggo u la i Jerusalem, bo ahik puk pahu ate uamatot a haua ra la turung guata toin totoguo tar uanion. <sup>23</sup><sup>i</sup>Inggo u uoto ate puk pare, toro mamang uan uleik geru lagio, a Iabena Dedeil e uoto uahire uoum totoguo pare, a niduh e turung pokoso totoguo, kara turung uamokoio tar uih. <sup>24</sup><sup>j</sup>Bo inggo puk ahik pahu namanantiehe tenag niuangoul, a inete uleikintiehe ru namanaio, inggo paku uakapa baka uoum tenag kalekinale, a kalekinale geke heirin Iesu ger Tamata Noman, tar ueliu tauete toro Uelhire Uaiang tena hamhamas, kare na nimalauelhir God tagigeig.

<sup>25</sup>Doh gine daan, inggo u ate pare ahik tun me kalamiuoumene ku menmene ualasisasio tena Nitoia God re turung banga baka poluk totoguo. <sup>26-27</sup>Temaeit inggo gine ru hire tanika tamiuoum pare, a tang sioko tamiuoum gere punga uahiu tar nitagorong man, inggon ahik paha ineteng totoguo baka poluk, teene inggo ku siokor hire manasa tar inete ke malauelhirig God tamiuoum tar ate. <sup>28</sup><sup>k</sup>Tagin katongosioum, karung kaueke pono tas mai geke heirisir Iabena Dedeil tamiuoum tar kauek. Inggoum mu uangoul sira pare, o tamatang kaueke sipsipane tosno tamata God geke bulaua keipisiono tar Tun ke mate pe. <sup>29</sup><sup>l</sup>Inggo u ate, i muduhia tar binaka ru hiliu baka pe inggo, o gisiameher tamata ra turung la sirame tasir lo roke tar marang uedanga tar mamantouo tasir sipsip. <sup>30</sup>O gisiamehe ponane tamiuoum katong, ra turung tentur kai, kara uiuir toro uelhire gero mana tun, doh mo gisiamehe tamiuoum ra turung uakelukungua tasisin. <sup>31</sup><sup>m</sup>Maeit inggoum mu tagin teil! Namana dede pare, e banoto toro touono ro krismas inggo ahik pah ku uakenua tar menmeneng uatagin tamiuoum uakapa tar mamang marein mer boung, karu kiring keip pon.”

<sup>32</sup>“Gine daan inggo u uamoko tamiuoum tena nikaukeke God menia tonu uelhiring nimalauelhir keipiono tena niueldolom tamiuoum, gete roono pe tero uatampopokoho tamiuoum marung kale tar inete gere uoto heirigiono tosno tamatasitir dedeil.”

<sup>i</sup> 20.23 Apo 9.16; 21.11 <sup>j</sup> 20.24 Apo 21.13; 2Ti 4.7 <sup>k</sup> 20.28 1Ti 4.16; 1Pi 5.2-4

<sup>l</sup> 20.29 Mat 7.15; Jon 10.12 <sup>m</sup> 20.31 1Te 2.11

<sup>33</sup>“Tar binaka karu uangoul taguo tamiuoum, inggo ahik pahu uoto mahamaha tagu tenas manir tamat ue menas gomonosin. <sup>34</sup>°Inggoum mu ate pare, inggo u uoto kalekinale tar uakotpokoso katongo tar haua ru malahirin menia pono tar haua ra malahirinir tamatasit ka uangoul tagu totoguo. <sup>35</sup>Tar mamang kalekinalelik ku guatguatagio, inggo ku ualasira tamiuoum tar kalekinale uapopokoh mari banoteig i poul tasir tamata ge ahik pahe banot e poul katongois. Inggeig paki namana huara hape ke kula pe Iesu ger Tamata Noman, inggono ke kula pare, ‘A niuaha uleik e turung moko tar tamata gere heir tar inete tar tang giameh, a niuahon e i rana uain tar niuaha gere kaleiono gete namana pukin me pahen.’ ”

<sup>36</sup>I muduhia ke kula baka peono paar, inggono ke hatup uahua keip tasisina uakap, kare lotu. <sup>37-38</sup>Gisina ka uelkoke tatanon, kara kiring, kara nguh tatanon, teene Poul ke hire tasisina pare, gisin ahik pah ra turung bang huara baka poluk tatanon. Gisina song ka ueltutue tatanono tar la panete tar parau.

#### Poul ke la i Jerusalem

**21** <sup>1</sup>I muduhia king ueltageih baka pe inggeim mesir mamahoholik, inggeim king la panete tar parau, song ke ualor parau, ke ualo uakodkodohonguala i Kos. Tar uagiamehenar marein, inggeim king la ualola i Rodes. Inggeim song king la ualo tur poluk i Rodes tar la i Patara. <sup>2</sup>Doh tar uan i Patara inggeim king la ueltupara tar giameher parau e marang la i Ponisia, karing la panete tatanon, karing lala.

<sup>3</sup>I muduhia king bang huara baka pe inggeim i Saiprus, inggeim king ualohiala tar pang mua, maeit king la pokos i Siria, karing la hungungua i Tair tar uahua baka tar ineteng tar uan uleikion. <sup>4</sup><sup>P</sup>Inggeim king la ueltupara tasir tamatang tagorong mana tar uanion, karing uangoul tagungua tasisina tar mouitir marein.

#### Doha Iabena Dedeil ke heir tar ninamana tasisina tar kula tane tang Poul mara hik pahe la i Jerusalem

<sup>5</sup>Bo gine puk ke la binaka peon, inggeim king la puk manasampe. Maeit gisisir tamatang tagorong mana mesnosio kuah, doho bung tus ka ueltutue tauete tamiueimane tar uan uleik, karing siokor lako i teh teking la hatup uahieim, karing lotu to bak, karing uelheirie tar niuah, song king ueltageih. <sup>6</sup>I muduhia king la ueltageih baka pe inggeim, inggeim song king la panete tar parau, kara tapokisisin.

<sup>7</sup>Inggeim king la ualo ualatuman poluk tenami niualo, gine king hiliu pe inggeim i Tair, inggeim king la hungungua i Tolemes, doh tar uanion inggeim king la meneng uaha tun tasir tamatang tagorong man, karing

° 20.33-34 1Ko 9.11-12 ° 20.34 Apo 18.3; 1Te 2.9 P 21.4 Apo 20.23

uangoul tagu baka tasisina tar siokor marein. <sup>8</sup> Tar uagiamehenar marein, inggeim king hiliu poluk, karing la pokosongua i Sisaria, karing la uangoulungua tena uma Pilip ger tamatang mene tauete toro Uelhire Uaia, inggono ter tang sioko tasir mouitir tamat gera uoto poul tasir aposoul.

<sup>9</sup> Inggon a tang toueitir tun o kuah kalan harah, halan ta le, doh ra uoto mene tauete tono uelhire God ngohina tasir propeit.

<sup>10</sup> I muduhia king uangoul manasa pe inggeim tar uaniono tar giniamer marein, a tang siokor propeit, a hangana tang Agabus ke la uahua turuha i Judia. <sup>11</sup> Inggono ke lame tamiueim, kare me kale tono beil Poul, song ke uih katongo tar liman, doha toking pang keken, kare kula pare, “A Iabena Dedeil ke kula pare, “Tera turung guata sira per Jung Jerusalem tang tanena ro beil rone, ra turung uihin, song ra turung ueliuilain tasir tamatis ahik paho Ju tagu.” <sup>12</sup> Gine king longoro pe inggeim tar puhon, inggeim mesir tamatang tar uaniono king siokor kula tane uapopokoho tun tang Poul pare, ahik pahe la taro i Jerusalem. <sup>13</sup> Song ke mene hahaua Poul pare, “Ae maene rung kiringioum, karung uaueldolomontiehe tun totoquo? Inngo deh ahik pah ku kaleuatoro pukuo tar la karabus, bo tar la mate tunumpe tar hangana Iesu ger Tamata Noman.” <sup>14</sup> Gine ahik pe inggeim pah king pehuara tar kula tane tatanon, inggeim king la uakenua puk manas, karing kula pare, “Auia! Uakeluk tena nimalarar Tamata Noman.”

<sup>15</sup> I muduhia tar puhonene, inggeim song king kaleuator, karing la taro i Jerusalem. <sup>16</sup> O gisiamer tamatang tagorong manang Sisaria ka la tagu tamiueim, kara la ueliu baka tamiueim tena uma Nason, Nason a peng Saiprus, doh inggono ter tang sioko tasir tamata geka tamatang tagorong mana uakikilang, inggono teking la uangoulieim na um.

### Poul ke la pokos i Jerusalem

<sup>17</sup> Tar binaka king la pokoso inggeim i Jerusalem, o tamatang tagorong mana ka siokor uaha uangoul tun tamiueim. <sup>18</sup> Doh tar uagiamehenar marein, siokor inggeim uakapa mes Poul king siokor la tar la banga tang Jems menia ponampe tasir mamahoholik ra siokor uangoul tagu pon. <sup>19</sup> Poul ke la meneng uaha tun tasisina song ke siokor uelueluatata hamas tun hape ke poul pe God tatanono i uantinanina tasir tamatis ahik paho Ju tagu.

<sup>20</sup> Gine ka longoro pesina tar puhpahunin, gisina ka siokor uatakai tar hangana God. Gisina song ka kula tang Poul pare, “Ingga ko banga manas, a touihar taosein tasir Jusine ka tagorong mana tang Iesu,

<sup>8</sup> 21.8 Apo 6.5; 8.40    <sup>9</sup> 21.10 Apo 11.28    <sup>10</sup> 21.11 Apo 20.23; 21.33    <sup>11</sup> 21.13 Apo 20.24

<sup>12</sup> 21.19 Apo 15.12    <sup>13</sup> 21.20 Apo 15.1,5



doh gisina tera uoto tur uapopokoho tar uakeluk tena ualatut Moses.

<sup>21</sup> Gisina ka siokor longoro kout pare, ko mene ualasira pe ingga tasir Jusis ra uangoul i uantinanina tasisis ahik paho Ju tagu tar tur kauiur liu tena ualatut Moses, kara hik pono pah ra poka tar kapokous ro bung tus gesir bulout, kara hik pono pah ra uakeluk tar niguatar nosir Ju.

<sup>22</sup> Hopengua ri turung guata pe inggeig? Gisina ra turung longoro pare, ingga ko pokos. <sup>23</sup> Maeit ingga o uakeluk sira hape ring turung kula pe inggeim. Gane tamiueim ura uangoulur tang toueitir tamata kura nihing ualapagah keip pukis tang God. <sup>24</sup> Ingga o kila tasisin, karo uatagua tar binaka re uadelauanaisisin, karo bulaua ueleheir tasisin mara koutigir ulus. Song ra turung ater tamata uakapa pare, a bohor menenine ra me uelueluatata teilig totomua, kare ingga katongo tero uakeluk ponompe tar ualatut.

<sup>25</sup> <sup>x</sup> Doh tasisine ahik paho Ju tagu, inggeim king bolo manasa tasisina tar uahire tenami ueluauiæ pare, gisina paka hik baka pah ra ein me niein ge me niheiring uahung tasir godo bohoboh, kara toub pono tar deuating, kara hik pono pah ra ein mo inetesisir nilolo pous, kara uakenua pono tar ura ueltebeir.”

<sup>26</sup> <sup>y</sup> Tar uagiamehenar marein, Poul ke kila tasir tamatasin, kara siokor uadelauanais. I muduhia song ke laono tar umang lotu ger dedeil tar uahire tang hingiar marein re la karuh toinir puhon, kara guata ponoigir uahung re laig tasisina kahakah.

### Poul ka kuse toin ium

<sup>27</sup> Tar binaka ke la marang karuh manasa per mouitir marein, o gisiameher Jung tar pang uan i Esia ka bang huara uatur to tang Poulane iuma tar umang lotu ger dedeil. Gisina ka menmene uahounungua tasir manai tamat, kara kusengua tatanon, <sup>28</sup> kara kula ualeik pare, “Ir tamatang Israel mu me poul tamiueim! Gine ter tamata geke menmene ualasira tasir tamatang toro mamang buturulik pare, tar ueluelde tagigeigir Ju, kare nagi ualatut menia ponompe tenagi umang lotuene. Doh inggono pono teke keip ualeke tasir tamata ge ahik paho Ju ium tar umang lotu mare uasusa pono tar umene ger dedeil.”

<sup>29</sup> <sup>z</sup> Gisina ka kula ualeik paar, teeit gisina ka banga sioun tang Tropimus ger peng Epeses e la tagu teil tang Poul, kara namana pare, Poul ke keip ualek iuma tatanono tar umang lotu ger dedeil. <sup>30</sup> O tamata uakapa tunane tar uan uleik ka siokor tenturung nimaliana turane toro mamang buturulikane tar uan uleik, kara siokor ualome, kara me kuse tang Poul. Gisina ka reih liu turane tar umang lotu tatanon, doh ahik me

<sup>w</sup> 21.23-24 Aha 6.1-20; Apo 18.18    <sup>x</sup> 21.25 Apo 15.29    <sup>y</sup> 21.26 1Ko 9.20

<sup>z</sup> 21.29 Apo 20.4

sikir manasan, kare siokor holoro ponor pirpirik. <sup>31</sup>Gine ra ueduedanga pesina tar marang uiliatung pous tatanon, o ueluatata tar puhono ko la pokoso tar tamatang uoum keip tasir tamatang uiliatung Roum pare, o tamatang tar uan uleik ka ueluelnimaliana ueltebeiris. <sup>32</sup>Inggono ke uateuele tunin, kare kila tasir gisiamer tamatang uoum keip, karo tamatang uiliatung, kara ualoko tar la banga tasir tamatasin. Gine ka bang huara pesit ra nimaliana tasir uiluiatung menas tamatang uoum keip, gisina ka uolo uakenua tar uiliatung tang Poul.

<sup>33</sup>Git nas tamatang uoum keipir uiluiatung ke me kuse tatanon, kare ualatoho pare, ra uih taneiono me torikir tiein. Song ke dangatono tasir tamata pare, maionene, doha haua ke guataion? <sup>34</sup>O gisiamer ra uahire taro tar ginamer siokor inet, karo gisiamer ra hire tar ginamer siok, doh gine ahik per tamatang uoum keip pah ke ate uaia mo mana ra kulkula ualeik ueltebeir pesin, inggono ke ualatoho pare, ra keipilain Poul tenas buturung uangangoulur uiluiatung.

<sup>35</sup>Tar binaka ke lala matoto pe Poul toro kakaet, res nimalianar tamata ke uleik uain, maeit o uiluiatung ka uelkabe tatanon. <sup>36</sup>O tamata geka uakeluk ra kulkula uauleik teilimpe pare, “Uiliatung pous liu tatanon!”

#### **Poul ke mene baka tasir manai tamat**

<sup>37</sup>Gine ra lang leke keip manasa pelar tamatang uiliatung tang Poul tenas buturung uangangoul, inggono ke dangata tar tamatang uoum keip toro uelhireng Grik pare, “Inggo u banotompe u mene baka totomua?”

Kare kular tamatang uoum keip pare, “Ingga o uelhire pono toro uelhireng Grik?”

<sup>38</sup><sup>b</sup>Ahikia pah ter peng Isip geke uakekena tar marang uiliatung keip tang gavaman, kare uoum keip tar 4,000ir tamat, kara la tar butbutur padenene sioun sikor?”

<sup>39</sup>Doh Poul ke mene hahaua pare, “Inggo deha Jung tar uan i Tasius i Silisia, inggo u la tur pono tar uan uleik ger tohangana pon. Uamaluana geru mene bako tasir tamat.”

<sup>40</sup>Gine ke uamaluana per tamatang uoum keip tasir uiluiatung tatanon e mene baka tasir tamat, Poul ke tur kai toro kakaet, kare sarang pau tasir tamat. Gine ka turtur sikoro pesin, inggono ke kula tasisina toro uelhireng Hibru.

**22** <sup>1</sup>“Ro bung tahig meso bung tamoug, ualongoro baka geru meneng uelturut tagin bakaio.”

<sup>2</sup>Gine ka longoro pesina ke mene peon tasisina toro uelhireng Hibru gisina ka tur bukuk tun. Song ke kula Poul pare, <sup>3</sup>“Inggo a peng Ju

<sup>a</sup> 21.36 Luk 23.18   <sup>b</sup> 21.38 Apo 5.36-37   <sup>c</sup> 22.3 Apo 5.34

pon, ka poho toio i Tasius tar pang uan i Silisia, bo ku uleik to puk tar uanene i Jerusalem. Inngo ku uangoul i kukulebanga tang Gamaliel, kara ualasirao tenas ualatut ro bung tamagigeig, doh reg nimalara uleik tun pono tang God nghoina puk pono tamiuoum daan. <sup>4</sup>Inngo u uoto mamantouo tasir tamata geka tagorong mana tang Iesu mara mat. Inngo u uoto kuse tasir bulout meniampe tasir kuah, karu la bakala iuma tasisina tar karabus. <sup>5</sup>Gine nasi uleikir patere mesir mamahoholikisine ra banoto ra hire uelkout pon. Inngo u kale tur pono tar bolobolo tasisina tar la heir i Damaskus toso uanotousisin, song ru la, karu la ueliu tapokisime tasisinane i Jerusalem mara me uauelmahingisisin.”

<sup>6</sup>“Ke la uahuhutin nar moloi, gine ku lang uahuhut manasa peo i Damaskus, a luh a balontiehe tun ke balo ualutara turuha i Heuen ke me balo uilohane totoguo. <sup>7</sup>Inngo ku punga uahiu i kot, karu longoro tar uauanar tamata ke kula pe totoguo pare, ‘Sol! Sol! Ae maene ro uauelmahingia totoguo?’ ”

<sup>8</sup>“Karu dangata inngo pare, ‘Innga te mai, ter Tamat Nomana?’ Kare kula hahauono pare, ‘Inngo te Iesu ger peng Nasaret, gine ro uauelmahingia.’ <sup>9</sup>O uanotouguosine ra la tagu teil totoguo ka siokor banga tar luhion, bo ahik puk pah ka naman manate a haua ke meneinir uauanar tamatene ke menmene totoguo.”

<sup>10</sup>“Karu dangatanguao pare, ‘A hauangua paku guataio?’ Kare kular Tamata Nomana pare, ‘Tentur kai karo la lekela iuma tar uan uleik i Damaskus. Dohi Damaskus innga song ra turung siokor hirea tenang kalekinale geka uamatotoig totomua pare, o turung guat.’ ”

<sup>11</sup>“O uanotoguo ka uoum keip ualasira totoguo i Damaskus, teene inngo ke uakutur nitampopokohonor luh. <sup>12</sup>A tang siokor tamat, a hangana tang Ananias ke lame tar me banga totoguo. Inngon e uoto uakeluk uaia tun tar ualatut, doho Jusine ra uangoul i Damaskus ra siokor ueltada tun tatanon. <sup>13</sup>Inngono ke me tur tabara totoguo, kare me kula pare, ‘Sol, ge tahiguo, innga o banga tapokis!’ Ahik me sikir manasan, inngo song ku bang huara tapokis tatanon.”

<sup>14</sup>“Song ke kula Ananias pare, ‘Nasi God ro bung tamagigeig ke uamatoto totomua maro ate tena nimalara inngon maro ate tagu tatanono ger kodkodoho tun, karo turung kalkale tur tun tatanono tar uelhire. <sup>15</sup>Innga tero turung uelhire tauete tasir mamang tamatalik tar haua ko bangaig, kara haua ko longoroig. <sup>16</sup>Doh gine daan, a haua baka poluk ro uangoulia? Tentur kai gera uahuhuia, kila tar hanganar Tamata Noman mare kuse luara tereng niguata uasa innga.’ ”

<sup>17</sup>Doh Poul ke mene tumana poluk pare, “Tar binaka ku tapokis peme inngo i Jerusalem, karu me lotu to tar umang lotu ger dedeil, inngo ku

---

<sup>d</sup> 22.4 Apo 8.3

me banga tar borborian, <sup>18</sup> ekaru bang huarangua tar Tamata Nomana ke kula pe totoguo pare, “Teuel! Gine daan hiliu puk manasampe i Jerusalem, ge gisina pe ahik pah ra turung uauia geto mene ualasira ingga tasisina totoguo.”

<sup>19</sup> f“Doh inggo ku mene hahaua tatanono pare, ‘Tamata Noman!’ O tamata dehesine ra ate totoguo ku la hahai pe toro umang lotu, ku uiliatung pe, karu uamoko tasir tamata geka tagorong mana totomua tar karabus. <sup>20</sup> gDoh tar binaka ko tading ro deuatingina Stiben ger tamat e uoto hire tauete totomua, inggo teru tur tagu, karu heir tenag uauia, karu kaueke tenas gomonosit ka uiliatung pous tatanon!”

<sup>21</sup> h“Song ke kula polukur Tamata Nomana totoguo pare, ‘La! Inggo u ueliuila totomua i rehe tun tasisis ahik paho Ju tagu.’ ”

### **Poul ke hire tasir uiluiliatung Roum pare, a tamatang Roum**

<sup>22</sup> O tamata ka ualongoro bukuk tang Poul e tuka ke mene peono tasisis ahik paho Ju tagu, song ka nimaliana poluk. Maeit gisina ka menmene uauleik poluk, kara kula pare, “Uiliatung pous liu tatanon! Inggono de ahik pahe banoto e uangoul baka polukane tar kot!”

<sup>23</sup> Gine ra kulkula ualeik pesin, gisina ra bakbaka kai tenas gomono mer uoung tar kotane i ran. <sup>24</sup> Maeit git nas tamatang ualatohor uiluiliatung ke ualatoho ra keipin Poul tenas buturung uanguangoulusin. Inggono ke ualatoho pare, inggono ra la halhaluhin, kara dangdangatain ae maene ra menmene kulkula ualeikir tamata pare tatanon. <sup>25</sup> iGine ra uelkuse uakodkodoho peono mara halhaluhin, Poul ke kula tar tamatang uoum keip tasir uiluiliatung pare, “A kodkodohompeonane tar ualatut tar tamatang Roum ra halhaluhin tar binaka halana ta ateinir haua ke guata uasain?”

<sup>26</sup> Gine ke longoro per tamatang uoum keip tasir uiluiliatung ke mene pe Poul paar, inggono ke lala tar tamatang ualatoho tasir uiluiliatung, kare la hire tar puhon, kare la dangata pare, “hapengua ro guata pe ingga, ge inggono pe a tamatang Roum?”

<sup>27</sup> Song ke lalaoneitir tamatang ualatoho tasir uiluiliatung tang Poul, kare la dangata pare, “Hire totoguo, ingga a tamatang Roum?”

Kare mene hahaua Poul pare, “Inggo a peng Roum nomanampe.”

<sup>28</sup> Song ke kula polukur tamatang ualatoho pare, “Inggo ku bulaua uauleik tun, maene ku kotpokos a tamatang Roum.”

Bo Poul puk ke mene hahaua pare, “Bo inggo puk ka pohoio pare, a tamatang Roum.”

<sup>e</sup> 22.18 Apo 9.29-30   <sup>f</sup> 22.19 Apo 8.3; 26.9-11   <sup>g</sup> 22.20 Apo 8.1   <sup>h</sup> 22.21 Apo 9.15

<sup>i</sup> 22.25 Apo 16.37

<sup>29</sup>J<sup>j</sup>Doh gisis ka marang dangdangata baka tatanono tar puhpuhung dangata ka siokor uakenuangua. Gitir tamatang ualualatoho ke lutara tun ke la ate pe pare, ke uih tane pe tar tiein tang Poul, ge inggono pe a tamatang Roum pon.

### Poul ka uaturin i uoum tasir Sanhidran

<sup>30</sup>Tar uagiamehenar marein, a tamatang ualatoho tasir uiluilitung e marang ate uaia tun a haua ka bangainir Ju ke guata uasain Poul, maeit inggono ke uamaluana tang Poul, kare kula tasir Sanhidrana uakap gesir uleiking tasir patere mesir mamahoholiking tasir Ju, ra siokor la toto. Song ke ueliuila inggono tang Poul, kare la uaturane i uoum tasisin.

**23** <sup>1</sup>Poul e uakeis uanono kompela tasir Sanhidran, kare kula pare, “Ro bung tahig, inggo ku uakapa manasa tar kalekinaler nang God, doh inggo u ate pare, ku guata uakodkodoho tun ke me tuka pe daan.” <sup>2</sup><sup>k</sup>Doh gine ke mene pe Poul tar puhon, Ananias ger uleiking tasir patere ke ualatoho tas gera tur uahuhut tang Poul tar posara tar uauanon. <sup>3</sup><sup>l</sup>Song ke kula Poul tatanono pare, “God e turung posara pono totomua, ge ingga pe a tang guata kokopoia mara namanaia pare, a tamata uaia. Ingga o tabila tar kedanga keip totoguo tar ualatut, bo ingga puk teko kategompe tar ualatut ko ualatoho pe pare, ra posaraio!”

<sup>4</sup>Gisis ra tur uahuhut tang Poul ka kula pare, “Ingga o marang uelsigala tun tar tamata uleiking tasir patere ger nang God?”

<sup>5</sup><sup>m</sup>Kare mene hahaua Poul pare, “Ro bung tahig! Inggo deh ahik pah ku ate pare, inggono tenas uleikir pater, inggo ku guata uasa manas. Ge i lolono pe tono bolobolo God, inggon a nibolo pare, ‘Ahik paho uelsigala tas mai gera uoum keip tosnongo tamata.’ ”

<sup>6</sup>Poul inggono ke ate pare, o gisiameme tasisina Sadiusi, doho gisiameh o Parisi. Maeit inggono ke mene uakikilanganguala tar kaunsil pare, “Ro bung tahig, inggo a Parisi pon, ku uatamana pono tar tamata Parisi. Inggo gine ru tur i uoum tasir tamatang kedang, teene inggo u tagorong mana pare, o tamat ra mat, kara tua tapokis.”

<sup>7</sup>Gine ke mene pe Poul paar, a uelsae ke pokosongua i uantinanina tasir Parisi mesir Sadiusi, doh gisina ka pang torikingua. <sup>8</sup><sup>o</sup>O Sadiusi tera kula pare, ahik me tua tapokis, kare ahik pono mo anggelou mer iaben, bosir Parisi tera siokor tagorong mana tar mat, kara tua tapokis menia pono tasir anggelou, doh tar iabeisir tamat.

<sup>9</sup>Temaeit gisina ra ueluelperere uauleik tun, doho gisiamemer Parisi gesir tang ualasira tar ualatut ka tentur kai, kara mene uapopokoho tun, kara kula pare, “Inggeim deh ahik tun pah king tupara me niguata uasa

<sup>j</sup> 22.29 Apo 16.38 <sup>k</sup> 23.2 Jon 18.22-23 <sup>l</sup> 23.3 Mat 23.27 <sup>m</sup> 23.5 KT 22.28

<sup>n</sup> 23.6 Apo 26.5 <sup>o</sup> 23.8 Mat 22.23

ke guataigir tamatene. Hape gete ke hire me anggelou ue me iabene tatanon?" <sup>10</sup>A ueluelperere ke la santiehe uain manas, maene a tamatang ualatoh tasir tamatang uiliatung ke sokoro keip tang Poul geta uiliatung pousin. Maeit inggono ke ualatueko tasir uiluiliatung tar la i uantinani tasir manai, kara la peng tampopokoho tar kale liu tur tasisina tang Poul, kara keip liuilain tenas buturung uangoulur uiluiliatung.

<sup>11</sup>P<sup>r</sup>Tar uagiamehenar boung, a Tamata Nomana ke me tur tabara tang Poul, kare me kula pare, "Peng tampopokoh! Ingga gine ko uelhire tauete uoum tar hangouguoane i Jerusalem, doh ingga o la turung guata sira polukumpe i Roum."

### A uelhote tar marang uiliatung pous tang Poul

<sup>12</sup>Nalio tar giameher marein o Ju ka la toto, kara uelhote tar uiliatung pous tang Poul. Gisina ke uelualapagah taneis pare, ahik pah ra ein, kare ahik pah ra inum e la tuka tar binaka ra pehuara bakasina tar uiliatung pous liu tang Poul. <sup>13</sup>Gisinasit ra uangoul teil i lolono tar uelhoteon ke la banotois tar toueitir hangaul.

<sup>14</sup>Gisina ka la tenas uleikir pater, karo mahoh, kara la kula pare, "Inggeim king guata tenami uelualapagah pare, ahik pah mi ein me inet e tuka tar binaka ring uiliatung pous baka tang Poul. <sup>15</sup>"Doh gine daan, inggoum mesir tamatang kedanga mu bolo mo bolobol o la tar tamatang ualatoho tasir uiluiliatung mare keipimeono tamiuoum tang Poul, mu tut mo boho pare, mu me marang ate uaia baka me mene kodkodoho tatanon. Doh inggeim tering kaleuatoro tar uiliatung pous tatanono tar binaka halanono te me pokosane."

<sup>16</sup>Bo gine puk ke longoro per tang siokor kabina Poul tar puhung uelhoteonene, inggono ke la lekempe tenas buturung uangoulur tamatang uiliatung, kare la hire tang Poul.

<sup>17</sup>Song ke kilangua Poul tar tang siokor tamatang uoum keip tasir uiluiliatung, kare la kula pare, "Keip taro tar tamata kalanene tenang tamatang ualatoh, ge inggono pe e marang hire tar inet, inggonompe re ate."

<sup>18</sup>Maeit inggono ke keip tatanono tar tamatang ualatoh. Inggoneitir tamatang uoum keip ke me hire pare, "Poul ger karabus ke ualatue uelhir totoguo, kare me kula totoguo tar keipiha tar tamata kalanene totomua, teene inggon e ate teil tar siokor puh, dohe marang hire totomua."

<sup>19</sup>Gitir tamatang ualatoho ke kuse tar limanar tamateitir kalan, kare reihila i tektekena tatan song ke dangata tatanono pare, "A hauonene ro marang hireia totoguo?"

<sup>20</sup>Kare kula inggono pare, "O Ju ka ueluauiare pare, ra dangata totomua tar ueliuila tang Poul i uoum tasir Sanhidran roliuo tar boho

<sup>p</sup> 23.11 Apo 27.24; 28.16,23    <sup>q</sup> 23.15 Apo 25.3

pare, ra marang dangata uaiia baka tatanon mara ate uaiain. <sup>21</sup> Ahik paho longoro tasisin, ge gisina pe o toueitir hangaul, ra turung uiliatung kout to tatanono tar lele mare mat. Gisina ka uelualapagah katongois pare, ahik pah ra banoto ra ein ue ra inum e la tuka tar binaka ra uiliatung pous baka pe tatanon. Gisina ka kaleuatorene daan, bo ra uanguangoul puk manasampe tenang mene hahaua ingga tasisin.”

<sup>22</sup> A tamatang ualatoho ke kula tar tamata kalan e la manas, kare kula tane uapopokoho tatanon ahik pahe hire me tamata pare, ke me hire tar puhono tar tamatang ualatoh.

<sup>23</sup> Song ke kilonor tamatang ualatoho tena tang torikir tamatang uoum keip, kare ualatoho tasrasina pare, “Kaleuator, kaura kila me torikir hangaulur hangaulur tamatang uiliatung, kare me mouitir hangaulur tamatang ualo tasir hos, kare me torikir hangaulur hangaulur tamatang uiliatung keip tar bel, karung la i Sisaria daan tar 9 kilok tar boung. <sup>24</sup> Heir pono tang Poul me torikir hos mara la ueliu uaudeiliono tang Peliks ger gavana.”

<sup>25</sup> Doh inggono ke bolo toro bolobolo rone.

<sup>26</sup> “Inggo Klodius Lisias. O bolobolo rone o la tar tamat uleik tang Peliks ger gavana tar gavaman tar pang uanane. A binaka uaiia tun totomua. <sup>27</sup> A tamatene ka kuseinir Ju, kara marang uiliatung pous tatanon, bo inggo puk ku keipila tosnogo tamatang uiliatung, karing la uelkarus tatanon, doh inggo ku ueltupar tatanono pare, a tamatang Roum pon. <sup>28</sup> Inggo ku marang ate ae maene ra tohtohotolasina tatanon, maeit inggo ku keipila tatanono tasir Sanhidran. <sup>29</sup> Inggo ku la ueltupar pare, nasi tohtohotolasina tatanono ke lain tar nidangatang tenas ualatutusin, bo ahik pukusina pah ka tupara me inete ke guata uasaiono mare banoto ra uiliatung pousuiono ue ra uamokoin tar karabus. <sup>30</sup> Tar binak ka me hireio tar uelhote uanomong uiliatung pous tatanon, inggo ku ueliu uateuele tunula tatanono totomua. Inggo ku ualatoho pono tasisis ra tohtohotola tatanono tar la ueliuila tar puhono totomua.”

<sup>31</sup> Maeit o uiluiliatung ka uakeluk hape ka ualatoho peis. Gisina ka kale tang Poul naboung, kara keip tatanono tar uan ra kilain i Antipatris. <sup>32</sup> Tar uagiamehenar marein, gisina ka uamaluana tasir tamatang ualo tasir hos teka la keip dede tatanon, bosir bureheis ka tapokis uoum tenas buturung uangoulusin. <sup>33</sup> Tar binak ka la pokoso lar tamatang ualo tasir hos i Sisaria, gisina ka la heir toro bolobolo tar gavana, kara ueliu ponola tang Poul tatanon. <sup>34</sup> Gitir gavana ke timana toro bolobol, kare

---

† 23.27 Apo 21.30-33; 22.25-27    § 23.28 Apo 22.30    † 23.30 Apo 23.16-23; 24.1-9

dangata pare, hingiar pang uan re la turion. Gine ke ate peono pare, a peng tar pang uanionene i Silisia.

<sup>35</sup>Inggono ke kulangua pare, “Inggo u turung ualongoro uasiokompe tar niduhene totomua geta pokoso bakasis ka tohtohotola totomuaane.” Song ke ualatoho inggono pare, Poul e la turung uangoul tena umang toia Herot, bo ra la turung tur kauেকে পুকিন.

**Poul ke me tur i uoum tang Peliks ger gavana**

**24** <sup>1</sup>I muduhia kura karuh baka per tolimar marein, Ananias ge nas uleikir pater, ke lako i Sisaria menia pono tasir gisiamer mamahoholik, kare nas tamatang iate tar ualatut ger hangana tang Tertulus. Gisina ka keipiko tenas uelhire tar gavana, tar marang kedanga tang Poul. <sup>2</sup>Tar binaka ka kilalain Poul ium, Tetulus song ke uakekena tar tohotola tatanonane i uoum tang Peliks pare, “Inggeim king me uaha tun, ko me kauেকে পে ingga tamiueim, a niuaha kara niuangoul uaia, ke moko tar puhung barah, doh ingga teko me uakotpokoso pono tar bureher inete uaia tar pang uanene. <sup>3</sup>Siokor inggeim uakapa tunane toro mamang buturulik king banga tar kalekinalenin, karing siokor uaha tun. <sup>4</sup>Bo ahik puk pahe la turung uia tamiueim tar uoho uanono totomua, inggeim mi dangata puk totomua tar ueldolom baka tamiueim, karo ualongoro baka tar haua ring marang meneieim. <sup>5</sup>“Ge Inggeim pe king ueltupara tar tamatene pare, e uoto uakotpokoso tar ueluelnimaliane, e uoto uatentur tar ueluelkoiane i uantinana tasir Ju toro mamang buturulikane tar koto uakap. Inggono ter tamata uleik tar toto tamatang bohoboh ra kilais o Nasaret. <sup>6</sup>“Kare uedanga pono tar uasuasa tar umang lotu ger dedeilane tar matana God, temaeit king kuse inggeim tatanon. <sup>7</sup>Bo Lisias puk ger tamatang ualatoho tasir uiluiliatung menia toso uiluiliatung ka lame, kara me kale liu tur tatanono tamiueim, kare kula tasisis ka tohtohotola tatanono tar me tur i uoum totomua. <sup>8</sup>Doh ingga geto heheke uauia tun tatanon, ingga o turung atempe toro mana tun tar tamatono pare, a mamang inetelikinine ra tohotolaig tatanon a mana uakapa tun.” <sup>9</sup>O Ju pono ka siokor meneng poul tang Tertulus tar mene uapopokoho tar puhunina pare, a man.

<sup>10</sup>Maeit gitir gavana ke dumatala tang Poul mare mene bak. Doh Poul ke la mene hahaua pare, “Inggo u ate uaia tun pare, ingga ko tur sira pare, a tamatang kedanga tasir Ju tar puhung barah, maeit inggo u uaha tun getu meneng uelturutio. <sup>11</sup>Ingga o turung ate uakodkodohompe pare, ahik pah sioun, a siokor hangaul, doha torik pukur marein kura karuh, ku la pe taro inggo i Jerusalem tar lang lotu. <sup>12</sup>Gisina ra tohtohotola totoguo ahik pah ka ueltupara me siokor binaka totoguo ku uelperere

<sup>u</sup> 24.5 Apo 17.6    <sup>v</sup> 24.6 Apo 21.28-30



keip me tang siokor tamatane iuma tar umang lotu ger dedeil ue me ueluelnimalianane toro umang lotu ue gane ueltebeirimpe tar uan uleik. <sup>13</sup>Doh gisin ahik ponompe pah ra banoto ra hire uamatoto tun me puhpahunine ra tohtohotolaigisina totoguo pare, ge para man.”

<sup>14</sup>“Bo toro mana tun puk, inggo u hire pare, inggo u lotu pono tenasi God ro bung tamagigeig. Inggo u uakeluk tun tena nimalaron, teene ra kulainisin, a toto tamatang bohoboh. Inggo u tagorong mana tar mamang inetelik gere uauiaigir ualatut, dohe moko pono tenas bolobolor propeit. <sup>15</sup>”Doh inggo u uangougl sira pono tasisina tar binaka ra tua tapokisir mamang tamatalik. <sup>16</sup>Maeit inggo u uedanga tun tar uangougl uakodkodohane tar matana God, doh gane tar matasir tamat.”

<sup>17</sup>“I muduhia ke tabo baka peioane tar giniamerher krismas, inggo ku tapokisime i Jerusalem tar me heir tosnogo tamata tar niheir mara heir tasir tiome, karu lang guata pono tenag uahung. <sup>18</sup>”Inggo ku tur tar marang uakeluk tar hagarung uadelauana tar tukunun tar matana God. Tar binak ka bang huara tosina totoguo iuma tar umang lotu, inggo ku delauana manas. Tar binakon ahik pono mo bureher tamata ka uangougl tagu totoguo. Doh ahik pono me ueluelnimalian. <sup>19</sup>Bo gisine puk ka me kuse totoguo, o Jung tar pang uan i Esia ge pake kaeisisinane, gisina pake tera tohotola me inete totoguo. <sup>20</sup>Ue gisine ra uangougl tera banoto ra hire uamatoto tar haua ku guata uasaio. Ge pare ka ueltuparasina me inete uasa ku guataio tar binaka ka uaturusina totoguo i uoum tasir Sanhidran. <sup>21</sup>”Inggono here ter puh geku mene uauleikio pare, ‘Inggo u tur i uoum daana totomua, teene ru tagorong mana pe tar mat, kara nitua tapokis.’ ”

<sup>22</sup>”Tar binakonene Peliks e ate uaiang sioun tenas nitagorong manar tamat gera uakeluk tar Tamata Noman, maeit inggono ke uain tar tabilon e tuka gete pokoso baka Lisias ger tamatang ualatoho tasir uiluiliatung. Song ke hire tang Poul pare, inggo song ru turung uahire totomua tar ninamana ka kedangain totomua. <sup>23</sup>Inggono ke ualatohongua tar tang siokor tamat tar tur kaueke tatanon, bo e uamaluana puk ponompe me giniamerher binaka tatanon, kare uamaluana pono toso kaluanono ra me ruh koutumpe tatanon, kara bang a haua re katupagion.

<sup>24</sup>I muduhia ke karuh baka per giniamerher marein, Peliks me Drusila ge na kuahampeono kura laha. Drusila a kuahang Ju. Ke ualatue ra la kilain Poul, song kura ualongoro rasina tatanon, ke hire pe tar nitagorong mana tang Kristo. <sup>25</sup>Gine re hirhire uaia tun pe inggono tasrasina tar niuangougl uakodkodoh, kara nikauke katong menia tar nikedanga gere turung lame. Peliks ke sokor, kare kula tang Poul pare, “Hiliu bakene daan, gete me binaka uaia poluk kaein, song ru kila polukio totomua!”

<sup>w</sup> 24.15 Jon 5.28-29    <sup>x</sup> 24.18 Apo 21.17-28    <sup>y</sup> 24.21 Apo 23.6    <sup>z</sup> 24.22 Apo 23.26

<sup>26</sup>Inggono ke namana pono pare, e marang bulaua uanomo Poul tatanon, temaeit re uoto kilono tatanono tar menmene tatanon.

<sup>27</sup>Kura karuh baka ro torik ro krismas, Porsius Pestus ke palih tang Peliks. Bo teene Peliks e malara ra uahar Ju tatanon, maeit ke uamaluano tang Poul e uangoul uoum tar karabus.

**Poul ke malahir tang Sisa tere tabila tar kedanga tatanon**

**25** <sup>1</sup>A touonor marein kura karuh manasa ke pokoso pe Pestusane tar pang uan i Judia, inggono ke hiliu i Sisaria tar la taro i Jerusalem. <sup>2</sup>“Doh nosio uleikir patere mesir mamahoholiking tasir Ju ka lame tatanon tar me heir tatanono tenas nitohotola tang Poul.

<sup>3</sup><sup>b</sup>Gisina ra malara uateuele ra ueliu tapokisimein Poul i Jerusalem, ge gisina pe ka namana tanika tar turung tur koutkout tatanono tar lele kara uiliatung pous.

<sup>4</sup>Doh Pestus ke mene hahaua tasisina pare, “Poul deh ke karabus i Sisaria, doh inggon ahik pahi reh, karu la uahiuu katongoko inggo tar uanion. <sup>5</sup>Mu turung uamaluana pukumpe mo nomio mamahoholik gera turung la tagu totoguo mara la heir me nitohotola tatanon ge pare ke guatono me inete uasa.”

<sup>6</sup>I muduhia ke uangoul tagu baka peono tar hangaulur marein tasisin, inggono song ke la uahiuako i Sisaria. Maeit tar uagiamehenar marein inggono ke kula tar tabilang kedanga tang Poul ra tabilain, kare ualatoho inggono tang Poul ra me uaturin i uoum tatanon.

<sup>7</sup>“Tar binaka ke me tur pe Poul i uoum tatanon, o Jusine ka la turuha i Jerusalem ka me tur uiloho tatanon, kara tothotola tatanono tar bureher niguata uasa. Bo gisina puk ahik pah ka uakalahara baka taninina pare, a man.

<sup>8</sup>Song ke meneng uelturut katongoin Poul pare, “Inggo ahik tun matu guata me siokor inete me saane tenasi ualatutur Ju ue gane tar umang lotu ger dedeil, doh gane ponompe tang Sisa.”

<sup>9</sup>Pestus ke marang uakeluk teres nimalarar Ju, maeit ke kula pare tang Poul. “Ingga o uauiampe tar la taro i Jerusalem mare tero la tur toa i uoum totoguo tar ualongoro tar nitohotolanine?”

<sup>10</sup>Doh Poul ke mene hahaua pare, “Inggo gine manasa ru tur tar butur ku malahirin e kedanga to Sisar totoguo. Ingga o ate ponompe totoguo ahik pe matu guata me inete me sa tasir Ju. <sup>11</sup>Bo geku guato me inete me sa, dohe banoto pare, inggo ra uiliatung pousuio, inggo ahik pahu sokoro tar mat. Bo ge ahikir nitohotolanine ka heir taueteig paha man, ahik ponompe me tamata re banoto e kalaharain tar heir totoguo tasisin. Inggo u malara pare, Sisa re turung kedanga totoguo!”

<sup>a</sup> 25.2 Apo 24.1   <sup>b</sup> 25.3 Apo 23.15   <sup>c</sup> 25.7 Apo 24.5-6

<sup>12</sup>I muduhia ke ueluatata keip baka pe Pestus mesno tamatang iate, inggono ke mene uakalahara tang Poul pare, “Ingga ko malahir o la tang Sisa, auia, ingga o turung lampe tang Sisa!”

Pestus ke uahire tang Agripa ger toia tang Poul.

<sup>13</sup>I muduhia ke karuh baka per ginameher marein, Agripa ger toia me tatahinalik, a hangana tang Bernaisi kura me pokos i Sisaria tar lang ualasira tenasira niueltada tang Pestus. <sup>14</sup>Gine kura uangoul manasa pe rasina tar bureher marein tar uanion, Pestus ke ueluatata keip manasa tar niduhene tang Poul. Pestus ke kula pare, “Gane e uangoulur tang siokor tamata ke hiliu toin Peliks tar umang uih. <sup>15</sup>Tar binaka ku la taro inggo i Jerusalem, o tamata uleiking tasir pater, doho mamahoholiking tasir Ju, ka me uahire totoguo tar nitohotola tatanon, kara dangata menia tar marang tung pous tatanon.

<sup>16</sup>Inggo ku hire tasisina pare, inggon ahik pah ter niguatang Roun tar heir tang hingiar tamata tar uelmahing tar binaka halana te tur i uoum tasisit ka tohotola tatanon. Kare inggon e banotompe tar uelturut katongoin tar nitohotolanin. <sup>17</sup>Tar binaka ka la tagu mesina totoguoane, inggo ku me uamoko puk manasampe tar puhono tar uagiamehenar marein, karu ualatouk pare, ra keipimein Poul i uoum totoguo.

<sup>18</sup>Tar binaka ka tentur kair tamatasit ka tohotola tatanono tar men, gisih ahik pah ka tupara tatanono ke guata uasa me siokor ninamananit ku naman taginigio.

<sup>19</sup>Gisina doh ka ueluelperere baka pukumpe mes inggono tar niguatang tenas lotumpe, kare tar tang siokor tamata geke mat, inggon a hangana tang Iesu. Bo Poul puk ke kula pare, ‘A tamatonene Iesu ke tua tapokis.’

<sup>20</sup>Inggo ku uatoboul, kara hik pah ku naman manate hape maru kale uaia tar puhon, maeit inggo ku dangata tatanono ge pare malarono tar la i Jerusalem mara la kedanga toig na nitoholaon. <sup>21</sup>Bo gine puk ke malara peono tang Sisa tere kedanga tar puhon, inggo ku ualatoho puk manasampe ra uamokoiono tar umang uih e tuka tar binaka ru kula inggo ra keipiono tang Sisa.”

<sup>22</sup>Song ke kula Agripa tang Pestus pare, “Inggo u marang ualongoro katongo tun baka tatanon.” Kare mene hahaua Pestus tatanono pare, “Ingga o turung ualongorongua roliuo tatanon.”

<sup>23</sup>Tar uagiamehenar marein, Agripa me Bernaisi kura uatoro uaia tun tara tukunus tenasira gomomong toia, kaura lekeme ium menia pono tasir tamata uleikisisir tohangas, kare gisih ponor tamata uleikane tar uan uleik, ka me siokor lekameane tenas tine umar tamatang uakeis, maeit song ka keip ualekamein Poul tar uakelukumpe tena ualatoho Pestus.

<sup>24</sup>Song ke kula Pestus pare, “Agripa ger toia, kare inggoumene rung uangoul tagu tamiueim, inggoum mu banga tar tamatene! O mamang Ju

---

<sup>d</sup> 25.14 Apo 24.27

uakap ka dangata to totoguo i Jerusalem, kare gane ponompe i Sisaria, gisina ka kulkula ualeik pare, inggon ahik pahe banot e uangoul baka poluk. <sup>25</sup>Doh inggo ahik pah ku tupara me puh ke guata uasaion mare banoto pare, ra tung pousin, bo inggono puk ke malara pare, te Sisampe re me kedanga tatanon. Inggo ku namana puk manasa pare, ueliuila tatanon i Roum. <sup>26</sup>Bo inggo puk ahik dedempe me puh re kalahara tun maru bolola tang Sisa tar uahire tar puhon. Temaene ku ueliuimeo tatanonane tamiuoum, kare totomua pono Agripa ger toia mare song ra tuparain me inete tar tabilene, song ru bolompe inggo. <sup>27</sup>Ge inggo pe u namana pare, inggon ahik paha uia tun tar ueliu pukula tar tamata ger uih i Roum, doh ahik mata bolobolo uakalahar bakaigir haua ge guata uasaig.”

**26** <sup>1</sup>Song ke kula Agripa tang Poul pare, “Inggo ku uauia totomua tar mene katongo bak.” Maeit Poul ke sarang pau tar limana song ke uakekena tar meneng uelturutin.

<sup>2</sup>“Agripa ger toia, inggo u uaha tun ku me tur pe i uoum totomua, inggo u mene tar uelturut katongoio tar nitohotolanine ka tohotolaigir Ju totoguo. <sup>3</sup>Doh inggon e la uia tun pare, ge ingga pe o ate uaia tun pono tenas niguatar Ju, kara inetenine king ueluelnimalianageim. Temaene, inggo u dangata totomua tar tabtabila sikor, karo ualongoro totoguo.”

<sup>4</sup>“O Ju uakapa tun ra siokor ate tang hingiar niuangoul ku uangoul turumeio tar binak, karu keketik ku uangoul peme tenag pang uan, dohi Jerusalem. <sup>5</sup>“Gisina ka ueliate tur totoguo sioun, doh geta malarasin ra hire uakalara tenag niuangoulio. Inggo ku uangoul sira pare, a Parisi, o Parisi tera uakeluk tun tena hagarir lotu. <sup>6</sup>Inggo u tagorong mana teil tena niualapagah God toso bung tamagigeig, temaene ru turio daan i uoum tasir tamatang kedang.

<sup>7</sup>Inggonor ualapagah teene ra uanguangoulin ro hangaul, doho torik ro matinasine, mangiha re kotpokoso pare, o man, ra lotu pe tang God tar boung, doh tar marein.”

“Ir toia, inggono ter nitagorong manon temaene ra toholar Ju totoguo. <sup>8</sup>Ae maene rung namanoum pare, ahik God pahe banot e uatua tapokis tasir mat?”

<sup>9</sup>“Sioun inggo teku namana pono pare, paku guata me puh tar tur tane tar hangana Iesu ger peng Nasaret. <sup>10</sup>Doh inggo teku guatampe tar kalekinaleon i Jerusalem. Inggo ku kale tena niuauia nasi uleikir pater, karu uamoko tasir burehe tar umang uih. Karu uauia tar binaka ra marang tung pousisina tasisin. <sup>11</sup>A bureher binak, inggo u la hahai toro umang lotu tar uuelmahing tasisin, karu petutupe tasisina tar hiliu tar Tamata Noman, kara uelhire uasa tatanon. Gine ru nimaliana uasa

° 26.5 Pil 3.5-6    † 26.6-7 Apo 23.6; 28.20    § 26.9 Apo 8.3

tun pe inggo tasisin, Temaeit inggo u la toro ginameher pang uan tar mamantouo tasisin.”

**Poul ke ueluatata tar binaka ke pokoso pare, a tamatang tagorong man**

<sup>12</sup>Doh Poul ke mene ualatumana poluk pare, “Inggo ku lang la keip poluk i Damaskus tena niuauia nas uleikir pater. <sup>13</sup>Ir toia, inggono kaelainane namoloi, gine ring la pela inggeim tar lel, inggo ku bang huara tar luh e balo turuha i Heuen, inggon a balontiehe uain poluk tar balbalanar pisar, inggono ke me balo uiloho totoguo, kare gisis ra la tagu teil totoguo. <sup>14</sup>Maeit inggeim king siokor punga uahiu i kot, karu longoro inggo tar uauanar tamat re uelhire pe totoguo toro uelhireng Hibu pare, ‘Sol, Sol! Ae maeit ro uaelmahingia totoguo? Ingga e parakukuh baka pukia tar tur tane tereg nimalaro.’”

<sup>15</sup>“Karu dangata inggo pare, “Tamata uleik! Ingga pe mai?””

“Kare mene hahauar Tamata Nomana pare, ‘Inggo dehe Iesu, teene ro uaelmahingia. <sup>16</sup>Tentur kaiene daan, doho tur keip tar pang kekem. Inggo ku pokoso totomua tar uamatoto totomua pare, a tamatang kalekinale, karo hirhire tauete teil tar haua ko bangaig menia tar haua ru turung ualasiragio. <sup>17</sup>Inggo u turung uelkarus liu tur totomua tosnongo tamat menia tosnongo uelmatan, inggo u turung ueliuila totomua tasisis ahik paho Ju tagu. <sup>18</sup><sup>h</sup>Tar la uatakapuka tar matasisin mara hiliuisina tar kitupun, kara lame tar luh mara hiliu tena nitampopokoho Satan, kara lame tang God. Mara kuse luara liuig res niguata uasasin, song ra turung kale ponosina tar niguata uaia menia tasisis ra tagorong mana totoguo, kara turung uangoul teil tagu tasisis ku uamatotosio pare, o noug.’”

<sup>19</sup>“Maeit, Agripa ger toia, inggo ahik pah ku longlongoro boho tar nibangene ku bangain ke la turuha i Heuen. <sup>20</sup>Temaeit, inggo ku la mene ualasira uakikilang i Damaskus, song ku la poluk i Jerusalem meniampe toro mamang buturulik i Judia, karu la pono tasisis ahik paho Ju tagu mara hiliu tenas niguata uasa, kara siokor lame tang God, kara ualasira tar niguata uaia mara ateisisina pare, ka uapalih.

<sup>21</sup>Ter tengkanene maeit ka kuser Ju totoguo, kara marang tung pous, teeit ku mene ualasira pe inggo tar puhon. <sup>22</sup>Bo God puk ke poul totoguo, maene ru uangoul harah tar hire tauete dedempe tasir tamata uakapa tar puhpuhunina pare, ginin a man, e uakikilanga tur pe tasir tamata ueltebeir e la tuka pe tasisir tohangas. Inggo ku ualualasira teil pukumpe tar haua ka meneigir propeit mes Moses pare, e turung kotpokos. <sup>23</sup><sup>i</sup>A puhono tere kulkula tang Iesu e turung mat, doh inggono tere turung tua uakikilanga tur poluk toro mat mare me pokoso sira pare, ter luh gere luh uakubara tasir Ju, doh inggon e siokono ponompe tasisis ahik paho Ju tagu.”

<sup>h</sup> 26.18 Ais 42.16; Epe 2.2; Kol 1.13    <sup>i</sup> 26.23 Luk 24.44-47; 1Ko 15.20

<sup>24</sup>Gine re mene pela Poul paar, Pestus ke mene uauleik pare, “Poul ingga deh ko popouluan, ingga deh ko sikul uaburburehe puk. Ingga ko uapopouluana keipia tar niate ululeik puk!”

<sup>25</sup>Kare kula Poul pare, “Pestus ger tamata uleik, inggo ahik paha popouluan, inggo u mene tun tar hauar kodkodoh, kara mana tun.

<sup>26</sup>Doh ingga Agripa ger toia! Inggo u ongolo tun tar hire totomua pare, teeit ingga o ate pono tar puhpuhunin, ge a puhpuh penin ahik pah ke kotpokos uaou. <sup>27</sup>Agripa ger toia! Ingga o tagorong mana pono tasir propeit? Inggo u ate ingga o tagorong mana tasisin.”

<sup>28</sup>Song ke kula Agripa tang Poul pare, “Ingga o namana sira pare, o banotong guata totoguo maru tamatang tagorong mana tang Kristo tar sikir binakene daan?”

<sup>29</sup>Doh Poul ke mene hahaua tatanono pare, “Geta puhinar binaka ue a barah, inggo u lotu tang God mara hik pah ingga puk, bo siokor inggoum uakapene rung ualongoro totoguo daan, mu turung siokor pokoso sira totoguo, bo ahik puk pah ra turung uamoko tagusium tar karabus.”

<sup>30</sup>Maeit gitir toia ke tentur kai menia pono tang Bernaisi ge tatahinalikion, kare Pestus ger gavana, doho gisis pono ra tabila uahuhut tasisina ka tentur kai pon. <sup>31</sup>Gisina ka tauete liuane tar tine um. Doh gine re ueluelmene teil pelaisisin, gisina ka kula pare, “A Tamata dehetie ahik pah ke guata me inete me sa mare banoto ra uiliatung pousin ue e uangoul tar karabus.”

<sup>32</sup>Kare kula Agripa tang Pestus pare, “A tamata dehetie paka uatauetein ge paka hikiono pahe malarala tang Sisa i Roum tar tabila tar kedanga tatanon.”

### Poul ke la i Roum

**27** <sup>1</sup>Gisina ka ueluauiiae pare, inggeim mi la i Itali, Poul mesir gisiamer tamatasisir karabus ka ueliuilais tang Julius, inggono tere uoum keip tasir tamatang uiliatung, doh gisina tera kaueke tun tang Sisa. <sup>2</sup>Inggeim king panete tar parauing tar uan uleik i Adramitium, inggonor parau e marang bokboko hahaila toro biris gere moko toro binabatang tar pang uan i Esia. Gine king panete pe inggeim, a tang siokor tamata a hangana tang Aristarkus a peng Masedonia tar pang uan i Tesalonaika e la tagu teil pono tamiueim.

<sup>3</sup>Tar uagiamehenar marein, inggeim king la bok i Saidon, doh Julius ke guata uaia tun tang Poul, inggono ke uamaluana tatanono ke la toso bung kaluan mara poulusina tatanono me inete gere malaraiou.

<sup>4</sup>Inggeim king ualo tur poluk tar buturuon, doh king ualo tutupengua tar rom, doh ahikingua pah king banoto tar ualo uakodkodoh, maeit

<sup>j</sup> 27.2 Apo 19.29

inggeim king ualohiangua tar pang giameh i Saiprus i uantinanina tar toro mer pang uan uleik.

<sup>5</sup>Gine king ualo kout pela inggeim tar kasap tar pang uan i Silisia me i Pampilia, inggeim king la hungungua tar uan uleik i Maira tar pang uan i Lisia.

<sup>6</sup>Doh tar uan uleikion gitir tamatang uoum keip tasir uiluiliatung ke la ueltupara tar siokor parauing Aleksandria e marang la i Itali, kare uapanetengua tamiueim.

<sup>7</sup>Inggon ahik paha binaka uايا i laur, maeit inggeim king ualualo hamas tun, doh ahikingua pah king la uolong pokos i Nidas. Inggeim ahik pah king banoto tar ualo uakodkodoh, inggeim king ualo uaounguala tar tor i Krit gere uahuhut toro tulehun i Salmone. <sup>8</sup>King ualualo sikorompela tar binabat, karing la pokosola tar uan ra kilain, “A hua ger uia,” inggon e moko uahuhut tar uan uleik i Lasea.

<sup>9</sup>A burehe manasar marein ke karuh, doha rom e ululeik uain dedempe, teeit a binaka uaiang toro parau tar ualo ke siaua manasain, doh nasi marein uleikir Ju tar ueil, ke karu manasa pon, maeit Poul ke uatagin pare tasisin, <sup>10</sup>“Inggoum uakapa tunene, inggo dehu banga sira pare, na niualor parauene ahik pahe turung uia, doh inggon e turung uakotpokoso tar niduh uleikane tar parau meniampe tar inetenit ra kihanga teilig, kare inggeig menia ponompene ri panete teil.”

<sup>11</sup>Bo git pukur tamatang uoum keip tasir uiluiliatung ahik pah ke marang longoro tang Poul ke mene pe, bo ke uakeluk puk tena ninamanar tang uakapis tar parau meniampe tang tanener parau. <sup>12</sup>Gine ahik per buturuono paha uia tar binakang rom, o bureher tamata ka pentampopokoho pare, gisina ra ualo dedempela tar uan uleik i Piniks mare la tupara tois tar binakang pang romo tar uanion. Inggonene a biris e mok tar tor i Krit tar painahia re hukoinir pisar.

#### A romo uleik ke u

<sup>13</sup>Gine ke uakikilanga per romene re u tur sikoroha tar pang kais re hu pekor pisar, gisine ra ualo teil tar parau ka naman ahikir romo pahe uleik, maeit ka reih kai toro oto nar parau, kara ualo uahuhutuko tar binabatang Krit. <sup>14</sup>Gisin ahik pah ka ualo baka me puhung barah, kare u manasar romo ngohina re popokoho per solihang, a romene ra kilain pare, “A touabuin,” ke me u bise taro tar parau i uantinaninar laur. <sup>15</sup>A parau ahik tun pah ke banot e ualo tutupe tar rom, maeit inggeim ke uabele uakeluk puk manasampesieim. <sup>16</sup>Gine king siaua pe taro inggeim tar toro gera kilain i Kauda, inggeim ke parakukuh uadeil pukusieim tar reih kai tar boutung panete gera reih teilin. <sup>17</sup>Gisine ra kalekinale tar parau, ka lolo uiloho tar parau tar roup mare popokoh. Gisina ka sokoro gete ulainir parau tar lolouon i Aprika, maeit ka uahiuwa tapokis toro uatabilang rom mare belbele hamasinir parau.

<sup>18</sup>Nar boun g a romo ke uleikintieh, doha butuana ke uleikintiehe pon, maeit gine ke liuo peon gisis ra kalekinale tar parau ka uakekena tar bakbaka uahiua manasa tar inete gera kihanga teilig. <sup>19</sup>Tar uatouononor marein, gisina ka baka uahiua manasa tar ineteng tar parau, o iauon, a roup, doha uatabilang rom meniampe tar turun. <sup>20</sup>Tar bureher marein, inggeim ahik pah king bang huara tar pisara mesir pitopit, kara rom, dohe popokoho dedempe. Maeit siokor inggeim ahik baka poluk pah mi ate pare, ge paring udeil.

<sup>21</sup>A burehe manasar marein ke karuh, doho tamat ahik pah ra ein me niein, maeit Poul ke turane i uantinanin, kare kula pare, “Ge pakung longoro inggoum ku kula pe inggo pare, ahikieig pahi hiliu i Krit, inggoum pake siauasium tar binaka uasaene, maene ke rouor inet. <sup>22</sup>Bo gine daan inggo u kula pare, inggoum mu pentampopokoh, teeit siokor inggoum mu turung udeil. A paraua puk manasampe tera turung mamantouoin. <sup>23</sup>Na boun g, na angelou Godener nana totoguo, doh gine ru kalekinaleio, ke me tur i tektekena totoguo, <sup>24</sup><sup>k</sup>kare me kula pare, ‘Poul! Ahik paho sokor! Ingga o la turung turumpe i uoum tang Sisa, doho tamatasine ra turung siokor udeil keipompe totomua.’ <sup>25</sup>Maeit inggoum ahik pah mu sokor, ge inggo pe u tagorong mana tang God pare, a mamang inetelik e la turung pokoso sirampene ka hire peio. <sup>26</sup>’Bo inggeig puk paki uamaluana tar rom e u bisela tar parau me lolouona mari la horo inggeig me tor.”

### A parau ke sa

<sup>27</sup>Kaelainane nar uantinaninar boun g tar uahangaul, doha uatoueitinar boun g ke u pe rom, gine re u pelasieim tar teheng Adria, o tamatang kalekinale tar parau ka hagouo sira pare, a parau here ke uahuhut i kot. <sup>28</sup>Maeit gisina ka uahiua i laur tar uahireng lolou, doh inggono ke uahire pare, inggon a toueitir hangaul pukur param re tunguna pe. Ahik paha puhung barah ke ualo per parau, gisina ka banga tagin poluk tar uahireng lolou, kara la ate poluk pare, inggon a touonor hangaul puk manasar param re tunguna pe. <sup>29</sup>Gisina ka sokoro geta ualoko i rana mo palau, kare tapolakar parau, maeit gisina ka baka uahiua toro toueit ro otane i mud tar parau, Gisina ka lotu pono mare marein uateuelon. <sup>30</sup>Gisiner tamatang kalekinale tar parau ka marang uedanga uanomo tar marang hiliu tar parau, gisina ka pepe boho pare, ra uahiua tar otane toro uamunar parau, bo gisina ka marang uahiua tar bout. <sup>31</sup>Doh Poul ke kula tar tamatang uoum keip tasir uiluilitung mesir uiluilitung pare, “Gera hiliuir tamatasine tar parau, inggoum ahik pah mu banotong udeil.”

<sup>k</sup> 27.24 Apo 23.11    <sup>l</sup> 27.26 Apo 28.1



<sup>32</sup>Maeit gisisir tamatang uiliatung ka tokout tar uoho ger nilolo uakuse tar bout, kare punga uahiuar bout i laur.

<sup>33</sup>Gitiempe re langlang liuo pe inggon, Poul ke ualahur tasisina ra ein, inggono ke kula pare, “Tar hangaul, doha toueitir marein gisiane kura karuh, inggoum ahik pah kung hagouo uaia, karung uangoul puk, ahik pah kung ein me niein. <sup>34</sup>Gine daan inggo u kula uapopokoho tamiuoum tar ein baka me siksikir niein. A niein pe tere uatampopokoho tamiuoum. Ge ahik pe me tang sioko tagigeig re turung kale uelmahingene daan.”

<sup>35</sup>Song ke kaleono tar giniamer bereit, kare heir tar niuaha tang Godane i uoum tasisin, kare pis toro mahar, kare uakekena tar ein.

<sup>36</sup>Gisina ka siokor hagouo uaia, kara siokor einingua. <sup>37</sup>Inggeimene ring siokor panete teil tar parau ke la matotosieim tar 276 uakapar tamat.

<sup>38</sup>Tar binaka ka ein uamatoto baka peisisina teres nimalar, gisina song ka bakbaka uahiuar tar giniamer raes-uit i laur mare mamaolo sikoror parau.

<sup>39</sup>Gine ke la liuo manasa peon, gisin ahik pah ka bang paroko tar binabat, bo ka bang huara puk tar siokor tamiongon a ioniononan, doh gisina ka kula pare, ra ualo uahoroko tar parau tar buturuon. <sup>40</sup>Gisina ka siokor tokout liu tar ot, doh tar siokono pukumper binak, gisina ka luaka liu tapokis pono tar uoho geka uih tane bakaig toro habinar parau. Song ka reih kai pono tar uatabilang rom, kara uabangako tar parau i kot.

<sup>41</sup>Bo a parau puk ke la horo kout tar lolou. O uamunar parau ko la horo uanon, doh ahik paho banoto tar in uain. Doho uakapisinar parau ko tapolaka siksikin re posposara per butuan.

<sup>42</sup>O uiluiliatung ra marang uiliatung pous tasir karabususine tar parau mara hik me tansioko re uaene liu, kare ualo. <sup>43</sup>Bor tamatang uoum keip puk tasir uiluiliatung tere marang uaudeil tang Poul tar tur tane mara hakisina pah ra uakeluk teres ninaman. Inggono ke ualatoho baka uoum tas mai gera banoto tar uae, kara la hung i kot. <sup>44</sup>Bosir bureheis ra turung uaene uahung keip tar mahmahar douk ue tar mahmaharanar parau. Tar hagarionene, siokor teasina uakapa ka la siokor uaene uahungumpe i kot. Ahik me tang sioko ke mat.

### Poul e uangoul tar tor i Malta

**28** <sup>1</sup>Gine king la siokor pokoso pe ko inggeim i kot, inggeim king siokor udeil, song king la ate pare, inggono ter tor gera kilain i Malta, <sup>2</sup><sup>m</sup>O tamatang tar toron, ka ualasira tun tar niguata uaia tamiueim, gisina ka uout toro hue, kara siokor kilala tamiueim, teene re huana peon, kara malahong. <sup>3</sup>Poul ke la kale randouk, kare me bakala toro hue, doha soiener sa ke hagouo tar uelsuk, kare hir tauete tur tar

<sup>m</sup> 28.2 2Ko 11.27

randouk, kare eitingua tar limanon. <sup>4</sup>Tar binaka ka bangar tamatang tar tor re eit teil per soi tar limana Poul, gisina ke uelkule katongois pare, “A tamata dehene a tang haluh, gine ke uaudeil peionane i laur, a ualatut ahik dedempe pahe banot e uamaluana tatanono pare, e tua.”

<sup>5</sup>“Bo Poul puk ke kiaba bise liu tar soiane tar liman, kare la dudulaono toro hue, kara hikimpe pah ke hagouo sikoro baka mo momouh. <sup>6</sup>O tamata ka la namanangua pare, inggon e turung isingir limana ue e turung mate ualutar, bo ahikimpe. Doh gine ka mahang bangbanga teil pesin, doh ahik me puh re pokoso tatanon, gisina ka uapalih teres ninaman, kara kula puk manasa pare, inggono ter godo noman.

<sup>7</sup>Tar toron o moko ro mahar koto uleik menia toro um, o nanar tang siokor tamata uleiking tang gavaman, a hangana tang Publius. Inggono ke kilala tamiueim tena um. Inggono ke la kauেকে uaia tun tamiueim e banoto tar touonor marein.

<sup>8</sup>Tamanon e momouh rikinimpe toro uat, inggon e uelsukur tukunun, kare kalein ro silele uleik. Poul ke lekala iuma tar la banga tatanon, i muduhia ke lotu baka peon. Inggono song ke uaponola tar limana tatanon, kare uauia tatanon. <sup>9</sup>Gine ke kotpokoso baka per puhon, o tamatang tar toro gera momouh ka la ponome, kara me siokor uauia ponois. <sup>10</sup>Gisina ka siokor ueltada tun tamiueim tar bureher hagar, doh gine ring kaleuatoro manasa pe inggeim tar panete poluk tar parau, gisina ka heir uamatoto tun tamiueim tar inete king malaraiğ pare, a tinamar tenami nila.

### Inggeim king pokos i Roum

<sup>11</sup>I muduhia tar touonor bialoko king uangoul pe inggeim tar tor i Malta, inggeim king panete tar siokor parau geke la boko uaouo pono tar torono tar pang romo uleik. Inggono a parauing Aleksandria, gane i uoum tar parauiou ura tur teil nosira kaesar toking pouh gera hangas tas Kastor me poluks ger toking godong Roum.

<sup>12</sup>Inggeim king la hung bak i Sirakius, karing uangoul baka tar uaniono tar touonor marein. <sup>13</sup>King ualo tur polukieim tar uanion, karing la hungungua tar uan ra kilain i Regium. Tar uagiamehenar marein, a romene re u turume tar pang makos ke u, maeit tar uatorikinar marein, song king la pokoseim i Puteoli.

<sup>14</sup>Tar uanion, inggeim king la ueltupara tasir tamatang tagorong man, gisina ka kilangua tamiueim, karing la uangoul tagungua tasisina tar mouitir marein. Inggeim song king hiliu tar uanion, king lihila i kot, karing la pokos i Roum.

<sup>15</sup>O tamatang tagorong manang Roum ka longoro pare, king la peme inggeim, gisina ka la tantane tola tar lele tamiueim. Gisina ka la tar

<sup>n</sup> 28.5 Mak 16.18    <sup>o</sup> 28.6 Apo 14.11

puhung barah pon, song ka la ueltupar tamiueim, gisina ka la ueltupara to tamiueim tena buturung uabulbulaua Apius, doh tar uan ra kilain, Touonor Umang Pokos. Poul ke bang huara tasisin, kare uatakai tang God, inggono song ke hagouo uaia pon. <sup>16</sup>Gine king la pokoso pelaeim i Roum, Poul ka uamaluanampein e uangoulung pahen menia tar tang siokor tamatang uiliatung tar tur kaueke tatanon.

### Poul ke la uelhire ualasin i Roum

<sup>17</sup>I muduhia ke karuh baka per touonor marein king la pokoso pe inggeim, Poul ke kila toto tasir mamahoholiking tasir Ju. Gine ka la toto baka pesin, song ke kula Poul tasisina pare, “Ro bung tahig! Inngo ahik pah ku guata me puh tar touahiuu tosnogio tamateig ue me inete me sa tar ueluelde tar niguatang tosnogio mahoheig. Inngo ka kuse toio i Jerusalem, kara ueliuimeio tar gavamaning Roum. <sup>18</sup><sup>p</sup>Gisina ka heheke totoguo, doh ka marang uamaluana totoguo, teene gisin ahik pah ka tupara me inete ku guata uasaio mara matoto ra uiliatung pousoio. <sup>19</sup><sup>q</sup>Bo o Ju puk ka ueluelde, maeit inggo ku malahir tar la tang Sisa tere ualongoro tar kedanga totoguo, ahik teilimpe me inete ru banotoio u tohotola tosnogo tamata katong. <sup>20</sup><sup>r</sup>Doh inggono ter tengkana tun maene ku dangata inggo pare, u menmene baka tamiuoum. Karu marang uaate tamiuoum pare, inggo ru uangoul keip pe tar tiein, teeit ri tagorong mana teil pe inggeigir Israel tang Iesu pare, ter Mesaia.”

<sup>21</sup>Maeit gisina ka mene hahaua tang Poul pare, “Inggeimane ahik pah king kale mo sioko ro bolobol o la turume i Judia tar uahire tamiueim totomua, doh ahik ponompe me tang sioko tasisit ka la turume i Judia ke me ueluatata tamiueim ue ka me menmene uasa toane totomua. <sup>22</sup><sup>s</sup>Doh inggeim tering marang ualongoro tar haua ro marang meneia, ge inggeim pe king longoro tasir bureher tamata ra meneng ueluelde pe tar timuhur nitagorong manene ke kotpokos i Judia.”

<sup>23</sup>Gisina ka ueluauiangua tar ueltupara tapokis tang Poul tar siokor marein, doh tar binaka ka lamesin, gisina ka burehe uain ka la peme tar buturene re uangoul Poul. Ke uakekena tur pe naliuo ke la tukampe nareiu, Poul ke mene uakalahar, kare uelhire tauete pono tasisina tena Nitoia God. Doh inggono ke uelhire tauete tur pono tar hangana Iesuane tena ualatur Moses menia pono tenas bolobolor propeit tang Iesu. <sup>24</sup>O gisiameme tasisina ka tagorong man, doho gisiameme ahik dedempe pah ka tagorong man.

<sup>25</sup>Gisina ke ueluelperere katongois, kara hilhiliu uatouk manasene re menmeneng uadouhina pela Poul pare, “A Iabena Dedeil ke uahire toro man o la toso bung tamamiuoum tar binaka ke kula pare, tang Aisaia ger propeit,

---

<sup>p</sup> 28.18 Apo 26.31   <sup>q</sup> 28.19 Apo 25.11   <sup>r</sup> 28.20 Apo 26.6-7   <sup>s</sup> 28.22 Apo 24.14

- 26 'O la tasir tamatasine, karo la kula pare,  
 Inggoum mu turung longor, bo ahik puk pah mu turung naman  
 manate.  
 Inggoum mu turung bang huar, bo ahik puk pah mu turung bang  
 parok.
- 27 Ge resi ninamana pesina ahik paha uia,  
 gisin ahik tun pah ra banotong longor.  
 Doh gisina ka uakut ponois mara hik pah ra bang huar.  
 Ter sa pare, geta banga keipisina tar matas, ra longoro keip tar  
 talingas,  
 doh geta naman manate pon, kara tapokisime totoguo, song ru me  
 uauiao tasisin.' ” *Aisaia 6.9-10*

28 Temaeit Poul ke mene uadouh pare, “Inggoum mu ate manasa tar  
 puh pare, God e marang uelkarus tasir tamat, na niuelkarus God e la  
 tasir tamat ahik paho Ju. Gisina ra turung longor.” 29 (-)

30 Toro torik pe ro krismas, Poul ke uangoul tar uaniono tar uma re  
 bulauain tar mamang bialokolik, kare kilola tena uma tas mais gera lang  
 banga tatanon. 31 Doh inggon ahik tun pahe sokoro sikoro re mene tauete  
 pe tena Nitoia God, kare ualasira pono tasir tamata tang Iesu Kristo ger  
 Tamata Noman.

# Roum

## O bolobolo ke boloin Poul tasir tamat i Roum

O bolobolo tasir Roum o moko teil i lolono tar timuhur uelhote toro Baeboul. O bolobol o nang Poul tasir tamatang tagorong man i Roum. i Roum here ter uleikir uan uleik tar koto uakap. Poul ke bolo toro bolobolo roono toro krismas 57 (I muduhia ke mata baka pe Iesu). Here ke bolono tar binaka ke uangoul i Korin.

O buk tasir Roum o ualasira hape re banotong uelkarus tur pe God tagigeig tar uabang manate teregi niguata uasaeig. Doh roon o ualasira pono hape paki uangoul peeig. A giniamer inete uleik ri banotong ate turueig toro bolobolo roono teenine:

O tamata uakapa ka siokor guata tar niguata uasa tang God.

God e uelkarus tasir tamata gera tagorong mana tatanon.

Inggeig ahik pahi banotong uelkarus katongo keipsisieig tar inete haua ki guata uaiain.

Na Iabena Dedeil God e poul tagigeig tar guata tar niguatar uia.

God e ualasira hape paki uangoul peeig.

---

### Poul ke hire uakalahara tena kalekinaler aposoul pe

**1** <sup>1</sup>Inggo Poul na tamatang kalkalekinale puk Iesu Kristo ka kilaio a aposoul, kara niuamatoto sioko tar mene tauete tono Uelhire Uaia God.

<sup>2</sup>God ke ualapagaha to toro Uelhire Uaia rone tasir propet sioun tun i lolono toro buk gero dedeil, <sup>3</sup>gero menmene tar tunon Iesu Kristo geke kotpokoso tur toso bunguna Debit ka me uatamata pein, <sup>4</sup>doh geke uakalaharainir Iabena Dedeil ter tuna God, kara ualasira uakalahara keip toin tena nitampopokoho uleik God, ka uatentur tapokis tur pein toro mat, Iesu Kristo ge nagi Tamata Nomaneig. <sup>5</sup>Inggeig ki kale tur tatanono

---

<sup>a</sup> 1.1 Apo 9.15   <sup>b</sup> 1.2 Roum 16.25-26   <sup>c</sup> 1.5 Apo 26.16-18; Gal 2.7-9

tar nipoul tar kotpokos o aposoul tar kila tasir bureher tamatar peng gime uan ahik paho Ju tar tagorong mana tang Kristo, kara longor, kara heir tar uiniatoro tar hanganon.

<sup>6</sup>Doh inggoum pono kae teil ponosioum tasisit ka kilais o nang Iesu Kristo. <sup>7<sup>d</sup></sup>Tamiuoum uakapeit re malaelhiris God i Roum gera kilais pare, no tamaton.

A nimalaelhir, doh no hiarouo God ge tamagigeig, doha Tamata Noman Iesu Kristo e la tamiuoum.

### Poul e marang banga toсно tamata God i Roum

<sup>8</sup>Uakikilangan, tar hangana Iesu Kristo inggo u heir tar niuah ueleheir tang God tamiuoum uakap, teeit remi nitagorong manoum ka ueliatein tar koto uakap. <sup>9</sup>God geru kalkalekinale keip tunuio tar koloug tar uelhire tauete tono uelhirer tunon, e ate a touihar binaka ru heirio tar namana tamiuoum <sup>10<sup>e</sup></sup>tenag lotu tar mamang binakalik. U lotu ge pare, kaelain me binakene daan tena nimalara God maru banotong tuparo me lele tar lame tamiuoum.

<sup>11</sup>Inggo ku marang banga tun tamiuoum maru heir tar inete uaia ke heirinir Iabena Dedeil tar uatampopokoho tamiuoum. <sup>12</sup>A inetono te pare, inggo u marang lame tamiuoum mari uaueltampopokohesieig teregi nitagorong man.

<sup>13<sup>f</sup></sup>Ro bung uanotoug, inggo u marang uahire tamiuoum pare, inggo ku gune tar me banga tamiuoum, bo a burehe pukur inete ke uapekout e tukene daan. Inggo u marang me kalekinale i uantinanina tamiuoum tar kale tur me puh uaia misiana ku guata uoum pe i uantinanina tasir gisiameher gime uan.

<sup>14</sup>God ke hire uapopokoho totoguo tar hire tauete toro Uelhire Uaia tasir tamata uakap ge ahik paho Ju toro mamang buturulik. Ge paro tamatasina ra ate toro uelhireng Grik, kara niguatang Grik ue ahik, o tamatang iate ue ahik pah ka la tar sikul. A puhunin ahik pah tere hau. Inggo u pentampopokoho tun puk tar uelhire uakalahara toro Uelhire Uaia tasir tamata uakap. <sup>15</sup>Temaait pono ku malarantiehe tunuo tar me hire tauete toro Uelhire Uaia tamiuoumat i Roum.

<sup>16<sup>g</sup></sup>Ge inggo pe ahik pahu matala keip tono Uelhire Uaia Iesu Kristo, teeit o uelhire tena nitampopokoho God re uelkarus keipin tasir tamata uakapa gera tagorong man, e uakikilanga keip tasir Ju song o gime uan. <sup>17<sup>h</sup></sup>Ge i lolono pe toro Uelhire Uaia o hire teil hape re uakotpokoso pe God tasir tamata tar kodkodoho keip tatanon te tar hagarang tagorong manang sioun kompe, uakekene tur tar uakikilanganar binak e la uatuka

<sup>d</sup> 1.7 Aha 6.25-26    <sup>e</sup> 1.10 Apo 19.21; Roum 15.23    <sup>f</sup> 1.13 Apo 19.21    <sup>g</sup> 1.16 Mak 8.38; Apo 13.46; 1Ko 1.18-24    <sup>h</sup> 1.17 Hab 2.4; Roum 3.21-22

tar uadouhin. Ngohinar nibolo peono tono uelhire God pare, “O tamatar kodkodoho ra turung uangoul keip tar nitagorong man.”

### Na nimaliana God tar niguatar sa

<sup>18</sup>Ge na nimaliana pe God e la turuha i Heuen e ualasira hape re nimaliana pe tar mamang niguata uasa, doha niuangoul uasa geka guataigir tamata ka tur tane keip pe toro mana teres mamang niguata uasalik. <sup>19</sup><sup>i</sup>God ke nimaliana tasisin, teeit a haua ka ateinisina tang God a kalahara katongompe, doh God ke uakahara tar puhono tasisin. <sup>20</sup><sup>j</sup>Sioununtiehe tun tar binaka ka touoinir kot, o tamata ka bang huara tar kot, doha langit, doha mamang inetelikimpenit ke touoig God. Gisina ka banotong banga uaia tun tena niuiaono ger mahang bang, doh na nitampopokoho ger mahang kap, doh God a i rana uain tar mamang inetelik ke touig. Temaeit gisin ahik pah ra banotong uolih ra tele tang God.

<sup>21</sup><sup>k</sup>Ge gisina pe ka atempe tang God, kara hik dedempe pah ka ueltada sira tatanon a God ue ra uatakai tatanon, kara uakekene tar touo teres ninamana hape re baka pe God. Temaeit res ninamanasina ke kitkitup, kare toboul. <sup>22</sup><sup>l</sup>Gisina ra uasalais, kara kula katongois pare, o tamatang iate, bo gisina puk o popouluan. <sup>23</sup><sup>m</sup>Gisina ka turung tar mud tang God ge paka uatakainisina ger Godung tar mamang binakalik, bo ahik ka uatakai kalehe puk tar kaesa a nipuruh sira tasir tamat ue o tetiau ue o inetesisier tua, o soi ue o pale gesir uoto mat.

<sup>24</sup>Temaene God ke uamaluana tasisina tar guata belehu kompela tang hingiar puhur ualamatala re malaraguir tukunus, kara uasuaa tar tukunus, <sup>25</sup>teeit gisina ka de mata tagorong mana toro mana tang God, bo ka tagorong mana kalehe puk toro boh. Gisina ka lotu tar inetenitie ke touoig God, kara uangoul i kukulebanga taninin, ahik pah tang God geke touo tar mamang inetelik. Teono pe pake teri uatakaiieig tar mamang binakalik. O man.

<sup>26</sup>Ter tengkanonene maeit ke uamaluana God tasisina tar guata tar niguata uasantiehe tun, kara ualamatal. O kuaha ka de mata le tasir bulout ger niguatang sioun, kara ueluelkale katongois, <sup>27</sup><sup>n</sup>kara siokononpe toso bulout, ahik pono pah ka malara ra le toso kuah ger niguatang sioun, bo ka malarantiehe tun ra uelueleis, temaeit gisina ra turung kale tar niduh geka uahingaig ra kale.

<sup>28</sup>Doh, gitie ahik pesina pah ka bang paroko tang God, inggono ke uamaluanangua tasisina tar uangoul keip tar ninamana uasa ra banotong

<sup>i</sup> 1.19 Apo 14.15-17; 17.24-28    <sup>j</sup> 1.20 Job 12.7-9; Ker 19.1    <sup>k</sup> 1.21 Epe 4.17-18

<sup>l</sup> 1.22 Jer 10.14; 1Ko 1.20    <sup>m</sup> 1.23 Ual 4.15-19; Ker 106.20    <sup>n</sup> 1.27 NKP 18.22; 20.13; 1Ko 6.9

namana huaraig, a puh ge ahikisina pah ra banotong guat. <sup>29</sup>Gisina ka uoun tar mamang niguata uasalik, a niuangoul uasa, ra pe, tera gono tar bureher inet, ra uelsae, ra geh, ra tung poustasir gisiaméh, ra ueluelkoi, ra boh, ra marang guata uasa tasir gisiaméh, karo uoto ngur. <sup>30</sup>Kara uasusa tar hangasir gisiaméh, kare tokouasais tang God, kara mahang kul, kara uakaiais, kara uasalais tesir uiantieh, kara namana tar giniaméhemper niguatar sa, kara mahang longoro toso tinas. <sup>31</sup>Gisin ahik mes ninamana uaia, kara hik pah ra uakeluk tar uelhote, kara hik pah ra ualasira me niguata uaia ue ra ueldolomo tasir gisiaméh. <sup>32</sup>Gisina ka atempe re kula pe na ualatut God pare, o tamata gera uangoul tar niuangouluninanine ra mat, bo gisin ahik ka guata dedempe tar niguataninanine, kara uatakai meniangua tas mais ka guata tar niguatanin.

### God e bang kedanga tasir tamata uakap

**2** <sup>1</sup>Temaeit, inggaene ahik tun me puh maene ro bang kedanga tasir gisiaméh, ge tang hingia per puh ro bang kedanga tolaia tasir gisiaméh, ingga o uamoko tagu ponolaia. Ter hauon, inggaeit ro uoto bang kedang o uoto guata pono tar hararinin. <sup>2</sup>Doh inggeig i ate pare, na nikedanga God re guata pe e guata uapono toro mana tasisit ra uoto guata tar hararinin. <sup>3</sup>O namana tang God e turung bang kedang, kare tohotola tasisit ka guata pe tar hararinin, kare bangang duk totomua ko guata pono pe tar hararinin? <sup>4</sup>Ahik paho bang paroko ke hamhamas peono totomua? Ue ahik paho namana uaduh tar puhono? Ahik paho banga tar niguata uaiaene ke guataiono ke heir pe totomua tar binaka tar uiuiria tenang niguata uasa, kara hik pah ke uolong heir me niduh totomua? Na niguata uaiaono ter tengkana tar uoum keip totomua maro uiuiria.

<sup>5</sup>Bo teeit torongo tuktukara, doh rongo mahang uiuir tenang niguata uasa, ingga misianangua pah ko uamoko toto tar niduh uleik re laig totoum tar marein re kotpokoso na nimaliana God, doh na nikedanga ger kodkodoh. <sup>6</sup>Ge God pe e turung heir hahaua tasir tamata uakap e lampein tar haua ka guatain. <sup>7</sup>Tasisit ra tur uanon, kara guata dede tar niguata uaia, inggon e turung heir tar niuangoulung tar mamang binakalik, teeit ra sir pe tar kale tar uiniator, kara ueltad, kara niuangoul gere moko dede tar mamang binakalik. <sup>8</sup>Bo inggono puk e turung nimalianantiehe tun, kare turung heir tar niduh uleik tun tasisitir kupal geke de toro man, kara uakeluk tar niguata uasa. <sup>9</sup>A niduh, kara uelmahing uleik e turung kotpokoso tasir tamata geke guata tar niguata

° 2.1 Mat 7.1-2; Jon 8.7    º 2.4 Epe 1.7; 2Pi 3.15    º 2.6 Ker 62.12; NU 24.12; Mat 16.27; 2Ko 5.10    † 2.8 2Te 1.8



uasa, e uakekene keip tasir Ju song o gime uan. <sup>10</sup>Bo tasisit ka guata tar niguata uaia ra turung heiris tar uiniator, a ueltad, karo hiarou, uakekene keip tasir Ju song o gime uan. <sup>11</sup>Ge God pe e bang kedanga tasir tamata uakapa tar siokonor hagar.

<sup>12</sup>Ge God pe e turung mamantouo tasir gime uan ge ahik menas ualatut ger nang God, doh ra guata tar niguata uasa, gitiempe ahik pesina menas ualatut ger nang God. Kare turung kedanga tasir Ju geta guata tar niguata uasa gitiempe nas ualatut pesin ger nang God. <sup>13</sup>Ge ahik peono paha ineteng longoro puk tar ualatut re uakodkodoho tar tamata tang God. Bo gisis puk ka longor, kara uakeluk tera turung uakalaharais o tamatar kodkodoho tar matana God. <sup>14</sup>O mana noman geta uakeluk per tamatang gime uan teres ninamana katongo, kara guata tar niguata uaia, gitiempe ahik pesina menas ualatut ger nang God, gisin ra uoto ualampirame pare, ra ate, ge i lolono pe teres ninamanasin e uahirempe tar huar uia, kara huar sa. <sup>15</sup>Temaene nas niguata sin e ualasila tena ualatut God a nibolo uahiuala tasisin, doh res ninamana uaiasin e uahirempe tasisin, hape ra guata pe, dohe hire pono tasisina tar ineter uia ue a ineter sa. <sup>16</sup>A puhuninanine e turung kotpokoso to tar marein re turung bang kedanga keip God tang Iesu Kristo tenas niuangoulur tamata uakap geka guata uaouoig. Tero hire teil pe ro uelhire rone ku meneio.

### **O Ju ra namana tar ualatut e matotong poul tasisin**

<sup>17</sup>Inggo nag puhung mene tamiuoumur Juene rung uahinga to tar ualatut e poul tamiuoum. Karung uairanasium re aha to pelasium tang God. <sup>18</sup>O mana noman, inggoum mung ate a hua re malahirigion, karung iate tar huar uia, kara huar sa, teeit ka ualasila pesium tena ualatuton. <sup>19</sup>Inggoum kung ate tunusium pare, mung matotong uoum keip tasir kut, doh inggoum a luh tasisit tar kitup. <sup>20</sup>Karung namana pare, mung matotong ualatut tasisit ahik mes niate, karung ualasila tasir keketik tar niguatar nang God. Teeit inggoum a namiuir ualatut, temaeit mung namanangua pare, mung iate tar mamang inetelik, kara mamang inetelik rung menegioum a man.

<sup>21</sup>O mana tun, inggoum mung ualasila tasir gisimeher tamat, bo maeit ahikioum pah mung ualasila katongosium? Inggoum mung hire tasir tamat, "O sa ro uenau." Bo inggoum ahik pah mung uenau? <sup>22</sup>Karung hire "O sa ro ur." Bo inggoum ahik pah mung guata tar puhon? Karung kula pare, "Dehen tung lotu tasir god bohoboh." Bo inggoum ae maene ahik pah mung ueltada tar ineter dedeil? <sup>23</sup>Inggoum mung uakai tunusium rung ate pe tena ualatut God, bo inggoum puk ahik tun pah

---

° 2.14 Apo 10.35   ' 2.20 2Ti 3.5   " 2.21 Mat 23.3-4

mung ueltada tang God, rung katego pe tar ualatut. <sup>24</sup>Temaeit pe no uelhire God o kula pare tar puhon, “Teoum ter tengkana maene ro kula no uelhire God pare, ‘Ka mene uasainir hangana God i uantinanina tasir gime uan.’”

### A niguatang poko tar tukunun

<sup>25</sup>Nas niguatar Ju tar poko tar tukunun e uia to puk geta uakelukigir ualatut. Bo getung katego inggoum tar ualatut, inggoum mung uangoul sira tasir tamatasitier tabung pok, gitiemper nipoko peoum. <sup>26</sup>“Doh geta uakelukur gime uan tena ualatut God, God e turung banga keip tasisina tar siokonor hagar tasir Ju gesir nipok. <sup>27</sup>Temaeit o gime uan gera uakeluk tar ualatut, karo nitabung pok ra turung uakouh tamiuoumur Ju, teeit a nibolo uahiua pe nami ualatut, karo nipok, bo inggoum puk o tamatang katego tar ualatut.

<sup>28</sup>Ge a tamata pe ahik paha Ju teeit a nipoho tur pe toro matina tasir Ju ue teeit ka poko pein. <sup>29</sup><sup>x</sup>Ahik, a Ju tun te giner kodkodoho na niuangoul tar matana God. Doha niguatang pok ahik pahe lain tar poko tar tukunun, bo a uapalihinar niuangoul i lolono tar koloun gere uakotpokosoin na labena Dedeil God tar tamat ahik pah tar ualatut. Kara hikir tamata pah ra uatakai tatanon, bo God puk tere uatakai tatanon.

### God a uauaman

**3** <sup>1</sup>Ia re uia tolar tamata geta peng Ju? Ue ia re uia tolar puhonener poko tar tukunun? <sup>2</sup>A bureher hagarir uia. Uakikilangan no uelhire God o niheir uamatotoha tasir Ju.

<sup>3</sup>Hape ge paka tagorong bohor gisiameher Ju tono uelhire God? A puhon e uamaluana tang God tar katego tena ualapagah? <sup>4</sup>Ahik nomanampe! O tamata uakapa tun ra uoto boh, bo God me pahener uauaman. Misiana ro kula teil pe ro uelhire gero nibolo pare, “Inggon e turung uakodkodoho toin tar haua re menein, kare turung pehuara geta tohotolain tar uelhehek.”

<sup>5</sup>Bo gete uakalahara nagi niguata uasaeig re uamana pe God, hapengua ri kula peeig? A saono tang God tar nimalian, kare heir me niduh tagigeig? A puhung dangataninanine e la tur puk tena ninamanar tamat. <sup>6</sup>Ahik noman! Ge paka hik God paha guata uelmatout, hapengua re bang kedanga peono tar koto uakap? <sup>7</sup>Me tamat e banotong kula pare, “Gete rogo bohoboho ko uakalahara tono uauamana God, karo uauleik tena uiniatoron, ae maene ra heirio tar niduh a tamatang guata pe tar niguata uasa?” <sup>8</sup>Gete ko uakeluka tar ninamanon, auiangua ponompe tar kula pare, “Geti guata pukulaeig tar niguata uasa ter uiantieh.” O tamata

∨ 2.24 Ais 52.5 ∨ 2.26 Gal 5.6 × 2.29 Ual 30.6; Kol 2.11 ∨ 3.4 Ker 51.4

gera kula tar puhung kulononinanine ra turung uakouhis. Bo o gisiamehe puk ra uelsigal, kara tohotola pare, ter puhono ru ualasiraio.

### Ahik me tang siokor tamatar kodkodoh

<sup>9</sup>Hapenguaon? Inggeimir Ju tesir tamata uaiantiehe? Ahik nomanampe! Geking ualasira manasa pe inggeim tasir tamata uakapa pare, o Ju ue o gime uan ra siokor uangoulumpe i kukulebanga tena nitampopokohor niguata uasa. <sup>10</sup>Misiana ro kula pe ro uelhire gero nibolo pare,

- “Ahik me tamatar kodkodoh,  
ahik tun me tatang siokolik!”
- <sup>11</sup> Ahik me tamatar naman manate  
ue e sir tang God.
- <sup>12</sup> O tamata uakapa ka siokor turung tar mud tang God,  
kara siokor guata tar niguata uasa,  
ahik me tang sioko ke guata uaia,  
ahik tun me tatang siokolik.” *Ker 14.1-3; 53.1-3*
- <sup>13</sup> “Nas menesin a sa tun kenar benge nar keu,  
kara uauasisin a bohoboh.”
- “A baranganar soi ke sosoro tur tar bilisisin.” *Ker 5.9; 140.3*
- <sup>14</sup> “A uauasisina ke uoun tar soul,  
kara mamangusul tar tang giameh.” *Ker 10.7*
- <sup>15</sup> “Gisin o karkarianalik tar tung pous,  
<sup>16</sup> Ia ra lasina ra mamantouo tenas niuangoulur gisiameh,  
<sup>17</sup> kara tele tar niguatang uelhiarou.” *Aisaia 59.7*
- <sup>18</sup> “Ahik tun me nisokoro tang God kaeig tasisin.” *Ker 36.1*

<sup>19</sup>I ranahia tar mamang inetelikinin, inggeig ki banga manasa pare, a ualatut e lain tas mais ka heiris, ge a tengkana pe maeit ka heiriono mara uakelukusin, kara hik pah ra heir menas puh ka guata uasa pe, doh tar keipila tar koto uakapa tena uelheheke God. <sup>20</sup>“Ge ahik pe me tamata ra banotong uakodkodoho tolain tar matana God ke uakeluk pe tar haua re kulainir ualatut. Ge gitie pe geti ate uaia uaineig tena ualatut God, e la kalahara uainintiehengua ponor puhono tagigeig pare, ahik pe pahi uakeluk tananin.

### Hape ri kotpokoso peeig pare, o tamata kodkodoho tar matana God

<sup>21</sup>Bo gine puk daan, God ke ualasira tar giamehe siokor hagar tar kodkodoho tola tatanon, ahik pah tar uakelukunar ualatut, bo tar hagar

<sup>2</sup> 3.9 Roum 1.18–2.24; 3.23    <sup>a</sup> 3.20 Ker 143.2; Roum 7.7; Gal 2.16

ko hire teilin ro bolobolo sioununtieh tang Moses mesir propet tar ualapagah. <sup>22</sup><sup>b</sup>Inggeig ka uakodkodoho keipisieig tang God tar binaka ri tagorong mana tang Iesu Kristo tar kale liu teregi niguata uasaeig. Doh inggeig uakapa ra siokor uelkarus turusieig tar siokonor hagarion, hingiamper tamata ue a haua ke kalekinalein, ge o tamata uakapa pe o siokono tar matana God.

<sup>23</sup>Ge o tamata uakapa pe ka siokor guata tar niguata uasa, ahik me tang sioko ke kale tar uinatoror nang God. <sup>24</sup><sup>c</sup>Doh gitie daan tena hamhamas God geke heirheir pukin inggeig ki kotpokos o kodkodoh. Inggono ke guata keip tar puhono tang Iesu Kristo geke luaka liu teregi niguata uasaeig. <sup>25</sup>God ke heir tatanon a uahung, maeit toro deuatinginon, inggon e turung kotpokos ter tamatang kuse luar teres niguata uasar tamata ra tagorong mana pe tatanon. Inggono ke guata pare, tar ualasira hape ke guata uelmatout pe. God ke guata uaelmatout tun, kara kodkodohonor binak ahik pe pah ke heir me niduh tasisit ka guata tar niguat uasa sioun. <sup>26</sup>Doh inggono ke uaelmatout tun, kare guata uakodkodoho tun tar binakalanine binaka ke uatur uakalahara tasir tamatang guata tar niguata uasa tar kotpokos o kodkodoho tar matanon, teeit ra tagorong mana pesin tang Iesu.

<sup>27</sup>Temaeit mai re matotong uasalain? Ahik baka poluk me tamat, a puhonene ke kapa uakapangua. Kara hik pah ke kapa to tar hagarion uakeluk tar ualatut, bo ke kapa to tar hagarion tagorong man. <sup>28</sup>Teeit ki kula manasa pe inggeig pare, ki kodkodoho to kompe tar matana God tar hagarion tagorong man, kara hik pah tar hagarion uakeluk tar ualatut.

<sup>29</sup><sup>d</sup>Inggoum mung namana pare, God nas God pukur Ju? Ahikiono pah nas God tagur gime uan? Ahik! Inggono nas God ponor gime uan! <sup>30</sup><sup>e</sup>A tang siokon sioun pukur God, kara siokon sioun pukur lelung haijala tatanon. Inggono e uakodkodoho tola tasir tamata tatan tar siokon siounumper hagar, tar hagarion tagorong man. Gitiempe geto Jusin ue o gime uan. <sup>31</sup><sup>f</sup>Geti uainete uleikeig tar nitagorong man, a ualatut e iinetelikingua? Ahik tun! A nitagorong man e guata tagigeig tar kotpokoso sira re malauehir per ualatut.

### Na nitagorong mana Abraham

**4** <sup>1</sup>Hapengua ri kula pe inggeig tar puhpuh ke ueluparamaig Abraham tamageig gere kulkula teil tar puhung dangatene pare, a tamata ra uelkarus toin i lolono tar nitagorong man? <sup>2</sup>Geto mana roono ke guata Abraham tar niguata uai, doh ter niguatonene ke guata tatanon a tamata kodkodoh, auia inggono pake uairana tar hangan. Bo tar

<sup>b</sup> 3.22 Gal 2.16    <sup>c</sup> 3.24 Roum 5.1    <sup>d</sup> 3.29 Roum 10.12    <sup>e</sup> 3.30 Ual 6.4; Gal 3.20  
<sup>f</sup> 3.31 Mat 5.17

matana puk God, inggon ahik pah ke kodkodoho to tar hagarion. <sup>3</sup>Ge no bolobolo God pe gero dedeil o kula pare. “Abraham ke tagorong mana tang God, temaeit God ke kila tatanon a tamata kodkodoh.”

<sup>4</sup>A tamata gere tuha tar kalekinale, kara bulauain, gitier bulauanon ahik pah ra kulain a ineteng uauah, ahik, bo a ineteng heir hahaua puk ka tuha peinir kalekinale. <sup>5</sup>Bor tamata ra kilain a tamata kodkodoh, teeit tena nitagorong man, kara hik pah tar kalekinale uaia ke tuhain, bo e tagorong mana tang God, teeit re ate pe pare God tere banotong uamoko tasir tamata uasa ra kodkodoho keip tatanon. Ter nitagorong manonene, maeit re kila God tatanon a tamata kodkodoh.

<sup>6</sup>Debit ger toia teke mene tar puhene ke hire sir pe tena niuahar tamata geke kilain God a kodkodoho tar matanon, gitiempe ahik peono pah ke uakeluk uaia tena ualatut God.

<sup>7</sup>“O tamata geka kuse luaraig nas niguata uasa  
kara malabourig,  
gisina tera banotong uah.

<sup>8</sup>A tamata ge ahikir Tamata Nomana pahe toho tagu tola tatanono  
tena niguata uasa  
inggono tere banotong uah.”

*Ker 32.1-2*

<sup>9</sup>A niuahonene a nas pukusisir nipoko ue a nas ponosisir tabung pok? Ingeig ki kula pare, “Abraham ke tagorong mana tang God, temaeit God ke kila tatanon a tamatar kodkodoh”. <sup>10</sup>Mangiha ke kotpokosor puhonene? I muduhiaono ka poko baka peiono ue i uoumuhia? Ahik dehono pahi muduhia bo i uoumuhia!

<sup>11</sup><sup>h</sup>Doh Abraham ka pokoin, a hagarion uanasa tatanono ke tagorong mana pe tar binaka halana haraha ta pokoin. Temaeit inggono ter tamasir tamata uakap a gera tagorong man, bo ahik puk paho nipoko mare kila pono God tagigeig o tamata kodkodoho pon. <sup>12</sup>Doh inggon a tamas ponositir nipok, ahik paho nipoko puk bo ka uelhir sira tar nitagorong mana geke uakelukin Abraham i uoumuhia tar binaka halan ta pokoin.

### Na ualapagah God ra kale keipin tar nitagorong man

<sup>13</sup><sup>i</sup>Inggon ahik pah tar hagarion uakeluk tar ualatut ke kale to Abraham meso bunguna tar ualapagah a tar kale tar koto uakap. Ahik! Abraham ke tagorong mana tang God, kare kilangua God tatanon a tamata kodkodoh. <sup>14</sup><sup>j</sup>Gete gisit puk ka uakeluk tar ualatut ra kale tar mamang inetelik ke ualapagahaig God, a niguatang tagorong mana ra

<sup>g</sup> 4.3 Uak 15.6; Gal 3.6    <sup>h</sup> 4.11 Uak 17.10-11    <sup>i</sup> 4.13 Uak 17.4-6; 22.17-18; Gal 3.29  
<sup>j</sup> 4.14 Gal 3.18

uainetelik pukunguain, doh na ualapagaha God a tabo tengkanangua. <sup>15</sup><sup>k</sup>Ge a ualutut pe, e heir hagar tena nimaliana God, bo iar butur ahik me ualutut, ahikingua pono me katego tar ualutut.

<sup>16</sup><sup>l</sup>A mamang inetelik e haono to tar nitagorong mana tang God, teeit tena nimalaelhirono menia tena niueldolomo tagigeig, maeit a ualapagaha ra turung kale nomananguain ro bunguna uakapa Abraham, ahik pah gisit puk nas ualutut, bo gisis uakapa pono ka tagorong mana sira tun tang Abraham ge tamagigeig. <sup>17</sup><sup>m</sup>O mana tun temaeit ro kula teil no bolobolo God gero dedeil pare, “Inggo ku guata totomua a tamasir burehe ro uan.” A puhono ke kotpokos, teeit Abraham ke tagorong mana tang God gere uoto heir tar nitua tasisit ka mat, kare uelhire tar inetelanit i uoum ahik pah ke mokome sioun.

<sup>18</sup><sup>n</sup>Abraham e tele hape re turung guata pe God tar ualapagaha ke guatain, bo ke tagorong mana teil tun puk tar inetenin e turung kotpokos. Maeit ke kotpokoson a tamasir burehe ro uan. A siokono ro hire teil pe no uelhire God pare, “O bungumua ra turung burehentiehe sira tun tasir pitopit.” <sup>19</sup><sup>o</sup>Abraham ahik pah ke punga sikoro baka na nitagorong man, gitiempe no hangaulur hangaul manasa pe no krismas, doh ke mahohontiehe tun manasa pon, doh Sara ke pipigogolik tun manasa pon, kara bouh tur sioun.

<sup>20</sup>Bo ahik pukumpe Abraham pah ke tagorong boho sikor na nitagorong manono ke popokoho uain kaleh, doh tar puhonene, ke heiringuaono tar uinatoro tang God. <sup>21</sup>Inggono ke tagorong manantiehe tun pare, God e banotong guata tar huar inete ke ualapagahain. <sup>22</sup><sup>p</sup>Doh teeit tena nitagorong manon, God ke kilangua tatanon a tamatar kodkodoh.

<sup>23</sup>A puhene, “Ka kilain a tamatar kodkodoh.” Ahik pah ka boloin tatanono puk, <sup>24</sup>bo tagigeig pon. Inggeig ki tagorong mana tang God geke uatentur tapokis tang Iesu nagi Tamata Nomaneig, inggon e turung namana to teregi nitagorong maneig, kare kila tagigeig o tamata kodkodoh. <sup>25</sup><sup>q</sup>Inggono ka tung pousin, teeit teregi niguata uasaeig, kara uatentur tapokisin mare kila tagigeig o tamatar kodkodoh.

### O hiarouo kara niuah

**5** <sup>1</sup>Gine ka uakodkodoho to manasa pesieig tar nitagorong man tar matana God, temaeit o moko keipingua ro hiarou tagigieg menia tang God tang Iesu Kristo ge nagi Tamata Nomaneig. <sup>2</sup>Teeit teregi nitagorong maneig, temaeit Kristo ke keip tagigeig tar butur ri kale tar nimalaelhir menia keip tar nipoul gine ri uangoulieig. Kari uahauaha ri

<sup>k</sup> 4.15 Roum 3.20; 5.13 <sup>l</sup> 4.16 Gal 3.7 <sup>m</sup> 4.17 Uak 17.5 <sup>n</sup> 4.18 Uak 15.5

<sup>o</sup> 4.19 Uak 17.17 <sup>p</sup> 4.22 Uak 15.6 <sup>q</sup> 4.25 Ais 53.4-5

tagorong mana teil pe tena uiniatoro God. <sup>3</sup>Ahik pah tar puh pukuon, bo i uahauaha pono teregi niduh ri ate teil pe pare, a niduh auia tagigeig e poul tagigeig tar kale tar niate hape ri huata bolongur pe tananin.

<sup>4</sup>Gete ki huata bolongureig tar niduh e uakotpokosonguar puhono pare, God e uaha tagigeig, teeit ri tur uapopokoho pe tar niduh re kotpokoso tagigeig, doh inggeig i tagorong mana teil tang God tar poul, kare uelkarus tagigeig. <sup>5</sup>A nitagorong mana ri uangoul keipisieig ahik pahe uahagouo uasa tagigeig, teeit God ke uakalahara tun manasa tena nimalauelhir tagigeig tar Iabena Dedeil geke heirin.

<sup>6</sup>Teeit tar binaka tun ka uamatotoin, binak ahikieig meigi nitampopokoho tar poul katongosieig. Kristo ke mata ueleheir tagigeigir tamatang guata tar niguata uasa. <sup>7</sup>Ge ahik pe mo bureher tamata ra marang mata ueleheir tar tamata ger kodkodoh, bo ge paka tamata uaiantiehe tun pukuon, song here kaein me tamata re mata ueleheir tatanon. <sup>8</sup>Bo God ke marang ualasira uakalahara puk terener nimalauelhir tagigeig tar puhonene tar binaka ki guateig tar niguata uasa, Kristo ke mata ueleheir tagigeig.

<sup>9</sup>Gitie ka uakodkodoho keip manasa pesieig toro deuatingina Iesu, inggon e turung uelkarus turungua ponompe tagigeig tena nimaliana God. <sup>10</sup>Ge tar binaka pe ri uelmatan haraheig tatanon, inggeig ka ueliu tapokisisieig tang God tono mater tunon. Doh gine daan inggeig ki kotpokos o bung kaluanon, temaeit inggeig ki banotong ate uaia tunungua pare, tena nitua Iesu inggeig ra turung uelkarus turusieig tena nimaliana God. <sup>11</sup>Ahik pah tar puh pukene, bo i uahauhantiehe tun pono tang God tang Iesu Kristo tenagi Tamata Nomaneig geke uakotpokoso tagigeig o bung kaluana God!

#### **Adam ke uakotpokoso toro mat bo Iesu ke uakotpokoso tar nitua**

<sup>12</sup>Temaeit a niguata uasa ke kotpokoso tur tar tang siokon siounur tamat, nu Adam, doh na niguata uasaono ke uakotpokoso toro mat. Temaeit ko la uakapangua ro mata tasir tamata uakap, teeit ka siokor guata pesina tar niguata uasa. <sup>13</sup>Tar binaka halanar ualatut ta heirig, a niguata uasa e moko manasampeane tar kot. Bo tar butur puk ahik me ualatut, God ahik pahe uakouh me tamat. <sup>14</sup>Bo tena binaka Adam e tuka tena binaka Moses, o tamata uakapa ka mat, teeit Adam ke katego tena ualatoho God, gitiempe ahik pesina pah ka guata uasa sira tang Adam. Adam misiana paha niparoko tar tang sioko gere turung lame.<sup>w</sup> <sup>15</sup>Bo rasina puk ahik paha toking siokon. Teeit a inete uaia ke heirheir pukin

<sup>r</sup> 5.3 Jas 1.2-3; 1Pi 1.5-7    <sup>s</sup> 5.8 Jon 3.16; 1Jo 4.10    <sup>t</sup> 5.9 Roum 1.18; 2.5; Epe 2.3-5

<sup>u</sup> 5.12 Uak 3.6; Roum 6.23    <sup>v</sup> 5.13 Roum 4.15    <sup>w</sup> 5.14 Pare, na niguat Adam ke la guata uasa tasir tamata uakap, bo i muduhia na niguata Iesu ke la guata uaia tasir tamata uakap

God ahik paha siokono keip tar puhung siokon siounur niguata uasa ke guatain Adam. O mana noman, o bureher tamata ka mat, teeit ke guata uasa per tang siok, bo na nimalaelhir puk God a i rana uain. Temaeit a inete uaia ke heirheir pukin God e la tasir bureher tamat tena niguata uaiar tang siok, nu Iesu Kristo. <sup>16</sup>Inggo u hire uapoul poluk tar haua ke kotpokos, bo tar giamehe pukur hagar. A inete uaia ke heirin God ahik paha siokono tar niguata ke guatain Adam. Ge tar puhung siokon sioun per niguata uasa ke guatain Adam ke guata tang God e ualakouh tasir tamata uakap, bo inggeig puk nagi inete uaia a niheirheir puk ke uahue pe God e kila tagigeig o kodkodoh, gitiempe ki kouh peig tar bureher niguata uasa. <sup>17</sup>Tena niguata uasa pukur tang siokor tamatonene Adam, ke guata tagigeig ki uangoul i kukulebanga tena nitampopokoho ro mat, bo tasisit puk geka kale tena nimalaelhir God menia tar nipoul, doh na inete uaia ger kodkodoh, ra turung uangoulung uah ka touahiu peinir niguata uasa, doho mat tar tang siokor tamat Iesu Kristo.

<sup>18</sup> <sup>x</sup>Temaeit, tena niguata uasansioun pukur tang siokor tamatonene Adam, God ke uakouhungua tagigeigir tamata uakap, te misiana kompe tena niguata kodkodohor tang siokor tamat Kristo, God ke kila tasir tamata gera tagorong mana tang Kristo o tamata kodkodoh, kare heir tar timuhur nitua tasisin. <sup>19</sup> <sup>y</sup>Te misiana kompe tono mahang longoror tang siok, nu Adam, maene o burehe ka kotpokos o tamatang guata tar niguata uasa. Temaeit puk pono tono longlongoror tang siok, nu Kristo, o burehe ra turung uakodkodohonguais.

<sup>20</sup> A ualatut ka heirig mare bureher niguata uasa. Bo ia puk re mokor burehentiehe niguata uasa, na nimalaelhir God e la burehentiehe uain. <sup>21</sup> <sup>z</sup>Sioun o tamata uakap ke uoum keipis na nitampopokohor niguata uasa, kare uamata tasisin, bo gine puk daan, na hamhamasa God ke uoum keip kaleh, maeit ke uatur keip tagigeig tang God pare, o kodkodoh, kare uoum keip tagigeig tar niuangoulung tar mamang binakalik tang Iesu Kristo nagi Tamata Nomaneig.

### Na nitampopokoho ro mat ka uatakoutin

**6** <sup>1</sup>Pake hape ri kulangua pe inggeig? Paki guata ualataunumpela tar niguata uasa mare heir uaburehe God tena nimalaelhir keip tena nipoul? <sup>2</sup>Ahik dehon! Inggeig ki mata tar niguata uasa, hape maeit ri la uangoul keip baka polukueig tar puhuon? <sup>3</sup> <sup>a</sup>Ue ahik pah mung iate pare, inggeig uakapene ka uahuhu tagusieig tang Iesu Kristo, ka uahuhu tagusieig tono maton? Te misiana kompe ki mata tagu pe inggeig tatanono tar korose. <sup>4</sup> <sup>b</sup>Temaeit tar uahuhu, inggeig ka keu tagusieig tatanon, kari uangoul teil tono maton, maeit misiana ka uatentur

<sup>x</sup> 5.18 1Ko 15.22   <sup>y</sup> 5.19 Ais 53.11   <sup>z</sup> 5.21 Roum 6.23   <sup>a</sup> 6.3 Gal 3.27   <sup>b</sup> 6.4 Kol 2.12



tapokis keip pein Iesu Kristo toro mat tar balbalana na nitampopokoho tamageig, inggeig i banotongua pon i uangoul tar timuhur niuangoul.

### Inggeig i turung tua tagu tang Iesu Kristo

<sup>5</sup>Gitie ki uangoul tagu pe inggeig pare, tono maton, inggeig i turung uiliodout keipingua pono tatanono ke tua tapokis pe. <sup>6</sup><sup>c</sup>Ahik pahi malabobour tenagi niuangoul ger pensiouun ka uakuse keipeig tang Kristo tar korose, maeit a tukunugigeigininer uoun tar niguata uasa ahik baka poluk mena nitampopokoho tar kale uahiua tagigeig mara hiekeig pahi uangoul baka poluk o tamatang kalkalekinale puk tar niguata uasa. <sup>7</sup>Ge a tamata pe geke mat ka luaka liu tur manasain tena nikaueker niguata uasa. <sup>8</sup>Gitie ki mata keip pe inggeig tang Kristo, inggeig i tagorong mana pare, i turung uiliodout keip tatanono tena timuhur niuangoul. <sup>9</sup>Inggeig i ate pare, Kristo ke tentur tapokis tur toro mat, kara hik pahe turung mata uapoul poluk. O mat ahik baka poluk mena nitampopokoho tar kale uahiua tatanon. <sup>10</sup>O mata ke mateion, ke mata uasiokon siounumpe tar siokor binaka tar niguata uasa, bo daana puk a niuangoul re uangouluion, e uangoul tar balbalana na nitampopokoho God. <sup>11</sup><sup>d</sup>Temaeit inggoum mung banga katongonguasioum pare, kung mata tar niguata uasa, karung banotong tua to tang God tang Iesu Kristo.

<sup>12</sup><sup>e</sup>Temaeit ahikioum pah mung uamaluana tar niguata uasa e uoum keip tenami niuangouloum, karung longoro tar nimalara uasang tar tukunun. <sup>13</sup><sup>f</sup>Ahik pah mung uamaluana tar maharanar tukunumi a ineteng guata keip tar niguata uasa, bo mung heirisioum tang God misiana tasisitie ka kale tapokis turis toro mat, kara tua. Karung heir tar maharanar tukunumi tang God pare, a ineteng guata keip tar ineter kodkodoh. <sup>14</sup><sup>g</sup>Ahik pah mung uamaluana tar niguata uasa nami tamatang uoum keipioum marung longoro inggoum tar haua re malaragion, ge inggoum pe ahik pah mung uangoul i kukulebanga tar ualatut, bo i kukulebanga tena nimalaelhir God, doh na niueldolom.

### Inggeig tesir tamatang kalkalekinale puk tar niguatar kodkodoh

<sup>15</sup>Hape ri kulangua pe inggeig? I guata tar niguata uasa, teeit ahik pe pahi uangoul i kukulebanga tar ualatut, bo i kukulebanga tena nimalaelhir God, doh na niueldolom? Ahik dehon! <sup>16</sup><sup>h</sup>O mana tun, inggoum mung iate pare, tar binaka rung tanganasioum tar longoro me tamat, inggoum no tamatang kalkalekinale pukur tamatene kung longoroin, gitiempe geta niguata uasaon gere uakotpokoso toro mat ue o longlongoro gero uakotpokoso tamiuoum o kodkodoho tola tang

<sup>c</sup> 6.6 Gal 5.24    <sup>d</sup> 6.11 2Ko 5.15; Gal 2.19    <sup>e</sup> 6.12 Uak 4.7    <sup>f</sup> 6.13 Roum 12.1

<sup>g</sup> 6.14 1Jo 3.6    <sup>h</sup> 6.16 Jon 8.34; 2Pi 2.19

God. <sup>17</sup>Bo a uataakai puk e la tang God, teeit sioun, gitiempe kung uangoul sira peoum o tamatang kalkalekinale puk tar niguata uasa, bo gine daan inggoum kung malarantiehe tun karung uakeluk uelhir tun puk tena niualasira Kristo ka heirig tamiuoum. <sup>18</sup>Inggoum ka luaka liu tur manasasioum tar niguata uasa, karung kotpokos o tamatang kalkalekinale puk tar niguatar kodkodoh.

<sup>19</sup>Inngo u uamisiana tola tena niuangoulur tamata pare, tar tamatang kalkalekinale puk, doh na tamata uleik, teeit a parakukuh peono tamiuoum tar naman manate tar ineter nang God. Ter siokono sira kompe kung uoto heir peoum tar maharanar tukunumi e kotpokos a tamatang kalkalekinale puk tar tamatang uoum keip uasa, karung guata toro ur, doha mamang niguata uasalik, karung la kotpokosongua o tamata uasantiehe tun. Temaeit gine daan inggoum mung heir sira manasa tar maharanar tukunumi e kotpokos o tamatang kalkalekinale puk tar tamata uleik ger uia mare uakotpokosono tamiuoum tar pilese tar niuangoulur kodkodoho marung kotpokosoum o dedeil.

<sup>20</sup>Tar binaka kung kalkalekinale pukuoum tar niguata uasa, inggoum ka luaka liu turusioum tena nikaueker kodkodoh. <sup>21</sup>Tar binakon, a hauanguar bulauana kung kale turugioum tar inete rung matala keipig daan? A inetenin e uakotpokoso puk toro mat. <sup>22</sup>Bo gine puk daan, ka luaka liu manasa pesioum tar niguata uasa, karung kotpokos o tamatang kalkalekinale puk tang God, a bulauana rung kalegioum e poul tamiuoum tar uangoul tar niuangoulur dedeil, kare uakotpokoso tar niuangoulung tar mamang binakalik. <sup>23</sup><sup>i</sup>Ge a bulauana per niguata uasa tero mat, bo na inete uaia God geke heirheir pukin ter niuangoulung tar mamang binakalik tang Iesu Kristo nagi Tamata Nomaneig.

### Inggeig ahik baka poluk pahi uangoul teil tena nikaueker ualatut

**7** <sup>1</sup>Ro bung uanotoug, inggo u menmene tasisit ra ate tar ualatut, Inggoum mung ate pare, a ualatut e la kaueke uatuka puk tar tamat e tuka gete mat. <sup>2</sup>Misiana pare, a ualatut e kula pare, gete ler kuah, inggon e uangoul keip tena bulout e tuka gete maton, bo gete mata puk na buloutuon, inggono ka kale liu manasain tena ualatut ro le. <sup>3</sup>Doh tar binaka re tua haraha na buloutuon, kare le polukuono me tang giameher bulout, inggono ke guatangua toro ur. Bo gete mata puk na buloutuon song ka luaka liuono tar ualatut, kara hik pahe guata toro ur tar binaka re le poluk.

<sup>4</sup><sup>j</sup>Temaeit ro bung uanotoug, inggoum kung mata pono tena nitampopokohor ualatut tar binaka kung mata tagu tang Kristo tar korose, doh gine daan inggoum mung uiliodout keip tar tamata geke tua

<sup>i</sup> 6.23 Roum 5.12,15    <sup>j</sup> 7.4 Roum 6.2,11

tapokis tur toro mat marung banotong uakotpokosoum me kukuanana uaia ter niguata uaianinar nang God. <sup>5</sup>Sioun tar binaka ki uangouleig i kukulebanga tar nimalara uasang tar tukunugig, a ualatut ke uatentur tar nimalara uasaninanine gere uakotpokoso tar nimalara uasang tar tukunun gere keip pokoso toro mat. <sup>6</sup><sup>k</sup>Bo gine puk daan, inggeig ka luaka liu tur manasasieig tar ualatut ki mata keip pe tang Kristo, doh ahik baka poluk pah ra uoho uanonosieig i lolono tena nitampopopkohor ualatut. Gine daan inggeig i kalekinale tun tang God, kara hik pahi uakeluk tar ualatut, bo tar uakeluk tar timuhur hagarir nanar Iabena Dedeil.

### Na ualatut God ke ualasira tagigeig a hauar niguata uasa

<sup>7</sup><sup>l</sup>Temaait hape ri kulangua pe inggeig? A ualatut a sa? Ahik dehon! A ualatut ahik paha niguata uasa, bor ualatut teke ualasira totoguo tenag niguata uasa tar haua ku guata uasain. Ge paka hikir ualatut pahe kula pare, “Ingga ahik paho gehe tena ineter tang giameh.” Inggo paka hik pahu ate tenag niguata uasanine tar geh ue tar nimalara uasanine re ouiouane i lolono totoug. <sup>8</sup>Bo ter ualatutonene ke uatentur tar niguata uasa, kare uakotpokoso tar bureher kahakahar geh totoguo. Ge paka hik me ualatut, a niguata uasa paka hik mena nitampopokoh.

<sup>9</sup>Sioun inggo ku uangoul uaia tar binaka ru tele tar haua re uahingaigir ualatut, bo tar binaka puk ku me ateo tananin, song ke me kaleior nimalara uasang tar tukunug tar gehe tenas ineter gisiamer tamat, temaait rogo mahang longoro tena ualatut God ko aha liuingua totoguo tang God. <sup>10</sup>Ku tupara tun tar ualatutunitie pake tere ueliu totoguo tar lelung tar nitua, bo ke ueliu puk totoguo toro mat. <sup>11</sup><sup>m</sup>Ge a niguata uasa pe ke uelour keip tar ualatut totoguo, kare uiliatung pous puk totoguo. <sup>12</sup><sup>n</sup>Temaait a ualatut a dedeil, doha ualatoh a dedeil, kara kodkodoh, kara uia.

<sup>13</sup>Doh hapenguaon? Ter ualatut ger uia ke aha liu totoguo tang God? Ahik dehon! Bor ualatut ke guata mara bang parokoinir niguata uasa pare, a sa tun. A niguata uasa ke aha liu tur totoguo tang God tena ualatut ger uia, teeit ku mahang longoro peo tananin. Temaait ki ate uaia tur tunungua inggeig tar ualatut pare, a santiehe tun.

<sup>14</sup>Inggeig i ate pare, na Iabena Dedeil God teke heir tar ualatutunin, bo inggo a tamata puk pon ahik paha dedeil, ka uabuluaiao a tamatang kalkalekinale puk tar niguata uasa. <sup>15</sup><sup>o</sup>Inggo ahik uadeilimpe pahu naman manate katongoio. Ge u marang guata tun pe tar ineter kodkodoh, bo ahik puk pahu guat. U guata kalehe puk tar inetenitie ahik pahu marang guataig, a inete ru degio. <sup>16</sup>Doh getu guata inggo tar inet ahik

<sup>k</sup> 7.6 Roum 6.4; 8.2 <sup>l</sup> 7.7 KT 20.17; Ual 5.21 <sup>m</sup> 7.11 Uak 3.13 <sup>n</sup> 7.12 1Ti 1.8  
<sup>o</sup> 7.15 Gal 5.17

pah ku marang guatain inggo misianangua pah ku uauia tar ualatut. <sup>17</sup>Bo ahik puk pah inggo ru guata tar puhon, inggono ter niguata uasaene i lolono totoguo re guata totoguo tar guata tar niguata uasananine.

<sup>18</sup>Ingggo u ate ahik me inete uaia kaeig totoug i lolono tar tukunug. Hingiamper hagar ru marang kauiurio, ahik nomanampe pahu matotong guata katongoio tar guata tar niguatar kodkodoh. U malar, bo ahik puk pahu matot. <sup>19</sup>Getu marang guato tar inete uaia, ahikimpe pahu guat. Doh getu uedango ahik pahu guata tar niguata uasa, u guata belehu kompela. <sup>20</sup>Bo getu guata inggo tar haua ru dein matu guat, inggon ahik pah teo tun ru guata tar puhon, bo e guatainir nimalara uasang tar tukunuguonine re moko totoguo.

<sup>21</sup>Temaait ku tuparangua inggo tar puhon a man. Misiana getu marang guata inggo tar ineter uia, a nimalara uasang tar tukunuguonine e toto uoum tar kotpokos, kare guata totoguo tar guata tar niguata uasa. <sup>22</sup>Ge i lolono pe totoguo u malauelhir tun tena ualatut God. <sup>23</sup>Bo a giamehe pukur nitampopokoho gine re kalekinale i lolono totoguo, dohe uiliatung keip tereg ninamano. A nitampopokohon e uoumuoum teil tar uiliatung, kare guata totoguo a tamatang kalkalekinale puk tar nimalara uasang tar tukunug i lolono totoug. <sup>24</sup>Kuano, a sa nag niuangoul, karu uaueldolomolikio. Mai re turung luaka liu tur totoguo tenag niuangoul uasa mara hik God pahe aha liu totoguo tatan? <sup>25</sup>Uatakai tang God a tengkana te Iesu Kristo nagi Tamata Nomaneig tere turung luaka liu totoguo!

Temaetingua totoguo katong, doh tereg ninamana uakap u kalkalekinale pukungua tena ualatut God, bo i lolono tar nimalara uasang tar tukunuguo, inggo a tamatang kalkalekinale puk tena nitampopokohor niguata uasa.

### A niuangoul tar Iabena Dedeil

**8** <sup>1</sup>Temaene tar puh ku mene manasaio, ahik baka poluk me puh ra uakouhin tasisit ra uangoul tokaha keip tang Iesu Kristo. <sup>2</sup>Ge tang Kristo pe na nitampopokohor Iaben geke heir tagigeig tar timuhur nitua, ke luaka liu tur pe tagigeig tena nitampopokohor niguata uasa doho mat. <sup>3</sup>Ge a haua pe ke matoto leuein na ualatut Moses tar guat, teeit a maluana per tukunugigeigener uoun tar niguata uasa, God ke matotong guat. Inggono ke heiriha tar tuna katongo tar me kotpokos a tamata sira tagigeigener uoto guata tar niguata uasa, bo inggono puk a nimalara uasang tar tukunun ahik pah ke matotong uoum keip tatanon. God ke heiriha tatanono tar me kale uelmahing teregi niguata uasaieg. Temaetingua ke tohotola, kare heir uelmahing tatanono misiana

<sup>p</sup> 7.23 Gal 5.17; 1Pi 2.11    <sup>q</sup> 7.25 1Ko 15.57

pah teke guata tar niguata uasa. <sup>4</sup>Maetit a hauar ineter kodkodoho re uahingaguir ualatut ra banotong tupara toig tagigeigene ahik pah i uangoul teil tar niuangoulung sioun, bo tena niuangoulur Iaben.

<sup>5</sup>Ge gisis pe ra uakeluk tar nimalara uasang tar tukunun, ra uamoko teres ninamana tar haua re malaraguir tukunus. Bo gisis puk ra uakeluk tena nimalarar Iabena Dedeil, ra uamoko teres ninamana tar haua re malarainir Iabena Dedeil. <sup>6</sup>Gisis re moko res ninamana tar inete re malaraguir tukunus e uoum keip res ninamana tatas ra haiala toro mat. Bo gisis ra uamoko teres ninaman tar Iabena Dedeil, ra uoum keipis tar nitua, karo hiarou. <sup>7</sup>Ge gisis pe ra uamoko teres ninamana tar inete re malaraguir tukunus ra uelmatan tang God. Ge ginina pe ahik tun pahe uakeluk tena ualatut God, ahik tunumpe. <sup>8</sup>Gisis re uoum keipisir nimalara uasang tar tukunun, ahik tunumpe pah ra banotong uauaha tang God.

<sup>9</sup>Bo inggoum puk ahik tagu pahe uoum keipir nimalara uasang tar tukunun, inggoum e uoum keip teilir Iabena Dedeil, ge pake uangoul teil tamiuoum. Doh gete me tamata tabo teilin na Iabena Kristo, inggon ahik paha nang Kristo. <sup>10</sup>Bo gete uangoul teil Kristo tamiuoum, a iabeimiuoum e tua, teeit God ke kula tamiuoum o kodkodoh, gitiempe gete turung mater tukunumioum tar niguata uasa. <sup>11</sup>Gete kare uangoul teilir Iabeneit ke uatentur tapokis tang Iesu tamiuoum, git ke uatentur tapokis tur tang Iesu toro mat, e turung heir pono me nitua tar tukunumioumunit re turung mat tar Iabenait re uangoul teil tamiuoum.

<sup>12</sup>Temaene ro bung uanotoug, a kalekinaleon a nagigeig tar uangoul uakeluk sira re malauelhir pe na Iabena God, kara hik pah tena nimalara uasar tukunun. <sup>13</sup>Ge gitie pe getung uangouloum tar nimalara uasang tar tukunun, inggoum mung turung mat, bo getung uakenua keipoum tena nipoulur Iabena Dedeil tar uakeluk tar niguata uasa, kung guata keipig tar tukunumiou, inggoum mung tua. <sup>14</sup>Teeit gisis pe re uoum keipis na Iabena God o bung tuna God.

<sup>15</sup>Ge a Iabena Dedeil pe geke heirin God tamiuoum, ahik pah ke guata tamiuoum o tamatang kalkalekinale puk, kare uasokoro tamiuoum, bo ke ueluarur tamiuoum o bung tuna tun God. Doh tena nitampopokohor Iaben temaeitingua ri kiring taroeig tang God pare “Tamoug! Kuhur tamoug.” <sup>16</sup>Na Iabena Dedeil God e ueltumana keip tar iabegigeig tar hire toro mana pare, inggeig o bung tuna tun God. <sup>17</sup>Doh gitie o bung tuna God peeig, inggeig tesir tamatang kale uahiuangua tene inete uaia God, uakikilangan, inggeig no tamatang kale uahiua God, dohi siokor kale uahiua tokahanguampe mes Kristo geti huata uelkout tena niduhon mari la uangoul tagu tena uinatoron.

<sup>r</sup> 8.4 Gal 5.16,25   <sup>s</sup> 8.9 1Ko 3.16; 12.3   <sup>t</sup> 8.10 Gal 2.20   <sup>u</sup> 8.13 Gal 6.8; Kol 3.5

<sup>v</sup> 8.15 Mak 14.36; 2Ti 1.7   <sup>w</sup> 8.15-17 Gal 4.5-7; UGO 21.7   <sup>x</sup> 8.16 2Ko 1.22

### A uinatoro uleik e turung kotpokos

<sup>18</sup>Inggo u ate teil tar niduhung daan, ahik paha inete uleik tagigeig tar huatala tar banga keip tar uiniatoreit ra turung ualasirain tagigeig. <sup>19</sup>A mamang inetelik ke touoig God e uahuahing, kare malarantiehe tun tar bang, kare tagorong mana teil tun tar mareineit i uoum re turung ualasira God mais tun ro bung tun. <sup>20</sup><sup>y</sup>Ge a mamang inetelik pe ke touoig God ke binirig, dohe turung mat, kare beng. Ahik pah tena nimalara katong, bo tena nimalara God geke tengkana tananin, maeit ke guata pare, a mamang inetelik ke touoigion e tagorong mana teil pare, <sup>21</sup>e turung luaka turig tena binir God. Song re heir tananina tar siokonor uiniatoror nas ro bung tuna God, kara uangoul o niluaka liu ahik pah ra turung mat, kara beng.

<sup>22</sup>Ge a mamang inetelik pe ke touoig God ke homalame tar uelmahing misianar uelmahingina ro poh e me tukene daan. <sup>23</sup><sup>z</sup>Ahikiono paha inete pukunine ke touoig God ke hagouo uelmahing, bo inggeig ponene geki kale tena Iabena God ter uakikilanganar ineter uia ke heiriono tagigeig ki hagouo uelmahingane i lolon, ri uanguangoul pe tar binaka re hire tauete God tagigeig pare, o bung tun, kare uatimuh tar tukunugigeig misiana ke ualapagaha pe. <sup>24</sup>Ge tar binaka pe ke uelkarus God tagigeig, inggeig ki tagorong mana teil tang God e turung guata tar ineteninanine tagigeig. Teeit inggeig i ate pare, gete ke kale manasa me tamata tar haua ke uanguangoulin, ahik baka poluk pahe uanguangoul tar inetonene. <sup>25</sup>Bo geti tagorong mana teileig tar haua halan ti kalein, inggeig i uanguangoul hamas, kari iate tun pare, a ineton e turung kotpokosompe.

<sup>26</sup>Ter siokono komper hagar, a Iabena Dedeil e poul pono tagigeig, teeit inggeig o maluan, kari tele paka haua tun ri lotu uatuhin, bo ter Iabena Dedeilonene re dangata tutup ueleheir keip tagigeig tang God tar nikiring, kara nihagouonitie ahik pah ra matotong ualasira taueteig. <sup>27</sup><sup>a</sup>Doh God gere banga hihir tun tar kolougigeig e ate tena ninamanar Iabena Dedeil, teeit a Iabena Dedeil e dangata tutup ueleheir toso tamata God, dohe uakeluk to tun tena nimalaron. <sup>28</sup><sup>b</sup>Doh inggeig i ate pare, tar mamang inetelik God e uakotpokoso tananin auia tasir tamata gera malauehir tatanon geke uamatotois pare, o nanon, teeit gisin o to tengkana tatanon. <sup>29</sup><sup>c</sup>Ge gisit pe re atensiounis God ra turung tagorong man, inggono ke uamatoto tanik tasisina ra turung misiana sira tar tunon. Tar hagarion ter tunono tere uamunangua toso bung tahinasisir burehe toso bung tuna tun God. <sup>30</sup>Temaeit gisis ke kila uamatotois God, inggono ke kila tasisin, doh tasisinasis ke kila sioun, inggono ke

<sup>y</sup> 8.20 Uak 3.17-19    <sup>z</sup> 8.23 2Ko 5.2-4    <sup>a</sup> 8.27 Ker 139.1    <sup>b</sup> 8.28 Epe 1.11

<sup>c</sup> 8.29 Kol 1.18; Hib 1.6

uakodkodoho tola tasir tamata tatan, kare uelpakaha keip tasisina tena uniator.

**Ahik uadeil me inete re banotong tur tane  
tena nimalaelhir God tagigeig**

<sup>31</sup> <sup>d</sup>Me haua baka poluk ri banotong kulalasiieg tar inetenanane? Gitie re poul pe God tagigeig, kaein me tamata re banotong tur tane tang God tar poul tagigeig? <sup>32</sup>O mana noman, God ahik pah ke ut tar tun tar me kale uelmahing, bo ke heir tatanono tagigeig. Doh gete pagiaron, inggon e turung heirheir pukungua pono tar mamang inetelik tagigeig.

<sup>33</sup> <sup>e</sup>Mai re banotong tohotola tasir tamata geke uamatotois God? Ahik me tamat, ge God pe ke kuse luara manasa tenas niguata uasa no tamat. <sup>34</sup>Bo maiono re turung uakouh tagigeig? Iesu Kristo? Ge inggono pe teke mata uelhir tagigeig, kare tua tapokis poluk, dohe tabila tar butur re mokor uleikir ueltad i uahuhut tang God, kare dangata tutup ueleheir taro tagigeig tang God tar poul tagigeig.

<sup>35</sup>Hingiar puh re banotong pakaha liu tur tagigeig tena nimalaelhir Kristo? A niduh gera heirigir tamata tagigeig? Ue gete parakukur niuangoul ue geta guata uasa mo tamata tagigeig o matatang tagorong mana pe? Ue gete ualor gog, karo palapal, karo tabotana tun tar mamang inetelik? Ue geti uangoul tar niuangoulur ualakanuh ue a ualasokor? Ue geta uiliatung pousieig? <sup>36</sup>Misiana re kula teil per puh pare, tono uelhire God,

“Teeit nongo tamata pea tamiueim,  
O mat o ueltupar a ualataunungua tamiueim,  
inggeim ra banga siranguasieim tasir sipsipisitier  
nikaleuatoro tanik tar tung pous.”

*Ker 44.22*

<sup>37</sup>A mamang inetelikininanane e pokoso noman, bo inggeig puk i turung pehuar, teeit Kristo, gere malaelhir tagigeig, gine manasa re poul tagigeig.

<sup>38-39</sup>Ge inggo pe u ate tun pare, ahik uadeil me inete re matotong pakaha liu tur tagigeig tena nimalaelhir God tar haua ke guatain Iesu Kristo nagi Tamata Nomaneig tagigeig, o mat ue a nitua, o anggelou ue o liouana uasa, a inete re pokosene daan ue e pokosolaieit i uoum ue me inete tampopokoh, ue me ineteng ran ue tar laur ger tungun ue me inete baka poluk ke touoin God.

**Poul e ueldolomo tasir Israel ahik pe pah ra tagorong mana tang Iesu**

**9** <sup>1</sup>Inggo u mene toro man, inggo e matoto teilio tang Kristo, kara hik pahu boh. Reg ninamanonine re uoum keip teiligir Iabena

<sup>d</sup> 8.31 Ker 118.6    <sup>e</sup> 8.33 Ais 50.8-9

Dedeil e uahire tar haua ku hiregio a man. <sup>2</sup>Inggo reg niueldolomo uleik tun dohe uelmahing dedeinir koloug, <sup>3</sup>f<sup>3</sup>tosnogo tamat, o tahigulik tar poul tasisin. Inggo u maha ge pakene inggo katongono re birio tang God tenas buturusin, kare aha liu tur totoguo tang Kristo. <sup>4</sup>God ke uamatoto tun tasisisir Israel o bung tuna tun, kare ualasira tena uinatoro tasisin, ke uelhote keip tasisin, kare heir tasisina tena ualatut. Doh gisina teka ualasira tunis tar niguatang lotu, doh ka kale tar inete ke ualapagahaig God, <sup>5</sup>Doh gisina teso bungus tun ro bung tubugigeig nu Abraham, Aisak, doh Jekop, doh Kristo ke tamata pe tere la tur tasisinar Ju. Inggono tenas Godor mamang inetelik, ra uatakaiaian tar mamang binakalik! O man.

<sup>6</sup>Inggo ahik pahu kula pare, no uelhire God ko boh, doh ahik pah ko uakeluk tar ualapagah. Ge ahik per Israel uakapa pah no tamata uakapa God. <sup>7</sup>hAhik pah teeit o bunguna pe Abrahmasin, maeit ra siokor kilaisisin o bung tuna Abraham. Bo o gisimehe tun puk tasisina teke bangais God o bung tuna Abraham. No uelhire God o kula pare, “Teso bunguna Aisakansiouun kompe teru turung ahasio pare, o bungumua.” <sup>8</sup>iPare dehon, God ahik pahe aha toso bunguna uakapa Abraham gera la tur tar tukununono pare, o bung tun. Bo e banga tasir keketikin tar ualapagah gere ahais pare, o bung tuna Abraham. <sup>9</sup>jGe na ualapagah pe God e kula pare, “Tar binaka tun ka uamatotoin, inggo u turung tapokisime, doh Sara e turung poho tar keketik bulout.”

<sup>10</sup>Ahik pah tar puh pukuon, ge a toking tuna pe Rebeka kura uatamana pono tar tang siok Aisak, a tamagigeig. <sup>11-12</sup>kBo mare to tengkana tun na nikedang God tar tang siokor keketik bulout geke tar kiloin a nan, God ke hire tang tinas rasina pare, “A uoum e turung kalekinale tar uakeluk.” Inggono ke kula tar puhene tar binaka halana rasina ta pohois, doh halan tura guata me inete uaia ue me inete uasa. God ke guata pare, tar ualasira to hape ke kedanga pe tar tang siokor keketik ke namanain, kara hik pah tar haua kura guatain rasin. <sup>13</sup>lMisiana ro kula pe no buk God gero dedeil pare, “Inggo u malaelhir tang Jekop, bo Iso u deio.”

<sup>14</sup>I kulangua inggeig tang God ahik paha kodkodoh? Ahik dehon! <sup>15</sup>Ge inggono pe ke kula pare tang Moses,

“Inggo u turung ueldolomo tang mai ru ueldolomoin,  
karu guata uaia tang mai ru marang guata uaiaian.”

*Kale Tapokis 33.19*

<sup>16</sup>mAhik per puhono pahe haono to tena nimalarar tamat ue na nitampopokohor tamat, bo tena niueldolomo God.

<sup>f</sup> 9.3 KT 32.32    <sup>g</sup> 9.4 KT 4.22; NKP 1–10; Ker 147.19; Roum 15.8; Hib 9.5    <sup>h</sup> 9.7 Uak 21.12  
<sup>i</sup> 9.8 Gal 4.23    <sup>j</sup> 9.9 Uak 18.14    <sup>k</sup> 9.11-12 Uak 25.23    <sup>l</sup> 9.13 Mal 1.2-3    <sup>m</sup> 9.16 Epe 2.8



17<sup>n</sup>Ge no buk God pe gero dedeil o hire teil pare tang Pero, “Inggo teku uatoia totomua tar kaukeke tasir tamat, doha tengkana teene, maru ualasira into inggo teregu nitampopokoho totomua, doh mara ueliateinir hangouguo tar koto uakap.” 18<sup>n</sup>Temaeit God e ueldolomo tang mai re marang ueldolomoin, kare uamahang uiuir tang mai re marang uamahang uiuirin.

### Na nimaliana God doh na niueldolom

19<sup>n</sup>Bo me kalamiuoum puk e turung kula pare, “Gete pagiaron, hapengua mare tupara God me niguata uasa tar tamat? Mai re banot e tur tane tena nimalara God.”

20<sup>n</sup>Kaloug, bo ingga te mai maro banotong perere tang God? E banotong kular inetener nituha tar tamatang tuha pare, “Ae maene ko tuha ingga totoguo pare?” 21<sup>n</sup>A tamatang tuha tar nouh e banotong kale me kot, doh tena nimalara katongon inggon e banotong tuha me torikir nouh, a siok a matmata hamas tun e lain tar kalekinale uaia, doha giameh e lain tar kalekinale ueltebeir. Ue ahikir puhonene paha kodkodoh? 22<sup>n</sup>Doha mana nomanar puh ke guatain God, ke marang ualasira pe tena nimalian, kare marang uaate tena nitampopokoh. Bo inggono puk ke hamhamas tun, kare uatut tena nimaliana tasisit geka uanimaliana tatanon gesir nikaleuatoro tar mamantou. 23<sup>n</sup>Doh ke marang uakalahara pono tena uinatoro uleik geka ding tauetein tagigeigene ka ueldolomosieig, inggeigene ke kaleuatorosiona tar kale tena uinatoron. 24<sup>n</sup>Ge inggeig peene ke kila sioun, ahik paho peng Ju puk bo o gime uan pon.

25<sup>n</sup>Misiana ke kula peono tang Hosea ger propet,

“Inggo u turung kila tasisit ahik pah nogo tamato pare,  
nogo tamat,  
karu turung kula pare, u malaelhir tasisit  
ahik pah ku malaelhiris sioun.”

*Hosea 2.23*

26<sup>n</sup>Doh,

“E turung pokoso tonguar puhono tar butur tun ka kula toisisina  
pare,  
‘Inggoum ahik pah nogo tamato,’ ra turung kilasioum, ‘O bung  
tuna God ger tua.’”

*Hosea 1.10*

27<sup>n</sup>Bo tasir tamatang Israel puk, Aisaia ger propet ke kula ualeik tar puhene tasisin,

“O mana noman, o tamatang Israel o burehentiehe sira tar iononiko  
i teh,

<sup>n</sup> 9.17 KT 9.16    <sup>o</sup> 9.20 Ais 29.16; 45.9    <sup>p</sup> 9.21 Jer 18.6

bo o papagalik puk ra turung uelkarusis.

<sup>28</sup> Ge a Tamata Nomana pe e turung mamantouo tasir tamatang tar koto uakapa misiana ke kula pe, e uakapa tun hape re malara pe,  
kare guata ualahur tun.”

*Aisaia 10.22-23*

<sup>29</sup> Misiana ke kula uoum pe Aisaia pare.

“Ge pakene ahikir Tamata Nomana ger Tampopokoh pah ke hiliu baka mo gisiamehe tamiueim, inggeim paka binbinopo hihir tununguampesieim misiana tasir Sodom doho Gomora.”

*Aisaia 1.9*

### O Israel ka tagorong boh

<sup>30</sup> Hape ri kulangua pe inggeig? O gime uan pe ahik pah ka pentampopokoho tar kotpokos o kodkodoh, bo ka kale puk tar puhon, o kodkodoho tar nitagorong man, <sup>31</sup> bosir Israel teka pentampopokoho tun tar uakeluk tar ualatut tar kotpokos o kodkodoh, bo ahik puk pah ka pehuar. <sup>32</sup> <sup>9</sup>Ae maeit ahikisina pah ka matot? Teeit gisina ahik pah ka haono to tar nitagorong man, bo ka haono to tar haua ra guataig. Teeit gisina ka pentampopokoho puk tar uakeluk tar ualatut, ahik pah tar nitagorong man, bo ka tagorong mana puk tar inete uaia ka marang guataig. Temaeit gisina ke tukais toro “palaua ueltuk.” <sup>33</sup> Misiana ro kula teil pe no uelhire God pare,

“Bang, inggo ku uamoko toro palau i Saion gero ueltuka tasir tamat,  
karo uapunga tasisin.

Doh mai re tagorong mana tatanon ahik pah ra turung uamatalain.”

*Aisaia 28.16*

**10** <sup>1</sup> Ro bung uanotoug, reg nimalaro, doh nag lotuo tang God e la tasir Israel, te mare uelkarus God tasisin. <sup>2</sup> Ge inggo pe u iate tun, karu mene tauete tar haua ku bangain tasisin, gisina ka pentampopokoho tun tar uauaha tang God, bo res ninamana pukusin ahik pahe tengkana keip tar ninamanar kodkodoh. <sup>3</sup> Gisina pe ahik pah ka bang paroko tena niguata God re uakodkodoho to pela tatan tasir tamat, bo ra marang guata katongois pare, hape ra kotpokoso pe o tamata kodkodoh. Doh ka de mata uakeluk sir tena hagar God. <sup>4</sup> Ge Kristo pe ke uatuka keip manasa tar ualatut, maeit o tamata uakapa gera tagorong mana ra uakodkodoho tolais tang God.

<sup>9</sup> 9.32 Ais 8.14    <sup>r</sup> 9.33 1Pi 2.6

**God e uelkarus tasir tamata uakap gera tagorong  
mana tang Iesu Kristo ter Tamata Noman**

<sup>5</sup>Ge Moses pe ke bolo uahiua hape re kodkodoho to pelar tamata tang God re uakeluk pe tar ualatut. “Mai re uakeluk tena ualatohor ualatut, inggon e turung tua.” <sup>6</sup>‘Bor inete tun ro kula teilin no buk God gero dedeil tar kodkodoho tola tang God tar nitagorong man e kula pare, “Ahik paho kula pare, ‘Mai re turung la kai taro i Heuen tar keip uahiua tang Kristo, <sup>7</sup>ue mai re turung lako tar uaneko i kot? Tar uatentur tapokis tur tang Kristo toro mat.’” <sup>8</sup>A haua re kula teiliono te pare, “No uelhire God o uahuhut totomua, o moko tar bilimua, doh tar koloum.”

**O uelhire rone tero uelhirenar nitagorong  
man gering uelhire tauete teilieim**

<sup>9</sup>Geto hire luaka ingga tang Iesu ter Tamata Noman, karo tagorong mana tang God ke uatentur tapokis tur tatanono toro mat, ingga ra turung uelkarusia. <sup>10</sup>Ge tar nitagorong mana per eigigeig tera turung uakodkodoho tonguasieig tang God, teeit ki uelhire luaka pe inggeig, temaeit ka uelkarusieig. <sup>11</sup>“No uelhire God o kula pare, “Mai re tagorong mana tatanon ahik pah ra turung uamatalain.” <sup>12</sup>“Ge ahik pe me inete re uagiamehe sioko tasir Ju doho gime uan. Iesu Kristo ger Tamata Noman ter tang sioko komper tamata uleik tagigeig uakap, kare guata uaia uakapa tun tasisit ra kila tatanon. <sup>13</sup>“No uelhire God o kula pare, “Ge o tamata uakapa pe gera kila tar hanganar Tamata Noman tera turung uelkarusis.”

<sup>14</sup>Bo hapengua puk ra kila pesina tar tamata ge ahik pah ka tagorong manain? Doh hape mara tagorong manasina tar tamata ge ahik pah ka longlongoro koutin? Doh hape mara longorosin geta hik me tamata ke la hire tasisin? <sup>15</sup>“Doh hape ra hire tauete pein ro Uelhire Uaia geta hik me tamata ka ualatuain tar la keip toro uelhire? Misianar nibolo uahiua peono tono bolobolo God gero dedeil pare, “A mataia tunumper kekeisisit ka keipime toro Uelhire Uaia.”

<sup>16</sup>Bo ahik pukuono paho tamata uakapa tun ka uahue tar kale toro Uelhire Uaia. Ge Aisaia pe ke kula pare, “Tamata Noman, mai ke kale, kare tagorong mana tonomio uelhireim?” <sup>17</sup>Temaeit a nitagorong man e la tur tar longoro toro uelhire, doho uelhire ra longoro toin geta uelhire tauetein no uelhire Kristo. <sup>18</sup>Bo inggo puk u dangat, “Ahikisina pah ka longor?” O mana tun, gisina ka longor ge no bolobolo pe God gero dedeil o kula pare,

<sup>s</sup> 10.5 NKP 18.5    <sup>t</sup> 10.6-9 Ual 30.12-14    <sup>u</sup> 10.11 Ais 28.16    <sup>v</sup> 10.12 Apo 15.9

<sup>w</sup> 10.13 Jol 2.32    <sup>x</sup> 10.15 Ais 52.7    <sup>y</sup> 10.16 Ais 53.1    <sup>z</sup> 10.18 Ker 19.4

“A alialinginar uauasisina ke la tauete tar koto uakap,  
doh nas uelhiresina ke haijala uatuka tar surunar kot.” *Ker 19.4*  
19 Inngo u dangata poluk, “Ahikir tamatang Israel pah ka naman  
manate?” Uakikilangan Moses ke kula pare,

“Inngo u turung guata tamiuoum mung gehe tasir gime uan  
gerung namanasioum o tatamatalik puk, o man,  
inggo u turung uanimaliana tamiuoum tasir gime uan  
gerung namanasioum o tuktukar,” *Ualatut 32.21*

20 Aisaia ke kula uapopokoho tun pare,

“Inngo ka tuparaisisit  
ahik pah ka sir totoguo,  
inggo ku uakalahara katongoio tasisit  
ahik pah ka kila totoguo.” *Aisaia 65.1*

21 Bo tasir Israel, inggono ke kula pare,

“Tar udeil per marein ku hue tauete inggo tar toking limoug  
maru kilauatoro tasir tamatar mahang longor, karo mahang kul.”  
*Aisaia 65.2*

### Na niueldolomo God tasir Israel

**11** <sup>1</sup>“Temaeit u dangatanguao pare, ke de manasa God tosno tamata?  
Ahik dehon! Ge inggo katongo pe ter peng Israel toso bunguna  
Abraham, doh tar toto tamatar nang Benjamin.

<sup>2</sup>God ahik pah ke de tosno tamata geke uamatoto tanikais. Ahik  
paho namana huara ro kula teil pe no uelhire God pare, tang Elaija  
tar binaka ke menmene tang God tasir Israel? Inngono ke kula pare,  
<sup>3</sup><sup>b</sup>“Tamata Noman nongo propetia ka uiliatung pousis, doh nongo olta  
ka mamantouoin teo puk manasampe teene, ru uangoul, doh inggo ra  
marang uiliatung pous ponoio.”

<sup>4</sup>“Doh hape ke kula pe God tatanon?”

“Innga ahik pah me pahem ro uangoul, inggo ku kale liu baka tasir  
gisiameher tamat, a mouitir taosein ge ahik pah ka hatup uahiuwa tagu  
tang Baal ger god bohoboh.”

<sup>5</sup>Temaeit gine daana pon o pagangua puk ka uamatotois tena  
hamhamas God. <sup>6</sup><sup>d</sup>Inngono ke namana tasisin, kare uamatoto to

<sup>a</sup> 11.1 1Sa 12.22; Ker 94.14; Pil 3.5    <sup>b</sup> 11.3 1To 19.10,14    <sup>c</sup> 11.4 1To 19.18

<sup>d</sup> 11.6 Gal 3.18

tena hamhamas, ahik pah ke namana to tar kalekinale ka tuhainisin. Ge pakene ke namana to inggono tar kalekinale ka tuhaigisin, na hamhamasono paka hik paha man.

<sup>7</sup>Doh hapenguaon? O tamatang Israel ahik pah ka peng tupara baka tar haua ka sirsirin. Ter toto tamatalik puk manasampeoneit ke uamatotois God teka tupar, bosir bureheis ka uatukarais. <sup>8</sup>Misianana ro kula pe no uelhire God pare,

“God ke uahohouon duk tasisin.

Doh tar binakampemenine, inggono ke uakut tar matasisina mara hik pah ra bang, kare uakamelong tasisina mara hik pah ra longor huar.”

*Ualatut 29.4; Aisaia 29.10*

<sup>9</sup>Debit ke mene tar siokonor inete tar binaka ke kula pare,

“Uiuir toroso nieinisin o kotpokos a hangang biana toro lol mara pungasin, kara heiris tar niduh ka uahingaig.

<sup>10</sup>Uakut tar matasisin! Kara hik paho uamaluana ra bangasin.

Karo uakokolo keip tasisina teres niduh tar mamang binakalik.”

*Ker 69.22-23*

<sup>11</sup><sup>e</sup>U dangatangua polukuo pare, e de dede manasa God tosno tamata? Ahik dehon! Gitie ka guata pesina tar niguata uasa, a niguatang uelkarus ke langua tasir gime uan tar guata tasir Ju mara gehe tasisin, kara malarangua pake tera uelkarusis. <sup>12</sup>Bo ge teka pouluntiehe tolaisir tamatang gime uan uakapa tenas niguata uasar Israel ka punga pe, a koto uakapa ra turung guata uaia tununguais geta siokor uiliodout tapokisimer Ju uakap.

<sup>13</sup>Inggo u menmene tamiuoumur gime uan. Gitier aposoul peo ke ualatie peha God totoguo tamiuoumur tamatang gime uan, inggo u hire tasir tamata pare, inggon a kalekinale uleik tun ka heirin totoguo.

<sup>14</sup>Inggo heru banotong guata tosnogo tamata katong ra geh maru banotong uelkarus mo gisiamehe tasisin. <sup>15</sup>Teeit tar binaka ke turung tar mud God tasir Ju, doha tengkana te gine, inggono ke keip uahuhut tunungua me tasir gime tamatang tar koto uakap tar tapokis, kara matakaluana tatanon. Hapengua re turung baka per binakon? Gete malar e turung misianangua tasir tamatasitie ka tua tapokis tur toro mat.

<sup>16</sup>Geto dedeil ro mahar uakikilangana ro mahar bereit ka heirin tang God pare, a uahung, o udeilina ro bereit o dedeilingua ponompe, doh

---

<sup>e</sup> 11.11 Apo 13.46

geto dedeil ro uana ro douk ra heirin tang God, a ranan a dedeilingua ponompe.

<sup>17</sup>fDoh ge teka katego liuig me giniameher ranana ro oliv, doh inggar peng gime uan, a ranana ro oliv roke, ka uahua tumana keipia toro oliv ahik pah roke, inggoumur gime uan misianangua toro oliv roke, bo gine daan inggoum kung uelpakaha keip tar inete ke ualapagahaig God tasir Israel. <sup>18</sup>Temaet inggoum ahik pah mung uakaiasium ka uatur palih pesioum tar ranan ger nikatego liu. Geto guata ingga, namnamana hamas tunungua tar puhene, “O uana ro douk ahik pah tero tur i rana tar ranan, bor ranan e tur uapon i rana toro uana ro douk.”

<sup>19</sup>Ingga hero kulangua pare, “A rananin ka katego liuig tar heir menag hagario.” <sup>20</sup>O mana noman, bo ginina puk ka katego liuig, teeit ka tagorong boho pe, bo ingga o tur keip tar nitagorong man. Dehen to uairanaia, bo pako sokor. <sup>21</sup>Ge pakene ahik God pah ke uatur uoum tar ranana tun, paka hik ponompe pahe uatur pono totomua.

<sup>22</sup>gInggoum mung namnamana hamas tena niguata uaia God, doh na nimaliana tasisit ka de tatanon, bo e guata uaia puk tamiuoumur gime uan, bo inggoum puk mung uaha dede tena niguata uaiaon. Geta hikioum pah mung tagorong mana dede tatanon, inggon e turung katego liu pono tamiuoum. <sup>23</sup>Doh geta tagorong mana tapokisir Ju gisina ra turung uahua tumana tapokisilais, ge God pe e banotong uahua tapokis polukula tasisin.

<sup>24</sup>Gete malara God e kale tur tamiuoum ngohinar ranan, kare uahua tumanala totomua toro douk uaia, a malagir tununguampe tang God tar uatur tapokisila toro douk tosno tamata geke katego liu bakais.

### Na niueldolomo God a nasir tamata uakap

<sup>25</sup>Ro bung uanotoug, inggo u malara mung ateoum toro mana tang God mara hikoum pah mung uairana katongosioum, karung kula pare, God e malaelhirintiehe uain tamiueim tasir Ju. O mana noman, God ke uatukar tasir gisiameher Ju. Bo a puh pukuono e lain e tuka tar binaka rung lameoumur gime uan tang Kristo, inggoumeit rung malar.

<sup>26</sup>Tar hagarionene, o Israel uakapa tun ra turung uelkarusis, misianar nibolo uahiua peono tono uelhire God pare,

“A tamatang uelkarus e turung la tur i Saion.

Inggon e turung uapalih tasir bureher tamatar nang Jekop tar uakenua tenas niguata uasa.

<sup>27</sup>Doh gine tenag uelhote keipio tasisin a

tar binaka ru kale liu tenas niguata uasasin.”

*Jeramaia 31.33-34*

<sup>f</sup> 11.17 Epe 2.11-19    <sup>g</sup> 11.22 Jon 15.2,4

<sup>28</sup>Misiana ro kula teil pe ro Uelhire Uaia, gisin o uelmatan ter eimuar nibang, bo ke uamatoto pe God tasisin, temaene inggon e poul tamiuoumur gime uan, bo inggon e malaelhir haraha tasisinar Ju, teeit tar haua ke ualapagahaiono toso bung tubusisin. <sup>29</sup>Ge a inete uaia pe ke heirig God, doh na ualapagah a mahang uapalih. <sup>30</sup>Te misiana kompe kung mahang longoro peoumur gime uan tang God sioun, doh daana kung kale manasoum tar niueldolom ter tengkana rosio mahang longorosin. <sup>31</sup>Temaet gisinar Ju ka mahang longoro manasa ponene daan, doh ra turung kale tagungua pono tar niueldolom, teeit ke ueldolomo peono tamiuoumur gime uan. <sup>32</sup>Ge God pe ke uataongo tasir tamata uakapa tun, teeit torosio mahang longorosin mare ueldolomono tasisina uakapa tun.

<sup>33</sup><sup>h</sup>Na nimalaelhir God a uleik menia keip tena niueldolom! Inggon a naman manate tun tar haua ke guataig. Inggeig ahik pahi banotong naman manate tar inete ke guatagion, na nimalaelhirion e matoto leue tagigeig tar naman manate, doh inggeig i matoto leue tar naman manate hape re guata peon. <sup>34</sup><sup>i</sup>“Mai re iate tena ninamanar Tamata Noman ue mai ke ualasira tatanon?” <sup>35</sup><sup>j</sup>“Ue mai ke heir uakikilanga tatanono me inet mare heir hahauon?” <sup>36</sup><sup>k</sup>Ge a mamang inetelik pe ke touogion, doha mamang inetelik ke kotpokoso tur tatanon, doha nanon, a uatakai e la tang God tar mamang binakalik. O mana tun.

### Inggeig i heir tar tukunugig a uahung tang God

**12** <sup>1</sup><sup>l</sup>Temaene ru mene uapopokoho inggo tamiuoum ro bung uanoutog i lolono tena nimalaelhir God menia keip tena niueldolomo tar heir tar tukunumi uahungener tua, kara dedeil, dohe uauaha tang God tar uangoulung kalekinale tang God ter lotu tunuonene pakung heirigioum pare, a uahung. <sup>2</sup>Kara hik baka poluk pah mung uakeluk tar niguatang gane tar kot, bo mung uamaluana tena Iabena Dedeil God e uapalih teremi ninamanoum marung pilesoum me timuhur niuangoul. Tar hagarion, inggoum mung turung iate tar haua re malarai God tamiuoum tar kuat, a ineter uia, kara inete re uauaha tatanon.

### Hape paka uangoul per tamatang tagorong man

<sup>3</sup><sup>m</sup>Ge tar nimalaelhir pe menia keip tar nipoul geke uamatoto keipin God totoguo a aposoul, inggo u hire tamiuoum uakapar tang siok tang sioko pare, ahik paho namanaia a i rana uain, bo o namanaia tar ninamanar kodkodoh, karo kedanga katongo tolaia hape re baka per nitagorong mana ke heirig God totomua. <sup>4</sup><sup>n</sup>Teeit inggeig a bureher mahmaharana tar tukunugig, doha

<sup>h</sup> 11.33 Ais 55.8-9 <sup>i</sup> 11.34 Ais 40.13; 1Ko 2.16 <sup>j</sup> 11.35 Job 41.11 <sup>k</sup> 11.36 1Ko 8.6

<sup>l</sup> 12.1 Roum 6.11,13; 1Pi 2.5 <sup>m</sup> 12.3 1Ko 12.11; Epe 4.7; Pil 2.3 <sup>n</sup> 12.4-5 1Ko 12.12,27

mahmaharanin a kahakaha na kalekinale. <sup>5</sup>Ter siokono komper hagar, giner burehe peeig, inggeig a siokon siounur tukununa keip tang Kristo dohi siokor tumana keipisieig pare, a kahakahar maharana tar siokor tukunun.

<sup>6</sup>Doh inggeig a kahakahar niate uaia ke heirig God tena nimalaelhir menia keip tena nipoul. Gete ka heiria tar niate tar uelhire tauete sira tasir propet, uelhire tauete keip tar nitagorong man. Ge God pe e mene keip totomua. <sup>7</sup>Gete ka heiria tar niate uaia tar kalekinale i kukulebanga tasir gisiamah, kalekinale uaia tasisin. Gete ka heiria tar niate uaia tar ualualasir, kalkalekinale hamas uaia tununguampe binaka ro ualasil. <sup>8</sup>Gete ka heiria tar niate uaia tar mene uapopokoho tasir gisiamah, kale nomana tar kalekinaleon, karo guatang palakat. Doh ge teka heiria tar niate uaia tar pakaha tenang inet, heir keip tar niuah. Gete ka heiria tar niate uaia, a tamatang uoum keip tasir gisiamah, kalekinale uapopokoho tar uoum keip uaia tasir tamat. Gete ka heiria tar niate uaia tar uamamahoul tasisit ra ueldolom, guata keip dede tar niuah.

<sup>9</sup>Ahik paho pepe boh o malaelhir tasir gisiamah, malaelhir nomana tasisin. Mu de tar niguata uasa, bo mung kale uanono tun puk tar niguatar uia. <sup>10</sup><sup>p</sup>Mu uelmalaelhir tunusioum misiana paho matmatatahinalik tun, karung ueltadesioum. <sup>11</sup>Ahik pah mung marapula kout, uakeluk dede kompe tar labena Dedeil, karung kalekinale tar Tamata Noman.

<sup>12</sup><sup>q</sup>Mu uah, teeit rung pepe uangoul hamas pe tar haua re turung guatain God tamiuoum, karung uanguangoul sikoro tar binaka re pokosor niduh tamiuoum, karung lotu dede. <sup>13</sup><sup>r</sup>Geta katup no tamata God me inet, inggoum mung poul tar heir tasisina me ineter namiu. Karung tororo keip tasir pokoso me niein, doh me buturung hohou.

<sup>14</sup><sup>s</sup>Dangata tang God tar guata uaia tasisit ra guata uasa tamiuoum, dangata tatanono tar guata uaia, kara hik pahe guata uasa tasisin. <sup>15</sup>Mu uaha tagu tasisit ra uah, karung kiring tagu tasisit ra kiring. <sup>16</sup><sup>t</sup>Mu kale tar ninamanang namana tasir tamata uakap. Ahik pah mung uairana katongosioum tesir i rana tasir gisiamah, bo mung kale uahiuasioum, karung matakaluana keip tasir tiome. Ahik pah mung namanasioum tesir uiantiehe tasir gisiamah.

<sup>17</sup>Ahik pah mung pehahaua tar niguata uasa ka guataig tatamiu. Mu tagin tun, binaka rung guata tar ineter kodkodoho tar matasir manai.

<sup>18</sup>Geta uiaon, peng tampopokoho tar uangoul keip toro hiarouo tasir tamata uakap.

<sup>19</sup>Ro bung uanotoug, ahik pah mung pehahaua tasir gisiamah ge teka guata uasasin tamiuoum, bo mung heir me hagar tena nimaliana God, ge a nibolo peono tono uelhire God pare,

<sup>o</sup> 12.6-8 1Ko 12.4-11; 1Pi 4.10-11 <sup>p</sup> 12.10 1Pi 1.22 <sup>q</sup> 12.12 1Te 5.16-18

<sup>r</sup> 12.13 Hib 13.2 <sup>s</sup> 12.14 Mat 5.44; 1Ko 4.12 <sup>t</sup> 12.16 NU 3.7



“A pehahaua nar niguata uasa nag kalekinaleo,  
 Inngo katongo uoumumpe ru turung pehahaua tenas niguata  
 uasasin,  
 karu mamantouo tasisin.”  
 Teke kula per Tamata Noman.

*Ualatur 32.35*

20<sup>u</sup>Bo inggoum mung guata pare,

“Gete gogo nang uelmatana ingga, ualaein tatanon,  
 gete kamadakon, uainum tatanon,  
 ge gitie pe geto guata ingga pare, ingga o turung uamatala  
 mata tununguampe tatanon tar haua ke guatain totomua.”

*Nitabila Uaia 25.21-22*

21 Ahik pah mung uamaluana tar niguata uasa e reih uahiua tamiuoum,  
 bo mung kale uahiua keip tar niguata uasa tar niguatar uia.

**O tamatang tagorong man paka longoro tosnosio tamatang uoum keip**

**13** <sup>1</sup>Inggoum pakung siokor longoro tun tasir tamatang uoum keip tar gavaman, ge God pe me pahene ke heir tar nitampopokoho tar tamat, kare uatur tasir tamatasina toro hagarinin. <sup>2</sup>Temaeit, mai re perer, kare de mata uakeluk tasir tamatang uoum keip, inggono ke perer, kare de mata uakeluk tar haua ke uamokoig God. Gisis ra guata pare, ra uaheir katongois tar poluk. <sup>3</sup>Ge o tamatang uoum keip pe ahik pah ra uasokoro tasir tamata gera guata tar kalekinale uaia, bo tasisitir tamata uasa. Temaeit geto malara ingga ahik paho sokor, uakelukungua tar ualatur mara uauahaia. <sup>4</sup>Ge gisina pe no tamatang kalekinale God tar mene uapopokoho tasir tamata tar uangoul tar niuangoulur uia, kara kodkodoh. Bo geto pesiaua me inet, song a to tengkanono totomua tar sokor, ge gisina pe ka heiris tar nitampopokoho tar kalekinale tar pehahaua tasir tamatang katego tar ualatur. Gisina no tamatang kalekinale God ra guata keip ueleheir tena nimaliana God tasir tamata ra guata uasa. <sup>5</sup>Temaene, inggoum uakapa tun mung longor, karung ueltada tasir tamatang uoum keip, ahik pah teeit ra turung pehahaua pesin tamiuoum gete kung guata tar niguata uasa ue kung mahang longoro tasisin, bo teeit rung iate katongo pono peoum pare, a puhono ter kodkodoho tamiuoum tar guat.

<sup>6</sup>\*Ter tengkana pononene maeit rung heiroum tar buluanar takis, ge o tamatang uoum keip pe no tamatang kalekinale God, ra heir tenas binaka tar kalekinale tar uoum keip tar gavaman. <sup>7</sup>Heir tapokis tasir

<sup>u</sup> 12.20 Mat 5.44    <sup>v</sup> 13.1 NU 8.15; Tai 3.1    <sup>w</sup> 13.3 1Pi 2.13-14    <sup>x</sup> 13.6-7 Mat 22.21

tamata tar haua kung kale puk bakain, karung heir tar mani nar takis tas mais ra hing tananin, karung heir pono tar mani nar giniamehenar takis tas mais nas kalekinale tar hing, karung heir tar ueltada tas mais paka ueltadais, karung uatakai tas mais paka uatakais.

### A hauar kalekinale ro guatagia

<sup>8</sup>ʸAhik pah mung uamaluaana tar inete kung kale puk bakaig e mok a tabung umat, bo ter siokon siounumper ineter nikale puk baka te tamiuoum tar uelmalauelhiresioum, ge mai pe re malauelhir tang uanoton, inggono ke uakeluk tar ualatut. <sup>9</sup>ʒGe a ualatut penine, “Ahik paho uiliatung pous, ahik paho uenau, ahik paho gehe tenas ineter gisiameh.” Doh hingia ponomper ualatut e tumana keip tar siokor ualatutonene. “Malauelhir tang uanotoum misiana ro malauelhir katongo peia.” <sup>10</sup>ªGeto malauelhiria toso uanotoum, ingga ahikinguampe paho matotong guata uasa tasisin. Temaeit mai re malauehir tasir gisiameh inggono ke uakeluk uakapa tena ualatut God.

<sup>11</sup>ᵇKarung guata tar puhene, inggoum mung ate hape re katupa per binak, a binak e ualo ualahur. Mu gulet, ge na binaka per Tamata Nomana tar tapokisime ke uahuhututiehe uain tar binaka ki tagorong mana uakekeneig. <sup>12</sup>ªA boung ke uahuhutung kapa manas, temaeit i baka liu manaseig tar niguatang tar kitup, kari kale tar niguatar kodkodoh. <sup>13</sup>ᵈTi pilese sira tasir tamatasitie ra uangoul tar marein. Ahik pahi ura ueltebeir, kari inum tar inum popokoh e tuka gete uilohor lugig, kari la ueltebeiringua tar guata tang hingiar puh ra uoto guatainir tamatang sipak ue i guata keip tar tukunugig me niguata uasanitier ualamatal, kara hik pahi uelkoi ue i gehe tasir gisiameh. <sup>14</sup>ᵉBo i pilese uakeluk sira tena nipilese Iesu Kristo mara hikieig pahi uauaha tar nimalara uasang tar tukunugig.

### Ahik paho bang kedanga tar tang giameher tamat

**14** <sup>1</sup>ᶠTar tamatetie ahik paha popokoho na nitagorong man, inggoum mung uahue tar kale tatanon, kara hik pah mung uelperere keip tatanono tar haua re namanaion ter uia ue a sa. <sup>2</sup>ᶢMisiana pare, gete tagorong mana me tamata pare, auar ein ueltebeir tar niein, bo a tang giamehe pukur tamatang tagorong mana na torikir ninamana tar inete ke kulaig God ra einig. <sup>3</sup>ᶣA tamatener ein ueltebeir ahik pahe bangang uelsigal tar tamatene ahik paha ein ueltebeir. Ge God pe ke uahue manasa tar kale tatanon. <sup>4</sup>ᶣᶦIngga te mai maro kedanga tena tamatang

ʸ **13.8** Mat 22.39-40; Jas 2.8    ʒ **13.9** KT 20.13-15,17; Ual 5.17-19,21    ª **13.10** 1Ko 13.4-7

ᵇ **13.11** Epe 5.14; 1Te 5.6-7    ¸ **13.12** 1Jo 2.8    ᵈ **13.13** Luk 21.34; Epe 5.18

ᵉ **13.14** Epe 5.11    ᶠ **14.1** Roum 15.7    ᶢ **14.2** Uak 9.3-4    ᶣ **14.3** Kol 2.16    ᶣᶦ **14.4** Mat 7.1; Jas 4.11-12

kalekinaler tang giameher tamat? Na tamata uleikiono tere banotong hire tatanono ge pare, ke guata uaiiono tena kalekinale ue ahik. Doh gitila i uoum, a tamata uleik e turung hire tena tamatang kalekinale pare, inggono ke guata uaiia tena kalekinale gitiempe gete ke ein pukuono tar giniamer niein ue ahik. Ge a Tamata Nomana pe a tampopokoho tar poul tatanono tar kalekinale dede tang God.

<sup>5</sup>Ter siokono komper hagar, o gisiamer tamata ra namana me siokor marein a dedeil uain tar giameher marein, doho gisiamer ra namana tar marein uakapa paha siokono kompe. Bo inggoum pukur tang siok tang siok mung namnamana hamas tun, karung ualongoro tar haua re hireig remi ninamana uaioum tamioum tar guat. <sup>6</sup>Mair tamata re namana tar siokor marein pare, a marein uleik tar lotu tang God, inggon e lotu tar mareinon tar uatakai tar Tamata Noman. Ter siokono kompe gete me kalamiuoum e namana pare, auar mamang nieinilik menia pono tar mahar singsingin, inggon e ein tananin tar uatakai tar Tamata Noman. Teeit ka heir pesina tar uatakai tang God song ka ein.

Doh gete me kalamiuoum e naman a sar ein tar mahar singsingin, doha kahakhar niein, inggono ke malara tanik manasampe pare, mare uatakai tar hanganar Tamata Noman, kare uauaha tang God ke heir pe tar niein. <sup>7</sup>Ge inggeig pe ri tua pe ahik pahi uauaha katongosieig, misiana ponompe geti mateig ahik pahi mata tereigir nimalar. <sup>8</sup><sup>k</sup>Gine ri tua pelaeig, auia tagigeig tar uatakai tar Tamata Noman tenagi niuangoul, doh geti mateig, auia tagigeig tar uatakai tar Tamata Noman tar binaka ri mat. Temaeit gete hape i mateig ue i tua, inggeig nagi tamata uleik tar Tamata Noman. <sup>9</sup>Ter tengkana teene Kristo ke mat, kare tua tapokis tur tasisit ka mat, maeit inggono nas Tamata Nomana tokahanguamper mata doho tua.

<sup>10</sup><sup>l</sup>Bo ingga ae maene ro bang kedanga uasa tang uanotoum? Ue ae maene ro banga uahiua ingga tang uanotoum? Namana uanon, inggeigir tang siok tang siok i turung tur kahakah i uoumuhia tonu tabtabilang uelhehek God. <sup>11</sup><sup>m</sup>Ge no uelhire God pe o kula pare,

“Inggo u hire tun tamioum, gine teo per God ger tua teke kula per Tamata Noman,

‘o tamata uakapa tun ra turung hatup uahiua totoguo,  
doho tamata uakapa tun ra turung hire luaka pare, Inggo a  
God.’ ”

*Aisaia 45.23*

<sup>12</sup>Song ri turung heir uakapa tunungampe inggeigir tang siok tang siok tar haua ki guatain tang God. Inggeig ahik pahi guata toso uanotougir ra

<sup>j</sup> 14.5 Gal 4.10-11   <sup>k</sup> 14.8 Gal 2.20   <sup>l</sup> 14.10 2Ko 5.10   <sup>m</sup> 14.11 Pil 2.10-11

pung, kara guata tar niguata uasa <sup>13</sup>Temaeit inggeig i uakenua manasa tar ueluelkedangasieig, bo i namana uiuir pare, ahik pahi ualor, kari uapunga tar tang giamehe tar niguata uasa.

<sup>14</sup>Inggo u mene sira tar tamateitier tohangana tar Tamata Noman Iesu. Inggo u iate tun pare, ahik uadeil me niein re uasa tagigeig tena nibanga God ki ein pe tananin. Bo gete me tamata re tagorong man me inete pare, a sa, song ter saono tatanon. <sup>15</sup>Gete hagouo uasa uanotoumua totomua, teeit tar haua ro einia, ingga ahikingua pah ko pilese sir o malauelhir tang uanotoum. Ahik paho mamantouo keip tang uanotoum tar haua ko einin, ge Kristo pe ke mata tatanon. <sup>16</sup>Ahik pah mung uamaluana tar haua rung bangaig pare, auia ra meneig a sa.

<sup>17</sup>Ge na Nitoia pe God ahik paha ineteng banga to tar haua ri einigieig ue ri inumig, bo i uangoul keip tar niuangoulur kodkodoh, karo hiarou, kara niuah geke heirinir Iabena Dedeil tagigeig, <sup>18</sup>teeit a tamata gere kalekinale tar hagarionene God e uaha tun tatanon, doho tamata ra ueltada tatanon. <sup>19</sup><sup>P</sup>Temaene i kale manaseig tar inete re uakotpokoso toro hiarou, doh tar uelmene uatampopokohosieig.

<sup>20</sup><sup>Q</sup>Ahik pah mung mamantouo tena kalekinale God tar haua rung einin. A niein uakapa tun a delauan, bo a sa puk tar tamata tar ein me inete ueltebeir gere guata tar tang giameh e pung. <sup>21</sup>Auiantiehe totomua tar toub tar singsingin ue o toub tar inum tar bino ue tar guata me puh gere uapung tang uanotoum. <sup>22</sup>Temaeit a haua ro tagorong managia, uamoko tereng ninamana tar inetenin, a ineteng tamiraoum me God. Ge me tamat e guata me inete re atein a kodkodoh, doh na ninamana uaiaon ahik pahe tohotola tatanon, doh inggon ahik pahe matal, inggon e turung uah. <sup>23</sup>Bor tamata ger torik na ninaman, ra tohotolain ke guata tar niguata uasa, teeit tar binaka re ein toubuon, inggon ahik pah ke tagorong mana tun, inggon ke guata uasa, teeit a mamang inetelik ge ahik pahe la tur tar nitagorong man e kotpokos a niguata uasa.

#### Uauaha tasir gisiameh, kara hik paho uauaha katongoia

**15** <sup>1</sup>Inggeigener tampopokoho uoum paki poul tar huata uelkout teres niduhusitir maluana harah. Ahik pahi uauaha katongosieig. <sup>2</sup><sup>T</sup>Bo paki siokor uauaha puk toso uanotougig tar guata tar inete tar poul tasisina mara guatasina tar niguatar kodkodoh, kare popokoho res nitagorong man. <sup>3</sup><sup>S</sup>Ge Kristo pe ahik pah ke uauaha katongoin misiana ro kula pe no uelhire God pare, “A uelsigal geka uelhire uasa tolaig totomua, ke pono totoguo.” <sup>4</sup><sup>T</sup>Ge a mamang inetelik pe tono uelhire God ka boloiq sioun, ka boloiq tar ualasira tagigeig tar tagorong mana teil

<sup>n</sup> 14.14 Apo 10.15; Tai 1.15    <sup>o</sup> 14.15 1Ko 8.11-13    <sup>p</sup> 14.19 Roum 12.18; 15.2    <sup>q</sup> 14.20 1Ko 8.13  
<sup>r</sup> 15.2 1Ko 10.24,33    <sup>s</sup> 15.3 Ker 69.9    <sup>t</sup> 15.4 2Ti 3.16

dohē uatampopokoho tar iabeigigeig ri pepe uangoul hamas pe tena ualapagaha God.

<sup>5</sup>Inngo u lotu tang God gere uoto heir tar hamhamas, kara nitampopokoh tar heir tamiuoum tar siokonor ninaman e la tur tang Iesu Kristo. <sup>6</sup>Maeit rung turung uatakai keipinguaoum tar siokon siounur ninaman, kara siokor tengkana tang God ge tamana nagi Tamata Nomaneig Iesu Kristo.

<sup>7</sup>Doh gine daan, inggoum pakung uah, karung ueluahesioum misiana ke uahue pe Kristo tar kale tamiuoum mara heirinir uatakai tang God. <sup>8</sup>Ge inggo pe gine ru hire tamiuoum, Kristo ke me kotpokos a tamatang poul tasir Ju maro mana no uelhire God tar ualasira tar ualapagah geka guatain tasir propet. <sup>9</sup>Doho gime uan ra matotong uatakai tang God ke heir pe tena niueldolom. Misiana ro kula teil pe no uelhire God pare,

“Temaieit inggo u turung uatakai tur totomua i uantinanina tasir gime uan,  
inggo u turung ker tar kerekereng uatakai tar hangoumua.”

*Ker 18.49*

<sup>10</sup>Doh no uelhire God o kula poluk pare,

“Inggoumur gime uan mung uaha mesir Ju no tamaton.”

*Ualatut 32.43*

<sup>11</sup>Karo kula poluk pare,

“Inggoumur gime uan mung uatakai tar Tamata Noman,  
doho tamata uakapa ra uatakai tatanon.”

*Ker 117.1*

<sup>12</sup>\*Doh Aisaia ke kula poluk pare,

“A bubunguna Jesi e turung kotpokos,  
a tamata gere turung uoum keip toro mamang uanilik,  
o gime uan ra turung tagorong mana teil tatanon.” *Aisaia 11.10*

<sup>13</sup>God tere turung guata tamiuoum tar tagorong mana teil pare, inggoum mung turung kale tar haua ke ualapagahaion, temaieit inggo u dangata tatanono tar uauaha tun tamiuoum, kare heir toro hiarou, gitie rung haono to pe tatanono tar poul tamiuoum. Inngo u lotu tatanon, maeit tena nitampopokohor Iabena God e uatampopokoho tamiuoum tar bangala i uoum tar binaka re turung guata God tar ineteninanit tamiuoum.

---

° 15.7 Roum 14.1   ° 15.8 Mat 15.24   ° 15.9 Apo 3.25   ° 15.12 UGO 5.5

**Poul e ueluatata hape ke uelhire tauete pe toro Uelhire  
Uaia tasir tamatang toro burehe ro uan**

<sup>14</sup>Ro bung uanotoug, inggo katong u iate tun pare, inggoum kung uoun tar niuia, karung iate tar mamang inetelik re malaraig God, karung banotong uelualasiresioum. <sup>15</sup>Toro bolobolo rone, inggo ku bolo keip tar uelhireniner popokoha tar giniamer puhpuhung mene ku mene uoumig tamiuoum. Inggo ku mene uapopokoh, teeit tar nimalauelhir menia keip tar nipoul ke heirin God totoguo, <sup>16</sup>tar kotpokoso na tamatang kalekinale Iesu Kristo tar kalekinale tasir gime uan. Inggo u kalekinale sira tasir pater tar uelhire tauete toro Uelhire Uaia gero la tur tang God mara kotpokosor tamatang gime uan pare, a uahungunitie re uauaha tang God tar kale, doh ke guatasiono pare, o nana tun ke heir peha tar Iabena Dedeil tar me uangoul tasisin. <sup>17</sup>Temaeit inggo u banotong uaha keip tar kalekinale ru guataig tang God, teeit tar ueliahe re matoto teil peio tang Iesu Kristo. <sup>18</sup>Inggo ahik pahu mene me inete sioko tar kalekinale ke uamatotoin Kristo totoguo tar guata tar uoum keip tasir gime uan tar longoro tang God, teeit tar haua ku mene manasagio, doh tar haua ku guataig. <sup>19</sup>Inggo ku guata keip tananin tena nitampopokohor nitou menia tar uaparoko geke heirinir Iabena Dedeil totoguo. Temaeit ku la uiloho tur peo i Jerusalem ku la uatuk i Ilirikum, inggo ku uatuatuka hihir tunungua ku uelhire tauete pe toro Uelhire Uaia tang Kristo.

<sup>20</sup><sup>a</sup>A puh ku uoto marang guata tunuio te tar uelhire tauete toro Uelhire Uaia toro uan ge ahik pah ka longoro tagu tang Kristo, inggo u kalekinale pare, mara hik pahu uakapa keip tar kalekinale ke uakekeneinir tamata sioko misiana tar tamata gere tuha uapono tar uma tar tagir ke uamokoigir tamata siok.

<sup>21</sup>Misiana ro kula teil pe no uelhire God pare,

“O tamata ge ahik pah ka longoro kout tagu tatanon ra turung iate  
doh gisis ahik pah ka longoro me uelhire tatanon, ra turung  
naman manate.”

*Aisaia 52.15*

<sup>22</sup><sup>a</sup>A tengkana maene ku otoungo, teeit ku uelhire tauete baka pe toro uananin.

**Poul e namana tanik tena nila i Roum**

<sup>23</sup>Bo gine puk daan, inggo ku kalekinale uiloho uakapa manasa toro uananine, doh teeit ku marang bangantiehe tun peo tamiuoum tar bureher krismas. <sup>24</sup>Inggo ku namana tar banga baka tamiuoum tar binaka ru la i Spein. Tar binaka ru lalao, inggo u turung banga kout baka

---

<sup>γ</sup> 15.16 Roum 1.5; 11.13    <sup>z</sup> 15.20 2Ko 10.15-16    <sup>a</sup> 15.22 Roum 1.13

tamiuoum, karu uaha tar uangoul keip baka tamiuoum me sikin, doh inggo u uahingo tamiuoum tar heir totoguo me nipoul tar la uainila i Spein.

<sup>25</sup><sup>b</sup>Bo gine puk daan, inggo u la baka uoum i Jerusalem tar heir tar mani tar poul tasir tamatang tagorong man gesir tiomeala. <sup>26</sup><sup>c</sup>Ge o tamatang tagorong mana pe i Masedonia, doho tamatang tagorong manang Akaia ka heiring uaha tun ka uelbake pe tenas manir tiome tosno tamata God i Jerusalem. <sup>27</sup><sup>d</sup>Gisina ka uaha tun tar guata pare, o mana tun gisina nas kalekinale tar poul tasir tamatang tagorong manang Ju. Misianangua pah ka kale tur puk baka tasisin. Ge gitie pe ge teka kale tokahar gime uan tenas inete uaiar Ju geke ualapagahaig God, gisina nas kalekinalenguampe tar poul tasir tamatang tagorong manang Ju tar uelpakaha keip tenas mani tasisin. <sup>28</sup>I muduhia getu uakapa bako tar kalekinaleene, doh ku heir uaia manasa tenas manisin, karu turung langua i Spein, song ru la bangala tamiuoum. <sup>29</sup><sup>e</sup>Inggo u ate tun pare, getu me pokosomeo tamiuoum, u me pokoso keip tun tar niguata uaia e la tur tang Kristo.

<sup>30</sup><sup>f</sup>Doh gine daan, inggo u dangata uapopokoho tamiuoum tar hanganar Tamata Noman Iesu Kristo, mung kalekinale tokaha tenag kalekinaleo, karung lotu tang God. Inggoum mung guata paar, teeit tena nimalauelhirir Iabena Dedeil. <sup>31</sup>Dangata tatanono tar kaueke totoguo tasir Jusila i Judia ra uangoul uiloh i Jerusalem gera ueluelde toro uelhire tang Kristo. Mu dangata pono tatanono tar guata tasir tamatang tagorong man i Jerusalem tar uaha uangoul tar nipoul ru lang heirigio tasisin. <sup>32</sup>Maeit gete pagiarono re malara pe God, inggo u me banotong pokos i Roum, karu uaha tun tar banga tamiuoum, doh maru kale inggo me timuhur nitampopokoho tar binaka ru uangoul tagu tamiuoum.

<sup>33</sup>Inggo u lotu tang God gere uoto heir tagigeig toro hiarou tar uangoul tagu tamiuoum uakap. O mana tun.

#### Poul e heir tar niuah tasir bureher tamat

**16** <sup>1</sup>Inggo u marang uahire baka tamiuoum tang tatahigulikio Pibi a tamatang kalekinale tar sios i Senkria. <sup>2</sup>Inggo u dangata tamiuoum tar tororo tun tatanon, karung ueltada tar binaka re pokosomeono tamiuoum, mung tororo sira kompe tatanono paha uanotomiu rung uangoul teil pe tar Tamata Noman. Mu kaueke keip tatanono ra uoto kaueke peis no tamata God, karung heir tatanono me nipoul gera malara turig tamiuoum ge inggono pe ke poul uauleik tun tasir bureher tamata menia pono totoguo.

<sup>b</sup> 15.25-26 1Ko 16.1-4   <sup>c</sup> 15.26 Apo 24.17; 1Ko 16.1; 2Ko 8.1; 9.2,12   <sup>d</sup> 15.27 1Ko 9.11  
<sup>e</sup> 15.29 Roum 1.11   <sup>f</sup> 15.30 2Ko 1.11; Kol 4.3; 2Te 3.1

<sup>3</sup> Mu heir pono tenag niuaha inggo tas Prisila mena bulout Akuila. Rasina kura uoto kalekinale tagu totoguo tena kalekinale Iesu Kristo.

<sup>4</sup> O mana tun, a siokor binaka rasina kura bakais totoguo tar uauheil totoguo. Ahikiono pah inggo puk ru heir tar niuah, bo noso sios uakapa ponor gime uan ra heir pono tenas niuah. <sup>5</sup> Mu heir pono tenag niuaha inggo tar sios gere uoto uiliodout tenasira uma rasin.

Heir tenag niuah inggo tang kuhur kaloug Epenetus ger uakikilanganar tamata tar hikume tosno tamata Kristo tar pang uan i Esia. <sup>6</sup> Mu heir tenag niuah inggo tang Maria geke kalekinale ueleheir tamiuoum. <sup>7</sup> Mu heir tenag niuaha inggo tas Andronikus me Junias a toking tahigulikio, doh gekura uangoul tagu totoguo tar uih. Rasin a toking tohangas tasir aposoul, doh gera ueltadantiehe tunisir tamatang tagorong man. O mana tun, rasin te kura kotpokoso uakikilang na toking uakuakeluk Iesu Kristo totoguo. <sup>8</sup> Mu heir tenag niuaha inggo tang Ampilatus geru malauelhirintiehe tunuio i lolono tar niguatar nang Kristo. <sup>9</sup> Mu heir tenag niuaha inggo tang Urbanus, inggono nagi tamatang kalekinale tokaheig tena kalekinale Iesu Kristo, doh tang kuhur kalouguo Stakis.

<sup>10</sup> Mu heir tenag niuaha inggo tang Apeles, inggon a tohangana tun tar uakeluk tang Kristo, karung heir pono tenag niuaha inggo tasisis ra uangoul tena uma Aristobulus. <sup>11</sup> Mu heir tenag niuaha inggo tang Herodion a tahigulikio.

Heir tenag niuaha inggo tasisis ra uangoul tena uma Narsisus gera tagorong mana teil tar Tamata Noman. <sup>12</sup> Mu heir tenag niuaha inggo tar toking kuaha rasine, Tripina me Triposa. Rasina kura kalekinalentiehe tun tar tuha tena kalekinaler Tamata Noman. Inggo u heir ponola tenag niuaha tang Persis ger kuhur kalouguo, inggono ter tang sioko pono ke kalekinalentiehe tar Tamata Noman. <sup>13</sup> <sup>h</sup> Mu heir tenag niuaha inggo tang Rupus, inggon a tamatang uakeluk uaia tun tar Tamata Noman, inggo u heir pono tenag niuah a tang tinanon geke uoto guata uaia sira tun totoguo paha tuna tun.

<sup>14</sup> Inggo u heir ponola tenag niuaha tas Asinkritus, doh Pegon, doh Hermes, doh Patrobas, doh Hermas, doh tasir tamatang tagorong mana gera uiliodout keip tasisina tar lotu tang God. <sup>15</sup> Mu heir tenag niuaha inggo tas Pilologus me Julia, doh tang Nereius me tatahinalik, doh tang Olimpas, doh tosno tamata uakapa God gera uoto uangoul tagu tasisin. <sup>16</sup> <sup>i</sup> Tar binaka rung uiliodoutoum, inggoum mung uaha keip tun toso uanotoumiu tar niuaha, doh tar koloumiu. O sios uakapa tunusine ra uakeluk teil tang Kristo ra heirila tenas niuaha tamiuoum.

---

<sup>s</sup> 16.3 Apo 18.2   <sup>h</sup> 16.13 Mak 15.21   <sup>i</sup> 16.16 1Ko 16.20; 1Pi 5.14



### A uadouhinar menemen

<sup>17</sup>JRo bung uanotoug, inggo u mene uapopokoho tamiuoum tar tagin tasir tamatis ra uaueltageih tamiuoum mesir gisiamah. Nas niualasirasin e guata puk tamiuoum tar tur uiuir liu tang Kristo, doh nas uelhiresin ahik pahe siokono keip tar niualasir kung kalegioum. Ahik tun pah mung longlongoro tasisin. <sup>18</sup>kGe o hai tamata pesin ahik pah ra kalekinale tenagi Tamata Nomaneig Iesu Kristo. Bor ninamana tun ra kalekinale keipinisin tera malara kompe ra uauaha katongois. Gisin o tang menmene uahihiana tun tenas mene tar uelour teres ninamanar tamatasine ahik pah ra ate pare, o hai tamatang ualualasirasin o bohoboh. <sup>19</sup>O bureher tamata ka longoro ueluatata toromio longlongoroum toro Uelhire Uaia ter tengkanonene, maeit inggo u uaha tamiuoum. Inggo u uahingo tamiuoum tar naman manate tar huar uia, karung uareing liu tar ineter sa. <sup>20</sup>mSisikinalik, God gere uoto heir tar nitabila uaia, doho hiarouo tagigeig e turung uamaluana tamiuoum tar ueih tane tang Satan i kukulebanga tar kekemiu. Na hamhamas Iesu Kristo nagi Tamata Nomaneig e uangoul tagu tamiuoum.

### O gisiamer tamata ka heirila tenas niuah i Roum

<sup>21</sup>nTimoti gere kalekinale tang Kristo, dohe kalekinale keip totoguo ke heir tena niuaha tamiuoum, doh Lusius pon, doh Jeson, doh Sosipater, doho uanotougou pono gesir Ju.

<sup>22</sup>Inggo Tertius ter tamatang bolo toro bolobolo rone u heir ponola tenag niuah a tamiuoum.

<sup>23</sup>oGaius geke kaueke uaia tun totoguo, doh geke uoto uiliodoutinir sios na um, ke heirila tenas niuah. Erastus ger tamatang kaueke tena manir uan, doh Kuartus ger uanotougigeig ura heir ponola tenasira niuah.

<sup>24</sup>Na hamhamas Iesu Kristo nagi tamata Nomaneig menia keip tena nipoul e moko tagu tamiuoum.

### A lotung uatakai tang God

<sup>25</sup>Pi uatakai tar hagana God, inggono tere banotong poul tamiuoum, kare uatampopokoho tamiuoum tar uakeluk tang Kristo. Ter puhonene ru uoto heirio tasir tamata tar binaka ru uelhire tauete toro Uelhire Uaia tang Iesu Kristo. Sioun God ke touaouo toro Uelhire Uaia rone tar puhung barah, bo gine puk daan, inggono ke uakalahara to tang roon, <sup>26</sup>i lolono

<sup>j</sup> 16.17 Mat 7.15; Tai 3.10    <sup>k</sup> 16.18 Pil 3.19; 2Pi 2.3    <sup>l</sup> 16.19 Roum 1.8; 1Ko 14.20

<sup>m</sup> 16.20 Uak 3.15    <sup>n</sup> 16.21 Apo 16.1-2; 19.22; 20.4    <sup>o</sup> 16.23 Apo 19.22; 1Ko 1.14

<sup>p</sup> 16.25 Roum 1.5; Epe 1.9; 3.5,9; Kol 1.26

tenas bolobolor propet, ka bolo keip pe tena ualatoho God mara siokor tagorong manar gime uan toro mamang buturulik, kara longoro tatanon. <sup>27</sup>Inggeig i uatakai tang God ger naman manate me pahen, temaeit tena nipoul Iesu Kristo inggeig i uatakai manasa tar hangana God tar mamang binakalik. O mana tun.

# 1 Korin

## O uakikilana ro bolobolo ke boloin Poul tasir tamat i Korin

### O uakikilangana ro bolobolo tasir Korin

Poul ke bolo toro bolobolo barah rone o la tasir tamatang tagorong mana tar uan uleik i Korin. Inggono ke uatentur tar lotu i Korin tar binaka ke uangoul tar uaniono tar siokor hangaul, doha tualir bialok (Apo 18). I muduhia ke hiliu baka peono tar uan uleikion, a inete uasa ke kotpokoso tar lotuon. Maeit Poul ke bolongua toro bolobolo rone tasir tamatang tagorong man i Korin tar poul tasisin.

I Korin a uan uleik tar pang uan i Gris. O tamatang Gris ka uaha tun o tamatang ate pe. Bo Poul puk ke mene uakalahara pare, God e kula teres niater tamat a tuktukar.

Maeit o tamatang tagorong mana paka bang paroko tang Iesu pare, tenas Tamata Nomanasin. Inggono tere kale teil tena niate uaia God, doho tamatang tagorong mana paka longoro dede tatanon (1Ko 1.2).

Poul e marang mene ualasira tasir tamatang tagorong man i Korin hape ra uatakai tokaha pein God. Inggono ke ualasira pono mara uelbuleisisina tar bereit mer bino tar namana huara ke mata pe Iesu (1Ko 11). Ge na Iabena Dedeil pe God e banot e poul tasisina mara kalekinale tokah (1Ko 12; 14). Doha inete uleik ke heirin God ter malauelhir (1Ko 13).

Poul ke mene ualasira pono tar nitua i muduhia toro mat. I muduhia ke mata baka pe Iesu, God ke uatua tapokis tang Iesu, o bureher tamata ka banga tang Iesu ke tua tapokis pe (1Ko 15.1-8). Tar siokonor hagar God e turung uatua tapokis tagigeig. Ge God pe a tampopokontiehe liu toro mat (1Ko 15).

### I lolono toro bolobolo rone:

A meneng uakalahar 1.1-9

A kalekinale i lolono tar lotu 1.10-4.21

O ura ueltebeir, kara niuangoul toso matamatame 5.1-7.40

O tamatang tagorong man, doh gisis ra tele tang God 8.1-11.1

A nitagorong man, doha lotu 11.2-14.40

A nitua tapokis doho tamatang tagorong man 15.1-58  
 Nas uahungur tamatang tagorong manang Judia 16.1-4  
 Na niduh Poul, kara udohinar menemen 16.5-24

---

### A niuah e la tur tang Poul

**1** <sup>1</sup>Inggo Poul ku bolo toro uelhire rone, raeim me Sasten ge uanotougigeig. God ke malara totoguo na aposoul Iesu Kristo. <sup>2</sup>Roon o la tasir tamatang lotur nang God tar uan uleik i Korin, geke uadedeilis Iesu Kristo, kara kilais ra uangoul pare, o dedeil menia pono tas mais gera uangoul ueltebeir gera kila tenagi Tamata Nomaneig Iesu Kristo pare, nas Tamata Noman. <sup>3</sup>A hamhamas, karo hiarouo tamiuoum uakapa tun e la tur tang God ge tamagigeig me Iesu Kristo ge nagi Tamata Nomaneig.

### Poul e heir tar niuaha tang God

<sup>4</sup>Inggo u heir dede tar niuaha tang God, teeit tar burehe tunur nipoul ke heir turigiono tamiuoum tang Iesu Kristo. <sup>5</sup>Inggoum kung matoto teil tun tar mamang inetelik uaia, teeit kung uangoul tokaha keip pe tang Kristo, nami nimenoum, kara niater eimiuoum uakapa tun ke i rana tun. <sup>6</sup>Teeit a haua geking hire tauetegieim tang Kristo ka ate uaia tur tunig tamiuoum. <sup>7</sup>Temaeit ahik baka poluk pah mung katupa me inete uaia re hireinir Iabena Dedeil, mung uanguangoul sikoro kompe tenagi Tamata Nomaneig Iesu Kristo gete tur uakalahar. <sup>8</sup>Inggon e me uatampopokoho tamiuoum e tuka tar uadouhinar binak, maeit tar binaka re la tapokisimeon, inggon ahik pahe me tupara me ineter sa tamiuoum. <sup>9</sup><sup>b</sup>God gera tagorong manain, Inggono teke kila tamiuoum tar uangoul tokaha keip tang Iesu Kristo ger tunono ge nagi Tamata Nomaneig.

### O tamatang lotu ka uangoul uelpakah

<sup>10</sup><sup>c</sup>Inggo u kula uapopokoho tun tamiuoum ro uanotoug pare, tar hangana nagi Tamata Nomaneig Iesu Kristo, inggoum mung ueluaiesioum, maeit ahikioum pah mung ueluelpakah ueltebeir. Inggoum e turung moko tokaha uaia tun remi nimalar, kara ninaman. <sup>11</sup>Ro uanotoug, o gisiamer tamatang tena uma Kole ka hire totoguo pare, Inggoum mung ueluelkoi. <sup>12</sup><sup>d</sup>A tengkana maeit ku mene sira pare, teeit a tang sioko tamiuoum e kula pare, “Inggo u uakeluk tang Poul.” Ue a tang giameh e kula pare, “Inggo u uakeluk tang Apolos.” Ue a tang giameh e kula pare, “Inggo u uakeluk tang Pita.” Ue a tang giameh e kula pare, “Inggo u uakeluk tang Kristo.”

---

<sup>a</sup> 1.8 1Te 3.13; 5.23 <sup>b</sup> 1.9 1Te 5.24; 1Jo 1.3 <sup>c</sup> 1.10 Pil 2.2 <sup>d</sup> 1.12 Apo 18.24-28; 1Ko 3.4

<sup>13</sup>Iesu ka ueluelpakahain? Ue te Poul ke mata tar korose tamiuoum? Ue inggoum ka uahuhu keipisioum tar hangana Poul? <sup>14</sup><sup>e</sup>Inggo u heir tun tar niuaha tang God pare, ahik tun pah ku uahuhu me kalamiuoum tes Krispus puk manasampe me Gaius, <sup>15</sup>temaeit ahik me tamata re kula pare, ka uahuhu keipin tar hangouguo. <sup>16</sup><sup>f</sup>O man, inggo ku uahuhu pono tasir tamatang tena uma Stepanas, dohi muduhia tasisinasine, inggo u telengua, ge pare ku uahuhu baka poluk me tamat. <sup>17</sup>Ge Kristo pe ahik pah ke heirihia totoguo tar me uahuhu tasir tamat. Bo inggo ka heirihaiu tar me hire tauete toro Uelhire Uaia tasir tamat, ahik pah tar uelhire gere la tur teres niater tamatang ate mare hikir nitampopokoh geke la tur tang Kristo tar binaka ke mata tar korose pahe kap.

### **A niate uaia, kara nitampopokohor nang God e moko tang Kristo**

<sup>18</sup><sup>g</sup>O tamata gera heil, gisina ra namana pare, o uelhire tang Kristo ke mata pe tar korose, o tuktukar, bo tagigeigene ra uaudeilisieig, a puhung uelhireono ter nitampopokohor nang God. <sup>19</sup>Ge a puh pe ka boloiing sioun tono uelhire God pare,

“Inggo u mamantou teres niate uaiar tamatang ate uaia tun, karu uakapa teres niater tamata tang atentiehe tun.” *Aisaia 29.14*  
<sup>20</sup><sup>h</sup>Ia kaeisir tamatang ate uaia tun? Ia kaeisir tamatang tar ualatut? Ia kaeisir tamatang sir pokoso tar ninamanene daan? Ahik God pah ke uatuktukara tar niate uaiang gane i kot?

<sup>21</sup><sup>i</sup>Bo tar niate uaiar nang God, o tamatang gane i kot ahik pah ra banotong ate tang God teresir niate uaia. Temaeit inggono ke uah, kare heirihia tono uelhire gera kilain o tuktukara geka hire tauetein mare uaudeilono tas mais ra tagorong man. <sup>22</sup>O Ju ra malara kompe me uaparok e la turuha i Heuen mara tagorong man. O Grik ra sir kompe tar kale ninaman, kara niate uaia. <sup>23</sup><sup>j</sup>Temaeit geti hire tauete inggeig pare, Kristo ka uakusein tar korose, o Ju ra de, karo gime uan ra kula pare, roono ro uelhire o nasir tuktukar.

<sup>24</sup><sup>k</sup>Bosir Ju mesir gime uan geke kilais God, ra ate pare, Kristo inggono ter nitampopokohor nang God, kare ter niate uaiar nang God. <sup>25</sup><sup>l</sup>Bo a hauanine re guataig God gera kilaig a tuktukar, ginina ter niate uaia uleikintiehe tun e hahaua liu teres niate uaia uleikir tamatang gane i kot. Doh na nimaluana God, inggono ter popokohontiehe tun e hahaua liu teres nitampopokohor tamat.

---

<sup>e</sup> 1.14 Apo 18.8; Roum 16.23    <sup>f</sup> 1.16 1Ko 16.15    <sup>g</sup> 1.18 Roum 1.16    <sup>h</sup> 1.20 Job 12.17; Ais 19.12; 33.18; 44.25    <sup>i</sup> 1.21 Mat 11.25    <sup>j</sup> 1.23 Roum 9.32; 1Ko 2.14    <sup>k</sup> 1.24 Kol 2.3  
<sup>l</sup> 1.25 2Ko 13.4

<sup>26</sup>Ro uanotoug namana huara kompe tar binaka ka kilasioum, ahik paho bureher naman manate ra banga per tamat, ahik mo bureher uelpipih, ahik mo bureher i ranantieh. <sup>27</sup>Bo God ke kedanga tar inetenanine gera kilaig a tuktukar mare uamatala tasir tamatang ate uaia tun. God ke kedanga tar inetenine gera kilaig a maluan mare uamatala tasir tampopokoh. <sup>28</sup>God ke kedanga tar haua ger i kotontiehe tunane i kot, kara inete gera banga uasaigane i kot mare uakeip uahua tunungua tar haua gera uairanaigane i kot. <sup>29</sup>Temaeit ahik me tamata re matot e uasala katogoin tar matana God.

<sup>30</sup>Teeit God ke guata pare, Inggoum mung uangoul tokaha keip tang Iesu Kristo. Doh tar poul tapokis tagigeig, Iesu Kristo inggono ter niate uaia ke heirin God, e laha tagigeig, inggono ter niuangoul ger kodkodoho tun tang God, kare uadelauan, kare uadedeil tagigeig, kare bulaua tapokis tagigeig. <sup>31</sup>Mare pokoso uakalahara tunur puh,

“Mai gere uasalain,  
inggon e uasalain tar haua ke guatainir Tamata Noman.”

*Jeremaia 9.24*

**2** <sup>1</sup>Ro uanotoug, tar binaka ku me pokoso tamiuoum ku me hire tauete pe tono uelhire God gero ououu. Inngo ahik pah ku me mene keip me meneniner lingia tun ue me i ranantieher niate uaia. <sup>2</sup>Bo inggo ku namana pare, tar binaka ru uangoul keipo tamiuoum, inggo ku malabobour uakapa tun tar mamang ineteliking gane i kot, u namana puk manasampe tang Iesu Kristo ka uakuse pein tar korose. <sup>3</sup>Tar binaka ku me pokoso tamiuoum, inggo a maluana tun, ku sokor, karu kanuh tun. <sup>4</sup>Nagu meno, kara haua ku hire tauetegio tamiuoum, ahik pah ngohinar mene ger nasir tamatang ate ue o tamatang mene uahihian. Bo inggo ku mene keip kompe tena nitampopokohor Iabena Dedeil. <sup>5</sup>Maeit tena nitampopokoho God tere tengkana tur tun remi nitagorong manoum, ahik pahe la tur teres niate uaiar tamatang gane i kot.

### A niate uaia gere la tur tar Iabena Dedeil

<sup>6</sup>O man inggeim mi mene keip nomana tar niate uaia, kara ninamana uaia tun tas maisir tangtangouo res nitagorong man, bo ahik puk, paha niate uaia ger eisir tamatang gane i kot ue a nitampopokohong gane i kot ge a nitampopokoho penin e uahuhutung kap. <sup>7</sup>Inggeim king mene keip tena niate uaia God ger ououu, a niate uaia geka touaouo bakain. A niate uaiaono ka heir tanika manasampein tena uiniatoro uleik tagigeig tar binaka halanar koto te pokos. <sup>8</sup>Ahik me tang siokor tamata uleikane

<sup>m</sup> 1.26 Mat 11.25; Jas 2.5    <sup>n</sup> 1.29 Epe 2.9    <sup>o</sup> 1.30 Jer 23.5-6    <sup>p</sup> 2.3 Apo 18.9;  
2Ko 10.1    <sup>q</sup> 2.4 1Te 1.5

i koto re naman manate, bo ge pakene ka naman manatesin, gisina paka hik pah ra uakuse tar Tamata Noman i rana tar korose, ge inggono pe a i rana liu tasir tamata uakap. <sup>9</sup>Ge a puh pe ka boloig sioun tono uelhire God pare,

“Ahik me tamata ke bang, ahik me tamata ke longor,  
ahik me tamata ke naman,  
tar haua ke kaleuatoroin God  
tas mais gera malaelhirintiehe tun tatanon.” *Aisaia 64.4; 65.17*

<sup>10</sup>Bo God ke uakalahar tur tar Iabena Dedeil tar mamang inetelik. Ge a Iabena Dedeil pe e sir tar mamang inetelikir nang God gitimpe gete moko uaouonin i lolono teil tun. <sup>11</sup>Mai re uangoul keip tasir tamat e ate teres ninamanar tamat, doh gete uangoul teil tun na iabener tamatono tatanon. Ter siokono komper hagarion, ahik me tamata re ate tena ninamana God tena Iabena Dedeil puk manasampe God tere ate. <sup>12</sup>Inggeig ahik pah ki kale tar iabeneng gane i kot, bo inggeig ki kale tar Iabena gere la tur tang God. Maeit ri naman manate inggeig tar haua ke heirheir pukin God tagigeig.

<sup>13</sup>Inggono ter hauanine ri menegieig, ahik paha mene geka ualasira keipig tar niate uaiang gane i kot, bo ginin a niualasira gere la tur tar Iabena Dedeil, e hire tauete tar Iabena ger mana ger nanar Iabena Dedeil. <sup>14</sup>Mais ge ahik pah ra uangoul keip tar Iabena Dedeil, ahik pah ra matotong kale me inete uaia gere la tur tena Iabena God, teeit gisina ahikingua pono pah ra naman manate. Ra namana tar inetenin a tuktukar, bo mais gera uangoul keip tar Iabena Dedeil tera matotong naman manate taninin. <sup>15</sup>A tamata ge na Iabena Dedeil, inggon e matotong kedanga tar mamang inetelik. Bo me tamata gere kale teil tar Iabena Dedeil ahik pah ra matotong kedanga taguin.

<sup>16</sup>“Mai pe re ate tena ninamanar Tamata Noman,  
kare banot e ualatut tatanon?” *Aisaia 40.13*

Bo inggeig i kale teil tena ninamana Kristo.

### Poul me Apolos na toking tamatang kalekinale Kristo

**3** <sup>1</sup>Ro uanotoug, inggo ahik pahu kila tamiuoum pare, o tamatang tar Iabena Dedeil, bo inggoum misiana haraha tasir tamata gera uakeluk puk tar nimalara uasang tar tukunus, a guama haraha remi nitagorong mana tang Kristo. <sup>2</sup>Inggo ku heir puk tamiuoum tar huh,

<sup>r</sup> 3.2 Hib 5.12-13; 1Pi 2.2

ahik pah ku heir tamiuoum me niein popokoh, teeit inggoum halana tung matotong ein taninin. Gine pe daan, inggoum halana harahampe tung matot. <sup>3</sup>Teeit inggoum mung uangoul sira harahampe tasir tamata gera uakeluk puk teres nimalara uasang tar tukunus, ge o ueluelgehe pe, karo ueluelnimalian o moko haraha tamiuoum, ahik me inete re uatur uakalahara tamiuoum pare, kung de manas tar nimalara uasang tar tukunumi. Inggoum mung uangoul sira harahampe tasir tamata gera uakeluk puk teres nimalara uasang tar tukunun. <sup>4</sup>Gete kula me kalamiuoum pare, “Inggou u uakeluk tang Poul,” kare kula me tang giamehe pare, “Inggou u uakeluk tang Apolos,” Inggoum hero tamatang gane harahampe i kot?

<sup>5</sup>Maionene Apolos? Maionene Poul? Raeim na toking tamatang kalekinale kompe God tekung tagorong mana turoum toro Uelhire Uaia. A Tamata Nomana ke heir kahakaha tenamira kalekinale raeim. <sup>6</sup>Inggou ku lebe tar uatun, Apolos teke pikpikir uamoloto taninin, bo God teke guata, maeit ke tungaranin kare hua. <sup>7</sup>Temaeit ahik me namana tang mai ke lebe ue tang mai ke pikir uamoloto tar kodomo te God puk manasampe ke kuat, maeit re huar inet. <sup>8</sup>Ahik me inete re uagiamehe sioko tang mai geke leb, kare tang mai geke pikir uamoloto tar kodomo, a siokono komper inete kura guatain, doh rasina ra turung bulaua kahakahampeis tar haua kura guatain. <sup>9</sup>Ge raeim pe na toking tamatang kalekinale God, doh inggoum ter iom, kare na uma God.

<sup>10</sup>Tar nipoulur nang God ger hamhamas geke heirin totoguo, inggo te misiana tasir tamatang atentiehe tun tar tuhanar um. Inggou ku uakodkodoho manasa tar uatabil, karu uamalataha manasa tar butur re me toko uaponolainir um, song me tang giamehe kalehe re me tuha tar um. Bo gisina kahakaha puk ra kapil uaia tun hape ra tuha pe. <sup>11</sup>Ge ahik pe me tamata re matotong uapono polukula i rana me uatabila tar butur ger niur uakodkodoho manas. Ge Iesu Kristo pe tero uatabil. <sup>12</sup>Mai gere tuha uaponola i rana tar buturuono me goul ue me palaua ger abeaba ue me palaua ger i ranar bulauan ue me inete ueltebeir puk, me douk ue me garasa ger mat ue me usir, <sup>13</sup>na kalekinaleon e turung ualasira uakalaharampein, hape re baka peon, binaka re pokosor mareining kedang. Ge a marein peono tere uakalahara taninina tar paden, inggon e pokoso keip toro hue, roono ro hue toro me uedanga tenas kalekinaler tamata ge para uiampe. <sup>14</sup>Gete popokoho deder haua ke tuhaion, inggon e turung kale tar bulauan. <sup>15</sup>Bo gete luh uakapon, inggon e turung hagou uasa, kare rouo na mamang inetelik, bo ra turung uelkarus pukin, kare udeil misiana tar tamata geke lukup tur toro hue.

\* 3.3 1Ko 1.10-11    † 3.4 1Ko 1.12    † 3.5-6 Apo 18.4,11,27-28    † 3.8-9 Mat 16.27; Epe 2.20-22    † 3.11 Ais 28.16; 1Pi 2.4-6    † 3.13 1Ko 4.5



### Inggoum na umang lotu God

<sup>16</sup>YInggoum ahik pah mung naman manate pare, inggoum uakapa tun tena umang lotu God, kare na Iabena Dedeil God e uangoul teil tamiuoum? <sup>17</sup>Ge me tang sioko re mamantouo tena umang lotu God, God e mamantouo pono tatanon. Ge na umang lotu pe God a dedeil, inggoum tena umang lotu God.

### Ahik me uauairana tasir tamat

<sup>18</sup>Ahik pah mung bohboho katongosioum. Gete kula me tang sioko tamiuoum pare, e atentiehe uakapa tun tar mamang niate uaialikane i kot, inggono paka tuktukar, song re atentiehe uaia tunon. <sup>19</sup>Ge a niate uaiang gane pe i kot a tuktukara re banga pe God, ge a puh pe ka boloin tonu uelhire God siun pare,

“God ke uatara keip tasir tamatang ate uaiantiehe tun,  
teres niate uaia katong.”

*Job 5.13*

<sup>20</sup>Doho giamehe ka boloin pare,

“A Tamata Noman e ate teres ninamanar tamatang ate uaiantiehe tunane i kot,  
a tabo tengkan.”

*Ker 94.11*

<sup>21</sup>Temaait ahik me tang sioko re uairana me tamat. A mamang inetelikinine a namiuoum, <sup>22</sup>Poul, Apolos, Pita, a kot, a nitua, o mat, kara inetene daan ue gaatala i uoum, ginin a siokor namiuoum uakapa tun. <sup>23</sup>Inggoum uakapa tun o nang Kristo, doh Kristo a nang God.

### No aposoul Iesu Kristo

**4** <sup>1</sup>Inggoum pakung kale sira kompe tamiueimene pare, no tamatang kalekinale Kristo. God ke umatoto tamiueim tar kauek, karing ualasira tena uelhireono ger ououu. <sup>2</sup>Doh tar uapopokoho tun tar puhonene, mai geke umatotoin e kaueke me inet, inggon e kalekinale uaia tun mare pokos a tamata uaia tar matana na tang kauek. <sup>3</sup>Inggou ahik pahu namana getung kedangoum tenag kalekinaleo ue mung tabila totoguo mesir mamahoholik. Inggou katongo ponompe, ahik pahu matotong kedanga katongoio. <sup>4</sup>Inggou u kalahar, karu naman manate tun tar puhonene, bo ahik pukumper puhonene pahe kulangua pare, inggou ahik pah ku guata uasa me inet. A Tamata Noman tere kedanga totoguo.

<sup>y</sup> 3.16 1Ko 6.19; 2Ko 6.16    <sup>z</sup> 4.2 Luk 12.42

<sup>5</sup>“Temaetit, inggoum ahik pah mung uolong kedanga tasir tamat e pokoso tun bakar marein ka umatoto tunin. Uanguangoul gete tapokisihar Tamata Noman, inggono tere me uakalahara tar haua re ouo tar kitup, kare me turung uatauete teres nimalaelhirir tamata gere moko tun tar koloun. Ter binakono tere turung heir kahakaha God tar uatakai tasir tamat.

### O Korin ka uasalais

<sup>6</sup>Ro uanotoug inggo ku mene keip tar inetenin totoug katong, kare tang Apolos, maetit a haua gekung longoro turugioum tamiraeim, inggoum mung turung ate tar tengkanar puhung men. “Ahik pah mung lalantiehe tar haua geka bolo uahiuain tono uelhire God.” Song ahikinguaoum pah mung uasala me tang sioko toso uanotoumiu ue mung de tar tang giameh. <sup>7</sup>Ge mai pe ke uagiamehe sioko tamiuoum toso uanotoumiu? A haua harahar inete halanoum tung kale? Bo gete kung kale manasoum tar inetenin, ae maene rung uasalasioum pare, ahik pah kung kale tur tar inetenin tang God?

<sup>8</sup>Inggoum kung siokor kale manasa tar haua rung malaraig, karung matoto teil tar mamang inetelik uakapa tun. Inggoum kung kotpokos o toia, bo raeim ahik tagu. Inngo u uahantiehe tun kung toia peoum, maetit ring la toia tagueim tamiuoum. <sup>9</sup>Bo inggo u banga sirangua pare, God ke tur uakalahara tunungua tamiueim no aposoul Kristo i mud ra la uelreireih pemer tamata, misiana tar tamata gera turung uiliatung poustoin tar matasir manai tar buturung uelpokos.<sup>d</sup> Inggeim ka uamakahasieim toro mamang buturulik, kare tasir anggelou, kare tasir tamata uakapa tun.

<sup>10</sup>Inggeim o tuktukara tun tang Kristo, bo inggoum mung iate tun tang Kristo. Inggeim o maluan, bo inggoum o tampopokoh, inggoum ra ueltada tunusiuoum, bo inggeim ahik pah ra ueltada tagusieim. <sup>11</sup>Doh ginempelaedaan, inggeim ra guatguata uasantiehe tunumpesieim, king gog, karing kamadak, ahik momio inum. <sup>12</sup>King kalekinalentiehe tunumpe mes paheimiu. Tar binaka ra menmene uasasieim, inggeim mi heir tapokis kompe tar niguata uaia. Tar binaka ra uaelmahingisieim, inggeim mi uatut kompe taninin. <sup>13</sup>Tar binaka ra boho tolasieim tar inet, inggeim mi hirhire tapokis hamas uaia kompe. Doh gine daan, inggeim misiananguar mongmongonine tar kot, kara muskurumung tar koto uakapa tun.

<sup>14</sup>Inngo ahik pah ku bolo tar puhunina tar uamatala tamiuoum, bo inggo misiana paho bung tug tun tamiuoum, maetit ku uatagin tamiuoum

---

<sup>a</sup> 4.5 1Ko 3.8   <sup>b</sup> 4.6 Roum 12.3   <sup>c</sup> 4.7 Roum 12.6   <sup>d</sup> 4.9 O uelhire rone o uakalahara hape re pokoso tasir tamata ka pehuarais tar uiliatung, kara tung poustois tar buturung uelpokos   <sup>e</sup> 4.11 2Ko 11.23-27   <sup>f</sup> 4.12 Mat 5.44; 2Te 3.8

tar puhunin. <sup>15</sup> O man, inggoum nomi burehentiehe nomanar tamatang ualasira tamiuoum tang Kristo, bo kung uatamana kompe tar tang sioko ge tar hangana Iesu Kristo pe, inggo teku pokoso sira pare, te tamamiuoum tur toro Uelhire Uaia. <sup>16</sup> Temaeit inggo u kula uapopokoho tun tamiuoum tar petut sira tun totogou.

<sup>17</sup> Ter tengkana tunon, maeit ku ualatuemeo tang Timoti tamiuoum, inggo u malaelhirintiehe tun tatanono misiana paha tug tun, inggon e uakeluk uaia tun, kare tagorong mana tun tar Tamata Noman. Inggono tere me uanamana tapokis tamiuoum tar haua ku ualasiragio tasir tamatang tagorong man tar mamang buturulik geku lalagio, kare hape ku uakeluk tun peo tang Iesu Kristo.

<sup>18</sup> O gisiamehe tamiuoum ka uakaiantiehe tunumpeis, teeit gisina ka namana pare, inggo ahik pahu lame tamiuoum. <sup>19</sup> Bo ahik pahi reh, karu me pokoso tamiuoum gete malarar Tamata Noman. Song ru me turung heheke uaia tunuo hape ra menmene tun pesinasiner kakaialik, kare hingiar nitampopokoh ra kale teiligisin. <sup>20</sup> Ge na Nitoia pe God inggono ter nitampopokoh ahik paha ineteng mene ueltebeir puk. <sup>21</sup> Te hingiar puh rung malarantieheioum? Hape rung malara peoum? U la keipime tamiuoum me puhung malit ue u la keipime tar uelmalaelhir, kara hamhamas?

#### Uelueluata liu tasir uraur

**5** <sup>1</sup> O mana noman, inggo ku longoro pare, o uraur o moko tamiuoum. A bulout ke kale katongo tena kuaha taman. A puhon ahik pahe uoto pokoso tagu tasir tamata gera tele tang God. <sup>2</sup> Doh inggoum mung uakaia tunusiuom, bo inggoum pakung maligom, karung ueldolom, karung matal. Inggoum pakung uelueluata liu tar tamaton, ahik pahe uangoul tagu tamiuoum.

<sup>3</sup> O man, inggo tabo nomanaio tamiuoum, bo a iabeiguo puk e uangoul tagu tamiuoum. Gine ahik peo pahu uangoul tagu tamiuoum, inggo ku heir manasa tar uabang manate tar tamatonene ke guata tar puhonene ter siokono kompe ge pakene u uangoul taguo tamiuoum. <sup>4</sup> Tat binaka rung uangoul toto polukoum tar hangana nagi Tamata Nomaneig Iesu, kare uangoul tagu ponor iabeiguo tamiuoum menia pono tena nitampopokohor Iabena nagi Tamat Nomaneig, <sup>5</sup> uakiha tar tamatonene tang Satan, maeit ra mamantouoinir tukununonener sa, kara uaudeilinin iaben e tuka tena mareinir Tamata Noman.

<sup>6</sup> Romio salasalalikioum o sa, inggoum ahik pah mung ate pare, a niguata uasanin, misianar sikir is, gere uadukis kai tar bereit?

<sup>8</sup> 4.15 Gal 4.19 <sup>h</sup> 4.16 Pil 3.17 <sup>i</sup> 4.17 Apo 19.22 <sup>j</sup> 4.20 1Ko 2.4 <sup>k</sup> 5.1 NKP 18.7-8; Ual 22.30 <sup>l</sup> 5.3 Kol 2.5 <sup>m</sup> 5.5 1Ti 1.20 <sup>n</sup> 5.6 Gal 5.9

<sup>7</sup>Uadelauana liu tar pensionur is, marung uangouloum tar timuhur niuangoul, misiana tar timuhur bereit, ge ahik pah ka uamoko taguig me is. Ge Kristo pe ter sipsiping tonosio niein uleikir Ju ra kilain, Leke Liu ro Mat, inggono ke kale uelmahing teregi niguata uasaieg. <sup>8</sup>Temaeit geti guluheig toro nieining Leke Liu ro Mat, inggeig ahik pahi tuha keip me bereit me pensionur is gere moko tellir niguata uasa, kara uelsae, bo inggeig i tuha tar timuhur bereit ahik me is. Ginina ter bereit delauana tun, karo man.

<sup>9</sup>Inngo ku bolome tamiuoum, ku kula tane ahikioum pah mung ueldokout keip tasir tamata gesir uraur. <sup>10</sup>Bo inggo ahik pahu kulkula tasir tamata gera tele tang God gera ura ueltebeir ue gesir kipala ue gesir bohoboho ue ra lotu tasir god bohoboh. Doh getung marang agoutoum tasir tamatasin, inggoum mung hiliu tar uanene i kot. <sup>11</sup><sup>9</sup>Doha tengkanar puhonene, maeit ku bolo polukumeio tamiuoum, teene inggo u marang kula pare, ahik tun pah mung ueldokout keip me uraur gere kula katongoin pare, e tagorong mana tang Kristo ue ger kipala ue gere lotu tasir god bohoboho ue ger uoto uelhire uasa ue ger uoto sipak uasa ue ra uoto boho tasir gisiamer tamat. Ahik pono pah mung matotong ein tokaha keip me niein tasisin.

<sup>12</sup>Inngo ahik pah tenag kalekinale tar uakodkodoho tas mais ra uangoul i behia tagigeig, God e turung kedanga tasisin. Bo inggoum nami kalekinale tar kedanga tas mais gera guata tar niguata ger sa i uantinanin tamiuoum. <sup>13</sup>No uelhire God o kula pare,

“Uelueluata liu tasir tamata uasa  
gera uangoul tagu tamiuoum.”

*Ualatut 13.5; 17.7*

### O tamatang tagorong mana tang Kristo ka ueluelpoluke katongois

**6** <sup>1</sup>Inggoumene rung tagorong mana tang Kristo, a sa tunumpe rung uoto guata pe pare, gete me tang sioko re uelperere keip tang uanoton, inggon e la uolo hirengua tasir tamatasine i behia gera tagorong boho tang Kristo tera tabila tasrasin, kare leke liu tosno tamata God ge pake tera tabila tasrasin. <sup>2</sup>Inggoum ahik pah mung ate pare, no tamata God pe gesir dedeil tera turung kedanga tasir tamata uakapa tunane i kot? Inggoum ahik pah mung matotong uakodkodoho katongosioum tar inete sira pare, gete pokoso tamiuoum, ge inggoum pe tosno tamata God? <sup>3</sup>Inggoum ahik pah mung ate pono pare, inggeig pe teri turung kedanga tasir anggelou? Temaeit inggoum mung uakodkodoho uai nomana tunusioum tar inete sira pare, gere pokoso tamiuoum tar nituaene rung uangoul keipin daan. <sup>4</sup>Temaeit gete kung ueluelkoioum, ae maene

° 5.7 Ais 53.7; 1Pi 1.19    P 5.8 Ual 16.3    ° 5.11 2Te 3.6; Tai 3.10    ° 6.2 UGO 20.4

rung uoto ueliuoum taninina tasir tamatang kedanga ge ahik pah ra ueltadairsir tamatang tagorong man? <sup>5</sup>Inggou ku mene tar puhonene u marang uamatala tamiuoum. Ahik mo tamatang ate tamiuoumeit rung tagorong mana tang Kristo tar tabila tar uelhirenin? <sup>6</sup>Bo inggoum gete kusa sikoroin me tang sioko me puh sira paar, tang uanotono katong e uolo ueliuingua tar puhono tasir tamata ge ahik pah ra tagorong mana tagu tang Kristo.

<sup>7</sup>A puhon e ualasira uakalahara manasa pare, inggoum ka pehuara manasasioum. Ae maene ahikioum pah kung uamaluanasioum ka guata uasa pesioum? Ae maene ahikioum pah kung uamaluanasioum ka uelour pesioum toro boh? <sup>8</sup>Bo inggoum kung guata uasa, karung uelour toso uanotoumiu.

<sup>9</sup>Inggoum ahik pah mung ate pare, o tamatasine i behia gera tagorong boh tang Kristo, gisina ahik menas hagar tagu tar Nitoiar nang God? Ahik pah mung bohboho katongosioum. Mai gere ura ueltebeir puk ue gere lotu tasir godo bohoboh ue gere uangoul uasa keip me kuaha ger le ue me bulout ger le ue a toking bulout ue a toking kuaha geura ueluelkale katongois ue mai gere heir ueltebeir puk tar tukununa tar hagar uasa, <sup>10</sup>ue a ueuenau ue a kupal ue ger uoto sipaka keip tar ninamana uasa ue gere uoto guata tar niguataniner sa tasir gisiamah ue gere uelour tasir tamat. O tamata gera uoto guata dede kompela tar niguatanin, ahik menas hagar tagu tar Nitoiar nang God. <sup>11</sup>Sioun o gisiameh tamiuoum ra kale teil tar niguatanin, bo inggoum puk ka uahuhu manasasioum, kara uadedeilisioum, kara uatur uakalaharasioum, o kodkodoho tun tar hangana nagi Tamata Nomaneig Iesu Kristo, kare tena Iabena Dedeil God ger nagigeig.

### A tukunugigeig na umar Tamata Noman

<sup>12</sup>Inggoum mung kula pare, “Inggou ka uauiaio tar guata tereg nimalara tar mamang inetelik” Bo a mamang inetelik pukunin, a giniamah ahik pahe guata uaia totomua. “Inggou ka uauiaio tar guata tereg nimalara tar mamang inetelik.” Bo inggou ahik pahu uamalua uakeluk pukuio tar mamang inetelikin. <sup>13</sup>Inggoum mung kula pare, a niein e la i lolono toro balanar tamat, karo balanar tamat o kale tar niein, bo God puk e turung mamantouo tasrasina tokah. A tukunugigeig, ahik pah ka heirig, ra ura ueltebeir keip pukig. A tukunugigeig a nanar Tamata Noman, doh inggonor Tamata Noman e uangoul teil tar tukunugigeig uakapa tun. <sup>14</sup>Na nitampopokoho God ke uatua tapokis tur tar Tamata Nomana toro mat, kare turung uatua tapokis pono tagigeig.

<sup>\*</sup> 6.9-10 Gal 5.19-21; Epe 5.5; UGO 22.15    <sup>†</sup> 6.11 Tai 3.3-7    <sup>‡</sup> 6.12 1Ko 10.23

<sup>¶</sup> 6.13 1Te 4.3-5    <sup>¶¶</sup> 6.14 Roum 8.11; 1Ko 15.20; 2Ko 4.14

<sup>15</sup>\*Inggoum ahik pah mung ate pare, a tukunugigeig pe o maharana Kristo? Ue inggo u matot u kale mo maharana Kristo, karu uamokola tar kuaha ger uraur? A puhon a mahang pe uasa tun. <sup>16</sup>ʷInggoum ahik pah mung ate pare, mai gere uangoul tokaha keip tar kuaha ger uraur, rasin e turung siokongua ra tukunus? Ge no uelhire pe God, geka boloing sioun o hire teil pare, “Ger tang torik, rasin a tang siok.”<sup>z</sup> <sup>17</sup><sup>a</sup>Bo mai gere uangoul tokaha keip tar Tamata Noman, inggono nasira siokor Iabena mer Tamata Noman.

<sup>18</sup>Ualo liu tar niguataniner sa ra uoto guataigir uraur, a giniameher niguata ger sa e moko puk i morene tar tukununar tamat, bor niguataniner sa ra uoto guataigir uraur e uasuasa katongongua tar tukunumioum uakapa tun. <sup>19</sup>Inggoum ahik pah mung ate pare, a tukunumioum pe na umang lotur Iabena Dedeil, inggonor Iabena Dedeil gekung kale turium tang God gere uangoul teil i lolono tamioum. Innga ahik paha noum totoum katong. <sup>20</sup><sup>b</sup>Inggoum a i ranantiehe tunur bulauamiu ke bulau tapokis pe God. Temaeit ueltada keip tang God tar tukunumi.

#### A ualatut tar le

**7** <sup>1</sup>Gine ter puhung uahire tapokis tar nidangatar namiuoum ge para uiamper tamata geta hik pahe le. <sup>2</sup>Gine daana ko pokoso uauleik pe ro uraur, temaeit auiantiehe tun tasir bulout mesir kuah tar le.

<sup>3</sup>A bulout e tangana tar tukununa tena kuah, a siokono ponompe tar kuah. <sup>4</sup>A tukununar kuah e moko tar nikaueken tena bulout ter siokono ponompe tar tukununar bulout e moko tar nikaueken tena kuah. <sup>5</sup>Ahik me tang sioko tas maisir le re ut tar tukununa tena kuaha ue tena bulout, gete me puh tun kura uelumokois rasin, tar uangoul uaha sikoro bak, kaura heir baka tenasira binaka tar lotu, song ura me uangoul tokaha poluk. Maeit Satan ahik pahe matotong uedanga uasa tasrasin tar binaka geta hik rasina pah ura matotong kaueke uaia katongois. <sup>6</sup>Gininanine ahik paha ualatoh, inggo u marang meneng poul puk tamioum tar puhonene. <sup>7</sup>Inggou u uahantiehe tun pono geta siokor kamobo sirar bulout totoguo. Bo God ke heir kahakaha tar nipoul tasir tamata uakapa tun. Gisina ka uamatoto kahakahampeis tar uangoulung kamobo ue ra le.

<sup>8</sup>Mais ge halana ta le, kare maisir kamob inggo u kula tasisina pare, auia geta uangoul sirampelasina pare, o kamobo misiana totoguo. <sup>9</sup><sup>c</sup>Bo geta hikisina pah ra matotong kaueke katongois teres nimalar, gisina ra le, ge auia pe tar le gete mamahanungur nimalaelhir.

\* 6.15 Epe 5.30    ʷ 6.16 Mat 19.5    <sup>z</sup> 6.16 Bolobolong Uakeken 2.24    <sup>a</sup> 6.17 Jon 17.21-23; Roum 8.9-11    <sup>b</sup> 6.20 1Ko 7.23; 1Pi 1.18-19    <sup>c</sup> 7.9 1Ti 5.14

<sup>10</sup> <sup>d</sup>Doh tamioumeitir le, inggo u ualatoh tamiouom pare; (Ahik pah inggo, bo inggon a Tamata Noman) A kuaha ger le ahik tun pahe matotong hiliu tena bulout. <sup>11</sup>Bo gete guatono paar, inggono pake uangoulung kamobo dedengua ue e me uelhiarou tapokis tena bulout. Doha bulout ger le, ahik tun pahe matotong ueluiltula liu tena kuah.

<sup>12</sup>Doh tasir bureheis, inggo u kula pare, (inggo katong ahik paha Tamata Noman.) Gete me uanotoumiuoum ke le me kuah, doh ahik pahe tagorong mana tagu tang Kristo, bo na kuaha pukuon e malarantiehe tun tar uangoul tokaha keip tena bulout, ahik paho ueluiltula tatanon. <sup>13</sup>Doh gete me kuaha tamiuoum ke le me bulout, ahik pahe tagorong mana tang Kristo, bo na bulout pukuon e malarantiehe tun tar uangoul tokaha keip tena kuah, ahik paho ueluiltula liu tatanon. <sup>14</sup>Ge a bulout pe ge ahik pahe tagorong mana tang Kristo e turung dedeil tur manasa tena nitagorong mana na kuah. Kara kuaha ge ahik pahe tagorong mana tang Kristo e turung dedeil tur manasa tena nitagorong mana na bulout. Ge o bung tumiuoum peene ahik pah mung tagorong mana tang Kristo paka hik paho dedeil, bo gine daan gisina ka dedeil manas.

<sup>15</sup> <sup>e</sup>Bo gete me bulout ue me kuaha ge ahik pahe tagorong mana tagu tang Kristo e marang hiliu tena kuaha ue tena bulout, uamaluana gere guatono tena nimalar. Ge a bulout pe ue a kuaha gere tagorong mana tang Kristo ahik pahe kale taguinir niduh. Ge God pe ke kila tagigeig i uangoul keip toro hiarou. <sup>16</sup><sup>f</sup>Hape ro ate pear kuaha gete ko poul tenang bulout mare tagorong mana tang Kristo? Hape ro ate pear bulout gete ko poul tenang kuah mare tagorong mana tang Kristo?

### Inggeig kahakaha i uangoul sirampe ke malara pe God

<sup>17</sup>Inggoum kahakaha pakung uangoul sirampe hape ke uamatoto per Tamata Noman. Uangoul sira tur dedempe tar uakekenen tar binaka ko tagorong mana tang Kristo. Gininanine tenag mene uakapa tuno ku meneig tasir toto tamatang toro buturung lotu uakapa tun. <sup>18</sup>A bulout geka pokoin ro kapokono tar binaka ke tagorong mana uakekene tang Kristo. Inggon e uangoul a nipokor kapokon. A bulout ge ahik pah ka pokoin ro kapokono tar binaka ke tagorong mana uakekene tang Kristo, inggon e uangoul a tabung pok. <sup>19</sup><sup>g</sup>Ge a hagar peonene ra poko peisir bulout ahik me inete re uapoksair baka tang mai ge ahik pah ka pokoin. Ter puhung uleik pakung guataioum teene, ueltada, karung uakeluk tar ualatohor nang God. <sup>20</sup>Inggeig kahakaha paki uangoul sira turumpeme tar uakekenen tar binaka ki tagorong mana tang Kristo. <sup>21</sup>Geta karabusa tar binaka ko tagorong mana uakekene tang Kristo. Ahik paho uamaluana tar puhon e kale uahiua totomua, bo gete kaein

---

<sup>d</sup> 7.10 Mat 5.32   <sup>e</sup> 7.15 Roum 14.19   <sup>f</sup> 7.16 1Pi 3.1   <sup>g</sup> 7.19 Roum 2.25; Gal 5.6; 6.15

me binaka re soloia o ualo uakelukungua. <sup>22</sup> <sup>h</sup>Namana huara kompe pare, ge teka kila toia tar karabus, gine daan ingga ke solo manasaia tur tar Tamata Noman. Doh gete ke soloia ke kale per Tamata Noman totomua ingga o karabus tang Kristo. <sup>23</sup> Inggoum a i ranantiehe tunur bulauamiu ke bulaua pe God, bo gine daan ingga ahik baka poluk paho pokos a karabus. <sup>24</sup> Temaeit, inggoum kahakaha pakung uangoul tokaha keip dedempe tang God tar binaka ka kila uakekenemeisium, karung tagorong mana tang Kristo.

### A puh e la tas maisir kamob, kare mais halana ta le

<sup>25</sup> A puhene e lain tasir kamob, inggo ahik pah ku kale tur me ualatoho tar Tamata Noman tar mene tasisin. Bo tar niueldolomo pukur nanar Tamata Noman, inggono ke uanaman manate tun totoguo tar niate gera ueltadain, karu turung uahireo tamiuoum. <sup>26</sup> Doh tar niduhunine re pokoslaene daan, inggo u namana sira pare, Auiantiehe tun totomua tar uangoul sira dedempe ro uangoul pe. <sup>27</sup> Inggger le ahik paho sir me hagar maura ueltageih. Inggoumeit ahik pah kung le ahik pah mung le. <sup>28</sup> Bo gete ko le ingga, auia ahik pah ko guata uasa. Doh gete me kuaha kamob ke le, auia inggon ahik pah ke guata uasa. Bo mais gera le ginela daan, gisina ra turung huata tar bureher niduh tar niuangoulur nas, temaeit ru marang hire taniko tamiuoum tar ineteninane.

<sup>29</sup> Ro uanotoug a tengkana maeit ku meno tar puhonene, teeit a binak a puhina uasa tun. Ginela daan, maisir bulout gesir le ra uangoul sira pare, ahik monosio kuah. <sup>30</sup> Mais gera kiring, kara ueldolomo gisina ra uangoul sira pare, ahik pah ra kiring, kara ueldolom. Mais gera uaha gisina ra uangoul sira pare, ahik pah ra uah. Mais geke bulbulau me inet, gisina ra uangoul sira pare, a ineter nasisin ahik paha nasisina tun. <sup>31</sup> <sup>i</sup> Mais geke kalekinale keipime tar ineteng gane i kot, gisina paka uangoul sira pare, ahik pah ra kalekinale keip taninin. Ge gine pelae daan gane i kot e rourouo uain manas.

<sup>32</sup> Inggou u malara tamiuoum ahik pah mung namanantieh, kare sirisium tar niuangoulung ginela daan. A bulout kamob e heir kompe tena binaka tar guata tena kalekinaler Tamata Noman, teeit inggon e marang uauaha tar Tamata Noman. <sup>33</sup> Bosir bulout gesir le ra namanantiehe kompe tar niuangoulung gane i kot, kare hape ra uauaha pe tosnosio kuah. <sup>34</sup> Temaeit gisina ra lih tar torikir lel. Ter siokono kompe tasir kuaha kamobo ue tasir kuaha gesir dedeil, gisina ra heir kompe tenas binaka tar kalekinale tar Tamata Noman, kare hape ra uadedeil pe tar tukunus, kare tar iabeis. Bosir kuaha gesir le ra namanantiehe kompe tar niuangoulung gane i kot, kare hape ra uauaha pe tosnosio bulout.

<sup>h</sup> 7.22 Plm 16; 1Pi 2.16    <sup>i</sup> 7.31 1Jo 2.17



<sup>35</sup>Inngo ku mene kompe tar puhonene tar poul tamiuoum. Inngo ahik pah ku marang tur tane tamiuoum tar le ue u heir me niduh tamiuoum. Bo inggo ku keip kai uain tar nitabilar namiuoum, marung kalekinale tokaha dede uaia kompelaoum tar Tamata Noman, ahik me lala uelpakaha ueltebeir. <sup>36</sup>Bo gete me tang siokor bulout re namanang pesiaua sikor, kara hik pahe guata uaia tena kuaha geka uamatotoin, inggono ra uarikin tane tanikain, song gete la matotoin na binakon, kare namana sira pare, e marang le, inggon e guata uakeluk kompe tena nimalar, a puhon ahik paha sa. Inggon e le. <sup>37</sup>Bo gete malaron e tur uanono keip nomana tena ninamana pare, ahik pahe le tar kuaha geka uarikin tanein tatanon, kare uakodkodoho katongoin, kare uamoko manasa tena ninamana pare, ahik pahe marang le tar kuahon inggono ke guata uaia. <sup>38</sup>Temaeit mair bulout gere le, inggono ke guata uaia, bo mai ahik pahe marang le inggono teke guata uaia uainintiehe tun.

<sup>39</sup><sup>j</sup>A kuah e uangoul dedempe tar nikaueken tena bulout tar binaka re tua harah, bo gete mata na bulouton, inggono song re soloin tar le tang mai re malarain geta tamatang tagorong manon. <sup>40</sup>Bo tar giameher paina puk, auiantiehe tun tatanono tar uangoulung kamob. Inngo u namana sira tar puhonene ku menein e la tur tena Iabena Dedeil God.

#### A niein gera guata keipig tar uahung tasir god bohoboh

**8** <sup>1</sup><sup>k</sup>Gine ter puhung uahire tapokis tar niein gera guata keipig tar uahung tasir god bohoboh; Inggeig i ate i siokor matoto teil tar niate. A niate e uakeip kai puk tar tamat, bo a nimalaelhir e poul uaiantiehe tun tar tamat. <sup>2</sup><sup>l</sup>A tamata gere namana pare, e ate tar inet, inggon halana te ate. <sup>3</sup>Bo a tamata gere malauehir tang God, inggono tere atein God.

<sup>4</sup><sup>m</sup>Temaeit, tar ein tar niein geka guata keipig tar uahung tasir god bohoboh, inggeig i ate, a god bohoboh ahik tunumpe me hangana tar uanene i kot. Ahik me god baka poluk a tang siokon siounur God. <sup>5</sup>Gitiempe gete kaeis mo inete gera kulais o god i Heuen ue kaeisane i kot. (O man o bureher god, karo bureher tamata noman.) <sup>6</sup><sup>n</sup>Bo tagigeigene a tang siokon sioun komper God, tamagigeig geke kotpokoso turur mamang inetelik, kare temaeit pono ri uangoul keipeig tar nituaena daan. Inggono gine re uangoul, bo a tang sioko komper Tamata Noman Iesu Kristo teono tere la turur mamang inetelik, doh temaeit pono ri uangoul keipig tar nitua.

<sup>7</sup>Bo ahik puk paho bureher tamata ra ate tar puhonene, o gisiameher tamata ke anga manasais tasir god bohoboh, tar binaka ra einisina tar

<sup>j</sup> 7.39 Roum 7.2-3   <sup>k</sup> 8.1 Apo 15.29   <sup>l</sup> 8.2 Gal 6.3   <sup>m</sup> 8.4 Ual 4.39; 6.4; Gal 4.8  
<sup>n</sup> 8.6 Epe 4.5-6

niein, gisina ra la namnamanangua kompe taninin, ka guata keip peig tar uahung tasir god bohoboh, doh gine daan a nieininin teke uatoboulungua teres ninamanasin tar hauar ineter sa ue a hauar ineter uia. Doha nieininin teke guata uasangua tasisin <sup>8</sup>Bor niein ahik pahe matotong keip uahuhut tagu tagigeig tang God. Inggeig ahik pahi matotong sa uasantiehe tun geta hik pahi ein ue ahik pahi uia geti ein. <sup>9</sup>°Tagin maeit ahikir nipileser noumua ro uangoul pela tereng nimalara katongo pahe uapunga tas mais gera toboul tar hauar ineter sa ue a hauar ineter uia.

<sup>10</sup>Gete me tang sioko re toboul, kare banga totomuaener naman manate ro ein to pe tenas umang lotur god bohoboho, inggon e ongolongua pono tar la ein taninin. <sup>11</sup>°Temaeit inggonener uanotougigeig gere toboul geke mata ueleheirin Iesu, reng niatea ke mamantouongua tatanon. <sup>12</sup>Gete ko guata uasa ingga tang uanotoum gere toboul tar hauar ineter sa ue a hauar ineter uia, ingga ko guata uasa pono tang Kristo. <sup>13</sup>°Temaeit gete ter nieininina geku einigio ke uapunga tang uanotouguo tar niguata uasa, inggo ahikingua pahu ein baka poluk tar singsingin, maeit ahikiono pahe punga tar niguata uasa.

#### **Poul ke tur uanono keip tun tena kalekinale pare, a aposoul**

**9** <sup>1</sup>Inggo ahik pah ke soloio? Inggo ahik paha aposoul? Inggo halana tu banga tang Iesu ge nagi Tamata Nomaneig? Inggoum ahik pah teka banga tosioum tar kalekinaler nouguo tar Tamata Noman? <sup>2</sup>°O gisiamer tamat ahik pah ra banga sira totoguo pare, a aposoul, bo toro mana tun, inggoum tekung kale tar haua ku ualasingragio ge inggoum pe tesir uaparokor nouguo pare, a aposoul.

<sup>3</sup>Gininanine teru turung tur keipigio tas mais gera marang kedanga totoguo. <sup>4</sup>°Ue ahikiono paha uia tamiueim tar kale tur me niein ue me kodom tar kalekinale king guatain? <sup>5</sup>Ue ahikiono paha uia tamiueim tar kilkila teil tosnomio kuaha gera tagorong mana misiana tasisitir gisiamer aposoul, kare misiana toso bung tahinar Tamata Noman doh Pita? <sup>6</sup>Ue teo puk me Barnabas mira kalekinale tar marang inet? <sup>7</sup>Mai re kalekinale pare, a tamatang uiliatung, kare bulaua katongoin? Ue mai re lebe mena lebe bino, kara hik pahe ein gete uanin? Ue mai re kaueke mo sipsip, kara hik pahe matotong inum me huh gera kale turig tasisin? <sup>8</sup>Inggo ku mene keip puk tena nitampopokohor tamat? Ahikir ualatut paha siokono taninin. <sup>9</sup>°Ge a ualatut pe ger nang Moses e hire pare, “Ahik paho uih tane tar uauanar kau tar binaka re kalekinale tar pioko liu tar kapokonor raes-uit.” Ter kau ke namanantiehe tunin God?

° 8.9 Roum 14.13-15; Gal 5.13    ° 8.11 Roum 14.15,20    ° 8.13 Roum 14.21

° 9.1 Apo 22.17-18; 26.16; 1Ko 15.8-9    ° 9.2 2Ko 3.2-3    ° 9.4 Luk 10.8    ° 9.9 Ual 25.4; 1Ti 5.18

Maeit ke mene tar puhon? <sup>10</sup> O manampe, God ke mene uatuha tola tar puhono tagigeig? Te paara noman, a puhon ka bolo uatuha tolain tagigeig, teeit mai re tau, kare mai re ueuer tar niein, inggono ke guata tar kalekinaleon, kare ate teil pare, e turung kale niein to pono tar haua ke tumarangain.

<sup>11</sup> Inggeim king uasis tar uatuna uaia ger nanar Iabena tamiuoum. Temaeit inggon ahik paha uia tamiueim tar kale tapokis tur me nipoul tamiuoum? <sup>12</sup> Bo gete mo gisiamhe ka uahueis tar kale tur me nipoul tamiuoum, inggeim here song ring kale tur me burehe uainir mamang inetelik tamiuoum? Bo inggeim ahik pah mi malar tar hagarion, inggeim mi kalekinale kompe, gitiempe ahik peem pah mi kale me bulauamiu, maeit ahik me inete re tur tane tonu Uelhira Uaia Kristo. <sup>13</sup> Inggoum ahik pah mung ate pare, mais ra kalekinale iuma tena umang lotu God, gisina ra kale niein to iuma tar umon? Kare mais ra kalekinale tar butur ra uoto guata toinir uahung, gisina ra uoto uelpakaha tar inete gere la tar uahung? <sup>14</sup> (-)

<sup>15</sup> Bo inggo puk ahik pah ku uakeluk me sisikinalik tar hagarion, doh ahik pono pah ku bolo tang roon, karu namana pare, mung turung guata ueleheiroum me inete totoguo, inggo u dentiehe tun geta kale liuin me tang siokor tamata tar haua ru sala keipio. <sup>16</sup> Doh tar binaka ru hire taueto toro Uelhira Uaia, inggo ahik pahu banotong uasalaio, bo inggo ka petutup tunio tar hire tauete tang roono ro Uelhira Uaia. A santiehe tun totoguo geta hik pahu hire tauete tang roon.

<sup>17</sup> Gete ku kalkalekinale pukuo tar hire tauete toro Uelhira Uaia teregir nimalar, inggo u banot u hinga me bulauoug. Bo inggo u guata pukumpe tar huar nimalara ke heiring God totoguo tar guat. <sup>18</sup> Doh hapengua me bulauoug? A bulauoug te gine, tar binaka ru hire taueto toro Uelhira Uaia, inggo u kalkalekinale puk ahik me bulauoug. Doh tar binaka ru hire tauete inggo tang roon ahik pahu uahinga ra heirio me inet.

<sup>19</sup> O man, inggo ke soloioene daan, inggo ahik paha nana me tang sioko pukur tamat. Bo inggo ku heir katongoio, a tamatang kalekinale puk tasir tamata uakapa tun maru pehuara mo bureher tamata mara la tang Kristo. <sup>20</sup> Binaka ru kalekinaleo tasir Ju, inggo u uakeluk tenas niguatasina maru pehuara tasisin. Doh mais ra uangoul i kukulebanga tar ualatut, inggo u la uangoul sira pono tasisin, (bo totoguo katongo puk ahik pahu uangoul tagu i kukulebanga tena nikauke na ualatut Moses.) Bo u uangoul sira kompe, maru pehuara tasisin. <sup>21</sup> Doh tas mais ge hik pah ra uangoul i kukulebanga tar ualatut, inggo u la uangoul sira ponampe tasisin, o man inggo ahik pahe soloio tar ualatutur nang God,

<sup>v</sup> 9.10 2Ti 2.6    <sup>w</sup> 9.11 Roum 15.27    <sup>x</sup> 9.12 Apo 20.34; 2Ko 11.9    <sup>y</sup> 9.13 Ual 18.1-3

<sup>z</sup> 9.16 Jer 20.9    <sup>a</sup> 9.20 Apo 21.20-26

bo inggo u uangoul i kukulebanga tar nikaueken tar ualatutur nang Kristo. Bo u la uangoul sira kompe maru pehuara tasisin.

<sup>22</sup><sup>b</sup>Doh tas mais ge ahik paho tang popokoh, inggo u la misiana sira pono tasisin. Inggo u la uakeluk sira tun tar mamang niguatalikir nasisin, maeit gete pokoso me puh, inggo u matotong pehuara mo gisiameh.

<sup>23</sup>Inggo u guata kompe tar hagarionene tar tur keip toro Uelhire Uaia mare turung kale keip ponoio tar niguata uaia.

<sup>24</sup>Inggoum ahik pah mung ate pare, geta marang uedangaisir tamat, mair ualontieh, a tang siokon sioun re pehuar, kare kale tar bulauan. Temaeit ualontiehe tun marung pehuaroum, karung kale me bulauamiu. <sup>25</sup><sup>c</sup>O tamata uakapa tun gera pilese tar haua ra petutupin tar kale, gisina ra uakeluk uaia tun tar ualatoh. Gisina ra pilese toro mahara roono mara kale toro keuar ge ahik paho moko dede tagu, bo inggeig i guata tar puhono mari kale toro keuara gero moko dede. <sup>26</sup>Temaeit inggo ahik pahu ualo sira tar tamata gere ualo togotog. Doh ahik pahu uelkoi sira tar tamata gere nun ueltebeir puk tar hagar. <sup>27</sup><sup>d</sup>Inggo u uatagala tun tar tukunug mare longoro tunono totoguo, maeit geta uedangaio tar binaka ru hire taueto tono uelhire God tasir gisiameh, inggo ahik pah ra matotong uapungaio me niuedang.

#### A uatagin tenas ueluatatang siounur Israel

**10** <sup>1</sup><sup>e</sup>Inggo u marang uanamana tapokis puk tamiuoum ro uanotoug tar inete ger man geke pokoso toso bung tubugigeig geka uakuakeluk teil tang Moses tar binaka ko kaeke ro mahar langit tasisin, kara talingorosina tang roon, kare tar binaka ka lih polakalasin tar laur ger Kubkubar. <sup>2</sup>Gisina uakapa tun ka siokor uahuhu tois toro mahar langit, dohi laur pare, no tamatang uakuakelukungua Moses. <sup>3</sup><sup>f</sup>Gisina ka siokor ein tar siokonor nieining tar iaben, <sup>4</sup><sup>g</sup>kara inum tar siokonor inumung tar iaben. Ge gisina pe ka inum tar kodomo geke tading tur toro palaua gero to iaben gere la teil tagu tasisin, doho palaua roon te Kristo. <sup>5</sup><sup>h</sup>Bo God puk ahik pah ke uaha tasir burehe tasisin, temaeit inggon ke uamata tasisin kare kasegir tukunusisin tar butur padenen.

<sup>6</sup><sup>i</sup>Doh gine daan, a mamang inetelikinin tere ualasira tapokis tagigeig mara hik pahi uamoko teregi nimalaelhir tar mamang inetelikininer sa ka guatguatameigisin. <sup>7</sup>Ahik pah mung lotu tasir god bohoboho misiana tasir gisiameh tasisin, ge a puh pe ka boloin, tono uelhire God sioun pare,

“O tamata ra tabil, kara ein, kara sipak,

<sup>b</sup> 9.22 2Ko 11.29   <sup>c</sup> 9.25 Pil 3.14; 2Ti 2.4-5; 4.7-8   <sup>d</sup> 9.27 Roum 8.13; 13.14

<sup>e</sup> 10.1 KT 13.21-22; 14.22-29   <sup>f</sup> 10.3 KT 16.35   <sup>g</sup> 10.4 KT 17.6; Aha 20.11

<sup>h</sup> 10.5 Aha 14.29-30   <sup>i</sup> 10.6 Aha 11.4,34; 1Ko 10.11

kara ualagoreih kara doum ra uaha pe tar niein.”

*Kale Tapokis 32.6*

<sup>8j</sup>Inggeig ahik tun pahi guata toro uraur, misiana ka guata per gisiamehe tasisin, a 23,000ir tamat tasisina ka mat tar siokonor binak.

<sup>9k</sup>Inggeig ahik tun pahi uedanga tang Kristo misiana ka guata per gisiameh, kare tung pousunguar soi tasisin. <sup>10l</sup>Ahik tun pah mung menmene uasa misiana ka guata per gisiamehe sioun tang Moses, kare tung pousunguar anggelou gere keip teil toro mat tasisin.

<sup>11</sup>Gininaniner inete ke pokos e ualasira tasisin, kara bolo uahuaig e uatagin tagigeigene ri uangoulene daan re lang kapa pelar binak.

<sup>12</sup>Temaeit gete kung namana siroum kung tur uanono tun, kapil uaia tunusioum getung pungoum. <sup>13m</sup>Namana huara kompe ahik me uatolaua uasanine re lame tamiuoum re giamehe sioko tanine re lame tasir tamata uakap, ge God pe a uauaman ahik pahe bangang duk tar uatolaua uasa re lame tamiuoum geta hikoum pah mung matot. Doh gete lamer uatolaua uasa tamiuoum, God e poul tamiuoum me hagar, maeit ahikioum pah mung pesiau.

#### **No nieinir god bohoboh, kare no nieinir Tamata Noman**

<sup>14</sup>Temaeit, inggoum ro bung kaloug, hiliu tar lotu tasir god bohoboh.

<sup>15</sup>Inggo u menmene tamiuoumener tangtangouo remi ninaman. Banga katongosioum tar haua ku meneio. <sup>16m</sup>A kapang tar niguata uaia geri heir keipieig tar niuah e uangoul tokaha keip tar deuatingina Kristo, doho bereit geri pisiseig o uangoul tokaha keip tar tukununa Kristo.

<sup>17n</sup>Teeit ge o sioko pe ro bereit, bo inggeig puk o bureh i la misiana sira pare, a tang siok, kari siokor ein toro bereit roon. <sup>18o</sup>Banga tola tasir Israel mais gera ein tar inete gera guatain tar uahung, gisina ra uangoul tokaha keip tang God tar butur ra guata toinir uahung.

<sup>19p</sup>Inggo u menmene pare, a uahung geka guatain tasir god bohoboh a to tengkan? Ue a god bohoboh a to tengkan? Ahik! <sup>20q</sup>Bo nas uahungur tamata gera tele tang God a uahungunin ahik pahe la tang God, e la tasir liouana uasa. Ahik pahu malara tamiuoum mung uangoul tokaha keip tasir liouana uasa. <sup>21r</sup>Inggoum ahik pah mung matotong inum tola tena kapar Tamata Noman, kare tena kapar liouana uasa. Ahik pah mung matotong ein to tena pateher Tamata Noman, kare tena pateher liouana uasa. <sup>22s</sup>Inggeig i marang uagehegehe tar Tamata Noman? Inggeig tesir tampopokohontiehe tatanon?

---

<sup>j</sup> 10.8 Aha 25.1-9   <sup>k</sup> 10.9 Aha 21.5-6   <sup>l</sup> 10.10 Aha 16.41-49   <sup>m</sup> 10.16 Mat 26.26-28  
<sup>n</sup> 10.17 Roum 12.5   <sup>o</sup> 10.18 NKP 7.6   <sup>p</sup> 10.19 1Ko 8.4   <sup>q</sup> 10.20 Ual 32.17; UGO 9.20  
<sup>r</sup> 10.21 2Ko 6.15-16   <sup>s</sup> 10.22 Ual 32.21

### O tamatang tagorong mana ka guata teres nimalar

<sup>23</sup> †Inggoum mung kula pare, “Inggo ka uauiaio tar guata tereg nimalara tar mamang inetelik.” Bo a mamang inetelik pukunin a giniamah ahik pahe guata uaia totomua. “Inggo ka uauiaio tar guata tereg nimalara tar mamang inetelik.” Bo ahik puk paha mamang inetelik re matotong poul me tamat. <sup>24</sup> †A tamat ahik pahe sir mena niuia katong, bo e sir kompe torosio uiar gisiamer tamat.

<sup>25</sup> †Ein tar mamang inetelik ra uabulauaig tar butur gera bulbulaua toigir singsingin, kara hik me dangat ia ka kale turiginin. <sup>26</sup> †Ge a niein penine i kot, kara mamang inetelik gere mokane i kot a nanar Tamata Noman.

<sup>27</sup> †Gete mo tamat ahik pah ra tagorong mana tang Kristo ra kila tamiuoum tar la ein to tonoso umasin, mung la getung malar, karung ein tar haua ra uatoko ueleheirin tamiuoum, ahik pah mung dangat ia ra kale turiginin. <sup>28</sup> †Bo gete me tamata re hire tamiuoum pare, “A nieininine ka guataig tar uahung tasir god bohoboh.” Song ahikioum pah mung ein taninin tono uiaene ke hire tamiuoum tar haua re moko tena niateon ia re la turunin. <sup>29</sup> †Doha niateonene ahik paha emiuoum na niater tang giamehe siokor tamat, ae maene re pemai to puk reg nimalaro tena niater tang giamehe siok? <sup>30</sup> †xGete ku heirio tar niuaha tang God tereg niein, ae maene ra meneio geku heir manasa peo tar niuaha tang God taninin?

<sup>31</sup> †yTemaait a haua gero einigia, karo inum ue a haua ro guatagia, uatakai keip dedempe taninina tang God. <sup>32</sup> †zAhik pah mung guata uasa tasir Ju ue tasir gime uan ue tosno tamata God. <sup>33</sup> †Bo mung guata sira puk misiana ku uauaha tun peo tasir tamata uakapa tun tar mamang hagarilik, ge inggo pe ahik pahu sir katongo torogo uia, bo inggo u sir torosio uiar bureher tamat, maeit ra banotong udeilisin.

**11** <sup>1</sup> †bPetut sira totoguo misiana ku petut sira tun peo tang Kristo.

### Uangoul i kukulebanga tar nikauek

<sup>2</sup> †Inggo u uaha tun tamiuoum, rung namana dede haraha pe totoguo tar mamang inetelik. Karung sanga uanono tun tar ualasira misiana harampe ku heir uain peo taninina tamiuoum.

<sup>3</sup> †Bo inggo u malara mung ate uaia tunoum pare, Kristo tere kaeke tasir bulout, doho bulout tera kaeke tasir kuah, doh God e kaeke tang Kristo. <sup>4</sup> †Doh tasir bulout uakapa tun, mai gere lotu ue gere hire tauete tena uelhire God tar buturung uelpokos, kare taku uaouo toro lun,

† 10.23 1Ko 6.12    † 10.24 Roum 15.1-2    † 10.26 Ker 24.1; 50.2; 1Ti 4.4    † 10.28 1Ko 8.7

× 10.30 1Ti 4.4    † 10.31 Kol 3.17    † 10.32 Roum 14.13    † 10.33 1Ko 9.20-22

† 11.1 1Ko 4.16    † 11.3 Uak 3.16; Epe 5.23

inggon ahik pahe ueltada tang Kristo. <sup>5</sup>Doh tasir kuaha uakapa tun, mai gere lotu ue gere hire tauete tono uelhire God tar buturung uelpokos, doh ahik pahe taku uaouo toro lun, inggon ahik pahe ueltada tena bulout, ahik me inete re uapoksair tatanon, kare tar kuaha ger nikakara ro lun. <sup>6</sup>Gete me kuah ahik pahe taku uaouo toro lun, inggono paka kout liuigir ulun, bo geta puhono ra matala keipin ro kuah geta kout liuigir ulus ue ra kakara liuigir ulus, inggono pake taku uaouo toro lun. <sup>7</sup><sup>d</sup>Bor bulout ahik tagu pahe taku uaouo toro lun, ge inggono pe tera banga toinir porene tar porene God, kare na uiniator God, bor kuah inggono tena uiniatoror bulout. <sup>8</sup><sup>e</sup>Ge a bulout pe ahik pah teka tuha keipin tar kuah, bo git a kuah teka tuha keipin toro maharanar bulout. <sup>9</sup>Ahik pah ter bulout ka tuhain tar poul tar kuah, bo git a kuaha ka tuhain tar poul tar bulout. <sup>10</sup>Ter tengkanonene, teeit o anggelou ra bang, maeit ra taku ro kuah e ualasira pare, na nikaueker kuah e moko toro lunon.

<sup>11</sup>Bo tar ueliahe puk tosno tamatar Tamata Noman, a kuah ahik pahe matot e pepe me pahen ge pake taboinir bulout, doha bulout ahik pahe matot e pepe me pahen ge pake taboinir kuah. <sup>12</sup>Ge a kuaha pe e la tur tar bulout, kare ter siokono ponompe a bulout ke pohoinir kuah. Bor mamang inetelik uakapa tun e la tur tang God.

<sup>13</sup>Dangata katongoia, auampe tar kuaha gete kale liu tono taku tar binaka re lotu tang God? <sup>14</sup>Ahikir inetenine ka touo keipig tagigeig pahe uamatala tar bulout gete uaouonanain. <sup>15</sup>Bo inggono pare, gete me kuaha ouonan, inggono ter niueltadar nanon, ge a uluna peononiner barah ka heirig tatanono mare ragom tane toro lunon. <sup>16</sup>Bo gete me tamata re marang uelperere tar puhonene ahik baka poluk me giniameher niguata tamiueim ue tosnoasio tamatang tagorong mana God.

### No nieinir Tamata Noman

<sup>17</sup>Tar ualatutunine ke la uoum, inggo ahik pahu matot u uairana tamiuoum, ge a mamang uelpokosolik per namiuoum a niguata uasa ke hahaua liu tar niguata uaia. <sup>18</sup><sup>f</sup>Tar uakikilangan, inggo ku longoro pare, tar binaka rung uelpokosoum, a siokor uan a uelsae e mok i uantinanina tamiuoum, doh inggo u tagorong mana sikoro nomanampe taninin. <sup>19</sup>Ahik me uaruara naman e uagiamehe siokongua tamiuoum, kare uakalaharangua mais ke bang paroko tunis God. <sup>20</sup>Tar binaka rung uelpokosoum, roon ahik pah tono nieinir Tamata Noman rung einioum. <sup>21</sup>Ge tar binakang ein pe o gisiamehe tamiuoum ra uoto ein uoum, ahik pah ra marang pepe uangoul tasir gisiameh, temaeit o gisiamehe ra gog, kara sipakang pahesir gisiamehe tar bureher inum. <sup>22</sup>Inggoum ahik mo nomio um tar ein to? Kare tar inum to? E baka sirono inggoum kung

<sup>d</sup> 11.7 Uak 1.26-27   <sup>e</sup> 11.8-9 Uak 2.18-23   <sup>f</sup> 11.18 1Ko 1.10-12

touahiua manasa tena lotu God, kara hik manasa pah mung ueltada tasir tiome. Mu malar u uairano tamiuoum tar inetenin? Inggon hera hik!

<sup>23</sup>Ge inggo pe ku kale tur tar Tamata Noman tar hauanine ru heir uainilagio tamiuoum. Nagi Tamata Nomaneig Iesu ke heirin Judas tasir uelmatana naboung. Iesu ke kale toro bereit, <sup>24</sup>kare heir tar niuaha tang God, kare pis toro bereit, kare kula pare, “Gine ter tukunuguo a eimiuoum, inggoum mung guata sira pare, tar namana huara totoguo.” <sup>25</sup><sup>g</sup>Inggono ke guata sira poluk binaka ka ein uakap, Iesu ke kale tar kap, kare kula pare, a kapene e ualasira tar timuhur uelhote tar deuatingiguo, inggoum mung guata sira pare, tar binaka rung inum keipoum tatanon, inggoum mung namana huara totoguo. <sup>26</sup>Ge a binaka pe rung einioum toro bereit roon, karung inum tola tar kap, inggoum mung tur keip, karung hire tauet, ke mata per Tamata Noman e tuka gete tapokisimeon.

<sup>27</sup><sup>h</sup>Temaeit, mai ahik pahe ueltada tar binaka re ein toro bereit ue binaka re inum tola tena kapar Tamata Noman, inggono ke kouh tena niguata uasa tar tukunun, kara deuatinginar Tamata Noman. <sup>28</sup>A tamat e banga katongo bakain tena nipiles, song re ein tar bereit, kare inum tola tar kap. <sup>29</sup>Ge mai pe re ein tar bereit, kare inum tola tar kap, doh ahik pahe naman manate uaia tun tar tukununar Tamata Noman, inggon e uasa katongoin re ein pe, kare inum. <sup>30</sup>Temaeitingua, o burehe tamiuoum, o manguh, karo momouh, karo gisiamehe tamiuoum ka mat. <sup>31</sup>Bo geti bang kedanga katongosieig, inggeig ahik pah ra matotong heirisieig me uabang manate.

<sup>32</sup><sup>i</sup>Tar binaka re heirir Tamata Nomana tagigeig me uabang manate, inggeig ra ualatutusiasieig, maeit inggeig ahik pah ra mamantouo keipisieig tar pang uanene i kot. <sup>33</sup>Temaeit, tamiuoum ro uanotoug tar binaka rung uelpokosoum tar ein tokah, uangougoul tasir gisiameh. <sup>34</sup>Mai tamiuoum, re gog, inggono pake ein to baka tena um, maeit ahikir uelpokosor namiuoum pahe kedangain God pare, a sa.

Doh tar giniamer puhunit re mok, inggo u me banga taninin getu tapokisime.

### A inete ke heirigir Iabena Dedeil

**12** <sup>1</sup>Gine daan, ro uanotoug, inggo u malara tamiuoum mung iate uaia tun pare, ahik pah mung kale uasa, karung tuktukara tar inete uaiaene re heirinir Iabena Dedeil. <sup>2</sup><sup>j</sup>Namana tapokis kompe tar binaka rung tele harahoum tang God. Inggoum ra uoto uoum keipisium tar bureher lel tar binaka rung uangougouloum i kukulebang tenas nikaueker god bohoboho gesir pau. <sup>3</sup><sup>k</sup>Temaeit, inggo gine ru hire

<sup>g</sup> 11.25 KT 24.6-8; Hib 8.8-13    <sup>h</sup> 11.27 Hib 10.29    <sup>i</sup> 11.32 Hib 12.5-6    <sup>j</sup> 12.2 Hab 2.18-19

<sup>k</sup> 12.3 1Jo 4.2-3



tamiuoum, ahik me tamata re mene keip tena Iabena God, kare kula pare, Iesu a sa ue me tamata re kula pare, Iesu a Tamata Noman, e kula kompe gete uangoul teilir Iabena Dedeil tatanon.

<sup>4</sup>A bureher kahakahar inete uaia re heirigir Iaben Dedeil, bo a sioko komper Iabena re heir taninin. <sup>5</sup>A bureher kahakahar kalekinale, bo a tang sioko komper Tamata Nomana ra kalekinaleiginin. <sup>6</sup>A bureher kahakahar kalekinale ri matotong kalekinalegieig, bo a tang sioko komper God re kalekinale keip taninin tasir tamata uakap.

<sup>7</sup>A Iabena Dedeil e uoto uakalahara katongoin tagigeig uakapa tun tar kahakahar inete uaia tar poul keip tar niuia tasir tamata uakap. <sup>8</sup>Na Iabena God ke heir kahakaha tar puhung uahire tasir gisiamer tamat, a uoun tar ninaman, kara niate uaia ter siokono komper Iabena ke heir pono tasir gisiamer tamata tar puhung uahireng tar niate. <sup>9</sup>Doh ter siokono komper Iabenono ke heir tasir gisiamer tar nitagorong man, doho gisiamer ka heiris tar nitampopokoho mara uauia tasir tamat tar mamang matelik, <sup>10</sup>doho gisiamer ka heiris tar nitampopokoho tar touo tar inet. Doho gisiamer ka heiris tar hire tauete tono uelhire God ngohina tar propet, doho gisiamer ka heiris tar niate tar ate parok, ge pare la turur niateono tar Iabena Dedeil ue ahik. Doho gisiamer ka heiris tar nitampopokoho tar mene tar uelhireng gime uan, doho gisiamer ka heiris tar hire luaka tar tengkanar puhung menon. <sup>11</sup><sup>m</sup>Gininanine tena kalekinaler tang siok, a siokonor Iaben, kare heir kahakaha taninina tasir tamat terener nimalar.

### A siokor tukunun a bureher maharan

<sup>12</sup><sup>n</sup>A tukunun a siok, bo ka tuha keip pukin tar bureher maharan, doha maharan e la tur kompe tar siokon siounur tukunun ter siokono tang Kristo. <sup>13</sup><sup>o</sup>Ge inggeig pe ka siokor uahuhu keipisieig tar siokon siounur Iabena hingiampe ro matina tamat, o Ju, o Grik o tamata gesir o karabus ue gisis ka solois. Inggeig tokah ki inum tar siokon siounur Iaben.

<sup>14</sup>A tukunun, ahik pah ka tuha keip pukin toro sioko ro mahar, ka tuha keipin tar bureher maharan. <sup>15</sup>Gete kular kekena pare, inggo ahik paha nana tagur tukunun, teeit inggo ahik paha liman. Bo ahik pukumper puhono pahe aha liuingua tatanon, inggonor keken o maharanamper tukunun. <sup>16</sup>Doh gete kular talingana pare, inggo ahik paha nana tagur tukunun, teeit inggo ahik paha matan. A puhon ahik pahe aha liuingua tatanon, inggonor talingan o maharanamper tukunun. <sup>17</sup>Geta matana uakapa komper tukunun. A tukunun ahikingua pahe matotong longor. Doh geta talingana uakapa pukur tukunun, a tukunun ahikingua pahe matotong amuh paroko tagu me inet. <sup>18</sup>God ke uamoko manasampe tang

<sup>1</sup> 12.4 Roum 12.6   <sup>m</sup> 12.11 1Ko 7.7   <sup>n</sup> 12.12 1Ko 10.17   <sup>o</sup> 12.13 Gal 3.28

hingia ro mahara tena butur ke malara pe taninin ia re mok. <sup>19</sup>Ahik mo mahar sioko tanininar mahara ro matoto uakotpokoso me udeilir tukunun. <sup>20</sup>Bo inggonor tukunun a sioko manasampe, bo a burehe pukur maharan.

<sup>21</sup>A matan ahik pahe matotong kula tar limana pare, “Inggo ahik pahu uahinga to totomua!” Doha liman ahik pahe matotong kula tar kekena pare, “Inggo ahik pahu uahinga to totomua!” <sup>22</sup>A mahmahanine tar tukunun geri kulagieig a manguh, ginin na kalekinale uleik tun. <sup>23</sup>Doha mahara geri uaikotogieig ginina tera ueltada tunig. Doha mahara geri touaouosieig roono tera ueltadantiehe tunin. <sup>24</sup>O mahara gero mataiantiehe tun tar tukunun ahik pah ra touaouoin. Bo God ke uauiliodout tokaha tatanonor tukunun, kare heir tun tar uleikir ueltad tang hingia ro mahara ro i kotontiehe tun. <sup>25</sup>God ke guata tar puhonene, maeit ahikir tukunun pah ra ueluelpakah ueltebeirin. Bo God e malara tanininar mahmahar tukununa uakapa tun tar uelkaueke katongoig tar siokonor nikauek. <sup>26</sup>Doh gete mo mahar sioko ko kale uelmahing, a maharana uakapa tun e siokor kale uelmahing keip tang roon. Doh gete mo mahar sioko ka uatakaiaian, a maharana uakapa tun ra siokor uatakai keip tang roon.

<sup>27</sup><sup>P</sup>Inggoum uakapa tun ter tukununa Kristo, mung siokor uangoul tokaha teil tar tukununon. <sup>28</sup><sup>q</sup>Dohi uantinanina tasir tamatang tagorong man, God ke uamatoto:

uakikilanga tasir aposoul,  
 song o propet,  
 song o tamatang ualasil,  
 song o tamatang touo tar inet,  
 song tas mais geke heirisir Iabena Dedeil tar nitampopokoho tar uauia tasir momouh,  
 song tas mais gera uoto poul tasir gisiameh, song maisir tang uoum keip,  
 song tas mais gera mene tar uelhireng gime uan.

<sup>29</sup>Ahik paho tamata uakapa tunur aposoul, ahik paho tamata uakapa tunur tang ualasil, ahik paho tamata uakapa tun ra matotong touo tar inet. <sup>30</sup>Ahik paho tamata uakapa tun ra kale teil tena nitampopokohor Iabena Dedeil tar uauia tar mamang matelik, ahik paho tamata uakapa tun ra mene tar uelhireng gime uan, ahik paho tamata uakapa tun ra matotong hire tauete tar tengkanar ueluatat. <sup>31</sup><sup>r</sup>Bo inggoum mung petutup tar malara me inete uaia me i ranantiehe tun tur tar Iabena Dedeil.

Gine daan Inggo u marang ualasila uaia tun tamiuoum tar hagar uaiantiehe tun.

<sup>p</sup> 12.27 Roum 12.5    <sup>q</sup> 12.28 Epe 4.11-12    <sup>r</sup> 12.31 1Ko 14.1

Na uelmalaelhir uleik tunur nitampopokoho ke heirinir Iabena Dedeil

**13** <sup>1</sup>Getu meno tar mamang uelhireng gime uanilik ue u mene sira tasir anggelou, doh taboinir nimalaelhir, inggo misiananguar inete gere ualagoreih ueltebeir puk. <sup>2</sup><sup>s</sup>Doh getu kale teilo tar nitampopokoho tar hire tauete tono uelhire God misianar propet, karu naman manate tar ineter ououoor nang God, karu ate tena niateon, doh regu nitagorong mano a uleik tun, u matot u uain tar siusan, bo tabo pukinir nimalaelhir totoguo, inggo misianar inete ger kalilon. <sup>3</sup>Doh getu bulo tenag mamang inetelik tasir tiome, karu heir katongo tar tukunug ra ualuhin, bo tabo pukinir nimalaelhir, inggo ahik pahu matotong kale me bulauoug.

<sup>4</sup>A uelmalaelhir a uanguangoul sikor, kara hamhamas. A uelmalaelhir ahik paha gehegeh ue a uoto uasalain ue a uoto uakaiaain. <sup>5</sup>A uelmalaelhir ahik pahe uoto uahagouo uasa ue a kupal ue a nimmalian. A uelmalaelhir ahik pahe uoto kale toto tagu tar niguataniner sa. <sup>6</sup><sup>t</sup>A uelmalaelhir ahik pahe uaha tagu tar niguataniner sa, bo e uaha kompe tar niguataniner man. <sup>7</sup><sup>u</sup>A uelmalaelhir e uoto uakeluk dede tar niguatanin; guata bolongur, tagorong man, tagorong mana teil tar haua re turung pokos i uoum, tur uanon.

<sup>8</sup>A nimalaelhir e la dede, bor nitampopokoho tar hire tauet tono uelhire God misianar propet, e turung tuka kout. Doha nitampopokoh, kara niate tar mene tar mamang uelhireng gime uanilik e tuka kout pon. Doha niate pon e turung tuka kout. <sup>9</sup>Ge inggeig pe i ate puk tar sikin, kara sisikinalik pono nas mener propet. <sup>10</sup>Doh gete udeil uakapa tunono re la peme, gininar sikin e turung rou. <sup>11</sup>Tar binaka ru keketikio, inggo u mene sira tasir keketik, doh regu ninamano misiana tasir keketik. Bo ku la kalan manasa peo, inggo ku la hiliu manasa tar niguatanin. <sup>12</sup>Te misiana tagigeig, gine daan inggeig i banga sira misiana geti bangala toro sisira gero hihihiou, bo gitila i uoum, inggeig song ri turung banga uaia tun tang God. Gine daan inggo u ate puk tar sikin, bo gitila i uoum inggo song ru turung atentieh uaia tun misiana re ate uaia pe God totoguo.

<sup>13</sup><sup>v</sup>Ter touonor inete rasine tere turung kalekinale dede; a nitagorong man, kara nitagorong mana teil tar haua re turung pokos i uoum, kara uelmalaelhir. Bo taninina puk a uelmalaelhir ter i rana uain.

A nitampopokoh geke heirinir Iabena Dedeil

**14** <sup>1</sup><sup>w</sup>Uakeluk tena niguata uaiar uelmalaelhir, karo malara tar inete uaia ke heirigir Iabena Dedeil, karo malarantiehe tun tar

<sup>s</sup> 13.2 Mat 17.20   <sup>t</sup> 13.6 Roum 12.9   <sup>u</sup> 13.7 1Pi 4.8   <sup>v</sup> 13.13 1Te 1.3   <sup>w</sup> 14.1 1Ko 12.31; 14.39

hire tauete tono uelhire God ngohinar propet. <sup>2</sup>Ge a tamata pe gere mene tar uelhireng gime uan, inggon ahik pahe menmene me tamata puk, inggon e menmene tang God. Ahik me tamata re naman manate tar haua re menmeneion, ge inggono pe e mene tar ineter ouoou re hireigir Iabena Dedeil. <sup>3</sup>Bo mais uakapa tun gera hire tauete tono uelhire God misianar propet, gisina ra uatampopokoho, kara uaongol, kara uamamahoul tasisin. <sup>4</sup>Ge mai pe gere mene tar uelhireng gime uan e poul katongo kompein. Bo mai gere hire tauete tono uelhire God ngohinar propet e poul tasir tamatang lotu uakapa tun.

<sup>5</sup>Inggo u malara tamiuoum uakapa tun tar mene tar uelhireng gime uan. Bo inggo puk u malara tun tamiuoum uakapa tun tar hire tauete tono uelhire God misianar propet. Ge a tamata pe gere hirehire uoum teil tono uelhire God misianar propet, inggon a i ranantieh tun tar tamata gere mene tar uelhireng gime uan, bo auia kompe gete hire uakalaharona tar menenin mare poul tasir tamat tar lotu.

<sup>6</sup>Ro uanoutog getu lameo tamiuoum, karu me uelhireng gime uan tamiuoum hapengua re poul penina tamiuoum? Ahik pahe matot. Te getu keip tunumeo tar inete timuh ger man ue me giniamer niate ue me giniamer mene ger nang God ue me giniamer ualasira ter ineteninane tere turung poul tun tamiuoum.

<sup>7</sup>Ter siokono kompe tar ineteniner mat gere ueluelbobe ueltebeir puk re kaling pe misiana tar rauoto gera uig, karo gita, hapengua re matotong longor paroko per tamata tang hingia ro kereker ra kerein e matoto tun geta uauelmatoutin ro kalkalingina ro gita re kaling per rauot, song ra longor parokoin. <sup>8</sup>Doh hape geta hik ro tuil paho kaling ualeik uaia tar uahire me uiliatung maingua re matotong kaleuatoro tanik? <sup>9</sup>Ter siokono getung menoum tar uelhireng gime uan tasir tamat, bo ra tele puk toro uelhire rone rung mene keipioum. Hapengua ra turung naman manate per tamat tar hauene rung menmeneioum? Inggo mung menmenengua kompe tar hagar.

<sup>10</sup>O man, gane tar koto uakapa tun, doh ginin auia uakapa tun tasisit gera naman manate taninin. <sup>11</sup>Bo geta hikio pahu longor paroko ue u naman manate toro uelhire roon, gine ke mene toro uelhire roon inggon a peng gime uan, raeim mira uelteleis raeim. <sup>12</sup>Ter siokono tamiuoum mung malara tun pe tar kale tur me inete uaia tun tar Iabena Dedeil. Uedanga tar kale tar nitampopokoh gere heirinir Iabena Dedeil gere turung poul tasir tamatang lotu.

<sup>13</sup>Temaait mai geke heirinir Iabena Dedeil tar nitampopokoho tar mene tar uelhireng gime uan, inggon e lotu mare hire uakalahara tar tengkanar puhung mene ke menein. <sup>14</sup>Gete ku kotouo tenag lotu toro uelhireng gime uan, a iabeiguo e lotu, bo regu ninamano e tel. <sup>15</sup>Doh hapengua ru guata peo? Inggo u lotu keip tar iabeig, karu

lotu keip pono tereg ninaman, karu kere keip tar iabeig, karu kere keip pono tereg ninaman. <sup>16</sup>Gete ke uatakaiar iabeimiuoum tang God rung lotu pe, hapengua re hahaua per tamata tar “o mana tun” geta hik pahe naman manate tar haua kung menegioum? <sup>17</sup>O man, inggoum kung heir tun tar niuaha tang God, bo tasir gisiamehe pukur tamat, gisin ahik pah ka kale me nipoul.

<sup>18</sup>Inggou u heir tun tar niuaha tang God tar nitampopokohene ka heirin totoguo tar mene tar mamang uelhireng gime uanilik, a uleik uain tar namiuoum. <sup>19</sup>Bo tar binakang uangoul tokaha puk, inggo u uelhire uakalahara kompe tar uelhire geru naman manateig tasir tamat ahik pahu marang uelhire me uelhireng gime uan.

<sup>20</sup>\*Ro uanotoug ahik pah mung namnamanang keketik, bo mung uangoul uaia sira kompe tasir keketik tar niguataniner sa, karung kale puk tar ninamanang mahoh. <sup>21</sup>Ge a puh pe ka boloin tono uelhire God sioun pare,

“Inggou u turung mene tar mamang uelhireng gime uanilik,  
karu meneng tur keip tar uelhirenin tasir gime uan,  
bo gisina puk ahik pah ra turung longoro totoguo.”

*Aisaia 28.11-12*

Teke kula per Tamata Noman.

<sup>22</sup>Temaait a nitampopokohonene tar mene tar mamang uelhireng gime uanilik inggon a uaparokor nasisit ahik pah ra tagorong mana tagu tang God, ahik paha nasisit ra tagorong manang sioun tang God. Doha nitampopokoho tar hire tauete tono uelhire God misianar propet a uaparokor nasir tamatang tagorong mana tang God, ahik paha nasisit ra tagorong boho tang God. <sup>23</sup>†Temaait geta siokor pepe tokahar tamata uakapa tun tar lotu, kara siokor mene tar mamang uelhireng gime uanilik, kara me ueluparame mo tamata ue mais ge ahik pah ra tagorong mana tang God, doh ahik pah ra naman manate, gisin ra turung kula tamiuoum pare, “o popouluan!” <sup>24</sup>‡Bo gete mo gisiameh ahik pah ra tagorong man ue ahik pah ra naman manate, ra me lame tar binaka rung mene uakalahara inggoum tono uelhire God misianar propet. Gisin e turung kakalahara tunungua res niguata uasa. Doha mamang menelik geka longoroigisina ginina tere turung kedanga tasisin. <sup>25</sup>§Doha mamang inetelik ger ououu teres ninamanasina ra turung ate uakapaig, gisina ra turung hatup, kara lotu tang God, kara kula pare, “God gine nomana tun re uangoul keip tamiuoum.”

\* 14.20 Epe 4.14 † 14.23 Apo 2.13 ‡ 14.24 Jon 16.8

### A uelae tokah e poul tasir tamatang lotu

<sup>26</sup>aRo uanotoug hapengua ri guata pe inggeig? Tar binaka rung uelpokosoum, a tang siok e pokoso keip tono kereker, a tang giameh e pokoso keip tar ualafir, a tang giameh e pokoso keip tar timuhur uelhirer nana ger nang God, a tang giameh e mene tar uelhireng gime uan, kara tang giameh e mene uakalahara tar tengkanar uelhirenin. Doh ter ninamana uleik tun, tar mamang niguatalikinin; ter poul, kara uatampopokoho tar lotu mare hua. <sup>27</sup>Maeit tar binaka rung uelpokosoum, doh gete me tang sioko re mene tar uelhireng gime uan, ahik pah me tang torik ue i ranahia tar tang touono ra siokor mene tokah, a tang sioko baka uoum re men. Doh mo gisiamhe tera mene uakalahara tar tengkanar menenin. <sup>28</sup>Bo geta hik me tamata re ate tar tengkanar menenin, mai geke mene tauete tar menenin, inggon e tabila bukuk, kare mene katongo kompein, kare tang God.

<sup>29</sup>bUahue kompe me tang torikir propet ue me tang touon tera men. Kare mo gisiamhe tera turung longor, kara kedanga uaia tun tar mene ka meneigisin. <sup>30</sup>Bo gete ke mene taueter uakikilanganar propet mo men, doha tang giamehe ke kale tar mene geka heirin me kaluasisine ra tabil, inggonor uakikilangan pake uakenua tar men, song re mene taueter uatang torikina tar hau ke kalein. <sup>31</sup>Ge inggoum pe mung hire kahakahampe tar haua ke hirein God tamiuoum. Maeit o tamata uakapa tun ra turung kale niate, kare me nipoul tur tar uelhirenin. <sup>32</sup>A iabene ger nasir propet e moko tenas nikaueke katongosin. <sup>33</sup>Ge God pe e de tar ualagoreih ueltebeir ge inggono pe a Godong tar uelhiarou.

A puhonene a puhung mana tun tasir tamatang tagorong man, kare toсно tamata God gesir dedeil. <sup>34</sup>cTe misiana king ueltupara pe inggeim tenas ualatutur Ju e kula pare, “O kuaha uakapa tun, ahik pah ra matotong tur mena kalekinaler lotu, kara hik pono pah ra matotong uahueis tar mene tagu me inete tar lotu. Gisina ra uangoul i kukulebanga tar nikaueken tar ualatut.” <sup>35</sup>Bo gete me inete ra marang ate uaiaisisin, gisina ra la turung dangata to uaia tonosio bulout iuma tonosio um. Ge a ualamatala tun pe tar kuaha tar menmene tar binakang lotu.

<sup>36</sup>Ko uakekene tur nomana no uelhire God tamiuoum? Roono ko la pukume tamiuoum mes pahemiu? <sup>37</sup>dGete mai re kulain pare, a propet ue ke kale nitampopokoho to tar iabena Dedeil, inggono pake bang paroko kompe pare, a inetenine ku bololagio tamiuoum e la tur tena ualathor Tamata Noman. <sup>38</sup>Bo geta hikono pahe bang paroko tar puhon, God ahik pono pahe bang paroko tatanon.

<sup>39</sup>Temaeit, tamiuoum ro uanotoug, malarantiehe tun tar hirehire uoum teil tono uelhire God misianar propet, ahik pah mung tur tane

<sup>a</sup> 14.26 1Ko 12.8-10   <sup>b</sup> 14.29 1Te 5.21   <sup>c</sup> 14.34 1Ko 11.3; 1Ti 2.12   <sup>d</sup> 14.37 1Jo 4.6

tasir tamata gera mene tar uelhireng gime uan. <sup>40</sup>Bo a mamang inetelik uakapa tun ra guata keipig tar niguatar kodkodoh, kara hagar uaia tun.

### Na nitua tapokis Iesu Kristo

**15** <sup>1</sup>Ro uanotoug, inggo u marang uanamana huara puk tamiuoum toro Uelhire Uaia geku hire taueteio tamiuoum. Inggoum mung kale teil tang roon, karung tur uanonono keip tun tang roon. <sup>2</sup>Doh roono ro Uelhire Uaia tero uaudeil tamiuoum, getung sanga dedeoum tar uelhire geku hiregio tamiuoum te gete kung tagorong mana pukuoum me inetenit ahik paha mana tar kikilangan.

<sup>3</sup>Ge a haua pe ru kaleio, inggo u heir uain taninina tamiuoum. A puhene ter puhung uleik tun; Kristo ke mat tar niguata uasar eigigeig, ro hire teil pe no uelhire God. <sup>4</sup>Inggono ka keuin, kara uatua tapokisin, ke karuh baka per touonor marein, ro hire teil pe no uelhire God. <sup>5</sup>Inggono ke me uamakahain tang Pita, song tasir hangaul kara tang torik. <sup>6</sup>I muduhia song ke me uamakahaiono tar siokonon binaka tasir burehener tamatang tagorong man ke siauais tar 500ir tamat. O gisiamehe tasisina ra uangoul harahene daan, karo gisiamehe ka mata manas. <sup>7</sup>Song ke me uamakahain tang Jems, song tosno tamatang uakuakeluk uakapa tun. <sup>8</sup>Doh inggo ter uadouhina tasisina uakap, ku me banga tagu pono tatanono ngohina tar tamata geka poho koutin tena binak.

<sup>9</sup>Ge inggo pe ter aposoulener tabo hangan, doh inggo ahik tun paha tamata uaia mara kila taguio pare, a aposoul, teeit inggo ku guatguata uasame tosno tamata God. <sup>10</sup>Bo tar nipoulur nang God ger hamhamas ke heirin totoguo, temaeit rung bangoum totoguo daana pare. Doh tar hamhamasonene ke heiriono totoguo ahik me inete ke uapekout tagu. Doh inggo ku kalekinalentiehe uaia uain tasisin, bo ahik puk pah tereg nitampopokoho katong. Inggoum ku kalekinale keip kompe tar hamhamasene ke heirin God totoguo. <sup>11</sup>Temaeit, ahik me ineter giamehe siok getu hire taueto toro Uelhire Uaia ue gisin. Ter uleik tunur puh teene inggoum kung tagorong mana tun toro Uelhire Uaia king hiregieim tamiuoum.

### O tamata gera mat ra turung tua tapokis

<sup>12</sup>Doh gete king hire tauete inggeim pare, Kristo ka uatua tapokis turin toro mat, doh ae maeit ra kular gisiamehe tamiuoum pare, o tamata geka mat ahik pah ra matotong tua tapokis? <sup>13</sup>Doh geta hikir mat pah ra matotong tua tapokis, Kristo ahikingua pono pah ka uatua tapokis turin toro mat. <sup>14</sup>Doh geta hik Kristo pah ka uatua tapokisin, a haua

<sup>e</sup> 15.3 Ais 53.5-12    <sup>f</sup> 15.4 Mat 12.40; Apo 2.24-32    <sup>g</sup> 15.5 Mat 28.16-17; Luk 24.34

<sup>h</sup> 15.7 Apo 1.3-4    <sup>i</sup> 15.8 Apo 9.3-6    <sup>j</sup> 15.9 Epe 3.8; 1Ti 1.15    <sup>k</sup> 15.10 2Ko 11.23

geking hire tauetegieim tamiuoum, ginin a tabo tengkanangua, kare siokonongua pono teremi nitagorong manoum.

<sup>15</sup>Doh inggeim mi turung kouhungua pon, king bohboho pe tang God, teeit king hirhire tauete teil pe inggeim pare, inggono ke uatua tapokis tang Kristo. Doh geta hikir tamata pah ra matotong tua tapokis, God ahik pono pah ke uatua tapokis tang Kristo. <sup>16</sup>Doh geta hikir tamata gera mat pah ra matotong uatua tapokis, Kristo, ahikingua pono pah ka uatua tapokisin. <sup>17</sup>Doh geta hik God pah ke uatua tapokis tang Kristo, remi nitagorong manoum tatanon a tabo tengkanangua, doh remi niguata uasaoum e moko dede. <sup>18</sup>Doh mais geka tagorong mana tang Kristo, doh ka mat, gisina ra turung heilingua. <sup>19</sup>Doh geting tagorong mana teil pukeimene daan ring uangoul pe tang Kristo, inggeim tering la turung tiomentiehe tunungua tasir tamata uakapa tun.

<sup>20</sup>Bo toro mana tun Kristo ke mat, kare uatua tapokis God tatanon. Ter uakikilanganar kukuanan ka uamunain tas mais geka mat. Doh gisina ra turung tua tapokis pon. <sup>21</sup><sup>l</sup>Ge o mata pe ko pokos, teeit tar haua ke guatainir tamat. Ter siokono kompe a nitua tapokis ke pokoso pon, teeit ke guata uoum per tamat. <sup>22</sup>Ge o tamata uakapa tun pe ra mat, teeit tang Adam, bo tang Kristo, o tamata uakapa tun ra turung tua tapokis. <sup>23</sup><sup>m</sup>Bo ra uatua tapokis kahakaha kompeis e lampeis hape ra uelture peha. Kristo tera uatua tapokis uakikilangain, song gete lahaon, song tes maisinguar nanon.

<sup>24</sup>Tar binaka ke mamantouo Kristo tar mamang nitampopokoholikir nanar iaben, kara mamang nitampopokoholiking kaukek, kara nitampopokoh, song re pokosor uadouhinar binak, kare heir tapokis Kristo tena kalekinaler toia tang God ge tamagigeig. <sup>25</sup><sup>n</sup>Kristo e toia e tuka tar binaka re siokor touahiua uakapa tun tosno uelmatan, kare ueih tane tasisin. <sup>26</sup><sup>o</sup>Doha uadouhina tunur uelmatana gera turung mamantouoin tero mat. <sup>27</sup><sup>p</sup>Ge no uelhire pe God geka bolong sioun o hire teil pare, “Ge God pe ke uamoko tar mamang inetelik i kukulebanga tar nikaueke tatanon.” Doh gine ro hire teil pe roono pare, “Tar mamang inetelik i kukulebanga tar nikaueke tatanon.” Inggon a kalahara tun pare, God ahik pahe matotong kale keipin, ge inggono pe teke uamoko tar mamang inetelik i kukulebanga tar nikaueke tang Kristo. <sup>28</sup>Gine ke guata peono tar puhonene tar tun Kristo katongompe re turung uamoko katongoin i kukulebanga tena nikaueke God, maeit e turung kaukeke uakapa tunungua God tar mamang inetelik.

<sup>29</sup>Doh geta hik me nitua tapokis, a huar tengkana tar uahuhu tasir tamata geka mat? Ae maene ra uahuhuisir tamat geta hikir tamata pah

<sup>1</sup> 15.21 Roum 5.12    <sup>m</sup> 15.23 1Te 4.16; UGO 20.5    <sup>n</sup> 15.25 Mat 22.44    <sup>o</sup> 15.26 UGO 20.14  
<sup>p</sup> 15.27 Ker 8.6



ra matotong tua tapokis? <sup>30</sup> Doh ae maene ri heir katongo dedempesieig toro mat tar mamang binakalik? <sup>31</sup> O mat o lame totoguo tar mamang binakalik! Ro uanotoug, inggo u uamana tun, u uasala tunuio, karu uatakai tang Jesu Kristo ge nagi Tamata Nomaneig tar hauanine ke guatagiono tamiuoum. <sup>32</sup> Doh getu uelkoi keipo tasir inete roke i Epeses gera pepe teil tasir tamat, a hauangua ru turung kaleio? Geta hikir mat pah ra matotong uatua tapokisis, o uelhire song o mana tun ro kula pe pare,

“Ein uamahmahurusieig,  
kari sipak geri mata pe inggeig roliuo.”

*Aisaia 22.13*

<sup>33</sup> Ahik pah mung uamaluana ra bohosioum, “Gerung ueldokout keipioum tasir tamata uasa, gisina ra uasuasa tamiuoum o uia pe.” <sup>34</sup> Kale tapokis teremi ninamana tar haua rung tagorong manain, karung uanua tar niguataniner sa, inggo ku mene tar puhonene a nimatala uleik tamiuoum, teeit o gisimehe tamiuoum ra tele harahampe tang God.

#### A tukunun gera uatua tapokis turin toro mat

<sup>35</sup> Bo me tamat e turung dangatampe pare, “Hapengua ra tua tapokis per tamata geka mat? Hapengua re turung baka per tukunusisin?” <sup>36</sup> A tuktukara tunumper puhung dangatono geto lebe ingga me tabtabuarar uatun, ahik pahe matotong tungara dedengua e mata tun bak, song re tungar. <sup>37</sup> Doh geto lebe ingga o lebe puk tar uatun, ahik paho lebe toro tukununa roono tun. <sup>38</sup> Bo God ke heir tar kukuananar mamang uatunalik ke kedanga manasa pe taninin. <sup>39</sup> O mamang inetelik a kahakahar singsingin, o tamat, o katiuo uakapa tun a giameh siok, o tetiau, karo ian.

<sup>40</sup> Doha tukununang Heuen e moko pon, doha tukununang gane i kot. Bo a nimataiana pukur tukununang Heuen a giamehe siokompe tar nimataianar tukununang gane i kot. <sup>41</sup> A pisar a giamehe siokomper nimataian, doha bialok a giamehe siokompe. Doh tasir pitopit a giamehe siokomper mataian. Doh tanininar pitopit a kahakahamper nimataian.

<sup>42</sup> Ter siokono sira tar nitua tapokis. A tukunugigeig ri uangoul keipin daana tar kot e mat, ra keuin, kare beng, song re turung tua tapokis keip tar timuhur nitua gere la dedengua. <sup>43</sup> Tar binaka ra keuinir tukununon ahik mena uiniator,<sup>†</sup> bo tar binaka re tua tapokison e uouon tun tar uiniator. Tar binaka ra keuinir tukununon a maluan, bo tar binaka re tua tapokison e uouon tar nitampopokoh. <sup>44</sup> Tar binaka ra keuinir tamat,

<sup>†</sup> 15.30 Roum 8.36    <sup>†</sup> 15.36 Jon 12.24    <sup>†</sup> 15.43 Pil 3.20-21    <sup>†</sup> 15.43 Toro uelhireng Grik e hire pare, ‘ahik paha ueltadain’

inggeig i banga puk tar tukununang gane i kot, bo tar binaka re tua tapokison, inggeig i banga tar tukununang Heuen. Ge a tukununang gane pe i kot e mok, doha tukununang Heuen e moko pon.

<sup>45</sup> “Ge no uelhire pe God o hire teil pare, “A uakikilanganar tamatane i kot, Adam, ka tuhain, kare pokos a tua.” Song ke pokosor uadouhinar Adam a tamata pon, inggono ter laben gere heir tar nitua. <sup>46</sup>A tukunun gere la tur i Heuen ahik pah teke pokoso uakikilang a tukunun gere la tur i kot ke pokoso uakikilang song a tukununang Heuen. <sup>47</sup>A uakikilanganar tamat, Adam ka tuha keipin toro uououng gane i kot, bor tang giameher Adam ke la tur i Heuen.

<sup>48</sup> Maisir peng gane i koto ra misiana sirampe tang mai geka tuha turinane i kot, doh maisir peng Heuen ra misiana sirampe tang mai ger peng Heuen. <sup>49</sup>Doh gine daan inggeig te misiana tang Adam ger peng gane i kot, bo inggeig puk i turung misiana sira tang Adam ger peng Heuen.

<sup>50</sup>Ro uanotoug, inggo u kulkula pare, a singsingin, doha deuating ahik pahe matotong kale inete to tagu tar Nitoiar nang God, a inete ger beng ahik pahe matotong kale inete to tar inete gere tua dede. <sup>51</sup>Ualongoro uaia tun tar puhung uelhirener ououo ru uakalaharaiu tamiuoum. Ahik pah inggeig uakapa tun ri siokor mat, bo inggeig uakapa tun ra turung uapalihiseig. <sup>52</sup>A uapalihan e pokoso geto kaling uadouh manasa ro tuil. Doh geto kaling manasa roon mais geka mat ra turung tua keip tar timuhur tukunus, doh inggeigener tua ra turung uapalahi ponosieig mari tua dedengua. <sup>53</sup>“A tukunun gere mat e turung uapalihilain tar haua gere la tua dedengua, doha haua gere beng e turung uapalih tar inete gere moko dedengua.

<sup>54</sup>Temaeit gete pokoso manasanin, a tukunun gere mat e uapalih tar tukunun gere la tua dedengua, song re la mana tunur puh geka boloin tono uelhire God pare,

“O mat ka pehuarain!”

*Aisaia 25.8*

<sup>55</sup> “O mat, ia karein ro binopo ko guataia?

O mat, ia karein ro uelhungumua gero uelpisir?”

*Hosea 13.14*

<sup>56</sup>\*Bo ro uelhung gero uelpisir gero nasir mat roono ter niguataniner sa. Doh na nitampopokohor niguata uasa ter ualatut. <sup>57</sup>Bo a niuaha kompe e la tang God ke heir peha tenagi Tamata Nomaneig Iesu Kristo ke me uoum keip pe tagigeig toro binop.

<sup>58</sup>Temaeit tamiuoum ro uanotoug mung tur uanono dede, ahik pah mung uahue me inete re ualilio tamiuoum, heir katongo nomana

“ 15.45 Uak 2.7    v 15.51-52 Mat 24.31; 1Te 4.15-17    w 15.53 2Ko 5.4    x 15.56 Roum 7.13

tunusium tena kalekinaler Tamata Noman. Ge inggoum pe mung ate pare, nami kalekinaleioum tar Tamata Noman ahik paha tabo tengkan.

#### A mani ka uelbakeig gere la tasir tamat i Jerusalem

**16** <sup>1</sup>Ygine daan inggo u marang mene baka tamiuoum tar mani geri uelbakesieig gere la tasir tamatang lotu i Jerusalem. Inggoum pakung guata sira ku ualatoho peo tasir tamatang lotu i Galesia. <sup>2</sup>Tar mamang uakikilanganar marein tar uik inggoum kahakah mung uamoko sioko manasampe me giniamer mani gekung kale turig tar haua kung uabulauaig, karung uamoko toto tanik, maeit getu lameo ahik baka poluk me kale hahai. <sup>3</sup>Song getu me pokoso, inggo u me heir tar bolobol e uahire teil tar mamang inetelik tar puhonene, inggo u me turung heir tas mais gekung uamatotosioum tar keip taninin menia tenami manioum. <sup>4</sup>Bo geta uiaono totoguo tar la tagu tasisin inggeim mi siokor la tokah.

#### A nidangatar nouguo katong

<sup>5</sup>Inggou u me turung banga tamiuoum i muduhia getu uakapa baka tar pang uan i Masedonia, ge inggo pe ku kaleuatoho manasa tar la. <sup>6</sup><sup>a</sup>Doh gete hapeon inggo u uangoul keip sikoro baka tamiuoum me sikin ue u uangoul e tuka gete kapar binakang pang rom. Maeit rung pouloum totoguo tenag nila ru lang lain. <sup>7</sup>Inggou ahik pahu malara tar me tur baka puk tamiuoum, karu tapokis. Bo inggo u malarantiehe tun tar me uangoul keip me puhung barah gete uahuer Tamata Noman. <sup>8</sup>Bo inggo u uangoul bakane i Epeses e tuka tar Pentikos. <sup>9</sup><sup>b</sup>Ge gane pe ka uatakapuka tun totoguo tar kalekinale keip tasisin, doho burehe tunur tamata ra malar, karo burehe ponampe ra tur tane totoguo.

<sup>10</sup><sup>c</sup>Doh gete me pokoso Timoti tamiuoum, ahik pah mung uasokoro tatanono tar binaka re uangoul tagu tamiuoum, ge inggono pe e guata tena kalekinaler Tamata Noman misiana totoguo. <sup>11</sup><sup>d</sup>Temaeit ahik me tamata re banga uasa tatanon. Heirime tatanono totoguo e la keipime toro hiarou mare me pokoso uaia tunono totoguo. Inggou u pepe uangoul tunumpe tatanon e la keipime mo gisiamer tamata gera tagorong mana tang Kristo.

<sup>12</sup><sup>e</sup>Doh uanotougigeig Apolos, inggo ku kula uapopokoho tun tatanono tar la tagu toso uanotougigeig geta me banga tamiuoum. Bo ahik pukumpe pahe malara tar lame gine daan e la uoumumpeme gete kaein mena binak.

#### A uadouhinar men

<sup>13</sup>Mu uala dede tar matamiu. Tur uanono keip dede tar nitagorong man misiana tar tamata ger tampopokoh, kara ongongol. <sup>14</sup>Mu uamoko tun tar nimalaelhir tar mamang inetelik rung guataig.

<sup>y</sup> 16.1 Roum 15.25-26; 2Ko 8.1-9    <sup>z</sup> 16.5 Apo 19.21    <sup>a</sup> 16.6 Roum 15.24

<sup>b</sup> 16.9 Apo 19.8-10; 2Ko 2.12    <sup>c</sup> 16.10 1Ko 4.17    <sup>d</sup> 16.11 1Ti 4.12    <sup>e</sup> 16.12 1Ko 3.6

<sup>15</sup>fInggoum mung ate tang Stepanas, doh tasir tamatang tena umon? Gisina tesir uakikilangar tamata ka uapalih, kara tagorong mana tang Kristo i Akeia, kara heir katongois tar kalekinale tar poul tosono tamata God, doh inggo u kula uapopokoho tun tamiuoum ro bung kaloug, <sup>16</sup>tar ueltada uaia tun, karung uakeluk tasir tamata gera kalekinale sira pare, kare tas mais gera kalekinalentiehe pono tasisin. <sup>17</sup>Inggo u uaha tun ka me pokoso pe Stepanas, Potunatas, doh Akaikus, teeit gisina teka kale uahiuu manasa tar mamang inetelik ahik peoum pah kung me siokor pokos. <sup>18</sup>Gisina teka me uatampopokoho tar iabeiguo, doh tar iabeimiuoum pon. Bang paroko tun tasir tamata sira pare.

### A meneng uadouh keip tar niuah

<sup>19</sup>gO tamatang lotu uakapa tun tar pang Esia ka heir tenas niuaha tamiuoum. Akuila me Prisila kura heir tenasira niuaha tamiuoum tar Tamata Noman menia tasir tamata gera uoto lotu to tonosio um. <sup>20</sup>Doho uanotougigeig uakapa tunusine ka heir pono tenas niuaha tamiuoum. Uelbuak katongosioum i lolono tun tar koloumiu.

<sup>21</sup>Inggo Poul ku bolo katongo tun tar puhung uelhireng uahananine tamiuoum.

<sup>22</sup>hMai ge ahik pahe malauehir tar Tamata Noman uamaluana tatanono gere birin. Lame! Nagi Tamata Nomaneig.

<sup>23</sup>Na hamhamas nagi Tamata Nomaneig Iesu e moko tamiuoum.

<sup>24</sup>Reg nimalauehiro e la tamiuoum uakapa tun tang Iesu Kristo. O mana tun.

---

<sup>f</sup> 16.15 1Ko 1.16    <sup>g</sup> 16.19 Apo 18.2,18,26    <sup>h</sup> 16.22 Gal 1.8-9; UGO 22.20

# 2 Korin

## O uatorikina ro bolobolo ke boloin Poul tasir Korin

### O uatorikina ro bolobolo tasir Korin

O bolobolo rone o moko teil tar timuhur uelhote. Poul ke bolo toro bolobolo rone ko la tasir tamatang tagorong man i Korin, teene o tamatang ualasira gesir bohoboho ra uangoul tenas lotusin.

Gisina ka menmene uasa tang Poul. Gisina ra kula pare, inggon e uoto uapalih tena ninaman. Gisina ka guata paar, teene Poul ahik mata la ruh kout i Korin.

Gisina ra kula pono tatanono pare, ahik paha aposoul uaia. Poul ahik paha tamatang mene sira tun tasir tang ualasisirisir bohoboh, doh Poul ahik pono pahe uoto hinga mani tagu tasir tamatang tar lotu.

Poul ke mene uakalahara tasisina maene ahik pah ke ruh kout tasisin. Inggono ke mene uakalahara pon ae maene ke uelkukuruntiehe tun tasir tamatang tagorong man i Korin. Bo inggono puk ke uaha ka hire tauete pesina tenas niguata uasa tang God. Doh gisina ka mata kaluana tapokis tang Poul.

Inggon ahik mena nitampopokoho sira tun tasir tang ualasisirisir bohoboh. Bo teene inggono ke maluan, kara banga tonguar tamata tena nitampopokoho God tatanon. Inggon ahik mata lame tar me mene katongoin. Inggono ke lame tar me hire tasisina tang Iesu, ge God pe ke uapalih tur tasisina tar uelmatan, kara la matakaluan. Song ke dangata tasisina me niheir keip tar niuia e la tasir tamatang tagorong mana gesir tiome i Judia.

Tar uadohina tun, inggono ke hirhire hamas tun hape maene ke kopokoso pare, ter aposoul uaia tun. God katongompe ke umatoto tatanono pare, a aposoul. Doh inggono ke kale tar bureher niduh, teene teke mene tauete peono tono uelhire God.

Bo Poul puk ke uaha tar kalekinale tang God pare, teke mene hahaua peono tasisin ka menmene uasa tatanon.

### I lolono toro bolobolo rone:

A meneng uakalahar 1.1-11

Poul, kara lotu i Korin 1.12-7.16

Nas uahungur tamatang tagorong man i Judia 8.1–9.15  
 Na meneng uelturut Poul tena nitampopokoh a aposoul pe 10.1–13.10  
 A uadohinar menemen 13.11-14

---

### Poul ke heir tena niuaha tang God

**1** <sup>1</sup>Inggou Poul ku bolo toro uelhire rone, raeim me Timoti ger uanotougigeig. God ke malara totoguo na aposoul Iesu Kristo. Roono o la tasir tamatar nang God toro buturung lotu tar uan uleik i Korin menia pono tosno tamata God gesir dedeil gera uangoul tar pang uan i Akaia.

<sup>2</sup>Inggou u lotu tang God ge tamagigeig tar heir tar hamhamas, karo hiarouo tamiuoum me Iesu Kristo ge nagi Tamata Nomaneig.

### God a tang uamamahoul tasir tamata uakap

<sup>3</sup>Uataikai tang God ger nagigeig a tamana Iesu Kristo ge nagi Tamata Nomaneig. God ge Tamagigeig e uoto ueldolomo tagigeig, kara tang uamamahoul tagigeig uakapa tun. <sup>4</sup>Inggon e uoto uamamahoul tagigeig tar mamang niduhulik ri kaleig. Temaeit inggeig pon i matotong uamamahoul tas mais gera kale tar niduh. Inggeig i heir tar siokonor uamamahoul geki kale turin tang God. <sup>5</sup><sup>b</sup>Ter siokono kompe geti kale inggeig me uleikir uelmahing ri kalekinale pe tang Kristo, inggeig i turung kale pono tar uleikir uamamahoul tur tang Kristo. <sup>6</sup>Geting kale uelmahingieim auia e uamamahoul, kare uaudeil tamiuoum geta uamamahoulusieim, inggon e la keipin tamiuoum pon, doha puhon e guatangua tamiuoum mung uangoungoul sikor, karung uatut tar binaka rung kale pono tar siokonor uelmahing geking kalesieim. <sup>7</sup>Inggeim mi tagorong mana teil uapopokoho tun tamiuoum, teeit inggoum kung kale tar siokonor uelmahing, kara siokonor uamamahoulene ka heirin tamiueim.

<sup>8</sup>Ro uanotoug inggeim mi malara mung namnamana tapokisium tar niduh, kara uelmahing geking kalegieim tar binaka king kalekinale tar pang uan i Asia. A niduh king kalegieim a uleikintiehe tun. Ahik me hagarang uasiaua taninin. Inggeim king namana puk manasa mi mat. <sup>9</sup>O man, inggeim king uamoko puk manasa tar siokor ninamana pare, mi mat. Bo a puh pukuonene ke pokos, e ualasira tamiueim, maeit ahikieim pah mi pemai katongoisieim, bo inggeim mi pemai to tang God, gere uatua tapokis tasir mat. <sup>10</sup><sup>d</sup>Inggono ke uaudeil tur tamiueim tar butur ualasokorontiehe tun. Inggon e turung uaudeil polukumpe tamiueim. Doh inggeim mi tagorong mana teil pare, inggon e turung uaudeil

---

<sup>a</sup> 1.3 Roum 15.5   <sup>b</sup> 1.5 Ker 34.19   <sup>c</sup> 1.8 Apo 19.23; 1Ko 15.32   <sup>d</sup> 1.10 2Ti 4.18

dedempe tamiueim. <sup>11</sup>Inggoum mung poul dedempe tar lotu tamiueim, maeit God e turung longoro tar bureher lotu gere laig tamiueim, song re guata uaia tamiueim. Kare mo burehe ra turung heir tar niuaha tang God ke guata uaia pe tamiueim.

### Poul ke uapalih tena ninaman

<sup>12</sup>A puhene tering sala keip tunusieim ge remi niate peeim ke hire tauete tun toro mana pare, inggeim king guata uaia tun tasir tamatang gane i koto te tamiuoum tunumpeono king mene uakalahara pe, karing uamana ngohina ke guata pe God. Inggeim ahik pah king guata tar puhene e la tur tar niate uaiang gane i kot, bo e la tur tena nitampopokoho God. <sup>13</sup>Ge inggeim pe ahik pah king bolome tamiuoum me inete ge ahikioum pah mung matotong bang paroko ue ahik pah mung naman manate. Doh inggo u tagorong mana teil pare, <sup>14</sup>egete kung naman manate tur pukuoum me sikina tamiueim, inggoum mung me turung naman manate uakapa tun, song rung turung sala tamiueim. Te misiana kompe inggeim mi turung sala pono tamiuoum tar binaka re kotpokoso na marein Iesu nagi Tamata Nomaneig.

<sup>15</sup>Temaieit inggo u ate uaia tun tar puhonene, inggo ku kaleuatoro tar me banga uakikilanga tamiuoum, maeit rung kale uatorikoum tar niuah. <sup>16</sup>Inggo ku malara pare, u la turung pepe kout baka tamiuoum getu la i Masedonia, karu me turung pepe kout polukume getu tapokisime. Song rung turung poul bakoum totoguo tar la i Judia.

<sup>17</sup>Inggo ahik pah ku guata belehu puk, kara hik pono pah ku uakeluk teres ninamanar gisiamer tamatang gane i koto gera uauia boho baka puk. <sup>18</sup>Bo toro mana tun God a uauaman, a uelhire geke heirig tamiuoum, ahik pah ka uauia boho baka pukig. <sup>19</sup>Ge a tuna God pe ger bulout Iesu Kristo geking mene taueteieim mes Silas, doh Timoti i uantinana tamiuoum, inggon ahik pah ke uauia boho baka puk ge inggono pe a uauaman.

<sup>20</sup><sup>h</sup>Ahik me haua geta burehemper ualapagaha ke guataig God, ginin auia uakapa kompe tang Iesu Kristo, doh tang God inggeig i turung kulangua pare, “o mana tun” tar uatakai tang God. <sup>21</sup>Bo inggono te God katongompe ke uamoko tamiueim, kare tamiuoum pono tar tur uanono keip tang Iesu Kristo. Inggon teke umatoto tagigeig, <sup>22</sup><sup>i</sup>mari kotpokoso nanon, kare heir tena labena ger Dedeil tagigeig pare, a uaparok e moko uatuka tar haua geke ualapagahaion e lame.

<sup>23</sup>Bo inggo ku kila tang God tar me tur keip totoguo maru hire tun tamiuoum toro man, ae maene ahikio pah ku tapokis i Korin, bo inggo

<sup>e</sup> 1.14 2Ko 5.12; Pil 2.16    <sup>f</sup> 1.16 1Ko 16.5-6    <sup>g</sup> 1.19 Apo 18.5    <sup>h</sup> 1.20 UGO 3.14

<sup>i</sup> 1.22 2Ko 5.5; Epe 1.13-14

ahik pah ku marang heir poluk me niduh tamiuoum. <sup>24j</sup>Inggeim ahik pah king petutup tamiuoum tar tagorong mana tar haua king hiregieim, bo inggeim king kalekinale keip puk tar niuahar eimiuoum. Teeit a nitagorong man, teene re uatur uanono tamiuoum.

**2** <sup>1k</sup>Temaet, getu la tapokisimeo tar me banga tamiuoum, inggo ku namana tanika manasa pare, ahik baka poluk pahu me uaueldolomo tamiuoum. <sup>2</sup>Doh gete ku uaueldolomo tamiuoum maingua re turung uaha totoguo? Teoum puk manasampeene ku uaueldolomosio pake turung uauaha totoguo. <sup>3</sup>Ter tengkana, maet ku bolomeo tamiuoum te pare, tar binaka ru lameo tamiuoum, ahik pah ra me uaueldolomo baka polukuio. Inggoum pake turung uauaha totoguo. Doh inggo u tagorong mana teil pare, tar binaka ru uaho, inggoum pono mung uah.

<sup>4l</sup>Tar binaka giane ku bolomeo, inggo ku ueldolomontiehe tun, kare pirik tunumper koloug, karu kiring u malara mung ateoum hape ru malahirintiehe tun peo tamiuoum.

#### Ueldolomo tapokis, karo kale liu tar niguata uasa

<sup>5</sup>Gete me tang sioko ke uaueldolomontiehe tun me tang giameh inggon ahik pah ke guata totoguo, bo inggono ke siokor uaueldolomontiehe tamiuoum uakap. U kula deho pare, inggo ahik pahu malar e parakukuhiou. <sup>6</sup>A uelmahing geka heirinir burehe tar tang siok ke matoto manas. <sup>7</sup>Bo gine puk daan inggoum pakung kale liu tar niguata uasa, karung uamamahoul tatanon, maet ahikiono pahe kalentieheinir niueldolom. <sup>8</sup>Temaet inggo u kula uapopokoho tun tamiuoum tar uamoko poluk teremi nimalaelhir tatanon.

<sup>9</sup>Ter tengkana maet ku bolomeo tamiuoum, inggo u marang uedanga tamiuoum, karu banga, ge pare kung longorompeoum tar mamang inetelik. <sup>10</sup>Doh getung kale liuoum me niguata uasa me tamat, inggo u kale liu pono tena niguata uasaon. Doha haua geku kale liuio inggo u guata keip tar hangana Kristo tar poul tamiuoum. <sup>11m</sup>Inggo ku guata paar maet, ahik Satan pahe matotong pehuara tur me inete tagigeig. Ge inggeig pe i ate uaia tun tar haua re marang guatagion.

#### Poul ke namanantiehe tang Taitus

<sup>12n</sup>Binaka ku lao i Troas tar hire tauete tono Uelhire Uaia Kristo, a Tamata Noman ke uatakapuka tun toro pirik totoguo. <sup>13o</sup>Bo ahik pukumpe pah ku hagouo uaia, teeit inggo ahik pah ku ueltupara tang Taitus ge kalougou tun. Temaet ku hiliu pukumpe tasisin, karu la i Masedonia.

<sup>j</sup> 1.24 1Pi 5.3   <sup>k</sup> 2.1 1Ko 4.21   <sup>l</sup> 2.4 Apo 20.31   <sup>m</sup> 2.11 Luk 22.31   <sup>n</sup> 2.12 Apo 14.27; 1Ko 16.9   <sup>o</sup> 2.13 Apo 20.1



<sup>14</sup>Bo a niuaha kompe e la tang God gere uoto uoum keip tamiueim toro binopo tar hangana Kristo. God ke guata maring hire tauete ueltebeireim tar niate geking kaleig tasir gisiamehe tar Tamata Noman misiana tar inete ger muhiantiehe tun. <sup>15</sup>Ge inggeim pe misianar amuhunar adua ke heirin Kristo tang God geke ngung ueltebeir tas mais gera udeil, kare tas mais gera heil. <sup>16</sup><sup>p</sup>Doh tasisit ra heil inggeim misiana tar amuhunar mat inggono teke uakotpokoso toro mat, bo tasisit ra udeil inggeim misianar amuhunar nitua inggono teke uakotpokoso tar nitua. Temaeit, maingua re matotong guata tar kalekinaleon? <sup>17</sup>Inggeim ahik pah mi uabulaua tono uelhire God misiana ra guata per gisiameher tamat. Bo tar hangana Kristo puk, inggeim mi hire tauete toro mana tang God. Teeit inggeim mi ate God ke heiriha tamiueim tamiuoum.

### O tamatang kalekinale tar timuhur uelhote

**3** <sup>1</sup>Inggeim ahik pah mi uakekene poluk tar uairana katongosieim. Ahik pah mi uahinga me bolobolong uahire e la tamiuoum ue e la tur tamiuoum ngohina tasir gisiameher tamata gera hinga me puhung uahire. <sup>2</sup>Bo inggoum te misiana pah ter bolobolor namiueim ka bololaig tamiueim mara ateig, kara bangar tamata uakap. <sup>3</sup>Inggoum mung ualasila tun pare, inggoum teka bololaigir uahire gere la tur tang Kristo ginina pe ter nieininar kalekinaler namiueim. Ginin ahik pah ka bolo keipig me inet, bo ginina ka bolo keipig tar labena God ger tua, doh ahik pono pah ka bololaig mo mahar palau, bo ginin ka bololaig tar kolounor tamat.

<sup>4</sup>Inggeim mi mene sira ring tagorong mana tun pe tang God, teeit tar haua ke guatain Kristo. <sup>5</sup>Inggo ahik pahu kula pare, inggeim mi matotong guata tar kalekinaleono mes paheimiu. Inggono te God ke guata tamiueim, maeit ring matotong guata tar kalekinalenine ring guataig. <sup>6</sup>God ke uamatoto tamiueim o tamatang kalekinale tena timuhur uelhoteon. Inggonor timuhur uelhote ahik pah ka boloin pare, a ualatut, bo inggon a laben, ge a haua pe ka boloin a ualatut e keip teil toro mat, bor laben e keip teil tar nitua.

### Na uinatoror uelhote

<sup>7</sup>A ualatut gere keip teil toro mat, ka boloug toro mahar palau. Roono ko la keipiha tena uiniatoro God. Temaeit gisisir Israel ahik pah ka matotong banga dede tar porene Moses, teeit inggono ke ragom tane ponoinir balbalanar uiniator, song ke rourouo uainimpela. <sup>8</sup>Ge a puh peon o mana tun, bo a timuhur uelhotene ke me keip pokoso tar

---

<sup>p</sup> 2.16 Luk 2.34; 2Ko 3.5-6    <sup>q</sup> 3.1 Apo 18.27; 2Ko 5.12    <sup>r</sup> 3.2 1Ko 9.2    <sup>s</sup> 3.3 KT 24.12; Jer 31.33; Isk 36.26-27    <sup>t</sup> 3.6 Jer 31.31; Jon 6.63; 1Ko 11.25    <sup>u</sup> 3.7 KT 34.29

Iaben, inggon a i rana uainintiehe na uiniator. <sup>9</sup> A ualatut e poluk tasir tamata teres niguata uasa, kare keip teil pono tar uiniator, bor timuhur uelhote e uakodkodoho keip tasir tamata tang God, inggono ter i rana uain na uiniator. <sup>10</sup> A ualatut ger pensioun a uleik na uiniator, bo e me rouo kompe getura me siokor moko tokaha mer uelhote ger timuh, ge a timuhur uelhote pe a i ranantieher na uiniator. <sup>11</sup> Doh gete moko puk na uiniatoror ualatut tar sikinar binak, bo a haua gere turung moko dedengua inggono ter popokoho uainintiehe na uiniator.

<sup>12</sup> Temaeit ri ongolonguaeig ri tagorong mana teil pe tar puhonene. <sup>13</sup> Inggeig ahik pah pe sira tang Moses geke taku uaouo tar poren, maeit ahikir tamatang Israel pah ra matotong banga tar porenono re rourouo uain per balbalanar uinator. <sup>14</sup> Doh gisin ahik pah ka naman manate. Temaeit ginempela daan tar binaka ra hire tauetesina tar pensiounur ualatut res ninamanasin ahik pahe kalahar. Te Iesu Kristo puk manasa tere matotong kale liu tar inete gere uaouo teres ninamanasin. <sup>15</sup> O mana tun, ginempela daana geta hire tauetesina tar uelhire geke boloig Moses, res ninamanasin e ouo harahampe, doh gisin ahikimpe pah ra naman manate.

<sup>16</sup> Bo gete uiuirir tamat, kare la tapokisime tar Tamata Noman, a haua geke uaouo tena ninamanono ra turung kale liuin. <sup>17</sup> Doh ginela daan, a Tamata Noman, a Iaben, doh tar mamang buturulik gere mokor Iabenon, o tamata ra uangoul teres nimalar. <sup>18</sup> Doh inggeig uakapa tunene ge ahik pah ka uataku tanesieig mare turung bala tapokisisieig tar balbalanar uinatoror Tamata Noman, inggeig ra uapalihisieig misianangua tatanon, kare misiana tar balbalana uinatoro gere moko dede gere la tur tatanon, ge inggono per Tamata Noman ter Iaben.

#### Hire tauete toro Uelhire Uaia

**4** <sup>1</sup> Temaeit, tar niueldolomor nang God inggono ke heiringua tamiueim tar kalekinalener uia tun, inggeim ahik pah mi matotong hagouo uasa. <sup>2</sup> Inggeim king hiliu sioun tar niguata gere kale teil tar nimatal, kara niguata gera guata keipig toro boh. Inggeim ahik pah king marang uelour me tamat, doh ahik pah king marang to pukula mo nomio boho tono uelhire God. Inggeim king hire tun toro man i uoum tar matana God, doh maisir uauaman ra ate pon.

<sup>3</sup> Doh ge teka kokop tanein ro Uelhire Uaia rone king hire taueteisieim, roono ka uamoko uaouo kompein tas mais geke heil. <sup>4</sup> Satan ger god bohobohong gane i kot ke uakut teres ninamanar tamata ge ahik pah ra tagorong mana tagu, maeit ahikisina pah ra matotong bang huara tagu

<sup>v</sup> 3.9 Ual 27.26; Roum 1.17    <sup>w</sup> 3.13 KT 34.33    <sup>x</sup> 3.16 KT 34.34    <sup>y</sup> 3.17 Jon 8.36;  
Roum 8.2    <sup>z</sup> 4.2 2Ko 2.17; 1Te 2.5    <sup>a</sup> 4.4 Epe 2.2; Kol 1.15; Hib 1.3

tar luh ger nana ro Uelhire Uaia gere la turur balbalana na uiniatoro Kristo, ge inggono pe tera banga toinir porene tar porene God.

<sup>5</sup>A haua gering hire taueteisieim, ahik pah king menmene katongosieim, bo inggeim king hirhire tauete teil tang Iesu Kristo ger Tamata Noman. Inggeim mi uoto hire taueteisieim tamiuoum pare, inggeim teking kalekinale tamiuoum tar hangana Iesu. <sup>6</sup><sup>b</sup>Ge God pe ke kula pare, “Uahue tar luh gere bala uamarmarein tar kitup.” Doh inggono ke guata tar luh mare bala uamarmarein tar kolougigeig mare heir tar luhung naman manate gere la tur tena balbalana na uinatoro God gere bala tur tar porene Kristo.

<sup>7</sup><sup>c</sup>Bo inggeim ngohina pah mi kale teil tar luh ger balantiehe tun gere moko teil i lolono tar nouh gere ualasira tar mamang nitampopokoholik ger uia uainintiehe tun gere la tur tang God ahik pahe la tur tamiueim.

<sup>8</sup><sup>d</sup>Inggeim king kale uelmahing tun tar mamang hagarilik, bo ahik pukumpe pah king uelueltageih ueltebeir ue king uaruara naman ahik pah king uamaluan. <sup>9</sup>Inggeim ka guatguata uasasieim, bo God puk ahik pah ke hiliu tamiueim. Ka uuelmahingintiehe tunusieim, bo ahik puk pah king santiehe tun. <sup>10</sup><sup>e</sup>A mamang buturulik king uiloho pe inggeim, king kale uelmahing dedempe tar tukunumi misiana tang Iesu tar binaka ke mat, maeit na nitua Iesu ra turung banga toin tar tukunumiueim.

<sup>11</sup><sup>f</sup>Ge inggeig peene tera heir dedempesieig toro mata ri kalekinale pe tang Iesu, maeit re turung pokoso uakalahara tunur nitua ger nang Iesu tar tukunugigeig gininer mat ri uangoul keipig. <sup>12</sup>Temaeit inggeim mi uangoul uahuhut tun toro mata marung ueltparoum tar nitua gere moko dede.

<sup>13</sup><sup>g</sup>Ge a puh pe geka bolo uahiuain tono uelhire God sioun, ka boloin pare, “Inggo ku tagorong mana, temaeit ku men.” Doh tar siokonor nitagorong manene. Inggeim mi mene teeit king tagorong mana pe.

<sup>14</sup><sup>h</sup>Inggeim mi ate tar God geke uatua tapokis tur tenagi Tamata Nomaneig Iesu toro mat, kare turung uatua tapokis pono tamiueim misiana tang Iesu, kare keip tamiueim menia tamiuoum i uoum tena butur. <sup>15</sup>A mamang inetelikinine ka guataig e laig tamiuoum, temaeit a hamhamas ger nang God e la tasir bureher tamata mara heiringuaig me burehentieher niuaha tena uiniator God.

### Uangoul keip tar nitagorong man

<sup>16</sup><sup>i</sup>Temaeit inggeim ahik pah mi matotong hagou uasa gitiempe ke saba manasa per tukunumiueim, bo a iabeimiueim e timuh kompela tar

<sup>b</sup> 4.6 Uak 1.3; Ais 9.2; 2Ko 3.18    <sup>c</sup> 4.7 2Ko 5.1    <sup>d</sup> 4.8 2Ko 1.8; 7.5    <sup>e</sup> 4.10 1Ko 15.31

<sup>f</sup> 4.11 Roum 8.36    <sup>g</sup> 4.13 Ker 116.10    <sup>h</sup> 4.14 1Ko 6.14    <sup>i</sup> 4.16 Epe 3.16

mamang mareinilik. <sup>17j</sup>A siksikir niduhunine ahik pahe moko uabarah, bo e poul tapokis puk tamiueim tar kale tar uinatoro ger i ranantiehe tun gere moko dede, inggon a uleik uain tar niduhuninane ring kalegieim. <sup>18k</sup>Ge inggeim pe ahik pah mi uakeis uanono tar inete gering bang huarainene daan, bo inggeim mi uakeis uanono tar hauar inete ge ahik pah mi matotong bang huarain, ge a inete pe gera bang huarainene daan e moko puk tar sikinar binak, bor inete ge ahik pah ra matotong bang huarain e moko dedengua.

**5** <sup>1l</sup>Ge inggeig pe i ate, a tukunugigeigene ri uangoul keipinene daan, misiana tar taluh ra turung mamantouoin. Bo inggeig tenagi um e la tur tang God i Heuen gere toko dedengua. Ahik pah ke tuha taguin me tamat. <sup>2m</sup>Bo gine puk daan, inggeig ki haha manasa tar tukununonene ri uangoul keipinene daan. I malara puk manasa ra uamoko manasalainir tukununang Heuenane tagigeig. <sup>3</sup>Inggeig i malara pon i uangoul keip tar timuhur tukunun ahik pah tar iabene ger tabo tukunun. <sup>4</sup>Inggeig i talingoro kompe tar taluh tar sikinar binak, kari huata tar niduh, kari haha manasa ri talingoro pe tar taluhonene. Bo inggeig i malarantiehe tun tar talingoro tar umang Heuen, maeit a haua gere moko puk tar sikin e turung gomo taneinir nitua gere moko dedengua. <sup>5</sup>God me pahene ke kaleuatoro tar puhonene tagigeig. Kare heir uoum tagigeig tena labena Dedeil a uaparok tar haua re turung guatagion i uoumuha.

<sup>6n</sup>Temaieit inggeig i tagorong mana dedempesieig, kari ate uaia tun pare, gine ri uangoul keip haraha pe inggeig tar tukununang gane i kot inggeig i uairehe harahampe tar Tamata Noman. <sup>7</sup>Temaieit inggeig i uangoul keip dedempe tar nitagorong man ahik pah tar haua ri bang huarainene daan. <sup>8o</sup>Inngo u kula pare, inggeig song ki tagorong mana tun, kari marang hiliuingua tar tukunugigene ri uangoul keipin, kari la uangoul tokaha keip tar Tamata Noman. <sup>9p</sup>Temaieit inggeig i uamoko uapopokoho tun manasampe teregi ninaman tar puhonene mari uauaheig tatanon. Ginempe ri uangoul keip haraha pe inggeig tar tukununang gane i kot ue ki hiliu manasa tar tukununonene. <sup>10q</sup>Ge Iesu pe tere turung kedang tagigeig uakapa tun. Inggeig kahakaha ra turung kedanga turusieig hape ki uangoul peane i kot, ge para uia ue a sa.

### Matakaluana tang God

<sup>11</sup>Inggeim mi ate tar haua ring sokoro uelhirin tar Tamata Noman. Temaieit inggeim king poul tun tasir tamata mara lame tang God. God e ate, inggeim mi uakeluk kompe tena nimalaron, doh inggo u tagorong mana teil inggoum mung ate uaia tun pon. <sup>12</sup>Inggeim ahik

<sup>j</sup> 4.17 Roum 8.17-18   <sup>k</sup> 4.18 Kol 1.16   <sup>l</sup> 5.1 2Ko 4.7   <sup>m</sup> 5.2 Roum 8.23

<sup>n</sup> 5.6 Hib 11.13-16   <sup>o</sup> 5.8 Pil 1.23   <sup>p</sup> 5.9 Kol 1.10; 1Te 4.1   <sup>q</sup> 5.10 Roum 12.14

pah mi uasala katongosieim tamiuoum. Bo inggeim king heir tar binaka tamiuoum, maeit rung uasaloum tamiueim tas mais gera sala puk tar haua ra bangain ahik pah ra sala tar haua re moko tar kolous. <sup>13</sup>Doh geto popoulaneim auia e lain tang God, bo geta kodkodoho remi ninamaneim auia e heir me nipoul uaia tamiuoum. <sup>14</sup>Ge na nimalaelhir pe Kristo, teene ke kaukeke tamiueim, teeit inggeim king tagorong mana tun pare, Kristo ke mata ueleheir tagigeig uakapa tun, doh inggeig ki siokor mata pon. <sup>15</sup>Kristo ke mata ueleheir tagigeig uakapa tun, temaeit mais geka kale tar timuhur nitua ger nanon, gisin ahik manasa pah ra uangoul teres nimalara katong, gisina ra uaha keip manasa tang Kristo geke mata ueleheir tasisin, kara uatua tapokis turin toro mat.

<sup>16</sup>Temaeit uakekenene daan, inggeim ahik baka poluk pah mi kedang me tang siokor tamatane i kot hape re baka pe. Bo sioun inggeim king guata tang Iesu Kristo tar puhonene, bo gine puk daan inggeim ahik manasa pah mi guata baka poluk tar puhono tatanon. <sup>17</sup>Ge mai pe re uangoul tokaha keip tang Iesu Kristo, inggono ra uatimuhin. A pensiuunur niguat, kara niuangoul ke hiliu, kare palihimer niuangoul.

<sup>18</sup>Ginina uakapa tununine e la tur tang God. Doh tena kalekinale Kristo God ke guata toro hiarouo tagigeig, doh tatanono katong. God ke heir tar kalekinale tagigeig tar uahiarouo tasir tamata uakap. <sup>19</sup>God ke heir tamiueim tar meneng uelhiarou uaia tun tasir tamatang gane i koto pare, tur tang Kristo. God e uelhiarou keip tasir tamatang gane i kot ahik pah ke namana teres niguata uasasin geka guataig.

<sup>20</sup>Temaeit inggeim tering tur keip manasa tang Kristo, ge God pe e uoto heir tunume tar popokohor mene tamiueim, inggeim mi mene uapopokoho tamiuoum ngohina pah te Kristo re menmene tun tamiuoum, “Mu uelhiarou keip tang God.” <sup>21</sup>Kristo ahik mena niguata uasa tagu. Bo God puk ke guata tatanono pare, e siokor huata teregi niguata uasaeig. Maeit tar niuangoul tokahene tagigeig mes Kristo inggeig, song ri uangoul uakodkodoho keip tun tang God.

**6** <sup>1</sup>Inggeim mi siokor kalekinale keip tokaha tang God, temaeit ring kula uapopokoho tuneim tamiuoum pare, ahik tun pah mung ueluelde puk tar nipoulur nang God ger hamhamas. <sup>2</sup>Ge Inggono pe ke kula pare,

“Tar binaka tun geka umatotoin, inggo u longoro tamiuoum, kare tar mareining uaudeil, inggo u poul tamiuoum.” *Aisaia 49.8*  
Ualongoro uaia tun! Gine daan ter binaka geka umatoto tunin tar kale tena hamhamas God. Doh gine daan ter marein geka umatoto tunin tar uaudeil tamiuoum.

<sup>r</sup> 5.15 Roum 14.7-8    <sup>s</sup> 5.17 Roum 8.1; Gal 6.15    <sup>t</sup> 5.18 Roum 5.10    <sup>u</sup> 5.19 Roum 3.23-25  
<sup>v</sup> 5.21 Hib 4.15

### A niduh ke lame tang Poul

<sup>3</sup>Inggeim ahik tun pah mi malara me tang sioko tamiuoum ra tur tanein tenami kalekinaleeim. Maeit ahik me tang siok ra tupara toin mo boho tamiuoum tenami kalekinaleim. <sup>4</sup>Bo tar mamang hagarilik puk inggeim king ualasira uakalahara tun pare, no tamatang kalekinale God tar huata tar mamang niduhulik; king kale uelmahing, king haguoung ubau, king toboul hape ring guata pe. <sup>5</sup>Inggeim ka halhaluhusieim, kara bakalaseim tar karabus. O tamata ka nimaliana tamiueim, ahik pah king tur uaha tar kalekinale, ahik pah king hohou, karing gog. <sup>6</sup>Inggeim no tamatang kalekinale God, king uangoul keip kompeme tar inetenine; a delauana tunur niuangoul, remi ninaman, king uanguangoul sikor, karo hamhamas. King ualasira keip taninina tar Iabena Dedeil, kare tar uelmalauelhir ger man, <sup>7</sup>kare tar mener namiueim ger man, kare tar nitampopokohor nang God. A niguataninaniner kodkodohor namiueim, ngohinar ineteng uuliatung e kauek, kare uuliatung keip tamiueim tar mamang hagarilik gere lang mamantouo tamiueim.

<sup>8</sup>O man, a giniameher binak o tamata ra ueltada tamiueim, doha giniameher binaka gisin ahik pah ra ueltad, a giniameher binaka gisina ra uairana tamiueim, doha giniameher binaka gisina ra uaikoto tamiueim, doha giniameher binaka gisina ra kula tamiueim o bohoboh, bo inggeim o uauaman. <sup>9</sup>Inggeim ra ate uaia tunusieim, bo inggeim puk misiana pah ra telesieim, king tapokis tur toro mat, doh gine harahampe ring uangoul ka halhaluhusieim ahik pah king mat. <sup>10</sup>Inggeim king ueldolom, bo inggeim puk gine ring uaha dedempe, inggeim o tiome, bo inggeim puk king guata tasir tamata ka kale tar bureher inet. Inggeim ahik tun menami inet, bo toro mana tun inggeim nami bureher mamang inetelik.

<sup>11</sup>Inggoumur Korin, inggeim king mene luaka tun tar uelhire geking meneig tamiuoum, karing uamoko tun tar nimalauelhir tamiuoum tar koloumiu. <sup>12</sup>Inggeim ahik pah teking uoho tane tar nimalauelhir tamiuoum, bo inggono inggoum katongo tekung uoho tane tar nimalauelhir tamiueim. <sup>13</sup>Doh inggo gine ru meneng ualatut sira manasa tamiuoum paho bung tug tun. Ter puh teene ru marang meneio tamiuoum. Uamoko tun teremi nimalauelhir tamiueim tar koloumiu.

### Tagin tasir tamat gera tagorong boho tang God

<sup>14</sup>Ahik pah mung ueldokout keip tasir tamata ge ahik pah ra tagorong mana tang Iesu Kristo. Hapengua ura uangoul tokaha per niguata uaia mer niguata ger sa? Hapengua re uangoul tokaha keip per luh tar kitup?

<sup>w</sup> 6.5 2Ko 11.23-27    <sup>x</sup> 6.6 1Ti 4.12    <sup>y</sup> 6.9 2Ko 4.10    <sup>z</sup> 6.13 1Ko 4.14    <sup>a</sup> 6.14 Epe 5.11

<sup>15</sup>Hapengua re la uelua peis Kristo me Satan? Doh hapengua ra uangoul tokaha per tamatang tagorong mana mesir tamata gera tagorong boho tang Kristo? <sup>16</sup><sup>b</sup>Hingianguar uelhote re turung mok i uantinanina tena umang lotu God menia tasir godo bohoboh? Ge inggeig peene ri tagorong mana tang Kristo ter umang lotu ger nang God ger tua, ge God pe ke kula pare,

“Inggo u turung uangoul tokaha keip tasisin,  
doh inggo tenas turung God manasasin, doh gisina tosnogo  
turung tamato.”

*Isikel 37.27*

<sup>17</sup><sup>c</sup>“Temaait hiliu tasisin, karung ueltageih.

Teke kula per Tamata Noman,

Ahik pah mung tuhtuha me inete ger sa, maru kilauatoro tamiuoum.

*Aisaia 51.1; Isikel 20.34*

<sup>18</sup><sup>d</sup>Inggoum a turung tamamiu totoguo,

doh inggoum, o turung bung tuguo.

Teke kula per Tamata Nomana ger i ranantiehe tun.”

*2 Samuel 7.14; Jeramaia 31.9*

**7** <sup>1</sup>Ro bung kaloug, inggeig ki kale tur tar ualapagahanine tang God, temaait inggeig i uadelauana katongo tar tukunugig, kara iabeigig mare dedeil tun tar mamang niguatalikininer sa, kari kalekinale tokaha kompe mari dedeil uakapa tun, ge inggeig pe i sokoro tang God.

### Poul ke uah

<sup>2</sup>Uamoko tun tar nimalaelhir tar koloumiu tamiueim, inggeim ahik pah mi sa me tamat. Ahik pah king uasusa keip me tamata me niguata uasa, ahik me tang sioko tamiuoum king uelourieim. <sup>3</sup>Inggo ahik pah ku uakouh tamiuoum ku mene pe tar puhonene, ge inggo pe ku hire baka uoum tamiuoum pare, remi nimalaelhireim tamiuoum e moko tun tar koloumiueim maring uangoul tokaha dedempela tamiuoum i la mata keip. <sup>4</sup>Inggo u tagorong mana teil tun tamiuoum, karu uasala tun tamiuoum. Inggoum kung uauaha tun totoguo. Ginempe ku kale peo tar mamang niduhulik, bo inggo puk u uangoul keip dede tar uleikir niuah.

<sup>5</sup>Tar binaka king la pokoseim tar pang uan i Masedonia, inggeim ahik pah king uangoul uaha bak. A niduh pe ke moko uiloho tamiueim a uelperere tar mamang buturulik, king uangoul keip tar nisokor. <sup>6</sup>Bo God gere uoto uaongolo tas mais gera sokoro teke uaongolo tamiueim tar binaka ke me pokoso Taitus. <sup>7</sup>Ahik pah ter nipokoso pukener nang Taitus ke me uaongolo tamiueim, bo inggono ter uaongolo pono gekung heirioum tatanon. Inggono ke me hire tamiueim rung marang banga tun

<sup>b</sup> 6.16 NKP 26.12; 1Ko 3.16   <sup>c</sup> 6.17 UGO 18.4   <sup>d</sup> 6.18 Jer 31.9   <sup>e</sup> 7.5 2Ko 2.13

peoum totoguo, kare hape kung ueldolomontiehe tun peoum, karung tur keip tun tar uelturut tar puhonene ka guatain totoguo. Doh inggoene daan u uahantiehe tun.

<sup>8</sup> Doh gete ku uaueldolomo tamiuoum toro uelhire geku heirilain, inggo ahik pah ku uapalih tagu, ge inggo pe u ate a puhonene ke uuelmahing tamiuoum, bo e la pukin tar sikinar binak.

<sup>9</sup> Ginempe daan inggo u uaha dedempe. Inggo ahik pahu uah, teeit ku uaueldolomo pe tamiuoum, bo inggo u uaha teeit remi niueldolomoum ke uapalih tenami niguatoum, karung turung tar mud tar niguatar sa. Ter niueldolomonina re malaraiG God tasir tamata ra kale, maeit ahikieim pah mi uabir tamiuoum.

<sup>10</sup> Ge na niueldolomo pe God e poul tagigeig mari uapaliheig tar kolougig, kare nagi niguataniner sa. Inggeig i uaha tun tar niueldolomonene. Bo a niueldolomo ge ahik pahe uapalih tagu teres niguata uasar tamat e keip teil toro mat. <sup>11</sup> Banga tar hauanine ke uakotpokoosoir niueldolomor nang God tamiuoum; ke guata uaiantiehe tun tamiuoum, ke guata marung ate uaiaoum pare, ahik pe pah kung guata uasa, karung marang uelturut katongo pukusioum, kare uanimaliana tamiuoum, kung sokor, kare sirisioum totoguo, karung tur keip tun tar uelturut tar puhonene ka guatain totoguo, karung namanantiehe tun tar heir me uabang manate tang mai ke pesiau. Karung ualasira uaia tun ahik pe pah kung kouh me puh tar ineteninane.

<sup>12</sup> Inggo ku bolo toro uelhire geku heirilain tamiuoum, ahik pah ku bolo tang roon, teeit ka guata per tamata tar niguata uasa ue tang mai geke kale uelmahing, bo inggo ku bolo toro uelhire roon, maeit rung ualasira tooum tar matana God hape rung malarantiehe tun pe tamiueim. <sup>13</sup> Ter mamang inetelikinin teke uaongolo tamiueim.

Doh tar tumana tar puhonene king uaongol katongo pesieim, inggeim king uahantiehe tunungua tar binaka king banga tang Taitus re uaha pe. Inggoum uakapa tun kung uahagou uaia tunungua tatanon. <sup>14</sup> Inggo ku uasala tun tamiuoum tang Taitus, doh inggoum ahik pah kung uamatala totoguo, bo ter puh kompeene, a mamang inetelik geking hiregieim tamiuoum a man, maeit a haua geking uasala keipgieim tamiuoum tang Taitus ke pokoso nomana tun.

<sup>15</sup> Doh gine daan na nimalauelhirono tamiuoum a popokoho tun tar binaka re namana huarono kung longoro tun peoum tatanon, karung heir tar uleik tunur ueltad, karung me tororo tun tatanon. <sup>16</sup> Inggo u uahantiehe tun, teeit inggo u pema to puk manasampe tamiuoum.

<sup>f</sup> 7.8 2Ko 2.4    <sup>s</sup> 7.10 Mat 27.3-5; Hib 12.16-17



**Rosio liliaheirir tamatang tagorong mana tang Iesu Kristo**

**8** <sup>1</sup>Ro uanoutoumieim, inggeim mi malara tamiuoum mung ate tar nipoulur nang God ger hamhamas tun geke heirin tasir tamatang toro buturung lotu tar pang uan i Masedonia. <sup>2</sup>Gisina ka kale nomana tar uleikir niduh, kara uelmahing. Gisina ka katupa tun tar mamang inetelik, bo ahik puk pah ka namana tar puhunin ra uangoul keip kompe tar niuaha tar mamang binakalik, kara uahauhantiehe keip tun torosio liliaheir tenas inete tang mai re katup. <sup>3</sup>Inggo gine ru hire tauete tun tamiuoum toro man, gisina ra uoto heir uaburehe tunumpe e siauain tar haua geke umatotoin. Ahik me tamata ke kula ueleheir tasisina tar guata tar puhon, gisina katongompe ka naman. <sup>4</sup>Gisina ra petutup dedempe tamiueim maring uauia tasisina tar poul tasir tamatang Jerusalem gera tagorong mana tang Kristo. <sup>5</sup>Doh gisin ahik pah ka uakeluk hape king namana pe inggeim, teeit gisina ra heir uakikilanga katongo dedempeis tar Tamata Noman, song tamiueim tang hingiar hagar re hirein God tasisin.

<sup>6</sup>Temaeit inggeim king mene uapopokoho tun tang Taitus geke uakekene tar kalekinaleono toro liliaheir e la tapokisila tamiuoumur Korin tar la kale toto uadouh baka tar mani gekung uelbakeigoum. <sup>7</sup>Inggoum mung uoumuoum teil tun tar mamang inetelik; tar nitagorong man, tar men, kare popokoho tun remi ninamana tar poul tasir gisiameh, kara nimalaelhirir eimiuoum tamiueim. Ter siokono pon inggo u marang banga tun toromio liliaheiroum tar niguatang tar uelmalaelhir e uoumuoum teil pon.

<sup>8</sup>Inggo ahik pah ku ualatoho tamiuoum tar guatangua tar puhon, bo inggo ku mene tar puhono tar ualasira tamiuoum pare, o gisiamer tamata ra malaelhirintiehe tun pono tar poul mara bangasioum ge para, manamper uelmalaelhirir namiuoum. <sup>9</sup>Ge inggoum pe mung ate tena niguata nagi Tamata Nomaneig Iesu Kristo a hamhamas tun. Inggon e matoto teil uakapa tun tar mamang inetelik, bo inggono puk ke uatiome katongoin tar poul tamiuoum. Inggono ke uatiomein marung matoto teil tunoum tar mamang inetelik.

<sup>10</sup>Gine te hape ku namana peo rung guata peoum. Toro krismas giat ko la uoum, inggoum tesir uakikilanganar tamata kung guata tar puhonene tar poul. Inggoum kung malara katongo tar guata tar kalekinaleon. <sup>11</sup>Doh gine daan inggoum pakung uakapa baka tar kalekinale gekung uakekenein mare uelmatout keip tun nami niguatoum tar haua rung marang guatain. <sup>12</sup><sup>k</sup>Gete kung uamoko tunuoum teremi

<sup>h</sup> 8.1 Roum 15.26; 2Ko 9.1-2    <sup>i</sup> 8.7 1Ko 16.1-2    <sup>j</sup> 8.9 Mat 8.20; Pil 2.6-7

<sup>k</sup> 8.12 Mak 12.43-44

nimalara tar marang heir tar inet, ginina ra kaleig, ge ginina pe ra banga toig tar haua ro matoto teil tunugia, ahik pah tar inete gero katupagia.

<sup>13</sup>Inggeim ahik pah mi malara pare, mung heiroum, karung kale me niduh, kare mo gisiamhe tera kale me nipoul. Bo inggeim mi malara pare, a puhono pake ualo uelmatout uaia tun. <sup>14</sup>Misianene daan inggoum nami bureh. Heir tar haua gera malaraigisin, maeit me binaka gere la burehe kaleheisisin, gisina ra turung heir kalehe tar haua rung malaragioum. Song re turung uelmatout uaia tunon. <sup>15</sup><sup>l</sup>Ge a puh pe geka boloin tono uelhire God sioun o hire teil pare, “Mais geka kale toto tenas bureher inet ahik me pagopag, doh mais geka kale tar papagalik ka uelmatout uaia tun.”

### Taitus meso uanoton ka ualatueis tar la i Korin

<sup>16</sup>Inggo u heir tun tar uleikir niuaha tang God ke heir pe tang Taitus tar siokonor nimalarene re moko totoguo tamiuoum. <sup>17</sup>Taitus ke uah, kare uauia tar nidangatar namiueim, teeit inggon e mokong sioun pono na nimalara tar lame tamiuoum.

<sup>18</sup>Inggeim king ualatue keipime tang Taitus tar tang giameher uanotougigeig. Inggono ra ueltada uaia tuninir bureher tamatang tagorong mana re uoto la hahaia pe tar hire tauete tono uelhire God tasisin. <sup>19</sup>Inggono teka uamatoto ponompeinir bureher tamatang tagorong mana uakapa tun tar la tagu tamiueim tar keip tar uahungene ra uelbakein re la i Jerusalem. A kalekinaleonene ring guataieim e heir tar uleik tunur uinatoro tar Tamata Noman, kare ualasira pare, inggeim mi marang poul noman. <sup>20</sup>Inggeim king malara mare siausiasieim tar menemene ring kaueke teil pe tar bureher mani. <sup>21</sup>Temaeit king uedanga tun tar lih me leler kodkodoho tar matanar Tamata Noman mara uaha ponor tamat.

<sup>22</sup>Temaeit, inggeim king ualatue tagume tasisina tar tang giameher uanotougigeig, inggono ka uedanga to manasain tar mamang hararilik. Inggono a tamatang poul uaia tun, doh inggono tere turung poul uaiantiehe tun, teeit inggon e tagorong mana teil tun tamiuoum. <sup>23</sup>Taitus, inggono te uanotougou e kalekinale tagu totoguo tar poul tamiuoum. Doh gisisir gisiamheher uanotougigeig, gisina tera keip teil tar mener nasir tamatang tagorong mana tar uinatoro tang Kristo. <sup>24</sup><sup>m</sup>Temaeit ualasira tun tasisina toro mana teremiur nimalaelhir. Karung ualasira pono tasisin, ae maene ring uasala keipeim tamiuoum, maeit ra bangar tamatang tagorong mana uakapa tun.

<sup>l</sup> 8.15 KT 16.18    <sup>m</sup> 8.24 2Ko 7.13-14

### Poul toso uanotougig

**9** <sup>1</sup>Inggō ahik baka poluk pahu uahinga tar bolola tamiuoum tar uahire tar uahung gere la toсно tamata God i Jerusalem. <sup>2</sup>Ge inggo pe u ate tar haua re moko tun teremi nimalaroum tar poul tasir gisiameh, doh inggo ku uasala tunumpe tar puhono tamiuoum tasir Masedonia, karu hire tasisina pare, inggoumener tamatang Akaia rung tagorong mana tang Iesu Kristo kung kaleuato ro tanik manasa uoum toro krismas geko la uoum tar haua rung turung heirig. Doh tar nipiles, kara nitagalar namiuoum tar puhonene ke uiuir tun tasir bureher tamata kara guatangua pon. <sup>3</sup>Bo inggo ku ualatu e pukume toso uanotougigeig tar me ate uaia tun, ge pare kung kaleuato ro tanik nomanoum, ge inggo pe ku hire manasa tasisina pare, inggoum kung uelbake tanik manasa ku me uahire peo tamiuoum. Doh inggo u de mata saluhur puhonene geta kulaio a bohoboho ku uasala pe tamiuoum kung guata pe paar. <sup>4</sup>Maeit geta la tagume mo tamatang Masedonia toto guo, karing me banga pare, inggoum ahik pah kung kaleuato ro tanik, inggeim ahik pah mi mene baka poluk me puh, inggeim mi matala keip puk manas tamiuoum, ge inggeim pe king tagorong mana teil tun tamiuoum. <sup>5</sup>Temaieit, inggo ku namana sira pare, auiantiehe tun tar kula uapopokoho toso uanotougigeig tar me banga baka uoum tamiuoum, kara me kaleuato ro tanik tar mamang inetelik tar uahungener namiuoum, kung ualapagahain tar heir. Maeit a uahungonene tere moko tanik manasampe tar binaka ru pokosomeo e ualasira pare, inggoum mung marang heir, ahik pah ka hinga tutupisium.

### Ualasira toromio liliaheir

<sup>6</sup>Namana dede tar puhene! A tamata geke lebe tar papagalikir uatun e turung kale tar papagalikir kukuanan. Bo mai gere lebe me bureh, inggon e turung ueuere uabureh. <sup>7</sup>Inggoum kahakah mung heir katongo tun tar haua rung marang heirin. Ahik pah mung heir tar haua rung dein tar heir ue ka hinga tutupin, maeit puk kung heir. Ge God pe e malara tar tamata gere heir keip tun tar niuah. <sup>8</sup>God e matot e heir uaburehentiehe tar haua rung malaragioum, song rung turung matoto teil dedeoum tar mamang inetelik rung malaraig, kare tototonguasioum, karung bulungua me giniamehe tasir gisiameh.

<sup>9</sup>Ge a puh pe ka boloin tono uelhire God sioun pare,  
 “Inggono ke heir ueltebeir tono liliaheir tasir tiome toro mamang pang uanilik uakapa tunane i kot.

<sup>a</sup> 9.1 2Ko 8.1-7    <sup>o</sup> 9.6 NU 11.24-25

A niguatonener nanonor kodkodoh e la dedengua.” *Ker 112.9*

<sup>10</sup>Ge God pe tere heir tar uatuna tar tamatang leb menia toro bereiting ein, inggon tere turung heir pono tamiuoum tar uatuna gerung malarai, kare uatungara taninin, kare ueuer uaburehentiehe tur tenami niguatoum ger kodkodoho.

<sup>11</sup>God e turung guata uaia tamiuoum, marung matoto teil tun tar mamang inetelik, maeit rung turung liliaheiroum tar mamang haulik gera guluhig. Doh toromio liliaheiroum tar inetenine kung heirig tamiueim gere la tas mais ra katupa tar inet, ra heiringuasina tar niuaha tang God. <sup>12</sup>A puhonene kung guataioum ahik pah kung bul uelhir puk tosno tamata God tar haua ka katupain, bo a puhonene ke uoun titidiaka pono tar heir tar bureher niuaha re la tang God. <sup>13</sup>Teeit tar puhonene kung guluhuoum mes paheimiu o tamata ra turung uatakai tang God toromio liliaheiroum. Ge romio liliaheir peoum tasisin, kare tasir gisiamehe tero hire uakalahar tun pare, inggoum mung longoro tun tono Uelhire Uaia Iesu Kristo. <sup>14</sup>Gisina ra turung lotu keip tun tar nimalara tar namana tamiuoum, teeit tar uleik tunur hamhamasonener nang God ke ualasinrain tamiuoum.

<sup>15</sup>A niuaha e la tang God tono liliaheir ke heirheir puk pe tar inete uaiaonener uiantiehe tun.

### Poul ke tur keip tun tena kalekinale

**10** <sup>1</sup>Inggo Poul, u dangata uapopokoh tun tamiuoum tar hangana Kristo ger hamhamas tun na niguata tar hire toro mana totoguo pare, o gisiamehe tamiuoum ra kula totoguo pare, u ongolo puk tar bolome tamiuoum, bo tar me pokoso katongo tun inggo u sokor. <sup>2</sup>Inggo u hire uapopokoho tun tamiuoum pare, tar binaka ru me pokoso, inggon ahik pahe turung binaka uaia. Inggo u me uaongolo tunumpeio tas mais gera namana pare, i uakeluk toeig tena nimalarar tukununang gane i kot. <sup>3</sup>O mana tun inggeig o peng gane i kot, bo ahik puk pahi uiliatung misiana ra uoto uelkoi per tamat. <sup>4</sup>Ge nagi ineteng uiliatung pe inggeig a giamehe sioko tun, ahik pah misiana taninine ra uoto uelkoi keipig gane i kot, bo nagi ineteng uiliatung keipeig e la keip tena nitampopokoho God tar mamantou tenas butur popokoho tunusis ge nas uelmatan God. <sup>5</sup>Inggeig i mamantou torosio kakaialikisina gero uakeip kai katongo tasisin ge ahik pahe la tur tena ninamana God, kari siokor reih toto teres ninamanasina mara uanua kout, kara uakeluk puk manasa tang Kristo. <sup>6</sup>Tar binaka rung longoroum, karung uakeluk uaia tun tang Kristo, song ring uinatoro tanikeim tar me poluk tenas niguatar mahang longor.

<sup>p</sup> 9.10 Ais 55.10 <sup>q</sup> 9.11 2Ko 1.11; 4.15 <sup>r</sup> 10.1 1Ko 2.3 <sup>s</sup> 10.2 1Ko 4.21

<sup>t</sup> 10.4 Epe 6.13-17

<sup>7</sup>Inggoum mung bangbanga kompe i morenehia tar inet. Gete me tamata ke ate uaia tunin e uangoul tokaha keip tang Kristo, inggono pake bang paroko kompe pare, inggeim tering uangoul tokaha keip pono tang Kristo. <sup>8</sup>“Ge a Tamata Nomana pe ke heir totoguo maru kalekinale tar kauke tamiuoum, karu uatampopokoho teremi nitagorong manoum, bo ahik puk pahu marang uahiuo teremi nitagorong manoum, ku uasala katongo peio tar sikin ru tur teil pe tar kalekinaleon. Gitiempe getu uasalantieheio ahik me inete ru matala keipin. <sup>9</sup>Inggou u de matu guata sira pare, u uasokoro tamiuoum, ku bolo peme tar uelhirenine. <sup>10</sup>Ge o gisiamhe pe tamiuoum ka kula pare, ahik me namana tang Poul, ge inggono pe ke mene tun tar popokohor uelhire ke bolo peme tagigeig, bo tar binaka re uangoul taguono tagigeig, inggon a maluan, doh na menon a tabo tengkan. <sup>11</sup>Temaeit o tamatasina paka namana huara kompe pare, a haua geking menegieim tamiuoum king bolo peme, inggeim mi me turung ualasira uakalahara tar nipileser namiu geting me pokoso tun tamiuoum.

<sup>12</sup>Inggeim ahik pah misiana tasir tamata gera marang petut sira puk tamiueim mara ualasira tasir tamat. Inggeim ahik pah mi malara ra banga aha keip tolasiem tasisin. Ge gisina pe ra malara kompe ra uairan, kara banga aha katongois. Gisin ahik tun mes niate.

<sup>13</sup>“Bo inggeim ahik pah mi uasala katongosieim tar inete ge taboin tamiueim. Bo inggeim mi uasalasiem tar kalekinaleene ke uamatotoin God tamiueim e la tuka tamiuoum pon. <sup>14</sup>Inggeim ahik pah king lalantiehe tar uasala katongosieim tege pakene ahikieim pah king me pokoso baka uoum tamiuoum. Inggeim pe tesir uakikilangana tun tar me pokoso keip tono uelhire Iesu Kristo tamiuoum. <sup>15</sup>Inggeim ahik pah mi uoto uasalasiem tar kalekinale geke guatainir gisiamhe siok. Bo inggeim mi tagorong mana teil teremi nitagorong manaoum e ululeik uain dedempe, kare nami kalekinale inggeim tamiuoum e turung uleikintiehe uainingua pon. <sup>16</sup>Maeit ring la turung hire tauete pono inggeim tono Uelhire Uaia Iesu Kristo tar pang uaneit re uahuhut tamiuoum ge halana me tamata te la tagu. Ge inggeim pe ahik pah mi marang uasala katongoisieim tar kalekinale geke guata uouminir gisiamheer tamata tar giameher uan.

<sup>17</sup>“Ge no uelhire pe God geke boloin sioun, o hire teil pare,

“Mai gere uasalain,

e uasalain tar haua ke guatainir Tamata Noman.” *Jeramaia 9.24*

<sup>18</sup>\*Ge ahik peono pah ter tamat re uasala katongoin, ra bang parokoin, bo inggon ter tamata gere uasalainir Tamata Noman.

<sup>u</sup> 10.8 2Ko 13.10    <sup>v</sup> 10.13 Roum 12.3    <sup>w</sup> 10.17 1Ko 1.31    <sup>x</sup> 10.18 1Ko 4.4

**Poul doho aposoul gesir bohoboh**

**11** <sup>1</sup>Inggo u uahantiehe tun mung marang uahue peoum totoguo tar mene baka me sikina tamiuoum tar meneniner tuktukar. Bo inggoum kung uahue manas. <sup>2</sup>’Bang! Inggo u gehe tun tamiuoum, doha nige honene a nang God. Inggo u ualapagaha tamiuoum mung le tar tang siokor bulout, inggono te Kristo, maeit ru la turung ueliu tatanono tamiuoum misiana tasir kuaha komodia gesir dedeil uaia tun. <sup>3</sup>’Bo inggo u kanuh teil puk gete lilio remi ninamanoum ger kodkodoho tun, kara siokon sioun remi nitagorong mana tang Kristo getung la pe siroum tang Eba ke uelour pe Satan ge inggono pe e atentiehe tunumpe tar uelour. <sup>4</sup>’Gete me tamat re me pokoso tamiuoum, kare me hire tauete me giamehe siokor Iesu tang geking hire taueteisieim tamiuoum ue me giamehe siokor labena tang gekung kaleioum ue mo giamehe sioko ro Uelhire Uaia tang geka malarain, mung uaha kompe tar longoro tasisin. <sup>5</sup>’Bo inggo puk ahik pahu namana sira ter i kot uain tasisitir “aposoulur i ranantieh.” <sup>6</sup>’Gete ahikio paha tang men, bo inggo puk regu niate. Inggeim king uakalahara uaia tun tar puhonene tamiuoum tar mamang hararilik.

<sup>7</sup>’Hau! Te inggo ku guata uasa, ku uaikoto katongo peio, karu uairana tamiuoum ku hire tauete pe tono uelhire God ge ahik me bulauan? <sup>8</sup>’Inggo ku reih tur tar mani tasir gisiamer toto tamatang tagorong mana toro ginamehe ro buturung lotu maru poul tamiuoum. <sup>9</sup>Binaka ku uangoul keipio tamiuoum, karu katupa tar inet, Inggo ahik pah ku heir me niduh me tamat, ge o uanotouguo pe geka lih turume i Masedonia teka me heir tar haua ku katupagio, doh inggo u turung agout uaia tun getu heir me niduh tamiuoum, karu turung guata uakeluk sira dedenguampe. <sup>10</sup>Inggo u uamana tun, gine ru kale teil tun peo tono uelhire Kristo gero man, ahik tun me tamata ge me peng Akaia re matotong tur tane totoguo ru uasala katongo peio ahik pe me bulauoug. <sup>11</sup>Hau! Teeit ahik peo pahu malauehir tamiuoum? God e ate, inggo u malauehirintiehe tun tamiuoum.

<sup>12</sup>Doh inggo u guata dedempe tar hauene ru guatain maru tur tane tasir tamata gera uasalais, kara kula pare, ra kalekinale sira pono ring kalekinale pe inggeim. <sup>13</sup>Gisinar tamatasin tesir aposoul gesir bohoboh ra kalekinale keip kompe toro boh, kara boho tolais pare, no aposoul Kristo. <sup>14</sup>Inggeig ahik pahi turung lutar tar puhonene gete me uapalih katongoin Satan mare banga sira tar angelou ger nanar luh. <sup>15</sup>Temaeit a puhonene ahik paha timuh tagigeig. Doh no tamatang kalekinaleono

<sup>y</sup> 11.2 Epe 5.26-27    <sup>z</sup> 11.3 Uak 3.4,13    <sup>a</sup> 11.4 Gal 1.8-9    <sup>b</sup> 11.5 1Ko 15.10; 2Ko 12.11  
<sup>c</sup> 11.6 1Ko 2.1,13    <sup>d</sup> 11.7 1Ko 9.18    <sup>e</sup> 11.8-9 2Ko 12.13; Pil 4.15-16

Satan ra matotong petut sira pono ra kalekinale tar haua ger kodkodoh. Bo tar uadouhina pukur binak, gisina ra turung kale tar uleikir uabang manate tar haua ka guata uasain.

**Poul ke uasalain ke kale uelmahing pe**

<sup>16</sup>Inggo gine ru hire uapoul poluk tamiuoum, ahik me tamata re kula totoguo a tuktukar, bo getung namana siroum paar, auia banga sirampe totoguo tar tuktukar, maeit ru uasala uain baka polukio. <sup>17</sup>Doh gine ru uasala katongo peio, inggo ahik pahu mene sira re mene per Tamata Noman, bo inggo u mene sira tar tuktukar. <sup>18</sup>Doh gine ra sala keip tun per bureher tamata tenas niuangoulung gane i kot, inggo u sala pon.

<sup>19</sup>Inggoum o tamatang ate uaia uakapa tun, mung uaha kompe tar uanguangoul sikoro keip tasir tuktukar. <sup>20</sup>Ge inggoum pe mung malara kompe tar reihime tang mai geke uoto ualatoho tamiuoum ue gere me uakarabus tamiuoum ue ke uelour tamiuoum ue gere petutup katongo pukumein ue tang gere posposara tar lumiuoum. <sup>21</sup><sup>f</sup>Inggo u matala keip tun tar hire tamiuoum pare, inggeim o soksokoro tar guata tar inetenina tamiuoum.

Bo gete me tamata re ongol, kare uasala katongoin, inggo song ru ongolo pon, karu uasalaio. Inggo ku mene sira tar puhonene tasir tuktukar. <sup>22</sup>Gisina tesir Hibrū? Inggono teo pon! Gisina tesir Israel? Inggono teo pon! Gisina teso bubunguna Abraham? Inggono teo pon! <sup>23</sup><sup>g</sup>Gisina no tamatang kalekinale Iesu Kristo? (Inggo u meneng tuktukara kompe ku mene pe tar puhonene.) Inggo auia uainintiehe tun tasisin, teeit inggo ku kalekinalentiehe uaia uain tasisin, kara kalkale uapoulio tar karabus, kara kalkalopis uapouluio, ku tapokis tur toro mata tar bureher binak. <sup>24</sup><sup>h</sup>A tolina tunur binaka ka kalkalopis per Ju totoguo u uoto kale tar touono hangaul, kara lusior (39) kalopis tar siokor binak. <sup>25</sup><sup>i</sup>A touonor binaka ka halhaluh keipio tar sineir, kara siokor binaka ka bakbak guturuio tar palau, kara touonor binak, ka la uamokoio tar parau ke horo tar lolou, ku uangoul tar siokor boung, kara siokor marein i laur. <sup>26</sup><sup>j</sup>A bureher binaka ku sabala uairehe peo, karu kale tar bureher niduh tur tar mamang hararilikinine; toro kodom gere ualo tur tar siusan, tasir ueuenau, tasir tamatang tenag pang uan katong, tasir gime uan, toro uan uleik, toro pang uan, toro butur padenen, i laur, kare toso uanotougigeig gesir bohoboh.

<sup>27</sup>Inggo ke parakukuh tunumpeio, karu kalekinale kompela ahik pah ku hohouo uaia tar bureher binak, ku gog, karu kamadak, a bureher binak inggo ahik meg niein, karu malahong, karu palapal. <sup>28</sup>Doh tar

<sup>f</sup> 11.21-22 Pil 3.5    <sup>g</sup> 11.23 Apo 16.23    <sup>h</sup> 11.24 Ual 25.3    <sup>i</sup> 11.25 Apo 14.19; 16.22  
<sup>j</sup> 11.26 Apo 9.23; 14.5

puhung giamehe tanininanine, inggo e duh teil tunumpeio tar mamang binakalik tar namana tasir tamatang tagorong mana toro mamang buturulik. <sup>29</sup>Inggo u maluana tunumpe gete me tang sioko re maluan, karu mahiaua tunungua gete me tang sioko ka uoum keipin tar guata tar niguata uasa.

<sup>30</sup>Getu marang uasalaio, inggo u turung sala tar inete gere ualasira torogo maluano.

<sup>31</sup>God ge tamanar Tamata Noman Iesu Kristo gera uatakai dedein tar mamang binakalik e ate pare, inggo ahik pahu boh. <sup>32</sup><sup>k</sup>I Damaskus, a tamatang uoum keip gere kalekinale i kukulebanga tena nikaueke Aretas ger toia ke babata uiloho tar uan uleikono mare kusa tane totoguo. <sup>33</sup>Bo inggo puk ka uahua tauete keipio tar tolah, ka uahiuahiaio tena masolor rom tar padoronar uan uleikon, temaeit puk ku udeilo.

### Na borboriana Poul, kara uelmahing ke kaleig

**12** <sup>1</sup>Inggo u sala dedempe geta hik me inete ru kalein. Inggo u mene tauete dedempe tar borborian, kara uelhire ger ououu geke heirigir Tamata Noman. <sup>2</sup>Doh toro hangaul, karo toueit ro krismas geke karuh manas a tang siokor tamatang tagorong mana tang Iesu Kristo ka kale kaiain i ran tar uatouononor Heuen. <sup>3</sup>Inggo u ate tar tamaton, bo u tele uamatoto puk, ge pare ke la kai keipimpeono tar tukununa tun ue ke la pukur iaben, God e ate. <sup>4</sup>Inggono ka keip kaiain i Paradiso, ke longoro tar inete ger ououu, ahik me tamata ra matotong uahuein tar hire tauete tar ineton. <sup>5</sup>Inggo u turung sala keip tar tamata sira paar, bo ahik puk pahu uasala katongoio u uasala kompeio tar binaka ru maluan. <sup>6</sup>Doh gete ku marang uasalaio ahik pahu guata siraiu tasir tuktukar, ge inggo pe u turung hire tun toro man. Bo ahik puk pahu uasala katongoio, doh ahik pono pahu malara ra kular tamata totoguo auiantiehe uain tun nag niguata geta hik bakasina pah ra kale tar haua ku guatagio, karu hiregio tasisin.

<sup>7</sup>Bo inggo ka tur taneio matu uasalantieheio tar ineteniner uleikintiehe ger ououu geke ualasiraig totoguo. Ka heirio tar uleikintiehe tunumper uelmahing tar tukunug. Na angelou Satan ke me heir tar uelmahingonene totoguo. <sup>8</sup>A touono tunur binaka ku dangata uapopokoho tun peo, karu petutup tun tar Tamata Noman tar uauia tapokis totoguo. <sup>9</sup><sup>m</sup>Bo inggono puk ke hire totoguo pare, “A hamhamasar nouguo tere matotong poul manasa totomua, ge a barangana per nitampopokoho ger nouguo a uelpipih tun tar binaka ro malmaluana.” Temaeit inggo u sala tunungua, karu uaha ra kula peio a maluan, maeit na nitampopokoho Kristo e me moko totoguo. <sup>10</sup>Inggo u uaha tun ra

<sup>k</sup> 11.32-33 Apo 9.23-25   <sup>l</sup> 12.7 Job 2.6   <sup>m</sup> 12.9 Pil 4.11-13



guata peio tar mamang hararilikinin; u malmaluan, ra uelsigalaio, u kale tar uleikir niduh, u kale tar uleikir uelmahing e parakukuhuo tar bureher inete ru kalekinale pe tar hangana Iesu Kristo. Bo u uaha kompe, teeit tar binaka ru maluano, inggo song ru tampopokoh.

### Poul e namanantiehe tun tasir Korin

<sup>11</sup>Inggoum kung guata totoguo, maeit ku pe sira tasir tuktukar. Inggoum pake turung uasala totoguo, ge inggo pe ahik paha i koto tasir aposoul gesir i ranantiehe tun, ginempe ahik peo paha to hangoug tagu. <sup>12</sup>A mamang hararilik gere uatur uakalahara tasir aposoul nomana tun te ginine; a uaparok, a inete timuh re pokos, kara hagarang touo tar inet. Ginina ka guatguata hamas, uamakaha uapoul to tunig tar matamuioum. <sup>13</sup>Inggo ku guata uaia uainantiehe tun tamiuoum toro giniamer ro buturung lotu. Ahik pah ku heir tagu me niduh tamiuoum misiana ku heir pe toro giniamer ro buturung lotu. Inggo u ueldolomo tun mung kale liu tar niguata uasaonener eiguo tamiuoum.

<sup>14</sup>Gine daan inggo u kaleuator, ter uatouonono manasar binakono ru lameo tamiuoum. Doh inggo ahik pahu malar u me heir poluk me niduh tamiuoum. Inggo ahik pahu lang kale menami inetoum, bo inggo u marang kale tamiuoum ngohina pare, o bung tug, ge o keketik pe ahik pah ra matotong patoho me inete ra heirin toso tinas, bosir tinana tera poul tasir keketik. <sup>15</sup>Temaeit inggo u uaha tun tar heir tenag mamang inetelik tar poul tamiuoum. Karu heir katongo ponoio tamiuoum, gitiempe ahik peoum pah mung malaelhir totoguo, inggo u malaelhir dedempe tamiuoum.

<sup>16</sup>A puhon a kalahara tun, inggo ahik pah ku heir me niduh tamiuoum, bo o gisimehe puk tamiuoum ra namana sira pare, ku lang uelour keipio tamiuoum toro boh. <sup>17</sup>Hau! Inggo ku uelour keip tamiuoum tasir tamata geku ualatuemeis tamiuoum? <sup>18</sup>Inggo ku mene uapopokoho tun tang Taitus tar la tamiuoum, karu heir tar uanotougigeig ke la tagu tatanono ue Taitus ke uelour tamiuoum? Raeim kira guata keip kompe tar siokonor ninamana tar mamang inetelik, kara siokor lel.

<sup>19</sup>Inggoum here mung namana pare, mi marang uelturut katongo pukusieim tamiuoum tar binakalaene daan bidouh? Ro bung kaloug tar matana God e ate inggeim king guata kompe tar mamang inetelikinine gere uatampopokoho tamiuoum ring uangoul tokaha keip pe tang Kristo. <sup>20</sup>Inggo u sokoro teil tun getu me banga pare, inggoum a giamehe sioko tunur niuangoul tar nimalara ke me moko tereg ninamano. Doh inggoum mung turung bangangua pono totoguo, a giamehe sioko pono tar nimalara ke moko teremi ninamanoum. Inggo u sokoro teil tun gete

<sup>n</sup> 12.11 2Ko 11.5   <sup>o</sup> 12.12 Roum 15.19   <sup>p</sup> 12.13 2Ko 11.9   <sup>q</sup> 12.18 2Ko 8.6,16-18

pokosor puhunine tamiuoum: a uelperer, a ueluelgehe, a ueluelkoi, a uelsae, uelsigala tasir gisiameh, a ueluelngure, o salasalalik, karo bilinggala ueltebeir. <sup>21</sup>Inggo u sokoro teil tun getu la uagiamehe polukume tamiuoum ter hauon a God ger nouguo e turung uamatala to tunumpe totoguo i uoum tar matamiuoum. Inggo u turung ueldolomo tun tas mais ka uangoul uasa. Inggo u ueldolom, teeit gisin ahik pah ke uiuir taguis teres niguata uasa, ahik pah ka uapalih tagu torosio uraur, kare tar ineteniner ualamatala ka guataig.

### A uadouhinar uatagin

**13** <sup>1</sup>Gine daan ter uatouonono manasar binaka ru me pokoso peo tamiuoum, namana uanono tun! No uelhire God o kula pare, “A mamang inetelik gerung marang uatauetegioum tasir manai ahik pah na ninamana pukur tang siokor tamat, bor puhono pake me tang torik ue me tang touonor tamata ra uelhote.”<sup>t</sup> <sup>2</sup>Inggo ku uatagin manasa tas mais geka guata uasa, kare tasir gisiamehe ponompe tar inetenin tar binaka giane ku me pokoso tamiuoum tar uatorikinar binak, doh inggo gine ru hire uapoul poluk tamiuoum tabo peio, maeit getu la uagiamehe polukumeo, ahik manasa pahu me heir binaka tasisin.

<sup>3</sup>Inggoum mung marang banga tun mo mana pare, Kristo e menmene totoguo. Kristo ahik paha maluana re kalekinale pe i uantinanina tamiuoum, inggon a uelpilih tunur barangana na nitampopokoho re uangoul keip pe tamiuoum. <sup>4</sup>“O man, inggon a maluana nomana ka tung pous pein, kara uakusein tar korose, bo gine puk daan, inggon e uangoul keip tar barangana na nitampopokoho God, doh inggeim tesir maluana pon, bo mi uangoul tokaha keip puk tatanon, maeit ring tagala keip tena nitampopokoho God.

<sup>5</sup>Bang banga hamas katongosioum, uedanga katongosioum, karung banga ge parung uangoul keipimpeoum tar nitagorong man. Inggoum ahik pah mung ate re uangoul tokaha teil pe Iesu Kristo tamiuoum? Bo gete taboinir nitagorong mana tamiuoum e baka sirono pare, inggoum, ahik pah kung kale uahiua taninin. <sup>6</sup>Bo inggo puk, u tagorong mana teil pare, inggoum mung turung banga tamiueim pare, king pehuar, karing siokor kale uahiua uakapa tun tar nitagorong manon.

<sup>7</sup>Bo mi lotu kompe tang God, maeit ahikoum pah mung guata me niguataniner sa. Inggeim ahik pah mi marang ualasira pare, teeit ka siokor bang paroko tun pesieim, bo inggeim mi marang ualasira tamiuoum marung guatoum tar ineter kodkodoh. Gitiempe ge teka namana sirar tamata pare, inggeim ahik pah ka bang parokosieim. <sup>8</sup>Ge

<sup>r</sup> 12.21 2Ko 13.2    <sup>s</sup> 13.1 Mat 18.16; 1Ti 5.19    <sup>t</sup> 13.1 Bolobolong Ualatut 17.6; 19.15

<sup>u</sup> 13.4 Pil 2.7-8    <sup>v</sup> 13.5 1Ko 11.28

inggeim pe ahik pah mi matotong guata tar inete gete na uelmatanono tar inete ger man. <sup>9</sup>Inggeim mi uaha dedempe tar binaka mi maluan, bo inggoum o tampopokoh. Ge inggeim pe mi lotu tamiuoum marung udeil uaia dede rung uangoul pe.

<sup>10</sup>Inggo ku bolo pukume tar uelhirenina tabo peio tamiuoum, maeit getu me pokoso tamiuoum, inggo ahik pahu me turung heir me uleikir uabang manate tamiuoum tar kalekinaleene ke heirinir Tamata Nomana totoguo tar kaueke tamiuoum, ge inggono pe ke heir totoguo tar kalekinaleono mare uairana tamiuoum ahik pah ra touahiuasioum.

#### A uadouhinar uelhireng uah

<sup>11</sup>Gon! Ro uanotoug. Auia manas! Mu uangoul uaia dedempe marung udeiloum, karung guata tun tar haua ku hiregio tamiuoum tar guat. Ueluaiesioum, karung uangoul keip toro hiarou mare turung uangoul tokaha keip Godong tar uelmalauehir, doha uelhiarou tamiuoum.

<sup>12</sup>Mu uelbuaka keip tar niuaha ger dedeil tun toso uanotoumiu.

<sup>13</sup>No tamata God uakapa tun gesir dedeil ka heir pono tenas niuaha tamiuoum.

Na hamhamas nagi Tamata Nomaneig Iesu Kristo, doha na uelmalauehir God, kara niuangoul tokaha ger nanar Iabena Dedeil e moko tamiuoum.

# Galesia

## O bolobolo ke boloin Poul tasir tamat i Galesia

### O bolobolo tasir Galesia

O Galesia o bolobolo i lolono tar timuhur uelhote.

O bolobolo tasir Galesia, roon o bolobol Poul ke bolo tana roon. Roon here tero uakikilangana ro bolobolo ke boloin Poul tasir tamatang tagorong man. Tar binakon o bureher tamata ge ahik paho Ju ka kotpokos o tamatang tagorong man. O gisiameher tamata ka kula pare, o tamata geke nihing tagorong man paka kotpokosongua pon o Ju. O tamatasina ka kula pare, o tamata geke nihing tagorong mana paka uakelukungua tar mamang ualatutulikir nasir Ju, doh nas niguat.

Poul e kila tar tamat geke kotpokos a tamatang tagorong man gete tagorong mana tang Iesu Kristo. Iesu ke mata tar kale tar niuabatong tenas niguata uasasin. Gisin ahik pah ra uakeluk tar ualatut, doh nas niguatar Ju.

O bureher tamata daan, ahik pah ra uakeluk tenas niguatar Ju. Bo o tamata pukusina nas niguat, doh res ninamana siok. Bo a niguata puk ahik pahe banotong inete uleik uain tang God. Temaeit o tamatasina paka tagorong mana tang Iesu.

Poul ke bolo pono hape paka uangoul per tamatang tagorong man. Gisina paka ualasira tar uelmalauelhir, kara niuah. Gisina paka uangoul keip toro hiarou. O tamatang tagorong mana pako hamhamas, o liliaheir, karo uia. Doho tamatang tagorong mana paka heir katong tunis tar mamang inetelik, pako hamhamas, kara ualasira tar niguatang ualatut (Gal 5.22-23). O tamatang tagorong mana ra guata tar niguatar uia tar uauaha tang God. Bo gisin o tamatang tagorong mana puk teeit ra tagorong mana pe tang Iesu. Temaeit nas niguata uaiasin ahik pah teke guata tasisin o tamatang tagorong man.

### I lolono toro bolobolo rone:

A meneng uakalahar 1.1-10

Na nitampopokoho Poul ke aposoul pe 1.11–2.21

No Uelhire Uaia God tena hamhamas 3.1–4.31

Na kalekinaler tamatang tagorong man, doh na niuangoul tar nimalar  
5.1–6.10  
A uadouhinar menen 6.11-18

---

### Poul e heir tar niuaha tasir tamat

**1** <sup>1</sup>O bolobolo rone o la tur tang Poul ger aposoul. Ahik me tamata ue mo tamata ka uamatoto totoguo, bo a kilonener noguo e la tur tang Iesu Kristo, doh God Tamagigeig geke uatentur tapokis tur tang Iesu toro mat.

<sup>2</sup>Inggo meso bung uanotoug gera tagorong mana tang Kristo ra uangoul tagu totoguo, inggeim mi heirila tenami niuaha tamiuoumane toro lotunine re moko tar pang uan i Galesia.

<sup>3</sup>A hamhamas doho hiarouo tamiuoum o la tur tang God Tamagigeig, doh tar Tamata Noman, Iesu Kristo, <sup>4</sup>geke mata teregi niguata uasaeig tena nimalara God a Tamagigeig mare uelkarus tapokis tur tagigeig tar hagar uasaene daan re moko tar kot. <sup>5</sup>Temaene ri bantoeig tar uatakai tar hangana God tar mamang binakalik. O mana tun.

### O sioko puk ro Uelhire Uaia

<sup>6</sup>Inggo ku lutarantiehe tun ke uiuir pesioum, karung hiliu tang God geke kilauatoro tamiuoum tena niueldolomo Kristo, doh inggoum kung uakeluk manasa toro giamehe ro uelhire uaia, <sup>7</sup>ge ahik tun nomana paho uelhire uaia. Bo inggo ku mene puk pare, teeit o gisiamer tamata ra ualelio teremi ninamanoum, kara marang uapalih toro Uelhire Uaia gero nang Kristo.

<sup>8</sup>Bo gete inggeimon ue me anggeloung Heuen re me uelhire tauete mo Uelhire Uaia ge mo giamehe sioko tang geku heirio tamiuoum, inggonor tamaton ue a anggelouon e turung birin tena nimaliana God, kare sa dedengua. <sup>9</sup>Inggeim king mene baka uoum sioun, doh gine daan inggo u mene uapoul poluk ge me tang sioko re uelhire tauete tamiuoum mo uelhire uaia, doh roon o giamehe sioko tang roeit kung kaleioum sioun, inggonor tamatono ue a anggelou e turung birin tena nimaliana God, kare sa dedengua.

<sup>10</sup><sup>d</sup>Doh hape rung namana peoum? O uelhire rone ku meneio, ku men maru uauaha uaia tasir tamata ue maru uauaha uaia tang God? Getu uauaha pukuo tasir tamat, inggo ahikingua pah na tamatang kalekinale Kristo.

---

<sup>a</sup> 1.4 Gal 2.20   <sup>b</sup> 1.7 Apo 15.1,24   <sup>c</sup> 1.8 1Ko 16.22   <sup>d</sup> 1.10 1Te 2.4

### Hape ke me kotpokoso pe Poul a aposoul

<sup>11</sup>eRo bung uanotoug gera tagorong mana tang Kristo, inggo u malara mung ateoum pare, O Uelhire Uaia geku uelhire taueteio sioun tamiuoum, roon ahik pah ke uakotpokosoin me tamat. <sup>12</sup>Inggo ahik pah ku kale tur tang roono me tamata ue ka ualasiraio tang roon, ahik tun! Iesu Kristo katongompe ke ualasira uakalahara tang roono totoguo.

<sup>13</sup>fDoh inggoum kung longoro manasa tenag niuangoulo sioun, ku uakeluk uapopokoho tun pe tenas niguatar Ju tar lotu. Doh hape ku guata uasa tun pe tasir tamatang tagorong mana tang God. Karu uedang a tun tar mamantouo uakapa tasisin. <sup>14</sup>gInggo ku pen tampopokoho tun tar uakeluk tar mamang hagarilikir nas ro bung tubug. Temaene tar hagaronene ku guataio, inggo ku uoumuoum keip teilingua tenag babeir tamata tenas lotur Ju.

<sup>15</sup>hBo tar binaka puk halana tinouguo te poho totoguo, God ke uamatoto manasa totoguo. Doh tar hamhamasar nanon inggono ke kila to totoguo tar binaka ke uamatotoin tar kotpokoso pare, a nana katongo tunon, <sup>16</sup>kare malar e ualasira tar tuna totoguo maru banotong uelhire tauete tonon Uelhire Uaiaono tasir gime uan ge ahik paho Ju. Doh tar binakonene inggo ahik pah ku la dangata uain baka me tamat. <sup>17</sup>Doh ahik pono pah ku la baka uoum i Jerusalem tar la banga tasir tamata geka aposoul uakikilanga totoguo, bo ku la ualahurungua kompe i Arebia, song ku la tapokis i Damaskus.

<sup>18</sup>iKo karuh baka ro touono ro krismas, karu lingua taro inggo i Jerusalem tang Pita tar la kale tur me niate tatanon, karu uangoul keip tatanono tar siokor hangaul, kara tolimar marein. <sup>19</sup>Bo ahik pukuo pah ku banga me tang siokor aposoul, te Jems puk manasa ge tahinar Tamata Noman. <sup>20</sup>Toro uelhire rone ru boloio tamiuoum, inggo u uamana to tun tar matana God, inggo ahik pahu boho tamiuoum. <sup>21</sup>jSong i muduhia ku lao toro uan uleik tar pang Siria, kari Silisia. <sup>22</sup>Bo tar binaka pukoun o toto tamata gera tagorong mana tang Kristo i Judia ra tele haraha totoguo. <sup>23</sup>Gisina ka longlongoro ueluatata kompe totoguo pare, “Ter tamata dehene geke turtur tane bak, kare mamantouo sioun tagigeig, bo gine daana puk inggon e uelhire tauete toro Uelhire Uaia tar nitagorong manonene ke mamantouo bakaion.” <sup>24</sup>Gisina ka longoro tar inetonene ke guatain God totoguo, kara uatakaiangua tang God.

<sup>e</sup> 1.11 Mat 16.17    <sup>f</sup> 1.13 Apo 8.3    <sup>g</sup> 1.14 Apo 22.3    <sup>h</sup> 1.15 Ais 49.1; Gal 2.7

<sup>i</sup> 1.18 Apo 9.26-27    <sup>j</sup> 1.21 Apo 9.30

### O aposoul ka malara tang Poul

**2** <sup>1</sup>Ko karuh baka ro siokor hangaul, doho toueit ro krismas, song ku la tapokis polukuo i Jerusalem me nu Barnabas, karu kila pono tang Taitus, karing la tokah. <sup>2</sup>Inggo ku tapokis puk, teeit God ke kula totoguo tar la, karu la tabila keip puk tasir tamatang uoum keip tar lotu. Inggo ku marang uahire uanaman manate puk tasisina toro Uelhire Uaia rone ru uoto uelhire tauetein tasir tamatang toro gime uan ge ahik paho Ju. Bo inggo puk ku guata uaouo keip tasir tamatang uoum keipisitir tamata uleik, teeit inggo ku namnamana tar kalekinalenine ku guata manasaig, kare ginine daan gete rou. <sup>3</sup>Doh gisina ka uauia, kara hik pah ka petutup tang Taitus ger uanotougou ra pokoinir tukunun ge inggono pe a peng gime uan ahik paha peng Ju.

<sup>4</sup>A puhonene ke kotpokos, teeit toso bung uanotougigeig gesir bohoboho geka uatagumeis, tar me banga uanomo tar niguata uaiar nang Iesu ke luaka liu tur peono tagigeig tar karabus tenas niualtutur Ju. Gisina ra marang guata kompe tagigeig o karabus. <sup>5</sup>Bo inggeim puk ahik tun pah king marang longoro tasisin, teeit inggeim king malara toro Uelhire Uaia gero man ahik paho uapalih o moko dede tamiuoum.

<sup>6</sup>Bo gisine puk ra uakeipis pare, o tamatang uoum keip, ahik pah ka mene me timuhur uelhire taninine ku menmenegio, kare ahik pah ku namana baka tasisina hape ra baka pe. Ge God pe ahik pahe kedanga tar tamata hape re baka pe. <sup>7</sup><sup>m</sup>Doh gisina ka banga sira pare, God ke heir totoguo tar kalekinale tar uelhire tauete toro Uelhire Uaia tasir gime uan ahik paho Ju te misiana kompe ke heir peono tar kalekinale tang Pita tar uelhire tauete toro Uelhire Uaia tasir Ju. <sup>8</sup>Ge na nitampopokoho pe God ke guata tang Pita tar kalekinale pare, a aposoul i uantinanina tasir Ju te misiana kompe ke guata pono peono totoguo tar kalekinale a aposoul tasir gime uan ahik paho Ju. <sup>9</sup>Jems mes Pita, doh Jon tera keip o tamatang uoum keip tar lotu gisina ka bang paroko tar siokor kalekinale uleikonene ke heirin God totoguo, temaeit ka uelkuse pang lima keipinguasina tamiraeim me Barnabas tar ualasira pare, inggeim mi kalekinale tokah. Doh inggeim king ueluauiare pare, raeim me Barnabas teira la kalekinale tasir gime uan ahik paho Ju, bo gisina tera la kalekinale tasir Ju. <sup>10</sup><sup>n</sup>Gisina ka dangata pono tamiraeim tar siokor puh pare, “Raeim mira namana dede tar poul tasir tiome gera uangoul teil tenas lotusin?” Doh inggo ku uaha tar kalekinaleon, ge a kalekinale peono ter noguung sioun.

### Poul ke uelkukur uakalahara to tang Pita i Antiok

<sup>11</sup>Tar binaka ke me uangoul tagu Pita totoguo i Antiok, inggo ku uelkukur to tun nomana tatanono tar matasir manai, teeit inggono ke

<sup>k</sup> 2.1 Apo 15.2 <sup>l</sup> 2.4 Gal 1.7; 5.1,13 <sup>m</sup> 2.7 Apo 22.21 <sup>n</sup> 2.10 Apo 11.29-30

guata tar hagar ahik paha kodkodoho tun. <sup>12</sup> Tar binaka ke pokoso uakekenon, inggon e uoto ein tokaha keip tasir gime uan ge ahik paho Ju gera tagorong mana tang Iesu. Bo tar binaka puk ka pokoso mer Ju geke ualatuemeis Jems, Pita ke uanuangua tar ein tokaha keip tasisin. Teeit inggono ke matal, kare sokoro tasisinar Ju, teeit gisina ra tur uapopokoho keip tar niguatang tar lotu tar poko tasir tamat. <sup>13</sup> O gisiamhe ponor Ju o uanotoumieim ka uakeluk pono tar puhonene ke guatain Pita, ge gisina pe ra kalekinale kokopo kompe, kare babasiringua pono Barnabas tasisin.

<sup>14</sup> Gine ku banga peo pare, ahikisin pah ra uakeluk uakokodoho tun toro man toro Uelhire Uaia, karu hire to tunumpe tang Pita tar matasisina pare, “Ingga deh ter peng Ju tun! Bo ingga puk ko uangoul sira tunane paha peng gime uan, ahik pah ko uangoul sir a peng Ju. Hape maene ro marang petutupa tasir gime uan ra uakeluk tenas niguatar Ju?”

#### A nitagorong man ke uaudeil tasir Ju mesir gime uan

<sup>15</sup> “O man inggeig o peng Ju ka poho pesieig ahik paho gime uan gera kulais o guata uasa. <sup>16</sup> Bo mung ate kompe, a tamat ahik pahe kodkodoho tola tang God re uakeluk pe tenas ualatur Ju, bo tar nitagorong mana tang Iesu Kristo. Temaeit inggeig pono ki tagorong mana manasa tang Iesu Kristo, kara nitagorong mana tang Kristo ke uakokodoho tagigeig, doh ahik pah ka kulasieig o kodkodoho ki uakeluk pe tar ualatur. Teeit ge ahik pe me tang sioko ra kulain a kodkodoho re uakeluk pe tar ualatur.”

<sup>17</sup> Bo hape geti sireig me hagar mari kokodoho to tang God tar nitagorong mana tang Kristo, kara tuparasiieig pare, o tamatang guata haraha tar niguata uasa te Kristo ke uoum keip tar niguatar sa? Ahik nomanampe! <sup>18</sup> Getu uatentur tapokis polukuo tar niguatang tar ualatur geku mamantouo baka uoumig, inggo u ualasira katongonguaio a tamatang katego tar ualatur. <sup>19</sup> Ge inggo pe ku mata tar niguatang tar ualatur maru me tua to tang God. <sup>20</sup> Ge inggo pe ka uakusa keipio i rana tang Kristo tar korose, temaeit inggo paka hik manasa paha tua daan, bor nituaene ru uangoul keipio teke heirin Kristo gere uangoul i lolono totoguo, karu uangoul keip kompe tar nitagorong mana tar Tuna God geke malauehirintehe tun totoguo, kare heir tar tukununa totoguo. <sup>21</sup> Inggo ahik pah ku turung tar mud tena hamhamas God. Gete me tamata ke uakokodohoinir ualatur, a tabo tengkanangua ke mata pe Kristo.

#### I uakeluk tar ualatur ue a nitagorong man

**3** <sup>1</sup> Inggoumur Galesia o popouluana tun. Mai ke uatoboul teremi ninamanoum. Inggoum ke banga tunur matamiu ka uakusa pein

° 2.12 Apo 11.3    P 2.16 Apo 15.10-11; Roum 3.20-28; Gal 3.11    ¶ 2.20 Gal 1.4



Iesu tar korose. <sup>2</sup>Inggo u marang dangatangua baka tamiuoum tar siokor puh pare, “Inggoum kung kale tar Iabene Dedeil tang hingiar lele tun?” Tar lelung tar uakeluk tar ualatut ue tar lelung longor, karung tagorong mana toro Uelhire Uaia? <sup>3</sup>Hape maene kung popouluanoum? Inggoum kung uakekene keip tenami niuangoul tar Iabene Dedeil. Doh gine daan inggoum mung marang uakapa keip katongo manasa teremiuir nitampopokoh? <sup>4</sup>Doh hapengua tar mamang hagar uakapa giniane ke kotpokoso tenami niuangouloum? A tabo tengkanagua ke kotpokoso pe? Ahik pahu namana sira ginin a to tengkana ke kotpokoso pe.

<sup>5</sup>Inggo u marang dangata poluk tamiuoum pare, “Ke heir God tamiuoum tar Iabene Dedeil, kare guata kudul tun tar nitouo tamiuoum, teeit kung uakeluk peoum tena ualatut Moses?” Ahik nomanampeon! Inggoum kung tagorong mana toro Uelhire Uaia tang Kristo, temaene ke heir God tena Iabene Dedeil, kare guata tar nitou.

<sup>6</sup>Te misiana kompe ro hire teil pe no bolobolo God tang Abraham pare, “Inggono ke tagorong mana tang God, maene ke kulangua God tatanono a kodkodoh.” <sup>7</sup>Ter puhunin pakung naman manategioum o tamata gera tagorong mana toro Uelhire Uaia, gisina teso bung tuna Abraham.

<sup>8</sup>Sioun no uelhire God ka boloin pare, “O gime uan ge ahik paho Ju ka uakodkodoho tois teres nitagorong man.” Karo Uelhire Uaia o uoum teil tar uelhire tauete tang Abraham pare, “Teeit totomua Abraham Inggo u turung guata uaiangua tasir tamata uakapane i kot.” <sup>9</sup>Abraham ke tagorong man, kara heirin tar niguata uaia. Temaeit o tamata uakapa tun gera tagorong mana tang Kristo gisina ra guata uaia ponois, teeit a tamatang tagorong mana pe Abraham.

<sup>10</sup>“Mais ra uakeluk tun tar ualatut, kara haono to taninin tar uakodkodoho tasisin, gisin e turung sir uabiris tang God, ge a puh pe a nibol a nang God pare, “Mais ge ahik pah ra uakeluk uakodkodoho tun tar haua ka bolo uahiuain toro bolobolo tar ualatut, gisin e sir uabiris tang God.” <sup>11</sup>“Doh gine daana song ke kalahara tunuono pare, ahik baka polukur tamata mena hagarang uakeluk tar ualatut mare kula God tatanon a kodkodoh. Teeit no bolobolo God o hire teil pare, “O tamata gera tagorong man, God e kula tasisin o kodkodoh, kara turung tua.” <sup>12</sup>“Bo tar uakeluk tun tar ualatut, ahik pahe banotong guata me inete tar nitagorong man tang God, ge no bolobolo God pe o hire teil pare, “Gero malara o sir tar nitua ingga pako uakeluk tunungua tar mamang ualatutulik.” <sup>13</sup>“Bo Kristo ke birin mare uelkarus tagigeig ke bir pesieig tar ualatut, ge o bolobolo pe o hire teil pare, “Maiar tamata gera uakusa

<sup>r</sup> 3.6 Uak 15.6    <sup>s</sup> 3.8 Uak 12.3; Roum 4.3,16    <sup>t</sup> 3.8 Bolobolong Uakeken 18.18; 22.18

<sup>u</sup> 3.10 Ual 27.26    <sup>v</sup> 3.11 Hab 2.4; Gal 2.16    <sup>w</sup> 3.12 NKP 18.5    <sup>x</sup> 3.13 Ual 21.23; Roum 8.3

kaiain i rana toro douk, inggono teke uabirin God.”<sup>14</sup> Kristo ke guata puk pare, mare heir tagigeig tar niguata uايا geke ualapagahain God tang Abraham. Teoneit ra turung heir tur ponoin tang Iesu Kristo tasir gime uan, temaeit tar nitagorong man inggeig i turung kalengua pono tar labene Dedeil geke ualapagahain God e heir tagigeig.

**Na ualatut God ahik pahe matot e katego tar ualapagaha geke guataion**

<sup>15</sup>Ro bung uanotoug gera tagorong mana tang Kristo tar uanaman manate tagigeig tar ualapagah inggo u mene ualasinguala ri uoto uangoul peeig. Getura ualapagahar toking tamata me puh, kaura bolongua tara hangas toro bolobol tar tur tane mara hikir inete gekura ualapagahais rasina pah ra katego in ue ra uanotoin me giniamer inet.<sup>16</sup>Sioun God ke ualapagaha tang Abraham mer tun. No bolobolo God ahik paho uahire pare, O bung tun ue o bureher tamat. Ahik! O bolobolo roon o kula pare, A tunono ger tang sioko ter Kristo. <sup>17</sup>O tengkana nogo uelhireo rone pare, A ualapagaha geke guata keipin God tang Abraham, God ahik pahe banotong katego tatanon. Dohi muduhia toro 430 ro krismas God ke heir tar ualatutur nagigeig tang Moses. Doha ualatuton ahik pahe banotong katego tar ualapagaha geke heirin God sioun tang Abraham. <sup>18</sup>Ge me inete ke heirin God tang Abraham gere haono to puk tar uakelukunar ualatut, inggon ahik baka poluk pahe haono to tena ualapagaha God. Bo God puk ke ualapagaha tar inetenin e turung heir tang Abraham.

<sup>19</sup><sup>b</sup>Ae maene ke heir God tar ualatut? God ke heir mare ualasing a huar niguatar sa. Doh inggono ke malar e mokor ualatut e tuka gete kotpokosor keketik ger tuna Abraham geke heirin God tar ualapagah. Doha ualatut ka heirihaig tasir angelou, kara me hire taninina tang Moses ger tamatang heir ualatuman tar uelhire tasir tamat. <sup>20</sup>Bo a tamatang heir ualatuman puk tar uelhire ra malara pukin geta tang torik ura marang ualapagah, bo geta tang sioko pukur tamata re ualapagah, a tamatang heir ualatuman ahik pah ra malarain. Ge God pe a tang siok.

<sup>21</sup><sup>c</sup>Ue hape! A ualatut e tur tanengua tar ualapagah ger nang God? Ahik tun! Gete ke banotong heirin ualatut tar nitua tagigeig ri uakeluk pe tar ualatutunin inggeig paki kotpokos o tamata kodkodoho tun tar matana God. <sup>22</sup>Bo no bolobolo God o hire teil pare, O tamata uakapa tun ra uangoul teil tar karabus tar niguata uasa. Temaene ter siokon siounur hagar mari kale inggeig tar inete geke ualapagahain God e heir tagigeig, ter tagorong mana dede kompe tang Iesu Kristo.

<sup>y</sup> 3.16 Uak 12.7    <sup>z</sup> 3.17 KT 12.40    <sup>a</sup> 3.18 Roum 4.14    <sup>b</sup> 3.19 Apo 7.38; Roum 5.20

<sup>c</sup> 3.21 Roum 8.2-4

<sup>23</sup> <sup>d</sup>Sioun tar binaka halanar nitagorong mana te kotpokos a ualatut ke tur tane tun tagigeig misiana pahi uangoul tar karabus ke la tuka tar binaka re la pokoso uakalahara tunur inete ri tagorong manaieig. <sup>24</sup> <sup>e</sup>Temaene a ualatut teke kaukek, kare uoum keip tagigeig ke me tuka ke me pokoso pe Kristo, temaeit gine daan tar nitagorong manar eigigeig tang Kristo inggeig o kodkodohongua tar matana God. <sup>25</sup> Bo gine daana ke pokoso manasa pe Kristo geke moko teregi nitagorong maneig. Inggeig ahik manasa pahi uangoul teil tena nikaueker ualatut.

### A nitagorong mana ke guata tagigeig o bung tuna God

<sup>26</sup> <sup>f</sup>Temaeit inggoum uakap o bung tuna God, teeit tar nitagorong manar emiuoum tang Iesu Kristo. <sup>27</sup> <sup>g</sup>Ge inggoum peeit ka uahuhusiuoum tar uangoul tokaha keip tang Kristo misianangua pah ka kalelasioum tena nitua Kristo. <sup>28</sup> <sup>h</sup>Temaeit gine daan ahik baka poluk mo kahakahar tamat, ahik paho kula pare, o Ju ue o gime uan ue o karabus ue o tamatasine ra uangoul teres nimalar, o bulout ue o kuah, ge inggoum pe a tang sioko tang Iesu Kristo. <sup>29</sup> <sup>i</sup>Ge paro nang Kristo nomanoum, inggoum teso bunguna pono Abraham, karung turung kalengua pono tar inete geke ualapagahain God tatanon.

**4** <sup>1</sup> Bo tar mene uakalahara uain baka poluk tar haua geku mene uoumuio. A keketik bulout tere turung kale uahiuu kalehe tena mamang inetelik taman, bo tar binaka puk re kalan harahon e uangoul sira pare, a karabus, bo a mamang inetelik puk a nanon. <sup>2</sup> Tar binaka re keketikon o mahoho ra kaukeke tatanon, doh inggon e longoro tasisin e tuka tar binaka ke uamokoin taman.

<sup>3</sup> <sup>j</sup>Te misiana pono tar binaka halaneig ti tagorong mana tang Kristo, inggeig ki uangoul pon i kukulebanga tenas nikaueker liouanang gane i kot. <sup>4</sup> <sup>k</sup>Bo tar binaka puk ke uamatotoin God, Inggono ke heiriha tar tun, ke me pohoinir kuah, kare uangoul teil tena nikaueker ualatut ger nasir Ju. <sup>5</sup> Tar bulaua tapokis tagigeigir tamata ri uangoul teil pe tena nikaueker ualatut mari kotpokoseig o bung tuna God. <sup>6</sup> <sup>l</sup>Tar ualasira pare, inggoum o bung tuna God, God ke heiriha tar Iabener tun ke me hiku tar kolougigeig ter iabenonene re kula ualeik pare, “Tamoug.” <sup>7</sup> Temaene inggoum ahik baka poluk pah kung uangoul sira pare, o karabus, bo o bung tuna God. Doh geto uangoul sira pare a tuna God, inggon e turung heir tar mamang inetelik tamiuoum misiana tar tun.

### Poul e namanantiehe tun tasir Galesia

<sup>8</sup> Sioun tar binaka rung tele harahoum tang God, inggoum kung uangoul sira pare, o karabus tasir god bohoboh. <sup>9</sup> Bo gine daana kung iate

---

<sup>d</sup> 3.23 Gal 4.3   <sup>e</sup> 3.24 Roum 10.4   <sup>f</sup> 3.26 Jon 1.12   <sup>g</sup> 3.27 Roum 6.3   <sup>h</sup> 3.28 Roum 10.12  
<sup>i</sup> 3.29 Roum 4.13   <sup>j</sup> 4.3 Kol 2.20   <sup>k</sup> 4.4-5 Jon 1.14; Roum 1.3   <sup>l</sup> 4.6-7 Roum 8.15-17

manasoum tang God ue paku kula pare, God e ate manasa tamiuoum. Ae maeit rung marang tapokis polukoum, karung kotpokoso sira poluk pare, o karabus tasir liouanang kauekane i kot, gisin o manguh, kara hik mes nitampopokoho tagu. Inggoum mung marang uangoul poluk i kukulebanga tasisin. <sup>10</sup> Inggoum mung namnamana kompe tar uakeluk tar niguatang tenas marein uleiking lotur Ju, doh tar timuhur bialok, doh tar uleikir lotu toro timuh ro krismas. <sup>11</sup> Inngo ku namanantieh, karu sokoro keip tamiuoum, a sa geta ueluelourig nagu kalekinalo geku guataig tamiuoum.

<sup>12</sup> Inngo u dangata uapopokoho tamiuoum ro uanotoug tar uangoul sira totoguo, ge inggo pe misiana puk tamiuoum. Inggoum ahik pah kung guata uasa totoguo. <sup>13</sup> Inggoum mung namana huara tar binaka ku me pokoso uakikilango tamiuoum, karu hire taete uakikilanga toro Uelhire Uaia tamiuoum, teeit inggo rogo mata tar binakon. <sup>14</sup> Doha puhono ke heir tun kompe tamiuoum tar niduh, bo inggoum puk ahik pah kung de, kara hik pah kung marapul tar kaueke totoguo. Bo kung kaueke uaia tun totoguo misiana pah kung uaha uangoul mena angelou God ue te Iesu Kristo uadeil puk. <sup>15</sup> Inggoum kung uahantiehe tun, a hauonene ke guata tamiuoum? Inngo u banotong kula katongoio pare, “Ge pake matoton, inggoum pakung ue golo tar matamiu, karung heir taninina totoguo.” <sup>16</sup> Ue a hau! Gine daan inggo ku kotpokoso manas a uelmatanangua tamiuoum, teeit ku hire tun pe toro mana tamiuoum?

<sup>17</sup> Doho gisameher tamatasinasine ra marang reih pukumpela tamiuoum tar uakeluk tasisin, gisin ahik pah ra namana tun tar poul tamiuoum. Gisina ra malara kompe i ueltageiheig, marung hiliuoum totoguo, karung namana kompe tasisina misiana ka namana pesina tamiuoum. <sup>18</sup> Gine daan auia tun tar namanantiehe tar guata dedempela tar niguata uaianin, kara hik pah tar binaka puk ru uangoul keipo tamiuoum. <sup>19</sup> Ro bung tug! Inngo ke mahingio misianangua re uelmahing peinir kuaha gere poh, doha uelmahingon e la moko uatuka totoguo getung kotpokoso sira bakoum ngohina tang Kristo. <sup>20</sup> Inngo u marang uangoul tokaha keip tunumpe tamiuoum, bo u toboul puk hape ru guata pe maru menmene hamas tokaha keip tun tamiuoum.

### O ueluatata ka uelhire uatuha tolain tas Hagar me Sera

<sup>21</sup> Inngo u marang dangatangua baka tas mais gera marang uangoul i kukulebanga tar haua re moko teil tar ualatut ger nasir Ju. Inggoum halan tung longoro, kara hik pah kung naman manate hape re kula per ualatutunin? <sup>22</sup> “Ge a nibolo uahiuu peono pare, Abraham a tang torikir tun a toking bulout. A tang sioko ke pohoin Hagar na kuahang

<sup>m</sup> 4.10 Roum 14.5; Kol 2.16    <sup>n</sup> 4.22 Uak 16.15; 21.2

karabuson, kara tang giamehe ke pohoin Sara tena kuaha tunon. <sup>23</sup>°A tunon geke pohoin Hagar ger karabus ke kotpokoso tur tena nimalarar tamat. Bor tunon geke pohoin Sara ge na kuaha tunon ke kotpokos tur tena ualapagah God.

<sup>24</sup>O ueluatata roon o uelhire uaranga pare, A toking kuaha rasina rasine misiana tar torikir ualapagaha geke uelhoteis. Hagar te misiana tar ualapagaha geke uelhote toin tar siusan i Sainai, doho bung tunono geke pohois o karabus. <sup>25</sup>Doh daana pon, inggono misiana tar uan uleik i Jerusalem. Inggonor Jerusalem e moko sira pare, a kuah a karabus menia keip toso bung tun. <sup>26</sup>°Bo Sara teka ualasira uatuha tolain tar giameher Jerusalem gere mok i Heuen, inggono e moko sira pare, ka luaka liu turin tar karabus. Inggono te tinageig. <sup>27</sup>Ge no bolobolo God pe o kula pare.

“Inggar kuaha ger bouh! Kara hik pah ko poho mo bung tum!  
O kula ualeik, karo kiring keip tar niuah,  
ge ingga pe ahik pah ko hagouo uaelmahing tar poho me keketik.  
Ge a kuaha pe geke uangoulung pahen ra  
turing burehe liu ro bung tun tar kuaha gere uangoul keip tena  
bulout.” *Aisaia 54.1*

<sup>28</sup>°Doh inggoum ro uanotoug, inggoum kung kotpokos o bung tuna God tar ualapagah misiana tang Aisak. <sup>29</sup>°Doh inggeigene geke poho keipisieig tena nitampopokohor Iabene Dedeil, teka uaelmahingisieig ra malara pesit ra uakeluk tar ualatur, te misiana kompe siun tang Aisak geke pohoin tar nitampopokohonor Iabene Dedeil geke uaelmahingin Ismael ger tuna Hagar.

<sup>30</sup>Bo hape puk ro hire teil pe no bolobolo God? No bolobolo God o kula pare, “Uelueluata liu tang Hagara mer tun, ge a tuna peon ahik pah ura matotong uelpakaha tar mamang inetelik me Aisak gere matoto teilig ra tamas.” <sup>31</sup>Temaet ro uanotoug, inggeig ahik paho bung tuna Hagar ger kuaha karabus, bo inggeig o bung tuna Sara ge na kuaha tun Abraham.

### Uangoul keip puk tang Kristo

**5** <sup>1</sup>Kristo ke kale tapokis tagigeig ki uakeluk peme tenas ualatur Ju. Temaene inggoum mung tur uapopokoh, ahik pah mung tangana baka polukusioum pare, mung kotpokos o karabus, karung uakuakeluk tenas ualatur Ju. Ge inggeig pe ki uangoul uaia manas.

<sup>2</sup>Ualongor! Inngo Poul u kula pare, getung tanganoum ra pokoigir kapokomiu, e kula siranguar puhono pare, a haua ke guatain Kristo

° 4.23 Roum 9.7-9    ° 4.26 Hib 12.22; UGO 21.2,10    ° 4.28 Uak 15.4-5; Roum 9.7

° 4.29-30 Uak 21.9-10; Jon 8.35

tamiuoum ahik pahe banot e poul tamiuoum. <sup>3</sup>Inggou u kula poluk pare, mais uakapa tun ra tangana ra pokoigir kapokous, gisina paka uakeluk uakapa tunungua tenas ualatutur Ju. <sup>4</sup>Maisioumene rung uedanga tar kotpokos o kokodoh tar matana God tar uakeluk uakapa tunungua tenas ualatutur Ju, inggoum kung aha liu katongosioum tang Kristo, karung uangoul i be tar hamhamasar nang God. <sup>5</sup>Bo inggeigener tamatang tagorong man i uangoul keip tar ninamana pare, God e turung uauia tagigeigene ri kotpokos o kodkodoh. Tena nitampopokohor Iabene Dedeil, inggeig ki tagorong mana tang God, kari uanguangoul tatanon, inggon e turung kila tagigeig o kodkodoh. <sup>6</sup>Ge tar binaka pe ri uangoul tokaha keipeig tang Kristo a niguatang poko tar kapokon ue a tabung pok a toking puh rasin a tabo tengkan. Bor puhung uleik tun te pare, inggeig i tagorong mana tang Kristo, kari malauehirintiehe tun tasir gisiameher tamat.

<sup>7</sup>Sioun, inggoum kung uakeluk uauia tun tena lele Kristo misiana pah kung ualo uakokodoho tun tar ualualo. Bo mai puk ke tur tane tamiuoum maene ahik baka polukoum pah mung uakeluk toro uelhire gero man? Maiono ke reih liu tamiuoum? <sup>8</sup>A ninamanoneit ahik pahe la tur tang God, ge gine re uoto kila tamiuoum. <sup>9</sup>Namana huara kompe gete me siokor puh ahik paha kodkodoh te misiana kompe tar sikir is gere banotong uauout kai toro bereit. <sup>10</sup>Bo inggo u tagorong mana tar Tamata Nomana pare, inggoum ahik pah mung kale tar giniameher ninaman. U telengua maionene re uoto ualelio teremi ninamanoum, bo auia kompe a tamaton, God e turung uabang manate tatanon.

<sup>11</sup>Ro bung uanotoug mung namana hape ru uangoul peo? Ge paku hirhire tauete teil haraho tasir tamata ra pokoigir kapokous, gisina paka hik pah ra guata uasa totoguo. Bo getu hire taueto pare, Iesu Kristo ke mata tar korose, a puhene paka hik pahe turung uakotpokoso me niduh. Ae maene ra marang guata uasa harahasina totoguo? <sup>12</sup>Doho tamatasit ka uahagouo uasa tamiuoum tar poko tar kapokomiu, inggo u malara paka uangua kompe ge pakene ra poko katongoisisin, kara ualaha katongo ponompeis.

<sup>13</sup>Ro bung uanotoug gera tagorong mana tang Kristo, God ke kila tamiuoum tar uangoul sira pare, inggoum ahik pah kung uangoul i kukulebanga tar ualatut, doh ahik pah mung namana pare, mung uauaha teremi nimalauelhir ger sa. Ahik! Inggoum ahik pah mung namana paar. Doh tar uakeluk tun tar nimalauelhir inggoum mung uelpoulesioum. <sup>14</sup>Ge a ualatut uakapa pe e siokor moko teil uakapa tun tar puhung ualatohonene, "O malauehir toso uanotoum misiana ro malauehir

<sup>s</sup> 5.6 1Ko 7.19; Gal 6.15    <sup>t</sup> 5.9 1Ko 5.6    <sup>u</sup> 5.10 2Ko 11.15; Gal 1.7    <sup>v</sup> 5.13 1Pi 2.16

<sup>w</sup> 5.14 NKP 19.18; Roum 13.9

katongo peia.” <sup>15</sup>Bo mung tagin teil puk! Getung ueluelkoi katongosioum, karung uiluletung katongosioum, karung mamantouongua tenami niuangoul.

### Uangoul keip tena niguatar Iabene Dedeil

<sup>16</sup>Temaeit inggo u kula pare, uamaluana tar Iabene Dedeil e uoum keip tenami niuangouloum, kara hik pah mung turung uakeluk tar nimalarang tar niuangoul uasang gane i kot. <sup>17</sup>\*Ge a haua pe re malarainir niuangoul uasang gane i kot e tur tane tena nimalarar Iabene Dedeil. Doha haua re malarainir Iabene Dedeil e tur tane tena nimalarar niuangoul uasang gane i kot. Rasin a toking uelmatan, e baka siranguaono pare, inggoum ahik pah mung banotong guata tar haua rung marang guatain. <sup>18</sup>Doh getung uakuakelukoum tar Iabene Dedeil, inggoum ahikingua pah mung uangoul teil tena nikaueker ualatut.

### A niuangoul uasang gane i kot

<sup>19</sup><sup>y</sup>Inggoum kung iate manasa tar niguatang tar niuangoul uasang gane i kot, a hagarinina teenine: poulil, uraur, guata tar kinale. <sup>20</sup>Doha hagarang lotu tasir god bohoboh, bilih, mamangusul, kara uiliatung, uelkoi, geh, namana puk totoum, kara uatago tar toking pain, <sup>21</sup>kara uelsae, doha hagarang inum uapopouluan, kara mahang kula ueltebeir, doho ura ueltebeir tar doum, kara guata tar hagar uasa ueltebeir. Doh inggo u uatagin tamiuoum misiana ku uatagin uoum pe sioun, gisis ra uangoul sira pare, gisis ahik pah ra banotong kale uahua tena Nitoia God.

### A kukuananar niguat e la tur tar Iabene Dedeil

<sup>22</sup>Bor Iabene Dedeil e uoto uakotpokoso tar hagar pare, a nimalar, a niuah, a uelhiarou, a uanguangoul sikor, a hamhamas, a niguata uaia, a tang namana dede, <sup>23</sup>tang kale uahua katongoin, uakokodoho katongoia. Ahik me puhung ualatut re kula tane tar niguata uaianinanine.

<sup>24</sup><sup>z</sup>Doh mais gesir nang Kristo, ka tina to manasala tar korose tenas niuangoul uasang gane i kot, menia teres nimalarang gane i kot, doh ginina ke mata manas. <sup>25</sup>Ge pari uangoul keip manasaeig tar Iabene Dedeil geke heir taregi nituaeig, inggeig i uakeluk manasangua kompe tar Iabene Dedeil gere uoum keip tagigeig tar mamang hagarilik. <sup>26</sup><sup>a</sup>Inggeig ahik pahi uauairana katongosieig, kara hik pahi ueluelualahuasieig, kara hik pahi ueluelgehesieig.

---

\* 5.17 Roum 7.15-23    y 5.19-21 1Ko 6.9-10    z 5.24 Roum 6.6; Kol 3.5    a 5.26 Pil 2.3

### Inggeig i ueuere tar haua ki lebein

**6** <sup>1b</sup>Ro uanotoug! Getung iateoum pare, me tang siok e guata tar niguata uasa, inggoumeit re uoum keip teilisir Iabene Dedeil mung poulpoul hamas puk tar tamaton mare uakeluk tapokisono tar leler kodkodoh. Doh mung tagin gete uatalaua Satan tamiuoum, karung punga ponoum tar siokonor niguata uasa. <sup>2c</sup>Uelpoule teremi niduh, ter hagarone, inggoum mung uakeluk tunungua tena ualatoho Kristo. <sup>3</sup>Gete me tamat e namana katongoin pare, a tohangan, bo inggono puk ahik me hangan, inggon e bohoboho katongoin.

<sup>4</sup>A tang siok e uakodkodoho katongoin tena nipiles, song re uauaha katongoin, kara hik pahe kodoho tasir gisimehe ra guata pe. <sup>5d</sup>Ge inggeig pe i huata kahakaha teregigir niduh.

<sup>6e</sup>Mais geka ualasisrais tono uelhire God, gisina paka uelpakaha tar bulaua ueleheir me inete uaia tosnosio tang ualasisra tar poul tasinis.

<sup>7f</sup>Ahik pah mung bohoboho katongosioum, karung namanang uelsigala tang God. A haua re lebeigir tamata tere turung ueuere tapokis katongompegion. <sup>8</sup>Gete me tang siokor tamat e uakeluk to tar nimalarang tar niuangoul uasang gane i kot, a niguata uasanin e uakotpokoso tar niein uasa ger beng. Bo mais geka heir teres niuaha tar Iabene Dedeil, gisina ra turung ueuere tar nitua gere moko dede e la tur tar Iabene Dedeil. <sup>9</sup>Temaene inggoum ahik pah mung marapula tar guata tar niguata uaia. Geta hikioum pah mung uanua tar guata tar kalekinalenin, a binaka geka uamatotoin e turung kotpokos, karung turung ueueroum tar inete ger uia. <sup>10</sup>Temaene hingiar binaka re tuparain tagigeig, inggeig paki guata uaia tasir tamata uakap, teesina tunumpesine ro uanotougigeig gera tagorong mana tang Iesu Kristo.

### Na uadouhinar meneng ualatut Poul

<sup>11</sup>Bangampe re ululeik per nibolbolononine teku bolo keip tun manasa pe inggo tar pang limoug.

<sup>12</sup>Ualongor! O tamatasine ra peng tampopokoho puk tar poko tar kapokomiuoum, gisina ra pe kompe mara tohangan tar matasir gisimeher tamat. Teene gisina ra sokoro geta guata uasais geta uakelukung siokor kabele puk tena korose Kristo, kara hik paho nipok. <sup>13</sup>Bo gisis puk ponor nipok, ahik pah ra uakeluk tun pono tar ualatut, bo ra malara puk tamiuoum tar uatohangan tasisisina ka poko pesioum.

<sup>14</sup>Bo inggo ahik pahu banotong uatohangana katongoio ue u uatohangana me tang giameher tamata baka poluk, ahik teru

<sup>b</sup> 6.1 Mat 18.15   <sup>c</sup> 6.2 Roum 15.1   <sup>d</sup> 6.5 Roum 14.12   <sup>e</sup> 6.6 1Ko 9.11,14

<sup>f</sup> 6.7-8 Roum 8.13



uatohangana kompe tonu mata Iesu Kristo tar korose ge nagi Tamata Nomaneig. Tar puhonene, ke guatain Kristo tar korose, a niguatang tar koto ke mata manasane tereg ninamano, doh inggo misiana pah ku mata to manasa tar korose, doh ahik baka poluk pahu banotong uakeluk tar niguatang gane i kot. <sup>15</sup> Ahik uadeil me inete re uagiamehe sioko ge teka pokoinir tamata ue a tabung pok. Bor inete tun te pare, God ke guata tagigeig i kale tar timuhur niuangoul. <sup>16</sup> God e heir toro bal uaia tasisit uakapa ra uakeluk tar inetenanine, kare guata uaia tasisin. Gisina tesir tamata tunur nang God.

<sup>17</sup> <sup>h</sup> A uaduhina tun, inggo ahik pahu malara me tamata baka poluk tar heir me niduh totoguo, ge inggo pe e moko teilir potono Iesu Kristo tar tukunug.

<sup>18</sup> Ro bung uanotoug, na hamhamas nagi Tamata Nomaneig Iesu Kristo e moko teil tamiuoum. O Mana tun.

---

<sup>s</sup> 6.15 Gal 5.6; 2Ko 5.17    <sup>h</sup> 6.17 2Ko 4.10

# **Epeses**

## **O bolobolo ke boloin Poul tasir tamat i Epeses**

### **O bolobolo tasir Epeses**

A tenkanar ninamana toro bolobolo rone te pare, God e marang uamoko toto tar mamang inetelik tang Kristo ter ineteng Heuene uakapa tununin, doha ineteng tar koto mare te Iesu re turung tamatang kaukengua tar mamang inetelik (Epe 1.10). Doh God e marang uatentur tosno tamata katongo mara uangoul taokaha keip tang Kristo, kara uangoul keip toro hiarou.

O uakikilangana ro mahar i lolono toro bolobol, Poul ke mene tar bureher mene tena niueldolomo God tosno tamata uakapa tun Kristo tar uangoul toto tokah, kara kotpokos a siokon siounur toto tamata tena kalekinale Iesu, God ke kale tapokis tasir tamat, kare heir tar Iabena Dedeil ter uaporokor nanono tasisina pare, inggon e turung guata tar mamang inetelikir uia tasisina misiana ke ualapagaha pe (Epe 1.14). Toro mahar uatorikina ro bolobol Poul e hire tasir tamatang tagorong mana ra uangoul tokaha keip pe tang Kristo, temaeit gisina paka ueluaie tun, kara uakeluk tena niguata God.

Toro bolobolo rone, Poul e uelhire uaranga tar ualasira uakalahara tasir tamata pare, gisina ra uangoul tohaka keip tun tang Kristo, doh ka kotpokos a tang siok. Inggono ke kula pare, no tamata God misiana pah ter tukunun, doh Kristo tero lunon (Epe 4.1-16). Doh no tamata God misiana pono paha um doh Kristo tero uakikilangana ro turunar umon (Epe 2.19-22). Doh no tamata God misiana tar kuah, doh Kristo tena buloutur kuahon (Epe 5.22-32). Toro bolobolo roon, i bang huara uaia tununguaeig tar inete uaia re marang guataig God tosno tamat.

### Poul e heir tar niuaha tasir tamat

**1** <sup>1</sup>Inggo Poul, tena nimalara God ku kotpokoso na aposoul Iesu Kristo, inggo ku bolo toro bolobolo rone tosno tamata God i Epeses gera tagorong mana dede keip tun tar kolous, kara uangoul tokaha keip tang Iesu Kristo.

<sup>2</sup>Inggo u lotu tang God tamagigeig, doh Iesu Kristo nagi Tamata Nomaeig tar heir tamiuoum tar hamhamas, doh toro hiarou.

### A niuaha uleik e la tur tang Kristo

<sup>3</sup>Inggeig i uatakai tun tang God ge Tamana Iesu Kristo ge nagi Godeig, teeit o nang Kristo peeig, inggono ke guata uaiantiehengua tagigeig tar mamang inete uaialiking Heuen tar poul tar iabeigigeig. <sup>4</sup>Gitiempe halana haraha per koto ta touoin, God ke uamatoto keip tanik manasa tagigeig tang Kristo tar kotpokos o nanon, karo dedeil, ahik me puh ra tohotolain tagigeig tena nibangon. Teeit ter enonor nimalaelhir, <sup>5</sup>God ke namana uakikilanga keip tanik tang Iesu Kristo e turung ueluarur tagigeig o bung tuna tun. Teeit tar puh ke guatain Iesu Kristo tagigeig. God ke guata pare, teeit a puhon e uauaha tatanon, doh na nimalara katongon.

<sup>6</sup>Mari uatakaieig tena uiniatoro God tar hamhamas menia tar nipoul, geka heirheir pukig tagigeig, teeit tar haua ke guata keipiono tar Tun tagigeig gere moko tun na nimalaelhirion. <sup>7</sup>Doh teeit ri uangoul tokaha keip pe inggeig tang Kristo, inggono ke bulaua tapokis keipingua tagigeig toro deuatinginar Tun tar kusa luara teregi niguata usaeig. <sup>8</sup>Tar hagarionene inggono ke ualasira tagigeig tena hamhamas a uleikintiehe tun, teeit re naman manate tun peono tagigeig, kare ate uaia tun a huar uia tagigeig tar mamang binakalik.

<sup>9</sup>God ke hire manasa tagigeig tar tengkanar puh geke mokmoko uaou ke heir peha tang Kristo, a ninamanono ke namana tanikampeono sioununtiehe tun. <sup>10</sup><sup>8</sup>Doha tengkana te gine, maeit tar binaka tun, ka uamatotoin, inggon e turung uamoko toto tar mamang inetelik i kukulebang tena nikaeueke Kristo, a mamang ineteliking Heuen dohi kot, doh Kristo e turung uangoul ter tamata uleik tar mamang inetelikininanine.

<sup>11</sup><sup>h</sup>God e uoto uakeluk tena nimalar, doh na ninamana katong, kare guata tar mamang inetelik e kotpokos. Sioununtiehe tun, tena nimalaron, inggono ke uamatoto tagigeig tar uangoul uanono keip tang Kristo, kari kotpokoso no tamata tunuon. <sup>12</sup>A tengkana maene ke guata God pare, mare inggeimener Ju king tagorong mana teil uakikilanga tang Kristo mi guata tasir tamata mara uatakai tang God, teeit na uiniatoron a i rana uainintiehe tun.

<sup>a</sup> 1.1 Apo 18.19-21; 19.1 <sup>b</sup> 1.3 Epe 2.6 <sup>c</sup> 1.4 Jon 15.16 <sup>d</sup> 1.5 Jon 1.12 <sup>e</sup> 1.7 Epe 2.7; Kol 1.14 <sup>f</sup> 1.9 Roum 16.25 <sup>g</sup> 1.10 Kol 1.16,20 <sup>h</sup> 1.11 Roum 8.28-29

<sup>13</sup>Doh gine daan inggoum kung longoro manasa pon toro mana toro Uelhire Uaia tang God ke uelkarus pe tamiuoum. Doh tar binaka kung tagorong manaoum tang Kristo, inggono ke uamatoto sioko tamiuoum, o nan, kare heir tar Iabena Dedeil ter uaparoko geke ualapagahaiono sioun. <sup>14</sup><sup>i</sup>Inggeig ki kale manasa tar Iabena Dedeil tero buk geke buk tanein tagigeig, temaene inggeig i ate, i muduhia inggeig i turung kale pono me giniamerher mamang inetelikir uia ke ualapagahaig God tar heir tosno tamat. Inggeig i pepe uangoul tar inetenin tar binaka re bulaua tapokis God tagigeig. Gine ter giameher tengkana maene ri uatakaieig tena uiniatoron.

### Na lotu Poul tasir Epeses

<sup>15</sup>Ter tengkanonene, maene e uakekene tur tar binaka ku longoro uakekeno teremi nitagorong manoum popokoho pe tar Tamata Noman, Iesu Kristo, doh teremi nimalaelhiroum tasir tamata uakapar nang God, <sup>16</sup>inggo ahik pah ku peng uanua baka tar uaha tang God tamiuoum, ku uoto lotu dedempe tamiuoum, <sup>17</sup><sup>j</sup>karu uoto dangata tang God tamagigeig ger uleik na uiniator ge na God Iesu Kristo nagi Tamata Nomaneig Iesu Kristo, e heir tamiuoum tar Iabena Dedeil gere uanamang manate, kare uakalahara tamiuoum mai tun God marung ate uaia tunoum tatanon. <sup>18</sup>Inggo u lotu pon mare uakalahara God teremi ninamanoum marung banotong bang paroko inggoum tar ineter uia tun geke kila uelhiriono tamiuoum tar kale tar ineteninanine rung tagorong mana teiligioum. Te marung ate uaiaoum tar ineteninanine a i ranantiehe tun geri turung kale uahuasieigene no tamaton.

<sup>19</sup><sup>k</sup>Inggo u lotu pono marung uakekene manasoum tar naman manate tena nitampopokohono ger uleikintiehe uain tar mamang inetelik gere kalekinale i lolono tagigeigene ri tagorong man. Ter siokono komper nitampopokohonene, <sup>20</sup><sup>l</sup>ke uatentur tur tang Kristo toro mat, kare uatabila tatanono tar pang mua i Heuen.

<sup>21</sup><sup>m</sup>Doh inggon e uangoul tun i ranahia toro mamang nitampopokoholik tasir iabenesine ue tar nitampopokohon tasir liouana uakapa tun. A hanganon a i rana tar hangasir tamata uleiking daan, doh git ponompela i uoum. <sup>22</sup><sup>n</sup>God ke uamoko tar mamang inetelik i kukulebanga tar kekena Kristo, kare guata tatanon tero lunar mamang inetelik tar sios, kare uangoul sir o lunar sios. <sup>23</sup><sup>o</sup>Doha sios ter tukununon, inggon a uoun tang Kristo gere uangoul teil toro mamang inetelik, doh tar mamang buturulik.

<sup>i</sup> 1.14 2Ko 1.22 <sup>j</sup> 1.17 Kol 1.9 <sup>k</sup> 1.19 Kol 1.11 <sup>l</sup> 1.20 Ker 110.1; 2Ko 13.4; Kol 2.12

<sup>m</sup> 1.21 Kol 1.16; 2.10 <sup>n</sup> 1.22 Ker 8.6 <sup>o</sup> 1.23 Roum 12.5; Epe 4.10,15; Kol 1.18

### A nitua i lolono tang Iesu Kristo

**2** <sup>1</sup>Psioun inggoum, kung uoto uangoul sirame tasir tamatasitier mat, teeit kung mahang longoro pe tang God, karung guata tar niguata uasa. <sup>2</sup>Tar binakon, inggoum kung uakeluk tar mamang niguata uasalikir nanar kot, karung uakeluk tang Satan ger tamata uleiking tasir iabenesine gera uangoul i ran. Inggono ter iabene gere kalekinale i lolono tasir tamata gesir mahang longoro tang God. <sup>3</sup>O mana noman, inggeig pono ki siokor uangoul sira uakapa pare, ki uakeluk to pe tar nimalara uasan tar tukunun, doh na ninaman. Inggeig ki uangoul teilingua ponompe tena nimaliana God ter siokono sira puk tasir tamata uakap.

<sup>4-5</sup>Bo teene kompe tena nimalaelhir God tagigeig a uleik tun ger uoun tar niueldolom, ke uatua keip pe tagigeig tang Kristo gitiempe ki mata baka pe inggeig tar niguata uasa. Tena nimalaelhiron menia tar niueldolom inggeig ka uelkarususieig. <sup>6</sup>Doh God ke uatentur keip tapokis tagigeig tang Kristo, kara uatabila tagusieig tang Iesu Kristo tono tabtabil i Heuen. <sup>7</sup>Inggono ke guata pare, mare gitila i uoum, inggon e ualasira hape re uleik tun pe na nimalaelhir menia tar niueldolom ke guata uaia pe tagigeig tang Kristo.

<sup>8</sup>Ge tena nimalaelhir pe God menia tar niueldolom, inggoum ka uelkarus keipisium tar nitagorong man. Inggon ahik paha inete kung guata katongosium. Ahik, inggono ke heirheir pukin God tamiuoum, <sup>9</sup>ahik paha buluanar kalekinale kung tuhagium, temaene ahik me tamata re uasalain. <sup>10</sup>Ge tang Iesu Kristo pe, God ke guata tagigeig ki kotpokos o timuhur tamat, tar tuha tar kalekinale uaia geke kaleuatoro tanikagiono tagigeig tar guat.

### Kristo ke uakapa tar niguatang uelmatan, kara torikir pang tamata kura kotpokos a tang siok

<sup>11</sup>Temaait inggoum mu namana uanonoumeit, kung kotpokoso tur pe tasir gime uan gera kilais, “o tabung pok,” tera kila per Ju gera kila katongois pare, “o nipok.” Gisina ra kula pare, teeit o nipoko pe, bo a puh pukuonener pok ra uoto guata pukinir tamat, dohe uapalih puk tasir tamat i kalaharahia. <sup>12</sup>Mu namana uanon, inggoum kung uangoul uairehe tang Kristo, kara aha liu turusium tasir Israel, doh inggoum o gime uan tar uelhote geke guata keipin God tasir Israel, kara hik me inete uaia kung tagorong mana uatuhain, doh God tabo teilin tenami niuangouloumane tar kot. <sup>13</sup>Bo gine puk daana tang Iesu Kristo,

<sup>p</sup> 2.1-5 Kol 1.21; 2.13    <sup>q</sup> 2.2 Kol 3.7; Tai 3.3    <sup>r</sup> 2.3 Kol 3.6    <sup>s</sup> 2.4-5 Roum 6.11-13

<sup>t</sup> 2.6 Kol 2.12    <sup>u</sup> 2.9 1Ko 1.29-31; 2Ti 1.9    <sup>v</sup> 2.10 Tai 2.14    <sup>w</sup> 2.12 Roum 9.4; Kol 1.21

<sup>x</sup> 2.13 Kol 1.20

inggoumene kung uangoul uairehe baka sioun, ka ueliu uahuhut keip manasasioum toro deuatingina Kristo.

<sup>14</sup>yGe Kristo katongo pe te nogio hiaroueing, ke uakotpokoso pe toro uelhiarou i uantinanina tamiueimir Ju, doh tamiuoumur gime uan, ke kale toto pe tagigeig pare, i kotpokos a tang siok. Inggono ke dura uahua keip tar pantuing uelsae geke uatur pakaha tagigeig, <sup>15</sup>z tar tukunun, inggono ke uakapa keipingua tenas ualatur Ju geke aha liu tasir gime uan. A tengkana maene ke guatono pare, mare uakotpokoso tar torikir toto tamat ura kotpokos a tang siok tang Kristo, kare uakotpokosongua toro hiarou. <sup>16</sup>aDoh tar siokon siounur tukununonene, Kristo ke uauliodout tapokis tar toking toto tamata tang God ke mata pe tar korose, kare uamatengua tar niguatang uelsae geke moko sioun. <sup>17</sup>bKristo ke me uelhire tauete toro Uelhire Uaia ro nana ro hiarouo tamiuoumur gime uan gekung uairehe tatanon, doho hiarouo tamiueimir Ju gering uahuhut tang God. <sup>18</sup>Ge i lolono pe tatanon, inggeimir Ju, doh inggoumur tamatang gime uan i siokor banotong la tang God Tamagigeig tar siokon siounur Iabena Dedeil.

### Ingeig uakapar tamatang tagorong man teno uma tun God

<sup>19</sup>cTemaene inggoum ahik baka poluk paho tamatasitier pokos ue o tamatang gime uan. Ahik! Inggoum o matinar nang God menia keip tasir tamata uakapasitir nang God, doh mu uangoul o matmatame tena umon, <sup>20</sup>dkarung kotpokos a maharanar um ger nituha uapon a tagir tasir aposoul, doho propet, doh Iesu Kristo katkatongo tero uakikilangana ro tagir. <sup>21</sup>eTeono tere kusa uanono tokaha tar udeilinar um, kare uahua tatanon e kotpokos a uma dedeilir nanar Tamata Noman. <sup>22</sup>fDoh tang Kristo, inggoum pono ka tuha tokahalasioum marung la kotpokoso tar butur, re uangoulur Iabena God.

### Na kalekinale Poul tasir gime uan ahik paho Ju

**3** <sup>1</sup>gTemaeit inggo, Poul, u lotu tang God tamiuoum. Inggo u uangoul tar uih teeit tar kalekinale ke heirin Iesu Kristo totoguo tar guata tar uelhire tauete toro Uelhire Uaia tamiuoumur gime uan. <sup>2</sup>hInggoum kung longoro manasa ke heir pe God totoguo tar kalekinale uleikene tar uelhire tauete tena nimalaelhir God tamiuoum. <sup>3</sup>iTer puhonene ku uahire baka uoumo i lolono toro bolobolo rone, God katongompe ke uakalahar tar puhener ouiuou totoguo. <sup>4</sup>Gitie getung timanoum, inggoum mu turung bang paroko hape ru naman manate peo toro uelhire uaouo

y 2.14 1Ko 12.13 z 2.15 Kol 2.14 a 2.16 Sek 9.10; Kol 1.20,22 b 2.17 Ais 57.19

c 2.19 Epe 3.6 d 2.20 1Ko 3.11 e 2.21 1Ko 3.16 f 2.22 1Pi 2.5 g 3.1 Pil 1.7,13

h 3.2 Kol 1.25 i 3.3 Epe 1.9-10; Kol 1.26

ro nang Kristo. <sup>5</sup>Sioun a puhon a tabung uakalahara tasir tamatang tar uakikilanganar binak, bo gine puk daan, a Iabena Dedeil ke ualasira uakalahara to tosno tamata God geke uamatotois o aposoul, doho propet. <sup>6j</sup>Doh gine ter puhung uelhire geke ouiou, inggoumur gime uan mu turung kale pono tar mamang inetelik ke ualapagahaig God tamiueimir Ju tang Iesu Kristo, karung kotpokoso sira pare, a tang siok doha siokor tukununa keip tamiueimir Ju toro Uelhire Uaia. <sup>7k</sup>Tar nipoulur nang God ger hamhamas geke heirheir pukin totoguo doh na nitampopokoh uleik, God ke uamatoto totoguo na tamatang kalekinale tar la uelhire tauete toro Uelhire Uaia.

<sup>8l</sup>O mana noman, inggo ter uadouhinar tamata tosno tamata uakapa God, bo a kalekinale uleik pukuonene ka heirin totoguo tar uelhire tauete tasir tamatang gime uan tar mamang inete uaialikir nang Kristo. A inetenin a uleik uain, ahikieigir tamata pahi banotong naman manate. <sup>9</sup>Inggo ka uamatotoio tar uakalahara tasir tamata uakapa hape re kalekinale pe God tena ninaman. God geke touo tar mamang inetelik, kare totouaouome tar ninamanon toro kikilangan.

<sup>10</sup>Na ninamanono ter kalekinale ke tuhaiono tena sios, inggon e turung ualasira tasir mamang iaben, doho liouana tampopokohosis i rana pare, na ninamana God auia uain tar mamang hagarilik. <sup>11</sup>Sioununtieh tun tar binaka halana God te touo tar kot, inggono ke kaleuatoro manasame tar ninamanon, doh gine daan inggono ke guata to manasa tananin tena kalekinale Iesu Kristo nagi Tamata Nomaneig.

<sup>12m</sup>Teeit, tang Kristo, doh tar nitagorong mana tatanon, temaeit a takapukanguampe tagigeig tar la tang God menia keip tar niongol, kara hik pahi sokor. <sup>13</sup>Temaait ru dangatangua inggo tamiuoum, ahik tun pah mung namnamana uaburburehe tar niduh ru huatagio, ahik, inggoum pakung uah, karung tampopokoh, teeit a puhon e turung poul tamiuoum.

### Na lotu Poul tasir Epeses

<sup>14</sup>Temaene tar binaka ru namana inggo tar inete uleikionene ke guatain God, inggo u hatup, karu lotu tang tamoug, <sup>15</sup>geke touo tasir mamang matina uakapa tun i Heuene dohi kot. <sup>16</sup>Inggo u lotu tang God mare heiriono tena uiniatoro uleik ger uoun tar bureher inet, tar uatampopokoho keip tun i lolono tamiuoum tena Iabena Dedeil. <sup>17n</sup>Inggo u lotu tang God mare uangoul tun Kristo i lolono tamiuoum rung tagorong mana pe tatanon, doh marung tur uanonoum tena nimalaelhir God, <sup>18</sup>marung banotong naman manate menia keip tosno tamata uakapa God, hape re uleik pe na nimalaelhir Kristo, doh hape re barah pe, doh

<sup>j</sup> 3.6 Epe 2.13,16-19   <sup>k</sup> 3.7 Kol 1.25   <sup>l</sup> 3.8 1Ko 15.9-10   <sup>m</sup> 3.12 Jon 14.6; Roum 5.2  
<sup>n</sup> 3.17 Jon 14.23; Kol 1.23; 2.7

hape re i rana pe, doh hape re uailolono pe <sup>19</sup>na nimalauelhiron gere matoto leue tagigeig tar naman manate, doh inggo u lotu marung kale uahia tunoum tar mamang niguatalikir nang God.

<sup>20-21</sup>Doh tang God gere banotong guat, kare heir uaburehentiehe tun tar mamang inetelik ri dangatageig ue ri namanaig tena nitampopokohon gere kalekinale i uantinanina tagigeig, a uatakai e la tur tar sios e la tang God, doh tang Iesu Kristo tar mamang binakalik. O man.

### Inggeigir tamatang tagorong man ter tukununa Kristo

**4** <sup>1</sup>°Temaene, inggo Poul u uangoul tar karabus, teene ru uoto guata pe tena kalekinaler Tamata Noman. Inggo u kula uapopokoho tamiuoum tar uangoul keip tar niuangoulur kodkodoho tar nikilene kung kalein. <sup>2</sup>°Mu kale uahiuasioum tasir gisiameh, karung hamhamas tasisin. Inggoum ahik pah mu nimaliana ualahur tar binaka ra guata uasasina tamiuoum, bo mu uelmalauelhiresioum, karung huata bolongur tar niduh ra heirig tatamiu. <sup>3</sup>°Pentampopokoho tar kaueke uanono tar puhene ke kale toto per Iabena Dedeil tamiuoum toro hiarouo misiana paho uoho gero rokoso tokaha tamiuoum.

<sup>4</sup>Doh inggeig a siokon sioun pukur tukunun, kara siokor Iaben ter siokono sira kompe ka kila pesioum tar siokor uiniatoreit i uoum. <sup>5</sup>A tang sioko pukur Tamata Noman, kara siokor nitagorong man, kara siokor uahuu <sup>6</sup>°kara tang siokon siounur God Tamageig uakap gere i rana tagigeig uakap, dohe kalekinale i uantinanina tagigeig uakap, dohe uangoul i lolono tagigeig uakap. <sup>7</sup>°Bo tagigeig uakapa pukur tang siok tang siok, a inete uaia a niheir pakaha manasa ke uamatoto pe Kristo. <sup>8</sup>°Temaene re kular puh tono buk God gero dedeil pare,

“Tar binaka ke la kai taro inggon i ran,  
inggono ke uoum keip tasir karabus ka la tagu tatanon,  
kare heir tosno tamata tar inete uaia.”<sup>u</sup>

<sup>9</sup>°A puhene “Ke la kai,” e ualasira tagigeig pare, Kristo ahik pah ke la kai puk. Ahik! Uakikilangan inggono ke la uahiuahane i kot. <sup>10</sup>Ter tang siokon siounumpeonene ke la uahiuaha, doh teono kompeonene ke la kai, kare ir anahiangua tar mamang inetelik i ran mare ualasira tena nitampopokoho uleik tar mamang inetelik.

<sup>11</sup>°Inggono te geke heir tar inete uaia tasir tamat. Tasir gisiameh, inggono ke heir tar kalekinale tar kotpokoso pare, o aposoul, o propet,

° 4.1 Kol 1.10    ° 4.2 Kol 3.12-13    ° 4.3 Kol 3.14-15    ° 4.6 1Ko 12.6    ° 4.7 Roum 12.3,6  
° 4.8 Ker 68.18    ° 4.8 Bolobolong Ker 68.18    ° 4.9 Jon 3.13    ° 4.11 1Ko 12.28



o tamatang keip ualaturan toro Uelhire Uaia, o tamatang kauke tasir tamatang tagorong man, doho tang ualafir, <sup>12</sup> tar kalekinale tasir toto tamatang tagorong manar nang God tar tuha tar kalekinale tar uatampopokoho tasir toto tamatang tagorong man mare huakair tukununa Kristo, <sup>13</sup> e tuka geti la uatukeyig tar uiliodout tokah tar nitagorong man, doh teregi niate inggeig tar Tuna God, kari namanang mahoh i kotpokos o udeil sira tang Kristo tar ninaman, kara siokonor niguatar nanon.

<sup>14</sup> Temaeit inggeig ahik paho keketik baka poluk gere puahpuaha uelapokiseis toro butuan, dohe uu uelapokiseis tar mamang rom misiana tar niualafir ger nasir tamata sis ra marang uelour tagigeig tenas boh gera tutig. <sup>15</sup> Bo paki uelhire keip puk toro man, doha nimalaelhir mari kotpokoso sirangua tang Kristo tar mamang inetelik teono pe tero lunar sios. <sup>16</sup> Tena nikauekon, a tukununa uakap e ueltuman tokaha keip uaia tun. Gitie re kalekinale kahakaha per mahmaharan ter nanar kalekinale, ginin e poul tar giniamer maharan tar hua, maeit re tagalar udeilinear tukunun, kare uoun tar nimalaelhir.

#### A niuangoulur pensiou nara niuangoulur timuh

<sup>17</sup> Tar hanganar Tamata Noman, inggo u kula uapopokoho pare, ahik tun pah mu uangoul sira baka poluk tenas niuangoulur tamata gera tele tang God, kara tukar res ninaman, <sup>18</sup> doho mahang naman manate, kara hik pah ra ate me inet, teeit ra de pesin tar longoro tang God. Temaene nas niuangoulusin e uairehe tunungampe tang God. <sup>19</sup> Gisin ahik mes nihagouong matal, kara uahue katongois tar guata pukom pela tar haua re malaelhirigir nimalara uasan tar tukunun, kara guata tar mamang niguatang ura ueltebeir, kara hik pah ra banotong uakenua tar niguata uasanin.

<sup>20</sup> Bo ahik pukuono pah te pagiare ka ualafir pesiou tang Kristo. <sup>21</sup> O mana tun, teeit inggoum ka ualafir manasasioum tena niuangoulon, karung ate tar niualafir ger man e la tur tang Kristo. <sup>22</sup> Inggoum ka ualafirasioum tar kaleliu tenami niuangoulur pensiou geke mamantouoigir nimalara uasan tar tukunun geke uelour tamiuoum. <sup>23</sup> Inggoum ka ualafirasioum tar Iabena Dedeil tere uapalih tar iabeimiuoum marung uakekenoum tar namana me timuhur hagar, <sup>24</sup> karung hiku tar timuhur niuangoul ger nitou sira tang God tar niuangoulur man, kara kodkodoh, kara dedeil.

---

<sup>\*</sup> 4.13 Kol 1.28   <sup>†</sup> 4.15-16 Kol 1.18; 2.19   <sup>‡</sup> 4.17 Roum 1.21; 1Pi 1.14   <sup>§</sup> 4.22 Roum 8.13; Kol 3.9   <sup>||</sup> 4.23 Roum 12.2   <sup>¶</sup> 4.24 Uak 1.26; Kol 3.10

25 <sup>d</sup>Temaene inggoum uakapa mu luara tar boh, karung “ueluelmene keip pukusioum toro man,”<sup>e</sup>  
 ge inggeig pe i siokor uangoul teil tar siokon siounur tukunun.  
 26 <sup>f</sup>“Getung nimalianoum, kaueke uanonosioum getung guata tar niguata uasa,”<sup>g</sup>  
 ahik pah mu uamaluan tar pisar e hu keip teremi nimalianoum,  
 27 kara hik pah mu heir mena hagar Satan tar lekame.

28 A tamata ger ueuenau, e uakenua manasa tar uenau, bo e kalekinale keip manasa tar limana katongo tar tuha tar kalekinale mare heiriono tena inete tasisit ra malara me nipoul.

29 <sup>h</sup>Ahik pah mu mene keip tar meneniner matasa ue mu soul, bo mu mene kompe tar meneniner uia, karung meneng poul tasir tamat mare banotong poul nami menoum tasisit ra longor, kare uahua teres nitagorong manasin. 30 <sup>i</sup>Kara hik pah mu uaueldolomo tena Iabena Dedeil God, ge inggono pe teke uamatoto tamiuoum o nan, dohe me turung bulaua tapokis uakapa tun tamiuoum tar uadouhinar marein.

31 <sup>j</sup>Kale liu manasa tar niguatang mamangusul, kara nimalian, kara louar, kara uiliatung, kara mener boh tar marang mamantouo puk tar tang giameh, kara mamang niguata uasalikinitie re mamantou tar tamat. 32 <sup>k</sup>Bo mu uelguate uaia pukumpesioum, karung ueldolomesioum, karung uelkuse luara teremi niguata uasa misiana tang God ke kusa luara pe teremi niguata uasaoum tang Kristo.

### Uangoul tar luh

**5** <sup>1</sup>Gitie o bung tuna God peoum gere malauelhirintiehe tunis, mu uedanganga tar uangoul sira tatanon. <sup>2</sup><sup>m</sup>Karung uakeluk tar niguatang malauelhir misiana ke malauelhirintiehe tun pe Kristo tagigeig, kare heir katongoin tar poul tagigeig misiana tar uahungeitier muhuia re la uauaha tang God.

<sup>3</sup>Bo i uantinanina puk tamiuoum, paka hik tun me sikir niguatang ura ueltebeir ue me niguatanitier ualamatal ue mu pe mu gono tar bureher inet. Ahik pah mu uamaluana me puh sira pare, ra tohotolain tamiuoum, ge inggoum pe no tamata God gesir dedeil. <sup>4</sup>Inggoum ahik pah mu ueluatata tar ueluatataniner sa ue mu mene tenas mener popouluan ue mu uelualeng tar ualengeniner sa. A niguatanin ahik tun paha uia tagigeig tar guat. Ahik, bo pakung heir puk tar niuaha tang God ke poul

<sup>d</sup> 4.25 Sek 8.16; Kol 3.8-9    <sup>e</sup> 4.25 Bolobolo Sekaraia 8.16    <sup>f</sup> 4.26 Ker 4.4; Jas 1.19-20

<sup>g</sup> 4.26 Bolobolong Ker 4.4    <sup>h</sup> 4.29 Kol 4.6    <sup>i</sup> 4.30 Ais 63.10; Epe 1.13-14; 1Te 5.19

<sup>j</sup> 4.31 Kol 3.8    <sup>k</sup> 4.32 Mat 6.14; 18.22-35; Kol 3.12-13    <sup>l</sup> 5.1 Mat 5.48    <sup>m</sup> 5.2 KT 29.18; Hib 10.10

pe tamiuoum. <sup>5</sup>Ge inggoum pe mu ate, o tamatasitier uoto ur ue ahik paho delauan ue ra pe ra gono tar bureher inet, ahik pah ra banotong lekala tar kale uahia tar inete uaia tena Nitoia Kristo me God. <sup>6</sup>Ahik pah mu uamaluana mo tamata ra uelour keip tamiuoum tar namana pare, a niguata uasaninanine a iinetilik puk, ge na nimaliana uleik pe God e pono tasisit ra mahang longoro tatanon. <sup>7</sup>Temaene ahikioum pah mu matakaluana keip tasir hai tamata sira gera guata tar hagarinin.

<sup>8</sup>Ge sioun pe nami niuangouloum ke uoun tun tar kitup, bo daan, inggoum kung uoun manasa tar luh e la tur tar Tamata Noman, temaene nami nipilesoum pake ualasira tun. <sup>9</sup>Ge a luh peeit re moko teil tamiuoum e uakotpokoso puk tar hauar uia, doha hauar kodkodoh, kara ineter man.

<sup>10</sup>Uedanganga sira tar haua re uauaha tar Tamata Noman. <sup>11</sup>Ahik pah mu matakaluana keip tasir tamata gera uoto guata tar niguatang tar kitup. A niguatanin a tabo tengkan. Bo mu hire luaka puk tasir tamata pare, a sa per niguatanin. <sup>12</sup>Ge a ualamatala per mene tar niguata ra guata uaouoinir tamat gesir mahang longor. <sup>13</sup>Bo tar binaka puk re bala uakalaharar luh tananin, a luh e uakalahara tunungua hape re matasa pelanin. <sup>14</sup>Ge ia pe re balahiar luh e ualasira tauete tar mamang inetilik. Temaene re kular puh pare,

“Inggar tamata ro hohou, o gulet,  
o tentur tur tar keu  
mare heir Kristo totomua tar luh.”

<sup>15</sup>Temaene kaueke uaia tun hape rung uangoul pe, ahik pah mu uangoul sira tasir popouluan, bo mu uangoul sira tasir naman manate, <sup>16</sup>karung guata uaia dede tar mamang inetilik tar binakalanine, ahik pah mu ueluelour tar binaka geke uoun per mareninin tar niguata uasa. <sup>17</sup>Temaeit ahikioum pah mu guatang tuktukar, bo mu naman manate tena nimalarar Tamata Noman.

<sup>18</sup>Ahik pah mu sipak tar bino gere uapopouluana, kare uaroke puk tamiuoum. Bo mu uauoun pukusioum tar Iabena Dedeil. <sup>19</sup>Tar binaka rung uelueluatatoum, kale tar uelhire re moko teil toro Bukung Kereker ue tar kerekereng lotu ue tar kerekere geke heirigir Iabena Dedeil. Mu guata, karung kere keip tar kerekere tar koloumiu tar Tamata Noman. <sup>20</sup>Doh tar mamang binakalik inggoum mu uauaha uaia dede tang God tamagigeig tar mamang inetilik tar hangana nagi Tamata Nomaneig Iesu Kristo.

---

ⁱ 5.5 1Ko 6.9-10; Kol 3.5    ° 5.6 Roum 1.18; Kol 2.4,8    ₪ 5.8 Jon 12.36; Epe 2.13;  
Kol 1.13; 1Pi 2.9    ¶ 5.13 Jon 3.20-21    † 5.14 Ais 26.19; Roum 13.11    § 5.15-16 Kol 4.5  
‡ 5.18 Luk 21.34    ⁂ 5.19 Kol 3.16    ∨ 5.20 Kol 3.17

### O kuahar le mesnosio bulout

<sup>21</sup> <sup>w</sup>Mu ueltadesioum ge inggoum pe mu ueltada tang Kristo.  
<sup>22</sup> <sup>x</sup>Inggoumur kuahasisir le, mu ueltada tosnomio bulout misiana rung ueltada pe tar Tamata Noman. <sup>23</sup> <sup>y</sup>Ter hauon, a bulout ter tamatang kaueke tena kuah te misiana puk tang Kristo tero luna per toto tamatang tagorong man ger tukununon. Doh Kristo ter tamatang uelkarus tatanon. <sup>24</sup> <sup>z</sup>Temaeit inggoumur kuahar le, mu uangoul i kukulebanga tar nikaueke tosnomio bulout tar mamang inetelik te misiana kompe ra uangoul per toto tamatang tagorong man i kukulebanga tar nikaueke nang Kristo.

<sup>25</sup> <sup>a</sup>Doh tamiuoumur bulout le, mu malauelhirintiehe tun tosnomio kuah misiana tang Kristo re malauelhirintiehe tun pe toсно tamatang tagorong man, kare heir katongo tar tukununa tasir toto tamatang tagotong man <sup>26</sup> <sup>b</sup>kare uadedeil tatanon, ke uahuhu keip pe tar kodom, doh tono uelhire. <sup>27</sup> <sup>c</sup>Inggono ke guata pare, tar uaturula tar sios tatan mare kotpokosono pare, a mataia tun, ahik me tokotoko ue me mamakit ueltebeir, bo a delauana tun, kara hik me ineter sa tatan. <sup>28</sup> <sup>d</sup>Ter siokono sir kompe tar hagarionene, o bulout paka malauelhir tosnosio kuah misiana ra malauelhir katongo pe tar tukunus. A bulout gere malauelhir tena kuah, e malauelhir katongoin. <sup>29</sup> <sup>e</sup>Ge ahik pe me tamata re de tar tukunun, bo e malauelhir, kare guata uaia, kare kaueke tatanon misiana tang Kristo re guata uaia pe, kare kaueke tar sios ter tukununon, <sup>30</sup> <sup>f</sup>ge inggeig pe a maharanar tukununon.

<sup>31</sup> <sup>g</sup>Ter tengkanonene ro hire teilin no uelhire God pare, “Temaeit re hiliuir bulout tang tamana doh tinan, kare la uangoul tokaha keip tena kuah doh rasin ura la uangoul sira pare, a tang siok.” <sup>32</sup> <sup>h</sup>A puhung uelhire uaouoninanine a uleik tun, bo inggo u mene ualasira tola tang Kristo mesir tamatang tagorong man. <sup>33</sup> <sup>i</sup>Bor puhung uelhireon, e lain tamiuoumur bulout kahakah tar malauelhirintiehe tun tosnomio kuah ngohina rung malauelhir katongo pesioum. Doho kuaha uakap paka ueltada tosnosio bulout.

### A uelhire ke meneig poul tasir keketik doho tinanan

**6** <sup>1</sup> <sup>j</sup>Inggoumur keketik, mu longoro tenas uelhire ro tamamui doho tinamui geter puh peonor kodkodoho tena nimalauelhirir Tamata Noman. <sup>2</sup> <sup>k</sup>Ueltada tang tamoum, doh tinoum geter ualatur peono gere moko teilir ualapagah. <sup>3</sup> <sup>l</sup>A ualapagahon e kula pare, “Geto

<sup>w</sup> 5.21 1Pi 5.5    <sup>x</sup> 5.22 Kol 3.18; 1Pi 3.1    <sup>y</sup> 5.23 1Ko 11.3; Epe 1.22    <sup>z</sup> 5.25 Kol 3.19; 1Pi 3.7    <sup>a</sup> 5.26 Tai 3.5    <sup>b</sup> 5.27 2Ko 11.2; Kol 1.22    <sup>c</sup> 5.31 Uak 2.24; Mat 19.5

<sup>d</sup> 5.31 Bolobolong Uakeken 2.24    <sup>e</sup> 5.32 UGO 19.7    <sup>f</sup> 6.1 Kol 3.20    <sup>g</sup> 6.2-3 Ual 5.16

longora tar toking tinoum, nang niuangoula e uia, karo turung uangoul uabarahanguaane tar kot.”<sup>h</sup>

<sup>4</sup><sup>j</sup>Doh inggoumur tamasir keketik, ahik pah mu ualualahua toso bung tumiu, karung uanimaliana tasisin. Ahik, mu ualasis, karung ualatut uaia keip tasisina tar niguatar kodkodoho re malaragir Tamata Noman.

#### O tamatang kalkalekinale puk mesnosio tamatang kauek

<sup>5</sup><sup>j</sup>Doh tamiuoumur tamatang kalkalekinale puk, mu longoro tosnomio tamata uleik. Karung longoro keip tasisina tar niultad, kara nisokor, karung kalekinale keip tun toro man misiana rung longoro pe tang Kristo. <sup>6</sup>Ahik pah mu longoro puk tasisina tar binaka re mokor matas tamiuoum tar uauaha teres nimalarasin, bo mu longoro sira dede puk pare, o tamatang kalkalekinale puk pe tang Kristo, karung uakeluk tena nimalara God teeit rung malarantiehe tun pe tar guata tena nimalaron. <sup>7</sup>Kalekinale keip tar niuaha tar binaka rung tuha tar kalekinale misiana pah mu kalekinale tar Tamata Noman, ahik pah na kalekinaler tamatang gane i kot. <sup>8</sup><sup>k</sup>Namana uanon, a Tamata Noman e turung heir hahaua pono tasir tamata uakapa tar mamang inete haulikir uia ra guataig, hingiamper tamat, a tamatang kalkalekinale puk ue ahik paha tamatang kalkalekinale puk.

<sup>9</sup><sup>l</sup>Doh inggoumur tamata uleik, mu guata uaia tosnomio tamatang kalkalekinale puk tar siokonor hagar. Ahik pah mu uasokoro tasisin, ge inggoum pe mu ate pare, Inggonenah I heven tenas tamata uleikisin, doha namiuoum pon ginah i Heuen tere uoto bang kedanga tenas niguatar mamang tamat tar siokonor hagar.

#### Poul e hire hape ra tur tane pein Satan

<sup>10</sup>A uadouhin, inggo u marang uakapa keip tenag uelhire pare, mu tur uapopokoho tar Tamata Noman, doh tena nitampopokoho uleikion. <sup>11</sup><sup>m</sup>Mu kale tar mamang ineteng uiliatungulik geke heirig God marung banotong tur uapopokohoum, karung uasiaua tar mamang niguatang uelour ue a boho gere uoto guata uaouoig Satan. <sup>12</sup><sup>n</sup>Ge inggeig pe ahik pahi uiliatung keip tasir tamat. Ahik, Inggeig i uiliatung keip tasir iabenesiner tampopokoh, doh tena nitoia Satan, doha mamang nitampopokohon tar kotener kitup, dohi uiliatung keip tasir mamang iabene uasalikisit ra uangoul i ran.

<sup>13</sup>Temaene mu hikuoum tar mamang hikhikung uiliatung geke heirig God marung tanesioum gete kotpokosor binaka uasa, doh tar binaka

---

<sup>h</sup> 6.3 Bolobolong Kale Tapokis 20.12; Bolobolong Ualatut 5.16 <sup>i</sup> 6.4 Ker 78.4; NU 22.6; Kol 3.21 <sup>j</sup> 6.5 Kol 3.22-23; Tai 2.9-10; 1Pi 2.18 <sup>k</sup> 6.8 2Ko 5.10; Kol 3.24-25 <sup>l</sup> 6.9 Roum 2.11; Kol 4.1 <sup>m</sup> 6.11 Roum 13.12; 2Ko 10.4 <sup>n</sup> 6.12 1Pi 5.8-9

re kapar uelkoi, inggoum mu tur uanon dedempe. <sup>14</sup>°Temaeit, mu tur uanonoum, karung kaleuato keipisoum toro man misiana toro let ge kung rokos tane keipioum, karung loho tar niguatar kodkodoh, misiana pah nomio hikhiku kapaoum, o ragom tane tar uaruaroumioum. <sup>15</sup>°Mu kaleuato keipisoum toro hiarouo gero la tur toro Uelhire Uaia misiana paha su tar kekemioum. <sup>16</sup>Doh tar mamang binakalik, tur uanono keip tar nitagorong man, teono ter uatara rung banotong lomoho keipioum tar mamang karkinilik ger niuana keip toro hue gere uamatotoig Satan tamioum. <sup>17</sup>°Mu namanaehe ke uelkarus pe God tamioum, doha ninamanono pake moko sira pare, nomio taku kapaoum kung takuin. Doh mu kalkale teil tono uelhire God misiana toro baenat geke heirinir Iabena Dedeil. <sup>18</sup>°Karung lotu keip dede tar Iabena Dedeil tar mamang binakalik tar mamang lotu, doha nidangat. Doh tar binaka rung lotuoum uakeis dede ahik pah mu marapula kout. Karung heir dede menas lotu no tamata uakapa God.

<sup>19</sup>°Mu poul pono totoguo tar lotu mare hingiar binaka ru uakekeno tar men, God e heir totoguo tar uiar mene ru meneig, karu banotong ongolo tar uelhire tauete toro Uelhire Uaia. O Uelhire Uaia roon te geko ouo bak, bo gine puk daan ko moko uakalahara roon. <sup>20</sup>°Ge tero Uelhire Uaia pe roono ru tur keipio, temaene inggo u uangoul tar karabus. Temaeit mu heiroum menag lotuo maru uelhire tauete keipio tar niongol doh hape tun paku guata pe.

### Na uadouhinar mene Poul

<sup>21</sup>°Tikikus a uanoutougigeig tun, doh inggono na tamatang kalekinale uaia tunur Tamata Noman, inggon e turung uahire tamioum tar mamang inetelik marung ate ponoum hape ru uangoul peo, doha haua manasa ru guatain, <sup>22</sup>ter tengkanono maeit ru heirimeo tatanono tamioum marung ateoum hape ring uangoul pe inggeim, doh mare uatampopokohono tamioum.

<sup>23</sup>No hiarouo God, doh na nimalaelhir Iesu Kristo nagi Tamata Nomaneig menia keip tar nitagorong man e la tamioumur uanotoug.

<sup>24</sup>Na hamhamas God e moko tasir tamata uakapa gera malaelhir tenagi Tamata Nomaneig Iesu Kristo, a nimalaelhir ge ahik pahe banotong kap.

---

° **6.14** Ais 11.5; 59.17; 1Te 5.8    ° **6.15** Roum 10.15    ° **6.17** Hib 4.12    ° **6.18** Luk 18.1; Kol 4.2; 1Te 5.17    ° **6.19** Kol 4.3-4; 2Te 3.1    ° **6.20** 2Ko 5.20; Plm 9    ° **6.21** Apo 20.4; Kol 4.7-8; 2Ti 4.12

# Pilipai

## O bolobolo ke heirin Poul tasir tamata gera tagorong mana tang Kristo i Pilipai

### O bolobolo tasir Pilipai

Noso bolobolor Pilipai o moko teil i lolono toro Baeboul tar timuhur uelhote. Poul ke bolo toro bolobolo rone tasir tamatang tagorong man i Pilipai geke uatenturugion (Apo 16.11-40).

Poul e karabus tar binaka ke bolo toro bolobolo rone. Bo ke kalekinale keip uaia pukuono tena binak iuma tar karabus. Inggono ke uahire pono tasir soldia tang Iesu (Pil 1.13). Doh ke uaha teeit o tamata ra ueluatata tang Iesu.

Poul ke mene uapampopokoho tasir tamatang tagorong man i Pilipai tar kalekinale tokah (Pil 1.27). Gisina paka uelmalauelhireis (Pil 2.1-4). Temaeit gisina pake kale uahiuois. Poul ke uahire pono tasisina tonu hamhamas Iesu (Pil 2.5-11). Bo gine puk daan God ke heir tar ueltada uleik tang Iesu.

Poul ke uatagin tasir tamatang tagorong man tasir tamata gera tele tang Iesu (Pil 3.1-4; 3.17-1a). Inggono ke malara tasir tamatang tagorong mana tar tagorong mana dede tang God. Poul katongo ponompe ke marang ate uaia pono tang God (Pil 3.10-11).

Poul ahik pah ke pepe boho pare ke delauana tun uoum (Pil 3.12).

Bo ke ate teil puk pare, God e turung uapalih uakapa tun tagigeig (Pil 3).

Temaeit inggeig paki uah (Pil 4.4). Paki guata tar niguatar kodkodoh (Pil 4.8-9).

Doh paki tagorong mana tang God e heir tar inete haua ri malarasieig (Pil 4.10-19).

### I lolono toro bolobolo rone:

A meneng uakalahar 1.1-11

Na niuangoul Poul 1.12-26

Resira ninamana Timoti me Epaprodaitus 2.19-30

A uatagin tasir uelmatan, doh a puhur ualabir 3.1-4; 4.9

Poul meso bung kaluanang Pilipai 4.10-20  
A uadohinar uelhire 4.21-23

---

### Poul e heir tar niuaha tasir tamat

**1** <sup>1</sup>Inggo, Poul, me Timoti, na toking tamatang kalkalekinale puk Iesu Kristo, raeim kira bolo toro bolobolo rone o lala tamiuoumur tamata uakapar nang Iesu Kristo rung uangoul i Pilipai, menia pono tamiuoumur tamatang kaukauek, doho tamatang kalekinale tasir toto tamatang tagorong man.

<sup>2</sup>Inggo u dangata tang God tamagigeig mer Tamata Noman, Iesu Kristo ura heir tar hamhamas, karo hiarouo tamiuoum.

### Poul e uaha tasir Pilipai, kare lotu tang God mare poul tasisin

<sup>3</sup>Inggo u uoto heir tar niuaha tang God tar mamang binakalik ru namana huara pe tamiuoum. <sup>4</sup>Doh tar binaka ru lotu ueleheirio tamiuoum, inggo u uoto lotu keip dede tar niuah, <sup>5</sup>teene kung poul uaia tun peoum totoguo tar mene tauete toro Uelhire Uaia. Inggoum kung guata paar tar uakikilanganar marein kung tagorong mana pe tang Kristo e me tukene daan. <sup>6</sup>Doh inggo u tagorong mana tun tar puhene pare, God geke uakekene tar guata uaia tun i lolono tamiuoum, e turung guata dedempela e tuka geto la kapa tun roono tar uadouhinar marein re tapokis polukuha Iesu Kristo.

<sup>7</sup>A kodkodoho nomanampe ru namana peo tamiuoum, teeit ru malaelhirintiehe tun pe tamiuoum, ge inggeig pe i kale tokaha tar nipoulur nang God ger hamhamas, gitiempe ru uangoul peo tar uih ue tar binaka ru uelturut tar tur keip uakalahara toro man tasir uelmatana toro Uelhire Uaia. <sup>8</sup>Ge God pe e ate hape ru namanantiehe tun peo tar la banga tamiuoum, teeit inggo u malaelhir keip tamiuoum tena nimalaelhir Kristo. <sup>9</sup>Gine tenag lotuo tamiuoum mare kotpokoso uapopokohontieher niguatang tar uelmalahir tamiuoum tasir gisiamehe rung uangoul pe, doh marung naman manate uaiantiehoum tar huar uia doha huar sa.

<sup>10-11</sup><sup>c</sup>Ge inggo pe u malara mu naman manateoum tar huar uiantiehe marung uangoul uadedeilisioum, karo tabung tohotola e tuka tar binaka re la tapokisiha Iesu Kristo mare na niguata uaia Iesu Kristo gere turung uakotpokosoig e uoun tun tamiuoum mara bangasin, kara uairan, doh ra uatakai tang God.

### Na niguata uaia Poul re uangoul pe tar umang uih

<sup>12</sup>Ro bung uanotougene rung tagorong mana tang Kristo, inggo u malara mu ateoum pare, a puhene ke kotpokoso totoguo ahik pah ke

---

<sup>a</sup> 1.1 Apo 16.12-40   <sup>b</sup> 1.6 1Ko 1.8   <sup>c</sup> 1.10-11 1Te 5.23



tur tane toro Uelhire Uaia, bo ke poul tun toro Uelhire Uaia o ualo uapopokoh. <sup>13</sup> <sup>d</sup>Inggo u uangoul tar karabus, teene inggo na tamatang kalekinale puk Kristo, doho soldia gera kaueke tena uma Sisa, doho gisiamhe pon, ra ate teil tar puhonene. <sup>14</sup> Doh gine ka kale peio tar karabus ke uatenturunguar puhon tar balasir bureher tamatang tagorong mana tang Kristo, ka ongolongua tar hirhire uatampopokoho teil tono Uelhire God.

<sup>15</sup> O man, o gisiamhe puk tasisina ka mene tauete tono uelhire Kristo, teene gisina ka geh, kara marang uairana kai liu katongois totoguo, bo o gisiamhe puk tasisin teka lih uaiampe, kara mene tauete toro Uelhire Uaia. <sup>16</sup> Gisit ka lih uaia teka mene tauet, teeit gisina ra malauelhir totoguo gera ate pe tar Tamata Noman ke keipimeane totoguo tar me tur keip toro Uelhire Uaia.

<sup>17</sup> Bo o gisiamheer tamata puk ra marang uairana katongo kompeis, ahik mes ninamana uaia tar binaka ra mene tauete toro Uelhire Uaia, bo ra marang tumana puk tar niduhene ru uangoul keipio tar karabus. <sup>18-19</sup> <sup>e</sup>Bo a puh pukuonene ahik paha inete uleik. Ter inete uleik tun tono uelhire Kristo ra mene tauete pein tar mamang hagarilik. Hape ka guata pesin, a sa ue a kodkodoh, doh no Uelhire Uaia Kristo ra mene tauete dedempein. Doh ter puhonene re uauaha totoguo. Karu turung uaha dedempela ge inggo pe u ate teil pare, a lotu kung dangatagium, kara nipoul gere la tur tar Iabena Dedeil ger nang Iesu Kristo, e turung poul totoguo maru udeil.

<sup>20</sup> Temaene inggo u uahuahinga tun, karu tagorong mana teil pare, ahik pahu banotong matal, bo gine daan misiana sioun, inggo u turung ongolo tun ge paru mato ue u tua, a mamang inetelik ru guatagio e turung uatakai tar hangana Kristo. <sup>21</sup> <sup>f</sup>Ter eiguor ninaman e baka siranguaono pare, getu tuo inggo u uangoul tokaha keip tang Kristo. Doh getu mato, inggo u kale tar inete uaiantiehe tun. <sup>22</sup> Getu tuampelao, inggo u banotong poul mo bureher tamat. Bo hingianguar lele paku lihio? Inggo u telengua. <sup>23</sup> <sup>g</sup>Inggo a torikingua reg ninaman, u malahirintieh u la uangoul tagu tang Kristo. A puhono ter uiantieh. <sup>24</sup> Bo inggon e la uiantiehe tun tamiuoum getu tua bakala inggo maru banotong poul tamiuoum.

<sup>25</sup> Temaene, inggo u tagorong manantiehe tun pagiare, nag kalekinaleo e moko harah tar poul tamiuoum tar uapopokoho keip teremi nitagorong manoum, kara niuah. <sup>26</sup> Maeit getu me pokoso polukuo tamiuoum, inggoum mu turung uah, teeit Iesu Kristo ke ueliu tapokisime totoguoane tamiuoum, doh inggoum mu turung uatakaiantiehe tun tar hangana Iesu Kristo.

---

<sup>d</sup> 1.13 Apo 28.30   <sup>e</sup> 1.18-19 2Ko 1.11   <sup>f</sup> 1.21 Gal 2.20   <sup>g</sup> 1.23 2Ko 5.8

### Mu uangoul sir o tamata gera tagorong mana tang Kristo

<sup>27</sup><sup>h</sup>A inete uleik te pare, nami niuangouloum e kodkodoh dohe uakeluk tun tono Uelhire Uaia Kristo mare gete hape u me banotong bango tamiuoum ue u longoro ueluatata puk tamiuoum, inggo u turung ate pare, inggoum mu kusa uanono tar siokon siounur ninamana tar tur uapopokoh, karung siokor uatentur tar niualasirana ro Uelhire Uaia. <sup>28</sup>Ahik pah mu sokoro tosnomio uelmatan, mu uaongolo dedempesioum tar mamang binakalik, tar uabang paroko tasisin pare, God e turung mamantouo tasisin, kare uaudeil tamiuoum. <sup>29</sup><sup>i</sup>Ge God pe ke guata uaia tamiuoum pare, ke uamaluana pe tamiuoum tar tagorong mana tang Kristo, doh ke uamaluana pono tamiuoum tar kale tar niduh tar hanganon, teeit rung tagorong mana peoum tatanon. <sup>30</sup>Doha niduh rung uangoul keipigioum daan, a siokono tar niduh ku uangoul keipimegio sioun gekung banga baka uoumugioum, doh gine daan, inggoum mu longoro ueluatata totoguo ru uangoul sira haraha pe paar.

### I petut tena niuangoul Kristo

**2** <sup>1-2</sup>Gete ter niuangoul tokaha keip tang Kristo ke uatampopokoho tar balamiuoum, kare uamamahoul tamiuoum tena nimalaelhir, doh getung uangoul tokaha keipoum tar Iabena Dedeil, karung kale tena niueldolom Kristo, inggoum mu uatuktuka hihir tunungua tar niuaha totoguo pare, a siokono pe remi ninaman, kara siokono remi nimalaelhir, kara siokonor iaben, doha siokor ninaman.

<sup>3</sup><sup>J</sup>Ahik pah mu uairana katongosioum tasir gisiamer, kara hik pah mu guata me inet mare uleikir hangamiu. Bo inggoum pakung kale uahiua katongosioum, karung namana sira pare, o gisiamer tamata tesir uiantiehe tamiuoum. <sup>4</sup><sup>k</sup>Inggoumur tang siok tang siok ahik pah mu namanantiehe puk tar haua re uauia tatamiu, bo pakung namanantiehe puk tar haua re uauia tasir gisiamer tamat.

### Kristo ke kale uahiua katongoin, doh God ke kale kai tatanon

<sup>5</sup>Inggoum pakung kale me siokonor ninamana misiana tang Iesu Kristo.

<sup>6</sup>Inggon a siokono sira tang God, bo ahik pukuono pah ke namanang uoho uanono tar hagarung uangoul sira tang God.

<sup>7</sup><sup>m</sup>Bo inggono ke kale uahiua katongoin, kare uangoul sir pare, a matatang kalkalekinale puk, kare kotpokoso sira kompe pare, a tamat.

<sup>h</sup> 1.27 Epe 4.1; 1Te 2.12    <sup>i</sup> 1.29 Apo 16.19-40    <sup>j</sup> 2.3 Gal 5.26    <sup>k</sup> 2.4 1Ko 10.24

<sup>l</sup> 2.6 Jon 1.1-2; 17.5    <sup>m</sup> 2.7 Jon 1.14; 2Ko 8.9

<sup>8</sup> Doho tamata ka banga tatanono pare, a tamata tun. Doh inggono ke kale uahiua katongoin, ke uakeluk tun pe tena nimalara God e tuka ke mata pe, gitiempe ke mata peono tar korose.

<sup>9</sup> Ter tengkanonene maeit ke uairana God tatanono tar mamang inetelik, kare heir tar niueltada tar hanganon e i rana uain tar mamang giniamer hang.

<sup>10</sup> God ke guata pare, mara hatup uahiuar tamata uakapa tang Iesu, gisis ra uangoul i Heuen, kara uangoulane tar kot, dohi kukulebanga tar kot.

<sup>11</sup> Doho tamata uakapa tun ra turung hire tauete pare, "Iesu Kristo ter Tamata Noman." Doh tar hagarion, e heir tar uiniator tang God ge tamanon.

### Uangoul sira tar luh i uantinanina tasir tamat

<sup>12</sup> Temaeit ro kuhur uanoutoug, inggoum kung longoro uaia tun, karung uakeluk dede tun tang God tar binaka ku uangoul keipimeo tamiuoum. Doh gine daana tabo peio, inggoum pakung uakeluk uaia dedempe, karung ueltada keip tun tang God tar nisokor, karung kalekinale uapopokoho tun tar kale tar inete ke uamatotoig God tamiuoum, ke uelkarus pe tamiuoum.

<sup>13</sup> Ge God pe tere kalekinale dede tagumpe tamiuoumur tang siok tang siok, kare uatentur tena nimalara tamiuoum tar guata tar haua re malahirigion.

<sup>14</sup> Doh tar mamang inetelik gerung guatagioum, ahik pah mu mene ngurungur, karung ueluelpereresioum, <sup>15-16</sup> mara hikioum pah mu kouh me puh, karung dedeil uakapa tun, ahik me tamata re banotong tohotola tamiuoum me inet misiana paho bung tuna God gera uangoul uakodkodoho tunane tasir tamata uasa tun i kot. Inggoum mu turung uangoul sira pare, a luh e uamarmarein i uantinanina tar uan uasaener kitkitup i kot tar binaka rung mene tauete toro Uelhire gero tua. Getung guatoum pare, inggo u turung uaha tamiuoum tena marein Kristo, geter tengkana peono tere turung ualasira tasir tamata pare, nag kalekinaleo ahik pah ka ueluelourig.

<sup>17</sup> Remi nitagorong manoum tang Kristo, doh nami niguat e ngohina tar uahungetie rung heirin tang God. Gitiempe ge teka uatadingin ro deuatingiguo e la keipin tenami uahungoum gete kotpokoso sirono pare, doh inggo u mata ueleheir tamiuoum, inggo u turung uah, karu turung uaha keip tamiuoum. <sup>18</sup> Ter siokono kompe, inggoum pakung uaha pon, karung uaha keip totoguo.

### Timoti me Epaproditus

<sup>19</sup> Bo gete malarar Tamata Noman, inggo u tagorong mana teil u turung ualatuela tang Timoti tar la banga baka tamiuoum mare gete

<sup>n</sup> 2.8 Hib 5.8; 12.2    <sup>o</sup> 2.9 Apo 2.33; Epe 1.20-21; Hib 1.3-4    <sup>p</sup> 2.10 Roum 14.11

<sup>q</sup> 2.11 Roum 10.9    <sup>r</sup> 2.15-16 Dan 12.3; Pil 1.10; 1Te 2.19    <sup>s</sup> 2.18 Pil 3.1; 4.4

tapokisimeon e me banotong uauaha totoguo gete me hire hape rung uangoul peoum. <sup>20</sup>Ahik me tamata misiana tang Timoti, inggon e uoto siokono na nihagou, kara na ninamana keip totoguo, doh tar mamang binakalik inggon e uoto namana tar sir me lele tar poul tamiuoum.

<sup>21</sup>Inggo u hire tar puhonene, teeit o tamata uakapa ra uoto namana kompe teresi nimalar, doh ahik pah ra namana tena nimalara Kristo.

<sup>22</sup>Bo inggoum mu ate manasa tena niguata Timoti e ualasira pare, inggon a uauaman, kare poul totoguo tena kalekinale ro Uelhire Uaia, misiana tar keketiketie re uoto poul tang taman. <sup>23</sup>Temaene ru marang uangoul sikoro bako, u marang ate paroko bak, a haua tunur inet re turung kotpokoso totoguo, song ru turung ualatuela tatanono tamiuoum. <sup>24</sup>Doh inggo u tagorong mana teil tun tar Tamata Noman pare, ahik pahi reh, karu turung la katkatongomeo tar me banga tamiuoum.

### **Poul ke kul e ualatu tapokis tang Epaproditus tar la i Pilipai**

<sup>25</sup>Inggo ku namana tar ualatu tapokisime tang Epaproditus tamiuoum. Raeim namira siokor kalekinale, kaira guata sir a toking tamatang uiliatung, mira uelturut pe toro Uelhire Uaia. Doh inggon a tamatang keip uelhire pon gekung ualatuemeioum tar me poul totoguo.

<sup>26</sup>Inggono ke sirintiehe tunin, kare marang banga tamiuoum, doh inggono ke ate pare, inggoum kung longoro toro ueluatat tatanon, ke momouh pe, doh ter puhonene re duh teilin tatanon. <sup>27</sup>O mana noman, inggono ke momouh, doh ke uahuhutung mata uadeil puk! Bo God puk ke ueldolomo tapokis tatanon, doh ahik pah tatanono puk, bo totoguo ponompe.

<sup>28</sup>Temaait u malarantiehe tunuo tar heir tapokisime tatanono tamiuoum marung me bangoum tatanon, karung uah, doh mara hik pono inggo pahe duhantieheio. <sup>29</sup>Temaene inggoum pakung uahantiehe tun tar kale tapokis tang Epaproditus menia keip tar uleikir niuah misiana paha tahigigeig gere tagorong mana tar Tamata Noman. Inggoum pakung ueltadangua tar tamata sira pare, <sup>30</sup>teeit inggono ke uahuhutung mata tena kalekinale Kristo, kara hik pahe namanantiehe tun gete mat, bo ke poul puk totoguo tar kalekinalenine, ahikioum pah kung banotong guat.

### **A tamata gere tagorong mana tang Iesu Kristo, inggono ter tamata kodkodoh**

**3** <sup>1</sup>Ro bung uanotoug, tar uakapa tar puhung uelhirenine, inggo u marang kula sira pare, inggoum mu uaha tar Tamata Noman. Ahik paha sa totoguo tar bolo polukula tamiuoum tar haua ku hiregio sioun tamiuoum, ginin pake terung kapil uaia tunugioum. <sup>2</sup>Bo mu tagin puk

<sup>1</sup> 2.21 2Ti 4.10    <sup>2</sup> 2.25 Pil 4.18

tasisit ra guata tar hagar uasa misiana tasir lo roke. Gisina ra marang pokpokong mamantouo kompe tar tukunus tar uakeluk tenas niguatar Israel. <sup>3</sup>vBo inggeig tesir Israel tun gesir nang God geri lotu keip tar Iabena Dedeil. Kari uatakai tar hangana Iesu Kristo, kara hik pahi namana pare, ka uelkarususieig tar haua ki guata katongoin.

<sup>4</sup>wO mana tun, inggo a bureher tengkana ru banotong tur uapopokohoig tar haua ku guata katongoig. Gete kaein me tang giameher tamat e namana pare, a bureher tengkan re banotong tur uapopokohoig tar haua ke guata katongoin, inggo tenag burehentiehe tun! <sup>5</sup>xTeeit, inggo a peng Israel, a peng toso bunguna Benjamin. I muduhia tar uatualinar marein ka pohoio, kara pokoio. Inggo tar toking tinoug ter toking peng Hibru tun, maeit inggo ter peng Hibru tun pon. Inggo ku uakeluk uakodkodoho tun tar ualatut tenas niguatar Parisi. <sup>6</sup>yKaru tampopokoho tun tar guata tar haua ku namanain pare, na kalekinale God, teeit ku petpetutup peo pare, u mamantouo tasir tamatar nang Iesu Kristo, doh ku uakeluk uaia tun tenas puhung ualatutur Ju, doh gisin ahik pah ka banga me puh uasa hape ku uakeluk peo tar ualatut.

<sup>7</sup>zSioun tar ineteninanine inggo ku namana pare, ginina ter inete uleikintiehe tun totoguo, bo gine daana puk inggo ku banga sira tananin a tabo tengkan, maru kale tang Kristo. <sup>8-9</sup>aBo ahik pah tar inete pukuninanine, inggo u banga sira tar mamang inetelik uakapa tununinene daan a tabo tengkana tun, ahik pahe uelmatout to tar ate tang Iesu Kristo nag Tamata Nomano. Tar ate tang Kristo ter uleikintiehe uain tun, temaeit inggo ku hiliu uakapa manasa tar mamang inetelikininanine, karu banga sira tananina tar mongmong maru banotong ate tun tang Kristo, karu uangoul tokaha keip tun tatanon.

Inggo ahik pahu namana pare, inggo a tamat kodkodoh teeit ku guata katongo peio u uakeluk tar ualatut. Bo ku kotpokos a tamata kodkodoho teeit ku tagorong mana pe tang Kristo. Ge a tamata pe gere tagorong mana tang Kristo, inggono tere kulain God pare, a tamat a kodkodoh. <sup>10-11</sup>bInggo u malara kompe u ate tun tang Kristo, karu ate pono tar nitampopokoho geke uatua tapokis tatanono toro mat, karu marang uangoul tokaha keip tatanono tar uelmahing geke kalegion, karu marang kotpokoso sira tatanono ke mata pe mare turung kedanga God totoguo, kare uatentur tapokis tur totoguo toro mat.

### Poul e uoto ualo uapopokoho tar la kale tar ineter uia

<sup>12</sup>cInggo ahik pahu kulaio pare, ku pehuara manasa uoum ue ku kotpokoso uoum pare, a tamata kodkodoho tun. Bo inggo u uatolaua dedempela maru

v 3.3 Roum 2.29 w 3.4 Apo 22.3 x 3.5 Luk 1.59; Apo 23.6; 2Ko 11.22 y 3.6 Apo 8.3

z 3.7 Mat 13.44-46 a 3.8-9 Roum 3.21-22 b 3.10-11 Roum 6.3-5; 8.17

c 3.12 1Ti 6.12,19

kotpokoso sira hape re malara pe Iesu Kristo ke uelkarus pe totoguo pare, a nanono tun. <sup>13</sup>Ro bung uanotoug, inggo u ate pare, inggo halan tu pehuara tar kale tar niguatanin, bo u uamoko tun puk tar siokon siounur ninaman te tar malabobour liu tar mamang ineteliking sioun, karu namana uapopokoho puk tar haua re turung kotpokos i uoumuhia. <sup>14</sup><sup>d</sup>Temaeit inggo ku uatolaua kompela maru la uatuka tun maru kale me bulauoug tar nituang ganah i ran gere kilamein God totoguo, teeit ke mata ueleheir pe Iesu Kristo totoguo.

<sup>15</sup><sup>e</sup>Inggeig uakapa tunene geke mahmahoho regi nitagorong mana tang Kristo, pake siokono regi ninaman tar puhonene. Bo ge pare kaeis mo gisamehe tamiuoum ke giamehe sioko res ninaman, God e turung uakalahar tar puhonene tamiuoum. <sup>16</sup>Bo a niguata uaia pukuniner man, ki kale manasa uoumugieig teri uakeluk dedegeig.

<sup>17</sup><sup>f</sup>Ro bung uanotoug, inggoum pakung petut totoguo, karung banga to tasisit ra uakeluk to hape ring uangoul pe inggeim. <sup>18</sup>Temaene inggo ku hirhire uapoul manasa tamiuoum, doh gine daan inggo u kiring keip tar niueldolom, karu hire uapoul poluk tamiuoum pare, a niuangoul gera uoto guataigir gisameher tamat e uaelmatanangua tasisina tar tengkan ae maene ke mata Kristo tar korose. <sup>19</sup><sup>g</sup>Tar uadouhinar marein, gisina ra turung mamantouois, ge nas godo pesina ter nimalarang tar tukunun. Gisina ra kai kompe tar haua ge pake tera matala keipigisin, kara namana kompe tar ineteng tar kot. <sup>20</sup><sup>h</sup>Bo inggeig tesir tamatang Heuen, i uanguangoul tar tamat geke uelkarus tagigeig, inggon ter Tamata Noman Iesu Kristo, gere la turuha i Heuen. <sup>21</sup><sup>i</sup>Doh tena nitampopokohon, inggon e banotong uamoko tar mamang inetelik i kukulebanga tena nikauek, kare turung upalih tar tukunugigeig gininer mat ri uangoul keipig, kare kotpokoso ngohina tar tukununon ger uoun tar uiniator.

**4** <sup>1</sup><sup>j</sup>Temaeit inggoum ro bung uanotoug geru malaelhirintiehesio, inggo e sirio tamiuoum. Ge inggoum pe kung uauaha totoguo, doh inggoum tesir bulauana tenag kalekinaleo. Ir uanotoug, inggoum pakung guata dede paar, karung tur uapopokoho tar uangoul keip dedempe tar Tamata Noman.

#### A ualatut

<sup>2</sup>Inggo u mene uapopokoho tun tas nu luodia me Sintike mura ueluiais raoum ge raoum pe a toking tunar Tamata Noman. <sup>3</sup><sup>k</sup>Doh inggo u dangata pono totomua ger uanotougou tun tar kalekinaleene, ingga o poul tar toking kuaha rasina rasine, teeit kura kalekinale uaia tokaha tun pe rasina totoguo tar mene tauete toro Uelhire Uaia. Doh Klemen menia keip tosnogo tamatang kalekinaleo, gisina pono ka kalekinale

<sup>d</sup> 3.14 1Ko 9.24    <sup>e</sup> 3.15 1Ko 2.6    <sup>f</sup> 3.17 1Ko 4.16    <sup>g</sup> 3.19 Roum 16.18    <sup>h</sup> 3.20 Epe 2.6,19  
<sup>i</sup> 3.21 1Ko 15.28,42-53    <sup>j</sup> 4.1 1Te 2.19-20    <sup>k</sup> 4.3 Luk 10.20

tagu totoguo. A hangas uakapa tunur tamatasinasine e moko teil toro bolobolong tar nitua.

<sup>4</sup>Uaha dede tar Tamata Noman! U kula uapoul polukuo, mu uaha dede. <sup>5</sup><sup>1</sup>Inggoum mu hamhamas tasir tamata uakap mara bangasin tar niguata uaiar namiuoum. Ahik pah reh a Tamata Noman gine manasa i hutun.

<sup>6</sup><sup>m</sup>Ahik pah mu kanuh me inet, bo mu lotu puk, karung dangata tang God tar mamang inetelik gerung katupaig, karung uauaha dede tatanono tar binaka rung lotu. <sup>7</sup><sup>n</sup>Getung guatoum pare, God e turung heir tamiuoum tena niuelhiarou, ahikir tamatang gane i koto pah ra banotong naman manate tar puhon. Song re turung uoho uanonon na niuelhiarouon tar balamiuoum doh remi ninaman tar uangoul tokaha keip tang Iesu Kristo.

<sup>8</sup>Doh tar uakapana nagu uelhireo ro uanotoug te pare, tar mamang binakalik inggoum pakung namana tar inete ger man, kara uia, kara kodkodoho tar matana God, kara dedeil, kara mataia, kare tar mamang inetelik gera uoto ueltadaig, kara uatakaig ger uia uakapa tun. <sup>9</sup><sup>o</sup>Doh mu guata keip manasa tar niate kara haua kung longoro turig totoguo menia tar haua ku guatagio, doh God gere heir toro hiarou e turung uangoul tokaha keip tamiuoum.

#### Poul e uaha tar inete ka heirigir Pilipai

<sup>10</sup>Inggou song ku uahantiehe tun tamiuoum teeit song kung namana huara poluk pe inggoum tar kauke totoguo, maeit inggo u uahantiehe tun tar Tamata Nomanene daan. Inggou u ate inggoum kung uoto namana huarama totoguo, bo ahik puk me binaka re soloin tamiuoum tar heirime me nipoul. <sup>11</sup>Doh inggoum ahik pah mu namana ku meno tar puhonene, teeit inggo u katupa me inet. Ahik, ge inggo pe ke ate manasaio ru uangoul sira pe pare, gete nag burehemper inet ue a pag, u uaha manasampe ru uangoul pe. <sup>12</sup>Inggou ke ate manasaio getu uangoul sira pare, a katupa nag inet ue gete nag burehemper inet, inggo ke ate tokahaio tar toking puh rasin, maeit hingiamper niuangoul, karu uangoul uaia dedempe u mahur ue u gog. <sup>13</sup><sup>p</sup>Ge inggo pe u banotong guata keip tar mamang hagarilik tena nitampopokoho Kristo gere uoto heir totoguo tar nitampopokoh. <sup>14</sup>Bo inggoum kung guata uaiantiehe tun kung poul pe, karung huata tokaha totoguo tar niduh geku kaleig.

<sup>15</sup><sup>q</sup>Doh inggoumur tamatang Pilipai, mu ate uaia tun pare, tar binaka ku uakekeno tar mene tauete toro Uelhire Uaia, doh tar binaka ku hiliuio tar pang uan i Masedonia, ahik baka poluk me giameher lotu ke poul totoguo tar hagaring heir me mani ue me ineteng poul totoguo. Ahik,

<sup>1</sup> 4.5 Hib 10.25; Jas 5.8-9    <sup>m</sup> 4.6 Mat 6.25-34; Kol 4.2    <sup>n</sup> 4.7 Ais 26.3; Jon 14.27; Kol 3.15  
<sup>o</sup> 4.9 Roum 16.20    <sup>p</sup> 4.13 2Ko 12.10    <sup>q</sup> 4.15 2Ko 11.9

teoum puk manasampe kung guata pare. <sup>16</sup>Doh tar binaka ru uangoulo i Tesalonaika, inggoum kung poulpoul uapoul tun totoguo tar hauar inete ku katupain. <sup>17</sup>Inngo ahik pahu mene tar ineteninanine pare, u marang inet, bo inggo u marang banga tang God e uairana tar bulauamiouom, teeit tar niguatar namiuoum auiantiehe tun.

<sup>18</sup>Inngo ku kale manasampe tar mamang inetelik kung heirigioum totoguo, karu kale uaburehe tar haua ku katupaig, karu kale uamatoto baka kompeio tar inete gekung heirimegioum tang Epaproditus. A inete misianangua tar uahung ger muhuar amuhun, ginina tere malara tunig God, kare uah. <sup>19</sup>Doh nag Godo e turung heir tar mamang inetelik rung katupagioum, e la tur tena nitampopokohon, kare na uiniator geka heir turin tang Iesu Kristo. <sup>20</sup>A uatakai, kara uiniator e la tang God ge tamagigeig tar mamang binakalik. O mana tun.

#### **A uadouhinar mener nang Poul**

<sup>21</sup>Heir tenag niuaho tasir tamata uakapa tunur nang God gera tagorong mana tang Kristo. Gisine ro uanotouguo ka heir pono tenas niuah tamiouom. <sup>22</sup>No tamata uakapa tun God gera uangoulane, ka heir tenas niuaha tamiouom teesine tunumpesin ra uoto kalekinale tena uma Sisa.

<sup>23</sup>Na hamhamasar Tamata Noman, Iesu Kristo e uangoul tagu tar iabeimiouom.



# Kolosi

## O bolobol o la tasir tamat tar pang uan i Kolosi

### O bolobolo tasir Kolosi

O bolobolo Kolosi teno bolobolo Poul tasir tamatang tagorong man i Kolosi. Poul halan te la banga uiloh i Kolosi. Bo ke uoto heir dede puk tenas loutusin (Kol 1.3-14).

Poul ke uanamana tasir tamatang tagorong mana tar inete uleik tang Iesu. Iesu a God, doh ke touo tar mamang inetelik. Song ke kotpokos a tamata mare mata ueleheir tagigeig. Temaeit ke mata pe Iesu, God e turung uelkarus tagigeig. Geti kale ualekeig tang Iesu tenagi niuangoul, inggeig i turung matakaluana keipingua tang God (Kol 1.15-23).

Song ke uatagin Poul tasir tamatang tagorong mana tasir gisiamer tamat (Kol 2). O tamatasina ka malara tasir tamatang tagorong mana tar uakeluk tar ualatutun sioun ger nasir Hibru. Doho tamatasina ra kula pare, o tamatang tagorong mana tun paka uakeluk tar mamang ualatutulik. Poul ahik pah ke uauia tar puhon. Inggono ke bolo pare, a ualatutunin a nas pukur tamat e lain tenas niguat (Kol 2.8). O tamatang tagorong mana paka uakeluk tang Kristo, kara hik pah tar niguat. A niguat a uia nomanape, bo ahik puk pahe poul tagigeig tar uangoul tar niuangoulur uia (Kol 2.23).

Poul ke uanamana tasir tamatang tagorong mana hape paka uangoul pe. Gisina paka namana tar ineteng Heven (Kol 3.2), teeit gisin o nang Kristo (Kol 3.3-4). Gisina paka hik pah ra guata tar niguata uasa (Kol 3.5-11). Bo paka malauehir tasir gisiamer tamat (Kol 3.12-14). Doh gisina paka kalekinale tang God (Kol 3.15-17).

### I lolono toro bolobolo rone:

A meneng uakalahar 1.1-8

A mamang inetelik, doh na kelekinale Kristo 1.9–2.19

A niuangoulur timuh tang Kristo 3.20–4.6

A uadohinar menemen 4.7-18

---

**Poul e heir tar niuaha tasir tamat**

**1** <sup>1</sup>Inggo Poul ku bolo toro bolobolo rone, God ke uamatoto totoguo na aposoul Iesu Kristo. Raeim me Timoti ger uanoutougigeig mira heir tar niuaha tamiuoum uakapa tun.

<sup>2</sup>Inggo u heirila toro bolobolo rone tamiuoumur tamatang tagorong man gesir dedeil, karo nang God i Kolosi gerung tagorong mana dede tang Kristo.

Inggo u lotu tang God tamagigeig mare heir dede tar hamhamas tamiuoum, kare uakotpokoso toro hiarou.

**Poul e lotu, kare heir tar uatakai tang God**

<sup>3</sup>Inggeim mi uoto heir dede tenami lotuoum, karing heir tar uatakai tang God ge tamana Iesu Kristo nagi Tamata Nomaneig. <sup>4</sup>Teeit king longoro pe pare, mu tagorong manoum tang Iesu Kristo, doh teremi nimalaelhiroum tosno tamata uakapa tun God. <sup>5</sup><sup>b</sup>Inggoum kung guata sira pare, teeit inggoum kung bangala i uoum tar niuahang Heuen misiana kung guata uoum pe tar kikilangana kung longoro uakekene pe toro mana toro Uelhire Uaia. <sup>6</sup>Doh tero Uelhire Uaia kompe roono rone geko lame tamiuoum, ko haijala ueltebeir toro mamang buturulik uakapa tunane i kot. Toro mamang uanilik o tamata ka kotpokos o tamatang tagorong man, kara pilese tar niuangoul re uauaha tang God. Te misiana kompe ko guata pe roon i uantinanina tamiuoum, e uakekene tur tar binaka kung longoro uakekenoum toro uelhire, karung naman manate toro man tena hamhamasa God.

<sup>7</sup><sup>c</sup>Inggoum kung iate tur tar inetenin tang Epapras ger kuhur uanotoumieim tun tar kalekinale, ger tang kalekinale uaia tun tang Kristo tar tur keip tamiueim. <sup>8</sup>Doh inggono teke hire pono tamiueim teremi nimalaelhiroum geke heirinir labena Dedeil.

<sup>9</sup><sup>d</sup>Inggono ter tengkana maeit e uakekekene tur pe tar marein king longoro uakikilangeim tamiuoum, inggeim ahik pah king uakenua tar heir tenami lotuoum, doh tar dangata tang God tar poul tamiuoum marung iate tar hua re malaragion. Teeit God e turung heir terener niate, doh na ninaman. <sup>10</sup>Doh inggeim king lotu pon marung uakelukoum tena nimalaron, karung uauaha tatanono tar mamang hagarilik, doh mare uanaman manateono tamiuoum marung guata uaia dede tar mamang hagarir uia, kara hagarung poul tasir gisiamah, doh marung hua keip dedeoum tena niate uaia God.

<sup>11-12</sup><sup>e</sup>Raeim mira lotu pono mare uatampopokoho dede God tamiuoum, e uatampopokoho keip tamiuoum tena nitampopokoho uleik tun. Marung

<sup>a</sup> 1.3-4 Epe 1.15-16   <sup>b</sup> 1.5-6 Epe 1.13; 1Pi 1.4   <sup>c</sup> 1.7-8 Kol 4.12; Plm 23   <sup>d</sup> 1.9 Epe 1.16-17  
<sup>e</sup> 1.11-12 Epe 1.11,18-19; 3.16

tur uapopokohoum, karung uatut uaia tun tar mamang niduh, karung uanguangoul hamas, karung heiring uaha tar uatakai tang Tamagigeig geke uadelauana tamiuoum marung kale tar mamang inetelik geke uamatotogion a nas no tamata gera uangoul i Heuen.

### Iesu Kristo a tamata uleikintiehe tar mamang inetelik

<sup>13</sup>fDoh God teke uelkarus liu tur tagigeig tena nitoiar kitup, kare keip ualeka tagigeig tena nitoiar tun ger kuhur tunon. <sup>14</sup>gTar tunonene, Inggono ke bulaua tapokis keip tagigeig toro deuatinginon, tar kuse luara teregi niguata uasaeig.

<sup>15</sup>hAhik me tamata ke banga tang God, bo tar binaka puk ke me tamatar tunon, inggono ke ualasira tagigeig tang God, hape re baka pe, ge inggono pe te misiana kompe tatanono re baka pe. Inggono ter tuna God ger uoum, kare ter i rana uain tar mamang inetelik ke touoig God. <sup>16</sup>Ge God pe ke touo keip tatanono tar mamang inetelik, a ineteng Heuen dohi kot, a inete gera bang huarraig, kara inete ge ahik pah ra bang huarraig, o toia, o nitoia uakap, o inete tampopokoho uakap ue o tamata tampopokoho uakapa tun. Ge God pe ke uamatoto tatanono tar touo tar mamang inetelik doha mamang inetelik a nanon. <sup>17</sup>iInggono e uangoulung sioun i uoumuhia tun tar mamang inetelik, doh inggono ter tengkanar mamang inetelik, maeit re moko tena butur.

<sup>18</sup>jInggono pe ter uakikilanganar tamata ke tua tapokis tur toro mat, temaeit inggono tero lunar toto tamat gera tagorong mana tatanon mare hahaua liu i ranahia tar mamang inetelik. <sup>19</sup>kGe God katongo pe ke malauelhir tar tun e siokono sira tun tatanon. <sup>20</sup>lDoh God ke malauelhir e uakotpokoso keip toro hiarou toro deuatingina Kristo tar korose i uantinanina tatan, doh tar mamang inetelik, a ineteng tar kot doha ineteng Heuen.

<sup>21</sup>mSioun inggoum kung uangoul uairehe tun tang God, doh remi ninamanoum ke guata tamiuoum kung kotpokosongua no uelmatan God, teene inggoum kung uoto guata dede tar niguatar sa. <sup>22</sup>nBo daana puk, God ke uakotpokoso manasa toro hiarou i uantinanina tatan, doh tamiuoum ke guata pe tar tukununa Kristo ke mata tar korose. God ke guata pare, maeit getung la turoum i uoum tang God tar binakang kedang, inggon e turung banga tamiuoum pare, o delauan ahik me niguata uasa, kara hik me tamata re tohotola tamiuoum me inet. <sup>23</sup>Bo pakung kusa uanono kompe tar nitagorong man, rung tagorong mana teil pe toro Uelhire Uaia gekung longoroin. Ahik pah mu uamaluana uakeluk

f 1.13 Luk 22.53; Epe 2.2 g 1.14 Epe 1.7 h 1.15 Jon 1.18; 2Ko 4.4 i 1.17 Jon 1.1; 8.58 j 1.18 Apo 26.23; Epe 1.22-23; UGO 1.5 k 1.19 Kol 2.9 l 1.20 Epe 1.10 m 1.21 Roum 5.10; Epe 2.12 n 1.22 Roum 5.10; Epe 5.27

pukusiuom. Inngo Poul ku kotpokos na tamatang kalekinale ro Uelhire Uaia roon, doh ku uelhire tauete tasir tamata uakapa tunane tar kot.

### Poul ke poul tasir Kolosi

<sup>24</sup>Gine daan inggo u uaha tar huata ueleheir tar niduh tar poul tamiuoum. Doh inggo u marang poul tosno tamata Kristo ge a tukununa peono ter toto tamat. A uelmahing ku huataigio halan te kap. Doha uelmahing ru huatagio tar tukunug katong u marang uakuakapa hihir tun tena uelmahing Kristo ke kale uelmahing pe tar tukunun tosno tamat. <sup>25</sup>°God katongompe ke umatoto totoguo, karu kotpokos a tamatang kalekinale tosno tamaton. Doh inggo nag kalekinale tar uelhire tauete tun tar mamang uelhirelikir nang God. <sup>26</sup>°Inggono ke heiriha totoguo tar me ualasira ter enonor ninaman geke ouiouome sioun tun tar binaka halanar koto te kotpokos. Bo gine puk daana ke uakalahara toono tosno tamat gesir dedeil. <sup>27</sup>God e uaha tar hire tosno tamata pare, a inet a uleikir bulauana menia tena nitampopokoho Kristo e la pono tamiuoum. Doha inete geke ouiouome, Inggono te Iesu Kristo e uangoul teil tamiuoum. Doh mu turung uangoul tagungampe tatanon tena uiniator i Heuen.

<sup>28</sup>Temaeit ia ring laeim, mi uelhire tauete tatanono, karing ualasira keip tasir tamata uakapa tar mamang niate uaialik maring banotong uatur tasir tamata uakap a mahmahoho res nitagorong man tar matana Kristo. <sup>29</sup>°Temaeit ru pentampopokoho tunuo, u kalekinale uapopokoho keip tun tar nitampopokoho ke heirigiono totoguo.

**2** <sup>1</sup>Ge inggo pe u malara mu ateuom hape ku pentampopokoho tun peo tar poul tamiuoum doh tasisit i Laodisia, doh tasisit halana ta banga totoguo. <sup>2-3</sup>°A tengkana maeit ru guato pare, te mare uatampopokohor puhono tamiuoum uakapa tar nitagorong man, doh mare siokono tokaha remi nimalaelhiroum. Doh marung kale tunoum tar mamang inetelik re kotpokoso tar binaka rung naman manate tunoum tono uelhire God gero ouiou, inggono te Kristo gere moko uaouor mamang niate uaialik mer ninamana uaia.

<sup>4</sup>Inngo u hire tamiuoum tar puhonene mara hik me tamata re banotong uelour tamiuoum tar uakeluk tenas niualasirasina gera longoro siraig paha man. <sup>5</sup>°O mana noman, inggo taboio tamiuoum, bo toro mana tun inggo tar iabeig e uangoul tagu tamiuoum, teene ru namana dede pe tamiuoum, karu uahantieh, teeit ru me longoro pe hape rung uangoul uiliodout peoum, doh hape re popokoho pe remi nitagorong manoum tang Kristo.

° 1.25 Epe 3.2,7-8    ° 1.26 Roum 16.25-26; Epe 3.5,9    ° 1.29 Epe 3.7,20; Pil 4.13

° 2.2-3 1Ko 1.24,30    ° 2.4 Roum 16.18    ° 2.5 1Ko 5.3

**Mu uangoul sira no tamata God, kara hik pah mu  
uakeluk tar niualasir ger giniamuhe siok**

<sup>6</sup>Temaeit git kung kale manasa peoum tang Iesu Kristo tenami Tamata Nomanoum, mu uangoul keip dedengua tatanon, <sup>7</sup>mu tur uapopokoho keip tang Kristo, karung uangoul tokaha keip dede tatanon, doh remi nitagorong manoum e popokoho dede misiana ka ualasira pesioum, karung uatakai dede tang God.

<sup>8</sup>Mu tagin, ahik tun pah mu uamaluana me tamat e uelour tamiuoum tar uakeluk tenas niualasirasina ger tabo tengkan, kara hik pahe tengkana keip mo man. A niualasiranin a ninamana kompe a niheir uain tur tasir gisiamemer tamat, doh ra ualasira tasir tamata tar uakeluk tar ualatoh gere menmene tar ineteng tar kot, kara hik paha nang Kristo. <sup>9</sup>Ge a tukununa pe Kristo a siokono sira tun tang God. <sup>10</sup>Doh inggoum mu uangoul tokaha keip tang Iesu Kristo, temaeit inggoum ahik pah mu katupa me inete tar iabeimiu. Ge inggono pe ter i ranantiehe tasir mamang inetelikir tampopokoh, doho tamata uleik uakap.

<sup>11</sup><sup>x</sup>Tang Iesu Kristo, inggoum pono ka pokoigir kapokoumiu ka kaleliu peigir niguata uasang tar tukunun, bo ahik puk paho nipoko sira tagu ka poko per tamata tar limas tenas niguatar Ju. <sup>12</sup>Tar binaka ka uahuhioum, inggoum ka keu keipisoum tang Kristo, doh tar uahuhioum inggoum ka uatua keipinguasoum tatanono tar timuhur niuangoul, teeit rung tagorong mana teil pe tena nitampopokoho uleik God geke uatua tapokis tur tang Kristo toro mat.

<sup>13</sup><sup>z</sup>Sioum inggoum kung uangoul sira tasir tamata geke mata manasa teeit teremi niguata uasaoum, karung uangoul uakeluk tar nimalara uasang tar tukunun, bo God puk ke uatua keip tamiuoum tang Kristo. Inggono ke siokor kuse luara tun teregi niguata uasaieg. <sup>14</sup><sup>a</sup>Inggono ke dura liu tar haua ka bololain, doha haua ka tohotolain tagigeig, kare uakapa keip tongua tananin ke tina to pela tena korose Iesu. <sup>15</sup>Doh tar koroseon, Kristo ke kale liu tenas nitampopokohor iaben, doho inete gesir tampopokoh. Kare uatur uakalahara tasisin, kare uoum keip sira tasisina tasir karabus ke pehuara pe toro mat.

<sup>16</sup><sup>b</sup>Temaene ahikioum pah mu uamaluana me tamat e bang kedanga tar haua rung inumugioum ue rung enig ue tar marein uleik ue tar mareining lotu tar timuhur bialok ue tar Mareining Pepe Uah. <sup>17</sup><sup>c</sup>A inetenin misiana kompe paha abiabener inete re turung kotpokos i muduhia, bor tengkana tun te Kristo. <sup>18</sup>Ahik pah mu uamaluana mo

<sup>u</sup> 2.7 Epe 3.17   <sup>v</sup> 2.9 Jon 1.14,16   <sup>w</sup> 2.10 Epe 1.21-22   <sup>x</sup> 2.11 Roum 2.29

<sup>y</sup> 2.12 Roum 6.4   <sup>z</sup> 2.13 Epe 2.1,4-5   <sup>a</sup> 2.14 Epe 2.14-16; 1Pi 2.24   <sup>b</sup> 2.16 Roum 14.1-13

<sup>c</sup> 2.17 Hib 8.5

tamata ra uelour tamiuoum tar kale tar inete tang Kristo, ge gisina pe ra uaha ra boho pe pare, ke kale uahiuais, kara lotu tasir anggelou, kara kula pare, ka banga tar niborian, bo gisit puk re uairana katongois tar ineteniner tabo tengkan.

<sup>19</sup>dDoh gisin ahik pah ra kusa uanono tang Kristo ger tamatang uoum keip tagigeig. I kukulebanga tena nikaueke Kristo a tukununa uakapon e moko tokaha keip tar ueltumanan, kare hua sira re malaelhir pe God hape pake hua peon.

### Inggoum kung mata keip tang Kristo

<sup>20-21</sup>eGitie kung mata keip peoum tang Kristo, gere mene tar ualatoho gere menmene teil tar ineteng tar kot, aeono maene rung uangoul sira harahoum pare, o peng gane i kot? Ae maene rung uakeluk harahoum tar ualatut sira pare, ahik pah mu tuhtuha tar inetene ue ahik pah mu ein tar inetene ue ahik pah mu kale tar inetene? <sup>22</sup>fGe a mamang inetelik pe ninananine e la tur tar inete ger tabo tengkan geta uakuakelukig, gininaniner ualatut doha niualsir e la tur puk tasir tamat. <sup>23</sup>O mana noman a ualatutunin ra banga siraig pare, e turung uatampopokoho tagigeig tar uangoul uaia tun, kari lotu uapopokoh, kari kale uahiuasieig, kare uauelmahing tar tukunugigeig, temaene o gisiameher tamata ra namana tar ualatutunin e uakeluk tar ninaman, kara niate uaia, bo a ualatut pukunin ahik tun pahe banotong poul tagigeig tar kale uahiu tar nimalara uasang tar tukunun.

### A ualatut tar uangoul uadedeil

**3** <sup>1</sup>sGitie ke uatua keip pe God tamiuoum tang Kristo, karung uangoul teil tar timuhur niuangoul, temaeit inggoum mu uamoko manasa teremi nimalara tar ineteng Heuen tar butur re tabila Kristo tar pang mua tang God. <sup>2</sup>hKarung namana dede tun tar mamang ineteliking Heuen, ahik pah tar ineteng gane i kot. <sup>3</sup>Ge inggoum pe kung mata keip tang Kristo, kare touaouo keip God tar nituaene tamiuoum tang Kristo. <sup>4</sup>A nitua tunur namiuoum te Kristo, doh gete kotpokosohaon, inggoum mu turung siokor kotpokosongua pon, karung siokor kale tokaha tena uiniatoron.

### A niuangoulur pensioun, kara timuhur niuangoul

<sup>5</sup>iTemaet mu uakapa liu manasoum tar niguata uasang tar tukunumiou misiana tar niguatang ur ue a niguatang popotoro tar guata tar niguata uasa, kara nimalara uasa, kara niguatang siokor gono tar mamang

<sup>d</sup> 2.19 Epe 2.21; 4.16    <sup>e</sup> 2.20-21 Gal 4.3,9; 1Ti 4.3    <sup>f</sup> 2.22 Mat 15.9    <sup>g</sup> 3.1 Mak 12.36; 16.19; Epe 1.20    <sup>h</sup> 3.2 Mat 6.33    <sup>i</sup> 3.5-6 Roum 6.6,11; Epe 4.19; 5.3-6

inetelik, ge a puh peono te ngohina kompe tar tamata gere lotu tar god bohoboh. <sup>6</sup> Temaeit tar puhuninanine na nimaliana God e turung pono tasisit ra mahang longoro tatanon. <sup>7</sup> Sioun inggoum kung uangoul sira pono pare, karung uoto guata pono tar niguatanin.

<sup>8</sup> Bo gine puk daan inggoum mu uakuakapa liu hihir manasa tar niguatanine, a niguatang nimalian ue a niguatang uelmamangusul ue a niguatang bal uasa tar tang giameh, kara hik pah mu uelsigal ue mu soul. <sup>9</sup> Ahik pah mu ueluelbohesioum gekung uakapa liu manasa peoum tar niuangoulung sioun menia tar niguata uasa. <sup>10</sup> Karung uangoul tar timuhur niuangoul ger niuatimuh keip tena niate God marung iate uainoum tang Kristo geke touo tar niuangoul timuhene tamiuoum. <sup>11</sup> Temaeit ke uatimuh pe God tamiuoum, ahik baka poluk mo kahakahar tamat, o Ju ue o gime uan, o nipoko ue o tabung pok, o tamatang iate ue o tamat ahik mes niate, o karabus ue o tamat gera uangoul teresir nimalar. Bor tengkana tun te Kristo, doh inggon e uangoul teil i lolono tamiuoum uakap.

<sup>12</sup> Temaeit ke uamatoto manasa pe God tamiuoum, mu uangoul sira manasa pare, no tamatono gesir dedeil. Doh inggon e malauehrintiehe tun tamiuoum, temaene mu kaleoum tar niguatanine, a niguatang ueldoloum, a niguatang toror, a niguatang kale uahiu, kara niguatang hamhamas kara uanguangoul sikor. <sup>13</sup> Mu ueluelpepe hamasesioum. Doh gete me tamat e tohotola me inete tamiuoum, mu kuse luara tar niguata uasa ka guataig tatamiu misiana ke kuse luara per Tamata Nomana teremi niguata uasaoum. <sup>14</sup> Dohi ranahia tar mamang inetelik ter inete uleik tun ter uelmalauehir gere kale toto tokaha tamiuoum, kare uauiiodout tamiuoum.

<sup>15</sup> Karung uamaluana toro hiarouo gero la tur tang Kristo o uoum keip tar koloumiuoum, ge gitie pe rung uangoul teil peoum i lolono tar siokor tukunun, inggoum ra siokor kila totosioum tar uangoul toro hiarou, karung uauaha dede tatanon.

<sup>16</sup> Uamaluana tono uelhire Kristo o moko tun tamiuoum tar mamang binakalik maro uoum keip roono tar mamang inetelik rung guatagioum ue rung namanaig, gitie rung uelualasira pesioum tang Kristo, mu ueluatampopokohesioum tar uakeluk tang roon, karung guata uakodkodoho tun. Karung kere keip toro bukung kereker, doha kerekereng lotu, doha kerekere ger nanar Iabena Dedeil, karung heir tar uatakai tatanon. <sup>17</sup> Doh tar mamang inetelik rung guatagioum ue rung meneig, mu guata keip tar hangana Iesu ger Tamata Noman, karung heir tar uatakai tang God tamagigeig tang Iesu Kristo.

---

<sup>j</sup> 3.8 Epe 4.25-29; 5.4   <sup>k</sup> 3.9 Epe 4.22,25   <sup>l</sup> 3.10 Epe 4.24   <sup>m</sup> 3.11 Gal 3.28   <sup>n</sup> 3.12 1Pi 2.9   <sup>o</sup> 3.13 Epe 4.2,32  
<sup>p</sup> 3.14 Roum 13.8-10   <sup>q</sup> 3.15 1Ko 12.27; Epe 4.4; Pil 4.7   <sup>r</sup> 3.16 Epe 5.19  
<sup>s</sup> 3.17 1Ko 10.31; Epe 5.20

### A ualatut e lain tar binaka ra uakekeneinir timuhur niuangoul

<sup>18</sup> <sup>t</sup>Inggoumur kuaha le mu uangoul tar nikaueken tes nomio bulout geter puh peonor uia tasir tamatar nanar Tamata Noman.

<sup>19</sup> <sup>u</sup>Doh inggoumur bulout le mu malaelhir tosnomio kuah, karung uangoungoul keip sikoro tasisin, ahik pah mu ueluelnimalianesioum.

<sup>20</sup> <sup>v</sup>Inggoumur keketik mu longoro tenas uelhire ro bung tamamiu doho tinamiu ge a puh peon a kodkodoho tar matanar Tamata Noman.

<sup>21</sup> <sup>w</sup>Inggoumur tamasir keketik, ahik pah mu ualualahua ue mu louara tasir keketik gete tokouasaisisin, kara malioh, kara dengua mata guata tar puhur uia.

<sup>22</sup> <sup>x</sup>Inggoumur tamatang kalkalekinale puk mu uangoul tar nikaueken tes nomio tamata uleik, karung longoro tasisina tar mamang inetelik ra meneig tamiuoum, uedanga tar uauaha dede tasisina tar mamang binakalik, ahik pah tar binaka puk ra uakeisisina tamiuoum, karung longoro keip tar niueltada tasisin, kara nisokoro tar Tamata Noman.

<sup>23</sup> Kalekinale keip tar niuaha tar binaka rung tuha tar kalekinale misiana pah mu kalekinale tar Tamata Noman, ahik pah na kalekinaler tamat.

<sup>24</sup> Namana uanon, a Tamata Noman e turung heir hahaua pono tar haua ke kaleuatoroig toсно tamat, ge Kristo pe ter Tamata Nomana rung kalekinaleioum. <sup>25</sup> <sup>y</sup>Bo getung guataoum me ineter sa, inggoum ra turung pehahauasioum tar haua kung guata uasain. Ge God pe e banga kedanga tasir tamata uakapa tar siokonor hagar, ahik me tang sioko re bantong uasiau.

**4** <sup>1</sup> <sup>z</sup>Inggoumur tamata uleik mu kaueke tosnomio tamatang kalekinale, karung kaueke uaueimatout keip tasisina tar siokonor hagar, ge inggoum pe mu ate pare, nami tamata uleik ponenah i Heuen.

### A ualatut

<sup>2</sup> <sup>a</sup>Mu gulet karung lotu keip dede teremi nitagorong man, karung banga uaia dede gete pokoso me puh, karung heir dede tar uatakai tang God, <sup>3</sup> <sup>b</sup>karung heir pono menami lotueim mare uakalahara God tar lele tamiueim tar hire tauet, doh maring ueliu taueteem toro uelhire rone tang Kristo geko ouiouo bakame sioun te roono pe, temaene ku uangoulo tar uih. <sup>4</sup> Mu lotu maru uelhire uakalahara sira tuno hape ra uelhire tauete pein roon.

<sup>5</sup> <sup>c</sup>Mu uakeluk tar ninamana uaia tar binaka rung uangoul keip tasir tamatasitie ahik pah ra tagorong man, karung guata dede tar niguatar

<sup>t</sup> 3.18 Epe 5.22    <sup>u</sup> 3.19 Epe 5.25    <sup>v</sup> 3.20 Epe 6.1    <sup>w</sup> 3.21 Epe 6.4    <sup>x</sup> 3.22 Epe 6.5-8

<sup>y</sup> 3.25 Roum 2.11    <sup>z</sup> 4.1 Epe 6.9    <sup>a</sup> 4.2 Epe 6.18; Pil 4.6    <sup>b</sup> 4.3 Roum 15.30; Epe 6.19

<sup>c</sup> 4.5 Epe 5.15-16



kodkodoh tar mamang inetelik. <sup>6 d</sup>Tar binaka rung ueluatatoum, uelhire keip tar meneniner uia, karung meneng poul tasir tamat mare banotong poul nami menoum tasisit ra longor marung ate uaia tununguaoum hape rung hire tapokis pe tar tengkanar puhung dangata gera dangataisir tamata uakap.

### Na uadouhinar mene Poul

<sup>7 e</sup>Tikikus a uanotougigeig tun doh na tamatang kalekinale uaia tunur Tamata Noman, inggon e turung uahire tamiuoum tar mamang inetelik marung iateoum hape ru uangoul peo. <sup>8 f</sup>Temaeit ru heirimeo tatanono tamiuoum mare la uatampopokohono tamiuoum, kare uaate tamiuoum hape ring uangoul peeim. <sup>9 g</sup>Inggo u heir ponola tang Onesimus inggon a uanotougigeig tun, kara peng tenami uanoum, rasin ura turung hire tar hauar mamang inetelik ke kotpokosane.

<sup>10 h</sup>Aristarkus gere uangoul tagu totoguo tar uih ke heir pono tena niuah, Doh Mak ge na turaka Banabas e heir pono tena niuah. Gete la kotpokosolaon inggoum mu uaha uangoul, karung tororo tatanon misiana ku uahire manasa uoum pelao. <sup>11</sup>Josua gera kila ponoin tang Justus, ke heir ponola tena niuah tesir tang touonor Jusinasine gera tagorong man ka kalekinale keip totoguo tena Nitoia God. Doh nas nipoulusina ke uauaha uaia tun totoguo.

<sup>12 i</sup>Epapras ger peng tenami uanoum inggono na tamatang kalekinale pono Iesu Kristo, ke heir ponola tena niuaha tamiuoum. Inggon e uoto lotu tar dangata tang God tar uatampopokoho tamiuoum tar tur uapopokoho dede misiana tasir tamatang tagorong manasitie ka kale manasa uoum, kara iate uaia tun tar nimalarar mahmahoh ger nang God. <sup>13</sup>Inggo u hire tun tamiuoum toro man tena kalekinaleon auia tun tamiuoum, doh tasir tamatang Laodisia dohi Herapolis. <sup>14</sup>Luk a uanotoumiueim doh nami doktaeim me Demas ura heirila tenasira niuaha tamiuoum.

<sup>15</sup>Heir tenami niuaheim tasir tamatang tagorong man i Laodisia, doh tang Nimpa, doh tar toto tamatang tagorong man gera uoto uangoul toto tena umon. <sup>16</sup>Getung timana uakapoum toro bolobolo rone, karung uelpalihe keip toro bolobolo geku heirilaio tasir Laodisia marung timana kalehoum.

<sup>17 j</sup>Karung hire tang Akipus pare, “Kaeuke uaia, karo uakapa tar kalekinale ka heirin totomua pare, na tamatang kalekinaler Tamata Noman.”

<sup>18 k</sup>Inggo Poul ku bolo katongola tar heir tar uauaha tamiuoum. *Poul*  
Mu namana huara totoguo ru uangoul pe tar uih.  
Na hamhamasa God e uangoul tagu tamiuoum.

<sup>d</sup> 4.6 Epe 4.29; 1Pi 3.15    <sup>e</sup> 4.7 Epe 6.21    <sup>f</sup> 4.8 Epe 6.22    <sup>g</sup> 4.9 Plm 10-12

<sup>h</sup> 4.10 Apo 12.12; 13.13; 15.37-39; 2Ti 4.11    <sup>i</sup> 4.12-14 Kol 1.7; Plm 23-24    <sup>j</sup> 4.17 Plm 2

<sup>k</sup> 4.18 1Ko 16.21

# 1 Tesalonaika

## O bolobolo ke heirin Poul tasir tamata gera tagorong mana tang Kristo i Tesalonaika

### O uakikilangana ro bolobolo tasir Tesalonaika

Rone o bolobol i lolono toro Baeboul tar timuhur uelhote. Poul ke bolo tang roon o la tasir tamatang tagorong mani Tesalonika. Inggono ke heir tar uauia tang God teres nitagorong manasin, res uelmalahir, kare teres nitagorong man. Gisina ka tur kauiur liu tasir god bohoboh, kara kalekinale puk tang God.

Gisina ra uanguangoul tena nitapokisiha Iesu. Gisin e kusempeisir niduh, kara tagorong mana dedempe tang God. Poul ke kula tasisina tar uauaha keip tang God tenas niuangoul. Gisina paka uangoul uadedeil tunis, kara kalekinalentieh. Doh gisina paka uelmalahire tunis.

Inggono song ke longoro tenas nidangatasina tena nitapokisiha Iesu. Inggono ke hire pono tasisin ahik pah ra namanantiehe tasisis ka mat. Ge gisisna pe ahik pahe siauais gete tapokisiha Iesu. Gisina tera turung ueltupara uakikilanga poluk tang Iesu tasisine ra uangoul harah.

Na nitapokisiha Iesu e turung ualutar. Temaeit o tamatang tagorong man i Tesalonaika paka kale uatoro tanikais. Gisina paka kalkalekinale bukuk kompe.

### I lolono toro bolobolo rone:

A meneng uakalahar 1.1

A niuaha tar uatakai 1.2–3.13

A mene uakalahara tar nipileseng tar nitagorong man 4.1-12

A meneng ualatut tena nilaha Kristo 4.13–5.11

Uadohinar menemen 5.23-28

### Poul e heir tar niuaha tasir tamat i Tesalonaika

**1** <sup>1</sup><sup>a</sup>O bolobolo rone o la tur tas Poul mes nu Sailas doh Timoti. Roono ka bololain tas mais gera uangoul teil tar lotu i Tesalonaika gesir nang God ge Tamagigeig me Iesu Kristo ge nagi Tamata Nomaneig, rasin ura heir tar hamhamas, karo hiarouo tamiuoum.

### A niuah teres nitagorong manar tamat i Tesalonaika

<sup>2</sup>Inggeim mi uoto hire tang God pare, mi uaha tun tamiuoum uakapa tun, karing uoto namana tamiuoum tenami lotu.

<sup>3</sup><sup>b</sup>Doh inggeim mi uoto namana tapokis dedempe, karing lotu dede tamiuoum tang God ge Tamagigeig tenami kalekinale uaiaoum geke kotpokoso tur remi nitagorong manoum, kara niguata uaia tun geke kotpokoso tur remi nimalaelhiroum, kare popokoho tun remi ninamana tar uanguangoul gete tapokisiha nagi Tamata Nomaneig Iesu Kristo.

<sup>4</sup>Ro bung uanotoumieim, God e malaelhirintiehe tun tamiuoum. Doh inggeim mi ate uaia tun manasa pare, God ke uamatoto manasa tamiuoum o nan, <sup>5</sup><sup>c</sup>teeit inggeim king keipime toro Uelhire Uaia tamiuoum, ahik pah ko lame a menemene puk, bo ko la keipime tar nitampopokoh, kara labena Dedeil. Inggoum kung bang paroko tun tar uleikir nitagorong manar emiueim, karung banga katongo tun king uangoul keip pemeeim tamiuoum, teeit tar niuia tamiuoum. <sup>6</sup><sup>d</sup>Inggoum kung babasira tamiueim mer Tamata Noman, gitiempe kung kale peoum tar uleikir uelmahing, inggoum kung kale keip kompe toro uelhire tar niuah geke heirinir labena Dedeil.

<sup>7</sup>Temaait inggoum tera bangbanga tonguar tamata uakapa tun gera tagorong mana tang Kristo tar pang uan i Masedonia, kare tar pang Akaia. <sup>8</sup>No uelhirer Tamata Noman ko tauete tur tamiuoum, karo haiala ueltebeir, ahik pah tar pang Masedonia, kare tar pang Akaia puk, bo toro giniamhe pompe ro pang uan, doh remi nitagorong manoum tang God ka la ueliateig toro mamang buturulik, temaait inggeim ahik baka poluk me inete ring menein. <sup>9</sup>Gisina katongomper tamata ka ueluatata tar uleikir niuaha kung heir uoumuoum tamiueim tar binaka king uangoul tokaha keipieim tamiuoum, karung de tasir god bohoboh, kare uiuirisoum tar niguata ger sa ger pensioum, karung uakeluk tang God gere uangoul dede, kara uauaman, <sup>10</sup>karung uanguangoul pono tar tunon gere turung la tapokis turuha i Heuen. Inggono te geke mata bak, kare uatua tapokis God tatanon, inggono te Iesu gere turung uelkarus tur tagigeig tena nimaliana God gere turung lame.

<sup>a</sup> 1.1 Apo 17.1-9   <sup>b</sup> 1.3 1Ko 13.13; Kol 1.4-6   <sup>c</sup> 1.5 1Ko 2.4-5   <sup>d</sup> 1.6 Apo 17.5-9

Poul ke menmene ke kalekinale pe i Tesalonaika

**2** <sup>1</sup>Ro bung uanotoumieim, inggoum kung ate tar binaka king me bangeim tamioum pare, tar kalekinaler namiueim ahik pe pah ke saluh. <sup>2</sup><sup>e</sup>Doh inggoum kung ate tun hape king kale pe inggeim tar niduh, kara uelsigal tosieim i Pilipai, bo God puk ger nagigeig ke poul tun, kare uaongolo tun tamiueim tar uelhire tauete uapopokoho tun toro Uelhire Uaia gero nanono tamioum, gitiempe o burehe per uelmatan. <sup>3</sup>Temaait inggoum kung banga katongo manasa pare, tar uelhire king guatagieim ahik pah king uelhire uagis ue king guata uasa, kara hik pah king uelour tamioum.

<sup>4</sup><sup>f</sup>Bo inggeim puk, God katongompe ke bang paroko tar hauene ring guatasieim, kare heir toro Uelhire Uaia rone ring uelhire tauetesieim tamioum. Doh inggeim ahik pah king uauaha tasir tamat, bo king uauaha tang God gere uedanga teremi nimalareim. <sup>5</sup>Doh inggoum pono mu ate pare, inggeim ahik pah king me menmene uahihiana puk tamioum. <sup>6</sup>Kara hik pah king guata uaouo maring gehe tenami inetoum, ge God pe e banot e hire pare, inggeim ahik pah king guata paar. Doh inggeim ahik pah king kalekinale tar uairana katongo tar hangamiu ue tasir gisiamer tamat.

<sup>7</sup>Inggeim no aposoul Kristo tar binaka king uangoul keipieim tamioum. Inggeim paking uahinga tamioum tar guata me inet, bo king me uanguangoul siokoro keip tun puk tamioum misiana tar tinanana re kaueke pe toso bung tun. <sup>8</sup>Doh inggeim mi malaelhirintiehe tun tamioum, maeit king uaha tun tar hire tauete toro Uelhire Uaia tamioum. Inggeim ahik pah king heir puk tonu Uelhire Uaia God tamioum, bo king heir katongo pono tar tukunumi tar poul tamioum, teeit kung matakaluana uaia tun peoum tamiueim.

<sup>9</sup><sup>g</sup>Ro bung uanotoumieim mu namana huara kompe, ahik tun peeim momio inum king kalekinale peme i uantinanina tamioum, a marein, kara boung mara hik pah mi heir me niduh me tamata tar kaueke tamiueim ring heir tauete pe tonu Uelhire Uaia God tamioum. <sup>10</sup>Inggoum tekung tur keip tamiueim doh God, karung banga tar haua king guatagieim ger kodkodoh, kara uia tamioumener tamatang tagorong mana tang Kristo. <sup>11</sup><sup>h</sup>Ge inggoum pe mu ate king guata sira pe me inggeim tamioum ngohina tar tamanar tamata re guata keip pe toso bung tun. <sup>12</sup>King ualatut, karing uamamahoul, karing uoum keip uaia tamioum tar uangoul keip tar niuangoul gere malarain God, ge inggono pe e kilame tamioum i lolono tena nitoia, marung la tabila keipinguaoum tar balbalana na nitampopokohon i Heuen.

<sup>e</sup> 2.2 Apo 16.19-24; 17.1-9    <sup>f</sup> 2.4 Gal 1.10    <sup>g</sup> 2.9 Apo 20.34    <sup>h</sup> 2.11-12 Apo 20.31

<sup>13</sup><sup>i</sup>Doha giameher tengkana maetie ring heir dedempe inggeim tar niuaha tang God, teeit tar binaka king me keip pokoseim toro Uelhire Uaia gero nang God tamiuoum, inggoum ahik pah kung me kale sira pare, o la tur puk roono tasir tamat. Ahik! Inggoum kung me uaha uangoul, karung kale sira tang roono pah te Godompe ke heir katongo tono uelhire. Doh roono no uelhire God, o kalekinale keip uaia tun tamiuoumene rung tagorong mana tang Kristo.

<sup>14</sup><sup>j</sup>Ro bung uanotoumieim, inggoum kung siokonongua tosono toto tamata God i Judia, gera tagorong mana pono tang Iesu Kristo. Inggoum kung kale uelmahing katongo tosnomio tamatang tenami pang uan ter siokono kompe ka kale uelmahing pemer toto tamatasinar nang God tasir Ju, <sup>15</sup><sup>k</sup>geka uiliatung pous tar Tamata Noman Iesu Kristo doho propet, kara geil liu pono tamiueim. Doh gisin e huais tang God, kare tokouasais tasir tamata uakap. <sup>16</sup>Doh gisina ka uedanga tar tur tane tamiueim tar uelhire tasir gime uanisine mara hikisina pah ra uelkarusis. Tar niguatonene ra guatainis, gisina ra uamoko toto dedempe tenas niguata uasa, doh na nimaliana God ke kotpokoso manasa tasisin.

### Poul e marang la tapokis poluk i Tesalonaika

<sup>17</sup>Ro bung uanotoumieim, ahik paha puhung baraha tar binaka ka uelueluata pakaha liu turusieim tamiuoum, doh inggeim mi namana tapokis manasa tamiuoum. O mana noman! A tukunomieim ke hiliu nomana tamiuoum, bo inggeim puk ahik pah mi malabobour tamiuoum. Doh inggeim mi marang bangantieh tapokis tun poluk tamiuoum, king uedanga tar bureher lel. <sup>18</sup>Doh inggeim mi marang bangantiehe tun, temaeit mi petutupe tun tar haiala tamiuoum. Doh inggo, Poul ku petpetutup uapoul tar la, bo Satan puk e turtur tane tamiueim. <sup>19</sup><sup>l</sup>Ge a haua pe ri uangoungoulusieig, regi niuaha ue nagi keuar, ri turung tur keipig i uoum tar uiniator tar binaka re tapokisime nagi Tamata Noman. Inggono teoum! <sup>20</sup>Inggoum ter uiniator, kara niuahar namiueim.

### Poul ke ualatue tang Timoti tar uapopokoho teres nitagorong manar tamat i Tesalonaika

**3** <sup>1</sup><sup>m</sup>Tar binaka king mahang uangoungoul teileim, inggeim king namana pare, auia raeim teira pepeane i Atens, <sup>2</sup><sup>n</sup>kaira ualatue puk tang Timoti, mare la uamamahoul tamiuoum, kare uatampopokoho teremi nitagorong manoum. Inggon a uanotoumiraeim dohe uoho dede tena kalekinale God tar uelhire tauete toro Uelhire Uaia gero nang Kristo. <sup>3</sup><sup>o</sup>Maet ahik me tang sioko ra uakanuh keipin me niduh gere pokoso tatan. Ge inggoum pe mu ate

<sup>i</sup> 2.13 2Te 2.13 <sup>j</sup> 2.14 Apo 17.5 <sup>k</sup> 2.15 Apo 9.23,29; 13.45,50; 14.2,5,19

<sup>l</sup> 2.19 Pil 2.15-16; 4.1; 2Te 1.4 <sup>m</sup> 3.1 Apo 17.15 <sup>n</sup> 3.2 Apo 16.1-3 <sup>o</sup> 3.3 2Ti 3.12

uaia tun pare, God ke heir uamatoto tagigeig tar kale tar niduhunin. <sup>4</sup>Doh tar binaka king uangoul keipime inggeim tamiuoum, inggeim king hirhire uapoul tun tamiuoum pare, inggeig ra turung turung tar mudusieig, kare tokouasaisisina tagigeig. Doh inggoum kung banga katong manasa ke pokoso uakakalahara per hagariono tamiuoum.

<sup>5</sup>Doh ter tengkanonene ku mahang uanguangoul teil baka peo, maeit ku ualatue tang Timoti tar la ate paroko teremi nitagorong mana inggoum. Teeit inggo u sokoro teil tun gete uelour Satan tamiuoum, kare la puk nami kalekinaleem.

### Poul ke uaha ke me hire tapokis pe Timoti

<sup>6</sup><sup>p</sup>Bo Timoti puk, gine ke pokoso tapokis manasa tamiueim ke la tur pe tamiuoum. Inggono ke me pokoso keip toro ueluatat o uia tun tar nitagorong maneitir eimiuoum tang God, kare tar nimalaelhireitir eimiuoum toso bung uanotoumiu. Timoti ke me hire pare, inggoum mu uoto namana dede haraha tamiueim, doh mu marang bangantiehe tun pono tamiueim, te misiana kompe ring marang bangantiehe pono pe inggeim tamiuoum.

<sup>7</sup><sup>q</sup>Ro bung uanotoumieim, temaene king me longoro peeim pare, kung tagorong mana uapopokohoum, doh ter puhonene ke uauahantiehengua tamiueim tar tur uapopokoho tar mamang niduhulik king huataig. <sup>8</sup>Temaene ring uangoulung uahantiehe tun manaseim, getung tur uatampopokoho dedempeoum tar Tamata Noman.

<sup>9</sup>Inggeim ahik pah mi banotong uauelmatout keip tar niuaha ring heirin tang God tamiuoum tar binaka ring lotu, teeit a burehentieher niuaha tekung heirigium tamiueim. <sup>10</sup>Doh tar mamang binakalik inggeim mi namana dedempe tenami lotu tamiuoum, maring me banga poluk tamiuoum, karing me heir uanoto baka poluk tar haua re katupa harahain teremi nitagorong manoum.

<sup>11</sup><sup>r</sup>Doh inggeim mi lotu tang God Tamagigeig me Iesu nagi Tamata Nomaneig ura kaleuatoro tar lel maring lameeim tamiuoum. <sup>12</sup>Karing lotu pono tar Tamata Noman e uanoto baka poluk teremi nimalaelhiroum toso uanotoumiu, kare tasir tamata uakap te misiana sira puk, mi malaelhirintiehe tun pe inggeim tamiuoum. <sup>13</sup>A Tamata Noman e uatampopokoho teremi nitagorong manoum, maeit mu turung uia uakapa tunoum, karung dedeil tun tar matana God ge Tamagigeig tar binaka re la tapokisiha nagi Tamata Nomaneig Iesu Kristo menia toso tamata dedeil. O mana tun.

### A niuangoul gere uauaha tang God

**4** <sup>1</sup>Ro bung uanotoumieim, tar tumana sikoro baka poluk, inggeim king ualatut manasa tamiuoum tar niuangoul, kare hape rung la

<sup>p</sup> 3.6 Apo 18.5   <sup>q</sup> 3.7 2Te 1.4   <sup>r</sup> 3.11 2Te 2.16-17

uakeluk tun peoum tena nimalara God, doh inggoum kung uakeluk tun tar niguatanin. Doh gine daan inggeim mi dangat, karing ualatut uapopokoho tun tamiuoum tar hangana Iesu ger Tamata Noman tar guata sira dedempela tar hagarinin. <sup>2</sup>Ge inggoum pe kung namana dede tun tar haua geking ualatut keipigieim tamiuoum tar hangana Iesu ger Tamata Noman.

<sup>3</sup>God e malara pare, inggoum mu uadedeil tar tukunumi uakapa tun, karung tur uagele toro ur. <sup>4</sup>Inggoumur tan siok tan siok pakung iate hape rung kauke katongo pe tar tukunumi tar hagarir dedeil, kara hagarung ueltad, <sup>5</sup>kara hik pah mu babasira tasir tamata gera tele tang God gera ura ueltebeir.

<sup>6</sup>Doh ahik pono pah mu boho ue mu guata tar hagar uasaninanine toso bung uanotougigeig. Ge a Tamata Nomana pe e turung heir tar niduh a popokohontiehe tun tang mai re guata tar hagarininanine. Ge inggeim pe king hire manas, karing uatagin tamiuoum. <sup>7</sup>Ge God pe ahik pah ke uamatoto tagigeig tar me uakeluk tar niguataniner sa, bo e malar i uangoul uadedeil keip tuneig tar tukunugig. <sup>8</sup>Temaene a tamata gere de tar uakeluk tar ualatutuninanine, inggon ahik pahe de puk tar tamat, bo e de tang God gere heir tamiuoum tar labena Dedeil.

<sup>9</sup>Ahik baka poluk me uahingang bolo me uahire tamiuoum tar malauelhir toso uanotoumiu, ge inggoum pe ke ualasira katongois God tar uelmalahiresioum. <sup>10</sup>Doho mana tun inggoum mu malauelhir noman toso bung uanotoumiu gera uangoul tar pang Masedonia. Bo inggeim puk mi kula uapopokoho tun tamiuoum ro uonotoumieim tar uatampopokoho dedempela tar niguatanin.

<sup>11</sup>Gine pake terung guata peoum, mu uangangoul sikor, kara hik pah mu mene tenas kalekinaler gisiameh, karung kauke katongo kompe tenami kalekinale, karung guata katongo sira manasa tar kalekinale, king ualatut pemeeim tamiuoum. <sup>12</sup>Getung guata nomana inggoum tar niguatanin, song ra turung ueltadangua ponor tamata ge ahik pah ra tagorong mana tang God tamiuoum, kara hik pono inggoum pah mu haono to tasir gisiameher tamata tar poul tamiuoum.

#### **A Tamata Noman e turung la tapokisiha tar me kale uiliodout tokaha tagigeig**

<sup>13</sup>Ro bung uanotoumieim, inggeim mi marang uaate uaia tun tamiuoum tar huar inete re turung pokoso toso uanotougigeig geka mata uoum, maeit ahikioum pah mu ueldolomontiehe tun misiana tasir tamata ge ahik pah ra uangoul keip tar nitagorong mana tar nitua

---

<sup>s</sup> 4.3 1Te 5.23; 1Pi 1.16    <sup>t</sup> 4.4-5 1Ko 6.13    <sup>u</sup> 4.7 Hib 12.14; 1Pi 1.15-16    <sup>v</sup> 4.8 Luk 10.16; 2Ko 1.22    <sup>w</sup> 4.9 Jon 13.34    <sup>x</sup> 4.11 Epe 4.28

tapokis tasir tamat. <sup>14</sup>Inggeig i tagorong mana pare, Iesu ke mat, kare tua tapokis, temaeit inggeig i tagorong mana teil pare, God e turung keip tapokis tang Iesu tatan menia tasir tamata geka tagorong man, kara mat.

<sup>15</sup>Doh tena menmene katongo tunur Tamata Nomana te pare, inggeigene ri uangoulur tua tar binaka re la tapokisihar Tamata Noman, inggeig ahik pah teri la uoum liu tas mais geka mata uoum. <sup>16</sup>Ge a Tamata Nomana katongo pe e turung la keip turuha i Heuen tar kula ualeik, a uauanar anggelou uleik menia pono tar kalkalingina no tuil God, kare mais geka tagorong mana tang Kristo, doh ka mata uoum ra turung tua tapokis uakikilang, <sup>17</sup>I muduhia inggeigener tua dohi uangoul haraha tar kot ra siokor kale uiliodout tokahasieig i rana tar langit tar la ueltpar to tar Tamata Noman tar hagarin, maeit ri la siokor uangoul tokaha keip dedengua tar Tamata Noman. <sup>18</sup>Temaeit mu uelhire uatampopokoh dedepesium tar uelhireninanine.

#### Kaleuator gete lahar Tamata Noman

**5** <sup>1</sup>Ro bung uanotoug, inggeim ahik pah mi banotong uahuahire uapoul tamiuoum tar uahire tar hingiar binak ue hingiar marein re kotpokosor inetenin. <sup>2</sup>Ge inggoum pe mu iate uaia tun tena mareinir Tamata Noman gete kotpokosome, e ualutara tun misiana tar ueuenaua gere leka uanomo tar boung. <sup>3</sup><sup>b</sup>Tar binaka ra kular tamata pare, “Gine daan a binaka uaia tun inggeig i uangoul uaia manasa tar hiarouon.” Doh ahik me manasan, kare la manasamer uelmahing misiana re uoto hagouo per kuah gere marang poh. Doh ahik me tamata re matotong uasiaua tar uelmahingonene.

<sup>4</sup>Bo inggoum ro bung uanotoumieim, ahik pah mu uangoul tar kitkitupun, temaeit tar mareinonene ka uamatotoin ahik pahe matot e ualutara tamiuoum misiana tar ueuenaua gere leka uanom. <sup>5</sup><sup>c</sup>Ge inggoum uakapa tun pe o bung tunar luh doha marein. Inggeig ahik paho nanar boung doha kitup. <sup>6</sup>Temaeit inggeig ahik pah misiana tasir gisiameher tamata gera hohouo puk, bo inggeig i kauke katongosieig, kari uakeis uanono tun tar haua re lame. <sup>7</sup>Temaeit tas mais gera hohouo gisina ra hohouo tar boung, kare mais ra sipak, gisina ra sipak tar boung. <sup>8</sup><sup>d</sup>Bo gine o nanar marein peeig, inggeig i kapil katongosieig, kari hiku tar nitagorong man, kara nimalauelhir, ter uatarar nagigeig. A nitagorong manene ri uangoul keipisieg ngohina pah tero taku o uatara tar lugigeig.

<sup>9</sup>Ge God pe ahik pah ke uamototo tagigeig tar me kale uelmahing tar nimalianar enon, bo ke uamototo tagigeig, maeit re uelkarusur Tamata Nomana tagigeig Iesu Kristo. <sup>10</sup><sup>e</sup>Inggono ke mata ueleheir tagigeig,

<sup>y</sup> 4.14 Roum 14.9; 1Ko 15.3-4,12    <sup>z</sup> 4.15-16 1Ko 15.51-52    <sup>a</sup> 5.2 Mat 24.42-43; 2Pi 3.10; UGO 3.3    <sup>b</sup> 5.3 Mat 24.39; Luk 21.34-35    <sup>c</sup> 5.5 Roum 13.12    <sup>d</sup> 5.8 Ais 59.17; Epe 6.14,17  
<sup>e</sup> 5.10 Roum 14.8-9; 1Te 4.14



gitiempe geto tuaeig ue ki mata manas, inggeig i la turung uangoul tokaha keip tatanon tar binaka re lame. <sup>11</sup> Temaeit mu ueluaongolesioum, karung uelpoulesioum, misiana rung uoto guata peene daan.

### Na uadouhinar meneng ualatut Poul

<sup>12</sup> Gine daan ro bung uanotoumieim, inggeim mi dangata tamiuoum tar ueltada tasisit ra kalekinalentiehe tun i uantinanina tamiuoum, ge gisina pe ra uoum keip, kara kauek, kara ualatut tamiuoum tar niguatar nang Kristo. <sup>13</sup> Ualasira tun tasisina tar uleik tunur ueltad, karung malauelhir tasisin, teeit tar kalekinaleene ra guataisisin. Karung uanguangoul sikor.

<sup>14</sup> Ro bung uanotoumieim, inggeim mi dangata uapopokoho tun tamiuoum tar uatagin tasisit ra marapul, karung uaongolo tas mais ra sokor, karung poul tas mais gesir malmaluan. Doh mu uanguangoul sikoro keip tasir tamata uakap.

<sup>15</sup> Baga uanono tun pare, ahik me tang sioko tamiuoum re la lul tar niguataniner sa tar pehahaua tar puh geka guatain, bo mu ueluauia dedeisioum, karung uatolaua tar guata uaia dede tasir gisiameher tamata pon.

<sup>16</sup> Uangoul keip kompe tar niuaha tar mamang binakalik. <sup>17</sup> Karung lotu dede tar mamang binakalik. <sup>18</sup> Tar mamang inetelik, heir dedempe tar niuaha tang God ter puh peonene re uahuahingain God tamiuoumener nang Iesu Kristo tar guat.

<sup>19</sup> Kara hik pah mu lomoho tar Iabena Dedeil. <sup>20</sup> Kara hik pah mu ueluelde tar uelhire re la tur tar Iabena Dedeil. <sup>21</sup> Doh inggoum mu uatolaua baka tar mamang inetelik ka kulaig, karung kale uanono tar huar uia. <sup>22</sup> Tur gele liu tar kahakahar mamang niguatalikininer sa.

### Na uadouhinar uelhire Poul

<sup>23</sup> Inggo u dangata tang God ger tang uahiarou, e uadedeil tamiuoum tar mamang hagarilik, kare kaueke tar iabeimiuoum, doh remi ninaman, kara tukunumi e delauana uatuka gete la tapokisime nagi Tamata Nomaneig Iesu Kristo. <sup>24</sup> God teke kila tamiuoum, inggon a uauaman tere turung guatampe tar ineteninanine.

<sup>25</sup> Ro bung uanotoumieim, mu lotu pono tang God tamiueim.

<sup>26</sup> Tar binaka rung ueltuparoum toso uonotoumiu gera tagorong mana tang Kristo, mu ueluahesioum.

<sup>27</sup> Inggo u kula uapopokoho keip tamiuoum tar hanganar Tamata Noman pare, mu timana ueleheir toro bolobol rone toso bung uanotoumiu uakap gera tagorong mana tang Kristo.

<sup>28</sup> Doh na hamhamasa nagi Tamata Nomaneig Iesu Kristo e uangoul teil tamiuoum uakapa tun.

<sup>f</sup> 5.14 2Te 3.6,11   <sup>g</sup> 5.15 Roum 12.17; 1Pi 3.9   <sup>h</sup> 5.16 Pil 4.4   <sup>i</sup> 5.18 Epe 5.20

<sup>j</sup> 5.19 Epe 4.30   <sup>k</sup> 5.21-22 1Jo 4.1   <sup>l</sup> 5.23 2Te 3.3   <sup>m</sup> 5.25 Kol 4.3; 2Te 3.1

# 2 Tesalonaika

## No uatorikina ro bolobolo Poul tasir tamat i Tesalonaika

### O uatorikina ro bolobolo tasir Tesalonaika

Rone o bolobol i loloo toro Baeboul tar timuhur uelhote. Roono ke boloin Poul o la tasir tamatang tagorong man i Tesalonaika, i muduhia kompe tono uakikilangaro bolobolo inggono tasisin.

O tamat ahik pah ra guata uaia tasir tamatang tagorong mana tar uanon. Maeit Poul ke hire tasisina tar uamoko teres nitagorong mana tang God. Ge tar binaka pe re tapokisiha Iesu, God e turung heir me uabang manate tasisisir tamata uasa.

Inggon e turung uabato pono tasir tamata uakapa ge ahik pah ka uauia tar kale tono Uelhire Uaia Iesu. O gisimeher tamatang tagorong manang Tesalonaika ra namana pare, ke tapokis manasaha Iesu.

Poul ke kula pare, o tamata gesir sa nas niuangoul tera kotpokoso baka uoum. Gisina tera turung ueluelde tang Iesu. Maeit inggoumener tamatang tagorong mana mung tagorong mana kompe tang God getung kale tar niduh.

O gisimeher tamatang tagorong mana ra namana pare, Iesu ke uahuhutin tar pokos. Maeit gisina ra de tar kalekinale. Bo Poul puk ke hire tasisina pare, inggono katongo ke kalekinalentieh i Tesalonaika. Doh gisina paka kalekinale pon.

### I lolono toro bolobolo rone:

A uelhire uakalahar 1.1-2

Uatakai tang God kara uairan 1.3-12

A meneng ualatut tena nilaha Iesu 2.1-17

A meneng uakalahara tar nipileseng tar nitagorong man 3.1-16

A uadouhinar menemen 3.17-18

### Poul e heir tar niuaha tasir tamat i Tesalonaika

**1** <sup>1</sup>O bolobolo rone o la tur tang Poul mes nu Sailas, doh Timoti. Roono ka bololain tas mais gera uangoul teil tar toto tamat i Tesalonaika gesir nang God ge Tamagigeig me Iesu Kristo nagi Tamata Nomaneig.

<sup>2</sup>Inggeim mi dangata tang God ge Tamagigeig me Iesu Kristo ge nagi Tamata Nomaneig ura heir tar hamhamas, karo hiarouo tamiuoum.

### A uelhire uapopokoh tar binakang huata tar niduh

<sup>3</sup>Ro bung uanotoumieim, inggeim paking heir tun tar niuaha uleik tang God, teeit remi nitagorong mana inggoum e in kai uateuele tun, karung uelmalauehiresioum. <sup>4</sup><sup>b</sup>Temaait ring uoto la hahaia pe inggeim toro buturunine ra uangoul no toto tamata God, inggeim mi uoto uairana tun tamiuoum tasisin. Inggeim mi guata tar puhonene, teeit tar binaka ka heirir tamata tamiuoum tar uelmahing, kara niduh inggoum ahik pah kung uamaluan, bo kung tagorong mana dedempela tang God.

### Na nikedanga God auia tun

<sup>5</sup>Doh inggoum kung kale tur nomana tar niduh, kara uelmahing tasir tamat, bo ginina puk e ualasira tar nikedangar nang God a kodkodoho tun, kare inggoum ra turung aha to ponolasioum i lolono tena Nitoia God kung kale pe tar niduhunine, kara uelmahing. <sup>6</sup><sup>c</sup>God e guata tar ineter kodkodoh, inggon e turung heir tar niduh, kara uelmahing tas mais geka guata tar hagarinine tamiuoum. <sup>7</sup><sup>d</sup>Kare turung uakapa liu tar niduhonene re moko tamiuoum, doh inggon e turung uaongolo tamiuoum, kare tamiueim pon. Doh inggon e turung guata to tar binaka re tur uakalaharain Iesu Kristo menia tosno anggelou gesir tampopokoh, kara la keipiha toro luhluhuna ro hue. <sup>8</sup><sup>e</sup>Doh inggon e me turung heir tun tar uleikir uelmahing tas mais ra de tang God, kara hik pah ka uakeluk tono Uelhire Uaia nagi Tamata Nomaneig, Iesu Kristo. <sup>9</sup><sup>f</sup>Doh gisina ra turung heiris tar uelmahing uleikintiehe tun, ger mahang kap, kara turung tur taneis tar lame tar Tamata Noman, kara hik pah ra matotong banga tar balbalan na nitampopokohon. <sup>10</sup><sup>g</sup>Tar binakene re lahaion, inggono ra me turung uatakai turin tosno tamata dedeil, kara lutarantiehe tununguar tamata gera tagorong mana tatanon. Doh inggoum pono mu turung uaha keip tasisin, teeit kung tagorong mana tun pe tono uelhire God geking mene taueteieim tamiuoum.

<sup>11</sup><sup>h</sup>Temaene ring uoto lotu dede inggeim tang God ger nagigeig, tar bang kedanga tenami niguata uaiaoum marung kaleoum tar niuangoulur

<sup>a</sup> 1.2 Roum 1.7   <sup>b</sup> 1.4 2Ko 7.4; 1Te 2.19   <sup>c</sup> 1.6 Roum 12.19   <sup>d</sup> 1.7 1Te 3.13

<sup>e</sup> 1.8 Ais 66.15   <sup>f</sup> 1.9 Ais 2.10   <sup>g</sup> 1.10 Kol 3.4   <sup>h</sup> 1.11 Kol 1.9; 1Te 1.2-3

kodkodoh geke kila uelhiriono tamiuoum tar la uangoul. Karing dangata pon mare tena nitampopokohon e uauoun tun teremi nimalaroum, kare nami niguata uaia rung guata keipig tar nitagorong man. <sup>12</sup>Inggeim mi lotu maeit ra turung uatakai turinir hanganar Tamata Noman Iesu tamiuoum. Doh inggoum mu turung kale pono tar uatakai. Ginin ka guataig teeit tena hamhamasa menia tena nimalaelhir nagi Godeig, doh tar Tamata Noman Iesu Kristo.

### A tamata uasa e turung pokos

**2** <sup>1</sup>Tar binaka re tapokisime nagi Tamata Nomaneig Iesu Kristo, inggeim mi marang hire tamiuoum tar hire toso bung uanotoumiu, hope ri me uiliodout tokaha pe inggeig tar uangoul keip tatanon. <sup>2</sup>Ahik tun pah mu tagorong mana tasisit ra kula pare, na mareinir Tamata Noman ke kotpokoso manas. Gitiempe ge teka kulasina ka longoro mo uelhire o la tur tang God ue o bolobol o la tur tamiueim, ahik tun pah mu uolong porongua, karung namanantieh. <sup>3</sup><sup>i</sup>Ahik tun pah mu uamaluana me tamat e boho tamiuoum.

Ge a marein peon ahik pahe turung kotpokos e tuka tar binaka geta turung tar mudur tamata tang God, kare kotpokoso uakalahara tun ponor tamata uasa gere uoto uelsigala tena ualatut God. Doha puhonene tere pokoso baka uoum. <sup>4</sup><sup>j</sup>Doh inggonor tamata uasa e turung uairana katongoin, kare uelmatan tar mamang inetelik ra uoto lotuigir tamata pare, nas god, song re lek iuma tena umang lotu God ger dedeil, kare kula katongoin ter God. <sup>5</sup>Inggoum kung malabobour tar binaka ku uangoul taguo tamiuoum, karu hire tamiuoum tar inetenine? <sup>6</sup>Doh inggoum mu ate tar hauar inete re tur tane tar tamatonene daan, maeit ahikiono pahe uolong kotpokoso uakalahara tun mare pokoso tunumeono tar binaka ke umatotoin God.

<sup>7</sup>Ge na nitampopokoho per tamata uasa gine manasa re kalkalekinale uaou, bo a siokor inete puk e turtur tane sikoro harahene daan, e turung tur tane dedempela e tuka geta la kale liuion. <sup>8</sup><sup>k</sup>Doh gete tur uakalahara manasar tamata uasa, Iesu ger Tamata Noman e turung tung pous keip tatanono tar romo nar uauan, kare uasusa hihir keip tun tatanono tar balbalana na nitampopokoh gete la tapokisihaon.

<sup>9</sup><sup>l</sup>Na nilamer tamata uasa e turung la keipime tena nitampopokoho Satan, kare touo tar bureher kahakahar nitou, kara uaparoko ger boh, kare touo tar inetenine ri toboulugieig, <sup>10</sup>kare turung ualasira tar mamang inete uasalikinine re uelour tas mais geka uasais, teene gisina ra de, kara hik pah ra malaelhir toro man, ge pake tero uelkarus tasisin.

<sup>i</sup> 2.3 1Ti 4.1; 1Jo 2.18; 4.3    <sup>j</sup> 2.4 Isk 28.2; Dan 11.36    <sup>k</sup> 2.8 Ais 11.4; UGO 19.15

<sup>l</sup> 2.9 UGO 13.11-13

11-12 A puh e turung pokoso pare, mais ge ahik pah ka tagorong mana toro man, God e turung ualelio tun teres ninamanasin mara turung tagorong mana tar bohonin, kara uahauaha kompe tar niguataniner sa, gisina ra turung ualakouhunguais.

### Tur uanono keip tereng nitagorong man

13<sup>m</sup>Bo inggoum ro uanotoumieim gere malaelhirintiehe tunisir Tamata Noman, inggeim mi heir dedempe tar niuaha tang God tamiuoum, teeit tar uakekenener binaka God ke umatoto manasa tamiuoum pare, mu turung udeil tena nitampopokohor Iabena Dedeil doh teremi nitagorong mana toro man. 14 Inggono ke kila tur tamiuoum toro Uelhire Uaia geking hiresieim tamiuoum, maeit mu turung uelpakahaoum tar balbalana na nitampopokoho nagi Tamata Nomaneig Iesu Kristo.

15 Temaeit inggoum ro uanotoumieim, mu tur uanono keip dede tar haua king ualasingieim tamiuoum i lolono tenami boloboleim ue tar haua king mene ualasingieim tunugieim tamiuoum.

16 Inngo u dangata tenagi Tamata Nomaneig Iesu Kristo, doh God ge Tamagigeig gere malaelhirintiehe tun tagigeig, doh tar nipoul menia tar hamhamasar nanon e uaongolo tagigeig, kare heir tar niuangoul uaia gere moko dede. 17 Doh tar uatampopokoho tamiuoum tar mamang niguatalikir uia, kara uelhireniner uia.

### Dangata tang God me lotu mare poultamiueim

**3** 1 Ro uanotoumieim, a uadouhinar men, inggo u dangata tamiuoum tar poultamiueim tar lotu maeit ro la uakapa tun no uelhirer Tamata Nomana toro mamang buturulik mara ueltada uaia tunin misiana kung ueltada pe inggoum. 2 Mu lotu pon, maeit re uelkarus God tamiueim tasir tamata uasa, kare tar tamata uasantiehe tun, ge o gisiamehe pe ahik pah ra tagorong mana toro Uelhire Uaia.

3 Bor Tamata Noman a uauaman e turung uatampopokoh, kare kapil tamiuoum tar tang sa. 4 Inggeim king tagorong mana tun tar Tamata Nomana pare, inggoum kung guat, karung turung guata dedempela tar haua king ualatohogieim. 5 Inngo u dangata pono tar Tamata Noman mare uanaman manate uaia tun tamiuoum tar nimalaelhirir nang God, kare umatoto tamiuoum marung me tur uapopokoho misiana ke guata pe Kristo.

---

<sup>m</sup> 2.13 Epe 1.4; 2Te 1.3    <sup>n</sup> 3.4 2Ko 7.16; Gal 5.10

### Tagin dehen tung manguh

<sup>6</sup>Ro uanotoumieim, inggeim mi ualatoho tun tamiuoum tar hanganar Tamata Noman Iesu Kristo tar uareing tasir tamat gesir manguh, kara hik pah ra uakeluk tar ualatut gekung kale turugioum tamiueim. <sup>7</sup>PGe inggoum pe mu ate uaia tun pare, hape pakung petut pe tar niguatar namiueim. Inggeim ahik pah king manguh tar binaka king uangoul keip tamiuoum. <sup>8</sup>qInggeim ahik pah king ein teres nieinir gisiameh a tabung bulau. Bo inggeim ahik tun momio inum ring kalekinale pe tar marein, kara boung mara hik me niduh re pono me tang sioko tamiuoum. <sup>9</sup>Inggeim king banotong dangata tamiuoum me nipoul, bo king de puk, king pe pare, marung petutoum tamiueim tar uakeluk tar niguata uaiar namiueim. <sup>10</sup>Ge tar binaka pe king uangoul keipimeeim tamiuoum, inggeim king hire baka tar puhung ualatutene, ahik pah mu uahue me tamata gere de mate kalekinale tar ein me niein.

<sup>11</sup>sInggeim king mene tar puhene, teeit inggeim king longoro pare, o gisiamehe tamiuoum o manguh, ahik pah ra kalekinale tagu, gisin o keipkeip uelhirelik, kara uapekout tenas kalekinaler gisiameh. <sup>12</sup>tDoh tar hangana nagi Tamata Nomaneig, inggeim mi ualatoho tun, karing uatagin tasir tamata tar puhonene mara uangoul uakodkodoh, kara kalekinale, kara bulaua katongo teres niein. <sup>13</sup>uDoh inggoumeitir gisiamehe ro bung uanotoumieim ahik pah mu manguha tar uangoul uaia, karung guata uakodkodoho uaia dedempela.

<sup>14</sup>Gete kaein me tang sioko ahik pahe uakeluk tar ualatohonine ka bolo uahiuai g toro bolobolo rone, banga uanono tun tatanon, ahik pah mu ueldokout keip tatanon mare bang paroko katongoiono pare, ke guata uasa pe, kare matalangua. <sup>15</sup>vBo ahik pukuoum pah mu guata sira tatanono tasir uelmatan, guata sira kompe paha tahimiu tatanon, karung ualatut.

### A uadouhinar uelhire

<sup>16</sup>Inggo u dangata tar Tamata Nomana katong ger tang uelhiarou, heir mo hiarouo tamiuoum tar mamang binakalik, doh tar mamang hagarilik. A Tamata Noman e uangoul tagu tamiuoum uakap.

<sup>17</sup>Inggo Poul ku bolo katongo tun toro bolobolong tar niuaha rone tar limoug teru uoto bolo peo tenag mamang bolobololik te mara bang paroko tunigir bolobolo ku bologio.

<sup>18</sup>Na hamhamasa nagi Tamata Nomaneig Iesu Kristo e moko tamiuoum uakapa tun.

---

° 3.6 Roum 16.17    p 3.7 Pil 3.17    q 3.8 1Te 2.9    r 3.9 1Ko 9.4; 1Te 1.6    s 3.11 1Ti 5.13  
 t 3.12 1Te 4.11    u 3.13 Gal 6.9    v 3.15 1Te 5.14

# 1 Timoti

## O uakikilangana ro bolobolo ke boloin Poul tang Timoti

### O uakikilangana ro bolobolo tang Timoti

Rone tero uakikilanganaro bolobolo ke boloin Poul tang Timoti i lolono toro Baeboul tar timuhur uelhote.

Timoti inggon a tang siokor tamat a kalan, doh inggon a tamatang tagorong man e la tur tar uan i Listra tar pang uan i Galesia. Tinanon ra la tur ro bungun i Judia. Doh tamanon ra la tur ro bungun i Grik. Poul ke kale tang Timoti ke la uiloho tagu tatanono tar guata tena kalekinale God Apo 16.1-3. Inggon e baka sira pare, Timoti ke kotpokoso sira pare, a tamatang uoum keip tar lotu.

I muduhia Timoti ke kotpokoso sir a tamatang uoum keip tar lotu gere moko tar uan i Epeses. Kare bolola Poul toro pas rone tang Timoti.

Uakikilangar inete ro menmenein ro bolobolo rone te pare, Timoti pake tagin teil geta guata uasa mo gisiamer tamat, kara uasusa teres nitagorong manar tamat. O tamata sira pare, gisin a giniamer sioko tun res ninaman, kara ualasira pare, a inetenine tar koto ginin ahik paha uiantiehe tun, doha tamata gere marang kale tar nitua ger mana tun, inggono pake ueil bak, kare haik pahe le (4.3).

A uatorikinar inete uleik ro uelhirein ro bolobolo rone ter niguata uaianine re banot e kauke uatoro uaia tar lotu, doh na kalekialer sios. O bolobolo roon o uelhire tauete uakalahara pono tang mai uamatoto tunur tamata sira pare, re banot e kotpokoso sir a tamatang kauk, kara tamatang kalekinale tar sios.

O uaduhina ro uelhire toro bolobolo rone, o uelhire tang Timoti pake uangoul sira pare, na tamatang kalekinale uaia tun Iesu Kristo, doh pake guata uaia kahakaha tar niguata uaia tasir kahakahar toto tamatasiner bulout, doho kuaha tar sios.

### I lolono toro bolobolo rone:

A meneneng uakalahar 1.1-2

A ualatut e lain tar sios, doh no tamtang uoum keip 1.3–3.16

A ualatut tang Timoti tena kalekinale 4.1–6.21

**Poul e heir tar niuaha tang Timoti**

**1** <sup>1</sup>Inggo Poul, ge na aposoul Iesu Kristo, ka uamatoto turuio tar kalekinaleene tar ualatohor nang God gere uoto uaudeil tagigeig me Iesu Kristo geri tagorong mana teilisieig.

<sup>2</sup>“Timoti, ingga misianahiampe paha tuguo tun gitier siokono pe regira nitagorong man.

God ge Tamagigeig me Iesu Kristo ura heir tar nimalaelhir keip tar niueldolom, kaura uahiarouo tamiuoum.

**Poul ke uaongolo tang Timoti mare tur tane  
uapopokoho tar niualasira ger boh**

<sup>3</sup>Tar binaka ku lao i Masedonia, inggo ku kula uapopokoho tun totomua tar uangoul i Epeses, karo kula tane tasir gisiamer tang ualasira gera to pukula tenas giniamer mene ra ualasira pe. <sup>4</sup><sup>b</sup>Hire tasisin, ahik pah ra uakapa puk tenas binaka tar namnamanantiehe tar tengkanar kiukiu, kara uakenua tar rer ge ginina pe e uoto uamenemene puk tasisin, kara niguatanin ahik pahe matotong poul tenas niuangoulusina tar tagorong mana tang God. <sup>5</sup>A tengkana maeit a ualatohonene ter uelmalaelhir gere la tur tun tar kolono uaia ger delauan, kara niate tar hauar ineter uia doha sa, kara nitagorong man ger uia tun.

<sup>6</sup>Bo o gisiamer pukur tang ualasira ka lih sioko tar puhonene, kara mene kompe tar uelhireniner tabo tengkan. <sup>7</sup>Gisina ra malara kompe ra kilais o tamatang ualualasira tena ualatut Moses. Gisina ra namana katongois pare, ra mene uapopokoho uaia tun tar ualatut, bo gisina puk ra tele tar haua ra menmenein. <sup>8</sup><sup>c</sup>Bo inggeig i ate a ualatutunin auia geta uakeluk uaia tunig. <sup>9</sup>Kari ate pono pare, a ualatutunin ahik pah ka guata uatuhaig a nasir tamata ger kodkodoho nas niguat, bo ginin a nasir tamata ge ahik pah ra longor, kara uakeluk tananin. Doh a nasisit re tokouasais tang God, kare mais gera de tono uelhireon, kare mais geka tung pous toso tinas doho tamas, kare maisir tang tung pous tamat. <sup>10</sup>A ualatutunin a nas ponor uraur, kare maisir toking bulout ue a toking kuaha geura ueluelkale katongois, kare tas gera uabulaua tasir karabus, kare maisir bohoboh, kare maisir tang boho tola tasir gisiamer tamat, kare mais ponomper tamata gera guata tang hingiar hagar ger sa gere ualasira sioko tar niualasira ger kodkodoh, <sup>11</sup>gere la tur tar uinatoro na ro Uelhire Uaia geke uaponoin God totoguo tar hire tauet.

<sup>a</sup> 1.2 Apo 16.1-3; Tai 1.4   <sup>b</sup> 1.4 1Ti 4.7; Tai 1.14   <sup>c</sup> 1.8 Roum 7.12,16



### Poul ke uatakai tun tang God ke ueldolomo pe tatanon

<sup>12</sup><sup>d</sup>Inggou u uaha tun tang Iesu Kristo ge nagi Tamata Nomaneig, teeit ke uamatoto peono totoguo tar kalekinaleene, kare heir totoguo tar nitampopokoh, doh ke tagorong mana teil tun pare, inggo u matotong guata tena kalekinaleon. <sup>13</sup><sup>e</sup>O man! Sioun inggo ter tang sioko nomana ku menmene uasa tang God, kara mamantou, karu uoto uiliatung tosono tamaton, bo Inggono puk ke ueldolomo totoguo, teeit inggo ahik pah ku ate tar inetene ru guatain, kare ahik meg nitagorong mana tang Kristo. <sup>14</sup>A uleikintiehe tunur nimalauelhir keip tar niueldolom e la tur tenagi Tamata Nomaneig ka heir manasain totoguo menia pono tar nitagorong man, kara uelmalahir gere moko tang Iesu Kristo.

<sup>15</sup><sup>f</sup>A puhung kulene ter puhung mana tun, kara tagorong manain, Iesu Kristo ke laha i koto tar me uelkarus tasir tamata uasa, doh inggo ter tang siokor tamata uasantiehe tun tasisin. <sup>16</sup>Bo maeit puk ka ueldolomoio, teeit Iesu Kristo e malara tasir tamata ra bang, kara ate pare, inggon a hamhamasalik tun na niguata tasir tamata uasa. Temaeit ke guatono totoguo tar puhene mara banga tor tamat, kara tagorong mana pono tatanon, kara kale tar nitua gere moko dedengua. <sup>17</sup>Inggono ter Kristo gere toia dedengua, ahik pahe matotong mata tagu. Inggeig ahik pahi matotong bang huara tatanon, ge inggono pe ter God nomana tun. Temaeit inggeig i ueltada dede, kari uatakai tatanono tar mamang binakalik. O mana tun!

### Timoti o uatampopokohoia tar uiliatung tar niguata ger sa

<sup>18</sup>Er tug Timoti! Gine tenag ualatoho ru heirin totomua. Namana dedempe toro uelhire geke meneinir propet sioun tar haua re turung pokoso totomua. Uakeluk uaia tun tar meneninanine maro uiliatung uaia ingga tar tur keip toro Uelhire Uaia gero man, <sup>19</sup>karo sanga dede tereng nitagorong mana tang Iesu, kara niate tar huar uia doha sa. Ge o gisiamehe per tamata ka ueluelde taninin, kara mamantou teres nitagorong man misianangua tar parau gere horo kout tar lolou. <sup>20</sup><sup>g</sup>Himeneus me Aleksanda ter tang torik tasisin teku uamoko uoumusio tar limana Satan mara uanamang manateis mare haik pah ra menmene uasa uapoul tang God.

### A ualatut tar lotu

**2** <sup>1</sup>Inggou u kula uapopokoho tun totomua tar guata uakikilanga baka uoum menas lotur tamata uakapa tun. A puhung dangata ro

<sup>d</sup> 1.12 Apo 9.15; 1Ko 15.9-10; Gal 1.15-16    <sup>e</sup> 1.13 Apo 8.3; 9.1-5    <sup>f</sup> 1.15 Luk 19.10

<sup>g</sup> 1.20 1Ko 5.5; 2Ti 4.14-15

dangataia tang God te pare, dangata tena niueldolomon e laha tasisin, karo heir tar niuah e la tatanon. <sup>2</sup>Karo guata pono menas lotur toia, kare mais ponompe ra uoum keip toro kalekinale uleik mari uangoul keip kompe inggeig toro hiarou, kari pepe bukbuk, kara kodkodoho nagi niuangoul tar matana God, kari uangoul uadedeil. <sup>3</sup>Doha niguatanin auia tun, e uauaha tang God ger tang uelkarus tagigeig. <sup>4</sup>Ge inggono pe e malara tasir tamata uakapa tun ra siokor udeil, kara ate uaia tun toro uelhire gero man. <sup>5</sup>Ge a tang sioko puk per God, kara tang siokor tamatang tur i uantinanina tang God, doh tasir tamata tar hire uain tar uelhire, inggono te Iesu Kristo, <sup>6</sup>heke heir katongoin tar bulaua tapokis tasir tamata uakap, ka ueluatat tauete tunin tena binaka tun. <sup>7</sup><sup>i</sup>Doh ter tengkanono temaene ka uamatotoio pare, a tamatang hire tauete tar uelhire, kara aposoul tar ualasira tasir gime uan ge ahik paho Ju tar nitagorong man, doh toro uelhire gero man. Inggo u uamana tun ahik pahu boh!

<sup>8</sup>Temaene iar butur rung uelpokosoum, inggo u malara tasir bulout ra lotu keip tar limas a dedeil ra hue kai pe tang God, kare haik me nimalian, kare me uelpereir. <sup>9</sup><sup>j</sup>Doh inggo u malara pono tasir kuaha ra kaleuatoro uaiais, ra hiku, kara loho tar ineteniner uia tar matasir manai, kare haik pah ra uamatmate hamas tar ulus ue ra uamoko teil tar ineteniner abeabe iauiaueler mataiantiehe tun ue ra kukuete me kabononiner abeab re uamatmate hamas tun ue a hikhiku ger i rana uainir bulauan. <sup>10</sup><sup>k</sup>Bor niguata uaia a niuamatoto tun tasir kuah gera kula pare, ra lotu tang God.

<sup>11</sup>Gisinar kuaha paka uangoul bukbuk, kara kale uahiua katongois. <sup>12</sup><sup>l</sup>Inggo ahik pahu uahue tasisina ra mene ualasira ue ra i rana tasir bulout. Gisina paka uanguangoul sikoro kompe. <sup>13</sup><sup>m</sup>Ge God pe ke tuha uakikilanga tang Adam a bulout song a kuah Eva. <sup>14</sup><sup>n</sup>Doh Adam ahik pah teka bohoin. Inggono ter kuaha teke bohoin Satan, kare kategongua tena ualatut God. <sup>15</sup>Bo o kuaha puk ra turung uaudeil tois tar binaka ra poh geta tagorong mana dede tang Kristo, kara malauelhir tasir gisiamah, kara dedeil, kara uakodkodoho katongois.

### O tamatang uoum keip tar lotu

**3** <sup>1</sup><sup>o</sup>A puhung menenine a puhung mana tun, tang mai re malarantiehe tun tar kauek, kare uoum keip tar kalekinaleniner nanar lotu, a kalekinaleon auia tun, kara uoto ueltadantiehe tunin. <sup>2</sup><sup>p</sup>Ge a tamata pe gere malar a tang uoum keip, inggono paka tamata uaia.

<sup>h</sup> 2.6 Roum 3.29-30; Gal 1.4    <sup>i</sup> 2.7 Apo 9.15; Gal 2.7-8; 2Ti 1.11    <sup>j</sup> 2.9 1Pi 3.3-5

<sup>k</sup> 2.10 1Ti 5.10    <sup>l</sup> 2.12 1Ko 14.34    <sup>m</sup> 2.13 Uak 2.7,21-22; 1Ko 11.8-9    <sup>n</sup> 2.14 2Ko 11.3; Gal 3.1-6    <sup>o</sup> 3.1 Apo 20.28    <sup>p</sup> 3.2-6 Tai 1.6-9

Ahikir tamata pah ra uoto mene tatanon, kare na tang siokon siounur kuah, kare haik paha uoto sipak, kare kaueke uaia katongoin, kara uoto ueltada tunin, kare uoto kilauatoro dede tasir pokos, kara tang ualasira uaia tun. <sup>3</sup>Doh ahik pono pahe uoto inumuntiehe tar inumuntier popokoh, doh ahik paha uoto nimaliana ualahur, bo a uanguangoul sikoro puk, doh ahik paha uoto nimalian, kare haik paha uaha mani. <sup>4</sup>Kare uoto kaueke uaia dede tasir tamatang tena um, kare uelhire uatabila uaia dede tun toso bung tun mara longlongor, kara ueltada uaia tun tatanon. <sup>5</sup>Ge a tamata pe ge ahik pahe kaueke uaia tasir tamatang tena uma katong, hapengua re banotong kaueke uaia peono toso toto tamata God?

<sup>6</sup>Doh inggonor tamatang uoum keip ahik pah song re hiku pukume tar lotu mare haikiono pahe uakaiain ka uamatoto pein tar timuhur kalekinaleon, kare kalengua tar siokonor uabang manate geka heir uoumin tang Satan. <sup>7</sup><sup>q</sup>Doh inggonor tamatono ra ueliate uaia tuninir tamata ge ahik pah ra tagorong mana tang Kristo pare, a tamata uaia, doh mare haik Satan pahe matotong uelour tatanon. Kare kaleono me nimalat.

#### **O tamatang poul tar kalekinale tar lotu ra uakeluk tar hagar uaia**

<sup>8</sup>Te misiana ponompe tasir tamatang poul tar kalekinale tar lotu. Gisina o tamata uaia pono ra ueltadantiehe ponoisir tamata uakap, kare haik paho uoto inumuntiehe tar inum popokoh, kare haik pah ra uelour tar kale tenas manir tamat. <sup>9</sup>Gisina paka kale uanono keip toro uelhire gero man gera tagorong manain tar niate pare, ka guata uakodkodoh. <sup>10</sup>Gisina paka uedanga bakais ge para guata uaiasin, song ra banotong guata tar kalekinaleon.

<sup>11</sup><sup>r</sup>Misiana ponompe tosnosio kuahasin, nas niguatasin paka uia, kara ueltadais, ahik paho uoto ngur, kara uaateis tar kaueke katongois, kara guata keip toro mana tar mamang inetelik ra guatain.

<sup>12</sup>A tamatang poul tar lotu, inggono mena tang siokon siounur kuah, kare uoto guata uaia toso bung tun, doh tasir tamata gera uangoul tena umon. <sup>13</sup>Mais ka guata uaia tun tar kalekinaleon, o tamata uakapa tun ra turung ueltadantiehe tunungua tasisin, doh ahik pah ra matal tar hire tauete teres nitagorong mana tang Iesu Kristo.

#### **God ke uamakaha tar niualasira ger man**

<sup>14</sup>Inggo u tagorong mana teil tun pare, ahik pahi reh, karu me pokoso totomua. Bo inggo ku bolo uoum pukumpeme tar puhuninanine totomua, <sup>15</sup>maeit getu otoungo tar lame, ingga o atensioun manasa hape ra

---

<sup>q</sup> 3.7 2Ko 8.21   <sup>r</sup> 3.11 Tai 2.3

uakeluk per tamat, kare hape ra ueltada pe tosno toto tamata God, ge o toto tamata pe gera tagorong mana tang God ger tua, gisina tero tur doh tesir tengkanana ro uelhire gero man.

<sup>16</sup>Ahik me dangata tar puhonene, a parakukuh tar uakalahara tar nitagorong manar eigigeig:

Inggono ke kotpokoso sir tagigeigir tamat,  
 doha labene ke ualasira uakalahara pare, inggon a kodkodoh.  
 O anggelou ka bang,  
 doh no ueluatatono ka hire tauetein toro mamang pang  
 uanilikane i kot.  
 O tamatang gane i koto ka tagorong mana tatanon.  
 Inggono ka keip kaiaian i rana tar uaning uinator.

#### A uatagin tang Timoti

**4** <sup>1</sup>Bor Iabene Dedeil ke hire uakalahara tun pare, i muduhia o gisiamer tamata ra, turung tar mud toro uelhire gero man, kara uakeluk tar iabene ger bohoboh, kara uakeluk tar ualasira ger sa gera hireisir liouana uasa. <sup>2</sup>Temaet a niualasira gere la tur tasir tamata gesir tang uelhire kokop, karo bohoboh, ge gisina pe ahik pah ra banotong ate a huar ineter uia ue a sa, gisina ngohinar kapokononiner mat.

<sup>3</sup>Gisina ka kula tane tasir tamat, ahik pah ra le, kara kula tane pono tasisina ra toub tar giniamer niein. Bo God ke tuha tar mamang nieinilik auia tas mais gera tagorong man, kara ate toro uelhire gero man tar ein tananin, kara heir tenas niuaha tang God. <sup>4</sup>Ge a mamang inetelik pe geke touoig God auia uakap. Inggeig ahik pahi ueluelde tananin, bo i kale keip kompe tananin tar niuah. <sup>5</sup>Teeit ginin a niuadedeil tur manasa toro uelhire gero nang God doha lotu.

#### A ualasira uaia tasir tamatang poul tar lotu

<sup>6</sup>Gete ko heir nomana tar ualatohoninanine toso uanotougigeigisine ra tagorong mana tang Kristo, Timoti, ingga song tena tamatang kalekinale uaia tunumpe Iesu Kristo, ka uaein tunuia toro uauamana tar tagorong man, karo uakeluk uaia tun tar niualasira ger kodkodoh. <sup>7</sup>Ahik paho uakapa to puk tenang binaka tar ualongoro tar kiukiu, doha uelhire ueltebeir ger tabo tengkan. Bo ingga o heirintiehe kompe tenang binak mare ate uaia tunuia tar hua na nimalara God, karo uakeluk. <sup>8</sup>Ge a inete pe gere uoto uatagala puk tar tukununar tamat, auiampe, bo ahik puk pahe la dede tagu, bor uatagalang tar iaben ter uaiantieh, ge

<sup>s</sup> 3.16 Mak 16.19; Jon 1.14; Kol 1.23 <sup>t</sup> 4.3 Uak 9.3; Roum 14.6; 1Ko 10.30-31

<sup>u</sup> 4.7 1Ti 1.4

teka ualapagaha to pelain pare, e la tokahain tar nituaene ri uangoul keipisieigene daan menia tar nitua gere la moko dedela. <sup>9</sup>A puhonene ku nihing mene pukuio o mana tun. O tamata paka siokor uauia kompe tar uakeluk, kara tagorong man. <sup>10</sup>Inggeig ki petutup tun, kari kalekinalentieh, teeit ki siokor uamoko tun pe inggeig teregi nitagorong mana tang God ger tua gere uoto uauheil tasir tamata uakap, teesine tunumpesina ra tagorong mana tatanon.

<sup>11</sup>Ualatoho karo ualasira uakalahara tun tar inetenin tasisin. <sup>12</sup><sup>w</sup>Ahik paho uamaluaana tasir tamata ra banga sira totomua pare, a tatamatalik puk, teeit a kalana pea, bo o uangoul siro mara banga tor tamatang tagorong mana tang Iesu tenang nipilesa tar haua ko ualasiragia tasisin, hape ro uangoul pe, kare hape tereng nitagorong man, kare tereng nimalauelhir tasir gisiameh, kare tenang niuangoul ger delauan. <sup>13</sup>Doh getu otoung sikoro tar lame, ingga o banga dedempe tonon Uelhire Uaia God karo uelhire ualasira tasisin.

<sup>14</sup><sup>x</sup>Ahik paho malabobour tar haua geke heirheir pukin God totomua tar uauasir propet tar binaka ka uaponor mamahoholiking tar lotu tar limas totomua. <sup>15</sup>Lihing siokor paina baka tar puhonene, kalkale hihir tun tananin, maetit ra siokor banga tor tamata uakapa tun tar haua ko guatagia. <sup>16</sup>Kaueke uaia tun tenang niuangoul, kara haua ko ualasirag, uakeluk uakodkodoho dede taninin. Geto uakeluk uaia tuna, God e uauheil totomua, doh tas mais pono ka longoro totomua.

#### A giniameher ualatut

**5** <sup>1</sup>Ahik paho louara ue o perere me mamahoholiking tar lotu, menmene hamas kompe misiana paha tamoum tatanon, karo guata sira tasir bulout kalan o bung tahim, karo guata sira tasir kuaha mahoh o bung tinoum. <sup>2</sup>Tasir kuaha kalan, ingga o guata sir o bung tatahimulik, karo namana uaia tun tasisin.

<sup>3</sup>Bang parok, karung kaueke tasir kamobo geka mata nosio bulout gera katupantiehe tun tar inet, kara uoto uangoul mes paheis. <sup>4</sup>Bo me kamobo ge kaeis ro bung tun ue kaeis mo bung tubun, gisina paka guata baka uoum tena kalekinaler Tamata Noman i lolono toso bung tahisilik banbanoto tun, a bulauana ka kaueke pemesina tasisin, teeit a puhonene tere uauaha tun tang God.

<sup>5</sup>Bor kamobo geke mata na bulout, doh ahik tun me tamata re banga uatoro tatanon, inggono pake tagorong mana teil tang God, kare lotu dede tar marein, mer boung tar dangata tang God me nipoul. <sup>6</sup>Bor kamobo geke mata na bulout, kare uakeluk kompe tena nimalauelhir, inggon a matar iaben, gitiemper tua peon. <sup>7</sup>Heir tar ualatutunine tasir

<sup>v</sup> 4.10 1Ti 2.3-4   <sup>w</sup> 4.12 Tai 2.15   <sup>x</sup> 4.14 2Ti 1.6

tamat, maeit ahik me tang siokor tamata ra tohotolain me pahene me inet.

<sup>8</sup>Bo mai ge ahik pahe banga uatoro toso tahinalik, teesine tunumpesina ra uangoul tokahasina tar siokor um, inggono ke uolih tar nitagorong manener eigigeig, kare santiehungua tas mais ahik pah ra tagorong mana tagu.

<sup>9</sup>Bolo uahua kompe tar hangasir kuaha nimata liu ge resi tonomor hangaulur krismas ge ahik pah ka kalkale hahaiia mo bulout, <sup>10</sup>kara ueliatein na niguat, auia, kare uoto kaueke uaia toso bung tun, kare uoto kilauatoro dede tasir gime uan gera pokos, kare uoto uaha uangoul tasir tamata gera tagorong mana tang Kristo, kare uoto poul tar guata tar uelhiarou tasir tamata gera pepe keip tar niduh, kare uoto heir katongo ponoin tar guata tar kalekinaleniner uia.

<sup>11</sup>Ahik paho bolo uahua tagu tar hangasir kuaha kamob gesir kalan, teeit gete pokoso res nimalaelirisina tar marang le poluk, gisina ra turung tar mudungua tang Kristo. <sup>12</sup>Teeit gisina ra turung kedang uasanguais geta katego tar ualapagaha geka guata keipin tasisina sioun. <sup>13</sup><sup>y</sup>A giomeher puh, gisina ra uakapa to kompe tenas binaka ra la hahaiia pe toro um, kara ngur tasir gisimeher tamat, kara uoto uapekout tenas kalekinale, karo tang menmene tane tenas ueluatatar gisimeher tamat, karo keipkeip uelhire. <sup>14</sup><sup>z</sup>Temaeit ru malaro tasir kuaha kamobo gesir kalana ra le mara poho poluk mo keketik mara kaueke katongo polukis tenas um, maeit ahikisina pahe kusais me puh gera menein nosio uelmatan. <sup>15</sup>Ge o gisimehe uoum pe tasisina ka turung tar mud tang Kristo, kara uakeluk tang Satan.

<sup>16</sup>Bo me kuaha gere tagorong mana tang Kristo, doh kaeis mo tahinalik mo kamob, inggono pake kaueke tasisin, maeit ahikisine ra kaukaueke teil tar lotu pahe ponois me niduh tar kaueke tasisin. Bo a lotu e banotong poul puk tasir kuaha kamob gera uangoul mes paheis, kara katupa tar inet.

<sup>17</sup>O tamatang uoum keip tar lotu geka kalekinale uaia tun, paka ueltadantiehe tunis, kara bulaua uaiais, teesine tunumpesina ka kalekinalentiehe tun tar hire tauete, kara ualasira tono uelhire God. <sup>18</sup><sup>c</sup>Ge o bolobolo pe o hire teil pare, “Ahik paho sanga tane tar uuanar kau tar ein tar binaka re reihreih teil tar sokong raes-uit tar binaka re pioko liu tar kapokononin,” karo kula teil pono pare, “A tamatang kalekinale ra bulauain.”

<sup>19</sup><sup>b</sup>Ahik paho uolong uakalahara me puh gere kusain me tamatang uoum keip tar lotu, e banoto tun geto longor toa me tang torik ue me tang touono ra hire. <sup>20</sup><sup>c</sup>Loulouara to tunumpe tar matasir manai tang

<sup>y</sup> 5.13 2Te 3.11    <sup>z</sup> 5.14 1Ko 7.9    <sup>a</sup> 5.18 Ual 25.4; Mat 10.10; 1Ko 9.9    <sup>b</sup> 5.19 2Ko 13.1

<sup>c</sup> 5.20 Epe 5.11

mai ra tuparain ke guata uasa, maeit ra turung tagininguar gisiamehe geta guata sira ponois.

<sup>21</sup>Inggo u kula uapopokoho tun totomua tar matana God me Iesu Kristo doh tasir anggelou dedeil i Heuen, tar uakeluk tun tar ualatohonine. Ahik paho lihing siokor pain, karo uamokontiehe puk tenang niuaha me tang siokor tamat. <sup>22</sup>Ahik paho uolong tuha toro lunar tamata geke tanganain tena kalekinale God, doh ahik paho uatagulaia teres niguata uasar gisiameh. Kaueke uaia katongoia maro uangoula, a delauan.

<sup>23</sup>Ahik paho inum kodomo puk, bo ingga o inum keip ponompe me sikir bino mare poul tar tukunumua torongo mat.

<sup>24</sup>Namana dede, a niguata uasa ger eisir gisiameher tamat e uoto kalahara uakikilang, doh ginin e la uoto kotpokoso uakikilangangua tar buturung kedang, bo o gisiameh e uoto ouo baka teil res niguata uasa, song re la kalahar i muduhia. <sup>25</sup>Ter siokono kompe tar niguata ger uia e pokoso uakalahara uaia tun, doha giniamer niguata uaia ahik pah ra turung ateig, bo e turung kalaharampe i muduhia.

#### A giniameher ualatut poluk

**6** <sup>1d</sup>O tamatang tagorong mana tang Kristo, gesir karabus paka ueltadantiehe tun tosnosio tang kauek, maeit ahikir hangana God pah ra menmene uasain, kara haua geki ualasiragieig. <sup>2e</sup>Geta tamatang tagorong mana pono nang tamatang kaueka tang Kristo, ingga ahik paho namana pare, a uanotoum tatanon, kara hikingua paho ueltada tatanon. Ingga o kalekinalentiehempempe, ge ingga pe o poul toso bung uanotoum, gisin o tamatang tagorong mana tang Kristo, doho malaelhir pono tasisin. Gininanine ter inete ro ualasiragia, karo mene uapopokoho tun tasisin.

#### A niualasira ger boh, doho uaha mani

<sup>3f</sup>Gete me tang sioko re ualasira me giniamehe siokor niualasir, doh ahik pono pahe uauia tar uakeluk tonu uelhire Iesu Kristo ger Tamata Noman, doh tar niuangoulur uia ger nang God, <sup>4a</sup>tamaton e uakai kompein, ahik me inete re atein, kare marang uelperer, kare marang uelkoi tar tengkanar puhung uelhire. Gininanine e uakotpokosongua tar ueluelgehe, kara ueluelkoi, kara ngur tasir gisiameh, kara uelsae. <sup>5g</sup>Gisinar tamatasin ra uoto uakotpokoso kompe tar nitabila uasa, kara uelperer, ahik pah ra banoto ra ate a huar uia ue a huar sa, doh ahik pah ra ate tagu toro man. Gisin ra namana ra uauaha tang God, kara ueltada tatanon mara kale menas bureher inet.

<sup>d</sup> 6.1 Epe 6.5   <sup>e</sup> 6.2 Plm 16   <sup>f</sup> 6.3 Gal 1.6-9   <sup>g</sup> 6.5 2Ti 3.8; 4.4; Tai 1.14

<sup>6</sup>Bo tar uauaha tang God, doh tar ueltada tatanon, e uatang inete tun tagigeig geti unga uaha tun tar haua ki kaleig. <sup>7</sup>iGe inggeig pe ahik pahi kale teil me inete ki pokoso peane i kot, doh ahik pono pahi matotong kale teil me inete geti mat. <sup>8</sup>Inggeig i turung uaha gete megie niein, kare nagi gomon, teeninanine tere uauaha tagigeig. <sup>9</sup>Bo gisis ra malara menas bureher mani ra turung punga tar uatalaua ger sa, kare kusais tar ninamananiner sa, kara nimalara uasa gere reih uahiua tasisin, kare uasuasa tunungua tasisin. <sup>10</sup>jGe o uaha mani pe tere tengkana tur dedemper mamang niguata uasalik. O gisiamehe ra malaelirintiehe tun tar puhon, kara turung tar mud tar nitagorong man, kara huata teilingua tar bureher niduh.

### Poul ke uatagin tang Timoti

<sup>11</sup>kBo ingga Timoti a tamat a nang God, ualo liu tar niguataniner sa, karo uakeluk uaia tun tar niguataniner kodkodoh. Doho uakeluk tena nimalahir God, doha nitagorong man, malaelhir, huata tar niduh, karo uanguangoul sikor. <sup>12</sup>lUiliatung uapopokoho tar uiliatung ger uia tar haua ri tagorong mana teilisieig, karo uoho uanono tar nitua gere moko dede geke heirin God totomua tar binaka ko hire luaka to tuna tar matasir manai toro man. <sup>13</sup>mInggo u kula uapopokoho to tunumpe totomua tar matana God geke heir tar nitua tar mamang inetelik, doh tar matana Iesu Kristo geke hire luaka tun toro mana tang Pontius Pailat. <sup>14</sup>Inggo u kula uapopokoho tun totomua tar uakeluk uelhir uaia tar ualatohonin, maeit ahikia pahe kusaia ue ra tohotolaia me puh e tuka gete tapokisime Iesu Kristo, <sup>15</sup>n gere turung heirihain God tar binaka geke uamatotoin. Uata kai tatanon ger tang Kaueke ahik me tang giameh, kare nas Toiar toia uakap, kare nas Tamata Nomanar tamata uakap. <sup>16</sup>Inggono te me pahene manasampe ahik pahe matotong mata tagu, inggon e pepe tar luh ger balantiehe tun, ahik me tang siokor tamata re matotong la uahuhut, doh ahik me tamata ke bang ue e banotong banga tatanon. Ueltada dede tatanon, ge inggono pe a toia uleikane i kot, kare na nitampopokoho gere moko dede. O mana tun.

<sup>17</sup>oTimoti, ingga o kula uapopokoho tun tas mais nas burehentieher maniene daana i kot, gisin ahik pah ra kai, kara tagorong mana teil tar mani ge ginina pe e uoto kap, bo gisin paka uamoko kompe teres nitagorong mana tang God gere matoto teil tun, kare heir tagigeig tar mamang inetelik ri malarai mare uauaha tagigeig. <sup>18</sup>Ualatoho tun tasisina tar guata tar hagarininer uia, kara guata tar burehentiehe tunur ineter uia, kara turung liliaheir, kara uauia tar bul tenas mamang

<sup>h</sup> 6.6 Pil 4.11-12; 1Ti 4.8; Hib 13.5    <sup>i</sup> 6.7 Job 1.21    <sup>j</sup> 6.10 Epe 5.5    <sup>k</sup> 6.11 2Ti 2.22  
<sup>l</sup> 6.12 1Ko 9.25-26; 2Ti 4.7    <sup>m</sup> 6.13 Jon 18.36-37    <sup>n</sup> 6.15 UGO 17.14    <sup>o</sup> 6.17 Luk 12.20-21



inetelik tang mai re katup. <sup>19</sup><sup>p</sup>Doh tar hagarionene, gisina ra turung patoho tar inete ger i rana uainir bulauan, ngohina tar tengkanar niuangoul i uoumuhia, kara kale uanono dede tar nitua nomana tun.

### Na uadouhinar uelhire Poul tang Timoti

<sup>20</sup>Timoti kaueke uaia tun tar haua ke heirin God totomua. Tur gele liu dede tar menemenenine re la tur i kot ger tabo tengkan, kara hik pahе ueltada tang God, doh tar uelperere tar inetenine ra kilaig pare, a niate uleik, bo ahik puk paha man. <sup>21</sup><sup>q</sup>Ge o gisiamehe pe ka uakeluk tananin, kara hiliu tar nitagorong mana tang Kristo.

A hamhamasar nang God e moko tamiuoum uakapa tun.

---

<sup>p</sup> 6.19 Mat 6.20    <sup>q</sup> 6.21 1Ti 1.6; 2Ti 2.18

# 2 Timoti

## O uatorikina ro bolobolo ke boloin Poul tang Timoti

### O uatorikina ro bolobolo tang Timoti

O uatorikinaro bolobolo geke boloin Poul tang Timoti o mok i lolono toro Baeboul tar timuhur uelhote. Poul ke bolo to toro bolobolo roon iuma tar karabus. Ge Timoti pe tena tang siokor uakuakeluk pono Poul. Inggono ke kaukaueke tar lotu. Poul ke malar e la ruh kout tatanon. Timoti ke kanuh, maeit Poul ke hire tatanono pare, e turung kale tar bureher niduh ngohina tar soldia, a tamatang ualualo ue a tamatang leb.

Inggono ke uatagin tang Timoti mara hik pahe namana dede me uelpereir gere uahagouo uasa tatanon. Timoti pono ke de tar guata me niguatanitir sa. Doh inggono paka tang ualasira uaia, kara hamhamas.

Poul ke uatagin pono pare, a inet e turung sa uain kompela. O tang ualasira gesir bohoboho ra turung uoumuoum keip uasa tasir tamata ge ahik paha popokoho res nitagorong mana toro man. Timoti pake mene ualasira puk toro mana gere moko teil toro Baeboul.

Poul ke ate pare, ke uahuhutin tar mat. Inggono ke uanamana huara tang Timoti tena nitagorong mana katong, kare na niduh. Bo Poul puk e ate pare, God e turung la bulaua to tatanon i Heven.

### I lolono toro bolobolo rone:

A meneng uakalahar 1.1-2

A uatakai, kara uakalahar 1.3–2.13

A meneng ualatur, kara uatagin 2.14–4.5

Na niuangoul Poul 4.6-18

A uadohinar menemen. 4.19-22

### Poul e heir tar niuaha tang Timoti

**1** <sup>1</sup>Inggo Poul ku kotpokoso na aposoul Iesu Kristo tena nimalara God mari kaleeig tar nitua geke ualapagahain God, kari uangoul tokaha keip tang Iesu Kristo.

<sup>2</sup>Timoti ingga misiana pah ter kuhur tuguo tun, a siokono pe regira nitagorong mana tang Iesu Kristo, a hamhamasa menia tar niueldolom, doho hiarou o moko totomua gere la tur tang God ge Tamagigeig me Iesu Kristo ge nagi Tamata Nomaneig.

### A meneng uangolo tar uangoul uakodkodoho tun

<sup>3</sup>Inggo u heir tun tar niuaha tang God geku kalekinale keip tunuio na niate, inggo ku guata uakodkodoh misiana ka guata pe ro bubungug sioun, ru lotu dede pe tatanono totomua tar boung doh tar marein.

<sup>4</sup>Inggo u uoto namana tapokis tar binaka ko kiringa, karu marang bangantiehe tunumpe totomua maru me uoun tun tar niuah.

<sup>5</sup>Inggo u uoto namana tapokis tar nitagorong manar eimua a mana tun, ge ingga pe ko kale uahiua uaia tun tena nitagorong mana luneis ger tinoumua, doh tang Lois ge tubumua ge kuah. Inggo u tagorong mana teil tun, ingga ko kale uahiua uaia tun. <sup>6</sup>Temaeit inggo u kula uapopokoho dedempe totomua tar uatua dedempe tar haua geke heirheir pukin God totomua tar binaka ku lotuo, karu uapono tar limoug i rana totomua. <sup>7</sup>Ge a Iabene Dedeil pe geke heirin God tagigeig ahik pahe uasokoro tagigeig, bo ke uauoun tun tagigeig tar nitampopokoh, kara nimalaelhir, doh mari kaueke katongosieig. <sup>8</sup>Temaeit ingga haik paho sokoro tar hire tauete ueleheir tar Tamata Noman, doh ahik paho matala ka uamoko peio tar karabus ru kalekinale pe tatanon. Bo ingga o uinatoro uaia tanika kompeia tar huata tar niduh misiana totoguo. God e turung heir totomua tar nitampopokoho maro huata tar niduh gero kaleig.

<sup>9</sup>Inggono ke uaudeil tagigeig, kare kila no tamata tagigeig. Inggeig ahik pah ki guata me inete, maeit ke guatono pare, bo git a to tengkan, a nimalaelhir menia tar hamhamas a nanono katong. A nimalaelhir menia tar hamhamasonene ka heir turin tang Iesu Kristo tagigeig, ke uakekene pemer binak. <sup>10</sup>Bo gine puk daan, inggono ke pokoso uakakalahara tun tagigeig ke pokoso pe nagi tang uaudeil Iesu Kristo, ke uakapa pe tar nitampopokoho na ro mat, kare ualasira uakalahara to tar nitua gere moko dedengua toro Uelhire Uaia. <sup>11</sup><sup>h</sup>Doh toro Uelhire Uaia rone, God ke uamatoto totoguo a aposoul tar hire tauet, karu ualasira toro Uelhire Uaia roon.

<sup>12</sup>Doh ter tengkana kompeon, maeit ku huato tar niduh tar inetenine. Doh gine daan inggo ahik pahu matal, teeit inggo u ate tang maiene ru

<sup>a</sup> 1.2 Apo 16.1; 1Ti 1.2    <sup>b</sup> 1.3 Apo 23.1    <sup>c</sup> 1.5 Apo 16.1    <sup>d</sup> 1.6 1Ti 4.14    <sup>e</sup> 1.7 Roum 8.15  
<sup>f</sup> 1.9 Epe 2.8-9; Tai 3.5    <sup>g</sup> 1.10 Hib 2.14    <sup>h</sup> 1.11 1Ti 2.7

tagorong manain. Doh inggo u ate uaia tun, inggono na nitampopokoho e uauaeil totoguo e tuka tar binaka re tapokisime Kristo, ro hire teil pe ro Uelhire Uaia geke uaponoiono totoguo.

<sup>13</sup>Kale uanono tar uelhire ger mana tun geku hiregio totomua maro uakelukua, karo kale uanono dede tar nitagorong man, doha nimalaelhir ger nagigeig mes Iesu Kristo. <sup>14</sup><sup>i</sup>Kaueke uaia tar inete uuaieit ka heirin totomua, kaueke keip tatanono tar nitampopokohonor Iabena Dedeil gere uangoul teil tagigeig.

<sup>15</sup>Ingga o ate o tamata uakapa tun gera tagorong mana tang Kristo tar pang Esia ka hiliu totoguo menia ponompe tas Pigelus me Hermogenes. <sup>16</sup>Inggo u lotu tar Tamata Noman e heir tar niueldolom tasir tamatang tena uma Onesiporus, teeit inggon e poul uaia totoguo, doh ahik pahe matala ka uamoko peio tar karabus. <sup>17</sup>Doh tar binaka ke me pokoson i Roum, inggono ke me tang sir uelhir tun totoguo e tuka ke tupara pe. <sup>18</sup>Tamata Noman o uahue tatanono mare tupara tar niueldolomo ger noumua tar mareining kedang. Timoti, ingga o ate uaia tun ke poul uaia tun peono totomua tar mamang hagarilik tar binaka ru pepeo i Epeses.

### Kalekinale keip tar nitagorong man tang Iesu Kristo

**2** <sup>1</sup>Timoti ger tuguo, ingga o uatampopokoho tun tar nimalaelhir menia tar niueldolom geke heirin Iesu Kristo. <sup>2</sup>Kale tar ualatut geko longoro turugia totoguo ku menmene to tun pe tar matasir bureher tamat, karo heir tasir tamata gesir uauaman mara turung ualasira uain tasir gisiameh.

<sup>3</sup><sup>j</sup>Huata pono tar niduhene tamiueim misiana tar tamatang uiluiliatung ger uia tun ger nang Iesu Kristo. <sup>4</sup>A tamata gere kalekinale nomana tun te pare, a tamatang uiluiliatung, kare uauaha tena tamatang ualualatouk, inggon ahik pahe uauelhoubour teilin tasir tamata ueltebeir puk. <sup>5</sup><sup>k</sup>Ter siokono kompe tar tamatang ualo gera ueluelpeikie tar ualualo, ahik pahe matot e kale mena inete ke to pe i mud toso uanoton, e banoto tun gete uakeluk tar ualatut. <sup>6</sup><sup>l</sup>Tanener iom, pake ter uakikilanganar tamata tar kale tar niening uamun. <sup>7</sup>Namana tar inetenine ku menegio, ge a tamata Nomana pe e turung uanaman manate totomua tar mamang inetelik.

<sup>8</sup><sup>m</sup>Namana huara dedempe tang Iesu Kristo geke tua tapokis tur toro mata geke kotpokoso tur toro matina tang Debit ger toia tero hire teil pe ro Uelhire Uaia rone ru hirhire tauete teilio. <sup>9</sup><sup>n</sup>Doh tero Uelhire Uaia roono rone ku hirhire tauete teilio, temaeit ku huato tar uleikir niduh, kara uih taneio misiana tar tamatener mamantou. Bo no uelhire puk God ahik pah ka uih tanein. <sup>10</sup>Temaeit inggo u siokor huata tar niduh

<sup>i</sup> 1.14 1Ti 6.20   <sup>j</sup> 2.3 2Ti 1.8   <sup>k</sup> 2.5 2Ti 4.8   <sup>l</sup> 2.6 1Ko 9.7   <sup>m</sup> 2.8 Roum 1.3; 1Ko 15.4  
<sup>n</sup> 2.9 Epe 3.1,13; Pil 1.12-14

tar mamang inetelik tas maisir tamata geke kedangais God, maeit re turung uaudeil pono Iesu Kirsto tasisin, kara kale tar uinatoro gere moko dedengua.

<sup>11</sup> °Rone tero uelhire tun gero man.

Geti mata keipeig tatanon,  
inggeig i tua keip tatanon.

<sup>12</sup> °Geti huateig tar niduh,  
inggeig i turung siokor uoum keip tokaha mes Iesu Kristo.

Geti uoliheig tatanon,  
inggon e turung uolih pono tagigeig.

<sup>13</sup> °Geta hikieig pahi tagorong man,  
inggon e uangoul keip dedempe tar nitagorong man,  
teit inggon ahik pahe banot e boho katongoin.

#### Ter tamata ke bang parokoin God tena kalekinale

<sup>14</sup> °Timoti uanamana dedempe tar inetenine tosnongo tamat, uatagin tasisina tang God mara hikisina pah ra uelperere tar men. Ginin ahik pahe guata uaia tasisin, bo e uasuasa kompe teres nitagorong manasit ra longoro taninin. <sup>15</sup> °Tur uatampopokoho tar heir katongoia tang God pare, ter tang sioko ka bang parokoia ter tamatang kalekinale tun, ahik pah ko matal, ko ualasira uakodkodoho tun pe toro uelhire gero man. <sup>16</sup> °Tur uagele liu dede tar mene gere uasuasa tar hangana God, ge ginina pe e uoum keip uasantiehengua kompe tasir tamat mara uairehe tang God. <sup>17</sup> °A menenin e haijala ueltebeir misiana tar pang kubar gere uabueir tar singsinginar tamat. A tang torikir tamata ke kale uoumis tar puhonene, Himeneus me Piletus, <sup>18</sup> Rasina kura lih sioko manasa tar lel gere hire toro man. Rasina kura kula pare, a nitua tapokis ke la manasain na binak, doh rasina kura mamantouongua teres nitagorong manar gisiameher tamat.

<sup>19</sup> °Bo God ke uahohoto tun tar tengkana roon, ahik paho matotong uagun. Doh roono ka boloin tar puhunine, “A tamata Noman e ate tas maisir nan, doh mais uakapa tun ra hire tauete tar hanganar Tamata Noman ra hiliu tar niguataniner sa.”

<sup>20</sup> I uma tar uma uleik, a dis uakapa tun a kahakah, ahik pah ka tuha keip pukig tar goul ue a silva, bo a giniameh a douk doha giniameh a nouh. Doh taninin a giniameh a nituha umatoto tun tar hua ra guata keipin, doha giniameh e laig tar inete ueltebeir. <sup>21</sup> Ge me tamata re

° 2.11 2Ko 4.11    ° 2.12 Mat 10.33    ° 2.13 Roum 3.3-4; Tai 1.2    ° 2.14 1Ti 6.4; Tai 3.9  
° 2.15 1Ti 4.6    ° 2.16 1Ti 4.7    ° 2.17 1Ti 1.20    ° 2.19 Aha 16.5; Ais 52.11; Jon 10.14;  
1Ko 8.3

uadelauana liu katongo turin tar niguata uasanine, inggono te misianar dis ger nituha umatoto tun tena kalekinale, teeit inggono ka uadedeil manasain, e matoto tunin, e uanguangoul puk manasa tar Tamata Noman tar kalekinale keip tar mamang niguata uaialikininer uia tun.

<sup>22</sup> <sup>w</sup>Bo ingga, o ualo liu tar niguataniner sa gera guatguataigir kalan, uakeluk kompe tar niguataniner kodkodoh, a nitagorong man, uelmaluelhir, karo hiarou menia tas mais gera kila keip tar Tamata Noman tar kolous a delauan.

<sup>23</sup> <sup>x</sup>Tur uagele dede tar meneniner nasir tuktukar, kara uelperere ger tabo tengkan, ge ingga pe o ate ginin e uakotpokoso kompe tar nimalian. <sup>24</sup>Na tamatang kalekinaler Tamata Noman ahik paha uoto perer, e uaha tasir tamata uakapa tun, kara tang ualasira uaia tun, kara uanguangoul sikor. <sup>25</sup>Doh mais ra ueluelde tar ualasira gere ualasiragion, inggono pake matakaluana tasisin, kare ualualatut hamas tun tasisina tar nitagorong manene ri tagorong mana teiliseig mare heir binaka sikoro baka poluk God tasisina ra uapalih pe tenas niguat mara lame, kara ate toro man. <sup>26</sup>Doh mare turung kodkodoho tapokis poluk res ninaman, kara lukup liu tur tono lolo Satan geke reih tasisina, kare guata tasisina ra uakeluk tena nimalaron.

### A uadouhinar binak

**3** <sup>1</sup>Timoti o ate kompe pare, a binak e turung sa tar uadouhinar marein. <sup>2</sup>O tamata ra turung malaelhir katongo kompeis, kara uaha tar mani, ra uasala katongois, ra uakaiais, ra uoto uelsigal, ahik pah ra longoro toso tamas meso tinas, kara hik pah ra mene tar niuah, kara ahik me ueltada tang God. <sup>3</sup>Gane tasir tamat e turung taboinir nimalaelhir, ahik me niueldolom, kara uoto boho tola tasir gisiameh, kara hik pah ra uakodkodoho katongois, kara uoto nimalian, kara uoto uiliatung, kara hik pah ra uaha tar niguataniner uia. <sup>4</sup>O tamata ra turung uelour toso bung kaluas, ra bilinggala ueltebeir kompe, ra uasalais, kara malaelhirintiehe tun tar haua re uauaha puk tar tukununar tamat, ahik pah ra malaelhirintiehe tagu tang God. O man! Gisina ra namana ra sanga uanono tun tar niguata tar <sup>5</sup><sup>z</sup>Uakeluk tang God, bo gisina puk ra uolih tena nitampopokohon. Mu agout uaia tun tasir tamata sira pare.

<sup>6</sup>O gisiameher tamatang ualualasira gesir bohoboho ra uoto la katongo kompe toro giniamhe ro um, kara uoum keip tasir kuaha gesir uangoul uasa ra namnamanantiehe puk pe teres niguata uasa ger pensioun, kara reihime tar mamang nimalaelhirilikir sa. <sup>7</sup>Gisinar kuaha ra uedangantiehe nomanampe tar kale me niate, bo ahik puk pah ra naman

<sup>w</sup> 2.22 1Ti 6.11    <sup>x</sup> 2.23 1Ti 4.7    <sup>y</sup> 3.1 1Ti 4.1    <sup>z</sup> 3.5 Mat 7.15,21; Tai 1.16

manate toro man. <sup>8</sup>Te misiana tas Janes me Jambres, rasina kura tur tane tang Moses, gisinar tamatasina ra tur tane pono toro man ahik pah ra namana uaia, kare punga res nitagorong man. <sup>9</sup>Bo a inete pukunine ka guataigisin e turung punga kout, teeit o tamata uakapa tun ra turung bang huara tun toroso popouluanasin, ter puhonene ke pokoso uoum tas tang torik.

### Na uadouhinar ualatut Poul tang Timoti

<sup>10</sup>Bo ingga o ate uaia tun tar haua ku ualasingo totomua, o ate hape ku uangoul pemeo, karo ate tar haua ru marang guataio, o ate tar nitagorong manar eiguo, kare hape ku uangoungoul sikoro tun peo. A nimalauelhirir eiguo, kare hape ku huata pe tar niduh, <sup>11</sup>ka guata uasaio karu kale uelmahing. A huar inete ke pokoso totoguo i Antiok, kari Ikoniam dohi Listra, a niduh geka heirig totoguo. Inggo ku kale uelmahing tananin, bo a Tamata Nomana puk ke uelkarus totoguo. <sup>12</sup>O mana noman, o tamata gera marang uangoul keip uaia tun tang Iesu Kristo, gisina ra turung guata uasasis. <sup>13</sup>Doho tamata uasa, karo bohoboh, gisina ra turung sa, kara santiehe tunungua, ra uelour tasir gisiameh, kara uelour katongo ponois.

<sup>14</sup>Bo ingga Timoti, o tur uanono keip dedempe tar haua ko atein, karo tagorong mana tunin, teeit ingga ko tagorong mana tun, karo ate uaia tun tas mais ka ualasinga totomua tananin. <sup>15</sup>Namana dede kompe toro bolobolo gero dedeil geko ate turuia tar binaka ro keketik, gero heir totomua tar niate uaia, karo uoum keip totomua torongo udeil gere la tur tar nitagorong mana tang Iesu. <sup>16</sup>Na mamang bolobololik God teke uakotpokosompeig God ter uiantiehe tun tar ualasinga tar inete ger man, karo lolouara tas mais ra guata uasa, karo uakodkodoho tar haua ka pesiauain, karo ualaisra tar ualatutunar niuangoul uaia. <sup>17</sup>Temaeit a tamata gere kalekinale keip tang God, inggon e turung uinatoro uaia tunin tena mamang kalekinalelik ger uaia tun.

### Timoti o uatampopokoho tunuia tar hire tauete toro Uelhire Uaia

**4** <sup>1</sup>I uoum tang God me Iesu Kristo gere turung kedanga tasir tamata uakapa tun, gisine ka mat doh gisiner tua, rasina teura tur keip getu heiro tar ualatutunine tar nipokos, kara Nitoiar nang Iesu Kristo, inggo u uatagin totomua tar puhunine. <sup>2</sup>Hire tauete tono uelhire God, kaleuatoro tanik dede gete na binaka roono ue ahik pah na binak, uakodkodoho uaia dede, loulouar, karo ualatut, ualualasinga hamas tun, karo ualatoho uaia dede.

<sup>a</sup> 3.8 KT 7.11    <sup>b</sup> 3.11 Apo 13.14-52; 14.5,8-20    <sup>c</sup> 3.12 Mat 16.24; Jon 15.20; Apo 14.22

<sup>d</sup> 3.16 Roum 15.4

<sup>3</sup>Ge a binaka pe e turung pokoso pare, o tamat ahik pah ra turung longoro tar niualasirar kodkodoho gere la tur tang Kristo. Gisina ra marang longoro me giniameme siokor niualasira gera malaelhir tunig. Tamaeit gisina ra turung la toto, kara ruh mo bureher tang ualasira tar ualasira tasisin hape ra malara pe. <sup>4</sup>Kara turung tar mud tar ualongoro toro man, ra ualongoro kompe tar kiukiu.

<sup>5</sup>Bo ingga pako kaueke uaia tunuia tar mamang inetelik re pokosome, gitiempe geto kale uelmahinga. Guata kompe tenang kalekinale tar hire tauete toro Uelhire Uaia. Siokor hire tauete tar mamang hagarilik tenang kalekinale.

<sup>6</sup>fGe inggo pe teka ding tauete uoumio misiana tar inum gera guatain tar uahung. Doh nag binako tar hiliu tar nituang gane i kot, ke pokoso manas. <sup>7</sup>gIngggo teku uiliatung uaia tun tar hauene ri tagorong mana teilisieig, ku uakapa tar ueluelpeikie, karu sanga dede tar nitagorong mana tang Kristo. <sup>8</sup>hDoh inggo ka uamoko tanik manasainir bulauoug ger uiantieh gere turung heirinir Tamata Nomana ger kodkodoho na nikedanga totoguo tar mareining kedang, doh ahik pah totoguo puk, bo tas mais ponompe gera marang banga tatanono gete pokoso tapokis.

#### Na uadouhinar ueluelhire Poul tang Timoti

<sup>9</sup>Timoti uedanga tar petutup tar la ualahurume totoguo, <sup>10</sup>i ge Demas pe ke malaelhirintiehe kompe tar ineteng gane i kot, ke turung tar mud totoguo, kare la i Tesalonaika. Doh Kresens ke la i Galesia, kare Taitus ke la i Dalmatia. <sup>11</sup>Luk me pahene manasampe re uangoul tagu totoguo. Geto lamea kila tagu me tang Mak, kaura siokor la tokahame, teeit inggon e uoto poul uaiantiehe tun totoguo tar kalekinaleene. <sup>12</sup>Ingggo ku ualatue tang Tikikus e la i Epeses. <sup>13</sup>JTimoti geto lamea, kale tagume tonogo hikhikuo gero baraha uatuk i kot, roono ku hiliu toio tang Karpus i Troas. Kale ponome tar buk, te giaata tunumpe roono ro nituha keip tar kapokonor sipsip.

<sup>14</sup>kAleksanda ger tang tuha keip tar inete tar haen, ke guata uasantiehe tunumpe totoguo. A Tamata Noman e turung suala tapokis tar niguataniner nanon. <sup>15</sup>Inggga o tagin tatanon, ge inggono pe ke turtur tane tar inetenine ki menegieig.

<sup>16</sup>Tar uakikilangana tunur binak ka hehekeio, ahik me tang sioko ke tur keip totoguo, siokor teesina uakapa tun ka hiliu totoguo. Doh inggo u dangata tang God mara hikisina pah ra polukis tar puhonene. <sup>17</sup>Bor Tamata Nomana ke poul, kare uatampopokoho tun totoguo tar hire tauete uakapa tun tenang uelhire tasir gime uan gera uangoul i Roum

<sup>e</sup> 4.3 1Ti 4.1   <sup>f</sup> 4.6 Pil 2.17   <sup>g</sup> 4.7 1Ti 6.12   <sup>h</sup> 4.8 1Ko 9.24-25   <sup>i</sup> 4.10-11 Apo 15.37-39; 2Ko 8.23; Kol 4.14   <sup>j</sup> 4.13 Apo 20.6   <sup>k</sup> 4.14 Ais 59.18; Roum 2.6



mara longoro ka uelkarus tapokis tur peio toro mat. <sup>18</sup>A Tamata Noman e turung uelkarus totoguo tar mamang niguata uasalik, kare uaudeil, kare keip totoguo tena Nitoia i Heuen. Uatakai tatanono tar mamang binakalik. O mana tun.

#### A menmeneng uadouhin

<sup>19</sup><sup>l</sup>Timoti heir tar niuahar nouguo tas Prisila me Akuila doh tasir tamatang tena uma Onesiporus. <sup>20</sup><sup>m</sup>Erastus e uangoul i Korin, doh inggo ku hiliu to tang Tropimus i Miletus e momouh.

<sup>21</sup>La ualahur sikorome gete ur pang rom, kare na binakar malahong. Ibulus mes Pudens, Linus, doh Klaudia menia pono toso bung uanotougigeig ka heir tenas niuaha totomua.

<sup>22</sup>A Tamata Noman e uangoul tagu tar Iabeimua, na hamhamasa God e moko tamiuoum uakapa tun.

---

<sup>l</sup> 4.19 Apo 18.2; 2Ti 1.16-17    <sup>m</sup> 4.20 Apo 19.22; 20.4; Roum 16.23

# Taitus

## O bolobolo ke boloin Poul tang Taitus

### O bolobolo tang Taitus

Poul ke bolo la toro buk Taitus tang kaluan a hangana tang Taitus.

Taitus e kalekinale tar tor, ra kilain i Krit. I Krit o bureher tamatang tagorong man, bo o tamatang tagorong mana pukusin ahik monosio tamatang uoum keip. Temaeit ke hire Poul tang Taitus tar uamatoto mo tamatang uoum kep toro uan kahakah. Bo Taitus puk pake bangbanga hamas tun tar binaka re uamatoto tasir tamatang uoum keipisin. O kahakahar tamatang uoum keip pako tamata uaia, o liliaheir, o dedeil, karo uauaman. Doho tamatang uoum keip paka ualasira uakodkodoho tono uelhire God (Tai 1.5-9).

A puhonene a kalekinale uleik tun. O gisiameher tamata ka uedangang reh tasir gisiameher tamtang tagorong mana tar uakeluk tenas niguatasin. O tamatainasine ka pepe boho tar ate tang God. Bo nas nipelese pukusina ke ualasira pare, gisin ka boho tang God (Tai 1.10-16).

### I lolono toro bolobolo rone:

A meneng uakalahar. 1.1-4

Noso tamata uleikir tamatang tagorong man. 1.5-16

A kahakahar kalekinale tasir kahakahar toto tamat i lolono tar sios. 2.1-15

A puhpuh paka hiliuig, kara uatagin. 3.1-11

A meneng uadouhin. 3.12-15

### Poul e heir tar niuaha tang Taitus

**1** <sup>1</sup>Inngo Poul na tamatang kalkalekinale puk God doh na aposoul Iesu Kristo, ka uamatotoio tar la uatampopokoho teres nitagorong manar tamata geke uamatotosion o nan, doh tar ualasira tasisina tar ate toro man mara uakeluk tena niguata

God. <sup>2</sup> <sup>a</sup>Doh tar ualasila tasisina tar niate mara tagorong mana teil tar niuangoul gere moko dede tar mamang binakalik geke meneng ualapagahain God tagigeig tar binaka halanar koto ta tuhain. Doh Inggon ahik pahe banotong boh.

<sup>3</sup>Doh tar binaka tun ke umatotoin God, inggono ke uakalahara tono uelhire. Doh inggo ku uelhire tauete tang roono tasir tamata uakap. Godompe nagi Tamatang uelkaruseig ke ualatoho totoguo tar guata ueleheir tena kalekinaleon.

<sup>4</sup> <sup>b</sup>Inggon ku bolola totomua Taitus, ge ingga pe misiana paha tuguo tun toro man, a siokono tun pe regira nitagorong man.

A hamhamasa doho hiarou o la tur tang God tamagigeig doh Iesu Kristo nagi Tamatang uelkaruseig.

#### A kalekinaler nang Taitus tar tor i Krit.

<sup>5</sup>A tengkana maene ku hiliu to inggo totomua tar tor i Krit, te maro uakokodoho ingga tar haua ku hiliu luluakagio, karo umatoto mo tamatang uoum keip tar lotu toro mamang uanilik misiana ku ualatoho peo sioun totomua. <sup>6</sup> <sup>c</sup>A tamata ge pake uoum keip tar lotu ter tamata ger kodkodoho na nipiles tar matasir tamata mara hik me tamata re banotong tohotola tatanono ke guata uasa me inet. Inggono paka buloutetie na tang siokon siounur kuah, doho bung tun ra tagorong mana tang Kristo, kara hik ro bung tuna pah ra banotong bangais pare, o roke, karo mahang kul, karo mahang longoro toso tinas. <sup>7</sup>Teeit a tamatang uoum keip tar lotu inggon e guata tena kalekinale God, temaene inggono paka tamata kodkodoho tun, kara hik pah ra banotong bangain me niguata uasa tatan. Kara hik pahe uairanain, kara hik paha uoto nimaliana ualahur, kara hik paha uoto inum uapopouluanain. Inggono paka hik paha tamatasitie gesir uoto uiliatung tasir gisiamer tamat, kara hik pahe uoto boh mare reih tur tar mani tasir tamat. <sup>8</sup>Bo inggono paka tamatasitier guata uaia, a tang kilauatoro tasir gisiamer, kare uoto malara tar mamang niguata uaialik, kare uakeluk tar ninamana uaia uelhir. Inggono paka kodkodoho na niuangoul, kara hik paha guata ueltebeir. Inggono paka uauaman, kara delauana na niuangoul tar matana God. Doh inggon e banotong uakodkodoho katongoin tena nimalar doh na nipiles. <sup>9</sup>Inggono pake sanga dede tun toro Uelhire Uaia geke ualasilain tatanon, mare banotong mene uapopokohono tar poul tasir gisiamer tamata tar niualasira ger man, kare ualasila tasisit ra tur tane tar niualasir uaia tar puh ka pesiauain.

<sup>10</sup> <sup>d</sup>Inggon u kula sira pare, ge o burehe per tamata tar tor i Krit ra tur tane tar niualasir ger man, gisina ra uoto mene tar bureher mene ueltebeir,

<sup>a</sup> 1.2 Kol 1.27   <sup>b</sup> 1.4 Roum 1.7; 2Ko 8.23; Gal 2.3   <sup>c</sup> 1.6-9 1Ti 3.2-7; 2Ti 2.24-26

<sup>d</sup> 1.10 1Ti 4.7

kara bohboho teres ninamanar tamat. O bureheis tasisiner ualualasir tesir Ju gera tagorong mana tar hagarang poko tar kapokon. <sup>11</sup>eGisina paka tur taneis ge tenas niualasira uasa pesinanit ke uaturung tar mud manasa tasir tamat, doho matmatame uakapa pono tar tagorong mana toro man. O ualualasirasin ra pe kompe ra kale tenami manioum tar hagarang uenau. <sup>12</sup>Sioun nas tang siokor propetesin i Krit ke kula pare, “O tamatang Krit uakapa tun o bohoboh, karo tamata uasa tun misiana tasir inetesitier roke, gisina ra uoto namana puk tar einintieh, kara marapula ueltebeir puk.”

<sup>13</sup>fO uelhire rone o man. Temaene ingga pako louar bise uapopokoho tun tasisin mara uakodkodoho uaia tun teres nitagorong mana tang God. <sup>14</sup>gKara hik pah ra longlongoro tenas kiukiuir Ju, doh tenas mamang ualatur tamata geka turung tar mud toro uelhire gero man.

<sup>15</sup>Tasisitir delauanar kolous a mamang inetelik a delauan, bo tasisit pukur sa, kara hik paho tamatang tagorong man, ahik uadeil me ineter delauan, ge res ninamana pesin, doh res niate tar hauar uia ue a sa, a sa uakapa tunungua. <sup>16</sup>hO tamatasinasine ra kula ra ate tang God, bo gisina puk ra uolih teilis tatanon ra banga to peis nas niuangoul. Gisin o santiehe tun, karo mahang longor, kara hik tun pah ra banotong guata me inete uaia.

### A niualasir ger kodkodoh

**2** <sup>1</sup>Taitus, tar binaka ro ualasira tasir tamatang tagorong man, a uelhirer noumua pake uelmatout keip tar niualasira ger kodkodoh. <sup>2</sup>Hire tasir mamahoholik ra kaukeke katongois, doh paka namana uakodkodoh kompe tar niguata ra guatain, kara uakeluk pukumpe tar ninamanar uia uelhir mara ueltadais. Doh paka uangoul uakokodoho tar nitagorong man, kara nimalauelhir, kara huata tar mamang niduhulik.

<sup>3</sup>iTer siokono sira kompe, ingga o ualasira pono tasir kuaha mamahoholik tar lih tar leler kodkodoh, kara hik pah ra uelhire uasa me tamat, kara hik pah ra malarantiehe tar bino, bo gisina paka guata ualasira puk tar hagarir uia. <sup>4</sup>Mara ualaderasina tasir kuaha kalan tar malahir tun tosnosio bulout doho bung tus. <sup>5</sup>JKara guata ualasingua pono tasir kuaha kalana tar kaukeke uanono tenas niuangoul, a delauan, kara kaukeke uaia tun tonoso um, kara ueldolomo tun tasir gisiameh, kara longlongoro tun tosnosio bulout, gisina paka pilese sira pare, mara hikir tamatasit ra uoto turung tar mud pah ra uelsigala tono uelhire God.

<sup>6</sup>Ter siokono kompe, ingga pako ualasira pono tasir bulout kalana tar kaukeke katongois. <sup>7</sup>kDoh tar mamang inetelik ro guatagia, ingga pake tero guata ualasira tasisina tar niguatar uia. Tar binaka ro ualasira,

<sup>e</sup> 1.11 2Ti 3.5-6; 1Pi 5.2    <sup>f</sup> 1.13 2Ti 4.2    <sup>g</sup> 1.14 1Ti 4.7    <sup>h</sup> 1.16 1Jo 1.6; 2.4

<sup>i</sup> 2.3 1Ti 3.11    <sup>j</sup> 2.5 Epe 5.22    <sup>k</sup> 2.7 1Ti 4.12

ualasira toro man ahik paho boh, kara hik paho tang ualeng, <sup>8</sup>l<sup>l</sup>karo mene uakodkodoho tun mara hik nang uelhirea pah ra banotong uelsigalaig, doh mara matalasisir uelmatan, teene ahik pe menas puh uasa ra banotong tohotolain tagigeig.

<sup>9</sup>m<sup>m</sup>Doh tasisiner tamatang kalkalekinale puk, ingga pako kula uapopokoho tasisina tar uangoul i kukulebanga tosnosio tang kauek tar mamang inetelik, kara uauaha tasisin, kara hik pah ra perer, <sup>10</sup>kara hik pah ra uenaua tur tasisin, bo ra ualasira tun tosnosio tang kauek pare, o uauaman doh nosio tang kauekesin ra tagorong mana tasisin, mare tar mamang hagarilik, gisina ra banotong guata tar niualasirar nang God ger ualakar ge nagi Tamatang uelkaruseig.

<sup>11</sup>Ge God pe ke ualasira tar hagar tasir tamata uakapa pare, ra uelkarus turis tar niguata uasa. <sup>12</sup>"Ge na hamhamasa pe God menia tar nipoul ke ualasira tagigeig tar uakenua tar nipilese uasang gane i kot, kare ualasira tagigeig tar kaueke katongosieig, kari lih tar leler kodkodohor nang God tar niuangoulung daan. <sup>13</sup>Kari uangoul tar marein geri tagorong mana teilin tena nitapokis Iesu, doha nibalbalana na nitampopokoho nagi Godeig ger uleik doh nagi Tamatang uelkarus Iesu Kristo, <sup>14</sup>°geke heir katongoin tar bulaua tapokis tur tagigeig tar mamang niguata uasalik doh tar uadelauana tasir tamat mari uangoul sira tuneig pare, o delauana tun, kari uangoul sira pare, o nana tunumpeon, kari malarantiehe tun tar guata tar mamang niguata uaialik. <sup>15</sup>p<sup>p</sup>Ter mamang inetelikininanine pako ualasingia, ualatut, karo louara uapopokoho sira pare, a tamatang uoum keip. Temaeit ahikia paho uamaluaana me tamat e kula pare, nang uelhirea a iinetelik puk.

### Guata tar niguatar uia

**3** <sup>1</sup>q<sup>q</sup>Taitus, o uanamana dede tasir tamatang tagorong mana ra longoro tasir tamatang uoum keip doho tamata uleikin tar gavaman, kara uakeluk tenas mamang ualatoholikisin, kara kaleuatoro tanikais tar guata me inete me hauamper uia. <sup>2</sup>Kara hik pah ra uelsigal me tamat, kara uangoul keip toro hiarou, kara ualasira tun tar niguatang kale uahiu, kara niuangoulur hamhamas tar mamang nipileselik ra guataigisina tasir tamata uakap.

<sup>3</sup>r<sup>r</sup>Sioun, inggeig ki uangoul sira pon o popouluan, karo mahang kul, ka uelourusieig, kari uangoul sir o tamatang kalkalekinale puk i kukulebanga tar mamang niguata uasalik, kari guata puk tar haua re malarainir tukunugig. Nagi niuangouleig ke uoun tar niguata uasa, kari gehe pono tasir gisiameher tamat. Kare uelueltokouasasieig.

<sup>1</sup> 2.8 1Pi 2.15   <sup>m</sup> 2.9 1Ti 6.1   <sup>n</sup> 2.12 1Jo 2.16   <sup>o</sup> 2.14 KT 19.5; Ual 7.6; Isk 37.23; Gal 1.4; 1Pi 2.9   <sup>p</sup> 2.15 1Ti 4.12   <sup>q</sup> 3.1 Roum 13.1-7; 1Pi 2.13-14   <sup>r</sup> 3.3 1Ko 6.9-11; Epe 2.1-2; 5.8

<sup>4</sup>Bo tar binaka puk ke uakotpokoso uakalaharain na niguata uaia, doh na nimalahir God ge nagi Tamatang uelkaruseig, <sup>5</sup>inggon ahik pah ke uelkarus tagigeig ke banga to pe tar niguata uaia ki guatageig, ahik! Bo teeit tena niueldolomon, maeit ke uelkarusono tagigeig. Kare heir tar Iabena Dedeil geke uahuhu liu teregi niguata uasaeig, kare heir tagigeig tar timuhur nitua. <sup>6</sup>Inggon te geke heirheir pukuion, kare heir uakapaha tatanono tagigeig i lolono tang Iesu Kristo ge nagi Tamatang uelkaruseig. <sup>7</sup>Inggono ke guata pare, maeit tena nimalaelhiron menia tar niueldolom, inggeig i banotong uangoul uakodkodoho keip tola tang God, kari turung kale uahiu tar niuangoulung tar mamang binakalikene ri uangououlin. <sup>8</sup>A puhuninanine a mana uakapa tun. Doh inggo u malar o mene uapopokoho ingga tar inetenin mara kalekinale uapopokoho tunusit ra tagorong mana tang God tar guata tar niguatar uia. A nualasiraninanine auia, kara inete uleik, dohe banotong poul tasir tamata uakap.

<sup>9</sup>Bo o tur gele liu dede pukua tar meneniner nosir tuktukar, kara uelperer, doha uelrer, doha uelkoi tar tengkanar puhung ualatut, ge ahik penina pahe banotong poul me tamat, kara tabo tengkan. <sup>10</sup>Gete kaein me tamat e marang uataltaliaha tar lotu, ingga o uatagin uatorik puk tatanon, i muduhia ingga o agout tatanon. <sup>11</sup>Ge ingga pe o ate, a tamatono ke hiliu manasa tar lel, doh ke kotpokos a tamatang guata tar niguata uasa. Doh na niguata uasa katongon e ualasira tatanono ke guata uasa pe.

### A uadouhinar uelhire

<sup>12</sup>Inggo u turung ualatue me, mera kaluas Artemas me Tikikus totomua, doh gere me pokoso mera kaluas rasin, karo uatolaua ualahurungua ingga tar me ueltupara to totoguo i Nikapolis, ge inggo pe ku namanang marang la uangoul tar buturuono tar binak malahong. <sup>13</sup>\*Guata tar mamang inetelik ro banotong guataig tar poul tang Senas ger tamatang tabila tar uelhire doh Apolos tenasira nila. Banga pare, ra heiris rasina tar mamang inetelik ura malarai. <sup>14</sup>Ge nogio tamata pe inggeig paka kale tar niate tar guata tar kalekinale uaia mara kale tar huar inete ra katupaig, kara hik pah ra uangououlung kadaua puk.

<sup>15</sup>O tamata uakapasine ra heir tenas niuaha totomua. Doh ingga o heir pono tenami nuaheim tasir tamatasit ra tagorong mana tang Kristo mara malara tamiueim.

Na hamhamasa God e uangoul tagu tamiuoum uakap.

\* 3.5 2Ti 1.9; Hib 10.22 † 3.6 Apo 2.17-18 ‡ 3.9 2Ti 2.14,16 † 3.10 Mat 18.15-17

‡ 3.12 Epe 6.21-22; Kol 4.7-8 † 3.13 Apo 18.24; 1Ko 3.5-6 † 3.14 Epe 4.28

# Pilimon

## O bolbobolo ke boloin Poul tang Pilimon

### Pilimon

O bolobolo rone ke boloin Poul tang Pilimon, roon o puhina tun roon o moko teil tar timuhur ualatut.

Poul ke bolola tar giniamer uelhireng uaongol tang Pilimon. Song ke heir Poul tar popokoho tunur mene tang Pilimon e laig tang Onesimus. Inggono ke ualo liu tang Pilimon. I muduhia song ke tagorong manono tang Kristo. Inggono ke poul tang Poul. Bo e uangoul haraha kompe tena nikaueke Pilimon, teeit inggono Onesimus a karabus.

---

### Poul e heir tar niuaha tang Pilimon

<sup>1</sup>Inggono Poul ku bolo toro bolobolo rone, inggo u uangoul tar karabus teeit ku hirhire tauete teil pe tono Uelhire Uaia Iesu Kristo. Roon o la tur pono tang uanotougigeig Timoti.

Roono ka heirilain totomua Pilimon gero uoto kalekinale tokaha keip tamiueim, kara kaloumiueim. <sup>2</sup>“Karo la pono tang Apia ge tatahimiulikieim, kare tang Arkipus ge na tamatang uiliatungur korose, kare tas maisir tamata gera uiliodout tenang uma Pilimon.

<sup>3</sup>God ge tamageig me Iesu Kristo ge nagi Tamata Nomaneig ura heir tar hamhamas, karo hiarouo tamiuoum.

### Na niguata uaia Pilimon ke uauaha tang Poul

<sup>4</sup>Inggono u heir dedempe tar niuaha tang God ru uoto lotu pe totomua Pilimon, <sup>5</sup>teeit ru longoro dede pe pare, ingga o tagorong mana teil tun tang Iesu ger Tamata Noman, karo malauelhirintiehe tun tosono tamata

---

<sup>a</sup> 2 Kol 4.17; 2Ti 2.3

God. <sup>6</sup>Ingga a liliaheir teeit ro tagorong mana pe. Doh inggo u lotu tang God maro uamoko pona torongo liliaheir tar kalekinale maeit geto guata nomana, ingga song ro naman manate uakapa tunungua tar mamang niguata uaialik ri matotong guatagieig tang Kristo. <sup>7b</sup>Inggo katongo ku kale tur tun tar uleikir niuaha, kara uamamahoul tar malaelhirir eimua tahig. Nang guata uaia ingga e la dede ke uatagala tunungua tar kolous no tamata God.

### Poul ke dangata tang Pilimon tar inet

<sup>8</sup>Temaait ru dangata uapopokoho tuno totomua tereng nimalara katongo tun, inggo u dangata keip tar puhono tar hangana Kristo teeit a ineton a kokodoho tun totomua tar guat, <sup>9</sup>bo teeit kompe tar nimalaelhirene tagiraeig, temaeit ru dangato totomua. Temaeit kale sira tar puhonene pare a puhung uadangata puk e la tur tang Poul ge kaloumua, ke mahoho manas e uangoulene daana tar karabus re kalekinale pe tang Kristo.

<sup>10</sup><sup>c</sup>Inggo u malara tun pare, ingga o la ualasira tun tar niguataniner uia tang Onesimus. Inggo u namanantiehe sira tunumpe tatanono paha tug tun, teeit inggono teke tagorong mana tur tar kalekinalener noguo ru uangoul pe tar karabus. <sup>11</sup>Sioun Onesimus ahik nomana pahe poul uaia totomua, bo gine daan inggono song ter tamatang poul tun tagiraeig tokah. <sup>12</sup>Inggo u heir keip tapokisime tatanono totomua tar koloug tun.

<sup>13</sup>Inggo ku marang ut tunumpe tatanonane ru uangoul pe tar karabus mare kale bakono tenang buturua tar poul totoguo tar hire tauete toro Uelhire Uaia. <sup>14</sup>Bo ahik puk pah ku marang guat, ahik pe pah ku kale tur baka me puh totomua. Doh inggo ahik pahu malar o poul pukua tatanon, teeit ka petutupeia tar guat, bo ingga o guata tun geto malar. <sup>15</sup>Onesimus ahik pah ke hiliu totomua tar puhung barah, bor puhono here ke kotpokoso maro kale tapokis polukua tatanono mare uangoul dede keipiono totomua. <sup>16</sup><sup>d</sup>Doh gine daan inggon ahik paha karabus puk, bo inggon a uanotougigeig manas, te totoguo tunumpeon, doh totomua inggon a karabus bo i ranahia puk tar tamata ger karabus, kara uanotoumua pon.

<sup>17</sup>Temaait gete ko kale sira totoguo pare, a kaloum tun, kilauatoro tapokis tatanono misiana ro uoto guata pe totoguo getu me pokoso totomua. <sup>18</sup>Gete ke guata uasaono totomua me puh ue ke uenau me ineter noumua, uapalih tar hanganon, karo uaturula tar hangouguo tar inetenin. <sup>19</sup>Inggo Poul ku bolo katongo tun tar puhung uelhireene. Inggo katongo uoumumpe ru turung uamata taninin. Doh inggo ahik pahu marang mene pare, ingga ko kalkale tur puk pono tereng nitua katongo totoguo. Bo ahik pukuo pahu marang mene tar puhon.

<sup>b</sup> 7 2Ko 7.4   <sup>c</sup> 10 1Ko 4.15; Kol 4.9   <sup>d</sup> 16 1Ti 6.2



<sup>20</sup>Tahig ualongoro tar hanganar Tamata Noman inggo u marang dangata totomua tar guata tar puhonene maro uauaha keipa totoguo tang Iesu Kristo. <sup>21</sup>Gine ru bolo pelao toro bolobolo rone totomua, inggo u ate pare, ingga o turung uakeluk tenag puhung uelhireo. Inggo u ate tar niguata ro turung guataia tang Onesimus, e turung i ranantiehe liu tar niguatene ru dangataio totomua tar guat.

<sup>22</sup><sup>e</sup>Doh inggo nag puhung mene baka poluk. Inggo u tagorong mana teil pare, God e turung longoro tenang lotua, kare uamaluana totoguo tar tapokisime totomua. Temaeit ingga pako kaleuatoro me siokor tina um maru me hohouo.

### **O uanotono Poul ka heir tenas niuah**

<sup>23</sup><sup>f</sup>Epapras ge raeim mira uangoul tokaha tar karabus tar hangana Iesu Kristo e heir tena niuaha totomua. <sup>24</sup><sup>g</sup>Doho uanotouguo pon gera uoto kalekinale tokaha keip totoguo, Mak mes Aristarkus, doh Demas, doh Luk, gisina ka heir pono tenas niuah totomua.

<sup>25</sup>Inggo u lotu tang God e heiriha tena hamhamas nagi Tamata Nomaneig Iesu Kristo e me uangoul tagu tar iabeimua.

---

<sup>e</sup> 22 Pil 1.25; 2.24    <sup>f</sup> 23 Kol 1.7    <sup>g</sup> 24 Kol 4.10-14

# Hibru

## O bolobol o la tasir Hibru

### Noso bolobolor Hibru

O buk Hibru o moko tar timuhur uelhote.

O buk Hibru o ualasira tar bureher inete tang Iesu. Inggeig ahik pahi ate tang mai ke bolo toro bolobolo roon. O gisiamehe ra namana tang Poul teke bolo tang roon.

O buk Hibru o inete uliek tun ge o ualasira pe roono tar bureher niualasir i lolono toro Baeboul. Roon o ualasira tagigeig tang Iesu ahik paha angelo (Hib 1). Iesu a God. Bo Iesu puk ke me tamat. Iesu nagi patereig (Hib 5 doh mahar 9). Doh Iesu ter Patere uaia tun (Hib 7.25-28) i lolono tar pensiuunur uelhote, o patere ra uiliatung pous tasir inetesiner tua mare luaka liu God tasir tamat. Bo Iesu ke me mata katkatongo tar kale uelmahing teregi niguata uasaeig. God ke uahue toro duatingina Iesu tono maton (Hib 9). Temaeit God e turung kusa luara teregi niguata uasaeig tar binaka ri tagorong mana tang Iesu.

I lononno toro Baeboul tar pensiuunur uelhote, o burehe ka tagorong mana tang God (Hib 11). Gisina ka tagorong man, e turung heiraha God tang Iesu. Temaeit gisin ahik pah ka sokor, gitiempe ka ueltupara pemesina tar bureher niduh. Temaeit inggeig pono paki tagorong mana tang God tar binaka ri ueltupara tar niduh (Hib 12.1-2).

---

### No Uelhire God ke mene keipin tar tun ger keketik bulout

**1** <sup>1</sup> Sioununtiehe tun God ke mene keip toso bungugigeig tasir propet tar bureher binak, kare tar mamang hagarilik. <sup>2</sup> <sup>a</sup>Bo tar binaka pukulanine daan, God ke mene keip tar tun ger keketik bulout tono uelhire tagigeig. God ke ualapagaha tar tun tere kale uahua tar mamang inetelik. Tatanon, God ke touo keip tatanono tar mamang inetelik i ran dohi kot. <sup>3</sup> <sup>b</sup>Inggono tere ualasira tar balbalana na uiniatoro God, doh inggono teke kale uakapa tun hape re baka pe God, kare kale toto tokaha

---

<sup>a</sup> 1.2 Jon 1.3   <sup>b</sup> 1.3 Jon 14.9; Kol 1.20; Hib 8.1

tar mamang inetelik tono uelhire popokoh. Binaka ke uadelauana baka peono teregi niguata uasaeig, kare la tabilangua tar pang mua tang God ger tampopokohontiehe tun i Heuen.

<sup>4</sup>“Temaeit inggono ter i rana kai uainintiehe tasir anggelou ter siokono kompe tar hanga ke heirin God tatanon a irana kai uainintiehe tar hangasisin. <sup>5</sup><sup>d</sup>Ge God pe ahik pah ke kula pare, me tang siokor anggelou,

“Ingga a tuguo, daana ku kotpokoso inggo a tamoumua.” *Ker 2.7*

Doh ahik pono pah ke kula me anggelou pare,

“Inggo u turung kotpokos a tamanon,  
doh inggon e turung kotpokos a Tuguo.” *2 Samuel 7.14*

<sup>6</sup>“Doh tar binaka tun ke marang heirhaono tar tun ger uoum ger bulout i kot, inggono ke kula pare,

“Inggoum, no anggelou uakapa tun God, mu lotu tatanon.”  
*Ualatut 32.43*

<sup>7</sup><sup>f</sup>Kare kula pare tosno anggelou,

“God e guata sira tasir anggelou misiana tar rom,  
doh tosno tamatang kalekinale o nituha keip toro luhluhuna ro hue.” *Ker 104.4*

<sup>8</sup>Bor Tunono teke kulaiono pare,

“Ingga a God, nongo tabtabilang toiaa  
o turung moko dedela tar mamang binakalik,  
Ingga o kauেকে keip tosnongo tamata tenang nitoia tar niguatar kodkodoh.

<sup>9</sup>Ingga o malauelhir tar niguatar uia, karo de tar niguatar sa.  
Temaene, God ge nang Goda, ke uelpikur keip totomua tar uaiuaiang uah,  
a hagaring ueltad a uleik uain tar niuaheit ke heiriono toso uanotoumua.” *Ker 45.6-7*

<sup>10</sup>God ke kula pono pare,

“Tar uakikilanganar binak, ingga teko touo tar tagirinar kot,  
doh tar limoum katong, ingga ko tou i ran.

<sup>11</sup>Rasin ura turung rou, bo ingga o turung uangoul dede,

<sup>c</sup> 1.4 Pil 2.9 <sup>d</sup> 1.5 1OUTT 17.13; Apo 13.33 <sup>e</sup> 1.6 Roum 8.29 <sup>f</sup> 1.7 Ker 104.4

rasin ura turung pensiou, kaura mout sira toro gomono  
pensiou.

<sup>12</sup> Ingga o turung ligun sira tasrasina toro kokop,  
doh rasin ura turung uapalih.

Bo ingga puk o turung uangoul sira kompela pare tar mamang  
binakalik, ahik paho palih tagu.” *Ker 102.25*

<sup>13</sup> Doh God ahik pah ke kula sira tagu me anggelou misiana ke kula pe  
tar Tun,

“Tabilane tar pang mua totoguo,  
e tuka getu touahia inggo tosnongo uelmatana  
ra uangoul i kukulebanga totomua.” *Ker 110.1*

<sup>14</sup> O hauanguasinar anggelou? Gisin o iaben gera kalekinale tang God,  
doh no ualualatueon tar poul tasisit ra uelkarusis.

### Mu tagin gete reih liuisioum toro man

**2** <sup>1</sup> Temaene inggeig i longlongoro hamas tun toro mana geki  
longorosieig geta reih liuisieig tang God. <sup>2</sup> O uelhire geka heir  
turuahain tasir anggelou toso bungugigeig ko ualasira pare, o man, doh  
gisis ahik pah ka uakeluk tang roon, kara mahang longor, ka kale tar  
uelmahing ka uahingaig. <sup>3</sup> Hopengua ri uareing peeig geti bangang  
duk tar uelkarusonener uleik? Ge a uelkarus peonene ke uelhire tauete  
uakikilangainir Tamata Noman, song ka heirihain tasisit ka longoro  
tatanon, ke mene pe tar me heir ualatumana tagigeig. <sup>4</sup> God ke ualasira  
to pono tono uelhirer Tamata Noman pare, o man ke guata pe tar  
uaparok, a nitou, kara giniamhemper niguatar popokoh, kare pakaha  
tena inete uaiar Iabena Dedeil tasir tamat e pakaha tompe terener  
nimalar.

### Iesu ger Tuna God ka uatamatain

<sup>5</sup> Ge God pe ahik pah ke uamoko tasir anggelou ra me kaueke tar  
timuhur koteit re turung lame ri menmeneieig. <sup>6</sup> Bo misiana ro kula teil  
pe no uelhire God,

“O hua tuneimir tamat, maeit ro uanamnamantieha tamiueim?  
Doho hua tuneimir tunar tamat, maeit ro kaueke uaia ingga  
tamiueim?”

<sup>8</sup> 1.14 Ker 34.7; 91.11    <sup>h</sup> 2.2 Gal 3.19    <sup>i</sup> 2.3 Hib 10.29; 12.25    <sup>j</sup> 2.4 Mak 16.20;  
1Ko 12.4,11

7 Tar sikinan siounur binak ingga ko guata tamiueim o  
i koto uain tasir anggelou,  
karo uataku toro keuaranar uiniator,  
kara uleikir ueltada tamiueim.

8 Ingga ko heir tamiueim tar kaueke tar mamang inetelik.” *Ker 8.4*

Gine ri kula peeig, “A mamang inetelik,” e kulanguar puhono pare, ahik uadeil me inete ka aha liuin tar uangoul i kukulebanga tamiueim. Bo halana pukeig ti banga tar mamang inetelik re mok i kukulebanga tagigeig, <sup>9</sup>bo inggeig puk i banga tang Iesu geka uaikoto sikoro bakin tasir anggelou, maeit tena nipoul God ger hamhamas, inggono ke mata ueleheir tasir tamata uakap i kot. Doh gine daan inggeig i banga tatanono pare, ka uatakuin toro keuaranar uiniator, kara uleikir ueltad, teeit ke kale uelmahing peono toro mata tagigeig.

<sup>10</sup>Doh auia nomananguampeono tang God geke touo tar mamang inetelik tena uiniatoro katong, doh geka touo turigir mamang inetelik, e keip ualeka toso bung tun tar butur re uangoul. Tena uelmahing Iesu, God ke guatangua tatanon a tamatang uoum keip uaia mare uelkarusono tasisin.

<sup>11</sup>Doh gine daan Iesu ke uadelauana tasir tamata tenas niguata uasa, doh inggono mes gisis ka uadelauanais a tang sioko tamas. Temaene Iesu ahik pahe matala tar kila tasisina pare, o bung tahin i lolono tena niuangoul God. <sup>12</sup>Inggono ke kula pare tang God,

“Inggo u turung hire toso bung tahig tar haua ko guatagia. *Ker 22.22*  
Inggo u turung uatakai to totomua tar matasisir bureher tamatang tagorong man.”

<sup>13</sup><sup>m</sup>Kare kula poluk pare, “Inggo u tagorong mana teil tatanon.” Kare kula poluk pare, “Inggo gine manasa mesir keketik geke heiris God totoguo.”

<sup>14</sup><sup>n</sup>Gine o keketik pesitie re menmeneis Iesu gisina tesir tamata kompe, Iesu ke me tamata pe, ke kotpokoso sira tasisin. Inggono ke guata pare, maeit tono maton, inggon e banotong kale liu uakapa tun tena nitampopokoho Satan gere kale teil tena nitampopokoho ro mat. <sup>15</sup>Doh tar hagarionene, inggon e banotong luaka liu tasisit ka uangoul dede tar karabus, teeit ra sokoro pesina toro mat. <sup>16</sup>Ge a puh pe a mana pare, inggon ahik pahe kotpokoso sira tasir anggelou tar me poul tasir anggelou, bo ke kotpokoso tun a tamat, tar me poul toso tamata Abraham.

<sup>17</sup>Temaait tun pe ka me uakotpokoso sir tunuiono toso bung tahin tar mamang hagarilik, mare kotpokoson a Patere Uleik ger ueluedolom,

<sup>k</sup> 2.9 Pil 2.8-9   <sup>l</sup> 2.11 Mat 25.40   <sup>m</sup> 2.13 Ais 8.17-18   <sup>n</sup> 2.14 1Jo 3.8; UGO 12.10

kara tamata ra tagorong mana uakapa tunin tena kalekinale God, doh mare me guatono tar uahung tar kale liu tenas niguata uasar tamat. <sup>18</sup>Doh gine daan, inggon e banotong poul tasisit ra uedangais, ge inggono katongo pe ka uedangain, kare kale uelmahingime toro mahara roon.

### Iesu a i rana uain tang Moses

**3** <sup>1</sup>Temaeit ro bung uanotoug gesir dedeil, inggoumeit ke kila ponois God i Heuen, mu uamoko tun teremi ninamana tang Iesu geke heirihain God a tamatang keip uelhire tagigeig, doha Patere Uleik geri hire tauteieig teregi nitagorong man. <sup>2</sup>God ke uamatoto tatanon, doh inggono ke kalekinale uaia tun tang God, te misiana kompe tang Moses ke kalekinale uaia keip tun pe tar mamang inetelik tena uma God tosno tamata Godosin. <sup>3</sup>Iesu ra ueltadantiehe uainin tang Moses, te misiana kompe tar tamatang tuha tar um ra ueltadantiehe uainin tar uma katong. <sup>4</sup>Ge o uma uakapa pe, o nituhang tamat. Bo God puk teke tuhampe tar mamang inetelik.

<sup>5</sup>Moses ke kalekinale uaia sir tun nomanampe a tamatang kalekinale tosno tamata God, doh na kalekinaleon ke ualasira uakalahara tun tar ineter man gere turung uakalaharaig God gitila i uoum. <sup>6</sup>Bo gitie pukur tuna God pe Kristo, inggono teke i rana uainingua tosno tamata God. Doh inggeigener tamatang tagorong man, inggeig tena umon geti uaongolompelasieig, kari uoho uanono tar inete ri tagorong mana teilin tang Kristo. <sup>7</sup>Temaeit mu namana dedeoum ke kula per Iabena Dedeil pare,

“Daana getung longoroum tar uauouguo,

<sup>8</sup> ahik pah mu mahang longor

misiana ka guata uoumper Israel

tar binaka ka uanimaliana,

kara uedanga to totoguo tar butur paden.

<sup>9</sup> Ter buturuono ka uedangantiehe to tun ro bungumiuoum totoguo,

kara uedanga tereguor hamhamas,

gitiempe ka banga pesina tenag nitouo toro toueitir hangaul ro krismas.

<sup>10</sup> Temaeit inggo ku nimalianantiehe tun tasir Israelesinasit

ka uangoulume tar binakon, karu kulo pare,

‘Gisin ra uoto pe puk ra la teil tereisir nimalar,

kara hik pah ka naman manate ter noguor hagar.’

<sup>11</sup> Temaeit ku nimaliana inggo, karu uaman i rana pare,

° 3.1-2 Aha 12.7; Hib 4.14; 7.26    P 3.5 Aha 12.7; Ual 18.15-19    ° 3.7-11 Ker 95.7-11

† 3.8 KT 17.7; Aha 20.2-5    § 3.11 Aha 14.21-23

‘Ahik tunusin pah ra turung lekala tenag buturung pepe uaho.’<sup>”t</sup>

<sup>12</sup>Ro bung uanotoug, mu tagin, karung kaueke uanono tar koloumiu tar niguata uasa, doh tar tagorong boh gere reih liu penin tamiuoum tang God ger tua. <sup>13</sup>Bo mu uelmene uatampopokoho dedempesioum tar mamang mareinilik, sikina re moko haraha per binak mara hik me kalamiuoum re uelourinir niguata uasa, kare la mahang longor. <sup>14</sup>Ge gitie pe geti uoho uanoneig tar nitagorong man e tuka tar uadouhinar binak, kari tagorong mana uapopokoho tun tang God misiana ki uakekene pe, inggeig i turung uelpakah tagungua tar hauar nang Kristo. <sup>15</sup>“Gine te hape ko kula pe no uelhire God,

“Daana getung longoroum tar uauouguo,  
ahik pah mu mahang longor,  
misiana ka guata uoumper Israel tar binaka ka uanimaliana  
kara uedanga to totoguo tar butur paden.” *Ker 95.7*

<sup>16</sup>“Bo mais ka longoro tar uauana God, kara uanimaliana tatanon? Tesir tamata dehesin geke uoum tauete keip turis Moses i Isip. <sup>17</sup>“Doh mais ke nimalianais God toro toueit ro hangaul ro krismas? Ahikiono pah teisis geka guata tar niguata uasa geke mata rikin tor tukunus tar butur paden? <sup>18</sup>Ge mais pesina ke ualapagahais God pare, ahik tun pah ra turung lekala tenag buturung pepe uaho? Gisina teesis ka tagorong boho tatanon. <sup>19</sup>Temaeit inggeig i naman manate uaia tunungua tasisin ahik pe pah ka banotong la uangoul toro mahar koto roon, teetimpe ka tagorong boho pesin.

#### A buturung pepe uah geke ualapagahain God tosno tamat

**4** <sup>1</sup>Temaeit gine re moko pe na ualapagah God, tar lekala tena buturung pepe uahon, ti tagin gete punga kout me kalagigeig. <sup>2</sup>Ge inggeig pe ki longoro manasa pono toro Uelhire Uaia geka uelhire tauetein tagigeig, te misiana kompe ka longoro pesina tang roon. Bo o uelhire puk ka longoroinisin ahik pah ko banotong poul tasisin, teeit gisin ahik pah ka tagorong mana tar haua ka longoroig. <sup>3</sup>“Ge inggeig peene ri tagorong man teri banotong lekela tena buturung pepe uahon. Doh tasisit ahik pah ka tagorong man, God ke kula pare,

“Temaeit ku nimaliana inggo, karu uamana to i ran pare,  
‘Ahik tunusina pah ra turung lekela tenag buturung pepe uaho.’”  
*Ker 95.11*

<sup>t</sup> 3.11 Bolobolong Ker 95.7    <sup>u</sup> 3.15 Hib 3.7-8    <sup>v</sup> 3.16 Aha 14.1-35    <sup>w</sup> 3.17 1Ko 10.10  
<sup>x</sup> 4.3 Hib 3.11

God ke hire paar, gitiempe a nikaleuatoro tanik manasa pe mer pepe uahon tar binaka ke touono tar koto uakap. <sup>4</sup>Inggeig i ate a nikaleuatoron, ge a puh pe e moko teil tono uelhire God e hire sira tar mouitinar marein pare, “God ke tuha uakapa tena kalekinale, kare pepe uaha tar uamouitinar marein.” <sup>5</sup>Doh tar giameher puh God ke kula pare tasisin, “Gisin ahik tun pah ra turung lekela tenag buturung pepe uaho.” <sup>6</sup>Temaeit mo gisiamehengua komper tamata geke uahueis God tera lekela tena uaning pepe uahon. Bo gisisir gisiamehe geke longoro toro uelhire uaia geke hire tautein tasisina sioun, ahik pah ka banotong lekela tar buturung pepe uah, teeit torosio mahang longorosin. <sup>7</sup>Temaeit God ke uamoko sioko poluk tar siokor marein gere kilaiono, “Daan.” I muduhia ke la baka per puhung barah, inggono ke mene keip toha tang Debit misiana re mokon sioun per puh:

“Daana getung longoroum tar uauouguo,  
ahik pah mu mahang longor.”

*Ker 95.7-8*

<sup>8</sup>Ge gitie pe ge pake uoum keip Josua tasir Israel tar buturung pepe uah, God paka hik pahe mene baka poluk me Mareining Pepe Uaha sioko kaein i muduhia. <sup>9</sup>Temaetingua a Mareining Pepe Uah kae harahampein, e uangangoul tosno tamata God. <sup>10</sup>Ge mai pe re lekela tena buturung pepe uaha God, e pepe uahangua pono tena kalekinale, te misiana kompe ke pepe uaha pe God ter nanar kalekinale. <sup>11</sup>Temaeit inggeig i pentampopokoho manasa tar lekala tar pepe uahoneit mara hik me tang sioko re pung misiana tasir Israel geke pung, teeit torosio tagtagorong boholik.

<sup>12</sup>Ge no uelhire pe God, roon o tua, karo tampopokoh, roono o manantiehe liu toro baenat gero uaraman, karo hiku tun i lolono teregi ninamaneig, doha iabegig, doha ueltumanan, kara gagonar hirougeig. Roon o uakalahara teregi ninamaneig, doh regi nimalareig gere moko uailolono tun. <sup>13</sup>Ge tar mamang inetelik pe geke touoig, ahik uadeil tun me inete re banotong ouo tang God. A mamang inetelik e padeneneig, kare moko tar kalaharan tar matanon. Teono teri la turung hiresieig tar mamang inetelik ki guataig.

### **Kristo ter paterer uleikir nagigeig**

<sup>14</sup>Ge Temaeit gitie nagi Patere Uleik peeig tang Iesu ger tuna God geke la kai i Heuen, ti uoho uanono dede tar inete ri tagorong manaig. <sup>15</sup>Ge inggeig pe nagi Patere Uleik ger tang bang parok, kara tang ueldolom

<sup>y</sup> 4.4 Uak 2.2   <sup>z</sup> 4.5 Ker 95.11   <sup>a</sup> 4.7 Ker 95.7-8   <sup>b</sup> 4.8 Ual 31.7; Jos 22.4   <sup>c</sup> 4.10 Hib 4.4  
<sup>d</sup> 4.12 Epe 6.17; UGO 1.16; 19.13-15   <sup>e</sup> 4.14 Hib 3.1; 10.23



tagigeigir tamatang guata pe tar niguata uasa. Teeit nagi Patere Uleikeig ka uedangain tar mamang hagarilik misiana tagigeig, bo ahik pukuono mena niguata uasa tagu. <sup>16f</sup>Temaetit inggeig i uaongolosieig, kari la uahuhutula tonu tabtabila God tar buturung kale to tena hamhamasa God mari kaleeig tar niueldolom menia tar nimalaelhirir nanon tar poull tagigeig tar binaka ri malar.

**5** <sup>1</sup>Ge o patere uleik uakapa pe ra uoto umatoto turis tasir tamat, kara umatoto ueleheiris tar kalekinale tang God, tar heir tenas ineter tamata ka heirig e laig tar uahungunar niguata uasa. <sup>2</sup>Teeit a maluana pono peono tar bureher hagar, inggon e banotong guatguata hamasangua tasir tamata gera tel, doh tasisit ka pesiaua tar guata uai. <sup>3g</sup>Temaenengua re guatono tar uahung tar kale liu katongo terener niguata uasa, doh nas niguata uasa ponor tamat. <sup>4h</sup>Ahik me tamata re banotong kale katongo tar ueltadanar kalekinaleonene, bo God katongompe tere kila tatanon misiana kompe ka kila uoumpein Aron sioun.<sup>i</sup>

<sup>5</sup>Ter siokono kompe, Kristo ahik pah ke umatoto katongoin mare kale tar ueltad tar kotpokos a Patere Uleik. Bo ke kila katongompein God pare,

“Ingga a tuguo.

Daana ku kotpokoso inggo a Tamoumua.”

*Ker 2.7*

<sup>6j</sup>Kare kula poluk tar giameher butur pare,

“Ingga o turung patere dede tar mamang binakalik, misiana sira tang Melkisedek.”

*Ker 110.4*

<sup>7k</sup>Tar binaka ke uangoul Iesuane i kot inggono ke kirkiring uauleik keip tena lotu, kare dangata tutup tang God gere banotong uelkarus tur tatanono toro mat. God ke longor, teeit a tang longoro keip tun peono tar ueltada tang God. <sup>8</sup>Temaetit gitier tuna God pe Iesu ke ate tur toro longlongoro tar niduh ke huatameig. <sup>9</sup>Doh gitie ke longoro peon, kare uakuakeluk hihir tun tena nimalara God, ke kotpokosongua ter tengkanar uelkarus gere moko dede tar mamang binakalik tasir tamata gera longoro tatanon. <sup>10</sup>Temaetit God ke uatur uakalahara tatanon a Patere Uleik misiana sira tang Melkisedek.

### Ahik pah mu marapula kout tar tagorong mana tang Kristo

<sup>11</sup>Inggo a bureher ninamana ru marang meneig tar puhonene, bo a parakukuh puk tar uakalahara tamiuoum, teeit inggoum o mahang iate.

<sup>f</sup> 4.16 Hib 10.19    <sup>g</sup> 5.3 NKP 9.7; 16.6    <sup>h</sup> 5.4 KT 28.1    <sup>i</sup> 5.4 Bolobolong Kalekinaler Pater 16.6, 11-14; 9.7    <sup>j</sup> 5.6 Hib 6.20; 7.1    <sup>k</sup> 5.7 Mat 26.36-46; Pil 2.6-8

12<sup>1</sup>Inggoum kung ate manasa tang Iesu tar puhung barah, doh pakung ualasira manasa tasir gisiameh. Bo inggoum puk, mu uahingo harahampe me tamata tar ualasira baka poluk tamiuoum tar inete uleik uelhir gere uoto ate uakekenigir tamata tono uelhire God. Inggoum misiana tasir guamasitie ra huh puk tar huh, kara hik pah ra banotong ein tar niein pompomot. 13<sup>2</sup>Ge gisine pe ra inum tar huh misiana haraha tasir guam, doh ahik pah ka naman manate tar niualasirar kodkodoh. 14<sup>3</sup>A niein pompomot a eisisitir mahmahohououm res ninaman geke ate uoumis, kara banotong bang paroko tar huar uia ue a sa.

### Tagin getung punga kout

**6** 1<sup>1</sup>Temaeit inggeig i hiliu manasa tar uakikilanganar niualasir tang Kristo geke ualasira uakikilangaig tagigeig, kari la uain manasala i kotpokos a mahmahoho regi nitagorong man. Inggeig i uanua manasa tar uelueltapokise tar niualasir ki kale manasa uoumig, ahik pahi ualasira baka poluk tar hagaring uiuir liu tar niguata gere haijala toro mat, doh tar tagorong mana tang God. 2<sup>2</sup>Doha niualasir tar uahuu, doh tar tuha uapono keip tar limana tasir tamat, kara lotu keipis, doh tar nitua tapokis tur toro mat, doh tena nikedanga God tasir tamat e la dedein tar mamang binakalik. 3<sup>3</sup>Inggeig i la uain manas, ge teri turung guata manasa pe inggeig gete uahue God.

4<sup>4</sup>Gea mahang pe tunungua peono tasisit ka kalahara uoum tar luhur nang God, doh ka hagouo paroko tar inete uaia ke heir turuhagion i Heuen, doh ka kale pono tar labena Dedeil, 5<sup>5</sup>doh ka hagouo paroko hape ro uia to pela no uelhire God doh na nitampopokohor binakeit re turung lame. 6<sup>6</sup>A parakukuh tununguampe tasir tamatasina tar uiuir tapokis polukula tang God gete ka uatuka koutusina tar tagorong mana tatanon. Ahik tun! Teesina tera tina to polukula tang Iesu tar korose, kara uamatala toin tar matasir manai.

7<sup>7</sup>A bureher binaka re uoto durar huan, doha kot e uoto inum tananin, doh gete hua uaia tur me niein tar kotonin tar poul tasisit ka leba tar iom, God e turung guata uaianguampe toro mahar koto roon. 8<sup>8</sup>Bo gete tungara tur me uoho ueluelhung, doh me garasa uasa uelhir puk, o mahar koto roon o sangua ponompe, ahik pahi reh, kare ueluelde God toro mahar koto roon, o sa, karo turung luh uakapa tununguampe.

9<sup>9</sup>Ro bung uanotoug, gitie ring mene pe inggeim pagiare, inggeim ahik pah mi tagorong mana teil pare, mu uoto guatoum tar puhunin. Ahik, inggeim mi ate teil tun pare, inggoum mu uoto guata tar nipileser uiantiehe gere uahire tamiuoum o niuelkarus. 10<sup>10</sup>Ge God pe a tang

<sup>1</sup> 5.12 1Ko 3.1-3    <sup>m</sup> 6.6 Mat 10.22; Hib 10.26-27; 1Jo 5.16    <sup>n</sup> 6.8 Uak 3.17-18; Mat 13.7,22  
<sup>o</sup> 6.10 Hib 10.32-34

kedanga uelmatout. Inggon ahik pahe banotong malabobour hape kung kalekinale pemeoum tatanon, doh hape kung ualasira peoum teremi nimalauelhir tatanon, kung kaueke pe tosno tamaton misianeit rung guata haraha pe. <sup>11</sup>Inggeim mi malarantiehe tun tamiuoumur tang siok tang siok, tar petutup tar uelmalauelhir dedempesioum e tuka gete kapa nami niuangoul, marung ate tunoum tar haua kung tagorong mana teilig e turung kotpokoso noman. <sup>12</sup>Kara hik pah mi malara mu marapuloum, bo mu uakeluk sira tasisit ra turung kale tar haua ke ualapagahaig God, teeit ka uanguangoul hamas pe, kara tagorong man.

### A haua re ualapagahaig God e kotpokoso noman

<sup>13</sup>Sioun tar binaka ke ualapagah God tang Abraham, inggono ke uaman i ran tar guata tar haua ke ualapagahaig. Gitie ahik pe me tamatar i rana uain tatanon, inggono ke uamana katongo toin. <sup>14</sup>Inggono ke kula pare,

“Inggono u turung guata uaia nomana tun totomua,  
karu turung uabour mo bungumua mara burehentieh.”

*Uakeken 22.16-17*

<sup>15</sup>Abraham ke uanguangoul hamas, song ke kale tar haua ke ualapagahain God.

<sup>16</sup>Tar binaka ra ualapagahar tamat, gisina ra uamana tola tar tamatetier i rana uain tasisin, a puhung uamanon e uapopokoho tenas uelhiresin, kare tur tane tar uelperer. <sup>17</sup>Temaait God ke uamana katongo tolain mare uakalahara uaia tun tasisit ra turung kale uahiua tar haua ke ualapagahaion, kara hik pahe turung uapalih tena ninaman. <sup>18</sup><sup>p</sup>Inggono ke heir tokaha tena ualapagah, doh na puhung uaman ter toking puh rasina rasine ahik pah ura banotong uapalih, teeit a mahang pe tun pe tang God tar boh. Temaait inggeigene ri ualo uelhir keip tatanono tar niongolo tar kauek, i banotong kusa uanono tar inete ri tagorong mana teilin ka uamoko uamatotoin tagigeig.

<sup>19</sup><sup>q</sup>A nitagorong manon, gine ri kale teilieig misiana pah no otor iabeigigeig. E tur uanon, doha popokoh, dohe hikula toro mahar gomono gero kusa uaouo tar butur ger dedeilintieh iuma tar umang lotu ger dedeil. <sup>20</sup>Iesu ke leka manasa uoumula tar buturuon, e la manasain tar poul tagigeig. Doh inggeig ke kotpokoso manasa nagi patere uleikeig tar mamang binakalik misiana sira tang Melkisedek.

---

<sup>p</sup> 6.18 Aha 23.19 <sup>q</sup> 6.19-20 NKP 16.2-3

### Mai tunuonene Melkisedek?

**7** <sup>1</sup>Inggonene Melkisedek tenas toiar uan uleik i Salem, doh na patere pono God ger i ranantieh. Tar binaka re lang tapokis manasa Abraham tena uan, i muduhia ke uoumuoum teil pe tar uiliatung tasir tang toueitir toia, Melkisedek ke ueltupara kout tatanon, kare lotu tang God tar heir tar nitampopokoho tatanon. <sup>2</sup>Song ke pakaha Abraham tar mamang inetelik ke kale turig tar uiliatung, kare heir tar sisisiokor hangaul ro mahar tar inete tang Melkisedek. (A tengkanar hangonene “Melkisedek” e kula pare, “A Toia ger Kodkodoh.” Doh gitie nas toia pono per Salemon, hanganon e kulangua pono pare, “Na toia ro hiarou.”) <sup>3</sup>Ahik uadeil me puh re uahire teil ge para to tinanon ue a to taman ue mo bungun. Kara hik mena marein ke uakekene pe ue mena uadouhinar marein tena niuangoul. Inggono misiana tar Tuna God, e uangoul dede sir a patereng tar mamang binakalik.

<sup>4</sup>Ingga o bang parokonguampe hape re i rana peon, ge Abraham pe ge tubugigeig ke heir tatanono tar sisisiokor hangaul ro mahar tar mamang inetelik ke kale turig tar uiliatung. <sup>5</sup>Doh gisis ro bunguna Libai gesir niuamatoto tar uoho tenas kalekinaler pater, a ualatut e kula tasisina tar kale tur tar sisisiokor hangaul ro mahar tar mamang inetelik tasir tamat, gitiempe o tahisilik pesina tasisin, kara tamas tokah tang Abraham. <sup>6</sup>Bor tamatene, Melkisedek, ahik tagu pahe uangoul teil toso bunguna Libai, doh ke kale tur tar sisisiokor hangaul ro mahar tar mamang inetelik tang Abraham, kare lotu tang God tar uatampopokoh, dohe guata uaia tar tamatener niuamatoto tar ualapagah. <sup>7</sup>Inggeig i ate tun pare, a tamata ger i kot, e guata uaiainir tamata ger i rana uain.

<sup>8</sup>O patere ra kale tar sisisiokor hangaul ro mahar tar mamang inetelik, gitiempe o tamata puk pono pesin gera uangoul baka puk, kara turung mat. Bo Melkisedek geke heirin Abraham ro mahara tar mamang inetelik, e uangoul dede kompela misiana ro kula pe no uelhire God. <sup>9</sup>Inggeig i banotong kulangua tang Libai pare, inggono ke kale tar mahar mamang inetelik, kare heir turungua ponompela tar binaka ke heir Abraham toro mahara tar mamang inetelik tang Melkisedek, <sup>10</sup>ge tar binaka pe ke ueltupar Melkisedek tang Abraham, Libai e uangoul teil haraha tar tukununa Abraham gere turung uatubunuion.

<sup>11</sup>Ge pakene ke kalkalekinale hihir tun nas kalekinaler patereng Libai doh Aron, e uakeluk to tena nimalara God, geter nas tun per ualatut, paka hik baka poluk mo kahakahar pater ra kotpokos. Bo ae

<sup>r</sup> 7.1-3 Uak 14.17-20    <sup>s</sup> 7.5 Aha 18.21

maene ke malara God me tamat e la tur tang Melkisedek, kara hik pah me tamata re la tur tang Aron?<sup>t</sup>

<sup>12</sup>Ge tar binaka pe re uapalih nas niguatar pater me uapalih tar ualatut kae ponin. <sup>13</sup>Ge a tamata peene ri menmeneig e uangoul teil toro matina siok, doh ahik ro tahinalik pah ra banotong kalekinale to i rana toro olta. <sup>14</sup>A puhon a kalahara tenagi Tamata Nomaneig ke la tur pe toro matina tang Juda, doh toro matina roon, Moses ahik pah ke mene me puh tasisin e lain tasir pater.

### Melkisedek a niuamisiana to tang Kristo

<sup>15</sup>A puh uakapaninane a kalahara uainingua, teeit a tang giameher patere ke kotpokosoh manasha misiana tang Melkisedek. <sup>16</sup>Inggon ahik pah ka uapatere keipin menas ualatohor tamat ue me ualatut, bo ka uapatere keip turin tena nitampopokoh, doh na niuangoul gere moko dede tar mamang binakalik. <sup>17</sup>Ge no uelhire pe God o kula pare,

“Ingg a o turung patere dede tar mamang binakalik,  
misiana sira tang Melkisedek.”

*Ker 110.4*

<sup>18</sup>Na ualatut Moses ka uamoko liu manasaig, teeit ginin ahik mena nitampopokoh, kara hik mena kalekinale. <sup>19</sup>W a ualatutunin ahik pah ke banotong uauauia hihir tasir tamat. Bo daan inggeig ki tampopokoh, ri tur uanono keip pe tar nitagorong manar uia uain gere ueliu uahuhut tagigeig tang God.

<sup>20</sup>Tar mene ualatumana tar puhonene, God ke uaman i rana tar binaka ke uapatere tang Kristo. Tar binaka ka uapatere meisir gisiamah, ahik uadeil me ualapagah tagu. <sup>21</sup>W Bo Iesu ke kotpokos a patere tar hagarang ualapagaha tar binaka ke kula God tatanono pare,

“A Tamata Nomana ke uaman i ran.  
Ahik pahe turung uapalih tena ninaman.  
Ingg a o patere dede tar mamang binakalik.”

*Ker 110.4*

<sup>22</sup>W a puh ke uagiamehe sioko tar ualapagahene ra menmenein, e ualasira tagigeig tang Iesu ter tamatar uiantiehe tar kaukeke tar uelhoteonener uia.

<sup>23</sup>A giameher puh re uagiamehe sioko tar pensiounur uelhote, doha timuhur uelhote, tesir patere gera uangoul teil tar pensiounur uelhote, o bureh. Tar binaka re mater tang siokor pater teke tuka na kalekinaleon, kara tang giameh e turung kale palih tena hagarion. <sup>24</sup>Bo Iesu teeit

<sup>t</sup> 7.11 Aron a tubuna Libai    <sup>u</sup> 7.14 Ais 11.1; Mat 2.6; UGO 5.5    <sup>v</sup> 7.17 Hib 5.6

<sup>w</sup> 7.19 Hib 10.22; Jas 4.8    <sup>x</sup> 7.21 Hib 5.6    <sup>y</sup> 7.22 Hib 8.6; 12.24

re uangoul dede pela, inggon e uangoul dedenguampe a patereng tar mamang binakalik. <sup>25</sup>Temaeit daan, doh tar mamang binakalikimpe, inggon e banotong uelkarus turunguampe tatan tasisit uakapa tun ra lame tang God tur tar hangan Iesu, teeit re uangoul dede peono tar dangata ueleheir tang God tasisin.

<sup>26</sup>Inggono ter paterer uleik ri uahingaieig, teeit inggon a dedeil, kara hik pah ke guata uasa me inet, doh inggon a niuatur liu sioko tasir tamatang guata tar niguata uasa, ka uairana uainin tar mamang ineteliking Heuen. <sup>27</sup>Inggon ahik pah misiana tasir gisiamer patere geke heirheir tar uahung tar mamang mareinilik, ra uakikilanga keip teresir niguata uasa, song res niguata uasar tamat. Kristo ke heir tena uahung tar siokon siounur binak e la manasain tar mamang binakalik tar binaka ke heir katongoin a uahung. <sup>28</sup>Ge na ualatut pe Moses e uamatoto tasir patere uleik ge ahik paho deldelauana hihir uakapa tun, bor ualapagah puk geke lame i muduhia tena ualatut Moses, ke uamatoto tar tuna God ger delauan uakapa tun tar mamang binakalik.

### Iesu tenagi Patere Uleikeig tar timuhur uelhote

**8** <sup>1</sup>Ter tengkana tunur puh ru marang meneio te gine, inggeig nag i Patere Uleik e tabila tar pang mua tono tabtabilar toia o nang God ger i ranantiehe tun. <sup>2</sup>Nagi Patere Uleikeig e kalekinale to tun tar butur dedeilon tar taluhung lotu ger man geke tuhainir Tamata Noman, ahik pah ke tuhain me tamat.

<sup>3</sup>O patere uleik uakap o niuamatoto tar heir tar inete uaia gera heirinir tamat a uahung, karo inetesisier tua tang God. Temaeit nag i Patere Uleikeig pake heir pono me inet e lain pare, na uahungon. <sup>4</sup>Bo ge pake uangoulon i kot, inggono paka hik tun paha pater, ge o patere uoum pesis ra heir tar uahung re uahingo pe nas ualatutur Ju. <sup>5</sup><sup>b</sup>A kalekinale ra tuhainisin gitier patere pe, a niuamisiana to puk tar haua re mok i Heuen. Ter siokono kompe tena binaka Moses, tar binaka ke marang tuha manasano tar taluhung uelhote, God ke kula uapopokoho tatanono pare, “Namana uanono tar guata sira tun tar mamang inetelik misiana ko banga to pe ka ualatoho to peia i rana tar siusan i Sainai.”

<sup>6</sup>Bo gine puk daan, Iesu ka heir manasain tena kalekinaler pater ger i ranantiehe uain tar nasisin, te misiana kompe tar uelhote ger uiantieh, teeit re tengkana tur pe tar inete uaiantieh ger niualapagah.

<sup>7</sup>Ge pakene ahik me inete ke sa sikoro tar uakikilanganar uelhote, paka hik baka poluk me giamer uelhote ra uahingain. <sup>8</sup><sup>d</sup>Bo God ke banga tar ineter sa tasir tamat, temaeit ke kula pare,

<sup>z</sup> 7.25 Roum 8.34    <sup>a</sup> 7.27 Hib 5.3    <sup>b</sup> 8.5 KT 25.40; Kol 2.17; Hib 9.23    <sup>c</sup> 8.6 Hib 7.22

<sup>d</sup> 8.8-12 Jer 31.31-34

- “Bang! A marein gine manasa re lame teke kula per Tamata Noman geru turung guata keipio tar timuhur uelhote tasir tamatang Israel doho Juda.
- <sup>9</sup> Inggon ahik pahe turung siokono sira tar uelhote geku guata keipio toso bungususina tar binaka ku kusa inggo tar limasisin, karu uoum keip tauete tun tasisin i Isip. Gisin ahik pah ka uangoul uaia keip tar uelhoter noguo, temaeit ku bangan dukuo tasisin, teke kula per Tamata Noman.
- <sup>10</sup> Gine ter uelhote, geru turung guata keipio tasir tamatang Israel i muduhia tar mareinene, teke kula per Tamata Noman. Inggou u turung uamokola tenag ualatut teres ninamanasin, karu bolo uahiuala tananin tar koloususin. Inggou nas turung Godosin, doh gisina ra turung kotpokoso nogo tamato.
- <sup>11</sup> Doh ahik baka poluk me tamata ra uahingain tar ualasira tang uanotono tar Tamata Noman, teeit o tamata uakapa ra turung siokor ate totoguo, e uakekene keip tasir tatamatalik, e la uatuka tasir tamatar tohangas.
- <sup>12</sup> Ge inggo pe u turung kusa luara teres niguata uasasin, kara hik pahu turung namana huara baka poluk tananin.”

*Jeramaia 31.31*

<sup>13</sup> Gine ra kilang timuh peinir uelhoteene, God ke uapensioun tar uakikilangan. Doha huar inete geke pensioun, kara hik mena kalekinale, ahik pahi rehe, kare turung rou.

### Na ualatohor lotu tar uelhote ger pensioun

**9** <sup>1</sup> Gaat tar uakikilanganar uelhote i uantinanina tang God, doho Israel, a to ualatutun hape tar hagaraing lotu, doha buturung lotu to ponompe a nituhan tamat. <sup>2</sup> I lolono tar taluh, a niuatine kout tar torikir tine um. Giner uakikilangan ra kilain a Butur Dedeil. Tar buturuon o toko ro lam doha patehe na ro bereit gero niuadedeil. <sup>3</sup> <sup>f</sup> Umahia tero kusa ro mahar gomono obot, dohi muduhia tero mahar gomono roon ter tine umeit ra kilain a Butur Dedeilintiehe tun. <sup>4</sup> <sup>g</sup> Tar buturuon o moko ro olta ra uoto ualuh toigir adua, <sup>h</sup> doha bokisinar uelhote e tok a niuahail tane keip uakapa tar goul. I lolono tar bokision e moko teilir nouh a goul

<sup>e</sup> 9.1-2 KT 25.23–26.30    <sup>f</sup> 9.3 KT 26.31-33    <sup>g</sup> 9.4 KT 16.33; 25.10-16; 30.1-6; Aha 17.8-11; Ual 10.3-5    <sup>h</sup> 9.4 A ‘insens’ a muhung adua

uakap a niongolar bereit geke heirig God tasir Israel ra kilaig “a mana,” doh no tukana pono Aron geko tiuan, karo tokino mahar palau gero tokino nibololar ualatut. <sup>5</sup>I ranahia tar bokis ura turur toking anggelou, a toking goul uakap, ura uahire e uangoul God tar buturuon, a ra titiauas rasin e uamomolouina uahiuako tar matanar bokis, a buturuon ra kale liu toigir niguata uasa. Bo gine puk daan, ahik me binakang uahuahire hihir tar mamang inetelikinanine.

<sup>6</sup>Tar binaka ka uamokoigir mamang inetelik pagiare. O patere ra lekela tar uakikilanganar tine um tar mamang binakalik tar guata tenas lotu. <sup>7</sup><sup>k</sup>Bo ter patere puk manasampe ger uleik, tere lekela tar uatorikinar tintier dedeilintiehe tun tar siokon siounumper binak i lolono toro sioko ro krismas. Inggon e kale keip tagu dede tar deuating gere la heirigion a uahung tang God e lain tatan, doh teres niguata uasar tamata ge ka pesiauaig. <sup>8</sup>A Iabena Dedeil e ualasira to tar mamang inetelik ka uamoko uelhir peig pare, tar binaka re toko harahar uakikilanganar tine um, a lelung lekela tar Butur Dedeilintieh halan ta puka ueleheirin tagigeig.

<sup>9</sup><sup>l</sup>A mamang inetelikinanine a niualasira to puk, e uahire me tagigeig tar ineteng daan. E kula sirar puhono pare, a inete uaia, doha uahung ra heirigir tamata tang God, ahik pahe banotong uadelauana tar koloususit ra la lotu. <sup>10</sup>Doh gitie ra guata keip puk pesina tar niein, doha inum, doha giniamhemper hagarang uadelauan, gininanine a siokor ualatutung gane i kalaharahia puk tar tukununar tamat gera uakeluk pukig e tuka tar binaka re guata God tena timuhur niuangoul.

### A deuatingina Kristo ter uiantieh

<sup>11</sup>Temaait Kristo ke la manasaha, inggono ter Patere Uleik geke keip pokoso tar ineter uia tagigeig gere moko manasa daan. Inggono ke leke tar taluh i Heuen ger uleik, kara uiantiehe uain tena taluh Moses, ahik paha nituhang tamat, kara hik paho maharang gane i kot. <sup>12</sup>Tar binaka ke haijala Kristo tar taluhon, ke leke uasiokon siounumpela tar Butur Dedeilintiehe tun e la manasainir siokor binakono tar mamang binakalik. Inggon ahik pah ke kale me deuatinginar meme ue me kau kalan tar heir tar uahung, bo ke kale tar deuatingina katongo mare uelkarus keip tagigeig tar mamang binakalik.

<sup>13</sup><sup>m</sup>A deuatingisir meme, doho kau makan, doha taunar kau tinana ra kirkirasaig tasir tamata ge ahik paho delauan, ginin e uadelauan puk tar tukunusisin tena nibangar ualatut. <sup>14</sup><sup>n</sup>Doh gitier mana per puhene, namana ah ter nitampopokoh uleikintiehe ter deuatingina Kristo tar uadelauana tar kolougigeig, mari kalekinaleig tang God ger tua. Ge tena

<sup>i</sup> 9.5 KT 25.18-22    <sup>j</sup> 9.6 Aha 18.2-6    <sup>k</sup> 9.7 NKP 16.2-34    <sup>l</sup> 9.9 Hib 10.1-2

<sup>m</sup> 9.13 NKP 16.15-16; Aha 19.9,17-19; Hib 10.4    <sup>n</sup> 9.14 1Pi 1.18-19



nitampopokoho per Iabena Dedeil gere moko dede tar mamang binakalik, Kristo ke heir katongoin a uahungeitier delauana tun tang God.

<sup>15</sup> Temaeit Kristo teke kaleuatoro tar timuhur uelhote mara kalesit ke kilais God tar niguata uaian tar mamang binakalik geke ualpagahain God. A puhonene e banotongua ra guatain, teeit tono mata Kristo mare bulaua tapokis tasir tamata tenas niguata uasa ka guataig tar binaka ra uangoul harah i kukulebananga tar uakikilanganar uelhote.

<sup>16</sup> Toro mana tun, binaka ra guatainir uelhote sira pare, misianangua geta boloin ro mahar pepang kale uahiu tena ineter tamat gere mat. Ter hauon, a tamatene re bolo toro pepa e marang uahire teil mais ra turung kale uahiu tena inetono tar binaka re mat. <sup>17</sup> Ge o pepa pe o tabo tengkan tar binaka re tua harahar tamat, o la kalekinale uapopokoho to puk i muduhia gete mata bakar tamat.

<sup>18</sup> Temaeit ke tampopokohor uakikilanganar uelhote, teeit puk ka uatampopokoho keip peig tar deuating. <sup>19</sup> °A uakikilanganar inete ke guatain Moses, ke uahire baka uoum tasir tamata tar mamang ualatutulik ka bolo uahiuag. Song ke kale tar deuatingisir kau makan, doho meme, kare uelhouar keip tar kodom, kare kirasa hahai i rana toro bukung tar ualatut, doho tamata uakap. Inggono ke kirkirasa keip tar randoudoukulik ra kilain o hisop, a niauih tar puhung uoho kubkubar.<sup>p</sup> <sup>20</sup> Song ke kula pare, “Gine ter deuatinginar uelhote ke guata keipin God tamiuoum tar uakeluk.” <sup>21</sup> °Kare guata poluk tar siokono komper hagar, ke kirasa hahai poluk tar deuating tar taluh ger dedeil, doh tar mamang inetelik ra uoto lotu keipig. <sup>22</sup> °Toro mana tun re hire teil per ualatut, a mamang inetelik ke uahutung siokor delauana uadeil puk manas, ka uadelauana keipeig tar deuating. Geta hik mo deuating ro tading, ahik ponompe God pahe kusa luara tenas niguata uasar tamat.

### A deuatingina Kristo e kale liu tar niguata uasa

<sup>23</sup> °Temaeit a taluhung gane tar kot, doha mamang inetelik re moko teil tatanon, a nibanga to puk tar ineteng Heuen, kara uadelauana keipig tar deuatingisir inetesisier tua. Bor ineteng Heuene tun ra uadelauana keipig tar uahung ger uiantiehe uain tar deuatingisir inetesisier tua.

<sup>24</sup> Ge Kristo pe ahik pah ke lekala tar Butur Dedeil ke tuhain me tamat ger nipetut sira tatanoneit tun. Bo ke leke tunumpela i Heuen tar butur re uangoul God, tar kale tenagi hagareig. <sup>25</sup> Nas patere uleikir Ju e leke keipila tar deuatingisir inetesisier tua tar Butur Dedeilintiehe tar mamang krismasilik. Bo Kristo ke leke pela ahik pah ke heirheir uapoul taguin a uahung. <sup>26</sup> °Ge pake te pagiaron, inggono pake matmate uapoul tur ke

° 9.19-20 KT 24.6-8    ° 9.19 A puhung uohene a nituha keip tar ulunar sipsip

° 9.21 NKP 8.15,19    ° 9.22 NKP 17.11    ° 9.23 Hib 8.5; 10.1    ° 9.26 Hib 10.10

uakekene pemer kot. Bo ahik puk, inggono ke la uasiokon siounumpeha e la manasainir siokor binakono tar mamang binakalik tar binakene re me uelmatout tunur mamang inetelik, tar kale liu keip tena nitampopokohor niguata uasa tagigeig tar uahung ke guata keipin tono mat.

<sup>27</sup>God ke uamoko uamatoto tasir tamata uakap ra mata uasiokon sioun puk, dohi muduhia e kedangono tasisin. <sup>28</sup>Te misiana kompe, Kristo ka heirin a uahung tar siokon sioun pukur binaka tar kale liu tenas niguata uasar bureher tamat. Inggon e turung tapokis polukuha ahik pah tar me kale liu tar niguata uasa, bo tar me uelkarus tasisit ra uanguangoul uahingo tatanon.

**Kristo ke heir uasiokon siounin a uahung e lain tar mamang binakalik**

**10** <sup>1</sup>A niguatar pensoun tena ualatut Moses ngohina paha niualasira to puk tar ineter uia re turung lame, ahik pah ter inete tun. A uahung ka guataig tar niguatar pensoun ka guatguata uapoulig tar mamang krismas, bo ahik puk pah ke banotong guata me puh tar uadelauana hihir tun tasisit ra lame tar lotu. <sup>2</sup>Ge pako delauana nomanar tamatasit ra me lotu tang God tenas niguata uasa, paka hik baka poluk pah ra matala keip tenas niguata uasa, doh pake tuka manasar guata tar mamang uahungulik.

<sup>3</sup>Bo tar uahungionene ra uoto guatain tar mamang krismas e uoto uanamana tapokis puk tasir tamata teres niguata uasa. <sup>4</sup>“Ge ahik per deuatingisir kau mesir meme pahe banotong kale liu tar niguata uasa. <sup>5</sup>Temaet tar binaka ke uahuhutung la manasaha Kristoane tar kot, inggono ke kula tang God pare,

“Ingga ahik paho malara tasir inetesisir tua ra heiris a uahung, doha ineter niheirheir puk.

Bo ko kaleuatoro tanika puk totoguo tar me kale tar tukunug.

<sup>6</sup>Ingga ahik paho uaha tasir inetesisier tua gesir niualuh uaududeil toro olta ue tar uahung gere kale liu tar niguata uasa.”

<sup>7</sup>“Song ku kulo pare, ‘Nagu God, bang!

Inggo gine, ku laha tar me tuha tar haua ko malauelhiria teka bolo sira peio toro buk.’ ”

*Ker 40.6-8*

<sup>8</sup>Uakikilangan, Kristo ke kula pare, “Ingga ahik paho malar, kara hik paho uaha tar uahung gera guata keipig tasir inetesisir tuar niualuh to toro olta, doha uahungung tar kale liu tar niguata uasa.” (Gitiempe ra heir peigir uahung re kula pe na ualatut Moses.) <sup>9</sup>Song ke kula

<sup>u</sup> 10.4 Hib 9.13

pare, “Nagu God, bang! Inngo gine, ku laha tar me tuha tar haua ko malaelhiria.” Temeait God ke uakapa liu tar uahung ger pensioun, kare uamoko palihila tena uahung Kristo. <sup>10</sup> Tteeit Iesu Kristo ke guata tar haua ke malaelhirin God. Temeaitingua ka siokor uadedeil turusieig tar niguata uasa tar uahung geke guata keipiono tar tukunun tar siokon siounur binak e lain tar mamang binakalik.

<sup>11</sup> W<sup>i</sup> lolono tar pensiounur uelhote, o patere uakapa ra uoto tur i uoum toro olta tar mamang mareinilik ra uoto heir pe tar siokonor uahung gera heirheir uapoulin, kara hik pahe uoto kale liu baka tar niguata uasa. <sup>12</sup> Bo Kristo puk, ke heir tar siokon siounur uahung tar niguata uasa mare lainir siokor binakono tar mamang binakalik, song ke la tabila tar pang mua tang God. <sup>13</sup> x<sup>\*</sup> Tar buturuon inggon e uanguangoul e tuka geta touahiuais no uelmatanon i kukulebanga tar kekenon. <sup>14</sup> Tar siokon siounumper uahungon, inggono ke uadelauana hihir tunungua tasir tamatasit re uadedeilis.

<sup>15</sup> A Iabena Dedeil ke hire pono tagigeig tar puhene, uakikilangan inggono ke kula pare,

<sup>16</sup> y<sup>“</sup> Gine ter uelhote geru turung guata keipio tasir tamatang Israel, i muduhia tar binakene teke kula per Tamata Noman. Inngo u turung uamokola tenag ualatut tar koloususin. Karu turung bolo uahiuala tananina teres ninamanasin.”

*Jeramaia 31.33*

<sup>17</sup> “Doh nas niguata uasasin, doha mamang niguatalikinitier sa ka guataigisin, inggo ahik pahu turung namana huara baka poluk.” *Jeramaia 31.34*

<sup>18</sup> Doh geta nikuse luara manasanin, ahik baka poluk me puh ra uahungain tar guata me uahungunar niguata uasa.

### Ti la uahuhut tang God

<sup>19</sup> z<sup>“</sup> Temeait, ro bung uanotoug, inggeig i banotong uaongolosieig, kari lekela tar Butur Dedeilintiehe tun i Heuen, teeit toro deuatingina Iesu. <sup>20</sup> a<sup>“</sup> Tono maton, Iesu ke puk ueleheir tagigeig tar leler timuh gere heir tar nitua. A lelone e haijala toro mahar gomom tar tine um ger dedeilintieh tun.

<sup>21</sup> Doh gitie nagi Patere Uleik peeig gere uoum keip tosno tamata God, <sup>22</sup> b<sup>“</sup> inggeig i me uaongolosieig tar la uahuhut keip tar kolougig tang God, doha nitagorong manar uleik. A kolougigeig a nikirasa liu tar niguata

<sup>v</sup> 10.10 Hib 9.12    <sup>w</sup> 10.11 KT 29.38    <sup>x</sup> 10.13 Ker 110.1    <sup>y</sup> 10.16 Hib 8.10

<sup>z</sup> 10.19 Hib 4.16    <sup>a</sup> 10.20 Mat 27.51    <sup>b</sup> 10.22 NKP 8.30; Isk 36.25; Epe 5.26

uasaniner ualamatala tun toro deuatingina Iesu, doha tukunugigeig a niuahuhu tar kodom ger delauana tun.

<sup>23</sup>Inggeig i kale uanono tar haua ri tagorong mana teilin geri uelhire tauetein, ahik pahi uaruara naman, ge God pe e uamana tena ualapagah. <sup>24</sup>Namana me hagar ri banotong uatentur keipin tar uelpoule tar ualasira tar uelmalaelhir, doh tar guata tar niguatar uia. <sup>25</sup><sup>e</sup>Ahik pahi uakenua tar uiliodout misiana ka guata uoum per gisiameh, bo paki ueluaongole dedeseig. Guata ualatataunula tar puhunin ri banga to pe tena mareinir Tamata Noman e la uahuhutume.

<sup>26</sup><sup>d</sup>Bo geti uakuakelukeyig teregigir nimalar tar guata pukula tar niguata uasa ki kale baka pe toro man, ahik baka poluk me giameher uahung re kale liu tar niguata uasanin. <sup>27</sup><sup>e</sup>Bo ter puh puk manasa re mok te tar uanguangoul keip puk manasainir nisokoro tar nikedangeit re lame, doho tukuno hue gero turung mamantouo tasisit ra uelmatana tang God. <sup>28</sup><sup>f</sup>Gete mahang longoro me tamata tar uakeluk tena ualatoho Moses, ahik pah ra ueldolomoin, bo ra tung pousin. A puhon ra guatain geta tang torik ue a tang touon ura tur keip. <sup>29</sup><sup>g</sup>Bo hapengua tasisit ra banga uasa tar Tuna God, doh ka ngongo sira tar deuatingina Kristo paha iinetelik puk, kara hik paha dedeil. A puh peono teke uadelauana liu tatanono tar niguata uasa. A tamatonene ke uelsigala tar labena Dedeil gere keip teil tena niueldolomo God. Namana aha hape re turung uleik per niduh ra kaleinisin! <sup>30</sup><sup>h</sup>Ge inggeig pe i ate teil te God pe ke kula pare,

“A pe hahauanar niguata uasa nag kalekinaleo,  
inggo katongo uoumumpe ru turung pe hahau.”

Kare kula poluk pare,

“A Tamata Noman e turung kedanga tosno tamat.” *Ualatut 32.35-36*

<sup>31</sup>A ualasokorong maluana tun gete uabang manate God Ger Tua tar tamat.

<sup>32</sup>Namana tapokis tar haua ke kotpokoso tamiuoum sioun, binaka kung ate uakekene tang Kristo. Hape kung huata bolongur pe me tar niduh, gitiemper niduh uleik tun penin. <sup>33</sup>A binaka inggoum ka mene uasa tosium tasir manai, kara heirisium tar niduh. Kara binaka kung uahueoum tar tur keip tasisit ka guatais pare. <sup>34</sup><sup>i</sup>Kung huata keip tagu tar niduh tasisit ka bakalais tar karabus. Tar binaka ka kale liu turig nami hauoum tatamiu, inggoum kung uahue keip tar niuah. Teeit rung

<sup>c</sup> 10.25 Hib 3.13    <sup>d</sup> 10.26 Hib 6.4-8    <sup>e</sup> 10.27 Ais 26.11    <sup>f</sup> 10.28 Ual 17.6;  
19.15    <sup>g</sup> 10.29 Mat 12.30-32; 1Ko 11.27-29    <sup>h</sup> 10.30 Ual 32.35-36; Ker 135.14  
<sup>i</sup> 10.34 Mat 5.11-12; 6.20

ate teil pe pare, a namiuir inete ke ualapagahaig God, a inetenin auia uainintieh, dohe moko dede tar mamang binakalik.

<sup>35</sup>Ahik pah mu marapula kout tar tagorong mana tar Tamata Noman, ge gitie pe getung uatampopokoho dedempelasium, inggoum mu turung kalengua tar uleikir bulauamiu. <sup>36</sup>Inggoum pakung uangangoul hamas mare getung guata inggoum tar haua ke malarraig God, inggoum mu banotong kale tar haua ke ualapagahagion. <sup>37</sup>Ge no buk pe God o kula pare,

“Ahik pahi reh, kare lamer tamata gere turung kotpokos,  
inggon ahik pahe turung tur uangoul bak.

<sup>38</sup>Doha tamatar kodkodoh e turung tua to tar nitagorong man.  
Bo gete tur tapokis me tamat,  
inggo ahik pahu turung uauaha tatanon.”

*Habakuk 2.3*

<sup>39</sup>Bo inggeig ahik paho tamatang tur tapokis, ahik pahi la i Hel, bo inggeig o tamatang tagorong man ka uauailisieig.

#### A tengkana tar nitagorong man

**11** <sup>1</sup>A niguatang tagorong mana te pare, inggeig i ate uaia tun tar mamang inetelik ri uangangoulig tar kale, inggeig i turung kale nomana tananin. Gitiempe ahik peeig pahi bang huara tar inetenin, bo i ate tun pukumpe pare, e turung kotpokosonin. <sup>2</sup>Ge teres nitagorong mana per tamatang sioununtieh, temaeit ke me uaha God tasisin.

<sup>3</sup>Inggeig ki tagorong mana puk, temaeit i naman manate tar mamang inetelik i ran, dohi kot a nitouo keip tono uelhire God. Temaeit a haua ra banotong bang huarain ke kotpokoso tur tar inet ahik pah ra banotong bang huarain.

<sup>4</sup>Abel ke tagorong mana puk, maeit ke heir tar uahung tang God auia uain ter nang Ken. Tena nitagorong manon, inggono ke heiringua tar niuaha tang God, kare kilangua God tatanon, a tamatar kodkodoh. Abel ke mat bo na nitagorong mana pukuon e ualasira harahampe a haua tunur nitagorong man.

<sup>5</sup>Misiana tang Enok, ke tagorong mana puk, maeit ka keip taroin i Heuen, ahik pah ke mata tagu, kare la tabo ualutarain, teeit God ke kale tatanon. Bo tar binaka puk halanono te la kai, inggono ka mene uaiain ke uauaha pe tang God. <sup>6</sup>Ge gitie pe geta hikir tamata mena nitagorong man, e banoto leue tununguampe tar uauaha tang God. Gete me tamata re marang la tatanon, pake tagorong mana tang God e uangoul, kare uoto heir tar bulauan tasisit ra sir uelhir tun tatanon.

<sup>j</sup> 10.37-38 Hab 2.3-4 <sup>k</sup> 11.1 2Ko 5.7 <sup>l</sup> 11.3 Uak 1.1; Ker 33.6; Jon 1.3

<sup>m</sup> 11.4 Uak 4.3-10 <sup>n</sup> 11.5 Uak 5.21-24

<sup>7</sup>Noa ke tagorong mana puk, maeit ke uakeluk uelhir ke uatagin pe God tar inete re turung kotpokos i uoumuhia ge ahikiono pah ke banotong bang huar. Inggono ke longoro tang God, kare tuha tar parau geke banotong poul tasisina ro matmatame. O matmatame matmatang ione keip toso bung tus o niuelkarus. Noa ke tagorong man, maeit ke ualasinguaono tasir tamatang tar koto uakap ge ahik pah ka tagorong man, ka guata uasa pe. Ke kotpokosonguaon a tang sioko pono tasisis ka uakodkodoho keipis tang God tar nitagorong man.

### Abraham me Sara

<sup>8</sup>Abraham ke tagorong mana puk, maeit ke uakeluk tang God tar binaka ke kila tatanono tar la tar giameher uan geke ualapagahain God tar heir tatanon. Abraham e tel ia re la, bo ter nitagorong mana kompe, maeit ke hiliuiono tena uan, kare la. <sup>9</sup>Doh inggono ke tagorong mana puk, maeit ke uangoul sirono tasir pokoso tar pang uan ke ualapagahain God. Inggono ke uangoul toro pangpang taluh o nituha keip tar kapokousur meme. Aisak me Jekop ge kura kale tar siokonor ualapagah, kura uangoul ponome toro taluh sira pare. <sup>10</sup>Ge Abraham pe ke bangbangala i uoum, kare uangoul uahingo tar uan uleik gere moko dede tar mamang binakalik geke namana tanikain God tar tuh.

<sup>11</sup>Sara a bouh, bo ke tagorong mana puk e turung guata God tar haua ke ualapagahain, song ke to tun. <sup>12</sup>Gitiempe ke horong mahoho tun pe Abraham, bo tar tang sioko pukur tamatono ka bour turur burehentieher tamat, ka burehentiehe sira tasir pitopitosinaha tar langit, doh ka burehentiehe sira tar iononiko i teh ge ahik me tamata re banotong ah.

<sup>13</sup>O tamatasinasine ka mata tun puk, ahik pah ka peng kale baka tar haua ke ualapagahaig God tasisin, ka bangala i uoum tananin, doh ka tagorong mana teil e turung kotpokosonin, kara uaha uangoul tananin. Gisin ahik pah ka matala tar hire tauet o pokoso pe, karo tamatang uangoul uakaloto baka pukane tar kot. <sup>14</sup>O tamata gera kula tar puhuninanine ra uakalahara pare, ra sirsir me pang uan ra banotong kulainisin a nas. <sup>15</sup>Ge paka menmene uatuha tosina tar pang uan ka la turin, paka banotong tupara me lelung uelhir tapokis. <sup>16</sup>Bo gisina puk ka sirsir tar pang uan uaiantieh, a uan i Heuen. Temaeit God e ualasira pare, ahik pahe matala ra kila pesina tatanon, nas God. Teeit ke kaleuatoro manasa pe tenas uan uleikisin.

<sup>17</sup>Abraham ke tagorong mana puk maeit, ke tangan tar heir tang Aisak ger tunono pare, a uahung tar binaka ke uedanga God tatanon,

---

° 11.7 Uak 6.13-7.1    p 11.8 Uak 12.1-5    q 11.9 Uak 35.12    r 11.11 Uak 18.11-14; 21.2; Roum 4.19    s 11.12 Uak 15.5; 22.17    t 11.13 Uak 23.4; IOUTT 29.15; Ker 39.12; 1Pi 2.11  
 u 11.17-18 Uak 21.12; 22.1-14

doh Abraham te geke kale tar ualapagah, kare heir tar tang siokon siounur tun. <sup>18</sup>God ke kula tatanono pare, “Tang Aisak tera turung bour tur ro bungumua geku ualapagahasio.” <sup>19</sup>Abraham ke namana tang God e banotong uatua tapokis tur tang Aisak toro mat, doh tar nibang, Abraham ke kale tapokis nomanampe tang Aisak ngohina tar tamatetie ka uatua tapokis turin toro mat.

### Aisak mes Jekop doh Josep

<sup>20</sup>“Aisak ke tagorong mana puk, maeit ke mene hape re turung guata uaia pe God tas Jekop me Iso, gitila i uoum.

<sup>21</sup><sup>x</sup>Jekop ke tagorong mana puk, maeit tar binaka ke uahuhutung mata peon, inggono ke mene tanik tar niguata uaia re turung kotpokoso tar toking tuna Josep, inggon e honoin toro tukana re lotu pe.

<sup>22</sup><sup>y</sup>Josep ke tagorong mana puk, maeit tar binaka ke uahuhutung mat, inggono ke hire tanik tasir Israel tar binaka ra turung hiliu i Isip. Kare ualatoho tasisin, hape ra turung guata pe tar hironon.

### Moses

<sup>23</sup><sup>z</sup>A toking tinana Moses kura tagorong mana puk, maeit kura touaouo tang Moses tar touonor bialok i muduhia ka poho pein. Rasina kura banga tara tus a siokor keketik tun pe, kara hik pah kura sokor, kaura de matura uakeluk tena ualatohor toiang Isip.

<sup>24</sup>Moses ke tagorong mana puk, maeit tar binaka ke mahoho kaion, inggono ke ueluelde mata bang paroko sirain pare, a tunar kuaha toia. <sup>25</sup>Inggono ke malara pare, tar huata keip tar niduh tosono tamata God, auia uain tar niguata uasa gera uahauahain tar sisikinalik pukur binak. <sup>26</sup>Inggono ke namana pare, tar kale tar nimatal e laig tang Kristo ter uia uain tar kale tar inete uaiang Isip. Teeit inggono ke bangala tar bulauana re turung kalein i uoumuhia. <sup>27</sup>Moses ke tagorong mana puk, maeit ahik pah ke sokoro tar toia gete nimalian ke hiliu peon i Isip. Inggono ke kalekinalentiehe dede kompela tang God ger mahang bang luar. <sup>28</sup>“Moses ke tagorong mana puk maeit, ke uakekene keip toro niein uleik, ra kilain, “Leke liu ro Mat,” kare ualatoho ra sabaig me deuatinginar sipsip i rana tar pirpirik mara hikir angelou ger tang tung pous tasir keketik bulout gesir uoum pahe tung pous toso bung tusur Israel gesir bulout.

<sup>v</sup> 11.19 Roum 4.17    <sup>w</sup> 11.20 Uak 27.27-29,39-40    <sup>x</sup> 11.21 Uak 47.31-48.20

<sup>y</sup> 11.22 Uak 50.24-25; KT 13.19    <sup>z</sup> 11.23 KT 1.22; 2.2    <sup>a</sup> 11.28 KT 12.21-30

## O Israel

<sup>29</sup><sup>b</sup>O Israel ka tagorong mana puk, maeit ka banotong sair kout tar laur ra kilain a “Retsi” misiana paha papadakanansioun, bo tar binaka ka lang uakelukular Isip tasisina ka la houp matengua.

<sup>30</sup><sup>c</sup>O Israel ka tagorong mana puk, maeit ke tatadur uahiuar padorong Jeriko i muduhia ka uiloho per Israel tar mouitir marein.

<sup>31</sup><sup>d</sup>Rahab, ger uraur a peng Jeriko, ke tagorong mana puk, maeit ahik pah ka tung pous keipin tasisit ka mahang longoro tang God, teeit ke uaha uangoul peono tasir Israel geke lang bangbanga uanom.

## O gisimeher tamata ka tagorong man

<sup>32</sup><sup>e</sup>Inggo paku bolo harahampela, bo teeit ahik manasa peo menag binak. Ge inggo pe halan tu uahire tamiuoum tasir gisimehe poluk, pare tas Gidion mes Barak, doh Samson, doh Jepta, doh Debit, doh Samuel, doho propet. <sup>33</sup><sup>f</sup>O tamatasinasine ka tagorong mana tang God, kara touahiua toro nitoia ka uiliatung keip pe. O gisimehe ka guata tar puhur kodkodoh, kara kalengua tar haua ke ualapagahain God tasisin. O gisimehe ka tagorong mana puk, maeit ka uoho uelngungut tar uauasir laion, <sup>34</sup><sup>g</sup>karo gisimehe ka lomoho tar hue uleikintiehe tun, karo gisimehe ka lukup tur tasir tamata geke marang tung pous keip tasisina tar baenat barah. Gisin o maluan, bo God puk ke uatampopokoho tasisin. Gisina ka tampopokoho tar uiliatung, kara geil uaroke tasir tamatang uiliatungun toro gime uan. <sup>35</sup><sup>h</sup>O kuaha ka tagorong man, maeit ka kale tapokis toso tahisilik geke mat, o niuatua tapokis pe.

Bosir gisimeher tamat ka uelpusis, kara de mata luaka liuis, teeit ra tagorong mana pe tang God mara tua tapokis keip tar niuangoulur uia uain. <sup>36</sup><sup>i</sup>O gisimehe ka uuaneteis, kara halhaluh uuelmahingis, kara uih tane keipis tar tiein, kara belelais tar karabus. <sup>37</sup><sup>j</sup>O gisimeh o nibakbak pous keip tar palau, karo gisimeh o nitokout kout puhung torik, o gisimeh o nitung pous keip toro baenat. Doho gisimeh ka la teil keip pukumpe tar kapokousur sipsip, doha kapokousur meme a hangang gomom, ka gog, kara uuelmahingis, kara guata uasais. <sup>38</sup>O tamatasin o tamata uaiantiehe liu tasir tamatang gane i kot. Gisina ka uiloho ueltebeir tar butur padenen, doho sisan, kara uangoul hahai tar lebanga mer tung i lolono tar kot.

<sup>39</sup>O tamatasinasine ke heiris God tar ueltada uleik tun tar mamang inetelikinine ka pehuara keipig ka tagorong mana pe! Bo ahik dedempe

<sup>b</sup> 11.29 KT 14.21-31    <sup>c</sup> 11.30 Jos 6.12-21    <sup>d</sup> 11.31 Jos 2.1-21; 6.21-25; Jas 2.25

<sup>e</sup> 11.32 Ked 4.6-5.31; 6.11-8.32; 11.1-12.7; 13.2-16.31; 1Sa 16.1-1To 2.11; 1Sa 1.1-25.1

<sup>f</sup> 11.33 Dan 6.1-27    <sup>g</sup> 11.34 Dan 3.23-27    <sup>h</sup> 11.35 1To 17.17-24; 2To 4.25-37

<sup>i</sup> 11.36 1To 22.26-27; Jer 20.2; 37.15; 38.6    <sup>j</sup> 11.37 2OUTT 24.21



pah ka kale tar haua ka ualapagahaig, <sup>40</sup>teeit God ke namana tanik tar inete uaiantiehe tagigeig. A tengkana tena ninamanon, maeit inggeig tokaha keip tasisin ra turung siokor guata uaiasieig.

**Hape ke guata pe God tena ualatut, e ualasira  
uakalahara tena nimalaelhir**

**12** <sup>1k</sup>Temaeit tar puhon gitie ka tur uiloho pe mer manai tamata geka ualasira tar nitagorong man ka tur keipin, inggeig pono paki baka liu tar mamang inetelik re ualala hamas tagigeig, kare uapuape kout ter niguata uasa tunumpenin gere uapuape kout dede tagigeig tar ualo ualahurula tar butur paki ualo uatampopokoho uelhirilaineit i uoum. <sup>2</sup>Ti banga uanono tang Iesu gere tengkana tur regi nitagorong maneig, teono tere banotong uatuatuka hihir tar nitagorong man e tuka tar uadouhin. Inggono ke uahuein tar mata pare, tar korose, ke uahuein tar kale tar nimatal. Teeit tar niuaha ke ate teilion e turung kale i muduhia. Doh ke la tabila tar pang mua tono tabtabila God.

<sup>3</sup>O mana tun, mu namana kompe hape ke uatut pemeono tar nimatal e la tur tasir tamatang guata tar niguata uasa geka turtur tane tatanon. Inggono ke kalkale hamas tun tar uelmahing, kare huata bolongur mara hikoum pah mu maluan, karung maluana kout tar tagorong mana tang God.

<sup>4</sup>O mana noman, inggoum kung uiliatung tar kale uahiua tar niguata uasa, bo halana puk tung uelkoi uatuka tar binaka rung mat. <sup>5</sup>Ue kung malabobour uakapangua inggoum tar meneng uatampopokoho giniane ke meneig God tamiuoum ro bung tun? Inggono ke kula pare,

“Ir tug, ualongoro tar binaka re uakokodohor Tamata Nomana totomua,

kara hik paho kale uasa tar binaka re uamarorono totomua.

<sup>6</sup>Ge a Tamata Nomana pe e uakokodoho tas gere malaelhiris, kare uaelmahing tasisit re malaelhiris o bung tun.”

*Nitabila Uaia 3.11-12*

<sup>7m</sup>Gitie ro kale pela ingga tar uelmahinginin, namana uanon, God e guata sira paha tuna tun totomua. Ue kaein me keketik ahik tamana pah ke ualatut? Ahik tun! <sup>8</sup>Geta hik God pahe uakodkodoho totomua ngohina re guatang sioun pe toso bung tun, e baka siranguaono pare, ingga a tunang mok, kara hik paha tuna tagur tamat. <sup>9</sup>I ranahia tar puhonene teso bung tamagigeigane i kot, gisina ka uaelmahing tagigeig, doh inggeig ki ueltada tasisin. Temaeit inggeig paki longoro tununguampe tang Tamagigenah i Heuen ge tamanar iabegigeig mari tua dede.

<sup>k</sup> 12.1 1Ko 9.24-25   <sup>l</sup> 12.5-6 Job 5.17; UGO 3.19   <sup>m</sup> 12.7 Ual 8.5

<sup>10</sup>O bung tamagigeig ka heir uelmahing tagigeig tar sisikinalik pukur binak, teeit ka namana pe pare, auiantieher puhono tar guat. Bo God puk ke guata tar puhono torogio uiaieig mari dedeil sireig tatanon.

<sup>11</sup>Tar binaka ri kale uelmahingeig, inggeig i kale sira tar puhono pare, e uaueldolomo tagigeig, kara hik pahi uah. Bo i muduhia puk a puhon, e uakotpokoso tar niuangoulur kodkodoh, kara hiarouon tasisis ka ualatutumeis tar hagarion.

<sup>12</sup>Temaeit, mu hue kai tar limamiuinit re maluana kusa puk, doh mu uapagpagolo tar kekemiunitir malmaluan. <sup>13</sup>Uakodkodoho me lel re ueihilaigir kekemi, maeit geto peiloum, ahikingua pah ra banotong tula bise liuisioum tar lel. Bo mu uatampopokoho kalehe kompesioum.

### **Inggeig i uatampopokohosieig, kari tur uanon**

<sup>14</sup>Mu petutup tar uangoul keip toro hiarouo tasir tamata uakap, karung uatampopokohosioum tar niuangoulur dedeil. Ge gisis pe ahik paho dedeil ahikingua pono pah ra turung banga tar Tamata Noman. <sup>15</sup>Mu uelkauekesioum mara hik me kalamiuoum re oroho tena nimalauelhir God menia tena niueldolomon. Mu tagin geto hua kai mo uana ro douk uelbarang i uantinanina tamiuoum o heir me niduh tamiuoum, kare la uasuasa tamiuoum tena nibanga God. O bureh e uoto barangais tar uelbarangana roon.

<sup>16</sup>Ahik pah mu uamaluana tar niguatang ur ue mu ueluelde tar ueltada tar ineter dedeilir nang God e kotpokoso tamiuoum misiana tang Iso. Inggono ke uelpalihe keip tar niein tar heir liu tar huar niuamatoto tatanono tar kale uahiuar uoum pe.

<sup>17</sup>Inggoum mu ate, i muduhia ke guata baka peono pare, doh tar binaka ke malara inggon e mene tanik tamana hape re turung guata pe God tatanon, inggono ka utin, a mahang pe manas, gitiempe ke dangata tutup keip tun peono tar bulbulunar matan, ahik tununguampe inggono pah ke banotong tupara me hagar tar uiuir tena ninamana taman.

### **A timuhur uelhote, doha uelhoter pensioum**

<sup>18</sup>Inggoum halan te tuparasioum me inet, marung hagouo sira tasir Israel ka hagouo pe. Namana huar, gisina ka me uangoul uahuhut tar sisan i Sainai, kara banga toro luhluhuna ro tukuno hue, kara puhung kitup, kara tukung pang rom. <sup>19</sup>Kara longoro toro ururunguna ro tuil doha menmen e aling sira tar uauanar tamat. Tar binaka ka longorosin tar alialingonene, kara kula uapopokoho tununguampe ra de mata longoro baka poluk me puhung giameher puhung men. <sup>20</sup>Teeit gisin

<sup>n</sup> 12.11 Jas 3.17-18   <sup>o</sup> 12.12 Ais 35.3   <sup>p</sup> 12.13 NU 4.26   <sup>q</sup> 12.16 Uak 25.29-34

<sup>r</sup> 12.17 Uak 27.30-40   <sup>s</sup> 12.18 KT 19.16-20; Ual 4.11-12   <sup>t</sup> 12.19 KT 20.18-21; Ual 5.22-27

<sup>u</sup> 12.20 KT 19.12-13

ahik pah ka banotong uatut tar ualatohe, “Gitiempe gete me inete puk ponompesitieir tua re haiala tar siusan i Sainai ra bakbak pousin.” <sup>21</sup> <sup>v</sup>A haua ka banga toinir tamat i Sainai a ualasokorontiehe tun, temaeit ke la kulangua Moses pare, “Inggo u poro keipintiehe tun tar nisokor.”

<sup>22-23</sup> Bo inggoum puk kung lame tar siusan i Saion tena uan uleikir God ger tua ter timuhur Jerusalemono gere mok i Heuen tar butur ra uangoulur burehentiehe tunur anggelou, ahik pah ra banotong ahais. Kung lame tar butur ra uangoul uaha toto ro bung tuna God gesir uoum ger nibolo uahiuar hangas i Heuen. Kung lame tang God ger Tang Kedanga tasir tamata uakap, doh kung lame tar butur ra uangoulur tamatasitir kodkodoho geka mat, karo niuakodkodoho hihir tun. <sup>24</sup> <sup>w</sup>Kung lame tang Iesu geke uakotpokoso tar timuhur uelhote, karung lame toro deuatingina Iesu gero nikiras, doh geko mene toro uelhire o uiantiehe uain toro deuatingina Abel.

<sup>25</sup> <sup>x</sup>Mu kaueke uaia tununguampeisioum pare, ahik pah mu mahang longoro tang God geteono pe, teene re menmene tamiuoum. Ge gitie pe ge pakene ahikir tamatang Israel pah ka ualo liu tar binaka ka mahang longoro tang Moses ge nas tamatang uoum keip uelhiresinane i kot, paka binaka uasantiehe tununguamape tagigeig ge paki de tanene re mene turuha i Heuen. <sup>26</sup> <sup>y</sup>Tar binaka ke mene turuha God tar siusan i Sainai, a uauanono ke uaguna tar kot. Bo daana puk ke guatono tar giameher ualapagah pare, “Inggo u turung uaguna baka poluk ahik pah tar koto puk bo i rana pon.” <sup>27</sup> <sup>a</sup>A puhonener “Uaguna baka poluk,” e kula sira pare, tar inetenine i kot gera banotong uagunaig ter inetenin ger nitou, ra turung kale liuig mare la mokongua pukur inet ahik pah ra banotong uagunaig.

<sup>28</sup> Gitie ri kale pe inggeig tar nitoia ge ahik pah ra banotong uagunain, ti la heir tar uatakai tang God, kari uauaha keip tatanono tar lotu ger kodkodoh, kara uleikir ueltad, kari uakeis bolongur keip puk tar nisokor. <sup>29</sup> <sup>z</sup>Ge nagi God peeig misiana ro hue uleik gero banotong ualualuh hihir tar mamang inetelik.

### Mu malaelhir dedeisioum

**13** <sup>1</sup> Mu malaelhir dedeisioum ngohina paho matmatatahinalik. <sup>2</sup> <sup>a</sup>Ahik pah mu malabobour tar uaha uangoul tasir pokoso tonomio um, ge tar puh peon o gisimehe ka me uaha uoum tosnosio pokos, doh gisin o anggelou, bo ra tele teil puk o anggelou pesin. <sup>3</sup> Mu namana toso uanotoumuisit ra uangoul tar uih, namana to ge pake inggoumuono rung uangoul tagu tasisin. Doh toso uanotoumuisit ra kale

<sup>v</sup> 12.21 Ual 9.19    <sup>w</sup> 12.24 Uak 4.10; Hib 8.6    <sup>x</sup> 12.25 Hib 2.1-3; 10.26-29

<sup>y</sup> 12.26 Hag 2.6    <sup>z</sup> 12.29 Ual 4.24; 9.3    <sup>a</sup> 13.2 Uak 18.1-8; 19.1-3; Roum 12.13

uelmahing, mu namana to ge pake inggoumuono rung kale uelmahing tagu tasisin.

### O le

<sup>4b</sup>O le paka ueltadantiehe tuninir tamata uakap. Doho bulout le mesir kuahar le, paka ueluetadeis, doh paka uangoul uadedeil keip torosio le, ge God pe e turung bang kedanga tasisit ra uangoul uasa keip tosnosio kuahar gisiamah ue nosio buloutur gisiamah, doh gisis pon ra ura ueltebeir.

### A mani

<sup>5c</sup>Ahik pah mu me uangoul sir “o uaha mani,” bo mu uaha keip puk manasa tar haua kung kale manasaig. Ge God pe ke kula pare,

“Inggo ahik tun pahu turung hiliu  
ue u uelsakil tamiuoum.”

*Ualatut 32.6,8*

<sup>6</sup>Temaet inggeig i banotong ongolongua tar kula pare,

“A Tamata Noman nagi tamatang pouleig,  
inggeig ahik pahi banotong sokoro me puh  
ra banotong guatainir tamata tagigeig.”

*Ker 118.6*

### O mamahoholikin tar lotu

<sup>7d</sup>Mu namana uanono tosnomio mamahoholikin tar lotu geka mene tonu uelhire God tamiuoum, bangbanga hamas tar haua ke kotpokosome tenas niuangoulusin, karung petut sir teres nitagorong manasin.

<sup>8</sup>Iesu Kristo a siokono nerau, daan, doh tar mamang binakalik. <sup>9e</sup>Ahik pah mu uareihisioum tar mamang niualasiraniner giniameme sioko tena niualasirar Tamata Noman. Auia geta uatampopokoho keipigir kolougigeig tar nimalaelhir doh na niueldolomo God, bo ahik pah tar ueluatatanar ualatutunar niein, ge gisis pe ka uakeluk taninin, ahikir puhunin pah ke poul baka tasisin.

<sup>10</sup>Inggeig nogio olta o giamehe sioko tonosio oltar Ju, bo o patere puk gera kalekinale to tenas buturung lotur Ju, ahik pah ra banotong ein to tagu tonogio oltaeig. <sup>11f</sup>Nas patere uleikir Ju e keip tar deuatinginar inetesisier tua tar Buturur Dedeilintiehe Tun tar heir tar uahung tar kale liu tar niguata uasa, bor tukunusir inetesisier tua ra ualuh toig i behia tar uan. <sup>12g</sup>Temaet Iesu ke kale to pono tar uelmahing i behia toro prikinar uan uleik tar uadedeil keip tasir tamata uakapa toro deuatingin.

<sup>b</sup> 13.4 Epe 5.5   <sup>c</sup> 13.5 Jos 1.5   <sup>d</sup> 13.7 1Ko 4.16   <sup>e</sup> 13.9 Roum 14.17   <sup>f</sup> 13.11 NKP 16.27  
<sup>g</sup> 13.12 Jon 19.17

13<sup>h</sup>Inggeig i la uelhir to manasala tatanon i behia tar uan, kari la kale uelkout tena nimatalon. 14<sup>i</sup>Ge gane pe i kot ahikieig menagi uan ri uangoul uamatoto tunin gere turung nagigeig dede, bo i sirsir tar uan uleik gere turung lame.

15<sup>j</sup>Temaeit i lolono tena nitampopokoho Kristo, inggeig i heir dedempesieig tar uahungung uatakai tang God pare, ter uahungono ri heir keipieig tar uauagig tar binaka ri me hire tauete tatanon a Tamata Noman. 16<sup>k</sup>Ahik pah mu malabobour tar guata tar niguata uaia, doh tar ueluelpoule, geter uahung penin re uauaha tun tang God.

17<sup>l</sup>Mu longoro tosnomio mamahoholikin tar lotu, karung guata tar haua ra kulainisina gera kaueke pesina tamiuoum, ge gisina pe ra la turung hire sira tang God hape ka kalekinale pe. Getung longoroum tasisin, gisina ra banotong kalekinale keip tar niuah. Geta hikia paho longor, gisina ra turung kalekinale keip tar niduh, kara hikinguamper puhono pahe banotong poul totomua.

18<sup>m</sup>Mu poul totoguo tenami lotu, inggo u ate teilio a kodkodoho reg ninaman, ge inggo pe u marang guata puk tar kodkodohor inete tar mamang binakalik. 19<sup>n</sup>Doh inggo u dangatantiehe tun tamiuoum tar lotu pare, mare heir tapokis ualahurume God totoguo tamiuoum.

20<sup>n</sup>Inggo u lotu tar Godong Toro Hiarouo, geke kale tapokis tur tang Iesu nagi Tamata Nomaneig toro mat toro deuatinginar uelhote gere moko dede, doh ge nas uleikir Tamatang Kaueke tasir sipsip, 21<sup>o</sup>tar heir uaburehe tamiuoum tar mamang inetelikir uia rung malaraig tar guata tena kalekinaleon. Doh inggo u lotu pono, maeit tang Iesu Kristo God e kalekinale i lolono tamiuoum tar haua re uauaha tatanon. Doh tang Iesu Kristo a uatakai a nanono tar mamang binakalik mamang binakalik! O Mana tun.

#### A uadouhinar men

22<sup>p</sup>Inggo u petutup tamiuoum ro bung uanotoug, mu ualongoro uanono tun tar haua ku menegio, ge inggo pe ku bolo puk tar sikir bolobolonine.

23<sup>q</sup>Inggo u marang uahire tamiuoum tang uanotougigeig, Timoti, ka uatauete tur manasain tar karabus, gete la ualahurumeonane, inggo u turung kale tagume tatanono tar me banga tamiuoum.

24<sup>r</sup>Heir tenag niuaha inggo tosnomio mamahoholikin tar lotu, doh tasir gisiamer tamatang tagorong man. O tamatang tagorong man i Itali ka heirila tenas niuah.

25<sup>s</sup>A hamhamasar nang God e uangoul tagu tamiuoum uakapa tun.

<sup>h</sup> 13.13 Hib 12.2    <sup>i</sup> 13.14 Hib 11.10,16; 12.22    <sup>j</sup> 13.15 Ker 50.14,23    <sup>k</sup> 13.16 Pil 4.18  
<sup>l</sup> 13.17 1Te 5.12    <sup>m</sup> 13.18 Apo 24.16; 2Ko 1.12    <sup>n</sup> 13.20 Jer 32.40; Isk 37.26; 1Pi 2.25

# Jems

## O Bolobolo ke boloin Jems

### O bolobolo tang Jems

O bolobolo tang Jems, roon o bolobol i lolono tar timuhur uelhote toro Baeboul. O tamata ra namana tang Jems ge tahina Iesu teke bolo tana roon. Inggono ke kotpokos a tamatang uoum keip tasir tamatang tagorong man i Jerusalem (Gal 1.19).

### Jems e hire teil toсно tamatang timana tar bureher inet:

Inggeig i banotong kale tar niduh teeit ri uakeluk pe tang Iesu. Bo paki uangougoul hamas kompe (Jas 5.7-11).

Inggono ke menentiehe tasir tang inete gera guata uasa tasir tiome (Jas 2.1-4, Jas 5.1-7)

God e turung kula tasisino pare ka guata uasa. Geta tagorong manar tiome tang God, a puhono ter uia uain toro tang inet (Jas 2.5-7).

---

### Jems e heir tar niuah

**1** <sup>1</sup>Inggo, Jems, a tamatang kalekinale tang God, doh tang Iesu Kristo.

O bolobolo rone o la tasir siokor hangaul, doho torik ro bungusur Ju geke hiliu tenas uan, doh ra uangougoul ueltebeir toro giniamhe ro uanane i kot.

A niuaha uaia tun tamiuoum!

### A uatolau e uoto uatampopokoho tagigeig

<sup>2</sup>Ro bung uanotoug tar binaka re kotpokosor uatolaua tamiuoum, inggoum pakung uaha tun. <sup>3</sup>Ge tar binaka pe ra uatolauaig remi nitagorong manoum, a uatolauanin e uoto uakotpokoso tar hararing

---

<sup>a</sup> 1.1 Mat 13.55; Apo 15.13; Gal 1.19; 1Pi 1.1    <sup>b</sup> 1.2 Roum 5.3-5    <sup>c</sup> 1.3 1Pi 1.7

tur uapopokoho tar huata tar niduh. <sup>4</sup>Bo mu uamaluana puk tar puhonene e hua ge tar binaka pe re hua uapopokohor puhonene remi nitampopokohoum tar haiala i lolono tar binaka re parakukuhur niuangoul ahik pahe punga uahiu, bo e kalekinale dedempe marung kotpokosoum pare, o mahoh, karo kodkodoho uakapa tun. Kara hik pah mu katupa me inet.

<sup>5</sup><sup>d</sup>Doh gete me tang sioko tamiuoum e katupa tar ninamana uaia, inggono pake lotu, kare dangata tang God gere turung heir tatanono ger uoto heir uaia tasir tamat, kara hik pahe uoto heiring nimalian. <sup>6</sup>Bor tamata gere lotu keip tar nitagorong man, inggon ahikingua pahe tagorong boho baka poluk. Mair tamata re tagorong boh, inggono misiana toro butuana gero puahpuaha ueltebeirin tar rom. <sup>7-8</sup>A tamata sira pare, inggon a torik na ninaman, kare uoto uapalih dede tena ninaman. Inggon ahik pahe namanain, e turung kale tur me inete tar Tamata Noman.

### O tang mani, doho tiome

<sup>9</sup>Gete me tang siokor tamat e uoto tagorong man, doh ahik paha tang mani, inggon e banotong uah, ter hauono tar matana God inggon a tohangan. <sup>10</sup><sup>e</sup>Bo a tamata puk gere uoto tagorong man, doha tang mani, inggono pake uaha tar binaka re kale uahiu God tatanon. Ter hauon o tamata gera uoto malara tar uamoko toto tenas inete ue a mani, gisin ra turung mata sira tar kalanguhuna ro doudoukulik roke. <sup>11</sup>Ge a pisara pe e hara keip tar uelsuk, kare uamate tar doudoukulik, doha kalanguhunar doudoukulik e sab i kot, kare taboig na nimataia. Ter siokono komper hagar re turung kotpokoso tar tang mani. Inggon e turung mata to tar binaka re tuha haraha tena kalekinale.

### God e uoto heir tar mamang inetelikir uia

<sup>12</sup>A tamata gere uoto tur uapopokoh, kare huata tar niduh tar mamang uatolualik, inggon e banotong uah. Ge tar binaka pe re peharonono tar uatolauanin, inggon e turung kale tar bulauan geke ualapagahain God e turung heirin tasisit ka malaelhir tatanon, inggono ter nituang tar mamang binakalik. <sup>13</sup>Gete me tamata ke reihin tar guata me hagar uasa, inggono paka hik pahe kula pare, “A uatolauene e la tur tang God.” Ge God pe ahik pahe banot e uatolaua tar tamata tar guata me niguata uasa, doha niguata uasa ahik pahe banotong uatolaua tang God. <sup>14</sup>Bor tamat e banotong reih pukin tar guata tar niguata uasa tar binaka re uamaluanain re uakeluk to pe tar nimalara uasan tar tukunun, temaene re la guata uasanguaon. <sup>15</sup>A

<sup>d</sup> 1.5 NU 2.3-6    <sup>e</sup> 1.10 Ais 40.6-7

nimalahir uasaninanine ro uoto mahagia e uoto reihila tar tamata tar guata tar niguata uasa, doha niguata uasa e la uakotpokoso toro mat. <sup>16</sup>Temaene inggoum ro bung uanotoug ahik pah mu uamaluanasium pare, ra uelourusium.

<sup>17</sup>A mamang inetelikininer uia, ri uoto kalegieig, doha ineteng uauahanitier uia tun a mamang inetelikin e la tur i ran. Ginin e la tur tang God Tamagigeig geke touo tar luhung Heuen. Inggon ahik pahe uoto uapalih tagu tena niguat, e luh dede kompe ahik pahe kitup tagu. <sup>18</sup><sup>f</sup>Ter enonor nimalar, inggono ke uakotpokoso keip tagigeig toro uelhire gero man mari uangouleig o uakikilangana tar mamang inetelik ke touogion.

### Inggeig i longoro kari uakeluk

<sup>19</sup>Mu namana dede ro bung uanotoug, inggoum uakapa tun mu longoro uateuel, kara hik pah mu tororo tar men, doh tar nimalian. <sup>20</sup>Ge na nimaliana per tamat ahik pahe banotong uakotpokoso tar hagarir kodkodohor nang God. <sup>21</sup><sup>g</sup>Temaene mu kale liuoum tar mamang niguata uasalik, doha mamang hagar uasalik. Inggoum mu kale uahiuasium, karung kale toro uelhire geke lebeiono tar koloumiuoum, roono gero banotong uelkarus tar iabeimiuoum.

<sup>22</sup><sup>h</sup>O uelhire gekung kalesium, roono terung uakelukusium, kara hik pah mung longlongoro puk, bo mung uakeluk tang roon, karung guata sir. Bo getung longlongoro pukuoum, kara hik pah mung guata uakeluk sir, inggoum mu bohboho katongosium. <sup>23</sup>A tamata gere longoro toro uelhire, doh ahik pahe uakeluk sira ro kulkula teil pe roon, inggono te misianar tamatetie re sisirin toro sisir, dohe banga sir tunin re baka pe, <sup>24</sup>ke sisira uakapaion, kare hiliu, kara hik pahe namana huara baka poluk, hape re baka pe. <sup>25</sup><sup>i</sup>Bor tamata gere timtimana hamas tun i lolono tena ualatut God ger kodkodoho uakapa tun geke luaka liu tur tagigeig tar nitampopokohonor niguata uasa, kare uakeluk dedengua, kara hik pahe malabobour tar haua ke longoroig, bo e guata sir, God e turung guata uaia tar mamang inetelik re guatagion.

<sup>26</sup><sup>j</sup>Gete kula me tamata pagiare a tang lotu, doh ahik pahe kaueke tena nimen, na lotuon ahik paha to nieinin. Doh inggon e bohboho katongo pukin. <sup>27</sup>A lotur delauan, kara hik me ineter sa i lonon tere malaraiig God tamagigeig misiana pare, tar poul tasir keketikisiner tabo tamas, doho kuaha geka mata nosio bulout tar mamang niduh ra huataigisin, kari kaueke katongosieig gete reihir niguatang tar koto tagigeig.

<sup>f</sup> 1.18 Jon 1.13   <sup>g</sup> 1.21 Kol 3.8; 1Pi 2.1   <sup>h</sup> 1.22 Mat 7.26; Roum 2.13   <sup>i</sup> 1.25 Roum 8.2; Jas 2.12   <sup>j</sup> 1.26 Ker 141.3



### Guata uelmatout tasir tamata uakap

**2** <sup>1</sup>kRo bung uanotoug gitie o tamatang tagorong mana peoum tenagi Tamata Nomaneig Jesu Kristo ger uleikir balbalana na nitampopokoh, inggoum ahik pah mung namana pare, o gisiameher tamat o tohangas uain tasir gisiameh.

<sup>2</sup>Gete me tang siokor tamat a tang mani e uamoko teil tena mindal a i ranar bulauan, doha hikhiku uaia uelhir, kare la lekala tenami umang lotuoum, kare leka ponomer tamatetie ahik paha tang inet, dohe hiku teil tar hikhikunitier taktakih kara uh. <sup>3</sup>Doh gete mu guata uaiantiehe pukuoum tanetie re hiku teil tar hikhiku uaia uelhir, karung kula pare, “Nongo tabtabila uaia ingga rone,” karung kula tanetier tiome, “Tur uoumat,” ue, “Me tabilane i koto tar kekeguo.” <sup>4</sup>Getung guatoum tar puhonene, misianangua inggoum pah kung bang kedanga keip tenas hagarir gisiamehe teremiuir ninaman. Karung kotpokoso sira pare, o tamatang kedanga keip tar ninamana uasa.

<sup>5</sup>Ro bung uanotoug mu ualongor! God ke uamatoto tasir tiomeane i koto pare, ra turung uangoul uaia tun tar hagarir tagorong man, kara turung kale tar nitoiaeit ke ualagahain God tasisit ra malaelhir tatanon. <sup>6</sup>Bo inggoum puk kung uelsigala tasir tiome. Ge mais pe ka ueliu tamiuoum, kara reihila tamiuoum tasir tamatang tabila tar uelhire? Tesir tang mani! <sup>7</sup>Teesina deh gera uoto uelsigal dede tar hangana uaia Jesu ger nana tamiuoum.

<sup>8</sup><sup>m</sup>Inggoum mu guata tar hagarir kodkodoh getung uakeluk tena puhung ualatut Godene re moko toro Uelhire Uaia, “Malaelhir tang uanotoum misiana ro malaelhir peia.”<sup>n</sup> <sup>9</sup>Bo getung guata uaia pukuoum tar tang siokor tamat misiana ter tamata uaiantiehe tar tang giameh, inggoum kung guata uasa tena ualatut God, karung kotpokos o tamatang katego tar ualatut.

<sup>10</sup><sup>p</sup>Gete me tang siokor tamat e uoto uakeluk tar mamang hagar uaia ue a puhung ualatut, bo e katego pukuono tar siokon siounur puhung ualatut, inggono ke guata sira manasa tar tamatetie ke katego tar ualatut uakapa tun. <sup>11</sup><sup>q</sup>Ge God pe ke kula pare, “Ahik paho ur.” Kare kula pono pare, “Ahik paho uiliatung pous tasir tamat.” Geta hikia paho ur, bo ko uiliatung pous puk mo tamat, ingga ko kotpokos a tamatang katego tar ualatut uakapa tun.

<sup>12</sup><sup>r</sup>Temaene hingiar binaka rung mene inggoum ue a haua rung guatain, namana dede pare, inggoum ra turung kedanga tosious tar

<sup>k</sup> 2.1 Apo 10.34; Jas 2.9 <sup>l</sup> 2.5 1Ko 1.26-28 <sup>m</sup> 2.8 Mat 19.19; Gal 5.14 <sup>n</sup> 2.8 Bolobolong Kalekinaler Pater 19.18 <sup>o</sup> 2.9 Ual 1.17 <sup>p</sup> 2.10 NKP 19.37; Aha 20.7-12,24; Mat 5.19 <sup>q</sup> 2.11 KT 20.13-14; Roum 13.9 <sup>r</sup> 2.12 Gal 6.2; Jas 1.25; 1Pi 2.16

ualatut geke kotpokoso tur tena nimalaelhir God tagigeig gere luaka liu tagigeig. <sup>13</sup> Geta hikoum pah mu ualasira teremi niueldolomo tasir gisiameher tamat, God ahik pono pahe ualasira mena niueldolomo tamiuoum tar binaka re kedanga tamiuoum. Bor tamata gere ualasira tena niueldolom, e banotong tur keip tar niongolo tar binakang kedang.

### A nitagorong man, kara niguat

<sup>14</sup> Ro bung uanotoug, hape re uia to pelaono gete kula me tamata pare, na nitagorong man, bo ahik puk na niguata pahe la keip? Na nitagorong manonene e banotong uelkarus tatanon? Ahik! <sup>15</sup> Gete me uanotoumua e malara me hikhiku dohe katupa tar niein, <sup>16</sup> bo ahik pukua pah ko heir tar haua re malaragion tena niuangoul, hape re uia to pela nang puhung kula tatanono pare, “Auia, uangoul uaia, karo ein uaia.” <sup>17</sup> Ter siokono kompe a nitagorong mana puk me pahen, doh ahik me niguata uaia re la keip, a nitagorong manon a mat.

<sup>18</sup> “Me tamat e banotong kula pare, “O gisiameher tamata res nitagorong man, doho gisiameh o tang kalekinale.” Bo inggo u guata keip tenag niguata tar ualasira teregir nitagorong man.

<sup>19</sup> Ingga o tagorong mana pare, a tang sioko pukur God? Auia tun! O liouana uasa ra tagorong mana pon, kara sokorontiehe tun. <sup>20</sup> Ingga a tuktukar! O malara ra ualasiraia tar nitagorong mana ger mat ge ahik mena kalekinale uaia, kara tabo tengkana? Auia ualongor.

<sup>21</sup> “Sioun tubugigeig Abraham ke uamoko tar tun, Aisak toro olta, kare heir tatanono e lain a uahung. Temaene tar binakono God ke banga tena niguaton, kare kila tatanon a tamata kodkodoh. <sup>22</sup> “Bang! Na nitagorong mana Abraham, doh na niguata kura kalekinale tokah, doh na niguata uaiaononine ke uelmatout keip tun tena nitagorong manon. <sup>23</sup> “Temaene ke kotpokoso sir tunur puh ko kulain no uelhire God pare, “Abraham ke tagorong mana tang God, temaene ke kila God tatanono pare, a tamata kodkodoh, kara kila ponoin pare, a kaluana God.”

<sup>24</sup> Temaeit, inggoum kung ate manas, tar tagorong mana puk, God ahik pahe uoto kila to tar tamata pare, a kodkodoh. Ahik, God e banga to tar niguata uaia ri guatagieig, doh ter tengkanonene maeit re kilono tatanono pare, a tamatar kodkodoh.

<sup>25</sup> “Te misiana kompe tang Rahab ger uraur, inggono ka kilain a kodkodoh, teene ka banga to pein tena niguat. Ke kilauatoro pe tar tang torikir peng Israel gekura me banga uanom, kare poul tasrasina tar ualo tapokisila tar giamehe siokor lel.

<sup>26</sup> A siokono tar tukunun, inggon a mat geta hik uadeil me iaben. Doha nitagorong man a mat, geta hik pahe la keip me niguata uaia.

<sup>s</sup> 2.13 Mat 5.7; 18.32-35    <sup>t</sup> 2.15 1Jo 3.17    <sup>u</sup> 2.18 Gal 5.6    <sup>v</sup> 2.21 Uak 22.9-12

<sup>w</sup> 2.22 Hib 11.17-18    <sup>x</sup> 2.23 Uak 15.6; 2OUTT 20.7; Ais 41.8    <sup>y</sup> 2.25 Jos 2.1-21; Hib 11.31

### Inggeig i kaueke tar mene ri meneig

**3** <sup>1</sup>Ro bung uanotoug, ahik pah mu siokor kotpokoso pare, o tamatang ualasin i lolono tar lotu, ge inggeig peene ri ualasin, e turung bangeahantiehe tunis God tar binaka re bang kedanga tasir tamat.

<sup>2</sup>A bureher binak, inggeig i uoto punga tar guata tar niguata uaia, kari guata uasa. A ineteninanine e uoto kotpokoso tagigeig uakap, bo gete kaein me tamat a kodkodoho uakapa na men, inggon a tamata uaia tun, dohe banot e kaueke tar tukununa uakap. <sup>3</sup>Ualongor! Geti uamoigeig mo mahar haene tar uauanar hos, inggeig i banotong reih kari uakauuuir tar tukununa uakapono tar butur ri malaraiieig e laon. <sup>4</sup>Namana tar parau a uleikintiehe tun, doha ualihinon a kikitilikintiehe tun, bo e banotong uakauuuir pukuono tar parau tar butur re malarainir tamatang uakapis e laon, gitiempe geta uleikir rom.

<sup>5</sup>Ter siokono kompe a uauan, a kikitilik tun tar tukununar tamat, bo a uleik tun pukumper hagar uasa re uoto guataig. Namana tar tatanguono ger kadjakad, e banotong luh uakapa kompe geto tentur tur mo tukun o hue me sikir kapopoton. <sup>6</sup><sup>2</sup>Doha uauana te misiana toro hue. Inggono misiana tar pang uan ger uoun tar niguata uasa. I lolono tar giniamehenar mahar tukunun, inggon e mamantouo tar udeilinear tamat, e la kotpokos a tamata uasa, kare uakotpokoso tar bureher niguata uasa tenagi niuangouleig misiana toro hue rotie ro ualuh uakapa tar mamang inetelik. O hue roono tero hueng Hel.

<sup>7</sup>O tamata ra banotong uelpurapur, kara kaueke tasir kahakahar inete ra uangoulane i kot. O inete sira pare, o tetiau, o soi doho mamang inetelik ra uangoul i laur. <sup>8</sup><sup>a</sup>Bo ahik puk me tang siokor tamata re banotong kaueke tar uauan. Inggon a inete uasa, kara mahang uamahanam, kara uoun tar bilih uasa. <sup>9</sup>Inggeig i uatakai keip tar uauagig tang God a Tamagigeig, dohi mamantouo keip pono tar uauagig tasir tamata gesir nitouo sira tang God.

<sup>10</sup>Ter siokon siounumper uauanonene re uoto tauete turuhar mene uaia doha soul. Ro bung uanatoug, a niguata deheninanine paka hik tun pahe kotpokos! <sup>11</sup>A kodomo mer teh ahik pahe banotong reih tauete turig me siokon siounur tung. <sup>12</sup>Doh ahik me tamata re banotong lous tur me uauana ro maranga toro kuen ue me uauana ro kaloko toro marang. Ter siokono sira kompe, a nor ahik pahe banotong uana kai tar kodom.

### A ninamana uaia e la tur tang God

<sup>13</sup>Gete kaein me tang sioko tamiuoum na ninamana uaia, kara naman manate, inggono pake ualasin to tena niuangoul uaia, doh na niguata

---

<sup>2</sup> 3.6 Mat 12.36-37; 15.11,18-19    <sup>a</sup> 3.8 Roum 3.13

uaia menia tar niguatar hamhamas gere la tur tar ninamana uaia. <sup>14</sup>Bo getung uoto gehe uasa tunuoum tasir gisiamah, doh gete tar mamang binakalik mu uoto siroum me lel ue me hararing uairana katongosioum, ahik pah mu uasala teremi ninamana uaia ge a boho penin. <sup>15</sup>Ge a niguatang gehe penin, kara niguatang kapipis, ahik pahe la turuha i Heuen, bo a nanar uanene i kot. Doh inggon e la tur tar nimalahir uasa re tentur tur pe tasir tamat, dohe la tur tasir liouana uasa. <sup>16</sup>Ge a mamang buturulik pe gere mokor niguatang geh doha niguatang kapipis, a buturunin ra tupara toinir nitabila uasa, kara mamang niguata uasalik.

<sup>17</sup>Bor ninamana uaia gere la tur i Heuen te pare, uakikilangan a ninamanar delauan, kara tang uelhiarou, a hamhamas, e uoto longoro tenas ualathor gisiamehar tamat, a uoun tar niueldolom, kare uoto uakotpokoso tar kukuananar uia. Kare uoto guata uauelmatout tar siokonor hagar tasir tamata uakap, doh ahik pahe guata kokopo tar inet. <sup>18</sup><sup>b</sup>A tamatang uelhiarou e uoto lebe tar uatuna ro hiarou, kare uakotpokoso tar nitabila uaiar nang God.

#### O tamatang tagorong man ra longoro tang God

**4** <sup>1</sup><sup>c</sup>A huar tengkanar uelpererinine tamiuoum? Doh ia re la turunin? Ginin e la tur tar nimalarang kapipis i lolono tar tukunun gere uoto uiliatung dede i uantinanina tamiuoum. <sup>2</sup>Inggoum mu malara tar inet, bo ahik puk pah mu kale tananin, karung gehe tar inet, bo ahik puk pah mu banotong kale tar haua rung malarraig, temaene mu uiliatung pousesioum. A tengkana maene ahikoum pah mu kale, teene ahik pe pah mu dangata tang God. <sup>3</sup>Doh gete kung dangata manasoum, ahik pah mu banotong kale, ter hauon, remi ninamanoum ahik paha kodkodoh. Mu malara kompe tar haua re heir tar niuaha tar tukunumi.

<sup>4</sup>Inggoum kung hiliu tang God misiana tar kuahetie ke hiliu tena bulout, kare ura keip tasir gisiamehar bulout. Ualongor! Ue ahikoum pah mu ate pare, gete me tamata re malara tar mamang inetelikin tar kot, inggono na uelmatan God? Mair tamata re ueldokout tasir tamata gera uoto guata tar niguata uasang gane tar kot, inggon e guata katongoin pare, na uelmatan God. <sup>5</sup>No uelhire God o kula pare, “A Iabena Dedeil geke uamokoin God tagigeig, e gehe tun tagigeig tar uangoul kompe tatanon.” Inggoum mu naman o tabo tengkana roon? <sup>6</sup><sup>e</sup>Bo God puk e heir uaburehe tagigeig tar nitampopokoho tar tur tane tar nimalarar sa. Misiana ro kula pe no uelhire God pare,

“God e uoto tur tane tasir tamata gera uairana katongois.

Bo e uoto ueldolomo pukuon, kare guata uaia tasir tamata gera kale uahiuais.”

*Nitabila Uaia 3.34*

<sup>b</sup> 3.18 Mat 5.9; Hib 12.11    <sup>c</sup> 4.1 Roum 7.23    <sup>d</sup> 4.4 Roum 8.7; 1Jo 2.15    <sup>e</sup> 4.6 1Pi 5.5

<sup>7f</sup>Temaene inggoum pakung heir katongosioum tang God, karung uangoul i kukulebanga tatanon. Inggoum pakung tur tane tang Satan mare ualo liuono tamiuoum. <sup>8g</sup>La uahuhutula tang God mare la uahuhutumeono tamiuoum. Inggoumeitir uoto guata tar niguata uasa, uadelauana tar tukunumi! Inggoumeitir torik remi ninaman, uadelauana tar ninamana uasanit re moko tar balamiu. <sup>9</sup>Inggoum pakung ueldolom, karung kiring. Ahik pah mu uaha baka poluk, bo mu kiring kompe tar niguata uasanit kung guataig, <sup>10h</sup>karung kale uahiuasioum tar matanar Tamata Noman. Gerung guatoum pare, a Tamata Noman e turung kale kai tamiuoum.

### Inggeig ahik pahi mene uasa tar tang giameh

<sup>11</sup>Ro bung uanotoug, inggoum ahik pah mu mene uasa tasir gisiameher tamatar nang God. Getung mene uasaoom tasir gisiameher tamat ue mu tohotola tar puhung uelhire tasisin, inggoum kung uelhire uasa tena puhung ualatut God, doh kung uelsigala tananin. Doh gete kung uelsigaloum tena puhung ualatut God, inggoum ahik pah mu uangoul sira baka poluk pare, o tamata ra uangoul teil i kukulebanga tena puhung ualatut God. Ahik, inggoum misiana pah kung kotpokoso sira pare, o tamatang kedanga tar ualatut. <sup>12i</sup>God me pahene ke uakotpokoso tar ualatut, doh inggono me pahener tamatang kedang. Inggono kompe re banotong uelkarus tasir tamat, doh tar mamantouo tasisin. Doh ingga te mai maro kedanga tasir gisiameher tamat?

### Inggeig i tele tar niuangouleit i uoum.

<sup>13j</sup>Auia, mu ualongoro totoguo, inggoumeit rung kula pare, “Daan ue roliuo inggeig i la tar siokor uan, tar buturuon i la uangouleig mo sioko ro krismas, kari uualo menagi kalekinale, kari uakotpokoso me bureher mani.” <sup>14k</sup>Inggoum mu uoto kula tar puhuninanine, bo inggoum puk mu tel, a inete haua re turung kotpokoso roliuo. Nami niuangouloum misiana toro diku gero kotpokos, karo moko sikoro baka puk, karo rouo uakapangua. <sup>15</sup>A uiantiehe ge pakung kuloum pare, “Gete malara God, auia inggo u uangoul, karu turung guata tar inete ku namanain pare u guat.” <sup>16</sup>Bo inggoum puk mu uoto meneng uasalasioum, karung uelhire tauete tar uleikir kalekinale rung marang guatain. A meneng uasalaninanine a hagar uasa.

<sup>17l</sup>Namana uanon gete ko ate manasa ingga me siokor hagar uaia ro banotong guatain, bo ahik puk pah ko guat, ingga ko guata manasa tar niguata uasa.

<sup>f</sup> 4.7 Epe 6.12   <sup>g</sup> 4.8 Ais 1.16; Sek 1.3; Mal 3.7   <sup>h</sup> 4.10 Job 5.11; 1Pi 5.6   <sup>i</sup> 4.12 Roum 2.1; 14.4   <sup>j</sup> 4.13 Luk 12.18-20   <sup>k</sup> 4.14 Ker 39.5,11; NU 27.1   <sup>l</sup> 4.17 Luk 12.47

### O uelhireng uatagin tasir tang mani

**5** <sup>1</sup>Auia, inggoumur tang mani mu ualongoro totoguo. Mu kiring, karung kula ualeik uasa tun tar uleikir niduh re marang kotpokoso tamiuoum. <sup>2</sup><sup>m</sup>Nami inetoum ke mout manas, doh nami gomoum ka einigir kurkur. <sup>3</sup>Nami gouloum, doha silva ke mout manas, doha moutinanin tere turung uahire teremi hagar uasaoum, dohe turung ein tar tukunumioum misiana toro hue. Inggoum kung uamoko toto tanik tenami inete tar uadouhinar marein.

<sup>4</sup>"Bang! O tamatang kalekinale geke kalekinale tonomio ioumoum, doh ahikioum pah kung bulbulaua tasisin, ka kiring tang God mare pehahauono tenami hagar uasaoum. Nas nikiringisinasiner tamatang kalekinale ke la kotpokoso manasa tar talinganar Tamata Noman ger Tampopokohontieh. <sup>5</sup><sup>o</sup>Nami niuangouloumane i koto ke uoun tar bureher inet, doha niuahang tar kot. Inggoum kung uauleik tanikasioum tar Mareining Kedang, te ngohina kompe geta kaueke uauleikir tamata tasir hueit gera la toro niein uleik. <sup>6</sup>Inggoum kung kedanga tasir tamatar kodkodoho pare, o sa, karung uiliatung poum tasisin. Doh gisin ahik pah ka tur tane tamiuoum.

### Inggeig i uangangoul hamas, kari huata bolongur tar niduh

<sup>7</sup><sup>p</sup>Ro bung uanatoug, mu uangangoul hamas e tuka gete lamer Tamata Noman. Inggoum mu ate, tanener iom e uoto uangangoul hamas tono mahar koto tar uakukuanana tar niein. Inggoum e uangangoul hamas tena binakar huan, doh na binakar pisar ura kalekinale bak, song re kale tar niein uaia tun. <sup>8</sup><sup>q</sup>Inggoum pono mu uangangoul hamas, karung uatampopokohosioum tar huata tar niduh re moko tatamiu, ge na marein per Tamata Nomana ke uahuhut manasain.

<sup>9</sup>Ro bung uanatoug, ahik pah mu ueluelngure katongosioum mara hik God pahe kedanga tamiuoum. A Tamatang Kedanga ke uahuhut manasain, ke uahuhutung kotpokoso manas.

<sup>10</sup>Ro bung uanotoug, mu namana uanono tasir propet geke uelhire tauete tar hanganar Tamata Noman. O uelmatan ka guata uasa tasisin, bo gisina puk ka uangangoul hamas keip sikoro kompe tar niduhunin menia tar uelmahing. Mu guata sira tenas hagarisin, karung uakeluk. <sup>11</sup><sup>r</sup>Namana uanon, inggeig i kula pare, "Mais ra uangangoul hamas keip tar niduh, gisin tera banotong uah." Inggoum kung longoro ke uangangoul hamas pe Job, karung ate hape ke poum per Tamata Nomana tatanon i muduhia. Ge a Tamata Nomana pe a uoun tar niueldolom, kara niguata uaia.

<sup>m</sup> 5.2 Mat 6.19    <sup>n</sup> 5.4 Ual 24.14-15    <sup>o</sup> 5.5 Luk 16.25    <sup>p</sup> 5.7 Ual 11.14; Jer 5.24

<sup>q</sup> 5.8 Roum 13.11-12; 1Pi 4.7    <sup>r</sup> 5.11 KT 34.6; Job 1.21-22; 2.10; Ker 103.8

<sup>12</sup>Ro bung uanatoug, a uakikilanganar inete pakung namana uanonoium te pare, ahik pah mu uaman i ran. Inggoum ahik pah mu uamana tola i Heuen ue gane i kot ue mu uamana tola me giameher inet. Kula kompe, aa ue ahik mara hikoum pah mu haiala tena nikedanga God.

### Lotu keip tar nitagorong man

<sup>13</sup>Gete kaein me tang sioko tamiuoum e huata teil me niduh, inggono pake lotu tang God. Doh gete kaein me tang sioko re uah, inggono pake ker tar kerekereng uatakai tar hangana God.

<sup>14</sup>Gete kaein me tang sioko tamiuoum re momouh, inggono pake kila tasir mamahoholikin tar lotu ra lotu keip tatanon, kara koboto tar uaiuai tatanono tar hanganar Tamata Noman. <sup>15</sup>“A lotu ger nikotouo keip tar nitagorong man e turung uauia tar momouh. A Tamata Noman e turung uauia tatanon, doha niguata uasa geke guatagion ra turung kale liuig.

<sup>16</sup>Temaene inggoumur tang siok, tang siok mu uelhire tauete teremi niguata uasa toso uanotomiu, karung ueluelotue, marung uiaoum. Na lotur tamatar kodkodoh a popokoh, dohe banoto tun e uakotpokoso tar huar inete ra dangatain. <sup>17</sup>“Elaija a tamata sira puk pono tagigeig. Inggono ke lotu uapopokoh mara hik me huan, doh ahik nomananguampe me huana ke dur tar koto toro touono ro krismas, doha tonomor bialok. <sup>18</sup>“Song ke lotu polukuon, kare durar huan, song ke bukir tapokisir uan.

<sup>19</sup>“Ro bung uanotoug gete hiliu tur me tang sioko tamiuoum tar leler kodkodoh, dohe keip tapokisime me kalamiuoum tatanon, <sup>20</sup>“namana uanon, mai re keip tapokis tur me tamata uasa tar lele uasa ke uaudeil tar iabener tamata uasaono toro mat, doh ke guata maene a burehenar niguata uasar nanon ra turung kale liuig.

---

<sup>s</sup> 5.12 Mat 5.34-37    <sup>t</sup> 5.14 Mak 6.13    <sup>u</sup> 5.15 Mat 17.18-20    <sup>v</sup> 5.17 1To 17.1; 18.1  
<sup>w</sup> 5.18 1To 18.42-45    <sup>x</sup> 5.19 Gal 6.1    <sup>y</sup> 5.20 NU 10.12; 1Pi 4.8

# 1 Pita

## O uakikilangana ro bolobolo ke boloin Pita

### O uakikilangana ro bolobolo tang Pita

O uakikilangana ro buk Pita o bolobol i lolono toro Baeboul tar timuhur uelhote. A tamata ke bolo tana roon, inggono te Pita. Pita na aposoul Iesu. Pita teke tamatang uoum keip tasir uakikilanganar tamatang tagorong man i Jerusalem.

Pita ke bolo toro bolobolo tasir tamtang tagorong man geke kale uelmahing tar niduh uleik. Pita ke mene uatampopokoho tasisina mara uangoul uadedeil dedeis. Res niduhusin e turung kapampe ahik pahih reh. Bo no uelhire God ahik paho kapa tagu. Gisina ra turung uangoul tagu dede tang God i Heven. Doh i Heven, gisin ahik baka poluk pah ra turung kale uelmahing.

God ke umatoto tasisina pare, no tamat (1Pi 2.10) Maeit gisin o tamata giamehesioko tun tatanon. Gisin ahik paho tamatang gane tagu i kot (1Pi 2.11). Gisin o peng heven.

Ge Iesu pe ke kale uelmahing tur pono tar bureher inet. Bo inggono puk ahik pah ke mene hahaua ka menmene uasa pein. Ahik pah ke menmene uabureh, inggono ke tagorong mana tang God.

Doh tar binaka ke maton, inggono ke kale uelmahing tar niuabatong teregi niguata uasaieg. Doh te pare teke guata peono tagigeig ke kilo pokoso pe tagigeig no tamata God (1Pi 2.21-25).

### I lolono toro bolobolo rone:

A meneng uakalahar 1.1-2

A uanamanahuar tena niuelkarus God 1.3-12

Na nikila God tagigeig mari kotpokos o tamata dedeil 1.13-2.10

Nas kalekinaler tamatang tagorong mana tar binakang huata tar niduh  
2.11-4.19

Hape re kale uahiua peisir tamatang tagorong man, kara kalekinale 5.1-11

A uaduaduhinar menemen 5.12-14



### Pita e heir tar niuaha tasir tamat

**1** <sup>1</sup>Inggo Pita na aposoul Iesu Kristo, God ke uamatoto totoguo tar kalekinale tosono tamaton geke kedangais gera uangoul ueltebeir toro pang uaninine: i Pontus, i Galesia, i Kapadosia, i Esia kari Bitinia. <sup>2</sup><sup>a</sup>God ge tamagigeig ke kedanga tamiuoum sioun terener nimalar, inggoum kung dedeil tur tena kalekinaler Iabena Dedeil, kung uakeluk pe tang Iesu Kristo, kara uahuhusioum tar deuatinginon. Inggo u lotu tang God mare heir tar hamhamas, karo hiarou o uoun tatading tun tamiuoum.

### Ti uatakai keip tang God tar nitagorong maneit rung uangoul keipisoum ger tua

<sup>3</sup>Uatakai tang God ge tamana Iesu Kristo ge nagi Tamata Nomaneig! Tar uleikir niueldolomor nanon, inggono ke heir tagigeig tar timuhur nitua, kara timuhur nitagorong maneit rung uangoul keipisoum ger tua, ke tua tapokis pe Iesu Kristo toro mat. <sup>4</sup><sup>b</sup>Temaeit, inggeig i uangoungoulungua tar inete uaiaonene ra turung heirin tagigeig, ge ahik pahe matotong beng ue e sa tagu ue e la kapa kout. God ke uamoko uangoul taninin i Heuen tamiuoum. <sup>5</sup><sup>c</sup>Inggoum ke gomo tane tun God teremi nitagorong manoum tar nitampopokoh e tuka tar uadouhinar binaka gete tur uakalaharar tang uaudeil tagigeig. <sup>6</sup><sup>d</sup>Tar ineteninanine, inggoum mu uaha tun, bo gine puk daan, inggoum mu uangoul keip tar niduh, karung hagouo uasa tar mamang hagarilik tar sisikinalikir binak.

<sup>7</sup><sup>e</sup>Ginin ke pokos, maeit remi nitagorong manoum a mana tun, a i ranantiehe uain tar goul gere moko puk tar sikina geta uedanga toig toro hue ge para goul noman. Bo remi nitagorong manoum a i ranantiehe uain tar goul, ra uedanga ponoig mare moko uanon. Song rung turung kaleoum tar uatakai, kara uiniator, kara niueltada tar binaka re tur uakalahara Iesu Kristo.

<sup>8</sup><sup>f</sup>O man, inggoum ahik pah kung banga tatanon, karung malaelhirimpe tatanon. Gitiempe ahik peoum pah mu matotong banga tatanonene daan, bo inggoum kung tagorong mana dedempe. Temaeit inggoum kung uahauhantiehe tun, a uleikintiehe remi niuah. <sup>9</sup>Teet inggoum mu turung kale tar haua kung uamoko tunin teremi nitagorong mana mare uaudeil dede God tamiuoum.

<sup>10</sup><sup>g</sup>Sioun o propet ka me menmene uoum teil tar puhonene ka uaudeil peisoum, kare tar hamhamas, kara niueldolomo gere turung lame tamiuoum. Gisina ka sirsir, kara heheke uaia tun, <sup>11</sup><sup>h</sup>mara ueltupara tun tang hingiar binaka re hire uamototo tunur Iabena Dedeil tasisina tar

<sup>a</sup> 1.2 Roum 8.29; 2Te 2.13    <sup>b</sup> 1.4 Kol 1.12    <sup>c</sup> 1.5 Jon 10.28; 17.11    <sup>d</sup> 1.6 Jas 1.2; 1Pi 5.10

<sup>e</sup> 1.7 NU 17.3; Sek 13.9; Mal 3.3; Jas 1.3    <sup>f</sup> 1.8 Jon 20.29; 2Ko 5.7    <sup>g</sup> 1.10 Mat 13.16-17

<sup>h</sup> 1.11 Ker 22; Ais 53; Luk 24.26-27

binaka re kale uelmahing Kristo, kare tar uiniatoro uleik gere uakeluk teil.

<sup>12</sup>A Iabena Dedeil ke uakalahara tasir propet, maeit ahikisina pah ra poul katongo pukis, bo ra poul pono tamiuoum tar binaka ra hire tar haua kung longoro me giamehene daan tosno tamatang ualualatue God, ka hire tauete pe tamiuoum toro Uelhire Uaia ro la tur tar Iabena Dedeil geke la turuha i Heuen. Doho anggelou ra marang ate pono tar inetenin.

### Uangoul uadedeil

<sup>13</sup>Temaeit inggoum mu kaleuatoro tanik teremi ninamana tar haua rung pilesig, kaueke uakodkodoho katongosioum. Karung uamoko tun teremi nitagorong maneit rung uangoul keipin tar niguata uaia ra turung heirin tamiuoum binaka re tur uakalahara Iesu Kristo. <sup>14</sup><sup>i</sup>Longor, karung ueltada tun tang God, doh ahik pah mu uakeluk teremi nimalara uasan tar tukunumi misiana kung uakeluk peme sioun tar binaka halana tung ate tang Iesu. <sup>15</sup>God ger dedeil, inggono teke kila tamiuoum, temaeit guata keip tar haua rung guataig tar dedeilir hagar. <sup>16</sup><sup>j</sup>Ge a puh pe a nibolo pare, “Uadedeilia ge inggo pe a dedeil.”<sup>k</sup>

<sup>17</sup><sup>l</sup>Inggoum mu kila tang God pare, Tamamiu, binaka rung lotu tatanon, inggono teke kedanga tasir tamata uakapa tun, e lampein tang hingiar hagar ke guatain, temaeit heir tar mamang binakalik rung uangoul pe tar sisikinalikir binakane i kot tar ueltada tang God. <sup>18</sup>Ge inggoum pe mu ate, God ke bulaua tapokis tur tamiuoum tar niguataniner tabo tengkana gekung kale uahiua turig toso bubungumi sioun. Inggon ahik pah ke bulaua keip me inetenine re matotong sa misiana tar mani ue me goul, doh silva. <sup>19</sup><sup>m</sup>Inggono ke bulaua keip tagigeig tar deuatingina Kristo, ginin ter i ranantieh uain. Inggon ter sipsip ahik me ineter sa ue me maharana taboig tatanon. <sup>20</sup><sup>n</sup>Inggono ka uamatotoing sioun tar binaka halanar koto te pokos, bo ka uatur uakalahara kompein tar uadouhinar mareninine mare poul tamiuoum.

<sup>21</sup><sup>o</sup>Inggoum kung tagorong mana tang God, teeit tang Iesu ke uatua tapokis tur pe God tatanono toro mat, kare heir tatanono tar uleikir uiniator, temaeit inggoum mu tagorong mana tang God, karung tagorong mana teil tar haua ke me ualapagahagion.

<sup>22</sup><sup>p</sup>Inggoum kung uadelauana katongo manasasioum kung uakeluk pe toro man, temaeit a uelmalauelireitir emiuoum toso uanotoumiu a mana tun. Mu uelmalauelhir keip tunusioum i lolono tar koloumiu. <sup>23</sup>Ge inggoum pe kung kale tar timuhur nitua, ahik pah kung kale tur tar inete

<sup>i</sup> 1.14 Roum 12.2; Epe 2.3; 4.17-18    <sup>j</sup> 1.16 Mat 5.48    <sup>k</sup> 1.16 Bolobolong Kalekinaler Pater 19.2; 20.7    <sup>l</sup> 1.17 Roum 2.11; UGO 2.23    <sup>m</sup> 1.19 Apo 20.28; Hib 9.12-14    <sup>n</sup> 1.20 Epe 1.4; 2Ti 1.9-10    <sup>o</sup> 1.21 Jon 14.6; Roum 5.1-2    <sup>p</sup> 1.22 Jon 13.34; Roum 12.10

ger mat, bo inggoum kung kale tur tar timuhur nituaono tang God gere uangoul dede, kare tono uelhireono gero moko dede. <sup>24</sup>A puhung uelhire ka boloiing sioun pare,

“O tamata uakapa tun misianar garas,  
doha nimataia tasisina misianar kalanguh.  
O garas o makmakor,  
kara kalanguh e sab.

<sup>25</sup>Bo no uelhire God o moko dede sira kompela.”

*Aisaia 40.6-8*

Roono te rone ka hire tauetein tamiuoum.

### Iesu tero palau gero tua

**2** <sup>1</sup>Mu uadelauana katongo bakasium tar inetenine: a mamang niguata uasalikininer sa, o bohoboh, guata kokop tar inet, boho tola tar tang giameh, ueldud, karo ueluelsigalalik. <sup>2</sup>Mu uangoul sira tasir keketikisiner nihing poh ra marang huh totouaha kompe tar huh, te misiana tamiuoum ge pakung marang kale totouaha tar mamang inete uaia gere la tur tar Iabena Dedeil marung turung huang tagal, kara uaudeilisioum, <sup>3</sup>misiana ka bolo peinir puhono sioun tono uelhire God pare, “Inggoum song kung ueltupara katongo tun hape re uia per Tamata Noman.”

<sup>4</sup>Mu la uahuhutume tar Tamata Noman, inggono misiana ro palaua gero tua geke kedangain God pare, o uia tun, bosir tamata ka ueluelde tatanon.

<sup>5</sup>Inggoum misiana ponor palaua ger tua geka tuha keipig tena umar Iabena Dedeil. Ter buturuono mu kalekinaleoum pare, o patere dedeil tar guata tar uahung ger nanar Iabena Dedeil gere malauelhirin God teeit tang Iesu Kristo. <sup>6</sup>Ge o uelhire pe geka boloin sioun o hire teil pare,

“Inggo ku uatoko toro palaua geku kedangaio,  
gero i ranar bulauan, o uatabil tar gon i Saion,  
doh mai re tagorong mana tun tatanon  
ahik pahe matoto ra uamatalain.”

*Aisaia 28.16*

<sup>7</sup>Inggoumene rung tagorong man, o palaua roon o i ranantiehe uain tun. Bo tasisine ahik pah ra tagorong man,

“Te misian toro palaua geka baka liuinir tang tuh,  
bo roono puk tero i ranantiehe tun.”

*Ker 118.22*

<sup>1</sup> 2.1 Epe 4.22; Jas 1.21    <sup>2</sup> 2.3 Ker 34.8    <sup>3</sup> 2.5 Epe 2.21-22; UGO 1.6    <sup>4</sup> 2.6 Epe 2.20

<sup>8</sup>Doho giamehe pono ro uelhire ka bolo ponoin pare,

“O palaua ko ueltuka tasir tamat,  
roon teko guat, maeit ka pungasin.”

*Aisaia 8.14*

Gisis ka pung teka tagorong boho toro Uelhire Uaia, teeit God katongompe ke malar.

<sup>9</sup>“Bo inggoum tesir tamata ka kedanga manasasioum, inggoum te misiana pah terung pepe teil toro matina tasir patere gesir toia, a pang uan a dedeil, kare no tamata God, karung mene uakalahara tar niguataniner uiar nanon, ge inggono pe ke kila tauete tur tamiuoum tar kitup, karung lame tar luh ger uiantiehe tun a nanon.

<sup>10</sup>“Sioun inggoum, ahik pah no tamata God,  
inggoum ahik pah kung kale tar niueldolomor nang God,  
bo gine daan, inggoum kung kale tena niueldolomon.”

*Hosea 1.6,9; 2.23*

### Uangoul sir tasir tamatang kalekinaler nang God

<sup>11</sup>“Ro bung uanotoug, inggo gine ru kula uapopokoho tun tamiuoum, uangoul sira misiana tasir pokos, karo luluaharane i kot, ahik pa mu tanganasioum tar nimalara ger sa gere la tur teres nimalarar tamat gere uoto uelkoi keip tar iabeimiuoum. <sup>12</sup>“Uangoul keip uaia dede tasir tamata gera tele tang God, maeit geta marang boho tolasina tamiuoum me niguataniner sa, ahik pah ra matoto geta banga tar niguataniner uiar namiuoum, kara uatakai puk manasa tang God tar binaka re me banga tapokis tagigeig.

### Uangoul i kukulebang tasir tamata uleik

<sup>13</sup>“Heir katongoia tar Tamata Noman tar mamang hagariliking uoum keip, kara haua gera uatenturig i uantinanina tasir tamat, hingiamper tang uoum keip geta toiaoneitir i ranantiehe tun na nikauek, <sup>14</sup>ue tang mai geke umatotoinir toia tar heir me uabang manate tang mais geka guata uasa, kare uauaha tas mais ka guata uaia. <sup>15</sup>“God e malara tamiuoum tar guata uaia marung uuangoul bukbukoum tenas nimener tuktukar ger tabo tengkan. <sup>16</sup>Uangoul keip tar niuaha misiana tar tamata gere uangoul tena nimalara katong, ahik pah mu uahang rana puk, karung me guata kokopo keip tenami niguata ger sa, bo mu uangoul sira kompe no tamatang kalekinale God.

“ 2.9 Ual 7.6; 14.2; Ais 9.2; Apo 26.18; Epe 5.8    √ 2.11 Gal 5.17,24    √ 2.12 Mat 5.16  
× 2.13 Tai 3.1    √ 2.15 1Pi 3.16

<sup>17z</sup>Ualasis tenami uleikir ueltada tasir mamang tamatalik, malaelhir toso uanotoumiu gera tagorong mana tang Kristo, ueltada tang God, karung ueltada tar toia.

### Uakeluk tena niguata Iesu

<sup>18 a</sup>Inggoumur karabus, uangoul i kukulebang, karung ueltada tenami tang kauek, ahik pah tas mais gera guata uaia ue ra hamhamas tamiuoum, bo tas mais ponompe ra guata uasantiehe tun tamiuoum. <sup>19</sup>Ge God pe e turung guata uaia tamiuoum, ahik pe pah kung guata uasa, teeit kung uakeluk pe tena nimalaron, karung huata tar niduhunin, karung kale uelmahing. <sup>20 b</sup>A hauangua ra turung kaleinisina geta guata uasa, kara halhaluhis, kare mahingis tar puhung barah? Bo getung kale uelmahingoum tar puhung barah tar niguataniner uia, God e turung guata uaia tun tamiuoum.

<sup>21 c</sup>Tar ineteninanine, God ke kila tamiuoum, teeit Kristo ke kale uelmahing tamiuoum mara bangbanga toin na niguata Iesu rung uakeluk sira tun peoum tatanon. <sup>22 d</sup>“Inggon ahik pah ke guata tagu me niguata uasa, doh ahik pah ka longoro taguin mo boho ko tauete tur tar uauan.”

<sup>23 e</sup>Doh tar binaka ka uelsigala no uelmatanono tatanon, inggon ahik pah ke uelsigala hahaua tagu tasisina tar binaka ke kale uelmahingon, inggon ahik pah ke perere ue e pehahaua tasisin, bo ke uamoko kompe tena nitagorong mana tang God ger kodkodoho tun na nikedang. <sup>24 f</sup>Inggono me pahene ke huata teregi niguata uasaeig tar tukunun tar korose, maeit geti mat inggeig teregi niguata uasa, inggeig i uangoul uakokodoh, ge toro deuatingina peono teko uauia tagigeig. <sup>25 g</sup>Ge inggoum pe misiana tasir sipsip geka hilhiliu ueltebeir, bo gine daan inggoum kung tapokisime tang Kristo ger tang kaueke sipsip tere kaueke uaia tun tamiuoum.

### Hape ura ueltada katongo peis ramatang bulout

**3** <sup>1 h</sup>Tar siokonor hagar inggoumur kuaha le mu guata sira pon, karung kale uahiu katongosioum tosnomio bulout, doh getung leoum mo bulout ge ahik pah ra tagorong mana tang Iesu, inggoum mu guata uakeluk kompe tar haua ra malaraisisin, maeit ra banga tosina tar nipileser namiuoumur kuah, kara turung tagorong manangua toro Uelhire Uaia, ahik pah mu petutup tasisina tar kale tang roon. <sup>2</sup>Gisin e turung uiuir katongois geta banga to tar nipileser namiuoum a delauana tun, kara niueltadar namiuoum.

<sup>z</sup> 2.17 Roum 12.10   <sup>a</sup> 2.18 Epe 6.5   <sup>b</sup> 2.20 1Pi 3.14,17   <sup>c</sup> 2.21 Mat 16.24;  
Jon 13.15   <sup>d</sup> 2.22 Ais 53.9   <sup>e</sup> 2.23 Ais 53.7; 1Pi 3.9   <sup>f</sup> 2.24 Ais 53.5-6; Roum 6.11  
<sup>g</sup> 2.25 Isk 34.5-6; Mat 9.36; Jon 10.14; Hib 13.20-21   <sup>h</sup> 3.1 Epe 5.22

<sup>3</sup>iAhik pah mu uamatmate hamas pukusium tar inete, kara niguatanine: uir tar ulun, mindal, a kabon ger pang hain ger i ranar bulauan, kara gomono ger i ranar bulauan, ahik pah mu uamataia puk i morenehia. <sup>4</sup>Bo inggoum pakung uamatmate hamas i lolono tatamiu tar ineteniner mahang kap: uangougoul sikor, kara niguatar hamhamas ter nimataiaonene re malarantiehe tunin God. <sup>5</sup>Ter hagarionene, ra uoto uakelukinir kuahang sioun gesir dedeil gera uamoko tun teres nitagorong mana tang God, ra ueltada pe, kara uakeluk tun tar nimalara gera kulain nosio bulout ter hagariono re uamatmata hamas tasisin. <sup>6</sup>JMisiana tang Sara ke longoro pe tang Abraham, kare ueltada tatanon, kare kila tatanono na mamahoholik. Doh inggoum teso bung tunon getung guata uakeluk sira tunoum tar niguataniner kodkodoh, inggoum ahik pah mu matotong sokoro me inete gere ualakanuh.

<sup>7</sup>kDoh ngohina tamiuoum ro bulout pakung hamhamasa pono tosnomio kuah, karung ueltada tasisin, ter hauon gisina ahik mes nitampopokoho maura siokor uakotopokoso raoum ramatang bulout tar nitua gere heirin God, maeit ahik pono me inete re uapekout tenami lotuoum.

### Kale uelmahing tar niguata ger uia

<sup>8</sup>Nag uadouhinar menmeno tamiuoum uakapa tun teenine: mu ueluahesioum, ueldolomesioum, uelmalauelhiresioum, kale uahiua katongosioum, kara hamhamasa nami niuangoul. <sup>9</sup>Ahik pah mu pehahua tapokis tar niguataniner sa, ra guataig tamiuoum tar hagar uasa, ahik pah mu uelsigala tapokis geta uelsigalasioum, inggoum mu heir tapokis kalehe puk tar niguatar uia, geter puh tun peon, maeit ke kila God tamiuoum mare heirono tamiuoum tar niguata uaia. <sup>10</sup>Ge o uelhire pe geka boloin sioun o hire teil pare,

“Mai gere marang uangoul keip tar niuaha tena nitua, kare banga tar binaka uaia,  
 inggon ahik pahe mene tar meneniner sa,  
 kara hik pahe ueluatata tar boh.

<sup>11</sup>Inggono pake turung tar mud tar niguataniner sa,  
 kare uakeluk kompe tar niguata uaia.

Inggono pake uatampopokoho tar guata tar uahiarouo tasir tamat.

<sup>12</sup>Ge God pe e kauেকে tun tas mais gesir kodkodoh,  
 kare longoro tenas lotusin,  
 bor Tamata Noman e turung tur tane tas mais  
 gera guata tar niguataniner sa.”

*Ker 34.12-16*

<sup>i</sup> 3.3 1Ti 2.9   <sup>j</sup> 3.6 Uak 18.12   <sup>k</sup> 3.7 Epe 5.25

<sup>13</sup>Mai re turung tung tamiuoum getung malarantiehe tunoum tar niguata ger uia? <sup>14</sup><sup>l</sup>Bo, getung kale uelmahingoum tar niguataniner kodkodoh, inggoum mu uah, ge God pe e guata uaia tamiuoum, ahik pah mu sokoro tasisin, karung namanantiehe tun. <sup>15</sup>Bo i lolono tar koloumiuoum uamoko tang Kristo pare, ter Tamata Noman. Kaleuatoro tanik dede tar hire uakalahara tas mais gera dangata tamiuoum tar tengkanar nitagorong maneit rung uangoul keipisoum. Bo inggoum mu mene keip kompe tasisina tar hamhamas, kara niueltad.

<sup>16</sup><sup>m</sup>Kale uanono tun tar ninamana ger kodkodoho tun rung heir pe tar uelhire tasisin, maeit mais gera marang mene uasa tamiuoum, auia tun pe nami niguata rung uakeluk pe tang Kristo, ka ra turung matala keip inguarina tonoso boh. <sup>17</sup>Auiantiehe tun gete na nimalarampe God tar kale uelmahing tar niguataniner uia ue tar kale uelmahing tar niguataniner sa?

<sup>18</sup>Ge Iesu Kristo pe ke mata uasiokon sioun teres niguata uasar tamatang gane i kot. Ter tang siokor kodkodoh ke mata ueleheir tasir tamata ge ahik paho kodkodoh mare keip tasisina tang God. Inggono Kristo ka tung pousinir tukunun, kare uatua tapokisir Iabena Dedeil tatanon.

<sup>19</sup>Doh inggon teke la hire tasir iabeisir mat, gera uangoul tar karabus, <sup>20</sup><sup>a</sup>geka mahang longoro sioun tar binaka ke heir binaka pe God tasisin mara uiuir tenas niguataniner sa. Tar binaka pe ke tuha Noa tar parau, o papagalik pukur tamata ka panete tar parauiou, a tualang sioun kura udeil tar laur. <sup>21</sup>Doha laurinin tere uahire teilinguaene daana tar uahuuene ri uoto kaleieig tar binakang babtais, ginina teke uaudeil tamiuoum ahikiono pahe kale liu tar muskurum tar tukununar tamat, bo inggono ter ualapagah ri guataieig tang God mari tagorong mana dede tena nitua tapokis Iesu Kristo.

<sup>22</sup>Kristo ke la i Heuen, kare tabila tar pang makoso tang God, o anggelou uakapa tun, kara nikaueke uakapa tun, doha nitampopokoh e siokor moko tena nikaueke Kristo.

#### Uangoul sira no tamata God

**4** <sup>1</sup><sup>o</sup>Temaieit ke kale uelmahing Kristo tar tukunun, inggoum mu uinatoro tanik pono tar siokonor hagarono gete lame tamiuoum. Ge mai pe re kale uelmahing tar tukunun, inggon e kapa manasa na niguataniner sa. <sup>2</sup>Temaieit, a nituaene rung uangoul keipioum tar kot, ahikir nimalara gere uauaha puk tar tukununa pahe uasuasa tamiuoum, bo inggoum mu uangoul sira re nimalara pe God. <sup>3</sup><sup>p</sup>Ge inggoum pe kung

<sup>1</sup> 3.14 Ais 8.12-13; Mat 5.10; 1Pi 2.20; 4.14    <sup>m</sup> 3.16 1Pi 2.12    <sup>n</sup> 3.20 Uak 6-7

<sup>o</sup> 4.1 Roum 6.2,7    <sup>p</sup> 4.3 Epe 2.2-3

uangoul keipime sioun tar niguata ra malaraisir tamata gera tele tang God geka uangoul keip toro uraur, o gehegehelik, uoto sipaka keip tar ninamana uasa, kara guata keip tar niein uelik tar inetenine, uasipaka tasir tamat, ura ueltebeir, kara guata uasantiehe tun tar lotu tasir god bohoboh.

<sup>4</sup>Doh gine daan, gisina ra turung lutara ke uiuir peisioum ahik pe pah mu uakeluk tar niguataniner roke gere moko teilir niguata uasar nasisin, song ra menmene uasanguasina tamiuoum. <sup>5</sup><sup>a</sup>Bo gisina puk ra me turung hire uakalahara katongois tang God gere tabila uangoul puk manasa tar kedang tasir tua, doho mat. <sup>6</sup>Ge inggono pe ter tengkan, maeit ka hire tauete ponoin, ro Uelhire Uaia tasir tamat geka mata uoum, maeit gisina ra turung kedangais, ra kedang uamatotois tenas niuangoulane i kot. Maeit gisina tar iabeis pake turung uangoul keip tar nimalarar nang God.

<sup>7</sup>A uadouhinar marein ke uahuhut manasain, temaeit mu uatakapuka teremi ninaman, karung uakodkodoho bakasioum, song rung lotu. <sup>8</sup><sup>b</sup>Doh ter puh re kokop tane tar mamang inetelik uakapa tun teene, uelmalauelhiresioum, teeit a uelmalauelhir e kokop tane tar bureher niguata uasa.

<sup>9</sup><sup>c</sup>Mu uelkila uatorosioum, karung ueluahesioum, ahik me mamangusul. <sup>10</sup><sup>d</sup>Ge inggeig kahakaha pe o tang kaueke uaia tun tar inete uaia ke heirig God tagigeig mari poul keip tar niuia tasir gisiameh. <sup>11</sup>Gete me tansioko re mene tauete me inet, inggon e guatampe geke kale tur peono tar uelhire tang God, doh gete me tang sioko re poul, inggono pake guata keip tar nitampopokoho ke heirin God tatanon, maeit tar mamang inetelik, God ra uatakaiain tur tang Iesu Kristo. Doh tang Iesu Kristo, a uinator, kara nitampopokoh, e la dedengua tar mamang binakalik. O mana tun.

### **Kale uelmahing ro tagorong mana pe tang Iesu Kristo**

<sup>12</sup>Ro uanotoug, ahik pah mu turung lutara tar uedanga gete la keipime tar uelmahing uleik tun misiana paha timuhur inete re pokoso tamiuoum, <sup>13</sup><sup>e</sup>bo mu uaha kompe, ge inggoum pe ke kale keip ponosioum tar uelmahing geke kalein Kristo, maeit inggoum mu turung uahantiehe tun gete pokoso uakalahara tunur uinatoror nanon.

<sup>14</sup><sup>f</sup>Gete ka uelsigalasioum, teeit tang Kristo, inggoum mu kalengua tar niguata uaia, ge na uinatoro pe na Iabena Dedeil God e me uangoul dede tamiuoum. <sup>15</sup>Ahik pah mu kale uelmahing tar tung pous tamata ue toro uenau ue tang hingiar hagar gere katego tar ualatut ue tar keipkeip uelhire, <sup>16</sup>bo gete kung kale uelmahingoum tar hangana Iesu Kristo, inggoum ahik pah mu matal, mu uatakai kompe tang God.

<sup>a</sup> 4.5 Apo 10.42    <sup>r</sup> 4.7 Roum 13.11-12    <sup>s</sup> 4.8 1Pi 1.22    <sup>t</sup> 4.9 Hib 13.2

<sup>u</sup> 4.10-11 Roum 12.6-8    <sup>v</sup> 4.13 Apo 5.41; Jas 1.2; 1Pi 1.6-7    <sup>w</sup> 4.14 1Pi 2.20



<sup>17</sup>Doh gine daana ter binakang kedanga manas, e uakekene tur toсно tamata God, doh gete uakekene keipono tagigeig hopengua tas mais ge ahik pah ka ueltada tonо Uelhire Uaia God?

<sup>18</sup>Ge o uelhire pe geka boloin sioun, o hire teil pare,

“A parakukuh tun tar uauedil tar tamata ger kodkodoh.

Doh hopengua tas mais ahik pah ra tagorong mana tang God, kare tasir tamata uasa?”

*Nitabila Uaia 11.31*

<sup>19</sup>Temaeit mais gera kale uelmahing tar nimalarar nang God, gisina paka uamoko katongois tang God ger uauaman geke touo tar koto uakapa tun, kare guata uaia dedempela.

### O mahohong tar lotu doho bulout kalan

**5** <sup>1</sup>Inggo u kula uapopokoho tun tamiuoumur mahohong tar lotu, ku banga tun tena uelmahing Kristo, kare turung kale keip ponoio tena uinatorono gete pokoso uakalahar.

<sup>2</sup>\*Tur sira pare, o tang kauеke toсно sipsip God ra uangoul i kukulebanga tar nikaueker namiuoum. Ahik pah mu guata puk, rung kale teil pe tar kalekinaleon, bo inggoum mu kalekinale keip tun tar koloumiu a delauan, kare tar nimalara re malara pe God. Ahik pah mu marang kale mani to puk tar kalekinaleon, bo inggoum mu uamoko tun teremi ninamana tenami kalekinale tar poul tasir tamat. <sup>3</sup>†Ahik pah mu uairanasioum tas mais rung kauеkeis, bo inggoum mu ualasira mara banga tosina tamiuoum. <sup>4</sup>Doh gete pokoso Iesu Kristo ger tang kauеke sipsip, inggoum mu turung kale toro keuarang tar uiniator gero mahang sa.

<sup>5</sup>†A siokono ponompe tamiuoumur kalan, uanguangoul sikor, karung kale uahiua katongosioum, karung guata uakeluk kompe tar haua ra malarain nomio mahohong tar lotu. Inggoum tokah mu gomosioum toro gomong tar hamhamas rung kalekinale tokaha pe, teeit

“God e de toro kakaialik,  
bo e guat auia kompe tas mais  
gera kale uahiua katongois.”

*Nitabila Uaia 3.34*

<sup>6</sup>†Kale uahiua katongosioum i kukulebanga tar limana God ger i ranantiehe tun mare turung kale kaiono tamiuoum gete matotoinir binak. <sup>7</sup>†Uamoko tereng mamang niduhulik tang God, ge inggono pe tere kauеke tamiuoum.

\* 5.2 Jon 21.15-17; Apo 20.28 † 5.3 2Ko 1.24; Pil 3.17; Tai 2.7 ‡ 5.5 Epe 5.21; Jas 4.6

† 5.6 Mat 23.12; Luk 14.11; Jas 4.10 ‡ 5.7 Mat 6.25-30

<sup>8</sup> Tagin! Karung uakaueke katongosioum, kare takapukar matamiu, ge nami uelmatan peoum Satan, gine re bue uiloho misiana tar laion<sup>d</sup> ger roke, e marang konomo uadeil mena tamat. <sup>9</sup> Tur tane tatanon, karung tur uanono keip puk tar nitagorong man. Ge inggoum pe mu ate, o uanotoumiuoum gera tagorong mana tang Iesu Kristo ra uangoul tar mamang buturulik i koto uakapa tun, ra kale pono tar siokonor uelmahing.

<sup>10</sup> Doh Godong tar nimalauelhir menia tar hamhamas ke kila uahiku tamiuoum tena uinator gere moko dede tang Iesu Kristo rung kale uelmahing peoum tar sikinar binak, inggono katongo re turung uaudeil, kare uatampopokoh, kare uatur uanono tamiuoum, karung uangoul uaia dede. <sup>11</sup> God e uoum keip tar nitampopohoho uakapa tun tar mamang binakalik. O Mana tun.

#### A uadouhinar uelhireng uah

<sup>12</sup> Sailas teke poul tootoguo, maeit ku bolo toro uelhire rone tamiuoum, inggo u namana tun tatanon, a uanotougou tun ger uauaman. Inggo ku bolome tar uaongolo tamiuoum, karu hire tauete uakalahara pare, a uelmalahironene a mana tun e la tur tang God. Tur uanono keip tun tatanon.

<sup>13</sup> O uanotoumiuoum gera uangoul i Babilon geke uamatoto ponois God, ka heir tenas niuaha tamiuoum, doh Mak pon ger tuguo. <sup>14</sup> Mu ueluahe katongosioum, karung nguh keip tar uelmalalhir.

Inggoum o nang Kristo, o hiarouo o la tamiuoum uakapa tun.

---

<sup>c</sup> 5.8 1Te 5.6    <sup>d</sup> 5.8 Laion ger kusi uleikintehe tun a ualaskoro tasir tamat ngohina tasir bakue ra ualaskoro tasir tamat.    <sup>e</sup> 5.9 Epe 6.11-13; Jas 4.7    <sup>f</sup> 5.12 Apo 12.2,25; 13.13; 15.22,37-40    <sup>g</sup> 5.13 Apo 12.2; 2Ti 4.11

# 2 Pita

## A uatorikina ro bolobolo ke boloin Pita

### O uatorikina ro bolobolo tang Pita

O uatorikinaro bolobolo ke boloin Pita o la uiloho tasir tamatang tagorong mana toro mamang butur. A ninamana uleik tun tanaroono te tar mene uaate tasisina tar to uahiua tasir tang ualasir gesir bohoboh, gera ualasira tar ninamanang ur.

A siokor hagarang tur uagele tar niualasiranain tera ueltupara toin geta uoho uanonoinir ninamana ger nang God, doh na ninamana Iesu Kristo ger Tamata Noman. A ninamana geke ueliuimeigir tamata geke banga tang Iesu, kara longoro pono tena niualasiron.

Pita e namanantiehe tun tenas niulasirasis ra kula pare, ahik Iesu pahe turung tapokisiha.

Pita e hirhire pare, a niuapekout tang Iesu mata la uateueleha e mokompe tar limana God, ahik pe pahe malara me tang siokor tamata ra mamantouoin, bo e malara tagigeig uakapa tar tur kauiur liu baka tenagi niguata uasa.

### I lolono toro bolobolo rone:

A meneng uakalahar (1.1-2)

A nikila tasir tamatang tagorong man (1.3-21)

O tang ualasira gesir bohoboh (2.2-22)

Na uadohinar nilaha Iesu Kristo (3.1-18)

---

### Pita ke heir tar niuaha tasir tamat

**1** <sup>1</sup>O uelhire rone ke boloin Saimon Pita na tamatang kalekinale, kare na aposoul Iesu Kristo.

Roon o la tas mais gera kale teil tar niguatar kodkodohor nang God me Iesu Kristo ger tang uaudeil tagigeig geke heir tamiuoum tar nitagorong mana ger i ranantiehe tun.

<sup>2</sup>Inggo u dangata tang God e guata uaia tun tamiuoum, kare heir dede toro hiarouo tamiuoum, teeit kung ate uaia tun peoum tatanon, karung ate pono tang Iesu nagi Tamata Nomaneig.

### God ke kila, kare kedang

<sup>3</sup>Tar nitampopokohor nang God, inggono ke heir tar mamang inetelik ri malarageig tar niuangoulung gane i kot, kari guata uakeluk tun hape re malara peon, teeit inggeig i ate uaia tun tatanon, ke kila pemeono tagigeig i lolono tar uinatoro na nitampopokoh, kare tena niguata ger uia tun. <sup>4</sup>Ter puhonene, temaeit ke heir God tagigeig tar i ranantiehe tunur ualapagah, maeit inggoum ahik pahe turung kale tagusioum tar nimalara uasa geke mamantouo tasir tamatane i kot, karung uangoul uaia sira re malara pe God.

<sup>5</sup>Ge ter puhung uleik tun peonene rung petutupusioum tere tumana tar nitagorong manar eimiuoum tar niguata uaia. Kare tenami niguata uaiaoum e tumana tar niate ger uia tun, <sup>6</sup>kare tar niate ger uia e tumana tar niguatang tar uakodkodoho katongosioum, kare tar niguatang tar uakodkodoho katongosioum e tumana tar kalekinale keip tar niduh, kare tar kalekinale keip tar niduh e tumana tar niguata re malaraig God, <sup>7</sup>kare tar niguata re malaraig God e tumana tar niguata uaiar emiuoum ger hamhamas misiana rung guata uaia pe toso uanotoumiu gera tagorong mana tang Iesu Kristo, kare tar niguata ger hamhamas e tumana tar uelmalaelhir tasir tamata uakap.

<sup>8</sup>Getung uakeluk dedeoum, karung guata tar niguatanine, ginin e uauleik dede tar niater eimiuoum tang Iesu Kristo ge nagi Tamata Nomana pe inggeig tere turung uakotpokoso tar bureher ineter uia, kara niguata uaia. <sup>9</sup>Bo me tamata ge taboigir niguataninaniner uia, inggon a hihihauar matan a kut. Ahik pahe namana tapokis bak, ka uadelauana uoum pein tena niguata ger sa ger pensioum.

<sup>10</sup>Temaeit inggoum ro uanotoug, petutup dede tar tagorong man, marung ualasira katongosioum pare, God ke kil, kare kedanga tamiuoum. Getung uakeluk dedeoum tar niguatanin, inggoum ahik pahe matotong punga remi nitagorong man, <sup>11</sup>kare turung heiringua God tamiuoum tar niuaha uangoul a uleik tun getung me pokoso tena Nitoiaon gere moko dede ger nana nagi Tamata Nomaneig Iesu Kristo ger tang uaudeil tagigeig.

### Na uelhire God

<sup>12</sup>Temaeit u uanamana dedempeo tamiuoum tar inetenine, bo inggoum mu ateng sioun taninin, kare toro man, rung tagorong mana uapopokoho

<sup>a</sup> 1.6 Gal 5.22-23

tun peoum. <sup>13</sup>Inggo u namana pare, giner tua haraha peo, auia tun tar uatua dedempe teremi ninamanoum marung namana dedeoum taninin. <sup>14</sup><sup>b</sup>Teeit inggo u ate, ahik pahi reh, karu mat. Ge nagi Tamata Nomana pe inggeig Iesu Kristo ke hire uakalahara tun totoguo. <sup>15</sup>Temaait, inggo u petutup tun tar hire tamiuoum tar inetenin, maait getu mata manaso, inggoum mu namana dede taninina tar mamang binakalik.

### Inggeim king banga tar uinatoror nang Kristo

<sup>16</sup><sup>c</sup>Inggeim ahik pah mi ueluatata mo kiukiu tamiuoum geke tut pukin me tamata tar binaka ring hire tamiuoum tar nitampopokoh, kare tar nilamer nang Iesu Kristo ge nagi Tamata Nomaneig, bo inggeim king banga katongo tun tar matamiu, hape re popokoho tun per barangana nitampopokohon. <sup>17</sup><sup>d</sup>Ge inggono pe ke kale tur tar uleikir uinator, kara uatakai tang God ge Tamanon. Tar binaka ke pokosor uau tang Iesu gere la tur tang Tamanon ger popokoho tunur barangan, inggono ke kula pare. “Gine ter Tuguo geru malaelhirintiehe tunin, inggo u uaha tun tatanon.” <sup>18</sup>Inggeim king longoro katongo tun tar uau gere mene tur i Heuen tar binakon inggeim mes Iesu Kristo mi pepe i rana tar siusana ger dedeil.

<sup>19</sup>Doh inggeig ki kale tar uelhire ger nasir propet, ginin ra ate uaia tunig a man. Inggoum mu uakeluk uaia tun tar uelhirenin misiana toro lam gero luh uamarmarein tar butur kitupun. Uakeluk dedempe tar uelhirenin e tuka tar binaka re tapokisime Kristo, kare me uakalahara tar mamang inetelik tamiuoum misiana gete kihihainir marein, kara pitopitong tar lulein gere pid uamarmarein tar koloumiuoum.

<sup>20</sup>A puhung uleik tun rung naman manatesioum pare, a uelhire ger nasir propet gerung banga togioum toro bolobol, ahik pahe la tur teres ninamana katongosin. <sup>21</sup><sup>e</sup>Gininar uelhire, ahik pah ke uatengkana tur teres nimalarasin ue mena ninamana me tamat. Gisinar propet ka uelhire tauete keip tena nitampopokohor Iabena Dedeil tono uelhire God.

### O tang ualasira bohoboh

**2** <sup>1</sup><sup>f</sup>O propet bohoboho ka uangoul tokaha keip pono sioun tasir tamatar nang God, te misiana pono tasir tang ualasira bohoboho ra uangoul tokaha keip pono tamiuoum. Gisina ra turung ualasira keip uanomo tenas boho tasir tamat mara namanampeiginin a man. Gininar boho e turung uasuasangua tar kolousur tamata gera tagorong mana taninin, gisina ra dengua pono mata uakeluk tar toia ger Tamata Noman geke bulaua tapokis tur tasisina tar niguata uasa. Temaait gisin e turung

<sup>b</sup> 1.14 Jon 21.18-19; 2Ko 5.1    <sup>c</sup> 1.16 Mat 17.1-5    <sup>d</sup> 1.17 Mat 17.5    <sup>e</sup> 1.21 2Ti 3.16; 1Pi 1.11-12    <sup>f</sup> 2.1 Mat 24.11; Jud 4

sir uabir katongois. <sup>2</sup>O bureher tamatang lotu ra turung uakelukungua tenas niguatasinaniner sa, kara niguata ger ualamatal, maeit o gisiamehe ra turung menmene uasangua tar hagarininer man, teeit tar niguataninaniner sa ka guataigir tamatang lotu. <sup>3</sup>Doh toroso kipalasinar tamatang ualasira gesir bohoboh, gisina ra turung reih me mani tamiuoum tenas kiukiu puk. Ge a uabang manate pe gera kaleinisina ke moko tur manasa tar puhung barah, gisin ahik pah ra matotong uasiaua tar inete ger ualabir.

<sup>4</sup>Ge God pe ahik pah ke poroko tasir angelou, ke heir tar uabang manate tasisina tar binaka ka guata uasasin, kare bakanguako tasisin i Hel tar butur ger kitupuntiehe tun e tuka tar binakang kedang. <sup>5</sup>God ahik pah ke poroko tasir tamata geka uangoulume sioun, ke uahoup tasir tamata uasa toro silu, bo ke uaudeil puk tang Noa geke hirhire tauete teil tar hauar ineter kodkodoh, kara mouit ponor tamata ka udeil. <sup>6</sup>Doh misiana ke mamantouo pe God tar uan uleik i Sodom dohi Gomora, ke ualuh uakalingoho pe tar toking uan uleik rasina mara ualasira tois hape ra turung guata pono peisir tamata uasa. <sup>7</sup>God ke uelkarus tang Lot ger tamata kodkodoh geke kale tar niduh toroso mahang matalar tamata ge ahik pah ka uakeluk tar ualut. <sup>8</sup>Lot a tamata kodkodoho ke uangoul keip tasisina tar mamang mareinilik, kare mahingintiehe tunin re longoro pe, kare banga teres niguata uasar tamatang katego tar ualut.

<sup>9</sup>Doh gete te paaron, a Tamata Noman e turung uelkarus pono tasir tamata uaia gete kaleisir niduh, kare kusa tane tasir tamata uasa, kare heir tasisina tar uelmahing e la tuka tar binaka ra kedangaisir tamata uakapa tun. <sup>10</sup>Gininanine a mana tun, e la tasir tamata uasa gera uakeluk puk teres nimalara uasang tar tukunus, kara mahang longoro tono uelhire God.

### A uabang manate e turung lame

Gisinasiner tamatang ualasira gesir bohoboh, karo tang uasala katongois, kara uairana katongois, ahik pah ra ueltada tas mais gesir uelpipih, bo ka uelsigala tasisin. <sup>11</sup>Misiana tosno angelou God, gisin o tampopokoh, karo uelpipih tun, ahik pah ra matotong uelsigala me mene ger sa tasisin i uoum tar matana God.

<sup>12</sup>Bosir tamatasina ra menmene uasa kompe tar hauar inete ra telein, gisina misianar inetesiner roke, ahik mes nitampopokoho tar naman, bo ra uakeluk pukumpe tar guata tar niguata re malaraigir tukunus. Gisin o nipoho mara lolois, kara tung pousis misiana tasir inete roke, gisina ra turung kale uelmahing pono toro mat. <sup>13</sup>Gisina ra turung kale uelmahing

<sup>g</sup> 2.4 Jud 6   <sup>h</sup> 2.5 Uak 6–8; 2Pi 3.6   <sup>i</sup> 2.6 Uak 19.24; Jud 7   <sup>j</sup> 2.7 Uak 19.1-16

<sup>k</sup> 2.10 Jud 7-8,16   <sup>l</sup> 2.11 Jud 9   <sup>m</sup> 2.12 Jud 10

sirampe tar uelmahing geke heirigisina tasir tamat. Res ninamanasin e moko kompe tar uauaha tar tukunus, ahik pah tar boung puk tar marein pon. Gisin o beng, ka uala uahiua tar uan, ra uauaha katongo kompeis ra einintiehe tun pe, kara sipak keip tar ninamana uasa geto taliaha ro niein tar binaka ra ein tokaha keip tamiuoum. <sup>14</sup>A matasisin e uoun kompe toro uraur, gisin ahik pah ra matotong uakenua tar niguataniner sa, kara uelour pono tasir gisiamhe gera uaruara naman. Gisina ra uaate katongo kompeis mara kipalantieh. God e turung heir tasisina tar uabang manate a uleik tun. <sup>15</sup>Gisina ka hiliu tar niguataniner kodkodoh, kara malara kompe tar uakeluk tar niguataniner sa ger nang Balam ger tuna Beor gere marang kale mani to puk tar niguataniner sa. <sup>16</sup>Bo inggono puk ke loulouarainir donki tena niguataniner sa re uoto guataig, a donki ahik pahe matotong mene tagu, bo ke mene sira tun tar tamat, kare kula tane tang Balam ger propet ahik pahe guata baka poluk tar niguataniner nasir popouluan.

<sup>17</sup>O tamatasin o tabo tengkan misiana tar noro kodomo geke papadak, kare misiana toro mahar langit gero u liuinir rom. A butur peniner kitupuntiehe tun ter nikaleuatoro tanika tasisin. <sup>18</sup>Ge gisina pe ra mene nomana tar men, bo ahik puk paha to tengkan, gisina ra uoto hire pono tasir tamata pare, ra matotong guata tar niguatar sa gere uauaha puk tar tukunusisin, Gisina ra uelour tapokis kompe tasir tamata geke nihing ualo liu puk tasir tamata gera uangoul keip tar niguata uasa. <sup>19</sup>Gisina ka ualapagaha tun tasir tamata pare, ra uangoul manasa teres nimalara katong. Bo gisina puk tera uangoulumpe i kukulebanga tar nikauekeng tar niguata ger sa gera uoto guata katongoig, ge a tamata pe geke pehuara tapokisin e uangoul a karabus tar ineton. <sup>20</sup>Gete ka hiliuisina tar niguata ger saane i kot, kara ate tun tang Iesu Kristo ger Tamata Noman ger tang uelkarus tagigeig, kara uelour tapokis polukis, kara pehuarais, gisina ra turung santiehe uain tunungua, ahik pah misiana tar uakikilangan. <sup>21</sup>Temaetit, auiantiehe tun tasisina pare, ahik pah ra matotong ate tar huar ineter kodkodoh, ter hauono geta atesina gisina ra turung turung tar mud dedempe tar ualatoho ger dedeil geke heirig tasisin. <sup>22</sup>Ge a puh pe ka bolong sioun toro bolobol ra kilain, “Tar nitabila uaiia,” o hire teil tun toro mana tasisina pare. “A lo ke lua, kare ein tapokis toro niluaan,” doh “A hueit geke uahuhu uaiia tunin, ke la iahiaha teil poluk tar lobolob.”

### Na mareinir Tamata Noman

**3** <sup>1</sup>Ro uanotoug, rone tero uatorikina nogo ueluatato tamiuoum. Inngo ku bolo tasrasina tokaha tar uanamana dede tamiuoum tar inetenin

<sup>n</sup> 2.15 Aha 22.7; Jud 11; UGO 2.14    <sup>o</sup> 2.16 Aha 22.28-35    <sup>p</sup> 2.17 Jud 12-13

<sup>q</sup> 2.20 Mat 12.45    <sup>r</sup> 2.21 Luk 12.47-48    <sup>s</sup> 2.22 NU 26.11

mare kodkodoho dede remi ninamanoum. <sup>2</sup>Inggo u marang uanamana tapokis puk tar uelhire geke meneigir propet gesir dedeil sioun, kare no aposoul Iesu Kristo geke heir tar ualatoho geke hireig nagi Tamata Nomaneig ger tang uaudeil.

<sup>3</sup>A uakikilangan, inggoum mu naman manate tun pare, tar uadouhinar marein o bureher tamatang uauanete ra turung pokos, kara me uauanete tamiuoum, kara uakeluk teres nimalara uasang tar tukunus. <sup>4</sup>Gisina ra turung kula pare, “Ia kaeionor tamata geke ualapagah e turung tapokisiha? Bang! O bung tamagigeig ka mata pon, bo a mamang inetelik a siokono sira kompela ke uakekene per kot.”

<sup>5</sup>Bo gisina puk ka malabobour pare, God ke mene puk, kare pokos i Heuen, kare uapopout kai tur tar pang uanene i koto tar laur, kare uamoko tar laur i tektekene uiloh. <sup>6</sup>Doh tar laurunin God ke uasilu, kare mamantouor laur tar pang uanene i kot. <sup>7</sup>Ter siokono komper puhung menon, i kot, dohi ran e moko uangoul e tuka tar binaka re ualuh God tasrasina toro hue geke uamoko uangoulin tar binakang kedang, kara mamantouoisir tamata uasa.

<sup>8</sup>Ro bung uanotoug, ahik tun pah mu malabobour tar puhene, a Tamata Noman e kula pare, a siokor marein misiana paho taosein ro krismas, karo taosein ro krismas misiana paha siokor marein. <sup>9</sup>A Tamata Noman ahik paha gimih tar uakeluk tena ualapagaha misiana tasir gisiameher tamata ra namana pe. Inggon e uanguangoul sikoro keip tamiuoum, ahik pahe malara me tang sioko ra mamantouin. Inggon e malara tasir tamata uakapa tun, ra turung uapalih tenas niguata ger sa.

<sup>10</sup>Bo tar binaka re kotpokoso na mareinir Tamata Noman, inggon ahik pahe turung uahire, e la sirame tar ueuenau. Doh tar binakon, i ran e turung rou e la keip tar ualagoreih a uleik tun, a mamang inetelik gere mok i ran e turung luh uakapa toro hue, doh gane i kot, kara mamang inetelik gere mokoane tar uanene i kot ra turung uakuakapa hihirig.

<sup>11</sup>Geta siokor mamantouo uakapaiginina tar siokonor hagar, hopenguarung la baka pelaoumur tamat? Inggoum mu uangoul keip kompe tar nidedeil, kare tar nimalara hape re malara pe God. <sup>12</sup>Tar binka rung uanguangoul peoum tar mareinir nang God gete pokos, inggoum mu reih uahuhut ualahurume tar mareinon. A mareinon e turung pokoso keip toro hue, o me mamantou i ran, kara mamang inetelik gere mok i ran e turung lalaur tar uelsukuna ro hue. <sup>13</sup>Bo inggeig puk i uanguangoul tar ualapagaha ger nang God, inggon e turung uakotpokoso uatimuh tapokis i ran, kare tar pang uanane i kot, inggono tenas uanir tamata gesir kodkodoho nas niguat, kara niuangoul.

<sup>1</sup> 3.2 Jud 17    <sup>2</sup> 3.3 1Ti 4.1; Jud 18    <sup>3</sup> 3.4 Mat 24.48    <sup>4</sup> 3.5 Uak 1.6-9    <sup>5</sup> 3.6 Uak 7.11; 2Pi 2.5    <sup>6</sup> 3.8 Ker 90.4    <sup>7</sup> 3.9 Hab 2.3; 1Ti 2.4    <sup>8</sup> 3.10 Mat 24.29,35; Luk 12.39; 1Te 5.2  
<sup>9</sup> 3.13 Ais 65.17; 66.22; UGO 21.1,27



<sup>14</sup>Ro bung uanotoug, gine rung uangangoul peoum tar inetenin, uedanga uapopokoho tun tar uangoul tar niuangoul ger delauan, kara kodkodoh ahik me inete ra tula tolain tamiuoum. Uangoul keip dede toro hiarouo tang God.

<sup>15</sup>Uamoko teremi ninaman, ae maene a uangangoul sikoro nagi Tamata Nomaneig? Ter tengkana teene, inggon e marang uaudeil tagigeig misiana tar kuhur uanotougigeig Poul geke bolo pono tono ueluatata tamiuoum tar ninamana uaia, kara niate ger uia geke heirin God tatanon. <sup>16</sup>A bolobolonine ke bologion a siokono tun ka bolo peig, inggono ke menmene ponompe tar puhonene. Bo a giniameme pukur mener nanono geke bolo uahiualaig taninin a parakukuh tun tasir tamat tar naman manate. O gisiamemer tamat ahikingua pah ra uelhire sira uamatoto tar tengkana hape re kulkula penin ter siokono kompe tar giniamemer uelhirer nang God, gisin ahik pah ra uelhire sira uamatoto tun, gisin e turung sir uabir katongo kompeis.

#### A uadouhinar men

<sup>17</sup><sup>d</sup>Temaeit inggoum ro bung uanotoug, gine kung ate manasa peoum tar puhonene, kaueke katongosioum mara hikir tamata gesir tabung ualatut, pah ra uoum keip tamiuoum tar lele uasa, ra boho pe tamiuoum, kara hikingua pah mu turung tagorong mana toro man. <sup>18</sup>Bo mu hua kai keip kompe tar hamhamas, kara niate ger nana nagi Tamata Nomaneig, kara tang uaudeil Iesu Kristo.

Siokor uatakai tatanonene daan, doh tar mamang binakalik! O Mana tun.

---

<sup>c</sup> 3.15 Roum 2.4    <sup>d</sup> 3.17 Mak 13.33; 1Ko 10.12

# 1 Jon

## A uakikilangana ro bolobolo ke boloin Jon

### No uakikilangana ro bolobolo Jon

Jon ter uakikilangana tamata ke uakeluk tang Iesu. Inggono ke ate uaia tun tang Iesu. Doh inggono ke ate uaia tun ponompe pare Iesu te God (1Jo 1-3).

Jon ke bolo toro bolobolo rone, o la tasir tamatang tagorong mana tar ate pare God e malauehr tasin (1Jo 3.1). God e malara tun tagigeig, temaene inggeig paki malauehir pono tasir gisimeher tamatang tagorong man (1Jo 3.17; 1Jo 4.19-21). A puhono tena puhung ualatutompe God tar mamang binakalik (1Jo 2.8), inggeig paki malauehir tasir gisimeher tamat.

Jon ke marang uanamana pono tasir tamatang tagorong mana toro mana pare, O tamatang tagorong mana tesno tamatampe God, doh gisina tera uaha tar matakaluana keip tatanon (1Jo 3.1; 2.3).

### I lolono toro bolobolo rone:

A luh doha kitup (1.1-4)

No keketik God, kare no keketik Satan (1.5-2.2a)

O man, doho boh (4.1-6)

Na kalekinaler nimalauehir (4.7-21)

Pehuara keip tar nitagorong man (5.1-21)

### Iesu tero uelhire gero tua

**1** <sup>a</sup>Inggeim king bolome tamiuoum toro uelhire rone gero tua gero mokon sioun ke uakekene pemer binak. Inggeim king longoro tun toro uelhire roon, karing banga tun tar matamiau, kare tuha tunur limamiau. <sup>b</sup>Inggonene re heir tar nitua ke uamakahain tamiueim. Doh inggeim king banga tatanon. Inggono ke hire tun toro mana tamiueim,

---

<sup>a</sup> 1.1 Jon 1.1    <sup>b</sup> 1.2 Jon 1.14

doh inggeim king hirhire tauete teil pono tamiuoum pare, inggono tere kale teil tar nitua gere moko dedengua, inggon e uangoul teil tang God ge Tamagigeig, kare me ualairain tagigeig. <sup>3</sup>Inggeim king hire tauete tamiuoum tar haua king bangain, karing longoroin marung uangoul uaia keip tokahoum tamiueim.

Doha niuangoul tokaha uaiaonene a nagigeig mes Iesu Kristo, doh God ge Tamagigeig. <sup>4</sup>Inggeim king bolo puk toro uelhire roono rone mare unga uaha tun regi niuaheig.

### God ke uadelauana teregi niguata uasaeig

<sup>5</sup><sup>d</sup>Rone tero uelhire geking longoro turuiem tang Kristo, karing hire tauete tamiuoum. God Inggono ter luh, dohi lolono tatanon ahik me kitup tagu. <sup>6</sup><sup>e</sup>Temaet geti kuleig pare, i uangoul tokaha uaia keip tang God, kari uangoul harahampela tar kitkitupun, inggeig o bohoboh, kara hik pah i uakeluk tun toro man. <sup>7</sup>Bo geti uangoul keipeig tar luh misiana re uangoul teil pe God, inggeig i matot i ueluaesieig, song re uadelauana tunur deuatingina Iesu ger God tagigeig teregi mamang niguata uasalik.

<sup>8</sup><sup>f</sup>Bo geti uoliheig ahik me niguata uasa kaeig tatagig, inggeig i bohboho katongosieig, karo uauaman ahik paho moko teil tagigeig. <sup>9</sup>Bo geti hire luaka inggeig teregi niguata uasa, inggon e uadelauana teregi niguata uasaeig, kare uadelauana tagigeig tar mamang inetelikir sa. Teeit God a uauaman, kara kodkodoho dede. <sup>10</sup>Bo geti kula inggeig pare, ahik pah ki guata me niguata uasa, inggeig i kulangua tang God a bohoboh, kara hik pah i uauia tono uelhireon o lame i lolono tar niuangoulur nagigeig.

### Iesu ter tamatang poul tagigeig

**2** <sup>1</sup><sup>g</sup>Ro bung tug! Inngo ku bolo pukume tar uelhireninanine tamiuoum, maeit inggoum ahik pah mung turung guata tar niguatar sa. Bo mai tagigeig ke guata uasa, inggeig nagi tang siokor tamata re tur keip tagigeig i uoum tang Tamagig Iesu Kristo ger tamat a kodkodoh. <sup>2</sup><sup>h</sup>Inggono pe ter uahung ke me kale uelmahing teregi niguata uasaeig, doh ahik pah tagigeig puk, bo teres niguata uasa ponomper tamata uakapa tunane i kot.

<sup>3</sup>Bo inggeig i turung ate tun pare, o nang God geti uakeluk tun tena ualatohon. <sup>4</sup>A tamata gere kula pare, “Inngo u ate tang God,” doh ahik pahe uakeluk tena ualatohon, inggon a bohoboh, ahik pahe uangoul keip toro man. <sup>5</sup><sup>i</sup>Bo mai re longoro, kare uakeluk tono uelhire God, inggon e ualairain pare, e malauelhirintiehe tun tang God, doha nimalauelhiron a

<sup>c</sup> 1.4 Jon 16.24 <sup>d</sup> 1.5 1Ti 6.16; Jas 1.17 <sup>e</sup> 1.6 1Jo 2.4 <sup>f</sup> 1.8-9 Ker 32.5; NU 28.13

<sup>g</sup> 2.1 Hib 7.25-26 <sup>h</sup> 2.2 Jon 1.29; Kol 1.20; 1Jo 4.10 <sup>i</sup> 2.5-6 Jon 14.21,23

kodkodoh tun. Inggono te paara, ri ate pe inggeig ri uangoul tokaha keip uaia pe tang God. <sup>6</sup>Mai re kula pare, e uangoul tokaha keip uaia tang God, inggono pake guata sirangua pono tar niguata ke guata pe Iesu.

### A ualatut mari uelmalaresieig

<sup>7</sup>Ro bung kaloug! Inggono ahik pah ku bolome tamiuoum me timuhur ualatut, bo a ualatohonene, “I uelmalaresieig.” Ter siokono kompe tar ualatut gekung longoromegioum sioun tar uakekenen. <sup>8</sup>Bo a ualatut pukuonene ku bolomeio tamiuoum a timuh pon, karo man tena nitua Kristo, doha nitua ponor emiuoum. Ter hauon a kitup e hilhiliu uain, kara luh ger man gine manasa re luh uamarmarein.

<sup>9</sup>Mai gere kula pare, “E uangoul teil tar luh, kare tokouasain tang uanotono gere tagorong mana pono tang Kristo.”<sup>m</sup> Inggono e uangoul harahampe tar kitkitupun. <sup>10</sup>Mai re malauehrintiehe tang uanotono gere tagorong mana pono tang Kristo, inggono e uangoul teil tar luh, kara hik me inete re uasuasa tatanon i lolono tena niuangoul. <sup>11</sup>Bo mai re tokouasain tang uanotono gere tagorong mana pono tang Kristo, inggono e uangoul tar kitkitupun, kara hik pahe ate ia re lihihia, teeit a kitup ke uakut tatanon.

<sup>12</sup>Inggono ku bolome tamiuoum ro bung tug, teeit remi niguata uasaoum ka uadelauana manasaig tar hangana Kristo.

<sup>13</sup>Doh inggo ku bolo ponome tamiuoumur mamahoholik, teeit inggoum mung ate tatanonene re uangoulung sioun ke uakekene pemer binak.

Doh inggo ku bolo ponome tamiuoumur kalan, teeit inggoum kung touahiua tang Satan.

Doh inggo ku bolo pukume tamiuoum ro bung tug, teeit inggoum mung ate tang Tamagigeig.

<sup>14</sup>Karu bolo ponome tamiuoumur mamahoholik, teeit inggoum mung ate tatanonene re uangoulung sioun ke uakekene pemer binak. Karu bolo ponome tamiuoumur kalan, teeit inggoum o tampopokoh, kare no uelhire God o uangoul teil tamiuoum, karung touahiua tang Satan ger tang sa.

<sup>15</sup>Uakenua tar malauehri i kot, doh tar ineteng gane i koto ger sa, bo gero malauehira taninin na nimalauehri God ahik pahe moko totomua.

<sup>16</sup>Temaene a mamang inetelikane i kot misiana tar nimalauehri sa,

---

<sup>j</sup> 2.7 Jon 13.34; 2Jo 5-6   <sup>k</sup> 2.8 Jon 1.9; Roum 13.12   <sup>l</sup> 2.9 1Jo 4.20   <sup>m</sup> 2.9 toro uelhireng Grik “tahn.”   <sup>n</sup> 2.10 Roum 14.13   <sup>o</sup> 2.11 Jon 12.35   <sup>p</sup> 2.15 Roum 8.7  
<sup>q</sup> 2.16 Roum 13.14

kare tar gehe tar inet, kare tar uairana katongo turin tena bureher inet. A niguatanin ahik pahe la tur tagu tang Tamagigeig, bo e la tur pukane i kot. <sup>17</sup>Doha kot, kara mamang inetelik geke malarraig e turung kapa dede, bo mai re guat, kare uakeluk tena nimalara God, inggon e la turung uangoul dedenguampela.

### No uelmatan Iesu

<sup>18</sup>Ro bung tug! Gine ter uadouhinar binak, doh inggoum kung longoro manasa tena uelmatana Iesu e turung la manasame. Doh gine daan no uelmatana Iesu o bureh, gisine ra uangoul manas. Temaeit ri ate inggeig pare, inggono ter uadouhinar binak. <sup>19</sup>Gisina ka hiliu tur tar totoene tagigeig, teene ahik pesina paho nagigeig tun. Bo ge pakene o nagigeig tunusin, gisina paka uangoul tagu dedempela tagigeig. Bo gisina ka hiliu tar totoene tagigeig e ualasingua pare, ahik me tang sioko tasisinar nagigeig.

<sup>20</sup>Bo inggoum ke uelpikir manasa Iesu tar Iabena Dedeil. Temaene rung atenguaoum toro man. <sup>21</sup>Inngo ahik pah ku bolome tamiuoum, teeit inggoum mung tele toro man, bo inggoum mung ate, karung ate pono pare, ahik pe mo boho ro la tur toro man. <sup>22</sup>Maionor bohoboh? Ingono ter tamata gere uolih tang Iesu pare, ahik pah ter Kristo. Doha tamata gere kula sira pare, na uelmatana Iesu, kare uolih pono tang God ge Tamagigeig mer Tun. <sup>23</sup>Doh ahik me tang sioko re ueluelde puk tar Tunon e ueluelde pono tang Tamanon. Bo mai re kilauatoro tar Tunon, inggono ke kilauatoro pono tang Tamanon.

<sup>24</sup>Banga tapokis tar haua kung longoro turig tar uakekenen, karung sanga dede taninin, getung uakelukoum, inggoum mung turung uangoul tokaha teil dede tar Tunon, doh tang Tamanon. <sup>25</sup>Ingono ke ualapagaha tagigeig pare, “Inggeig i turung kale tar nitua gere moko dedengua.”

<sup>26</sup>Inngo ku bolo pukume tanininanine tamiuoum tar tur tane tas maisir tamata gera marang uoum keip tamiuoum toro boh. <sup>27</sup>Bo inggoum ke uahuhu manasa Iesu tar Iabena Dedeil, kare moko dedengua tamiuoum, ahik baka poluk pah mung sir me tamata re ualasila tamiuoum. A Iabena Dedeil tere ualasila manasa tamiuoum tar mamang inetelik. Doh na niualasiron a man, ahik paha boh. Uakeluk dede tar haua ke ualasingariono tamiuoum marung uangoul keip dedeoum tatanon.

<sup>28</sup>Ro bung tug! Uangoul keip dede tang Kristo marung ongoloum tar binaka gete kotpokos, kara hik pah mung tokouaouo, karung matala gete tapokisimeon. <sup>29</sup>Getung ateoum pare, Iesu a tamata a kodkodoh,

---

<sup>1</sup> 2.17 Mat 7.21   <sup>2</sup> 2.18 Mat 24.5,24; 2Jo 7   <sup>3</sup> 2.19 Apo 20.30   <sup>4</sup> 2.20 1Ko 2.15; 2Ko 1.21; 2Jo 2   <sup>5</sup> 2.22 1Jo 4.3; 2Jo 7   <sup>6</sup> 2.23 Jon 5.23; 1Jo 4.15; 5.1   <sup>7</sup> 2.27 Jon 16.13  
<sup>8</sup> 2.29 1Jo 3.10

inggoum mung atengua pono pare, o tamata uakapa geka guata uaia, gisin o bung tunon.

### O bung tuna God

**3** <sup>1</sup>Bang! Tamagigeig e malauelhirintehe tun tagigeig, teeit ra kula peisieig pare, o bung tunon. Doh inggeig o bung tuna nomanon. Doh ter tengkana teene, maeit ra teler tamatane i koto uakapa tagigeig, teeit gisina ra tele tatanon. <sup>2</sup>Ro bung kaloug! Gine daan inggeig o bung tuna God, doh hape ri la baka pela inggeig halana haraha ta atein, bo i la ate to kompe gete la uamakahain Kristo. Doh inggeig i la turung misiana tatanon, ge inggeig pe i turung banga tun tatanon, hape re baka pe. <sup>3</sup>Doho tamata uakapasine ra uangoul keip tar nitagorong mana tang Kristo ra uadelauana katongois teres niguata uasa misiana tang Kristor delauana pe.

<sup>4</sup>Mais ra guata uasa gisina ra katego tar ualatur nang God. Doh geta guata kompelaigir hagarinin, inggono ter siokono kompe ra ueluelde pein God, kare na ualatur. <sup>5</sup>Bo inggoum puk mung ate pare, inggono ke laha tar me kale liu tar niguata uasar nagigeigane i koto uakap, doh inggon ahik tagu me niguata uasa kaeig tatan. <sup>6</sup>Temaeit mai gere uangoul keip dede tang Kristo, ahik pahe guata uasa tagu, bo mai re guata uasa dede kompela ahik pahe naman manate tang Kristo, kara hik pahe ate tatanon.

<sup>7</sup>Ro bung tug! Ahik pah mung longoro me tang sioko gere uelour tamiuoum. Teeit mai gere guata tar huar uia, inggon a kodkodoh te misiana kompe tatanon ger kodkodoh. <sup>8</sup>Bo mais ra uangoul, kara guata uasa dede harahampe, gisin o nang Satan, teeit Satan ke uangoul, kare guata uasa tanik manasa toro kikilangan. Doh ter tengkana maeit ke lahar tuna God te tar me mamantouo tena kalekinale Satan.

<sup>9</sup>Doh ahik me tang sioko tas mais geka kotpokos o bung tuna God ra uangoul, kara guata uasa dedempela, teeit na nitua God e moko teil dede tasisin. Doh gisin ahik pah ra matoto ra uangoul, kara guata uasa tagu, teeit gisina ka kotpokoso tur tang God. <sup>10</sup>Temaeit ri ate inggeig tas mais ro bung tuna God, kare mais ro bung tuna Satan. Mais ra guata tar haua ge ahik paha kodkodoh, gisin ahik tagu paho bung tuna God, kare mai ponompe ge ahik pahe malauelhir tagu tang uanoton gere tagorong mana tang Kristo inggono pon ahik paha nang God.

### Uelmalahiresioum

<sup>11</sup>Gine ter puhung uahire popokoho gekung longorosioum tar uakekenene pare, inggeig i uelmalahiresieig. <sup>12</sup>Doh ahik pahi guata sira

<sup>z</sup> 3.1 Jon 1.12-13; 16.3    <sup>a</sup> 3.2 2Ko 3.18    <sup>b</sup> 3.5 Jon 1.29; 1Pi 2.22-24; 1Jo 2.2

<sup>c</sup> 3.8 Jon 8.44    <sup>d</sup> 3.9 1Jo 5.18    <sup>e</sup> 3.11 Jon 13.34    <sup>f</sup> 3.12 Uak 4.8

misiana tang Ken ger nang Satan geke haluh pous tang tahin. Ae maene ke haluh pousono tatanon? Teeit tena nipilesone, kare na niguatono ger sa, bo na niguata tahinon a kodkodoh. <sup>13</sup>gDoh ahik pah mung lutara ro bung uanotoug gete tokouasaisir tamatang gane i koto tamiuoum.

<sup>14</sup>hInggeig i ate pare, ka luaka liu tur manasasieig toro mat, kari kale tar nitua, teeit inggeig i uelmalahiresieig, bo mai ge ahik pahe malaelhir tagu, inggon e uangoul keip haraha toro mat. <sup>15</sup>iDoh mai gere tokouasain tang uanoton, inggon a tang haluh, kare inggoum mung ate pare, ger tang haluh ahik tagu mena nitua gere moko dedengua. <sup>16</sup>jGine teki bang paroko pe inggeig, kari ate tar nimalaelhir tun, Iesu Kristo ke heir katongo tar tukununa tagieig. Doh inggeig paki guata sira pono toso bung uanotougig. <sup>17</sup>kDoh ge pare, me tang sioko na bureher mamang ineteliking gane i kot, kare banga tang uanotono ke katupa pe tar inet, doh ahik pah ke ueldolomo tatanon, hapengua re la moko pe na nimalaelhir God tatanon?

<sup>18</sup>lRo bung tug! Inggeig i uakenua manasa tar kulkula puk pare, i uelmalaelhiresieig, bo inggeig paki uamakaha tun tar uelmaluelhirono tar niguata, kara nipiles. <sup>19</sup>Inggonono ter niguata, kara nipileser nagieig teri ate toeig pare, i uangoul keip toro man, song ahikieig pahi kanuh tar binaka ri la tur i uoum tar Tamata Noman. <sup>20</sup>Doh geti ate katongosieig pare, ki kouh, bo God puk ter i ranantiehe teregi ninamanaeig, kare ate teil tar mamang inetelik.

<sup>21</sup>mRo bung kaloug! Geta hikieig pahi uakanuh katongosieig, inggeig ahik pahi kanuh tar tur i uoum tang God, <sup>22</sup>kari kale tar mamang inetelik ri dangataig tatanon, teeit inggeig ki uakeluk tun tena ualatohon, kari guata tar nimalarar nanon. <sup>23</sup>nGinine tena ualatohon, “Tagorong mana tar hanganar Tunon Iesu Kristo, kari uelmalaelhiresieig,” ngohina ke ualatoho peono tagieig. <sup>24</sup>oMais ka uakeluk tena ualatohono ra uangoul tokaha uaia keip tatanon, doh inggon e uangoul tokaha uaia keip tasisin, doh inggeig i ate pare, inggon e uangoul tokaha keip tagieig, teeit tar Iabena Dedeil geke heirhaiono tagieig.

#### A iabena ger man, doha iabena ger boh

**4** <sup>1</sup>pRo bung kaloug! Ahik pah mung uolong tagorong man tas mais ra kula pare, ra kale teil tar iaben. Bo mung uedanga baka tasisina ge pare, la turur iabeneit ra kale teilisisina tang God. Ge o burehe per propet bohoboh ra uangoul ueltebeir. <sup>2</sup>qGine te hape rung turung ate paroko peoum ge pare, la turumper iabenono tang God ge me tang sioko

g 3.13 Jon 5.18-19 h 3.14 Jon 5.24 i 3.15 UGO 21.8 j 3.16 Jon 13.1; Gal 1.4

k 3.17 Ual 15.7 l 3.18 Jas 2.15-16 m 3.21 Hib 4.16 n 3.23 Jon 6.29; 13.34

o 3.24 1Jo 4.13 p 4.1 Mat 7.15; 1Te 5.21; 1Jo 2.18; 2Jo 7 q 4.2 1Ko 12.3

re kula pare, “Iesu ger Kristo e la tur tang God ke la siraha tar tamat.” A iabenonene tar tamaton e la tur tang God. <sup>3</sup>Bo mai gere kula pare, “Iesu ahik mata la siraha tar tamat.” A iabenon, ahik pahe la tur tang God, a iabenon e la tur tosno uelmatana Kristo. Inggoum kung longoro pare, inggon e turung lame, doh gine daan, inggono gine manasa i kot.

<sup>4</sup>Bo inggoum ro bung tug, inggoum o nang God gekung touahiua manasa peoum tasir propet bohoboh, teeit a iabeneit re uangoul teil tamiuoum a i ranantiehe tasisit ra uangoul i kot. <sup>5</sup>Gisin o peng gane i kot, kara menmene teil uamatoto tar ineteng gane i kot, doh gane i koto ra longoro tasisin. <sup>6</sup>Bo inggeig o nang God, kare mais ra ate tang God ra longoro tagigeig. Bo mais ahik paho nang God tagu, ahik pah ra longoro tagigeig. Gininanine te mari bang paroko inggeig tar iabene ger uauaman, kare tar iabene ger bohoboh.

### A uelmaluelhir e la tur tang God

<sup>7</sup>Ro bung kaloug! Inggeig i uelmalahiresieig, teeit a uelmalahir e la tur tang God. Temaeit mai re malauelhir tang uanoton, inggon a tuna God, e ate tang God. <sup>8</sup>Bo mai ahik pahe malauelhir tang uanoton, inggon ahik pahe ate tang God, teeit God inggono ter tengkanar nimalaelhir.

<sup>9</sup>Gine teke ualasira pein God re malauelhir pe tagigeig. Inggono ke heiriha tar tang siokor Tunane i kot mari uangoul keipeig tar nitua e la tur tatanon. <sup>10</sup>Gine te hape tar uelmaluelhir, inggeig ahik pah teki malauelhir tang God, bo inggono pare, God ke malauelhir tagigeig, kare heiriha tar Tuna pare, a uahung mare kale uelmahing teregi niguata uasaeig.

<sup>11</sup>Ro bung kaloug! Ge pare malauelhirintiehe nomana God tagigeig, inggeig i uelmalahire ponosieig. <sup>12</sup>Ahik me tang sioko tagigeig ke banga tang God, bo geti uelmalahiresieig, God e uangoul tagu dede tagigeig, doh na nimalaelhiron e la uahiyo tunuhane i lolono tagigeig.

<sup>13</sup>Inggeig i ate pare, i uangoul tagu tang God, doh inggon e uangoul tagu pono tagigeig, teeit inggono ke heir tagigeig tena labena ger Dedeil. <sup>14</sup>Doh inggeig ki banga, kari hire toro mana pare, God Tamagigeig ke heiriha tar Tuna tar me uauaedeil tasir tamatane i kot.

<sup>15</sup>God e uangoul tagu tang mai gere hirhire tauete teil pare, “Iesu a Tuna God.” God e uangoul tagu tatanon. <sup>16</sup>Doh inggeig i ate uaia tun pare, God e malauelhirintiehe tun tagigeig, kari tagorong mana tatanono re malauelhirintiehe tun pe tagigeig.

God inggono ter tengkanar nimalaelhir, doh mais ra uangoul keip tar nimalaelhir gisina ra uangoul tokaha keip tang God, doh God e uangoul

<sup>r</sup> 4.3 1Jo 2.18   <sup>s</sup> 4.4 Mat 12.29; 1Jo 5.4-5   <sup>t</sup> 4.5-6 Jon 8.47; 15.19   <sup>u</sup> 4.9 Jon 3.16

<sup>v</sup> 4.10 Roum 5.8-10; 1Jo 2.2   <sup>w</sup> 4.12 Jon 1.18   <sup>x</sup> 4.13 2Ko 1.22; 1Jo 3.24



tokaha keip tasisin. <sup>17</sup>Doh tar hagarionene a uelmalar e la popokoho tun i uantinanina tagigeig, maeit inggeig ahik pahi la kanuh tar binakang kedang, teit inggeigane i kot i la misiana tang Kristo.

<sup>18</sup>Ahik me nisokoro kaein tar uelmalahir, teit na nitampopokohor uelmalahir e uelueluata liu tar nisokor, bo a nisokor e la keipin tar niduh, doh mai re sokor, ahik paha popokoho na nimalaelhir. <sup>19</sup>Inggeig i uelmalahiresieig, teit God ke malauehir uakikilanga tagigeig.

<sup>20</sup>Ge me tang sioko re kula pare, e malauehir tang God, kare tokouasa dedempein tang uanoton, inggonor tamaton a bohoboh. Hape geta hikieig pahi uelmalahiresieig, hapengua ri malauehir pe inggeig tang God, ge ahik pe inggeig pah ki banga tatanon? <sup>21</sup>Doh Inggono ke heir tagigeig tar ualatutene, mai re malauehir tang God, inggon e malauehir pono toso bung uanoton.

### A nitagorong mana tar Tuna God

**5** <sup>1</sup>Maisir tamata gera tagorong mana tang Iesu pare, Inggono ter Kristo, gisina ka kotpokoso o bung tuna God, doh mais ra malauehir tang Tamanon, gisina ra malauehir pono tar Tunon. <sup>2</sup>Gine te hape ri ate tun pe inggeig pare, ri malauehir pe toso bung tuna God, inggeig i malauehir tang God, kari uakeluk tena ualatuton. <sup>3</sup>“Tar malauehir tang God ter tengkana teene, “Uakeluk tena ualatuton.” Doh ginin ahik paha parakukuh tagigeig tar uakeluk. <sup>4</sup>Ge inggeig uakapa tun peene ro bung tuna God i touahiua manasa tar niguatar saane i kot. Gine ter uleikir nitampopokoho ka pehuara peinir kot, inggeig i tagorong mana tang Iesu. <sup>5</sup>Maiono ke touahiua tar niguatar saane i kot? Teesine kompe geke tagorong mana tang Iesu pare, a Tuna God.

<sup>6</sup>Iesu Kristo Inggono ter tang sioko ke laha tar kodom, ka me uahuhu pein, karo me tading ro deuatingin ke me mata pe. Inggono ahik pah ke laha tar kodomo puk, bo Inggono ke laha tar kodomo doho deuatingin. A Iabena Dedeil teke tur keip, kare hire tauete toro man, teit a Iabena Dedeil Inggono teger uauaman. <sup>7</sup>Ge a touono per inete rasi ura tur keip, kara hire tauete toro mana tagigeig tang Iesu, <sup>8</sup><sup>c</sup>a Iaben, kara kodom, kara deuating, doha touonor inete rasina ka uelhote. <sup>9</sup><sup>d</sup>Inggeig i tagorong mana tar haua gera hire taueteigir tamata tagigeig, bo a haua puk geke hire taueteig God, ginina ter inete uleik, doh inggono ke hire tagigeig toro mana tar Tuna katong. <sup>10</sup><sup>e</sup>Mai re tagorong mana tar Tuna God, inggono ke sanga dede tar uelhire geke hireig God tatanon. Bo mai ge ahik pahe tagorong mana tang God, inggono ke kulangua tang God a bohoboh, teit inggono ahik pah ke tagorong mana tar uelhire ger man geke hire umatoto tolaig God tar Tun.

<sup>y</sup> 4.21 Mak 12.29-31    <sup>z</sup> 5.1 1Jo 4.15    <sup>a</sup> 5.3 Jon 14.15,23-24    <sup>b</sup> 5.6 Jon 1.29-34

<sup>c</sup> 5.8 Jon 15.26    <sup>d</sup> 5.9 Jon 5.32-37    <sup>e</sup> 5.10 Jon 5.36-40

<sup>11</sup>O uelhire gero mana te pare, God ke heir tagigeig tar nitua gere moko dedengua, doha nituaon e moko tar Tunon. <sup>12</sup><sup>J</sup>Mai gere uangoul tagu tar Tunon, inggono na nitua, doh mai ge ahik pahe uangoul keip tagu tar Tuna God, ahik mena nitua gere moko dedengua.

#### A uadouhinar men

<sup>13</sup><sup>s</sup>Inggo ku bolome tanininanine tamioumene rung tagorong mana tar hanganar Tuna God, maeit rung ateoum pare, remi nituaoum e moko dedengua. <sup>14</sup><sup>h</sup>Gine ter nitagorong mana re reih uahuhut tagigeig tang God. Geti dangata inggeig me inete tang God re malara pe, inggon e longoro tagigeig. <sup>15</sup>Doh geti ate inggeig pare, inggono ke longoro tagigeig tar haua ki dangatain, inggeig song ri ate tun pare, i turung kale tar haua ri dangatain tatanon.

<sup>16</sup><sup>i</sup>Doh me tang sioko geke banga me uanotougigeigene ri tagorong mana tang Kristo ke guata tar niguata uasa ge ahik pahe uoum keip tagu toro mat, inggonor tang sioko pake lotu tang God mare heirono tang uantonono tar nitua. Inggo u menmene tas mais ka guata tar niguata uasa ge ahik tagu pahe uoum keip toro mat. Bo a niguata uasa gere uoum keip toro mat e mok. Inggo ahik pah ku kula pare, o lotua tas mais ra guata taninin. <sup>17</sup>A mamang niguata uasalik ginin a sa, bo ahik puk pah teenina uakapa re uoum keip toro mat.

<sup>18</sup><sup>j</sup>Inggeig i ate pare, mais geka kotpokoso tur tang God, ahik pah ra uaateis tar niguatar sa, ge a Tuna God pe e kapil uaia tun tasisin, doh Satan ahik pahe matot e mamantouo tasisin. <sup>19</sup>Inggeig i ate pare, inggeig o bung tuna God, bo gane puk i koto uakap e moko tena nikauekon, kare na nitampopokoho Satan. <sup>20</sup>Doh inggeig i ate pono pare, a Tuna God ke laha tar me uanaman manate tagigeig, maeit ri ate inggeig tatanono pare, a God noman. Doh inggeig i uangoul tagu tatanono gere uaman, kare tar Tunono pon Iesu Kristo. Inggono ter God noman, kare ter nitua gere moko dedengua.

<sup>21</sup>Ro bung tug! Mung kapil katongosioum tasir god bohoboh.

---

<sup>f</sup> 5.12 Jon 3.36    <sup>s</sup> 5.13 Jon 20.31    <sup>h</sup> 5.14 Jon 14.13-14; 1Jo 3.21-22    <sup>i</sup> 5.16 Mat 12.31  
<sup>j</sup> 5.18 1Jo 3.9

## 2 Jon

# O uatorikina ro bolobolo ke boloin Jon

### No uatorikina ro bolobolo Jon

O uatorikinaro Jon, o bolobolo puhin i lolono toro Baeboul tar timuhur uelhote.

A tamata ke bolo tana roono te Jon geke bolo pono toro Uelhire Uaia tang Jon, karo uatauete toro uelhire gero ou, doho gime torik baka polukompe ro bolobol.

O uatorikinaro Jon o mene ualsira tagigeig mari malaelhir tasir gisiameher tamtang tagorong man. God ke ualatoho tagigeig tar uelmalahirisieg (2Jo 5-6).

Inggeig paka hik pah tangana mo tamata gera mene ualasira me inete me sa e lain tang Iesu (2Jo 7-11). Ge Iesu pe te God. Bo ke me tamata puk, mare me mata tagigeig. Tar binaka ke mata Inggon, Inggono ke kale tar uelmahingin tenagi niguata uasaeig.

A puhonene tero mene tun ro la tasir tamatang tagorong man.

### I lolono toro bolobolo rone:

A meneng uakalahar 1-3

Na kalekinaler nimalaelhir 4-6

A uatagin tar niate ger boh 7-11

A uadouhinar menemen 12-13

---

### Inggeig i kale uanono tonu uelhire God gero man, kari tagin tasir tamata gera ualasira siok

<sup>1</sup>O bolobolo rone o la tur tang Jon ger mamahoholik. Inggong John ku bolo uamatotola tar kuaha geke uamatotoin God menia toso bung tuna geru malaelhirintiehe tunusio toro man, doh ahik pah inggo puk, bo gisine ponompe ra ate toro mana tang God. <sup>2</sup>Ge o mana pe o uangoul i lolono tagigeig, karo turung moko dede tagigeig tar mamang binakalik.

<sup>3</sup>A hamhamas, kara niueldolom, doha uelhiarou e la tur tang God ge Tamagigeig, doh tang Iesu Kristo ger Tunon e me turung moko tagigeigene ri uangoul keip toro man, kara uelmalahir.

### Uangoul keip dede toro man

<sup>4</sup>Inggo ku uahantiehe tun tar binaka ku ueltupara tasir gisimehe ro bung tumua ka uakeluk tun pe toro man misiana ke ualatoho pe Tamagigeig tagigeig.

<sup>5</sup>Er kuah, inggo ahik pah ku bolome totomua me timuhur ualatut, bo ginine te geki longoro tur kompesieig tar uakekenen. Inggo u marang kula uapopokoho kompe pare, i uelmalahiresieig. <sup>6</sup>Doha uelmalahironene inggeig i uakeluk tena ualatuton misiana kung longoro peoum tar uakekenen, doh na ualatutono teene, “I uelmalahiresieig.”

### Inggeig i sanga uanono dede tono uelhire Kristo

<sup>7</sup>O bureher tamatar bohoboho gera kula tang Iesu Kristo ahik pah ke la siraha tar tamat. Gisina ka la ueltebeir uakapane i koto uakap. Doha tamata gere kula paar, inggon a bohoboh, kare na uelmatan Kristo.

<sup>8</sup>Mung tagin teil mara hikioum pah mung uaheil tar bulauamiu geki kalekinalentiehe tun pe inggeig. Mung tur uapopokoho kompe marung siokor kaleoum tar bulauamiu uakapa tun i Heuen.

<sup>9</sup>Mai gere uasalain, kare uoumuoum teil re ualasira pe tar ginimehe siokor niualasir, doh ahik pahe uakeluk tena niualasira Kristo, inggon ahik pahe uangoul keip tagu tang God, bo mai re uakeluk dedempe tena niualasira Kristo, inggon e uangoul tagu tang God Tamagigeig mer Tun.

<sup>10</sup>Doh mai re pokoso tamiuoum, doh ahik pahe uakeluk tar ualasarar nang Kristo, ahik pah mung kilauatoro tatanono tenami um, karung uamaluana tatanono tang hingiar hagar. <sup>11</sup>Mai re kiluattro tatanon, inggono ke kale keip manasain ro bohoboh, kare tar niguatanitir sar nanon.

### A uadouhinar men

<sup>12</sup>Inggo nagu bureher mene ru marang boloig tar uahire tamiuoum, bo ahik puk pahu marang bolo uahiualaane. Inggo u tagorong mana teil pare, u la pokoso tun tamiuoum, kari uelbange tunusieig, song ri ueluatata tokah, maeit regi niuaheig e la unga uaha tun. <sup>13</sup>O bung tuna tahim kuaha geke umatotoin God, ka heir tenas niuah e lame totomua.

<sup>a</sup> 4 3Jo 3   <sup>b</sup> 5 1Jo 2.7   <sup>c</sup> 7 1Jo 4.1-3

# 3 Jon

## A uatouonono ro bolobolo ke boloin Jon

### No uatouonona ro bolobolo Jon

O uatouonoa ro bolobolo tang Jon i lolono toro Baeboul tar timuhur uelhote. Jon ke uaha tun ke longoro pe tang Gaius ke mene ualasira pe toro menmene tar nitagorong man. Jon ke uaha pono tang Gaius ke kaueke pe tasir gisiameher tamatang tagorong man. O tamatang tagorong manasina ra lang mene ualasira tono uelhire God tar giameher butur. Doh Gaius teke poul tasisin.

A giniamer niduh e mokompe toсно tamatang tagorong mana Gaius. Maeit dohe marang lame mare me poul tang Gaius.

### I lolono toro bolobolo rone:

A meneng uakalahar 1-4

Gaius ka uairanain 5-8

Diotepes ka to uahiuoin 9-10

Demitrius ka uairanain 11-12

A uadohinar menemen 13-15

---

<sup>1</sup> “O bolobolo rone o la tur tang Jon ger mamahoholik, inggo ku bolola tang Gaius ger kaloguo tun geru malaelirintiehe tunuio toro man. <sup>2</sup>Er kaloug, inggo u lotu dede tang God totomua maro uaha ingga, karo tagala dede, karo kalekinale uarabele uaia puk misiana tar iabeimua ru ate peo. <sup>3</sup><sup>b</sup>Inggo ku uahantiehe tun ka me pokoso pe ro bung uanotougigeig totoguo, kara me hire pare, ingga o uakeluk tun toro uelhire gero man, karo tagorong mana tang roon. <sup>4</sup>Inggo ke uleikintiehe tun regu niuaha ku longoro pe toso bung tug ra uakeluk uaia tun pe toro man.

---

<sup>a</sup> 1 Apo 19.29; Roum 16.23    <sup>b</sup> 3 2Jo 4

### Kaueke uaia tosno tamatang kalekinaler Tamata Noman

<sup>5</sup>Er kaloug, ingga ko guata uaia tun tar kalekinaler nang God ko kaueke pe toso uanotougigeig geka me pokoso tamiuoum ahik pah ko namana pare, o timuh pesina tamiuoum. <sup>6</sup>°Gisina ka me hire tasir toto tamatane tar lotu, hape rung uelmalahire pesioum. Inggoum mu guata uaia dedempela tar ueltutue tasisina tar butur ra lihihia. Inggoum mu uakeluk uaia dedempe tar puhono tere malara pe God. <sup>7</sup>dGisina ra la teil keip kompe tar hangana Iesu Kristo ahik pah ra kale to tagu me nipoul tas mais ge ahik pah ra tagorong mana tang Iesu. <sup>8</sup>Doh inggeigene ri tagorong mana tang Iesu i guata uaia, kari poul tasisina tar huar inete ra katupain mari siokor kalekinale keip tokaha tuneig toro man.

### Diotrepes me Demitrius

<sup>9</sup>Inggou ku bolola toro bolobolo tasir toto tamatane tar lotu, bo Diotrepes puk ke ueluelde, doh ahik pah ke malara tang roon, teeit inggon e malara kompe te me pahene re uoum keip tar lotu. <sup>10</sup>Doh getu lameo, inggo u me turung kila toto tasir tamat, karu hire tar haua ke uoto guatamegiono re uoto ngur pe, kare boho tola tagigeig tar niguata ger sa. A ineteninaniner sa ahik pahe uaunga uaha tatanon, ge inggono pe ahik pahe uoto kilauatoro tas mais gera tagorong mana tang Iesu, kare uoto tur tane tas mais ra marang guata uaia tasisin, kare uelueltula liuingua tasisina tar lotu tagu.

<sup>11</sup>°Er kaloug, ahik paho babasira tar niguatar sa, bo o babasira puk tar inete uaia. Ge mai pe re guata tar niguataniner uia a nang God, bo mai puk re guata tar niguataniner sa, inggon ahik pahe ate tang God.

<sup>12</sup>Demitrius e uoto mene tun toro man, kara tamata uaia ra kula per tamat, kare no uelhire God o hire teil pon, doh inggeig i bang huara teil pono tatanono pare, a tamata uaia, doha mener nagigeig a man.

### A uadouhinar men

<sup>13</sup>fInggou nagu bureher inete ru marang bololaig tamiuoum, bo ahik puk pahu marang bolo uahiua tanininane. <sup>14</sup>Inggou u tagorong mana teil tar me banga tun tamiuoum mari tabila uiliodout tuneig, kari siokor ueluatata tokah.

<sup>15</sup>O hiarou o moko totomua. O bung kaloumua ka heir tenas niuaha totomua, karo turung heir kahakaha ponola ingga tenag niuaho toso bung kalouguosit rung uangoul tokahoum.

° 6 Tai 3.13    d 7 1Ko 9.11-12    e 11 1Jo 3.6-10    f 13 2Jo 12

# Jud

## O bolobolo ke boloin Jud

### No bolobolo tang Jud

No bolobolo Jud o puhina ro bolobol i lolono toro Baeboul tar timuhur uelhote. A tamata ke bolo tang roono te Jud, inggon a tahina pono Iesu.

Jud ke bolo toro bolobolo rone tar uatagin tasir tamatang tagorong mana tasir gisiameher tamat. O tamatasina ra uangoul haraha tar niuangoul uasa.

Jud ke mene uakalahara pare God e turung uabatompe tasisin.

Doh Jud ke mene uampopokoho tasir tamatang tagorong mana tar tagorong mana dedempe tang God.

### I lolono toro bolobolo rone:

A meneng uakalahar 1-2

A nipiles, a niualasir, kara nisang tasir tang ualasira bohoboh 3-16

Pentampopokoho tar uoho uanono tar nitagorong man 17-23

Lotu keip tar uatakai 24-25

---

### Jud e heir tar niuaha tasir tamat

<sup>1</sup>O uelhire rone o la tur tang Jud, inggono na tamatang kalekinale Iesu Kristo, kara tahina Jems. Inngo ku bolo tang roono rone tas mais uakapa tun, ke kilais God tamagigeig tar nimalaelhirir nan gera uangoul tar nikaueker nang Iesu Kristo. <sup>2</sup>Inngo u lotu tang God mare heir tamiuoum tar uleikir niueldolom, o hiarou, kara nimalaelhir.

### A uatagin tar giniamehe siokor ualasir

<sup>3</sup>Inggoum ro bung kaloug, inggo ku namanantiehe tunumpe tar bolome tamiuoum tar uahire tar haua ke uauheil tagigeig. Gine daan inggo ku bolome tamiuoum tar giamehe siokor inet, inggo u uatampopokoho tun tamiuoum tar tur keip toro uelhire ro man. God ke heir toro siokon sioun

---

<sup>a</sup> 1 Mat 13.55

ro uelhire ro man tosno tamata dedeil, ahik pahe matotong uapalih. <sup>4b</sup>Ge o gisiamehe per tamata ke me bir uoumis geka bolo uahiua peinir puhono sioun. Gisina ka me uahiku uanomo kompemeis tamiuoum. O tamatasin ahik mes nitagorong mana tagu tang God ka uapalih tar hamhamas ger nana nagi Godeig, kara uauia tasir tamata tar ura ueltebeir, kara uolih tang Iesu Kristo ger tang siokon sioun nagi toiaieg, kara Tamata Noman.

<sup>5</sup>Inggomung mung ateng sioun inggo u marang uanamana puk tamiuoum pare, a Tamata Noman ke uelkarus tur tasir tamatang Israel uakapa tun i Isip, bo i muduhia puk inggono ke mamantouo tas mais ahik pah ka tagorong mana dede tagu. <sup>6d</sup>Mung namana tapokis kompe tasir angelou ge ahik pah ka tur uanono keip tar kauk, ka ualo liu pono tonosio uan, a Tamata Nomana ke uamoko tasisina tar butur kitupun, kare sanga tane tasisina tar tiein gere moko dedengua e tuka tar binakang kedanga tar marein ger uleik tun. <sup>7e</sup>Te misiana komper hagarono tasir tamatang Sodom, dohi Gomora, kare toro uan uleik uilohonine ka heir katongois toro uraur, kare tar hagar uasa. Gisina tera banga tonguais tas mais geka kale uelmahing tar puhung barah toro hue gero luh dede i Hel.

<sup>8</sup>Doh ter siokono sira komper hagaron tasir tamatasina ra borboriana tar inete gere guata uasa katongo tar tukunusisin, kara ueluelde tar nikaueke ger nanar Tamata Noman, kara menmene uasa tas mais gesir uelpipih gera uangoul i ran i Heuen. <sup>9f</sup>Bo tar binaka kura uelperere Maikoul ge nas uleikir angelou me Satan tang mai re kale tar tukununa Moses. Maikoul ahik pah ke menmene uasa tagu tang Satan, bo ke hire kompe tang Satan pare, “A Tamata Noman e loulouara totomua!” <sup>10g</sup>Doho tamatasinasine ra menmene uasa tun harahampe tar huar inet, ahik pah ra naman manatein, kara guata kompe tar haua ra marang guatain misiana tasir inetesiner roke ter niguataninanine ke mamantouontiehe tun tasisin. <sup>11h</sup>Kuasalik, God e turung heir tar uleikir uelmahing tun tasisin! Ka uakeluk pe tena niguata Ken, kara tang inete to tang Balam. Gisina ka mamantouois ngohina tang Korah ke mahang longoro pe tang Moses.

<sup>12i</sup>O tamatasin misiana tar lolouo ger ualasokor. I lolono toro nieining uah, gisin o mahang matal, o tang kauk ra marang gono kompe tar mamang inetelik. Gisina misiana pono tar mahar langit ge ahik pahe dur gere u bise liuigir rom. Gisina misiana ponor inua ge ahik pahe uoto ua tagu tena binak, kare misianar douk geke kahuhur, kare matmata

<sup>b</sup> 4 Gal 2.4; 2Pi 2.1    <sup>c</sup> 5 KT 12.51; Aha 14.29-30    <sup>d</sup> 6 2Pi 2.4    <sup>e</sup> 7 Uak 19.1-25; 2Pi 2.6,10  
<sup>f</sup> 9 Dan 10.13,21; 12.1; Sek 3.2; 2Pi 2.11; UGO 12.7    <sup>g</sup> 10 2Pi 2.12    <sup>h</sup> 11 Uak 4.7-8;  
 Aha 16.1-35; 2Pi 2.15; 1Jo 3.12    <sup>i</sup> 12 2Pi 2.13,17



hihir tunungua. <sup>13</sup>Gisina misianar butuana roke i laur, doh res niguata uasasinaniner ualamatala ke puraka sir tar peroper. Gisina ra uangoul sira tar pitopit gere uana ueltebeir puk i rana tar langit. Gisina ra turung uangoul dede tar butur kitupun geke umatotoin God tasisin.

<sup>14</sup>Jnok a propet ter uamouitina toso bunguna Adam teke mene tanika sioun tar puhonene ke pokoso manasa tasir tamatasin,

“Bang, A Tamata Noman gine re lame

menia toсно tamata gesir dedeil o burehentiehe tun o mahang ah.

<sup>15</sup> Inggon e me kedanga tasir tamata uakapa tun,

kare kout luaka tenas nipileser tamata uasantiehe tun tasir tamata uasa,

geka guata keipig tar hagar ger sa,

kara menmene uasa geka meneigir tamata ge ahik pah ra uakeluk tang God,

kara menmene uasa tatanon.”<sup>k</sup>

<sup>16</sup>Gisinar tamatasina ra korere kompe, kara boho tola tasir gisiameh. Gisina ra uakeluk kompe teres ninaman, kara nimalaraniner sa. Gisina ra uairana katongo kompeis, kara uahihiana tasir tamata mara kale me bureher inet.

#### A uahire tar tur uanono dede

<sup>17</sup>Ro bung uanoutoug, namana dede tar haua ra hireig no aposoul Iesu Kristo, <sup>18</sup>gisina ka hire tamiuoum pare, o tamat ra turung uelualeng uasa tar Tamata Noman menia tasir tamata gera tagorong mana tatanon, kara uakeluk kompe teres nimalara katongonine re deig God. <sup>19</sup>Gisina tera turung uaelueltageih ueltebeir tamiuoum, ge gisina pe ra uakeluk kompe tar haua re uauaha tar tukunus katong ahik me Iabena Dedeil re moko tasisin.

<sup>20</sup><sup>m</sup>Bo inggoum ro bung uanoutoug, mung uatampopokoho dedempesioum teremi nitagorong maneitir dedeilintiehe tun, karung lotu keip dede tar Iabena Dedeil.

<sup>21</sup>Uamoko katongo dedempesioum tar nimalaelhirir nang God, karung uanguangoul tar niueldolomo ger nana nagi Tamata Nomaneig Iesu Kristo gere keip tamiuoum tar nitua gere moko dede. <sup>22</sup>Ueldolom, karung guata uaia tas mais ahik pah ra tagorong mana dede tagu.

<sup>23</sup><sup>n</sup>Uelkarus tur tasir gisiameh toro hue, karung uauedeil tasisin.

Ueldolomo tasir gisiameh, karung guata uaia keip tasisina tar nisokor, bo

<sup>j</sup> 14 Uak 5.18,21-24    <sup>k</sup> 1.15 Bolobolo Inok 1.9    <sup>l</sup> 18 2Pi 3.3    <sup>m</sup> 20 Kol 2.7    <sup>n</sup> 23 Sek 3.2; UGO 3.4

mung kapil pukusioum tenas niguata uasasina gete sairisioum, karung sa pon.

### Inggeig i uatakai tang God

<sup>24</sup>God tere matotong kaueke uaia tun tamiuoum, maeit ahik pah mung matotong kouh tar sisiokong niguata uasa, kare uadelauana tun tamiuoum, kare keip tamiuoum i uoum tar niuahantiehe tun, kara uinatoror nan. <sup>25</sup>°Inggono ter tang sioko manasamper God nomana tun geke uaudeil tagigeig ke tangana pe tar tun Iesu Kristo nagi Tamata Nomaneig. A uinator a uelpipih, a nitampopokoh a i ranantiehe tun, kara nikauek e la tur tatanono sioun, gine daan, doh tar mamang binakalik. O Mana tun.

---

° 25 Roum 16.27; 2Pi 3.18

# O Uelhire Uaia Geko Ou

## O Uelhire Uaia Geko Ou

O bobolo rone toro Uelhire Uaia Geko Ou, roon o hire teil tar haua re turung pokosolaeit i uoum. Roon tero uadouhina ro bolobolo tar timuhur uelhote. Gine ke bolo tang roon Jon na aposoul Iesu.

O uelhire roono rone geko ou, o hire teil tar binakalanit i uoum. A ueluatatanin a parakukuh tun tar uakalahara tar tankan. Bo ro bolobolo puk roono rone, e moko teilir giniamer ninaman a kalahara tun e lain tar binakalaeit i uoum.

O tamata uaia uakapa tun ahik pah ra matotong kale uelmahing tagu. God ke kaleuatoro tanik manas tenas umar tamata gera tagorong mana dede tang Iesu. Ahik me tamata re uangoul keip me ueldolomo tar buturon i Heuen a turung uan uaia tun.

Ahik tagu mo tamatang uoum keip gesir sa. Resi mahang ueldolomosin e tuka kout. Res nitampopokohosin e turung tuka kout. God e turung heir me uleikir uelmahing tasisin.

Iesu e turung tapokisiha tar uanene i kot. Song ra turung atenguar tamata uakapa tun pare, Iesu a God. Inggono tere turung kedanga tasir tamata uakapa tun.

Satan ahik tagu me na nitampopokoh. God e turung heir me uleikir uelmahing tang Satan. Doha uelpipihinar baranganar tang sa e turung rou.

Inggeig i kila uahuhutume tang God e me uangoul tagu tagigeigene daan. A ualaskorontiehe tunumper inete re turung pokoso halana pe Iesu te tapokisiha. Bo God puk e turung kapil uaia tun tagigeig geti uamako tun teregi nitagorong man.

## I lolono toro bolobolo rone:

O borborian 1.1-20

A bolobolo tar moutir buturung lotu 2.1-3.22

A borboriana tang God, kara Tunar Sipsip 4.1-5.14

A moutir nihaila taner uabang manate 6.1-8.5

O mout ro tuilantar uabang manate 8.6-11.19

O borboriana tar uanene i kot, kari Heuen 12.1-14.20

A moutir nouhunar uabang manate 15.1-16.1

A uabang manate toro uraur, dohi Babilon 17.1-19.21

A uanene i kot e kap, kare lamer timuhur uan 20.1-22.21

**1** <sup>1</sup> Rone tono uelhire Iesu Kristo geko ou geke heirin God tatanono mare hire tanikono tena tamatang kalekinale tar hauar inete re uahuhutung pokoso uakalahar. Iesu ke ualatueha tena anggelou tar me uaate toro uelhire roono tang Jon ge na tamatang kalekinaleon, <sup>2</sup> Jon ke siokor bolo uahiuu uakapa tun tar mamang inetelik ke bangaig, kare hire tauete tun toro mana pare, roono tono uelhire nomana God ke uakalaharain Iesu Kristo.

<sup>3</sup> <sup>b</sup> A niguata uaia e la tang mai re timan, kare hire tauete toro uelhire rone ro nasir propet, kara niguata uaia e la pono tas mais ra longoro tang roon, kara uakeluk dede tar haua ka bolo uahiuuig tang roon, ge a binaka pe ke uahuhut manasain.

### Jon ke heir tena niuaha tar mouitir butur

<sup>4</sup> Inggo Jon u bolola tamiuoumur toto tamatang lotu tar mouitir butur tar pang Esia. A hamhamas, karo hiarouo tamiuoum, e la tur tang God gere pepeene daan, kare uangoulung sioun, kare turung la polukume. Dohe la tur pono tar mouitir laben gera tur i uoum tono tabtabila God ger toia, <sup>d</sup> <sup>5</sup> kare la tur pono tang Iesu Kristo ger uauaman, ke hire tauete toro man. Inggono ter uakikilangana tas mais geka uatua tapokis turis toro mat, kara uoum keip tasir toia uakapa tunane tar kot.

Inggono ke malauelhirintiehe tun tagigeig, kare luaka liu tur tagigeig tar uihing teregi niguata uasa toro deuatingin. <sup>6</sup> <sup>f</sup> Inggono ke guata tagigeig pare, o toia, karo patere mari kalekinale tar God ger nanon, kara Taman. Uatakai, kara nitampopokoh gere moko dede e la tang Iesu Kristo tar mamang binakalik. O Man.

<sup>7</sup> <sup>g</sup> Bang, inggon e la keipiha tar mahar langiting Heuen. Doha mamang matanalik e turung banga tatanon, mais ponompe ka soup tatanono toro bel. Doho tamata uakapa tunane i kot ra turung kiring tatanon. A puhonene a puhung mana tun. O man.

<sup>8</sup> <sup>h</sup> A Tamata Nomana ger God, ke kula pare, “Inggo ter Uakekenen, karu Uadouh keip poluk. Inggo u uangoulene daan, karu uangoulung sioun, karu turung la polukuha. Inggo ter uelpipihintiehe tun.”

### Iesu ke pokoso tang Jon tar borborian

<sup>9</sup> Inggo Jon ge uanotoumiuoum ku uangoul keip pono tamiuoum tar niduh tena Nitoia God tar mamang niguata uasalik geka guatguatameig

<sup>a</sup> 1.1 UGO 22.6 <sup>b</sup> 1.3 UGO 22.7,10 <sup>c</sup> 1.4 KT 3.14-15; UGO 3.1; 4.5 <sup>d</sup> 1.4 “Tono tabtabila God ger toia,” God’s chair, “throne,” gitir tabtabil e ualasira tar nitampopokohor toia tasir tamata uakap <sup>e</sup> 1.5 Ker 89.27; Kol 1.18 <sup>f</sup> 1.6 1Pi 2.9; UGO 5.10; 20.6 <sup>g</sup> 1.7 Dan 7.13; Sek 12.10; Mat 24.30; Jon 19.34-37; 1Te 4.17 <sup>h</sup> 1.8 UGO 21.6; 22.13

tagigeig mes Iesu. Inggo u uangoul tar tor i Patmos, teeit tono uelhire God, karu menmene ualasira tasisina tang Iesu. <sup>10</sup>Tena mareinir Tamata Noman, na Iabena Dedeil God ke hiku totoguo, karu longoronguao tar uau re kula ualeik pe misiana geta uin ro tuil. <sup>11</sup>Inggono ke kula pare, “Bolo uahiuu uakapa tun tar haua ko bangaig, karo heir tasir tamata gera tagorong mana tang Iesu Kristo tar mouitir pang uaninine, i Epeses, i Smerna, i Pergamungn, i Taiataira, i Sardis, i Piladelpia kari Laodisia.”

<sup>12</sup>Gitie ku uagege uelhir peo tar marang banga maionene re menmene totoguo, inggo ku bang huara dedengua, toro mouit ro toktokono ro lam a nituha tar goul.<sup>i</sup> <sup>13</sup>Dohi uantinanina taninin e turur tamata misiana tar keketik bulout ger Tunar Tamat.<sup>k</sup> E hiku teil toro hikhiku o baraha uatuk i koto tar kekenon, karo mahar gomom o abeaba iauiauel o auih uiloho toro uaruaronon. <sup>14</sup>O lunon, kara ulunon a gaugauilintiehe tun misiana tar ulunar sipsip gauil ue misiana tar mahar langit gaugauil, kara toking matanon e luh sira toro luhluhuna ro hue. <sup>15</sup>Doha kekenon e abeaba sira tar brasener nisoro uaabeab,<sup>m</sup> kara alalinganar uauanon e kaling sira toro reihin tar kodom. <sup>16</sup>“Doh tar pang limanonener pang mua e takopo teil tar mouitir pitopit, karo tauete me ro baenata tar uauanon o uaraman. A porenon e balantiehe misiana tar pisara gere balantiehe tun.

<sup>17</sup>“Tar binaka ku bango tatanon, inggo ku mata uapuh, karu punga uahiu misiana tar tamatener mat, song ke uaponolaono tar pang limanener pang mua totoguo, kare hire pare, “Ahik paho sokor, inggo ter Uakekenen karu Uadouh keip poluk. <sup>18</sup>Inggo ter tang sioko ger tua. Bang, inggo ku mat, bo gine daan inggo a tua tar mamang binakalik, karu kale teil tenas kir mat, kara ki tar uaning mat. <sup>19</sup>Bolo uahiuu uakapa tun tar haua ko bangaig re pokosene daan, kare tar haua re turung pokosolaeit i uoum.”

<sup>20</sup>“Ter tengkanar mouitir pitopit geko bangagia tar pang limouguo ger pang mua, karo mouit ro toktokono ro lam ger goul teenine: a mouitir pitopit tosnosi anggelour toto tamatang lotu tar mouitir butur, karo mouit ro toktokono ro lam tesir toto tamatang lotu tar buturin.”

### Rone o la tasir toto tamatang lotu i Epeses

**2** <sup>1p</sup>“O bolobolo rone o la tar anggelou tar lotu i Epeses. Ginine tena ueluelhirer tang sioko, gere kale teil tar mouitir pitopit tar

<sup>i</sup> 1.12 “goul,” a pang hain iauiauel abeabantiehe tun doha bulauan a i ranantiehe pon <sup>j</sup> 1.13 Dan 7.13; 10.5 <sup>k</sup> 1.13 A Tunur Tamat a giameher hangan tang Kristo.

<sup>l</sup> 1.14 Isk 43.2; Dan 7.9; 10.6; UGO 2.18; 19.12 <sup>m</sup> 1.15 “bras,” a pang hain iauiauel, kara abeab misiana tar “goul,” bo ahik paha siokon <sup>n</sup> 1.16 Hib 4.12; UGO 2.12; 19.15 <sup>o</sup> 1.17-18 Ais 44.6; 48.12; UGO 2.8; 22.13 <sup>p</sup> 2.1 UGO 1.16

pang limana ger pang mua, kare latlateil i uantinanina toro mouit ro toktokonor lam ger goul.”

2<sup>a</sup>“Inggo u ate tar haua ko guataia, ko kalekinalentiehe tun pemea tang Kristo, kara hamhamas nang niuangoul. Inggo u ate, ingga hik pah ko uahue tasir tamata uasa, kare hape ko uedanga pea tas gera kula katongois o aposoul, bo gisin ahik. Inggoum kung ate uaia tun manasa tasisina pare, o bohoboh. 3 Ingga a hamhamas nang niuangoul, karo huata tar niduh tar hangouguo, doh ahik pah ko maluana kout. 4 Bo reng puha teene re tokouasain totoguo: ingga haik manasa paho malauelhir totoguo misiana sioun. 5<sup>a</sup>Namana tapokis ko uangoul peme sioun tar uakikilangan, kari ia ko me punga kout toa! Uapalih tenang niguat, karo guata tar haua ko guatameig sioun tar uakikilangan. Geta hikia paho uapalih tenang niguat, inggo u lame totomua, karu me kale liu tonongo toktokono nongo lama totomua tena butur. 6 Bo ingga ko guata uaiantiehe tun tar puh pare, re tokouasa peia tar haua ra pileseinir Nikolisen,<sup>s</sup> inggo e tokouasa ponoio tar puhon.”

7<sup>t</sup>“Mai ge kaein me talingan, longoro tar haua re meneinir Iabene Dedeil tasir tamatang tar lotu. Mais geka touahiua tar tang sa, inggo u uahue tasisina ra ein toro kukuanana ro doukung tua gero tur i Paradiso tang God.”

### Rone o la tasir toto tamatang lotu i Smerna

8 “O bolobolo rone o la tar angelou tar buturung lotu i Smerna. Ginine tena ueluelhirer tang sioko ger uakekenen, kara uadouhin gere uangoulung sioun, geke mat, kare tua tapokis.”

9<sup>u</sup>“Inggo u ate tar niduh totomua. O katupa tun tar ineteng gane i kot, bo ingga puk nang bureher inete ke heirig God. Inggo u ate ka menmene uasa per tamata gera kula pare, o Ju totomua, gisin ahik paho Ju, bo gisina no tamata Satan. 10<sup>v</sup>Ahik paho sokoro tar niduh ro huatain. Inggo gine ru hire totomua, Satan e turung uamoko tasir gisiamehe tamiuoum tar karabus tar uedanga tamiuoum, doh inggoum mung turung kale uelmahing, kara niduh tar hangaulur marein. Tagorong mana kompe e tuka geto mat, doh inggo u turung heiro totomua toro keuarang nitua gere moko dede.”

11<sup>w</sup>“Mai ge kaein me talingan longoro tar haua re hireinir Iabene Dedeil toro buturung lotu. Mai geke touahiua tar niguata uasa, inggon ahik pahe turung tuparain ue e kale uelmahing toro uatorikina ro mat.”

<sup>a</sup> 2.2 1Jo 4.1   <sup>r</sup> 2.5 UGO 3.3   <sup>s</sup> 2.6 Nikolas a tang siokor tamat re ualasira tar niualasirar boh   <sup>t</sup> 2.7 Uak 2.9; UGO 22.2,19   <sup>u</sup> 2.9 2Ko 11.14-15; UGO 3.9   <sup>v</sup> 2.10 2Ti 4.8; Jas 1.12  
<sup>w</sup> 2.11 UGO 20.14; 21.8

### Rone o la tasir toto tamatang lotu i Pergamungn

12 “O bolobolo rone o la tar anggelou tar buturung lotu i Pergamun, Ginine tena ueluelhireon gero uaraman no baenata gero manantiehe tun.”

13 “Inggo u ate tar butur ro pepea tar uan uleik gero toko no tabtabila uleik Satan. Bo ingga ko uamana noman, ahik pe pah ko uolih o tele totoguo, gitiempe tar binaka ka tung pous toin tang Antipas geke tur keip tun tar nitagorong mana totoguo, kara tar uan uleikeitir noumua re uangoulin Satan. 14 <sup>x</sup>Bo reng puha teene re tokouasain totoguo: o gisiamer tamata kaeis totomua ra kale teil haraha tar niguata ger nang Balam geke kouruin Balak tar uelour tasir Israel tar niguata ger sa, ka ein pe tar niein geka guata keipig tar uahung tasir god bohoboh, kara ura ueltebeir. 15 Tar siokono kompe, o gisiamer gisit pono totomua ra kale teil tar niualasira ger nasir Nikolisen. 16 ‘Uapalih tar niguatanitir sa.’ Geta hikion, Inggo ahik mpahu heir binaka tar lame totomua, karu me uelkoi keip tasisina toro baenat gero tauete tur tar uauouguo.”

17 <sup>y</sup>“Mai ge kaein me talingan, longoro tar haua re hireinir Iabene Dedeil toro buturung lotu. Mais geka touahiuu tar tang sa, inggo u turung heir tasisina tar giniamer mana<sup>z</sup> ger ououu. Inggo u turung heir pono tasisina kahakaha me gaugauilir palau e tur teilir timuhur hangan a nibolola tang roon. Mai kompe re kale tang roono tere ate.”

### Rone o la tasir toto tamatang lotu i Taiataira

18 <sup>a</sup>“O bolobolo rone o la tar anggelou tar buturung lotu i Taiataira. Ginine tena ueluelhirer tuna God gere luh sirar matana toro luhluhuna ro hue, kara kekenono misianar baras ger nisoro uaabeab.”

19 “Inggo u ate tar haua ko guatguatagia, a nimaluelhirir eimua, kara nitagorong man, kara nipoul ko guatagia, karo uangoungoul sikoro tun. Ingga ko guata uaiantiehe tunene daan. 20 <sup>b</sup>Bo reng puha teene re tokouasain totoguo: ingga ko uahue tar kuah, Jesabel gere kula katongoin pare, na propet God tar ualafir, kare uoum keip uasa tosnogo tamatang kalekinaleo toro uraur, kara ein tar niein geka guata keipig tar uahung tasir god bohoboh. 21 Inggo ku heir tatanono tar binaka mare uiuirin tono uraur, bo inggono

<sup>x</sup> 2.14 Aha 22.1–25.2; 31.16; 2Pi 2.15    <sup>y</sup> 2.17 KT 16.4,14-15,33-34; Ais 62.2; Jon 6.48-50

<sup>z</sup> 2.17 “mana,” a niein ke heirin God tasir Israel tar binak ka uangoul tar butur paden, bang toro Bolobolong Kale Tapokis 16.32-34    <sup>a</sup> 2.18 UGO 1.14-15    <sup>b</sup> 2.20 1To 16.31; 2To 9.22

puk hik pah ke malar. <sup>22</sup> Temaeit inggo u baka uapononguala tatanono tar uelmahingininer santiehe tun, karu guata tasisit ka guata tagu tatanono toro uraur, ra kale pono tar uleikir uelmahing e tuka gete uiuirisisin tenas niguataniner sa, ka guata taguig tatanon. <sup>23</sup> <sup>c</sup> Karu turung umat tas mais gera uakeluk tatanono mara turung ater tamatang lotu uakapa tun pare, inggo u ate uakapa tun teres ninamanasin, kare teres nimalarar tamata uakapa tun. Inggo u turung bulaua kahakaha tamiuoum, e matotompein tenami niguat. <sup>24</sup> Bo o gisimehe tamiuoumur tamatang Taiataira, inggo u kula pare, totomuaeit ge ahik pah ko sanga uanono tena niualasirononiner sa, doh ahik pah ko ate uahiua tar niualasira gera kilaig pare, ‘Na niate Satan ger ouou.’ Inggo u kulangua pare, ahik pahu matot u heir me uleikir niduh tamiuoum. <sup>25</sup> <sup>d</sup> Kale uanono kompe tar haua kaein totomua e tuka getu lameo.”

<sup>26</sup> <sup>e</sup> “Mai geke touahiua tar niguata uasa, kare guata tar nimalarar eiguo e tuka tar uadouhinar binak, inggo u turung uahue tatanon, e kaueke uakapa tun toro mamang pang uanilik uakapa tun. <sup>27</sup> Inggon e turung kaueke keip tasisina toro bele sineir, kare turung mumumur tasisina misiana tar nouh, te misiana kompe tar nitampopokoho geku kale turio tang Tamoug. <sup>28</sup> Inggo u turung heir pono tatanono tar pitopitong tar lulein <sup>29</sup> Mai ge kaein me talingan longoro tar haua re hireinir Iabene God toro buturung lotu.”

### Rone o la tasir toto tamatang lotu i Sadis

**3** <sup>1</sup> <sup>g</sup> “O bolobol o la tar anggelou tar buturung lotu i Sadis. Ginine tena ueluelhireono gere kale teil tar mouitir Iabenar nang God, kara mouitir pitopit.”

“Inggo u ate tar niguatar noumua. Ingga ra uoto kulkulaia pare, a tua, bo ingga a mat. <sup>2</sup> Tentur! Uakodkodoho tar haua re tua sikoro harah gere uahuhutung mat, ge inggo pe ku tupara tar niguatar noumua, ahik pah ko uakuakapa hihir tenang kalekinale tar matana God ger noguo. <sup>3</sup> <sup>h</sup> Namana tapokis tar haua ko kaleig, karo longoroig, uakeluk taninin, karo uapalih tenang niguataniner sa. Bo geta hikia paho tentur, karo guata tar puhonene, inggo u turung la sirame tar ueuenau, doh ingga hik paho turung ate tang hingiar binaka ru lameo totomua.”

<sup>4</sup> <sup>i</sup> “I Sadis o papagalik puk manasamper tamatar delauana nas hikhiku. Gisina tera ueldokout keip totoguo ra hiku tar gaugauil, teeit gisina ka

<sup>c</sup> 2.23 Ker 7.9; Jer 17.10; UGO 20.12-13    <sup>d</sup> 2.25 UGO 3.11    <sup>e</sup> 2.26 Ker 2.8-9

<sup>f</sup> 2.28 UGO 22.16    <sup>g</sup> 3.1 UGO 1.4,16    <sup>h</sup> 3.3 Mat 24.43-44; 1Te 5.2; UGO 2.5; 16.15

<sup>i</sup> 3.4 Jud 23



uakeluk tereg nimalaro. <sup>5j</sup>Mai geke touahia tar niguata uasa, inggon e turung misiana tasin e hiku pono mo gaugauil. Inggo ahik pahu matotong dura liu tur tar hanganono toro bolobolong tua. Doh inggo u turung hire tauete tang Tamoug mesno anggelou pare, Inggon a noguo. Inggon e turung kalahara hangan i uoum tang Tamouguo mesno anggelou. <sup>6</sup>Mai ge kaein me talingan, longoro tar haua re hireinir Iabene toro buturung lotu.”

### Rone o la tasir toto tamatang lotu i Piladelpia

<sup>7k</sup>“O bolobolo rone o la tar anggelou tar buturung lotu i Piladelpia. Ginine tena ueluelhireono ger dedeil, kara uauaman gere kale teil tena ki Debit. A haua geke pukaion ahik me tamata re matotong holor, doha haua geke holoroion ahik me tamata re matotong puk.”

<sup>8l</sup>“Inggo u ate tar haua ko guatagia, doh inggo gine ku puka toro pirik ge haik me tamata re matotong holor. Karu ate pare, ingga a sisikinalik tun reng nitampopokoh, bo ko uakeluk uaia tun puk tar ualasarir nouguo, ahik pah ko uolih o tele totoguo. <sup>9m</sup>Inggo u turung guata me inete tas mais ra uangoul tena umang lotu Satan gera kula pare, o Ju, bo gisin ahik, gisin o bohoboh. Inggo u turung guata tasisina mara lame totomua, kara me kokolo uahiu i uoum totomua, kara turung ate pare, inggo u malaelhir tun totomua.”

<sup>10n</sup>“Teeit ko sanga dede pe ingga tar ualatutur nouguo, karo uanguangoul sikor, inggo u uaudeilingua pono totomua tar binakang kedanga gere turung lame tar uanene i kot. <sup>11</sup>Ahik pahi reh, karu lameo. Kale uanono tar haua ka kale manasain, maeit ahik me tamata re turung kale tonongo keuara. <sup>12p</sup>Mai geke touahia tar niguata uasa, inggo u turung guata tatanon, ngohina paho tur, o tur i uantinanina tena umang lotu God, <sup>q</sup>kare turung uangoul dedengua. Inggo u turung bolola tatanono tar hangana nagu God, kara hanganar uan uleik ger nang God, ter timuhur Jerusalem geke la turuha i Heuen tar God ger nouguo. Doh inggo u turung bolo uahiuala tar timuhur hangoug tatanon. <sup>13</sup>Mai ge kaein me talingan longoro tar haua re hireinir Iabene Dedeil toro buturung lotu.”

### Rone o la tasir tamatang lotu i Laodisia

<sup>14</sup>“O bolobol o la tar anggelou tar buturung lotu i Laodisia. Ginine tena ueluelhire ro man ger uauaman, kare hire toro man, kare uatengkana tar mamang inetelik geke touoig God.”

---

<sup>j</sup> 3.5 KT 32.32-33; Mat 10.32; Luk 12.8   <sup>k</sup> 3.7 Ais 22.22   <sup>l</sup> 3.8 1Ko 16.9   <sup>m</sup> 3.9 Ais 45.14; 49.23; 60.14; UGO 2.9   <sup>n</sup> 3.10 Luk 21.19; 2Ti 2.12   <sup>o</sup> 3.11 keuar toro uelhireng inglis “crown.”   <sup>p</sup> 3.12 Ais 62.2; 65.15; UGO 14.1; 21.2   <sup>q</sup> 3.12 Na umang lotu God ue umang lotu ger dedeil “Tempoul” a uelhire uarang pare, tar butur re uangoul dede tang God

15<sup>r</sup>“Inggo u ate tar haua ko guatagia, inggo u ate ingga ahik paha molomol ue a uelsuk, inggo u malar, ingga paka molomol, kara uelsuk. Inggo u ate, ingga ahik paha pul ue a tagal, bo inggo u malara pare, ingga pako uakeluk me siokor lele tar toking puh rasin. 16<sup>s</sup>Temaeit inggo u abih liuingua totomuane tar uauoug, teeit ingga o uelsuk sikoro pukumpe ahik paha uelsuk ue a molomol. A lilio reng ninaman ahik paha siokon. 17<sup>t</sup>Ingga o uoto kula katongoia pare, ‘Inggo nang bureher inet, u matoto teil tun tar mamang inetelik, ahik pahu uahinga baka poluk me inet.’ Bo ingga puk ahik paho bang paroko pare, ingga pe o katupa tun tar mamang inetelik, ahik meng niueldolom, a tiome, a kut, kara palapal. 18<sup>u</sup>Inggo u kula uapopokohongua totomua pare, o bulaua turungua totoguo me goul ge ahik paha uelhouar, maeit ro tang mania, karo hiku mo gaugaul ro hikhiku maro uatarai torongo mahang matal a palapala pe. Bulaua pono me marasin maro uamoka tar matoum maro banga uaia ingga. 19<sup>v</sup>Inggo u uoto loulouar, karu ualatut uaia tun tas mais geru malauehiris. Temaeit ingga o uapalih tun tenang niguataniner sa toro man.”

20<sup>w</sup>“Bang inggo gine ru kokolo tur toro pirik. Ge me tamata re longoro tar uauouguo, kare puka toro pirik, inggo u turung lek, karu ein tagu tatanon, kare ein taguono totoguo. 21<sup>x</sup>Mai geke touahiua tar niguata uasa, inggo u uahue tatanono tar me tabila keip totoguo tonogo tabtabila gero nasir toia. Te misiana totoguo ku guata uoum, karu touahiua tar niguata uasa, karu tabila keip tang Tamoug tono tabtabilang toia. 22<sup>y</sup>Mai ge kaein me talingan longoro tar haua re hireinir Iabene Dedeil toro lotu.”

### O tabtabila gero nanar tamata uleik i Heuen

**4** 1<sup>w</sup>I muduhia tar ineteninanine inggo ku banga toro pirik i Heuen o takapuk. Doha uau geku longoro baka uoumio gere kaling sira toro tuil, ke mene poluk pare, “Kaeitiehane maru turung ualasira totomua tar haua re turung pokosolaeit i uoum.” 2<sup>x</sup>Ahik me manasan, kare hikur Iabene Dedeil totoguo, doh gane i uoum totoguo, o toko ro tabtabila gero nasir toia, e tabila teilir tang siokor tamat. 3<sup>y</sup>A tukununar tamatonene re tabil e abeaba sira toro mahar jaspaz, karo mahar konilian.<sup>a</sup> Doho bato ko uiloho toro tabtabila roon o bukbukir sira toro mahar emiral.<sup>b</sup> 4<sup>c</sup>Doh

<sup>r</sup> 3.15 Roum 12.11    <sup>s</sup> 3.17 Luk 12.21; 1Ko 4.8    <sup>t</sup> 3.18 Ais 55.1    <sup>u</sup> 3.19 1Ko 11.32; Hib 12.6; UGO 2.5    <sup>v</sup> 3.20 Jon 14.23    <sup>w</sup> 4.1 UGO 1.1,10    <sup>x</sup> 4.2 Ais 6.1    <sup>y</sup> 4.3 Isk 1.28  
<sup>z</sup> 4.3 “jaspaz,” a palau a matia, karo abeab, karo bukbukir    <sup>a</sup> 4.3 “konilian,” a palau a pon, karo abeab, karo matia, karo kubkubar    <sup>b</sup> 4.3 “emiral,” a palaua ngohina pah ro galas a matia, karo abeabantiehe tun, karo bukbukir    <sup>c</sup> 4.4 UGO 3.18

toro tabtabila roono rone ro nasir toia e toko uiloho ponor giniaméh. A torikir hangaul, karo toueit, ra tabila teilir mamahoholik, gisina ra hiku teil tar gaugaulir hikhiku, kare nas keuar a nituha keip tar goul e moko tar lusisin. <sup>5d</sup>Toro tabtabila gero tok i uantinanina gero nasir toia e balbala turur kanau, kare pilar pil. Dohi uoum tang roon e mokor mouitir luh, a luhuntiehe tun. Ginina ter mouitir Iabenar nang God. <sup>6e</sup>Dohi uoum toro tabtabila roon a mamadelaua uaia tun misiana tar laur.

Gane i uoum uiloho toro tabtabil roon kaeis o toueitir inet o tua, doh tar tukunus uakapa tunusin e moko uiloho uakapar matas i uoum dohi mud. <sup>7A</sup>A uakikilanganar inetesinasiner tua ngohinar laion,<sup>f</sup> a uatorikin ngohinar kau, a uatouonon a porenon ngohinar tamat, a uatoueitin ngohinar manulab. <sup>8g</sup>Doh tasisinar toueitir inetesinasiner tua a tonomo uakapar titiauas, kare uoun uiloho uakapar matana taninin gane ponompe i kotohia tar pang titiauaisin. Tar mamang mareinilik, kara mamang boungulik, gisin ahik pah ra pepe uaha tar kula pare,

“A Dedeil, A Dedeil, A Dedeilir Tamata Noman, God ger i ranantiehe tun,  
gere uangoulung sioun, doh gine daan, kare turung lame.”

<sup>9</sup>Tar mamang binakalik o inetesinasiner tua ra uinatoro, kara uatakai, kara heir tar niuaha tatanonoene re tabila toro tabtabila gero nasir toia gere uangoul, kara tua tar mamang binakalik. <sup>10h</sup>A torikir hangaul, kara tang toueitir mamahoholik ra me uoto hatup uahiu i uoum tatanonene re tabila tono tabtabilar toia, kara lotu tatanonener tua tar mamang binakalik. Gisina ra uamoko tenas keuar i uoum toro tabtabila gero nasir toia, kara kula pare,

<sup>11</sup> “Ingga a i ranantiehe tun, nami Tamata Nomaneim,  
kare nami God tar kale tar uinator, kara uatakai, kara nitampopokoh.

Ge ingga pe ko tuha tar mamang inetelik,  
doh tar nimalarar eimua ginina ka tuhaig, ginine re moko daan a tua.”

#### A Tunar Sipsip e puka toro bolobol gero nihaila tane

**5** <sup>1i</sup>Song ku banga polukuo tar pang mua tatanonene re tabila toro tabtabila ro nasir toia, o moko ro bolobol o nibol i uoum dohi mud, a mouitir butur ka haila tane pein. <sup>2</sup>Song ku banga polukuo tar angelou

<sup>d</sup> 4.5 Isk 1.13; Sek 4.2; UGO 1.4; 8.5; 11.19; 16.18    <sup>e</sup> 4.6 Isk 1.5-10,22; 10.14    <sup>f</sup> 4.7 “laion,” a inete ngohina paha kusi, bo uleikintiehe tun    <sup>g</sup> 4.8 Ais 6.2-3; Isk 1.18; 10.12

<sup>h</sup> 4.10 UGO 19.4    <sup>i</sup> 5.1 Ais 29.11; Isk 2.9-10

uelpipih tun ke kula ualeikintiehe tun pare, “Mair uiantiehe tun re matot e peis tar butur nihaila tane, kare puka toro bolobol?”

<sup>3</sup>I Heuen ue gane i kot ue i lolono tar kot ahik me tang sioko re matotong puka toro bolobol ue e bang i lolono tang roon.

<sup>4</sup>Inggo ku kiringintiehe tun, karu mahmahang buk, teeit ahik pe me tang sioko ka tuparain re matotong puka toro bolobol, kare bang i lolono tang roon. <sup>5</sup><sup>j</sup>Song, a tang siokor mamahoholik ke kula pare totoguo, “Ahik paho kirkiringintiehe! Bang, a laion a peng toro matina tasir Ju, a bubunguna Debit, inggono ke pehuara tena uelmatan tere matotong peis tar mouitir butur ger nihaila tane uapopokoho tun, kare puka tang roon.”

<sup>6</sup><sup>k</sup>Song ku banga polukuo tar Tunar Sipsip gera banga sirain paha nitung pous e tur i uoum toro tabtabila gero nasir toia, kara tur uilohor toueitir inete gesir tua tatanon, karo mamahoholik. Inggonor Sipsip no mouit ro seir, kara mouitir matan, ginina ter mouitir iabene ke heirihais God tar pang uanene i kot. <sup>7</sup>A Tunar Sipsip ke lame, kare me kale tur tar pang mua toro bolobolo tang gere tabila tono tabtabilar toia. <sup>8</sup><sup>l</sup>Binaka ke kaleon, a toueitir inete gesir tua, kara torikir hangaul, doha tang toueitir mamahoholik ka siokor punga uahiu i uoum tar Tunar Sipsip. Gisina uakapa tun ra siokor uoho teil tenas gita, kara kale teil tar nouh a nituha tar goul a uoun tar adua.<sup>m</sup> Gininar diku e uamuhiua tenas lotur tamata gesir nang God.

<sup>9</sup>“Gisina ka kere toro timuh ro kerekere rone.

“Ingga tero matoto tun tar kale toro bolobol,

karo peis tar butur geka haila tane uapopokohoin.

Teeit ingga ka tung pousuia, doh tar deuatingimua, ingga ko bulaua tasir tamat o nang God tur toro mamang matinalik,

doh toro mamang uelhirelik menia mamang tamatalik, kare toro mamang pang uanilik.

<sup>10</sup>“Ingga ko uatoia, karo uapatere tasisina mara kalekinalesina tenagi Godeig,

kara turung uoum keipane i koto uakapa tun.”

<sup>11</sup><sup>p</sup>Song ku banga polukuo, karu longorongua tar uauasir angelou, o burehentiehe tun ahik pah ra matotong ahais, gisina ka tur uiloho toro tabtabila gero nasir toia, karo inete gesir tua, karo mamahoholik.

<sup>12</sup>Gisina ka siokor kere ualeikintiehe tun pare,

<sup>j</sup> 5.5 Uak 49.9; Ais 11.1,10; UGO 22.16 <sup>k</sup> 5.6 Sek 4.10; Jon 1.36; UGO 13.8

<sup>l</sup> 5.8 Ker 141.2; UGO 8.3-4 <sup>m</sup> 5.8 “insens,” a bultan ue adua toro douk, ra kilain, “o frankinsense.” <sup>n</sup> 5.9 Ker 33.3; 40.3; 96.1; 98.1 <sup>o</sup> 5.10 KT 19.6; Ais 61.6; UGO 1.6; 20.6 <sup>p</sup> 5.11 Dan 7.10; Hib 12.22

“A Tunar Sipsip geka tung pousin, inggono tere matoto teil tun tar kale me nitampopokoh,  
kare matoto teil tar mamang inetelik, kare tar niate uaia tun,  
kara tampopokoh, ra ueltadain a matmata hamas tun,  
kara uatakaian!”

<sup>13</sup>Song ku longoro polukuo tasir mamang inetelik i Heuen, doh gane i kot, kari lolono tar kot, dohi laur, kara haua gere moko taninin ka siokor kere pare,

“Tatanonene re tabila toro tabtabila ro nasir toia,  
kare tar Tunar Sipsip.  
Siokor uatakai, kari ueltad, kari umatmata hamas tun,  
kara nitampopokoho tar mamang binakalik,  
kare la dedenguampela.”

<sup>14</sup>Doh gisisir ineter tua ka siokor kula pare, “O mana tun”! Karo mamahoholik ka siokor hatup uahiu i kot, kara lotu.

#### A mouitir butur nihaila tane

**6** <sup>1</sup>Inggo ku banga tun tar binaka ke peisir Tunar Sipsip tar uakikilanganar butur ger mouitir nihaila tane, karu longoro tar tang sioko tasir toueitir inete gesir tua ke kaling ualeik pe, e kaling sira re kaling per pil, ke kula pare, “Lame!” <sup>2</sup>Karu banganguao tar hos a gauil, gane i uoum totoguo, doh gine re ualo teil tatanon e kale teil tena lean karkin, inggono ka uatokolain ro keuar toro lun. Inggono ke tur uakalahar ke pehuara pe tar uiliatung, kare pehuara dedempe tar mamang uiliatungulik.

<sup>3</sup>Tar binaka ke peisir Tunar Sipsip tar uatorikinar butur nihaila tane, inggo ku longoro tar uatorikinar inete tasisitir tua ke kula ualeik pare, “Lame!” <sup>4</sup>Song ke taueter uatorikinar hos, inggon a kubar. Gine re ualo teil tatanon, ka heirin tar nitampopokoho tar kale liu tar uahiarouo tasir tamata uakap, gane i kot, kare guata tasir tamata ra uelueltung pous katongois. Inggono ka heirin toro uleik ro baenat.

<sup>5</sup>Tar binaka ke peisonor Sipsip tar uatouononor butur nihaila tane, inggo ku longoro tar uatouononor inete gesir tua ke kula pare, “Lame!” Karu banganguao, gane i uoum totoguo tar hos a kurum. Gine re ualo teil tatanon e kaba teil tar sikeil. <sup>6</sup>Doh inggo ku longoro tar kaling ualeik misiana paha uau, i uantinanina tar toueitir inetesisir tua, e kula pare, “A sikir raes-uit e lain tar buluanar siokor marein, kara sikir bali-raes e lain tar buluanar siokor marein. Ahik paho mamantou tar uaiuai mer bino!”

<sup>1</sup> 6.1 UGO 4.6; 5.1    <sup>2</sup> 6.2-5 Sek 1.8; 6.1-6

<sup>7</sup>Tar binaka ke peisir Tunar Sipsip tar uatoueitinar butur nihaila tane, inggo ku longoro tar uauanar uatoueitinar inete gesir tua ke kula pare, “Lame!” <sup>8</sup>Karu banganguao tar hos a madaiar tukunun! Doh gine re ualo teil tatanon a hangana tang mat. Doh nas uanir mat, e uakuakeluk uahuhut teil manasa tatanon. Gisina ka heiris tar nitampopokoho tar tung pous mo toueit ro mahar tasir tamata karo moko mo mahar touono gane i kot, doh tar tung pous keip toro baenat, tar gog, toro uelmata, doh tasir inete gesir roke.

<sup>9</sup>Tar binaka ke peisono tar uatolimanar butur nihaila tane, inggo ku banga tola i kukulebanga toro olta tar labeisisitir nitung pous, teeit ka tur keip pe tonu uelhire God, kara uakeluk uaia tun tar haua ka tur keipin. <sup>10</sup>Gisinar iabene ka siokor kula ualeik tun pare, “Tamata Noman ger i ranantiehe tun, ingga a Dedeil, karo man, mangiha ro lula tasir tamatang gane i kot geka uatading tar deuatingimiueim?” <sup>11</sup>“Song ka heir kahakahaisisina tar gaugauilir hikhiku a baraha uatuk i kot, kara hireis tar uangoul sikoro baka me sikin e tuka geta aha uakapaisir tamatang kalekinale, karo uanotous gera turung tung pousis ngohina ka tung pous uoum pesieim.

<sup>12</sup>“Inggo ku uakeis uanono tar binaka ke peisono tar uatonomonor butur nihaila tane. Binakon ke nunur nun a uleikintiehe tun. Doha pisar ke kurkurum misiana tar kitup. Doha bialok, ke kubkubara uakapa sira tar deuating. <sup>13</sup>“O pitopit i rana tar langit ka siokor dud uahiu i kot misiana tar kukuananar douk ger murak geke pung i kot tar binaka re uagunar pang rom. <sup>14</sup>“A langit ke kauiur misiana toro bolobol geka ligun uilohoin, doho siusan, karo toro tor ka uain liuig tar butur re tok. <sup>15</sup>“Doho toiang tar koto uakapa tun, karo tamatang kaueke toro pang uan uleik, karo tamata gesir i ranantiehe tun, karo ualualatouk, kare mais nas bureher mamang inetelik, karo karabus, karo tamata gera kaueke katongois, gisina ra siokor tokouaou i lolono tar lebang, kari uantinanina tar mahar tulauanar siusan. <sup>16</sup>“Gisina ra kilkila tar siusana mer mahar tulaua pare, “Pungaha tamiueim, karo uaouo tamiueim tar mataneit re tabila tonu tabtabilar toia, kare tena nimalianar Tunar Sipsip! <sup>17</sup>“Ge a marein uleik pe geura nimaliana to rasina ke pokoso manas. Bo mai puk re matotong udeil?”

#### 144 taoseinir tamata ka uaanasais

**7** <sup>1</sup>“I muduhia tanininanine, song ku bango tar tang toueitir angelou ra tur toro toueit ro gon tar pang uanene i kot, gisina ra turtur tane

<sup>s</sup> 6.8 Jer 15.1-3; Isk 5.12,17; 14.21    <sup>t</sup> 6.11 UGO 7.9,13; 19.14    <sup>u</sup> 6.12 Mat 24.29; Apo 2.20; UGO 8.12; 11.13; 16.18    <sup>v</sup> 6.13 Ais 34.4    <sup>w</sup> 6.14 UGO 16.20    <sup>x</sup> 6.15 Ais 2.10,19,21  
<sup>y</sup> 6.16 Luk 23.30    <sup>z</sup> 6.17 Jol 2.11; Mal 3.2    <sup>a</sup> 7.1 Jer 49.36; Dan 7.2

tar toueitir rom gane i kot gete ume i rana tar uanene i kot ue i rana tar laur ue i rana tang hingiampe ro douk.

<sup>2</sup>Song ku banga polukuo tar tang giameher angelou e la turuha tar butur re hara turuhar pisar. Inggon e kale teil tar inete gere uanasa tasir tamat gesir nanar God ger tua. Inggono ke kula ualeikintiehe tun tasir tang toueitir angelou geka heiris tar nitampopokoho tar uuelmahing gane i kot, doh gane i laur.

<sup>3b</sup>“Ahik pah mung uuelmahing tar uanene i kot ue i laur ue tar douk e matoto geting uanasa bakeim tar pores no tamatang kalekinale nami God.”

<sup>4</sup>“Song ku longoro tunuo a tang touiha tun ka bubunis. O tamatang toro mamang matinalik gera la tur i Israel a 144 taosein.

<sup>5</sup>Toro matina tang Juda, a 12 taosein ka uaanais.

Toro matina tang Ruben, a 12 taosein.

Toro matina tang Gad, a 12 taosein.

<sup>6</sup>Toro matina tang Aser, a 12 taosein.

Toro matina tang Naptali, a 12 taosein.

Toro matina tang Manase, a 12 taosein.

<sup>7</sup>Toro matina tang Simion, a 12 taosein.

Toro matina tang Libai, a 12 taosein.

Toro matina tang Isakar, a 12 taosein.

<sup>8</sup>Toro matina tang Sebulun, a 12 taosein.

Toro matina tang Josep, a 12 taosein.

Toro matina tang Benjamin, a 12 taosein.

### O burehentieh tunur tamata ra hiku teil tar hikhiku gaugauil e baraha uatuk i kot

<sup>9</sup>I muduhia tanininanine, inggo ku banga poluk gane i uoum totoug, o burehentiehe tunur tamat ahik me tamata re matotong ah, ra la tur toro mamang pang uanilik, kare toro mamang matinalik, karo mamang tamatalik, kare tar mamang uelhirelik. Gisina uakapa tun ra tur i uoum tono tabtabilar toia, dohi uoum tar Tunar Sipsip. Gisina ra hiku teil uakapa tun tar hikhiku gaugauil a baraha uatuk i kot, kara kale teil tar rang kuen. <sup>10d</sup>Doh gisina ra kulkula ualeikintiehe tun pare, “A niuaudeil e la tur tang God ger nagigeig gere tabila tono tabtabilang toia, doh tar Tunar Sipsip”.

<sup>11</sup>Doho angelou uakapa tun gera tur uiloho toro tabtabilar toia, kare tasir mamahoholik, kare tar toueitir inete gesir tua. Gisina ka siokor baka uahiuais, kara kokolo uahiu, kara uatakai tang God, <sup>12e</sup>kara kula pare,

“O mana tun! A niuatakai, kara nitampopokoh, kara ninamana ger i ranantiehe tun,

<sup>b</sup> 7.3 Isk 9.4,6; UGO 9.4   <sup>c</sup> 7.4 UGO 14.1,3   <sup>d</sup> 7.10 UGO 5.6-7   <sup>e</sup> 7.12 UGO 5.12

kara niueltad, kara niuelpipih,  
kara nitampopokoho uakapa tun e la tur tang God ger nagigeig  
gere uangoul dede tar mamang binakalik, o mana tun!”

<sup>13</sup>Song ke dangatar tang siokor mamahoholik totoguo pare, “Maisir tasisinasine nas hikhiku gaugaul ger barah pare? Ia ra la turusin?”

<sup>14</sup><sup>f</sup>Doh inggo ku hire tapokis pare, “Tamata Uleik, ingga o ate.”

Kare hireono pare, “Gisinasine te geka la tur tar niduh uleikintiehe tun, kara kale tar uelmahing ger uleikintiehe tun. Gisina ka uabusa uadelauana tenas hikhiku, kara uaugaul keip taninina tar deuatinginar Tunar Sipsip. <sup>15</sup>Temaet gisina ra siokor tur i uoum tono tabtabila God ger toia, kara kalekinale tatanono tar marein, doh tar boung tena umang lotuono ger dedeil. Doh inggonene re tabila toro tabtabilar toia e turung uangoul tagu tasisin, kare kaueke tasisin, kare biana uauleik uain tena uma mare matoto tasisina uakap. <sup>16</sup><sup>g</sup>Gisih ahik pah ra matotong gogo uapoul poluk, doh ahik pah ra matotong kamadaka uapoul poluk. A pisar ahik pahe matotong uauelmahing baka poluk tasisin. Ahik baka poluk me butur re kaukauele tar tukunusisin. <sup>17</sup><sup>h</sup>Ge a Tunar Sipsip pe gere tur i uoum tono tabilar toia, inggono tenas tang kauekesin. Inggono e turung uoum keip tasisina tar uatauete tar kodomo ger tua. Doh God e turung uamamahoul, kare tunaha liu tar kirkirininar matasisin.”

### A uamouitinar butur nihaila tane

**8** <sup>1</sup>Tar binaka ke peisono tar uamouitinar butur nihaila tane i Heuen ke maligomo sikoro baka tar sikin. <sup>2</sup>Doh inggo ku banga tar mouitir anggelou ra tur pe i uoum tang God, kara heiris toro mouit ro tuil.

<sup>3</sup><sup>i</sup>A tang giameher anggelou gere kale teil tar nouh ger nituha keip tar goul gera uoto ualuh tolaigir adua ke lame, kare me tur toro oltang uahung. Inggono ka heirin tar bureher aduang uahung menia tenas lotur tamatar nang God toro oltang uahung ger nituha keip tar goul i uoum tono tabtabilar toia. <sup>4</sup>O diku nar adua menia tenas lotur tamatar nang God ke la kai tur tar limanar anggelou ke la i rana tang God. <sup>5</sup>Song ke kaler anggelou tar nouh gera uoto ualuh tolaigir adua, kare ongoko toro hue i lolono ra kale turin tar oltang uahung, kare baka uaduduntiehe tun tang roono tar uanene i kot, kare pila uaireireihinguar pil, kare kankanauar kanau, kare nunur nun.

### A tuil

<sup>6</sup>Doh gisitir mouitir anggelou gera kale teil tar tuil, ka kaleuoro tanika manasa tar u taninin.

<sup>f</sup> 7.14 Dan 12.1; Mat 24.21    <sup>g</sup> 7.16 Ais 49.10    <sup>h</sup> 7.17 Ker 23.2; Ais 25.8; UGO 21.4

<sup>i</sup> 8.3 KT 30.1-3; UGO 5.8    <sup>j</sup> 8.5 KT 19.16-19; NKP 16.12; UGO 11.19; 16.18



<sup>7</sup><sup>k</sup>A uakikilanganar anggelou ke u tono tuil, kare punga uahiuanguar mahar ais popokoho misianar palau, doha hue ke uelhouara tar deuating ka baka uahiuahaig tar uanene i kot. O touono ro mahar tar uanene i kot ke luh uakap, doha touono ro mahar tar douk, kara mamang garasalik uakapa tununiner bukbukir ke siokor luh uakapa tun.

<sup>8</sup>A uatang torikinar anggelou ke u tono tuil, doha inet misiana paha tinanar siusana ke luh, kara bakain i laur. O sioko ro mahara tar laur ke uapalih tar deuating, karo mahar torik kura udeil, <sup>9</sup>a siokono ponompe tasir inete gesir tua gara uangoul i laur ka mata pe, kara siokono ponompe toro parau geka mamantouoig.

<sup>10</sup>A uatang touononar anggelou ke u tono tuil, doha pitopit a uleikintieh, kara luhuntiehe tun ke dud turuha tar langit i lolonongua toro mahar sioko tar kodomo gere ualo turuha toro siusan, kaura udeil ro mahar torik, kare toro kodomo gere uana tauete tur i lolono tar kot. <sup>11</sup><sup>A</sup> pitopiton a hangana tang douk uelbarang. O sioko ro mahar tar kodomonin ke uelbarang, karo mahar torik ahik tagu, karo bureher tamata ka mata to toro kodomo geke uelbarang.

<sup>12</sup><sup>m</sup>A uatoueitinar anggelou ke u tono tuil, o sioko ro mahar tar pisar ka haluhin, kara siokono pono pe tar bialok, kara siokono ponompe tasir pitopit, maeit o sioko ro mahara taninina uakapa tun e kitup, kaura udeil ro mahar torik taninina uakap. Karo sioko ro mahar tar marein ahik me luh, karo sioko ro mahar tar boung, karo mahar torik ura udeil.

<sup>13</sup><sup>n</sup>Gine ru banga peo, inggo ku banga tar pasukadau e lululuh teilanah i rana tar uantinaninar hagarin, e kulkula ualeik teil pare, “U ueldolom! U ueldolom! U ueldolomo tun tamiuoumur tamatang gane i kot, ge a tang touono per anggelou ra turung u ualeikintiehe tun tenas tuil!”

### A uatang tolimanar anggelou ke u tono tuil

**9** <sup>1</sup><sup>o</sup>Tar binaka ke u uakalingir uatang toliminar anggelou tono tuil, karu banganguao tar pitopit e tokane i kot ke punga turuha tar langit. Ingonor pitopit ka heirin tar ki nar butur a i lolonontiehe tun.

<sup>2</sup><sup>p</sup>Binaka ke pukono tar buturuonener tungununtiehe tun, o diku ko totongung kai tur tar buturuon misiana toro diku na ro hue uleik. Roono ro diku ko uakitupungua tar pisar, doh tar langit.

<sup>3</sup>Doha kakaring ka tauete tur pono toro diku roon, kara uounungua tar pang uanene i kot, gisina ka heiris tar nitampopokoho misiana tasir hilang. <sup>4</sup><sup>q</sup>Gisina ka hireis, haik pah ra uauelmahing tar garas ue mo douk tar uanene i kot, bo ra uauelmahing kompe tas mais ge ahik pah

<sup>k</sup> 8.7 KT 9.23-26; Isk 38.22; Jol 2.30 <sup>l</sup> 8.11 Jer 9.15 <sup>m</sup> 8.12 Isk 32.7; UGO 6.12-13

<sup>n</sup> 8.13 UGO 9.12; 11.14 <sup>o</sup> 9.1 UGO 20.1 <sup>p</sup> 9.2-3 Uak 19.28; KT 10.12-15; Jol 2.2,10

<sup>q</sup> 9.4 UGO 7.3

ka uamoko tagu tena bubun God tar pores. <sup>5</sup>Gisin ahik pah ka heiris tar nitampopokoho tar tung poustasisin, bo ra uuelmahing kompe tasisina me tolimar bialok. Doha uelmahingonene ra turung kaleininis a uelpisir tun. <sup>6</sup>Doh tar marein nilaninanine o tamata ra turung sir toro mat, bo ahik puk pah ra matotong ueltupara tang roon, gisina ra malara ra mat. Bo roono puk ro mat o turung uasuasiaua tasisin.

<sup>7</sup>O kakaring misiana tasir hos gera kaleuatoro tanikais tar uiliatung. Gisina ra uamoko teil tar lus tar keuar a nituha keip tar goul, doha lususin misiana ro lunar tamat. <sup>8</sup>A ulusisin a barah, kara sikoi, doha liuoususin misianar liuousur laion. <sup>9</sup>A gisina nas uatar a haen e moko tar tukunus. Doha kalkalinginar pang titiauasisin misiana geta rourumer hos menia tar karis tar lang uelkoi. <sup>10</sup>Gisin o touihis, karo touelhungus misianar hilang, doh tar uihisisin e mokor nitampopokoho tar heir tar uleikir uelmahing tasir tamata tar tolimir bialok. <sup>11</sup>Gisina nas toia e kaueke uakapa tasisin, Inggono ter anggeloung tar tung ger uailolon. A hanganonor toia toro uelhireng Hibru te Abadon, doh toro uelhireng Grik inggono ra kilain tang Apolion.

<sup>12</sup>A uakikilanganar niueldolom ke la uoum, kara torik harahar niueldolom ura la harahame.

#### A uatonomonor anggelou ke u tono tuil

<sup>13</sup>A uatang tonomonor anggelou ke u tono tuil, karu longoronguao tar uau ke tauete tur toro toueit ro seir gere moko toro oltang uahung gero nituha tar goul o tok i uoum tang God. <sup>14</sup>Inggonor uau ke kula tar uatonomonor anggelou geke u tono tuil pare, “Uatauete tar tang toueitir anggelou geka kale uelmahing to tar kodomo uleik, gero moko ro reih i Upretis.” <sup>15</sup>Doh gisinar tang toueitir anggelou ka uataueteis, kara uinatoro tanik uaia tun tang hingiar binak, kara marein, kara bialok, kare hingia ro krismas ka uamaluanais tar tung poustoro sioko ro mahar tasir tamata tar uanene i kot, karo udeil mo mahar torik. <sup>16</sup>O tamatang uiliatung ra tabila tanik tonoso hos ra matoto tar 200ir milion. Inngo ku longoro ka aha peisisin.

<sup>17</sup>O hos, karo tamata gera ualo teil, inggo ku borboriana tasisina ra baka sira pare, nas hikhikung uatarasin a kubarantiehe tun, kara bubulumuntiehe tun, kara iauiabel. A lusur hos misianar lusur laion. Doh tar uauasir hos e tautauete turur hue, kara diku, kara palau gera kilaig a salpa.<sup>v</sup> <sup>18</sup>O manaiar tamata geka umatotoisane i koto ka mata tar touonor inete rasiner uelsuk, o hue, o diku, kara palau gera kilaig a salpa gere tautauete tur tar uauasir hos. <sup>19</sup>A nitampopokoho tasir hos e moko

<sup>r</sup> 9.6 Job 3.21; Jer 8.3   <sup>s</sup> 9.7 Jol 2.4   <sup>t</sup> 9.8 Jol 1.6   <sup>u</sup> 9.9 Jol 2.5   <sup>v</sup> 9.17 “salpa,” a palau a iauiabelentiehe tun o mok tar butur uelsuk

tar uauas, kare tar uihis. Ge a uihis pesin misianar soi e moko teilir lun tero heir tar uelmahing tasir tamat.

<sup>20</sup>W O bureher tamat ge ahik pah ka mata tagu, ahik dedempe pah ke uiuiris tar haua ka tuhaig tar limas. Gisin ahik pah ka uanua tar lotu tasir liouana uasa, doh tasir god bohoboh ger nituha keip tar goul, a silva, a bron a palau, kare gesir nipuruh tar douk, ge gisina per godosin ahik pah ra matotong bang ue ra longor ue ra la. <sup>21</sup>Doh gisinar tamat ahik pono pah ke uiuiris toroso tang uelpus, kara bilih, kare toro uraur, kare toroso ueuenau.

### A angelou, doh no bolobolo God gero sasalik

**10** <sup>1</sup>Song ku banga polukuo tar tang giameher angelou ger tampopokohontiehe tun e hiua turuha i Heuen. Inggono e loho teil toro mahar langit, karo bato i ranahia toro lunon, o lunono misianar pisar, kara toking kekenon misiana toro tur geko ngangaua toro hue.

<sup>2</sup>Inggonor angelou e kale teil tono bolobolo God gero sasalik o nial o pon i rana tar limanon. Inggono ke uatur tar kekena ger pang mua i laur, kara pang kais i mok, <sup>3</sup>kare kula ualeikintiehe tun misiana gete kaling ualeikir laion. Tar binaka ke kula ualeikon a uauasir mouitir pil ka men.

<sup>4</sup>Doh gitie ka mene per mouitir pil, inggo ku marang bolo uahiuu manas. Bo ku longoro puk tar uau e mene turuha i Heuen e kula pare, “Ateng paheim puk mnasampe tar haua ka meneigir mouitir pil, doh ahik paho bolo uahiu!”

<sup>5</sup>Doha angelou geku bangaio gere tur i laur, kari mok, ke hue kaiatig tar limana ger pang mua i Heuen. <sup>6</sup>Inggono ke la ualapagaha tang ger tua dede tar mamang binakalik geke tou i Heuen, kara haua gere mok i Heuen, dohi kot, kara haua gere mok tar uanene i kot, kari laur, kara haua gere mok i laur. Inggono ke kula pare, “Ahik baka poluk me uapekout! <sup>7</sup>Bo tar marenilaninanine tar binaka re u uakalingir uamouitinar angelou tono tuil na inete God ger ououo e kalahara uakap misiana ke hire peono tosno tamatang kalekinale gesir propet.”

<sup>8</sup>Song ke mene uagiamehe tur polukuhar uau i Heuen totoguo geku longoro baka uoumio pare, “La karo kale toro bolobol gero nial o pono tar limanar angelou gere tur i laur, kari mok.”

<sup>9</sup>Temaait ku la uelhiro tar angelou, karu dangata tatanono tar heir totoguo tono bolobolo God gero kit. Doh inggono ke kulangua totoguo pare, “Kale tang roon, karo ein. Roon o turung uauelteke toro baloumua, bo a uauoumua puk e turung lingiain ge roono pe misiana toro to.”<sup>b</sup>

<sup>w</sup> 9.20 Ker 115.4-7; 135.15-18; Dan 5.23; UGO 16.9,11    <sup>x</sup> 10.4 Dan 12.4,9

<sup>y</sup> 10.5 Ual 32.40; Dan 12.7    <sup>z</sup> 10.7 Amo 3.7    <sup>a</sup> 10.9 Isk 2.8-3.3    <sup>b</sup> 10.9 “hani,” a teisir lang, a lingiantiehe tun

<sup>10</sup>Inggo ku kale tur tono bolobolo God gero kit tar limanar anggelou, karu ein tang roon. Inggo ke lingiantiehe tunumpeinir uauoug tang roon, bo tar binaka puk ku konomo manasa peo tang roon, o balouguo ko ueltekein. <sup>11</sup>Song ka hireio pare, “Ingga o hire taute uapoul poluk tar haua re turung pokos i uoum, hire mo bureher tamat, kare toro mamang pang uanilik, kare toro mamang uelhirelik, kare tasir toia uakapa tun.”

### A tang torik ura tur keip

**11** <sup>1</sup>Inggo ka heirio toro uoh ra uoto paramain tar inete ue a butur, kara hireio pare, “Tentur karo la parama tena umang lotu God ger dedeil, karo oltang uahung, karo aha tasir tamatang lotu ge kaeis. <sup>2</sup>Bo i morenehia, ingga o hiliu, ahik paho parama tagu, teeit a buturuono ka heirin tasir gime uan. Gisina ra turung uiloh, kara bilinggala ueltebeir tar uan uleik ger dedeil tar toueitir hangaul, kara torikir bialok. <sup>3</sup>Doh inggo u turung heir tar nitampopokoho tenag tang torikir tang tur keip rasin ura hire taute tono uehire God tar siokor taosein, kara 260ir marein tar haua re turung pokosolaeit i uoum, rasin ura loho teil tar gomonong ueldolom.”

<sup>4</sup>Rasina tero torik ro oliv, karo torik ro toktokono ro lam e tur i uoum tar Tamata Nomanang tar uanene i kot. <sup>5</sup>Ge me tang sioko re uedanga tar uaelmahing tasrasin o hue o la tur tar uauas rasin, karo mamantouo tosnosira uelmatana rasin. Ter siokono kompe hape re turung mata pe me tamata gere marang uaelmahing tasrasin. <sup>6</sup>Rasin ura kale teil tar nitampopokoho tar uapisar, maeit ahikono pahe matotong huana tar binak ura hirhire uoum teil rasin. Rasina ura kale teil pono tar nitampopokoho tar uapalih tar laur mare deuating. Doh tar mamantouo tar pang uanene i koto tang hingiamper ro mata uasa, ura malarain.

<sup>7</sup>Tar binak ura uakapa rasina tenasira ueluelhire a inete ger roke gere turung taute turuha tar butur ger uailolontiehe tun, e me turung uelkoi keip tasrasin, kare turung pehuar, kare tung pou tasrasin. <sup>8</sup>Doha tukunus rasin e turung rikin tar lele tar uan ger uleikintiehe tun geke uakuseinir Tamata Nomana tar korose gera uamuamisiana tolain i Sodom ue i Isip. <sup>9</sup>Tar touonor marein, kara puh o mamang tamatalik, karo mamang matinalik, karo mamang uelhirelik, karo mamang pang uanilik uakapa tun ra turung bangang duk, kompe tar tukunus rasin, kara de mata keu uatoro tar tukunus rasin. <sup>10</sup>O tamata uakapa tunane i kot ra turung uaha tar tang torik rasin, kura mata pe. Gisina ra turung ualauah, kara ueluelbulie katongois tenas inet. Teeit rasinar toking propet kura heir tun tar uelmahing tasir tamatang gane i kot.

<sup>c</sup> 11.1 Isk 40.3; Sek 2.1-2 <sup>d</sup> 11.2 Luk 21.24; UGO 13.5 <sup>e</sup> 11.4 Sek 4.3,11-14 <sup>f</sup> 11.5 2Sa 22.9; Ker 97.3 <sup>g</sup> 11.6 KT 7.17-20; 1Sa 4.8; 1To 17.1 <sup>h</sup> 11.7 Dan 7.21; UGO 12.17; 13.7; 17.8 <sup>i</sup> 11.8 Luk 13.34

<sup>11j</sup>Bo i muduhia puk ke karuh baka per touon, kara puhur marein a romong nitua ke me hiku tasrasin, e la tur tang God, rasina kura tur kai, doh mais ka banga tasrasina ka sokoro uasa tun. <sup>12k</sup>Song ka longorosina tar uau e kula ualeikintiehe turuha i Heuen tasrasina pare, “La kaiahane!” Rasina kura la kai keip toro mahar langit i Heuen, binaka ra banga nosira uelmatan.

<sup>13l</sup>Ahik me manasan tar binakon ke nunur nun a uleikintieh tun, ke mamantoungua toro sioko ro mahar, karo mahar lusio teko udeil tar uan uleikon. A mouitir toaseinir tamata ka mata tar nun. O gisiamehe geka tua ka sokorontiehe tun, kara uatakai tar God gere uangoul i Heuen.

<sup>14m</sup>A uatorikinar niueldolomo ke la uoum, a uatouononor niueldolom e uahutung pokos.

### O uamoutina ro tuil

<sup>15n</sup>A uamoutinar anggelou ke u tono tuil, doha uau e kula ualeikintiehe turuha i Heuen pare, “A nitoiang gane i koto uakapa tun e moko manasa tar nikauekeng tenagi Tamata Nomaneg, kare tena nikaueke na Kriston, kare turung kaueke dedengua tar mamang binakalik.”

<sup>16</sup>Doh gisisir torikir hangaul, kara tang toueitir mamahoholik gera tabila tenas tabtabila uleik i uoum tang God ka siokor hatup uahiu, kara lotu tang God. <sup>17</sup>Gisina ka lotu pare,

“Inggeim mi heir tun tar niuaha totomuar Tamata Noman,  
a God ger tampopokoho tun gero uangoulung sioun, karo  
uangoulene daan.

Teeit ingga ko kale keip tereng uleikir nitampopokoh,  
karo uakekene manasa tar kauekane i kot.

<sup>18o</sup>O mamang pang uanilik ka nimalian.

Bo reng nimaliana pukua gere la dede gine pono re lame. Doha  
binakang kedanga tasir mat ke pokoso manas,  
kare tar bulaua tapokis tosnongo tamatang kalekinale o propet,  
kare nongo tamat, kare mais ka ueltada tar hangoumua,  
hingiamper tamata ger tohangan ue ahik.

Doh tar mamantouo tas mais gesir mamantouane i kot.”

<sup>19p</sup>Na umang lotu God ger dedeil i Heuen ke takapuk, doha bokisinginar uelhote ka keip uasoloin ium, kare kanauar kanau, kare

<sup>j</sup> 11.11 Isk 37.5,10   <sup>k</sup> 11.12 2To 2.11   <sup>l</sup> 11.13 UGO 6.12; 16.18   <sup>m</sup> 11.14 UGO 9.12  
<sup>n</sup> 11.15 KT 15.18; Ker 10.16; Dan 2.44; 7.14   <sup>o</sup> 11.18 Ker 110.5; 115.13; Roum 2.5;  
UGO 20.11-13   <sup>p</sup> 11.19 Hib 9.4; UGO 8.5; 15.5; 16.21

pilar pil, kare nunur nun, kare duduhar mahar ais ger popokoho sira tar palau.

### A kuah mer soi uleik<sup>q</sup>

**12** <sup>1</sup>A uleik tunur uaparok ke pokos i Heuen, a kuah e loho teil tar pisar, kara bialok i kukulebanga tar kekenon, karo keuar o toko toro lunon e moko teilir hangaul, kara torikir pitopit. <sup>2</sup>Inggon a balakos, kare homala uasa tun tar uelmahing re hagouo manasa pe.

<sup>3</sup>Song ke pokoso polukur giameher uaparok i Heuen. Inggono ter soi a kubkubar a uleikintiehe tun o mouit ro lun, karo hangaul no seir, karo mouit no keuara tar lunon. <sup>4</sup>Inggonor soi ke kirkiras bise liu keip toro uihina toro mahar sioko ro mahara tasir pitopit i rana tar langit, karo moko ro mahar torik, kare baka uahiuaha i kot. Tar binaka re hagouong pohor kuah, a soi e tur tanik manas i uoum tatanon, maeit re turung ein tar keketik gete pohor kuah.

<sup>5</sup>Inggonor kuah ke poho tar keketik bulout, a keketikono tere turung kaueke keip tar puhung bele toro mamang pang uanilik uakapa tunane i kot. Bo gitir tunono ka karus liuin, kara keip kai i Heuen tonu tabtabilar toia gero nang God. <sup>6</sup>Doh inggonor kuaha ke ualonguala tar butur padenen ter uan ke kaleuatoroin God tatanono mara kaueke toin e matoto tar siokor taosein kara 260ir marein.

<sup>7</sup>Song re pokosor uiliatung uleik i Heuen. Maikoul mesno angelou ka uelkoi keip tar soi menia tosno angelou, doha soi mesno angelou ka pehahau, <sup>8</sup>bo ahik puk pah ka matoto ka touahiuais, kara geil liuinguais i Heuen. <sup>9</sup><sup>w</sup>Inggonor soi ka baka tauetein. Inggono ter soi ger mahohong sioun ra kilain tar tang sa ue Satan geke uoum keip tar uanene i koto uakapa tun tar niguata uasa. Inggono ka baka uahiuahainane i koto menia tosno angelou.

<sup>10</sup><sup>x</sup>Song ku longoro tar uau e kula ualeik turuha i Heuen pare,

“Gine daan ke pokoso uakalahara manasar uelkarus, kara nitampopokoh, kara Nitoia ger nang God menia tar nikaueke ger nang Kriston ger nanon! Ge a tang tohotola pe toso bung uanotougigeig ka baka uahiuahain i kot. Inggon ke tohotola tasisina tar mamang inetelik i uoum tang God tar marein mer boung. <sup>11</sup>O uanotougigeig ka pehuara tang Satan, teeit tar deuatinginar Tunar Sipsip, kare tar uelhire ger mana geka mene taueteig, kara heir katongo tar tukunus toro mat. <sup>12</sup><sup>y</sup>Temaeit i Heuen e uah, kare mais gera uangoul i Heuen.

<sup>q</sup> 12.0 “dregon,” soi uleikintiehe tun a uelhire uarang tang Satan   <sup>r</sup> 12.2 Mai 4.10

<sup>s</sup> 12.3 Dan 7.7   <sup>t</sup> 12.4 Dan 8.10   <sup>u</sup> 12.5 Ker 2.9; Ais 7.14; 66.7; UGO 19.15   <sup>v</sup> 12.7 Jud 9

<sup>w</sup> 12.9 Uak 3.1,14; Luk 10.18; 22.31; UGO 20.2   <sup>x</sup> 12.10 Job 1.9-11; Sek 3.1

<sup>y</sup> 12.12 Ais 44.23; 49.13

Bo a nisokoro ger uleikintiehe tun e la tar uanene i kot, dohi laur, ge Satan pe ke la uahiuaha i kot! Inggono Satan ke uoun tar nimalian, teeit inggon e ate a puhin tun na binak.”

<sup>13</sup>Tar binaka ke ate manasar soi pare, ka baka uahiuahain i kot, inggono ke sir uakeluk tar kuaha geke poho tar keketik bulout. <sup>14</sup>Bo inggonor pukur kuaha ka heirin tar toking titiauan misianar manulab a uleikintiehe tun, maeit re luluh liuono gete me tuparar soi, e la tar uan geka kaleuatoroin tatanono tar butur padenen mara kaueke to bakaiono mo touon, kara puh ro krismas.

<sup>15</sup>Temaeit gitir soi ke lua tauete tar laur, o moko ro reih e ualo i uoumunghia tar kuah mare reih liuin toro reih. <sup>16</sup>Bo a koto puk ke poul tar kuah, ke pangang, kare konomo uakapa tar laur geke lua taueteigir soi. <sup>17</sup>A soi ke nimaliana uasa tun tar kuah, kare hiliu, kare la uelkoi keip tosno tamata God uakapa tun geka ueltada tena ualatut God, kara uakeluk tena ueluelhire Iesu. <sup>18</sup>Inggonor soi e tur i tektekener laur.

#### A inete e la tur i laur

**13** <sup>1</sup>Song ku banga polukuo tar inet a roke e puraka tur i laur. Inggono o mouit ro lun ka bololaigir puhung uelhire uasa tang God. Inggono, no hangaul ro seir e toko teilir keuar taninin. <sup>2</sup>A inetonener roke misianar pusi uleik a tokotok, a kekenon misianar be,<sup>d</sup> a uauanon misianar laion. Doha soi ke heir tena nitampopokoho tar inetonener roke, kare no tabtabilar toia, kare na popokoho tunur nikauek. <sup>3</sup>O sioko ro lunar inetonener roke o loto uasantiehe tun o marang mat, bo a loto pukono ke uia. O tamata uakapa tun ka siokor lutara tar puhonene, kara keketengua tatanon. <sup>4</sup>O tamata uakapa tun ka lotungua tar soi, teeit ke heir peono tar nikaueke tar inetonener roke, gisina ka lotu pono tar inetonener roke, kara dangata pare, “Mai misianar inetonener roke? Mai re matotong uelkoi keip tatanon?”

<sup>5</sup>A inetonener roke ka uahuein tar meneng uakaia katongoin, kare menmene uasa tar hangana God, kare guata tar haua re malarain, e matoto tar toueitir hangaul, kara torikir bialok. <sup>6</sup>Inggono ka uahuein tar uelsigalantiehe tun tang God, kare mamantouo tar hanganon, kare na umon, kare tas mais ra uangoul i Heuen. <sup>7</sup>Inggono ka heir ponoin tar nitampopokoho tar uelkoi keip tasir tamatar nang God, kare touahiuu tasisin, kara uamoko ponoin e kaueke uakapa tar mamang matinalik, karo mamang tamatalik, kara mamang uelhirelik, karo pang uan uakapa tunane i kot. <sup>8</sup>O tamata uakapa tun ra lotu tatanon ge taboisir hangas

<sup>z</sup> 12.14 Dan 7.25; 12.7    <sup>a</sup> 12.17 UGO 11.7    <sup>b</sup> 13.1 UGO 12.3; 17.3,7-12    <sup>c</sup> 13.2 Dan 7.4-6

<sup>d</sup> 13.2 “be,” a inete a roke ngohina lo uleikintiehe tun    <sup>e</sup> 13.3 UGO 17.8

<sup>f</sup> 13.5 Dan 7.8,25; 11.36; UGO 11.2    <sup>g</sup> 13.7 UGO 11.7    <sup>h</sup> 13.8 Ker 69.28; UGO 17.8; 20.12,15; 21.27

toro bolobolo gero tua gero nanar Tunar Sipsip geka tung pousin tar binaka ke uakekener uanene i kot.

<sup>9</sup>Mai ger to talingan, longor! <sup>10</sup><sup>i</sup>Mai gere uangoul i kukulebanga tar uabang manatenar uenaua tamata tar binakang uelkoi, inggon ra uenauain. Doh mai gere uangoul i kukulebanga tar uabang manatenar tung pous keip toro baenat, inggono ra tung pous keipin toro baenat. Temaeit, no tamata God ra tur uanono tun, ra tagorong mana dede kompela.

### A propet bohoboh a nanar inete ger roke

<sup>11</sup>Song ku banga polukuo tar giamehe polukur inete roke e tauete turuha tar kot. Inggono no torik ro seir misiana tar sipsip, bo inggono puk e mene sira tar soi uleik. <sup>12</sup>Inggono ke tur tagu tar uakikilanganar inete ger roke, kare kale tena nitampopoko uleikon mare reih tutup tar uanene i kot menia tasir tamata uakapa tar lotu tar uakikilanganar inete ger roke geka uauian na loto ger uleik. <sup>13</sup><sup>j</sup>Inggonener uatorikinar inetener roke ke me touo tar uleikintiehe tunur inet, inggono ke guata toro hue ko hiua turuha i ran ko lahaane i kot, o tamata uakapa tun ka siokor bang. <sup>14</sup>Temaeit ka heiringuaionor uatang torikinar ineter roke tar nitampopokoho tar guata ueleheir tena nimalarak uakikilanganar inete ger roke mare boho tasir tamata uakapa tun tar uanene i kot, kare kula ra puruhusina mo no kaesaono tar ueltada tatanono ka tokout pein kare tua dedempe. <sup>15</sup>Doh inggonener uatang torikinar ineter roke ka heirin tar nitampopokoh tar heir me romong tua toro kaesa gero nituha sira tar uakikilanganar ineter roke maro men, karo guata tas mais gera de mata lotu tang roono ra mat.

<sup>16</sup><sup>k</sup>Inggono ke petutup tasir tamata uakapa tun, maisir to hangas ue ahik, kare mais nas bureher inete ue o tiome, kare mais ra uangoul tar karabus ue ahik, hapempe re baka per tamata ra bubunigir pang limas ger pang mua ue tar pores. <sup>17</sup>Maeit ahik me tang sioko re matotong bulau ue e uabulau me inet, e kale tun baka tar bubun, geter hangana per inetono ger roke ue ra ahainir hangan. <sup>18</sup>Inggonene ter ninaman, kara niate uaia. Mai ger naman manatentiehe tun inggono tere matotong ueltupara hape ra aha peinir hanganar inetonener roke, ge inggono pe a hanganar bulout. Inggono ra ahain pare, 666.

### A Tunar Sipsip menia tar 144 taoseinir tamat

**14** <sup>1</sup>Song ku banga polukuo gane i uoum totoguo, a Tunar Sipsip e tur tar sisan i Saion, menia tar 144 taoseinir tamat. A hanganon,

<sup>i</sup> 13.10 Jer 15.2; 43.11; UGO 14.12    <sup>j</sup> 13.13-14 1To 18.24-39; Mat 24.24; UGO 19.20

<sup>k</sup> 13.16-17 UGO 14.9-11; 16.2; 20.4



doha hangana God, ka bololais tar poresisin. <sup>2</sup>Doh inggo ku longoro tar kaling e la turuha i Heuen, misiana toro puhung butuan, kare misiana gete pilantieher pil. Gitir kaling ku longoro misiana geta sarar tang sar tenas gita.

<sup>3</sup>Doh gisinar 144 taosein ra kere to toro timuh ro kereker i uoum tono tabtabilar toia, kare tar toueitir inete gesir tua, kare tasir mahmahoholik. Ahik me tang sioko re ate toro kerekere roon tesir 144 taosein puk manasa geka bulaua tapokis turis tar uanene i kot. <sup>4</sup>Gisina te geka kauেকে uaiia katongo tunis kara dedeil uaiia tun, ahik pah ka uanguangoul keip tagu mo kuah. Gisina ka uakeluk kompe tar Tunar Sipsip tar butur re lihihia. Doh gisina te geka bulaua tapokis turis tasir tamata uakapane i kot, kare tesir uakikilanganar uahung ke la tang God, kare tar Tunar Sipsip. <sup>5</sup>Ahik mo boho ko tauete tur tagu tar uauasisin, doh ahik pono moso uelhire tagu.

#### A tang touonor angelou

<sup>6</sup>Song ku banga polukuo tena angelou God, e luluhula i rana teil tun tar hagaran, ka ualatuēin tar me hire tauete toro Uelhire Uaia gero moko dede tar mamang binakalik tasir tamatang gane i kot. Toro mamang pang uanilik, kara mamang matinalik, kara mamang uelhirelik, karo mamang tamatalik uakapa tun. <sup>7</sup>Ingonor angelou ke kula ualeikintiehe tun pare, “Sokoro tang God, uataakai tatanon, ge na binaka peono tar kedang ke pokoso manas. Lotu tatanon geke tuh i ran, dohi kot, kare tar laur, karo kodomo gere tauete tur tar kot.”

<sup>8</sup>A uatang giamehenar angelou e luluh uakeluk teil tar uakikilangan, ke kula ualeik pare, “O binop, o binop tar uan uleik i Babilon ger popokoho tun ke uainum tasir tamata toro mamang pang uanilik tar binong tar niguata ger sa, kare tono uraur.”

<sup>9</sup>A uatang touononar angelou e uakeluk teil tar tang torikir angelou. Ingonono ke kula ualeikintiehe tun pare, “Ge me tang sioko re lotu tar inete ger roke, kare tono kaesaon, kare bubun tena bubunono tar poren ue tar liman, <sup>10</sup>pinggon e turung inum pono tena binong nimaliana God geka ding keipilaig tena nitampopokoh i lolono tena kapang nimaliana God. Doh inggon e turung kale uelmahingintiehe tun toro hue palakurum i uoum tasir angelou gesir dedeil, kare tar Tunar Sipsip. <sup>11</sup>Doho dikung teres uelmahingisin o totongung kai dede kompe tar mamang binakalik, ahik me marein ue me boung ra pepe uahain tas mais gera lotu tar inete ger roke, kare tono kaesaon ue mais ka bubunis tar

<sup>1</sup> 14.2 UGO 1.15; 19.6    <sup>m</sup> 14.3 Ais 42.10; UGO 5.9; 7.4    <sup>n</sup> 14.8 Ais 21.9; Jer 51.7-8; UGO 17.2; 18.2-3    <sup>o</sup> 14.9 UGO 13.12-17    <sup>p</sup> 14.10 Uak 19.24; Ker 75.8; Ais 51.17,22; Jer 25.15-16; Isk 38.22; UGO 16.19; 20.10    <sup>q</sup> 14.11 Ais 34.10

hanganon.”<sup>12</sup> Temaeit inggoumur tamatar nang God mung uangoungoul sikoro, karung kale uanono kompe tena ualatut God, karung tagorong mana kompe tang Iesu.

<sup>13</sup> Song ku longoro polukuo tar uau e mene turuha i Heuen totoguo pare, “Bolo pare, A niuah tasir mat geka mata keip tar nitagorong mana tar Tamata Noman ginela daan.” Kare kular anggelou pare, “Te paara noman, gisina ra pepe uah, ka kalekinalentiehe pe, teeit res niguata uaiasin e la keip tasisin.”

#### A ueuere tar uanene i kot

<sup>14</sup> Song ku banga polukuo toro mahar langit gaugaul gane i uoum totoguo e tabila teilir tang siok, e baka sira tar Tunar Tamat. O toko teil ro keuara toro lun o nituha keip tar goul, kare kale teil toro ioubung ueuer o manantiehe tun.

<sup>15</sup> Doha tang giameher anggelou ke tauete tur tena umang lotu God ger dedeil, kare kula ualeikintiehe tun tatanonene re tabila teil toro mahar langit pare, “Kale tonongo ioubung ueuer, karo tokout, ge a binakang tokout manasa peono ke matoto manasaigir ineteng gane i koto tar ueuer.”<sup>16</sup> Temaeit git re tabila teil toro mahar langit ke aba tono ioubung ueuer gane tar uanene i kot, kare ueuere uakapa manas.

<sup>17</sup> A tang giamehe anggelou ke tauete tur poluk tena umang lotu God ger dedeil e kale teil pono tono ioubung ueuer o manantiehe tun pon.

<sup>18</sup> Song ke hiua turur tang giameher anggelou toro olta, inggon e kaueke toro hue nar uahung, ke kula ualeikintiehe tun tar anggelou gere kale teil tono ioubung ueuer pare, “Kale tonongo ioub, karo tokout toto uakapa tar bungbung bino uakapa tun gane tar iomo binoene i kot, ge ginina pe ke muraka manas.”

<sup>19</sup> Maeit gitir anggelou ke aba uasiokon sioun tono ioubung ueuer, kare tokout toto uakapangua tar bungbung bino uakapa tun tar iomo binoene i kot. Kare baka uasolonguako taninina tar pousung bino ger uleikintiehe tun ger nang God. Inggonor pousung bino tena nimaliana God.<sup>20</sup> “Ginina ka pous toig tar pousung bino e tok i be tar uan uleik, kare tatading tauete turungar deuating tar pousung bino, kare silunguar uan. A butur ke silu e matoto tar 320ir kilomita re tahanga pe, kara siokor param re tunguna pe.

#### A mouitir anggelou ra lang mamantou tar uanene i kot toro mouit ro mata uleik

**15** <sup>1</sup> Inngo ku banga i Heuen, doha uaparokene ku bangaio, ke me uatentur tun toro balouguo. A mouitir anggelou ra lang

<sup>r</sup> 14.12 UGO 13.10   <sup>s</sup> 14.14 Dan 7.13   <sup>t</sup> 14.18 Jol 3.13   <sup>u</sup> 14.20 Ais 63.3; UGO 19.15

guata toro mouit ro mata uleik. Ingonene ter uadouhinar niduh, ge na nimaliana pe God e la keip teil taninin. <sup>2</sup>Song ku banga polukuo tar inet misiana tar laur ger mamadelaua uaia tun ke uelhouara keip toro luhluhuna ro hue, doh gisis ra tur i tektekener laurunin te geka touahia tar inete ger roke, gera uoto ahainir hangan, kare tono kaesaon. God ke heir tenas gitasinatine, <sup>3</sup>kara kerenguasina toro kereker ke kerein Moses ge na tamatang kalekinale God, kare toro kerekere ke kereinir Tunar Sipsip.

“God ger Tamata Noman a ranantiehe tun,  
ger tampopokohontiehe tun.

A inete ko guatagia ke me uatentur tun toro balougou.

A kodkodoh, kara mana tun nang niguat.

Ingga nas uleikir toia uakapa tun tar uanene i kot.

<sup>4</sup>“O tamata a uakapa tun ra turung sokoro totomuar Tamata Noman,  
kara heir tar uatakai tar hangoumua  
Ge ingga pe me pahemir dedeil.

O tamata uakapa tunane i kot ra turung lame,  
kara lotu to i uoum totomua,

ge nang niguata pea ger kodkodoho tun, ka uakalahara uakapaig.”

<sup>5</sup>“I muduhia tar ineteninanine, inggo ku banga tar uamang lotu ger dedeil i Heuen a takapuk, doha tina uma ger dedeilintiehe tun ka pukain.  
<sup>6</sup>Doha mouitir angelou gera lang guata toro mata uleik ka tauet. Gisina ra loho teil tar delauana, kara abeaba uaia tunur gomon, kara kukuete ka auhi uilohoig tar uaruarousisin a nituha tar goul.  
<sup>7</sup>Song ke heirir siokor inete gesir tua tasisina tar mouitir nouh ka tuhaig tar goul, ke uoun tena nimaliana God gere uangoul dede tar mamang binakalik. <sup>8</sup>“Doh tena umang lotu ger dedeil ke uoun tun toro diku nar barangan, kare na nitampopokoh God. Ahik me tamata re matotong lek ium e tuka tar binaka geta uakuakapa hihir tunur mouitir angelou toro mouit ro mata uleik.

#### A mouitir nouh a uoun tena nimaliana God

**16** <sup>1</sup>Song ku longoro tar uau e kula ualeikintiehe tur tun iuma tar umang lotu ger dedeil tasir angelou pare, “La karung ding tauete tena nimaliana God tur tar mouitir nouh.”

<sup>2</sup>“A uakikilanganar angelou ke la, kare ding uoum ter nan i rana tar uanene i kot, kare pokosonguar pang kubar, kara uelmahing uleikintiehe

† 15.3 KT 15.1; Ker 139.14; 145.17 † 15.4 Ker 86.9; Jer 10.6-7 † 15.5 KT 38.21

‡ 15.8 1To 8.10-11; 2OUTT 5.13-14; Ais 6.4 ‡ 16.2 KT 9.10; UGO 13.12-17

tun tas mais geka bubunis tena bubunur inete ger roke, kara lotu tono kaesaon.

<sup>3</sup>A uatorikinar anggelou ke ding ter nan i laur, kare uapalih siranguar laur tar deuatinginar tamata ger mat. O mamang inetelik gesir tua gera uangoul i laur ka mata uakapangua.

<sup>4</sup>A uatang touononar anggelou ke ding ter nan i rana toro kodom gero noro tur i lolono tar kot, kare toro kodom gero ualo turuha tar sisan. Ginin ke uapalihingua tar deuating. <sup>5</sup>Song ku longoro tar anggelou gere kaueke tar kodom ke kula pare, “Ingga ter tang siokor dedeil tun. A kodkodoho tunur uabang manatenine ko heirig. Ingga gero uangoulung sioun, doh gine daan.” <sup>6</sup>“Ge o tamata pesinasinasine ka uatading toro deuating tasir tamata gesir dedeil menia tasir propet. Doh ingga ko uainum tapokis tasisina toro deuating, Ter bulauasisina manas.” <sup>7</sup><sup>b</sup>Karu longoronguao tar uau ke mene tur toro oltang uahung pare, “O mana tun, God ger Tamata Noman a i ranantiehe tun. A uabang manate ko heirigia a mana, kara kodkodoho tun.”

<sup>8</sup>A uatang toueitinar anggelou ke ding ter nan i rana tar pisar, kare uelsukuntiehenguar pisar, kare uatougoug tar tukunusir tamat. <sup>9</sup><sup>c</sup>Doh gisina ke tougurur tukunus, kara menmene uasangua tar hangana God geke heiriha tar matanin tasisin, doh ahik mata uiuir tenas niguata ger sa, kara de mata uatakai puk tar hangana God.

<sup>10</sup><sup>d</sup>A uatang toliminar anggelou ke ding ter nan i rana tono tabtabilar toia ger roke, kare kitup uakapanguar pang uanene re kauekeion. Doho tamata ke uelmahing uasantiehenguais, kara eiteit tar mias. <sup>11</sup>Gisina ka ueluelhire uasangua tar God ger peng Heuen, teeit ka kale uelmahingintiehe pe, kara uelote uleik pon, gisina ra de mata uapalih tenas niguataniner sa.

<sup>12</sup><sup>e</sup>A uatang tonomonor anggelou ke ding ter nan tar kodom i Upretis gero moko ro reih, kare papadakanguar kodom. Maeit ra kaleuatoro tanikain tasir toia menia tosnoso tamatang uiliatung gera la turuha tar butur re hara turur pisar. <sup>13</sup>Song ku bango tar tang touonor liouana uasa ra banga sirais tasir rokrok, gisina ka tauete tur tar uauanar soi uleik, kare tar uauanar inete ger roke, kare tar uauanar propet bohoboh. <sup>14</sup><sup>f</sup>Gisinar liuana uasa ra touo to tar inete tar matasir manai, kara la uelhir tasir toia uakapa tun, kara ruh kout tasisina tar me uiliatung tar marein uleik ger nang God ger i ranantiehe tun.

<sup>15</sup><sup>g</sup>“Ualongor! Inggo ahik pahi reh getu lame! A niuah e la tang mai re kaleuatoro tinikin, kare loho teil tono gomom, maeit ahik

<sup>a</sup> 16.3-4 KT 7.17-21 <sup>b</sup> 16.7 Ker 19.9; UGO 15.3 <sup>c</sup> 16.9 UGO 9.20-21 <sup>d</sup> 16.10 KT 10.22; Ais 8.21-22 <sup>e</sup> 16.12 Ais 11.15 <sup>f</sup> 16.14 UGO 19.19 <sup>g</sup> 16.15 Mat 24.43-44; UGO 3.3

pahe latlateil palapal, kare matal ahik pe me inete re uatarain tasir manai.”

<sup>16</sup><sup>h</sup>Song ka kila uiliodoutisisin tar uaning Hibru, ra kilain i Armagedon.

<sup>17</sup>Song ke ding taueter uamouitinar anggelou ter nan i rana tar hagaran. Doh tena umang lotu God ger dedeil a uau e kula ualeik tur toro tabtabilar toia pare, “Ter uadouhin!” <sup>18</sup><sup>i</sup>Kare kanauanguar kanau, kare pilar pil, kare nunur nun a uleikintiehe tun ahik me nun misiana tatanono ke pokoso baka uoumane tar uanene i kot. <sup>19</sup><sup>j</sup>A uan uleik i Babilon ger i ranantiehe tun ke tapolaka pang touon, karo uan uleik toro mamang uanilik ka mamantouoig. God ahik pahe malabobour tar uan uleik i Babilon. Inggono ke heir tatanono tar kap bino a uoun tun gere moko teil na nimalianon. <sup>20</sup><sup>k</sup>O Toro uakapa tun ke siokor rouo tar nunon, kara mamang siusanalik ke siokor rouo uakap. <sup>21</sup><sup>l</sup>Doha mahar ais a popokoho sira tar palau a tolimar hangaulur kilagram ro duh pe ro mahara siok, ke dud turuha tar langit i ranangua tasir tamat. Gisinar tamata ka ueluelhire uasangua tang God, teeit tar mahar aisinin a uelmahingintiehe tun.

#### A kuah, kara inete ger roke

**17** <sup>1</sup><sup>m</sup>A tang sioko tasir mouitir anggelou gere kale teil tar uamouitinar nouh ke lame totoguo, kare kula pare, “Lame maru ualasira totomua tar uabang manate gera turung heirin tar tang tinana uraur gere tabila toro burehe ro kodom. <sup>2</sup><sup>n</sup>O toia uakapa tun tar uanene i kot ka uanguangoul uasa keip tatanon, kare uainum uapopouluanono tasir tamata uakapa tunane i kot tar binong tono uraur.”

<sup>3</sup><sup>o</sup>Song ke kilar anggelou tar iabeiguo kira la tar butur padenen. Doh tar buturuon inggo ku banga tar kuah e tabila teil i rana tar inet a roke a kubara uakap, ke uoun uilohor tukununa tar puhpuhung uelsigala tang God. Inggonor ineton o mouit ro lun, kare no hangaul ro seir. <sup>4</sup><sup>p</sup>Gitir kuah e loho teil toro tabeliah, karo kubkubara ro gomon, kare uounur tukununa tar mamang inetelikininer abeaba umatmata hamas tun. Inggon e kale teil tar kap ka tuhain tar goul a uoun tar ineteniner sa, kare tono urauron. <sup>5</sup><sup>q</sup>A puhung uelhire geka bololain tar porenon a ououu. “I Babilon ger i ranantiehe tun te tinana ro uraur, kare tinanar mamang niguata uasalikininer sa tar uanene i kot.”

<sup>6</sup><sup>r</sup>Inggono ku banga tar kuahonene ke inum, kare popouluana tar deuatingis no tamata God gesir dedeil, kara deuatingisir tamat geka

<sup>h</sup> 16.16 Sek 12.11 <sup>i</sup> 16.18 UGO 4.5; 8.5 <sup>j</sup> 16.19 UGO 14.10 <sup>k</sup> 16.20 UGO 6.14

<sup>l</sup> 16.21 KT 9.23-24; UGO 11.19 <sup>m</sup> 17.1 Jer 51.12-13 <sup>n</sup> 17.2 Ais 23.17; Jer 51.7; UGO 14.8

<sup>o</sup> 17.3 UGO 13.1 <sup>p</sup> 17.4 Jer 51.7; UGO 18.16 <sup>q</sup> 17.6 UGO 18.24; 19.2

tung pousis, teeit ka tagorong mana pe tang Iesu. Inngo ku lutara, kare siringuaio, ae maene ke guatono paar.

<sup>7</sup>Song ke dangatar anggelou totoguo pare, “Ae maene ko lutara, kare siria, ke guata peono pare?” Inngo gine ru hire uakalahara tar tengkana tar kuah, kare tar inete ger roke gere tabila teilion, gero mouit ro lun, kare no hangaul ro seir. <sup>8</sup>A inete ger roke geko bangaia ke tua sikoro bak, kare mat kout, inggon e turung taute tur tapokis tar tung ger i lolono tun, song ra la mamantouin. Doho tamata uakapa tun tar uanene i kot ge ahik pah ka bolo uahiualaisir hangas toro bolobolong tar nitua, binaka ke uakekene pemer uanene i kot, ra turung lutara geta banga tar inetonener roke gete tua tapokis, kare la tapokisime.

<sup>9</sup>Doha anggelou ke kula pare, “A puhene e malara me niate, kare me ninamana uaia tun. O mouit ro lun ter mouitir ponponin toro uan uleik gere moko tena nikaueker kuahon. O mouit ro luna rasin ka uamisiana to ponolain tasir mouitir toia. <sup>10</sup>A tang tolina tasisina ka hiliu uoum, a tang sioko pukene re uangoul, doha tang sioko halana te lame. Bo gete pokoso pukuon inggon e me uangoul puk tar sisikinalikir binak. <sup>11</sup>A inete ger roke geke mata sioun, kare tua tapokis, inggono tere uatual tasir toia gesir mouit, kara turung mamantouo uakap tunin. <sup>12</sup>O hangaul ro seir geko bangasia tesir hangaulur toia halana haraha ta heiris tar nitampopokoho tar kalekinale. Bo gisina puk menia tar inete ger roke ra turung heir pukis me sisikinalikir binaka tar kalekinale. <sup>13</sup>Gininar lun a siokono res ninaman, temaeit gisina ka siokor heir uain tar nikauek, kara nitampopokoho tar inete ger roke. <sup>14</sup>Gisina ra turung uelkoi keip tar Tunar Sipsip, bo a Tunar Sipsip puk e turung touahiua tasisina uakap, teeit inggono nas Tamata Nomanar Tamata Noman, kare nas Toiar Toia uakapa tun. Inggono ka uelkepana keip tas gesir nikil, kare gesir nikedang, kare geke tagorong mana dede tatanon.”

<sup>15</sup>Song ke hire polukur anggelou totoguo pare, “O kodomo geko bangagia gere tabila teilir uraur, ginina tesir mamang tamatalik a mamang matinalik o mamang pang uanilik, kara mamang uelhirelik. <sup>16</sup>Doha inete ger roke geko banga ponoia menia toro hangaul ro seir e turung tokouasais tar uraur, ra turung liur liu tena mamang inetelikion, kara uapalapalain, kara ein uelhir tar singsinginon, song ra ualuh uakapa tatanono toro hue. <sup>17</sup>God ke guat tasisinar toia, maeit ke sioko puk res ninaman, kara heir teres nitampopokohong uoum keip tar inete ger roke e la uatuka tar binaka geta siokor tagorong manain, no uelhire God. <sup>18</sup>A kuaha geko bangaia inggono ter uan uleik ger popokohontiehe tun, ke uoum keip tasir toia uakapa tun tar uanene i kot.”

### I Babilon ke la uahiu

**18** <sup>1</sup>I muduhia tar inetenine ku banga baka uoumugio, Inngo ku banga poluk tar tang giameher anggelou e hiua turuha i Heuen.

<sup>r</sup> 17.7 UGO 13.1   <sup>s</sup> 17.8 Dan 12.1; UGO 11.7; 13.7   <sup>t</sup> 17.12 Dan 7.7,24   <sup>u</sup> 17.16 UGO 18.8

Inggon a uelpipihintiehe tun, doha balbalana na nitampopokohono ke uamarmarein tun tar uanene i kot. <sup>2</sup>Inggonor anggelou ke kula ualeikintiehe tun pare, “Ke la uahiu, ke la uahiu i Babilon ger i ranantiehe tun. Nas umar liouana bohoboh, kare nas uanir liouana uasa, kare na uanir mamang niguata uasalik, kare nas uanir tetiaua uasa. <sup>3</sup>Inggono ke uainum uapopouluana tasir tamata uakapa tunane i koto tar bino gere moko teilir uelmahingin tonu urauron. O toia uakapa tunane i kot ka siokor ura keip tatanon. Doh gisis ra uoto bulau, kara uabulaua tenas mamang inetelik ka tang manintiehengua, teeit tonu urauron.”

<sup>4</sup>Song ku longoro polukuo tar giameher uau e louara tur polukuha i Heuen pare, “Tauete liu nogo tamat, hiliu tatanon gete kale tagusium tar niguata uasanitir enon, kara uelmahingininer sa gera heirig tatanon. <sup>5</sup>Ge na niguata uasa peono ke ueluelpone ke la tuk i rana tar langit. God ahik pahe matotong malabobour tar niguata uasanitir enon. <sup>6</sup>E uabang manate tapokisimpe tatanono tar haua ke heirigion. Inggon e kale uatorikingua tar uabang manate e lain tena niguat. Houara uapopokohontiehe uapoul poluk tena inumon a hahauana tang geke uainumiono tamiuoum. <sup>7</sup>Heir tatanono me uleikintiehe tunur uelmahing, kare me uleikintieher niueldolom a hahauana ke uairanantiehe tun peion, kare uahauaha katongoin. Ge inggono pe ke kula katongoin pare, ‘Inggono u tabila tonu tabtabilar kuaha toia ahik paha kamob, ahik pahu uangoul keip tagu me niueldolom.’ <sup>8</sup>“Temaeit a niduh kara uelmahingininer santiehe tun e pokoso kompe tatanono me siokon siounur marein, a niduhunina teenine: o uelmata uleik, kara niueldolom, karo hue o turung ein uakapa tatanon. Ge God pe ger Tamata Noman inggono ter i ranantiehe tun teke kedanga tatanon a sa na niguat. O tamata uakapa tunane i kot ka ueldolomo ke luh pe i Babilon.”

<sup>9</sup>“Tar binaka ko totongung kai ro diku ke luh manasa pe i Babilon o toia uakapa tunan i kot geka ura keip tatanon, kara uahauaha keip tatanono ka uangoul peme, ka ueldolom, kara urung tatanon. <sup>10</sup>Gisina ra tur kompe me i reh, teeit gisina ra sokoro tar niduh, kara uelmahingininer re kalegion, kara kulkula kirkiring pare, ‘Kuanalik, kuanalikir uan uleik ger i ranantiehe tun i Babilon. Inggono ter uan ger uleik, kara uelpipih tun ko pidala puk tar sisikinalik, karo kapkapa hihir uakapa tun.’”

<sup>11</sup>“O tamata uakapa tunane i koto gera bulau, kara uabulaua tenas mamang inetelik ka ueldolomontiehe tun tatanon, teeit ahik manasa pe me tamata re bulaua tenas inetesin. <sup>12</sup>Gisine ra uoto uabulaua tar goul

<sup>v</sup> 18.2-3 Ais 13.21; 34.11-14; Jer 50.39; UGO 14.8    <sup>w</sup> 18.4 Ais 48.20; Jer 50.8; 51.6,45; 2Ko 6.17    <sup>x</sup> 18.5 Uak 18.20-21; Jer 51.9    <sup>y</sup> 18.6 Ker 137.8; Jer 50.15,29; 2Te 1.6  
<sup>z</sup> 18.7 Ais 47.7-9    <sup>a</sup> 18.8 UGO 17.16    <sup>b</sup> 18.9-10 Isk 26.17; 27.30-35    <sup>c</sup> 18.11 Isk 27.36  
<sup>d</sup> 18.12 Isk 27.12-13,22

a silva o palauanit ger i ranar bulauan a daemon a ineteniner abeaba gaugauil re uoto moko toro bek ger i ranar bulauana, kara gomomoniner mataiantiehe tun a tabeliah a slika, kara gomono ger kubkubar. Gisina ra uabulaua pono tar mamang mahar doukuniner mataia, bo ahik paha bureh, kara mamang inetelikininer nituh, kara nipuruh, kare no liuir elepen, doha douk ger i ranar bulauan. Gisina ra uabulaua pono tar haen a matia, kara haen a popokoh, kara palau a matmata hamas tun ra uoto tuha keipig toro um, kara palau mamadelau. <sup>13</sup> Gisina ra uabulaua pono tar mamang inetelikinine ra uoto houara ualingiaig, kara uamunghuiaig tar inete ue a niein, a bino a uaiuai ger nituha keip toro oliv a plaua, kara raes-uit, o kau, o sipsip, o hos, kara karis, kara uabulaua pono tasir tamat geka uenauis tar uiliatung.”

<sup>14</sup> “Gisinar tamatang bulau, kara uabulaua tenas mamang inetelik ra kulkula kirkiring pare, ‘A mamang inetelik uaia tun ger uanimaoto tun totomua ke hiliu manasa totomua, doh rongo tang mania, kare rongo mataia ingga ko rou, ahik pah ra matotong tupara baka polukin.’ ”

<sup>15</sup> “O tamata uakapa tun geka tang mani to tatanono ka uabulaua pe tenas inete ra tur uairehe tun tatanono ra sokoro pe tar niduh, kara uelmahinginine ra heirig tatanon. Gisina ra beil, kara ueldolomontiehe tun, <sup>16</sup> kara menmene kirkiring pare, ‘Kuanalik, kuanalik tunur uan uleik ger i ranantiehe tun e uoto kaleuatoro umatmata hamas uaia tun tar tukununa tar gomomoniner mataiantiehe tun a tabeliah, kara kubkubar, kare uaabeabain tar goul, kara palau ger i ranar bulauan, kara kuaman. <sup>17</sup> Rongo tang mania ahik pah ko lain me puhung barah.’ ”

“O tang uakapis uakapa tun toro parau, kare mais gera ueltapokise taninin, karo tamatang kalekinale, doh mais gera kale mani to toro parau ra tur uairehentiehe tun tatanon. <sup>18</sup> Gine ra banga pesina toro dikunono re luh pe, gisina ra menmene ualeik kirkiring tun pare, ‘Kaempein me uan uleik misiana sira tar uan uleikonener i ranantiehe tun?’ <sup>19</sup> Gisina ka uelkuhis tar taun, ra beil pe, kara ueldolomontiehe tun, kara uakuakuana kirkiring pare, ‘Kuanalik! Kuanalik tunur uan uleik ger i ranantiehe tun, gisine nosio parau ka tang mani to kompe torongo tang mania. A sisikinalik tunur binak ka uakapa peia. Ahik pah ko pidala baka me puhung barah, kare taboia.’ ”

<sup>20</sup> “Inggoumeit i Heuen, kare no tamata God, karo aposoul, karo propet mung ualauah, ge God pe ke heir tar uabang manate tatanon e matoto tunin tar haua ke guatagiono tamiuoum.”

<sup>21</sup> Song ke kaler anggelou uelpipihintiehe tun toro tinana ro palakurum, kare dudur tang roon i laur, kare kula pare, “Te misiana tar

<sup>e</sup> 18.15 Isk 27.31,36    <sup>f</sup> 18.16 UGO 17.4    <sup>g</sup> 18.17 Ais 23.14; Isk 27.27-29    <sup>h</sup> 18.18 Isk 27.32  
<sup>i</sup> 18.20 Ual 32.43; Ais 44.23; Jer 51.48    <sup>j</sup> 18.21 Jer 51.63-64; Isk 26.21



uan uleikintiehe tun i Babilon ke dudur pe ahik pah ra banga kout baka polukin. <sup>22</sup> <sup>k</sup>Babilon ahik baka poluk pah ra longoro turia mo tang sar ra kere me kereker ue me kalkalinginar pagur ue me rauoto ra uig ue mo kalkalingina ro tuil. Ahik baka poluk mo tang puruh ue mo tang doul ue mo tang tuha tar inete ra banga uapoul tois totomua. Ahik baka poluk me kalinginar pang iah. <sup>23</sup> <sup>l</sup>Ahik baka poluk mo lam ro luh iuma totomua. Ahik baka poluk me bulout ue me kuaha ra guluh toin mosira le totomua. <sup>24</sup> <sup>m</sup>I Babilon ke kale tar uleikintieher tunur niduh, kara uleikintieher uelmahing, teeit inggono ka tupara toigir deuatingisir propet, kara deuatingis no tamata God, kara deuatingisir tamata uakapa tun geka tung pous toisane i kot.”

### O tamata uakapa tun i Heuen ka uataakai tang God

**19** <sup>1</sup>I muduhia tar inetenine ku banga baka uoumugio, inggo ku longoro sira tunumpe paho manai ra uatuatapuak ualeik i Heuen. Gisina ra kulkula ualeik tun pare, “Uataakai tang God! O udeil, a uinator, a nitampopokoh a nanar God ger nagigeig. <sup>2</sup> <sup>n</sup>A man, kara kodkodoho tun na nikedang. Inggono ke mamantouo tar uan ger uleikintiehe tun, teeit ke uoum keip uasa peono tasir tamata tar uanene i kot tono uraur. Inggono God ke heir tar niduh, kara uelmahing a uleikintiehe tun tatanon, teeit ke tung pous peono tosno tamatang kalekinaleon.” <sup>3</sup>Doh gisisir manai ka siokor kula ualeik poluk pare, “Uataakai tang God! O diku nar uan uleik i Babilon ko la kai i ran, karo la dedengua tar mamang binakalik.”

<sup>4</sup>Doh gisisir torikir hangaul, kara tang toueitir mamahoholik, kara toueitir inete gesir tua ka siokor hatup uahiuangua, kara lotu tang God gere tabila tono tabtabilar toia. Gisina ka kula pare, “O Man! Uataakai tang God.”

<sup>5</sup>Song ke mene turur uau tono tabtabilar toia pare, “Uataakai tar God ger nagigeig, inggoumene rung kalekinale tatanon! Uataakai tar God ger nagigeig, inggoumene rung ueltada tatanon, inggoum uakapa tun o tamata uleik, karo tatamatalik ueltebeir.”

<sup>6</sup>Song ku longoro polukuo tar uau a burehentiehe tun misiana geto puaha ro butuan ue ngohina gete pilar pil, gininar uau ke mene uleikintiehe tun pare, “Uataakai tang God! God ge nag i Tamata Nomaneig ger i ranantiehe tun ke tur uakalahara ter toia! <sup>7</sup> <sup>p</sup>Inggeig uakapa tun i siokor uaniong uaha tun, kari uataakai tatanon. Ge no le per Tunar Sipsip ko uahuhut manasain. <sup>8</sup>Doh na kuahaono ke kaleuatoro tanik manasa ponoin, no hikhikuon o gaugaul, karo abeabantiehe tun,

<sup>k</sup> 18.22 Ais 24.8; Isk 26.13 <sup>l</sup> 18.23 Jer 7.34; 16.9; 25.10 <sup>m</sup> 18.24 Jer 51.49; UGO 17.6  
<sup>n</sup> 19.2 Ual 32.43; UGO 6.10 <sup>o</sup> 19.6 UGO 14.2 <sup>p</sup> 19.7-8 Ais 61.10; UGO 21.2

teetit roono ka tuha keipin tar mamang niguata uaialikininer uia ger nas no tamata God gesir dedeil.”

<sup>9</sup>“Song ke kular anggelou totoguo, “Bolo pare, a niuah e la tas mais geka kilais tar me ein tar niein toro le tar Tunar Sipsip!” Song ke hireono totoguo pare, “Gininanine ko bolo uahiuagia tena ueluelhire God ger mana tun.”

<sup>10</sup>“Gine ke hire peonor anggelou totoguo tar puhonene, inggo ku hatup uahiu, karu lotu puk manasa tatanon. Bo inggono puk ke kula tane totoguo pare, “Ahik paho guata paar! Inggo na tamatang kalekinaleon misiana totomua menia toso uanotoumua geka tagorong mana tono uelhire Iesu. Lotu tang God! Ge no uelhire pe Iesu te misiana puk tar Iabene Dedeil gere uangoul teil tasir propet.”

### A tang ualo e tabila teil tar hos a gauil

<sup>11</sup>“Inggo ku bang i Heuen ke takapuk, karu banganguao tar hos a gauil, doh gine re ualo teil ra kilain tang, “Uauaman, kara kila ponoin tang O man.” Inggon a kodkodoh, kara uelmatout uaia tun na nikedang, kare tar guata tar uiliatung. <sup>12</sup>“Inggono tar matan misiana ro luhluhuna ro hue, kara bureher keuar e moko toro lunon. Doha hangene ka boloin tatanon ahik me tang sioko re ate, inggono manasampe me pahene re ate. <sup>13</sup>“Inggon e hiku teil toro hikhiku o baraha uatuk i kot o niuah tar deuating, doh inggono tar hangan ra kilain, “No Uelhire God.”

<sup>14</sup>Doho uiluiatung gera uangoul i Heuen ra ualo uakeluk teil tatanon. Gisina ra ualo teil tasir gauil uakapar hos, kara siokor hiku teil tar hikhiku e baraha uatuk i kot a gaugaulintiehe tun, kara delauana uaia tun. <sup>15</sup>“Doh tatanonene re ualo uoum teil o baenat ko tauete tur tar uauanon o man uaia tun, roono tera tokout bubura keipin tasir tamata uakapa tunane i kot. Inggon e kaueke keip tasisina tar puhung bel, kare turung pous tauete liu tena bino God ger i ranantiehe tun gere moko tar pousung bino, ge ginina pe tere moko teil tun na nimaliana God. <sup>16</sup>“Doh inggonene re ualo uoum teil tasisin, no hikhikuono gero baraha uatuk i kot, kara puhung kekenono ger puhung uleik ka bolois pare, “Nas Toiar toia, kare nas Tamata Nomanar tamata noman.”

<sup>17</sup>“Karu banganguao tar anggelou e tur tar pisar, kare kula ualeikintiehe tun tasir tetiaua uakapa tun gera luluh teil i rana tar hagarana pare, “Lame! Siokor la totomeane toro niein uleik rone re guatain God. <sup>18</sup>Maeit rung me einioum tar singsingisir toia, karo tamata uleiking tasir tamatang uiliatung uakapa tun, karo tamatang uiliatung,

<sup>9</sup> 19.9 Mat 22.2    <sup>r</sup> 19.10 Apo 10.25-26; UGO 22.8-9    <sup>s</sup> 19.11 Ker 96.13; Ais 11.4; UGO 1.5; 6.2    <sup>t</sup> 19.12 Dan 10.6; UGO 1.14; 2.17    <sup>u</sup> 19.13 Ais 63.1-3; Jon 1.1,14    <sup>v</sup> 19.15 Ker 2.9; UGO 1.16; 14.20    <sup>w</sup> 19.16 UGO 17.14    <sup>x</sup> 19.17 Isk 39.17-20

kara singsingsisir hos menia tasir tamata gera ualo teil, kara singsingsisir tamata uleik uakapa tun, karo tatamatalik ueltebeir.”

<sup>19</sup>Song ku banga polukuo tar inete ger roke, doho toia uakapa tunane tar kot menia tosnosio tamatang uiliatung. Gisina ka siokor la toto uiliodout uakapa tun tar uelkoi keip tang gere ualo teil tar hos menia toсно tamatang uiliatung. <sup>20</sup>Bo a inete pukuonener roke ka kusein, kara uih tanein, doha propet pono ger bohoboh gere uoto ualasira tasir manai tar nitou ger nanon. Doha inetenine ke touogion, ginina teke bohboho teres ninamanasit ka bubunis tena bubunur inete ger roke, kara lotu tono kaesaon. Doh inggonor inete ger roke, kara propeit ka baka tutualais toro luhluhuna ro hue geka bakalaigir taununar salpa. <sup>21</sup>Doho bureheisisina teka tung pou keipis toro baenat gero tauete tur tar uauanene re ualo teil tar hos. O tetiaua uakapa tun ka ueluelkaruse ra ein pe tar singsingsisin e tuka ka ein uakapa pe.

#### Satan ka karabusin toro taosein ro krismas

**20** <sup>1</sup>zSong ku banga polukuo tar angelou e hiua turuha i Heuen e kale teil tar ki nar tung ger i lolono menia tar tiein a popokohontiehe tun. <sup>2</sup>aInggonor angelou ke kusa tane tar soi ger pipigogolik a tang sa a hangana tang Satan. <sup>3</sup>A angelou ke uih tane tatanono tar tiein ger popokohontiehe tun e tuka geto karuh mo taosein ro krismas. Inggonor angelou ke bakanguako tatanonor soi tar tung ger i lolonontiehe tun, kare holor tane uanono tun, kare tita tane uapopokoho tun toro pirik, maeit ahikono pahe uelour baka poluk tasir tamat e tuka geto karuh baka ro taosein ro krismas, song ra uatauete bakaiono me sikinar binak.

<sup>4</sup>bSong ku bango tenas tabtabilar toia ra tabila teilis mais geka heiris tar uoum keip tar kedanga tasir tamatasiner sa. Inggo ku banga tasisina te geka tokout liuigir lus, teeit ka tagorong mana pe, kara uakeluk tena ualatut Iesu Kristo, kare tono uelhire God. Gisin ahik pah ka lotu tagu tar inete ger roke ue tono kaesaon, doh ahik pono pah ka bubun taguis tena bubunono tar pores ue tar limas. Gisina ra turung tua tapokis, kara uoum keip tokaha mes Iesu Kristo e matoto mo taosein ro krismas. <sup>5</sup>Inggonene ter uakikilanganar nitua tapokis. (O gisiamer mat halana ta tua tapokis i muduhia e tuka geto karuh baka mo taosein ro krismas.) <sup>6</sup>cA niuah, kara niguata uai e la tas mais geka kale tar uakikilanganar nitua tapokisonene. O uatorikina ro mat ahik paho matot o kale uahiua tasisin. Gisina no turung patere God me Iesu Kristo, kara uoum keip tokaha mes Iesu Kristo e matoto mo taosein ro krismas.

<sup>y</sup> 19.20 UGO 13.12-17; 20.10 <sup>z</sup> 20.1 UGO 9.1 <sup>a</sup> 20.2 Uak 3.1; UGO 12.9

<sup>b</sup> 20.4 Dan 7.9,22,27; 1Ko 6.2; UGO 13.17 <sup>c</sup> 20.6 UGO 1.6

### O binop ka guatain tang Satan menia toсно tamat

<sup>7</sup>Tar binaka ro karuh ro taosein ro krismas, Satan ra turung uatauetein tar karabus. <sup>8</sup><sup>d</sup>Inggon e turung la tauet, kare uelour tasir tamata uakap, toro toueit ro mahar tar pang uanene i kot. O tamata gera kilais o Gog menia tasir Magog gisina teka uelkeipana mes Satan tar uelkoi. Gisina ka burehentiehe tunungua misiana tar ion. <sup>9</sup><sup>e</sup>Gisina ra turung uoun toro mamang buturulikane i kot, kara tur uloho tar butur ra pepe no tamata God, gesir dedeil, inggono ter uan ger uleik gere malauelhirintiehe tunin God. Bo o hue puk ko hiua turuha i Heuen, karo me ein uakapa tasisin.

<sup>10</sup><sup>f</sup>Doh gitir tang sa geke uelour tasisin ka bakalain i uantinanina ro luhluhuna ro huenar salpa ter buturuono re uangoulur inete ger roke menia tena propet ger bohoboh, kaura kale uelmahing tar marein, kara boung, e la dedengua tar mamang binakalik.

### Mais ka mat, doh ahik pah ka tagorong mana ka kale tar uleikir uelmahing

<sup>11</sup>Song ku banga polukuo tonо tabtabilar toia o gaugauil, God e tabila tang roon. A kot doha langit, kura ualo liu tur i uoum tatanon ahikingua menas butur. <sup>12</sup><sup>g</sup>Inngo ku banga tas geka mat o tamata uleik, doho tatamatalik, gisina ra tur i uoum tonо tabtabila God, kara ualaigir bolobol, song ka ualain ro uagiamehene ro bolobol, roono terо bolobolong tar nitua. Gisisir mat ka heir kahakahais tar uabang manate e lampein tar haua ke guatain, ka bolo uahiua pein toro bolobol. <sup>13</sup><sup>h</sup>A laur ke siokor heir tasir mat gera pepe i laur, doh gisisir mat menia tenas uanir mat ka siokor heir tasir mat gera pepe tar buturunin. Song ka heir kahakaha uakapa tunisisin tar uabang manate e lampein tar haua ke guatain. <sup>14</sup>Song ka bakalaisir mat menia toro butur gera pepeisisin i uantinanina toro ngangauana ro hue uleik. Roono ro hue uleik ter uatorikin ra mata uagiamehe per tamat. <sup>15</sup>Ge me tang siok ahik pah ka bolo uahiuanir hangana toro bolobolong tar nitua, inggono ra bakalain i uantinanina toro ngangouana ro hue uleik.

### A timuhur Jerusalem

**21** <sup>1</sup><sup>i</sup>Song ku banga polukuo tar timuhur Heuen, doha timuhur pang uanene i kot. A uakikilanganar Heuen, doha uakikilanganar pang uanene i kot ke rou, gine daan ahik baka poluk me puhung butuan. <sup>2</sup><sup>j</sup>Inngo ku banga tar uan uleik ger dedeil, inggono ter timuhur Jerusalem

<sup>d</sup> 20.8 Isk 38.2,9,15-16    <sup>e</sup> 20.9 2To 1.10    <sup>f</sup> 20.10 Ker 11.6; UGO 19.20; 21.8

<sup>g</sup> 20.12 Dan 7.9-10; Mat 25.31-46; Apo 17.31; 2Ko 5.10; UGO 13.8    <sup>h</sup> 20.13 Roum 2.6; 1Pi 1.17; UGO 2.23; 22.12    <sup>i</sup> 21.1 Ais 65.17; 2Pi 3.13    <sup>j</sup> 21.2 Ais 52.1; 61.10; Hib 11.16; 12.22; UGO 3.12

e hiua turuha i Heuen tang God ka uinatoro uamatmata hamas tunin misiana tar kuaha gera lang liuin tena bulout.

<sup>3</sup> <sup>k</sup>Doh inggo ku longoro tar uau e kula ualeik tur tono tabtabilar toia pare, “Daan na uma God e uangoul keip tasir tamat, doh God e uangoul keip tasisin. Doh gisin o turung nanonongua, inggono katongo re turung uangoul keip tasisin, kare gisina nas turung God tatanon. <sup>4</sup> <sup>l</sup>Inggon e turung kale liu teres niueldolomosin, kare tunaha liu uakapa tun tar bulbulunar matasisin. Ahik baka poluk me mat ue me niueldolom ue me kiring ue me uelmahing, ge a niuangoulung sioun pe ger sa ke rouo uakap.”

<sup>5</sup> <sup>m</sup>Inggonene re tabila tono tabtabilar toia ke kula pare, “Inggo u uatimuh uakapa tun tar mamang inetelik,” Song ke kulono totoguo pare, “Bolo uahua tar puhunin, ge a uelhire penin ra ate tunig a man.”

<sup>6</sup> <sup>n</sup>Inggono ke hire totoguo pare, “Ginina ka guatguata hihir uakapa manasaig. Inggo ter Uakekenen, kare ter Uadouhin. Inggo u turung heirheir puk me kodomo tar kodomong tar nitua tang mai re kamadak. <sup>7</sup> <sup>o</sup>Mai geke touahua tar tang sa inggono tere turung kale taninin, doh inggono na God totoguo, kara turung tugouongua tatanon. <sup>8</sup> <sup>p</sup>Bo gisisir tamata uasa ra turung kale uelmahing i uantinanina toro ngangauana ro hue uleik tera mata uagiamehe poluk per tamat! Te gisis tunumpesina re uoto punga kout res nitagorong mana ra sokoro pe geta kale uelmahing tar hangana Iesu, kare gisis ahik pah ra tagorong mana tagu tang Iesu, kare gisis ahik pah ra uakeluk tagu tar lotu tang Iesu, kare gisis ra tung pous ueltebeir puk tasir tamat, kare gisis ra ura ueltebeir puk teil, kare gisisir tang bilih, kara kila tasir liouana uasa tar uatampopokoho tenas inetesin, kare gisis ra uelour tasir tamata ra touo pe tar ineteniner boh, kare gisisir bohoboho uakapa tun.”

<sup>9</sup> <sup>q</sup>A tang sioko tasir mouitir anggelou e kale teil tar uamouitinar nouh a uoun tar uadouhinar uamouitinar uabang manate, inggono ke lame, kare me kula totoguo pare, “Lame maru ualasira totomua tena kuahar Tunar Sipsip.”

<sup>10</sup> <sup>r</sup>Inggono ke kila tar iabeiguo, kare keipingua tar siusan a uleik kara i ranantiehe tun, kare ualasira totoguo tar uan uleik i Jerusalem ger dedeil e hiua turuha i Heuen tang God. <sup>11</sup> <sup>s</sup>Inggonor uan uleikono ke uoun tar balbalanar nitampopokohor nang God, kara abeabantiehe tun misianar tar daemon ue misiana re abeaba per palau gera kilaig a jaspa, kara kalahara sira tun toro sisir. <sup>12</sup> <sup>t</sup>Inggonor uanon a popokohontiehe

<sup>k</sup> 21.3 NKP 26.11-12; Isk 37.27; Sek 2.10; 2Ko 6.16 <sup>l</sup> 21.4 Ais 35.10; 65.19; UGO 7.17

<sup>m</sup> 21.5 2Ko 5.17 <sup>n</sup> 21.6 Ais 55.1; Jer 2.13; Jon 7.37; UGO 1.8,17; 22.17 <sup>o</sup> 21.7 2Sa 7.14;

1OUTT 17.13; Ker 89.26-27 <sup>p</sup> 21.8 Mat 25.41; UGO 20.15; 22.15 <sup>q</sup> 21.10 Isk 40.2

<sup>r</sup> 21.11 Ais 60.1-2,19 <sup>s</sup> 21.12-13 Isk 48.30-35

tunur pampantuiun, kara i ranantiehe tun ka ur uiloho pein menia toro hangaul karo torik ro pirik, kara hangaul, kara tang torikir anggelou ra kauke tar pirikinin. Doh tar pirikinin ka bolo kahakahalaigir hangasir hangaul, karo torik ro matinang Israel. <sup>13</sup>O touono ro pirik tar paina re hara turur pisar, karo touono tar paina re hukor pisar, karo touono tar paina tar pang makos re hu pekor pisar, karo touono tar paina tar pang kais re hu pekor pisar. <sup>14</sup>A palau geka uatabilaig tar pampantuiunar uan uleikon a hangaul, kara torikir babeir re oboto pe. Doh a uatabilanin e moko teilir hangasir hangaul, kara tang torik no aposoulur Tunar Sipsip.

<sup>15</sup>'Gitir anggelou ke menmene totoguo na sineir a nituha tar goul, inggono tere param keipiono tar uan uleikono menia tar pirikinon, kare tar pampantuiunaon. <sup>16</sup>Tar toueitir paina tar uan uleikon, e uelmatout uaia tunur nitahangan tar iranana. A anggelou ke param keip tar uan uleikono tena ineteng param ger nituha tar goul, kare tupara pare, tar lih i kot tar siokor pain e kaelain tar touonor bialoko ue i ranahia, kara siokono ponompe re tahanga peon i rana pe. <sup>17</sup>Inggono ke param pono tar pampantui, kare tupara pare, inggon a 216ir fit ue 65 mita re oboto pe. Inggonor anggelou ke param sira kompe ra uoto parama per tamata tar limas.

<sup>18</sup>"A pampantuiunar uan uleikono ka tuhain tar palau gera kilaig, a daemon, dohi koboro uakapa tun ka tuhain tar goul uakapa tun a abeabantiehe tun misiana toro sisir. <sup>19</sup>A palaua geka uatabilaig tar pampantuiunar uan uleikon a leleuara ueltebeir, kara abeaba uamatmata hamas tun. Gininar uatabil a siokor hangaul, kara torikir babeir re boto pe, a uakikilangan a palau gera kilaig a jasper, song a palau ger bubulumungntiehe tun gera kilaig a sapaia, song a tabeliaha sikor gera kilaig a aget, song a bubulumungntiehe tun gera kilaig a emiral, <sup>20</sup>song a helehele miaka gaugaul gera kilaig a sadonikis, song a miakantiehe tun gera kilaig a konilian, song a iauiauel a kalahara sira tun toro sisir, song a bubulum leleuara bukbukir ra kilaig a beril, song a iauiauele ra kilaig a topas, song a bukbukir misiana re bukir per inua, ra kilaig a krisopres, song a bubulum misianar pamboibo, ra kilaig a haiasin, song a tabeliah, ra kilaig a ametis.

<sup>21</sup>A pirik ger hangaul, karo torik ter hangaul, kara torikir kabono ger abeabantiehe tun.<sup>v</sup> Doha lelenanin ka tuha keipig tar goul uakapa tun, kara mamadelaua sira tun toro sisir.

<sup>22</sup>Inngo ahik pah ku banga mena umang lotu God ger dedeil tar uan uleikon, teeit God ger Tamata Noman, kara i ranantiehe tun mer Tunar Sipsip rasina ter umang lotu ger dedeilir nanar uan uleikon. <sup>23</sup>"Doha

<sup>1</sup> **21.15** Isk 40.3; UGO 11.1    <sup>2</sup> **21.18-21** Ais 54.11-12    <sup>3</sup> **21.21** Gere uoto mok i lolono toro tidungana ue toro bek.    <sup>4</sup> **21.23** Ais 60.19-20; UGO 22.5

uan uleikon ahik pahe malara tagu me pisar ue me bialok tar pid uamarmarein tatanon, ge a balbalanar nitampopokoho per nang God e luh uamarmarein tatanon, kara Tunar Sipsip tero laming tar uan uleikon. <sup>24</sup>xO mamang tamatalik uakapa tunane i kot ra turung la teil keip kompe tena luhur uan uleikon, doho toia uakapa tun ra turung keip pokoso tenas mamang inetelik ger matmata hamas tun.

<sup>25</sup>yA pirikinar uan uleikon ahik pahe matotong holoro tagu, ge ahik tagu pe me boung re pokoso tar uanon. <sup>26</sup>O mamang tamatalik uakapa tun tar uanene i kot, ra turung uatakai, kara ueltadantiehe tun tar uan uleikon. <sup>27</sup>zAhik me tamata uasa re matotong lek iuma tar uan uleikon. Ahik me tamata re matotong guata me ineteniner sa gera uoto matalaig ue mo boh. Bo mais geka bolo uahiuaisir hangas toro bolobolong tar nitua gero nanar Tunar Sipsip, gisina tera matotong lek iuma tar uan uleikon.

### Jon ke banga tar kodomong nitua

**22** <sup>1</sup>aSong ke ualasira polukur anggelou totoguo tar kodomong nitua ger to reihin a delauanantiehe tun a kalahara uaia tun e tading tauete tur tono tabtabilar toia gero nang God mer Tunar Sipsip. <sup>2</sup>bInggonor kodomo ke ualanguako i uantinanina tar lele ger tahangantiehe tun tar uan uleik. Doh tar toking paina tar kodomon e turur doukung tua, ginin e uoto ua tar hangaul, kara torikir mamang inualik toro sioko ro krismas, ginin e uoto mahoho tar mamang bialokolik. Doha kamanan ra uoto uelkobout keipig tasir tamata uakapa tunane i kot.

<sup>3</sup>Ahik baka poluk me niduh ue me uelmahing re moko tar uan uleikon. No tabtabilar toia gero nang God mer Tunar Sipsip tero turung toko tar uan uleikon, doh na tamatang kalekinaleon e turung lotu, kare liata tatanon. <sup>4</sup>cGisina ra turung banga tar porenon a hanganon ra turung bololain tar poresisin. <sup>5</sup>dA boung ahik baka poluk pahe pokoso tar uan uleikon ue me lam re luh baka poluk ue me pisara re pid. Ge God pe ger Tamata Noman tere turung heir tar luh tasisin. Doh gisina ra turung uoum keip dedengua tosno tamata God tar mamang binakalik.

<sup>6</sup>eSong ke kular anggelou totoguo pare, “A uelhire uakapa tununine ra tagorong manaig, ge ginina pe a mana tun. God ger Tamata Noman, geke heir tar Iabene Dedeil tasir propet, ke ualatueha tena anggelou tar me ualasira tena tamatang kalekinaleono tar huar inete ke uahuhutig tar pokos.”

\* 21.24 Ais 60.3,5    y 21.25 Ais 60.11    z 21.27 Ais 52.1; Isk 44.9; 1Ko 6.9-10

a 22.1 Isk 47.1    b 22.2 Uak 2.9; Isk 47.12; Jol 3.18; Sek 14.8    c 22.4 Mat 5.8; UGO 3.12

d 22.5 Dan 7.18,27; UGO 5.10; 20.6; 21.23,25    e 22.6 UGO 1.1

## Iesu e pokos

<sup>7f</sup>Iesu ke kula pare,

“Tur uanono dede nogo tamat, inggo ku uahutung pokos! A niguata uaia e la tang mai geke ueltad, kare uakeluk tenas uelhiner propet i lolono toro bolobolo rone.”

<sup>8g</sup>Inggo Jon teo ter tang sioko ku longor, karu banga tar inetenin. Tar binaka ku longor, karu banga taninin inggo ku baka uahuaio i uoum, matoto tar kekenar angelou, karu marang lotu tatanon, ge inggono pe teke ualasira taninina totoguo. <sup>9</sup>Bo inggono puk ke kula totoguo pare, “Ahik paho guata paar! Inggo a ualualatue ter siokono puk totomua menia toso uanotoum, karo propet, kare mais uakapa tun gera ueltada dede kara uakeluk tar uelhire toro bolobolo rone. Lotu tang God!”

<sup>10</sup>Song ke kulono totoguo pare, “Ahik paho uoho tane tar uelhireniner uouo toro bolobolo rone. Ge a binaka pe ke uahuhut manasain. <sup>11h</sup>Uahue tang mai ra guata tar niguataniner sa, ra guata dedempe: mai ra mahang matal ge ahik pah ra baka tenas niguata ger sa, ra guata dedempe. Mai ra guata tar niguataniner kodkodoh, ra guata uakodkodoho dedempe; mai ger dedeil e dedeil dedempe.”

<sup>12i</sup>Iesu ke kula poluk.

“Tur uanono dede nogo tamat, inggo ku uahutung pokos, a bulauougou gine totoguo, doh inggo u turung heir uamatoto tun tasir tamata uakapa tun e matotompein tenas niguat. <sup>13j</sup>Inggo ter Uakekenen, kare ter Uadouhin, a uakikilangan, kara surun.”

<sup>14k</sup>A niguata uaia e la tas mais geka uabusa uadelauana tenas hikhiku ger baraha uatuk i kot, maeit gisina ra turung uahuenguais toro doukung tua, kara turung leka toro pirik tar uan uleik. <sup>15</sup>Mais gera guata dedempela tar niguataniner sa, gisin ahik pah ra matotong uangoul tagu tar uan uleikonener nang God. Mais gera uelour tasir tamat, kara ualasira tar ineteniner boho tasisin, kare mais gera ura ueltebeir, kare maisir tang uelpus, kare mais ra lotu tar kaesa ue tar mahar palau, kare mais ra malauelhirintiehe tun toro boh tenas men kare tenas niguat.

<sup>16l</sup>“Inggo Iesu ku ualatueha tenagu angelou tar me heir tamiuoum tar uelhirenine tasir tamatang toro buturung lotu uakapa tun. Inggo

<sup>f</sup> 22.7 UGO 1.3   <sup>g</sup> 22.8-9 UGO 19.10   <sup>h</sup> 22.11 Dan 12.10   <sup>i</sup> 22.12 Ais 40.10; Jer 17.10; UGO 2.23   <sup>j</sup> 22.13 Ais 44.6; UGO 1.8,17; 21.6   <sup>k</sup> 22.14 Uak 2.9; 3.22   <sup>l</sup> 22.16 Aha 24.17; Ais 11.1,10; Roum 1.3; UGO 2.28; 5.5



tero tengkanana ro douk gero tiuana tur toro matina tang Debit,  
kare ter pitopitong tar lulein ger luhuntiehe tun.”

<sup>17</sup><sup>m</sup>A Iabene Dedeil, doh inggeim no tamata Iesu gere malauelhirintiehe tunis misiana tar bulout gere malauelhirintiehe tun tena kuah. King kula tang Iesu pare, “Lame!” Uahue tang mai gere longor e kula pono pare, “lame!” Mai re kamadak uahue tatanon. Doh mai re uah, uahue tatanono tere kale tar kodomong nitua ger niheir. <sup>18</sup><sup>n</sup>Inggo u kula tane uapopokoho tun tasir tamata uakapa tun gera longoro toro uelhire rone ro nasir propet pare. Mai re tumana mena puhung uelhire taninin, God e turung tumana pono tar uabang manate geko hire tauetein ro bolobolo rone e la tar tamaton. <sup>19</sup>Doh mai re kale liu me puhung uelhire i lolono toro bolobolo rone ro nasir propet God e turung kale liu tono bulon toro doukung tua, kare tar uan uleik ger dedeil gere hire tauetein ro bolobolo rone.

<sup>20</sup><sup>o</sup>Mai gere hire tauete tar uelhirenine. Inggon e kula ualeikingua pare, “Aa, inggo ku uahuhutung pokos.” O Mana tun. Lame Iesu ger Tamata Noman.

<sup>21</sup>Na hamhamas Iesu ger Tamata Noman e uangoul tagu tosno tamata God. O Mana tun.

---

<sup>m</sup> 22.17 Ais 55.1; UGO 21.6    <sup>n</sup> 22.18-19 Ual 4.2; 12.32    <sup>o</sup> 22.20 Mat 24.30-31; 1Ko 16.22